


Mata Ifenēya Nē
Od



The New Testament in the Marik Language of Papua New Guinea

Mata Ifeněya Ně Od
The New Testament in the Marik Language of Papua New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

Contents

Uylil Od	1
Matyu	2
MAK	42
LUK	66
Jon	106
APOSEL	135
ROM	173
1 KORIN	191
2 KORIN	207
GALESIA	218
EFESUS	224
FILIPAI	230
KOLOSI	234
1 TESALONIKA	238
2 TESALONIKA	242
1 TIMOTI	244
2 TIMOTI	249
TAITUS	253
FILEMON	255
HIBRU	256
JEMS	269
1 PITA	274
2 PITA	279
1 JON	282
2 JON	286
3 JON	287
JUD	288
KURŌ FESIYA OD	290
Enei Bun Ifaredif Nē Fadedya	310

Uylil Od

Preface

This book is a translation of the New Testament into the Marik language of Papua New Guinea. The population of the Marik language group is over 3,500. Most Marik speakers live in the Transgogol area of Madang province, approximately 15 miles south of Madang extending to the coast near Ogea.

Missionaries from Germany began work among the Marik people in the 1950's. The Amele and Bel languages from the coastal area around Gedaged were used as a medium for both evangelism and education. In the 1970's English became the language of education in the Marik area. Marik and Melanesian Pidgin continued to be used in the Marik churches until the time this translation work commenced.

At the invitation of the Marik people, the translation of this New Testament began in 1976 with the assistance of SIL. Thanks to the many Marik people whose efforts have gone into the production of this translation. Thanks also to the many people from around the world who have supported this work by means of financial support, prayers, and encouragement.

Above all, thanks be to God for His written word given as a means for people to come to know and believe in His Son, the living Word. Thanks to Him for faithfully sustaining and enabling each and every member of the translation team. To Him be the glory.

Uylil Od

Buk enei are Nu Testamen Papua New Guinea Marik od nem falei fiyan. Marik od wogō dedig tamo kayau are 3,500 wal fiya. Marik tamo kayau idi, Transgogol akor, Madang Distrik, Madang Provins bun difaredig, dogo neid modoū are 15 mail saut Madang, Ogea nē akor maaī sirin difaref melsā.

Biya od wogōya nigin Gemini temeleid yar 1950's bun, Marik tamo kayau atun

kabī gariya dinon. Sain anī bun, Amele od ado Bel od, are Garaged maaī sirin difaredig anidi neid od anī nem, biya od wogōya kabī ado keleī yaleya kabī yaleyen. Yar 1970's bun, Inglis od anī Marik akor bun od anim keleī yaleya nigin gariya inoyan, isi gama sain enei, Marik od ado Ninā Od anidim Marik sios bun kabī yalef isin, ile, sain Biya Od Marik od nem falei fiya kabī anī gariya inoyan.

Marik tamo kayau neid iweigya bunem, Marik Nu Testamen od falei fiya kabī anī, yar 1976 bun SIL nē isennēya bunem gariya inoyan. De fiyēya are Marik tamo kayau musei od falei fiya kabī enei nigin kabī total daledig anidi bun ilef. De fiyēya are tamo kayau kantri tunī bun temeleid kabī enei nigin dogo neid safineid, kosēya ado, wau yaleseya bunem disennadadig anidi ganan buneg ilef.

Eneidi ganan wal fiya, de fiyēya odug anī, Negur ī ada Yogon Naal kelei ken, momoi tauf nigin Mata Ifenēya nē Od anī ifanadan Ī bun ilef. Ada, Negur ī od falei fiya kabī talouf nigin ada mugu mugu toku isennada fen, mageir ifanadadig Ī anī de tafiyek bagai. Fula fiya medeīya odug Ī bun dogol gai gai ibodkalauf!

Marik Translation Team

Matyu

Jesus Wō Yen In Ibor (Luk 3:23-38)

¹ Jesus Kristus wō yen, anī nē ibor gī isin,
Ī Dawid tubu, Abraham nē ibor.

² Isak, ne tama Abraham,
Jakop, ne tama Isak,
Juda, ne tura tar geid, idi temeid Jakop,

³ Feres Sera ado, nedi temeid Juda, nedi
sineid Tamar,

Hesron, ne tama Feres,
Ram, ne tama Hesron,

⁴ Aminadab, ne tama Ram,
Nason, ne tama Aminadab,
Salmon, ne tama Nason,

⁵ Boas, ĩ yogon tama Salmon, Boas sina
Rahab, ĩ haiden kayau, Israel kayau
sã,

Obed, ĩ yogon tama Boas, yogon sina Rut,
ĩ haiden kayau, Israel kayau sã,

Jesi, ne tama Obed,

⁶ King Dawid, ne tama Jesi.

Solomon, ne tama Dawid, Solomon ne
sina ĩ, kulu kusī mudur Uria nē kayaun,

⁷ Rehoboam, ne tama Solomon,
Abiya, ne tama Rehoboam,
Asa, ne tama Abiya,

⁸ Jehosafat, ne tama Asa,
Jehoram, ne tama Jehosafat,
Usia, ne tama Jehoram,

⁹ Jotam, ne tama Usia,
Ahas, ne tama Jotam,
Hesekia, ne tama Ahas,

¹⁰ Manase, ne tama Hesekia,
Amon, ne tama Manase,

Josia ne tama, Amon,

¹¹ Jekonia in tura tar geid, nedi temeid
Josia, sain anī bun, Babilonem Is-
rael tamo kayau guri difeid dirou,
Babilon kalabus bun dilen.

¹² Babilon kalabus bun dilen sain anī
bunem,

Sieltiel, ne tama Jekonia,
Serubabel, ne tama Sieltiel,

¹³ Abiud, ne tama Serubabel,
Eliakim, ne tama Abiud,
Asor, ne tama Eliakim,

¹⁴ Sadok, ne tama Asor,
Akim, ne tama Sadok,
Eliud, ne tama Akim,

¹⁵ Eleasar, ne tama Eliud,
Matan, ne tama Eleasar,
Jakop, ne tama Matan,

¹⁶ Josef ĩ, ne tama Jakop, Josef ĩ Maria
aiwa, Maria ĩ Jesus gō fen, Jesus ĩ anī
Kristus* dedig.

¹⁷ Anī nigin, ibor Abraham bun tamal ile
Dawid, are ibor 14, Dawid bun tamal ile
Babilon kalabus dilen, are ibor 14, kalabus
bun tamal ile Kristus wō yen, are ibor 14.

Jesus Kristus Wō Yen (Luk 2:1-7)

¹⁸ Jesus wō yen anī eig fiya: In sina
Maria Josefem yalouf nigin digirkenen,
anī ere, idi uruwom fau mois diyo ken,
Awa Uur Fateul bunem Maria bou adon
anī dilen. ¹⁹ Josef, Maria ne aiwa, ĩ nun
karīya tamo, anī ĩ Maria atun meleid bun
yana sane ifenēya itor ken, yaor to wogō
yen, ĩ namen kayau anī itornēf nigin kisi
fen.

²⁰ Agef kisif mog, Negur nē engel, imīya
bun ĩ wagen wō ye fen, iron, “Josef, Dawid
naal, Maria wale fō bun on kayau ibodōf
nigin to kumī wo, ere nigin, Maria na-
men kare fef are, Awa Uur Fateul bunem.
²¹ Kayau anī kesu monog gō fouf, ō yana
ũ Jesus wouf, ere nigin, yogon tamo kayau
mosor bun temeleid kel gei fouf.”

²² Negur nē od, profet sigor bun eig ye
wogō yen anī kisi falauf nigin, enī ganan
wō yen: ²³ “Kayau taulei kesu adouf,
kesu monog gō fouf, idi yana dũ Imanuel
douf,”† anī nē gariya, “Negur ĩ ada ado.”

²⁴ Sain Josef irik yen, Negur nē engel
wogō fiyen kilei agef fen, Maria yale fō
bun irou ile, in kayau ibodon. ²⁵ Anī ere, ĩ
kayau ado bouweid bagu fiya san, ile kesu
monog matu gō fen, anī Josef kesu yana yũ
Jesus yen.

2

Gaa Iseyan Keleĩ Tamo Ki Dilen

¹ King Herod nē sain bun, Jesus Betle-
hem fonō Judia distrik bun wō yen,

* **1:16:** Grik od Kristus, are Hibru od Mesia dedig. Anī nē gariya are, kabī ifenēya nigin, Negurem ĩ bouwa bun
moul fi felen. † **1:23:** Asaia 7:14

anī bure fele di, keleī tamo gaa iseyan temeleid Jerusalem disin, ² idi to difen, “Kesu momou Juda neid king wō youf den anī, nain wō yen? Amā in barisa gaa iseyan melem mailen, ī yana malesauf nigin masin.”

³ King Herod od anī karī yen, ī wau morō fen, idi Jerusalem dibodon anī ganan geid waud morō fedin. ⁴ Agef fen, tamo kayau neid pris odudug ganan ado, lo ifelnēdiya tamo ganan iweigneīd, guru dife di, ī to fedin, “Kristus nain bagai wō youf?” ⁵ Idi aiten dalen, “Oun Betlehem fonō Judia distrik an, age foug nigin kulu profet eig ye itoton:

⁶ “ ‘Ō Betlehem, Juda teneub bun, ō Juda neid uyu irouya atun naal bagai sā, fau ō bunem tamo yana odug ado wō youf, ī anim neu tamo kayau Israel marau ibodōf.’* ”

⁷ Age de di, Herod gaa iseyan keleī tamo iminēyan iweigneīd fen, ere sain bagai barisa anī wō yen anī kelein. ⁸ Ī idi Betlehem sur feid fen, iron, “Ulagauf, kesu anī foinenem ed ge umirēgouf. Kesu anī fata gouf, kaisā bagai aya urokanag, ago ge di, ayag ele fen, yana alesauf.”

⁹ King nē od karī del fen, idi naab dale dilen, age de mog, barisa oun gaa iseyan idi dilen anī, ī ket uyu ile, kesu yenen nē modoū an bagai dē yel ifaren. ¹⁰ Barisa anī dē ye le di, dile fen, idi waud kulīya odug bagai adon. ¹¹ Fō namen disorū dilen, kesu sina Maria ado diledin, idi bobou dife fen, in yana dalesen, age de fen, nedi faa diwareīd fen, safina ege luwa eneidi difenen, are gol, aa gaula sumeī nigin tō fiyadig, moul aa bun tamal sumeī biya biya ado anī. ¹² Herod wagenem to ke de dilauf nigin, imīya bunem wedereid iroun, anī nigin, idi neid teneub bun ke douf nigin naab taka dalen.

Isip Diya Dilan

¹³ Idi dilel mog, Odug nē engel, imīya bun Josef wagen wō yen, ī iron, “Fā wo, kesu sina ado gei wo, uyag Isip uleg, an ubodōg uleg mog, aya fau arokonōf, gama

bagai Herod kesu imirek yukesiyouf nigin age fef.” ¹⁴ Anī nigin, Josef fā yen, kesu sina ado gei feid, bō turan Isip diya dilen. ¹⁵ Josef fau an ibod mog, Herod laa fen. Anī bun, Odug nē od, profet sigor bun eig ye wogō yen anī, wō ye kisi felen, “Isip bun tamal aya neu kesu aweignen.”†

¹⁶ Herod mogo kisi yalen, “Gaa iseyan keleī tamo aya didegnan,” ye fen, ī mogo fatuk bagai seye yen, keleī tamo naa nigin solo de dirokenen anī bun kisi es fe fen, Betlehem fonō kalilī fiya anī kesu monog yar uru, yar tekelei anī ganan didenkesiyouf nigin bagai ari fedi di, didenkesin. ¹⁷ Anī bun, Negur, profet Jeremaia bunem eig ye wogō yen anī, agef kisi felen:

¹⁸ “Rama fonō ait taka, inā wau gudū fiya odug karī den, Rahel inā odug gere tar nigin yalen, ī taka nem bobo fiyēf anī itoron, ere nigin, yogon kesu taka to mata ibodon.”‡

Nasaret Ke Den

¹⁹ Herod laa fe di, Odug nē engel, Josef Isip ibod mog, imīya bun ī wagen wō ye fen, ²⁰ iron, “Fā wo, kesu sina ado gei wo, Israel teneub bun ule, ere nigin, idi kesu yukesiya nigin age difen are mogo gare den.”

²¹ Age fe di, Josef fā yen, kesu sina ado gei feid, Israel teneub bun diyok dilen. ²² Anī ere, ī, Akelaus ī mogo tama Herod fotokar Judia teneub lo fef ya anī karī ye fen, ī an ileyā nigin kumī yen. Imīya bun weder iroun nigin, ī tokō fel, Galili distrik ilen. ²³ Josef ilen, taun taka Nasaret dedig an ibodon. Anī bun, profet od eig de wogō den anī kisi felen, “Ī Nasaret tamo douf.”

3

Jon Naan Igunēdiya Tamo Naab Dodok Fenen

(Mak 1:1-8; Luk 3:1-18; Jon 1:19-28)

¹ Sain anī bun, Jon naan igunēdiya tamo isin, gerere tuan Judia teneub bun biya od wogō ye fen, ² iweig iron, “Wauī falei gei, ere nigin, saa tano mogo melsak.” ³ Tamo enī nigin profet Asaia eig ye wogō yen,

* 2:6: Maika 5:2 † 2:15: Hosia 11:1 ‡ 2:18: Jeremaia 31:15

“Ait taka gerere tuan iweig iron,
‘Odug nē naab dodok gei,
in naab madur gei.’”*

⁴ Jon ne gabar are kamel siwi, ï gaar gabar nem lū diwan anim luwa gu fedig. Yogon saaf totobi nin te ado. ⁵ Tamo kayau Jon wagen guru difen, idi Jerusalem, Judia teneub ganan, Jordan naan kalilī fiya anī adok bun temeleid. ⁶ Idi neid mosor yaor difele di, Jon Jordan naan igunēdin.

⁷ Anī ere, ï naan iguneīd mog, Farisia tamo, Sadusia tamo geid musei disi di, ileid fen, ï idi irokenēdin, “Ā, gogour sane gere tar! Didi isiyouf anī wal ge fen, uyagauf nigin aim irokenein? ⁸ Wauī falei gef are, age fiya gen faat biya ū gouf. ⁹ Ā aug nigin kisi to eig ye irōf, ‘Abraham nemā tamamā.’ Aya arokeneik, meein eneidi bun Negur sā irō di, Abraham gere tar wowā douf. ¹⁰ Safor aayū gariyan mogo ibodok, aayū ganan faat biya to yuk, are itu ira ken, yā malan irāf.

¹¹ “Wauī falei gef nigin, aya naan nem naan aguneik, anī ere, taka ï aya dumeun isiyouf, ï megeir barikā aya wal fiya, ayam yogon ye su inukeis kenēya kisi feleya sā.†
Ī Awa Uur Fateul yā ado nem naan iguneīf.
¹² Ī susu fiya nē fok iman ado, ï yogon susu fiya nē mayā waī fouf, yogon wit biya are wit fō bun kuruf fen, wit ido yā mala faimud bun an irāf.”

Jon Jesus Naan Igunen
(Mak 1:9-11; Luk 3:21, 22)

¹³ Anī bure fele di, Jesus Jonem naan igunēf nigin Galili tamal Jordan naanū isin. ¹⁴ Anī ere, Jon Jesus gudū fiye ken, iron, “Onom aya naan igunaya, ere nigin aya garan usif?”

¹⁵ Jesus aiten yalen, “Arokonok nem ago. Negur nē madur bagai anī ganan kisi falauf nigin ada age tafouf, are biya.” Age ye di, Jon dōf age fen.

¹⁶ Jesus naan yale bure fel fen, kaisā bagai ï naanū tamal fā yen. Agef mog bagai, saa ilun bobog kā fele di, ï lof mog, Negur nē Awa Uur, ninā kuburir gen Jesus

muduren isi, lalan ifenen. ¹⁷ Ait taka saa ilun iweig iron, “Eī neu Kesu, ï nigin aya wau laa fedig, ï nigin aya wau kulī yedig.”

4

Satan Jesus Kisi Fiyen
(Mak 1:12, 13; Luk 4:1-13)

¹ Anī bure fele di, Awa Uur Jesus itonē di, gerere tuan ile, Satanem kisi fiyen. ² Ī kuri ibodon, naa foti bō foti bure fele di, ï naū fen. ³ Kisi fiyēya tamo Satan, ï bun wō ye fen, irokenen, “Ō Negur Naal ouf are, meein enidi urō di, bret falei fediyouf.”

⁴ Jesus Satan aiten yalen, “Negur nē Itotoya bun eig ye irok, ‘Tamo bretem dogol to mata ifenēf, sā, od ganan Negur sigor bun isif anim mata ifenēf.’”

⁵ Age fe di, Satan Jesus yale irou, fateul taun Jerusalem irou iselen, an tempel fō soko ilun bagai inenē ifaren. ⁶ Satan iron, “Ō Negur Naal ouf are, ogo ufū urā. Ere nigin, Negur nē Itotoya bun eig ye irok, “‘Negur ō nigin yogon engel ari fedi di, idi ō imedim ololon daleyōf, age dife di, ō yē meein takam to itutu ouf.’†”

⁷ Jesus Satan aiten yale iron, “Negur nē Itotoya taka buneg eig ye irok, ‘Odug ogon Negur kisi fiya bun to unenēf.’‡ ”

⁸ Baban, Satan Jesus yale irou, arei odug ilun biya isel fen, teneub enei nē tano ganan, nedi biya fiya adok ifelnen. ⁹ Satan iron, “Enidi ganan aya afonōf, ō wageun bobou wo, selu wabiyouf are.”

¹⁰ Jesus Satan irokenen, “Satan, utorna ule! Ere nigin, Negur nē Itotoya bun eig ye irok, ‘Odug ogon Negur seli wabi fen, ï dogol aruna walouf.’§ ”

¹¹ Age ye di, Satan Jesus itornē ile di, engel disi Jesus aruna dalen.

Jesus Biya Od Wogōya Gariya Inon
(Mak 1:14, 15; Luk 4:14, 15)

¹² Jesus mogo, Jon kalabus ibodon anī karī ye fen, kel Galili distrik ilen. ¹³ Jesus Nasaret taun itor ile, Kapenaum taun ibodon, Kapenaum are Galilī daliyou sirin,

* **3:3:** Asaia 40:3 † **3:11:** Juda neid tobonunā anī, sain tamo yana ado isi di, idi neid kabī tamo in ye su nē malū biru difedig. * **4:4:** Diuteronomi 8:3 † **4:6:** Sam 91:11, 12 ‡ **4:7:** Diuteronomi 6:16 § **4:10:** Diuteronomi 6:13

Sebulun Naptali ado idi neid teneub akor bun ibodon. ¹⁴Od profet Asaia eig ye wogõ yen anī kisi falauf nigin, agef wõ yen,

¹⁵“Sebulun nē teneub, Naptali nē teneub, are naab maaĩwõ ileyen, Jordan naan sitakã, Galili distrik haiden Israel sã anidi dibodok nē,

¹⁶tamo kayau gugum bun difaren, idi lalan odug dilen, tamo kayau laa teneub ado laa nē buri bun dibodon idi bun lalan iran.”*

¹⁷Sain anī bunem ilen anī, Jesus biya od wogõya gariya inon, “Wauĩ falei gei, ere nigin, saa tano mogo melsak.”

Jesus In Dõ Fiya Tar Uyulil Iweignēdin
(Mak 1:16-20; Luk 5:1-11)

¹⁸Jesus Galili daliyou yeri iyok isil fen, mala iran uru tura ado iledin, Simon yana taka Pita, yogon tura Endru ado. Idi maaĩ daliyoun kakãg diran, ere nigin, idi gau yaleyta tamo. ¹⁹Jesus iron, “Usig, aya dõ wiyag len, aya ã tamo gei fiya tamo aneneif.” ²⁰Kaisã bagai, idi neid kakãg folõ difel fen, Jesus dõ difen.

²¹Anenem iyok ile fen, Jesus baban mala iran uru tura ado iledin, Jems Sebedi ne naal, yogon tura Jon ado. Idi waag bun nedid temeid Sebedi geid kakãg madur difedif dibodon. Jesus disiyouf nigin iweignēdin. ²²Kaisã bagai, temeid waag ado ditor ken, Jesus dõ difen.

Jesus Dagi Adodo El Fedin
(Luk 6:17-19)

²³Jesus Galili distrik akor anī adok iyo ken, Juda neid uub fõ bun od ifelneĩd, saa tano ne biya od anī wogõ fedin, agef fen, tamo kayau atun dagi fire fire ado ilõyabidiya adok el fedin. ²⁴Ĩ nigin od anī, Siria teneub ganan bun iyokelen, age fe di, tamo kayau idi, dagi taka taka adodo anidi ganan Jesus wagen guri difeid, disin, idi darau odug biya adodo, idi kaa sesen adodo, idi mir adodo, idi bouweid ilolaisidiya anī, Jesus el fedin. ²⁵Guru fiya odug, Galili temeleid, Dekapolis† temeleid,

Jerusalem temeleid, Judia teneub ado Jordan naan sitakã teneub akor anī ganan tamo kayau Jesus dõ difen.

5

Jesus Arein Biya Od Wogõ Yen
(Luk 6:20-23)

¹Gama tamo kayau musei guru dife di, Jesus ileid fen, arei wala bun isel ibodon. Yogon dõ fiya tar Jesus wagen disin. ²Jesus gariya ino ifelneĩd fen, iron,

³“Aib idi uur nigin maleg dibodok, gama idi el fedif, ere nigin, saa tano are idi neid.

⁴Aib idi waud gudũ fedif, gama idi el fedif, ere nigin, idi waud yo fediyouf.

⁵Aib idi molol dibodok, gama idi el fedif, ere nigin, idi teneub akor adouf.

⁶Aib idi Negur nē madur bagai nigin naũ fedif, naan ail fedif, gama idi el fedif, ere nigin, idi weit fediyouf.

⁷Aib idi waud ifenēdif, gama idi el fedif, ere nigin, idi wau ifenēya dalouf.

⁸Aib idi waud bun karētut, gama idi el fedif, ere nigin, idi Negur dilouf.

⁹Aib idi maur gudũ difedig, gama idi el fedif, ere nigin, idi Negur gere tar difediyouf.

¹⁰Aib idi Negur nē madur bagai nigin darau dalef, gama idi el fedif, ere nigin, saa tano are idi neid.

¹¹“Aib ã aya nigin tamo kayau idi kono diyeik, darau difeneik, idegēya bun od sane ganan ã bun dirarak, gama ã nigin el yeik. ¹²Wauĩ kulīg fen, sereg, ere nigin, āgenei mala solo saa tano bun odug, profet idi ket dibodoneg kulu darau age fiya bagai dalen.

Sol Lalan Ado
(Mak 9:50; Luk 14:34, 35)

¹³“Ã teneub enī nē sol, anī ere, sol in kai sa kalauf are, ere naig fe di, baban kai adouf? ĩ baban ereb kabĩ taka ifenēya kisi feleya sã, diraille di, tamo anī teten dilef, disi difouf dogol.

* **4:16:** Asaia 9:1, 2 † **4:25:** Anī nē gariya, Ten Taun.

14 “Ã teneub enĩ nẽ lalan. Taun taka uya bun ibodok anĩ inokeleya kisi feleya sã. 15 Age fiya gen, tamo kayau lam tõ de fen, beĩ kur to dinouf. Age fiya ban, idi yoki bun diseginnẽ di, anĩ lalan tamo ganan fõ anĩ bun ifenẽdif. 16 Age fiya bagai, ãgenei fula fiya tamo kayau lalan ifenẽdiyof, ago ge di, tamo kayau idi ãgenei tobonuneĩ biya anĩ dile fen, ãgenei Temeĩ saa ilun ibodok anĩ seli dabiyouf.

Lo Od Kisi Fel Age Fen

17 “Aya asin anĩ, Moses nẽ Lo, profet neid od ado alelauf nigin asin to gouf, aya anĩ yaleleya nigin to asin, anĩ kisi afalauf nigin asin. 18 Aya momoi bagai arokeneik, sain saa teneub ado iminkeleya sã mog, sifa naal bagai, pen togo fiya anĩ Lo bun taka to fitol yale iminkalauf, idi anĩ ganan dibod mog, ereb ereb ganan kisi falauf. 19 Aibem taka, ãtãfiya enĩ nẽ tekelei naal bagai anĩ to dõf fen, tamo tunĩ ã dõ difiyẽ age difouf nigin ifelnẽdiyof are, ã saa tanon yana naal bagai youf, anĩ ere, aib taka ãtãfiya eneidi dõf agef kisi fel ifelnẽdiyof, saa tanon yana odug yalouf. 20 Anĩ aya arokeneik, ãgenei madur bagai anim, Farisia tamo ado lo ifelnẽdiya tamo neid madur bagai to wal gouf are, ã saa tanon ileya nigin kisi feleya sã bagai.

Seyeya Nigin Ifelnẽya (Luk 12:58, 59)

21 “Tamo ãtãfiya kulu eig den anĩ karĩ gen, ‘Õ tamo to ukeis, taka ne tã yukesif are, es fiya bun ifarauf.’* 22 Anĩ ere, aya ã arokeneik, aibem taka tura seye ifenek are, ã es fiya bun ifarauf. Baban, aib taka tura irokenek, ‘Daku,’ ã kot bun ifarauf. Takag, aibem irok, ‘Õ neneya!’ age youf, hel nẽ yã uruwa dõya kelẽ fiyek.

23 “Anĩ nigin, õ Negur bun sesewi wou fenẽ kisi wale, alta garan safina urou ule fen, õ turã õ bun nauseir ado anĩ õ weder fokõ fouf are, 24 safina an alta garan utor yen, kel ule turã ado komo weleg fen, gama usi, Negur safina wenẽ, sesewi wouf.

25 “Aib õ kot bun irouleyõya nigin, ã uruwom naab luwe uleg fen, on kiwai tamo ado kaisã komo gouf. Sãf, ã õ es fiya tamo bun inenõf. Age fe di, es fiya tamo õ irouyõ polis imeid bun ino di, idim õ kalabus bun dirãyõf. 26 Aya momoi arokonok, õ kalabus bun kutũ yesiya sã mog, wareg ganan unolauf.

Seseirã To Inoyauf Nigin Ifelnẽya

27 “Tamo ãtãfiya eig den anĩ karĩ gen, ‘Õ seseirã to uno.’† 28 Anĩ ere, aya ã arokeneik, taka ã malam kayau lof fen, mala yũ yalef, ã mogo wau bun kayau anĩ bun seseirã inol. 29 Õ malã biyalem mosor bun inenõf are, ubodol uraile. Õ boũ adok hel bun irãya anĩ fotokar, õ boũ tunĩ taka iminkalauf, are deuf. 30 Õ imã biyalem mosor bun inenõf are, gudũ uraile. Õ boũ adok hel bun irãya anĩ fotokar, õ boũ tunĩ taka iminkalauf, are deuf.

Tamo Kayau Ado Bagu Fiya To Fara Fiyauif Nigin Ifelnẽya (Matyu 19:9; Mak 10:11, 12; Luk 16:18)

31 “Ãtãfiya eig fe yenen, ‘Aibem taka yogon aiwa iruwau fenẽ, kayau ado bagu fiya anĩ fara fiya nẽ pepa ifen ken, bagu fiya fara fouf.’‡ 32 Anĩ ere, aya ã arokeneik, aibem taka, yogon kayau ã tamo taka ado to seseirã dino mog, iruf are, ã kayau anĩ seseirã naab bun inenek. Anĩ aibem taka kayau anĩ yalef, tamo anĩ mogo seseirã inof.

Wau Kuturoleya Od Nigin Ifelnẽya

33 “Takag, tamo ãtãfiya kulu eig den anĩ karĩ gen, ‘Ã wau kuturoleya od anĩ to waleleg. ã wau kuturoleya od, Odug mala bun unogen anĩ kulatun gouf.’ 34 Anĩ ere, aya arokeneik, od megeir ifenẽya bun, saa mala bun to bagai wouf, ere nigin, saa are Negur nẽ ibodõya modoũ. 35 Oo teneub mala buneg to wouf, ere nigin, teneub are Negur ye inoya nẽ sawa. Oo Jerusalemeg mala bun to wouf, ere nigin, are King Odug in taun yana. 36 Õ muduremeg anĩ nigin megeir to unouf, ere nigin, õ ogon fatiya age fe di, lalau be karos be taka

* 5:21: Eksodas 20:13 † 5:27: Eksodas 20:14 ‡ 5:31: Diuteronomi 24:1

wōya kisi feleya sã. ³⁷ Æ nigin yo yeya are yo gouf, sã de sã gouf dogol, od enī wal fen, tobol fiya are Satan bunem isif.

Sane Solo Fiya Nigin Ifelnēya
(Luk 6:29, 30)

³⁸ “Tamo itāfiya eig den anī karī gen, ‘Mala fagā difouf, mala solo abag mala fagā wo. Waila are waila tura.’[§] ³⁹ Anī ere, aya arokeneik, tamo sane mala solo to wenē. Tamo taka ogon walā biyalē fakā fouf are, falei wel len, walā sitakāg fakā fouf. ⁴⁰ Tamo taka ogon kolos yalouf nigin kot yō fenē, malakaī ogon saket anīg utorken. ⁴¹ Tamo taka mail tekelei ileya nigin nugo yōf, malakaī uruwom mail uru ulagauf. ⁴² Aibem ereb taka nigin to yok, are wenēf. Aibem ereb taka wareg ō bun yalou fenēf, ō to dudum wiyē.

Kiwai Nigin Wau Laa Fiya
(Luk 6:27, 28, 32-36)

⁴³ “Tamo itāfiya eig den anī karī gen, ‘Ō nē tā nigin wau laaf fen, on kiwai anī kiwai wenē.’^{*} ⁴⁴ Anī ere, aya arokeneik, āgenei kiwai nigin wau laaf fen, tunī darau difeneik idi nigineg kosē gouf. ⁴⁵ Ago gouf are, ā Temeī saa ilun ibodok gere tar wowā gouf. Ī yogon gaa sur fef, tamo sane, tamo biya adok daledig, taka uyēg sur fef, tamo madur, tamo madur sã adok ifenēdidig. ⁴⁶ Idi ā nigin orodidig anidi nigin dogol wau laa fouf are, ere mala solo anī ā walogouf? Are takis yaleya tamog to age difedig de? ⁴⁷ Æ tureī tar dogol aan wiyēdigouf are, ere anī tunī wal fediya ago gef? Haiden are idig, anī to age difedig de? ⁴⁸ Anī nigin, Temeī saa ilun ibodok ĩ madur bagai gen, āg de madur bagai agog.

6

Maleg Isennēya

¹ “Æ lo welegei, āgenei tobonuneī madur anī seluma kulō difouf ge mā, anī tamo kayau meleid bun yaau to du wog. Æ ago gouf, Temeī saa ilun ibodok mala solo to ifeneif.

² “Sain ō maleg tamo usennēdiyou fenē, ō anī taur to fū fen, ait bagauf, mala yaleya tamo Juda neid uub fō bun ado naabur, tamo idi seluma kulō difouf de fen, age difedig gen. Aya momoi arokeneik, idi anī nē mala solo adok mogo dalen. ³ Anī ō maleg tamo usennēdif, on imā kilē to keleī mog, imā biya melē age fouf, ⁴ anī ō iminēyan dor walef. Ago di, on Tamā, ō iminēyan agol, ile fen, mala solo ifonōf.

Kosēya
(Luk 11:2-4)

⁵ “Sain ā kosē gouf bun, ā mala yaleya tamo age difedig gen to agog. Idi tamo dilemāf de fen, Juda neid uub fō namen ado naab kaleyan difar fen, kosēya orodidig. Aya momoi arokeneik, idi anī nē mala solo adok mogo dalen. ⁶ Sain ō kosē wou fenē, ō ogon aabē ule, sukar unol fen, Tamā Negur, ĩ iminēyan ibodok, kosē wiyē. Anī on Tamā ō iminēyan agol, ile fen, mala solo ifonōf. ⁷ Sain ā kosē gouf, haiden age difedig gen, od musei to dīg, ere nigin, idi neid kisi, nemā od musei nigin karī famāf de fen, idi od musei biya wogō dedig. ⁸ Æ, idi age difedig gen, to agog, Negur āgenei Temeī ĩ ereb ā lau gef anī mogo keleī mog, dum ĩ to wiyēgedig.

⁹ “Kosē gou fenē, ā eig wog urōgouf:

“ ‘Ō nemā Dei ō saa ilun ubodok, ō yanā fateul ibodōf,

¹⁰ ogon tano isiyouf,

ogon oroyok saa ilun age fef gen, tenebur eineg age fouf.

¹¹ Saaf naa enī nē wanamāf.

¹² Ō amā nemā mosor nigin wederē tu kalauf, are idi amā bun mosor dinof, amāg idi neid mosor nigin wederamā tu kelef gen.

¹³ Kisi famāya bun to uroulemāf,

sesen anī bun tamal amā walelnamāf.*

¹⁴ Tamo idi ā bun mosor dinoyeif, ā idi neid mosor nigin wedereī tu kalauf are, āgenei Temeī saa ilun ibodok, ĩg āgenei mosor nigin weder tu kalauf. ¹⁵ Anī ere, ā tamo idi neid mosor nigin wedereī to tu

§ 5:38: Eksodas 21:24; Levitikas 24:20; Diuteronomi 19:21 * 5:43: Levitikas 19:18 * 6:13: Itotoya tunī agef yenek: walelnamāf. Anī tano, megeir ado, fula fiya medeīya faimud ogon ibodōf. Momoi.

kalauf are, ãgenei Temeĩ, ïg ãgenei mosor nigin weder to tu kalauf.

Kuriya Nigin Ifelnēya

¹⁶ “Sain ã kuri gouf, mala yaleya tamo sēya nē neweid age difedig gen to ago gei, ago gouf, tamo anĩ dile fen kuri def douf. Aya momoi arokeneik, anĩ nē mala solo adok mogo dalen. ¹⁷ Anĩ ere, sain õ kuri wouf, fatiyā moul u ken, nawā usurūf. ¹⁸ Anĩ bunem, õ kuri bek oo sã be, tamo idi õ nigin to keleĩ youf. Ogon Tamã, Negur iminēyan ibodok, ï yogo dogol keleĩ youf, anĩ ogon Tamã õ iminēyan ereb ago wouf ile fen, mala solo ifonõf.

Safina Biya Bagai Saa Ilun

(Luk 11:34-36; 12:33, 34; 16:13)

¹⁹ “Aug nigin safina biya biya tenebur ein to kuru wog. An dedek yãf, maat te yũf, bē tamog narĩ de, bē dalouf. ²⁰ ã aug nigin safina biya biya saa ilun kuru wog. An dedek to yãf, maat te to yũf, bē tamog to narĩ de, bē dalouf. ²¹ Ogon safina biya biya ibodok nē an, ogon waũg an yenēf.

²² “Mala are bouwa nē yal. Õ malã biyauf are, ogon bouwã ganan lalan lauf. ²³ Anĩ ere, õ malã sane lauf are, ogon bouwã ganan gugum kalauf. Lalan õ ado anĩ gugum kalauf, gugum are odug bagai!

²⁴ “Aib taka ï yogon marau uru bun kabĩ to yalouf. Anĩ taka kiwai ifen ken, taka anĩ nigin wau laa fouf. Ì taka anĩ dõf fen, taka anĩ mala irim fouf. Anĩ nigin, ã uru to aruneid walougouf, Negur ado moni.

To Osig

(Luk 12:22-31)

²⁵ “Age fiya nigin, aya ã arokeneik, ã ãgenei bouweĩ mata ibodõf nigin to osig fen, ere saaf tãf, ere naan tãf gouf. ã ãgenei bouweĩ nigin to osig fen, ere gabar tafilaĩf gouf. Mata anĩ saaf wal fiya, bouwa anĩ gabar wal fiya sã de? ²⁶ Saa ilun ã ninã uledigouf, idi saaf to ditenēdig, idi saaf u de fen, kin to dinodig, anĩ ere, ãgenei Temeĩ saa ilun yogo ifoutnēdidig. ã idi anĩ wal fediya sã de? ²⁷ ã takam yogon mata nigin osi ye fen, aua tekelei tobol fiya kisi feleya de?

²⁸ “Ere nigin ã gabar nigin osi gef? Dubur aa munĩ, naig fe odugedig anĩ ulougouf. Idi kabĩ to daledig, to diwadig. ²⁹ Anĩ ere, aya ã arokeneik, kulu King Solomoneg, yogon saki gegē biya biya ifonun anim, aa munĩ eig fediya taka to wal fen. ³⁰ Anĩ ere, Negur, dubur aa munĩ gama dogol ifarauf, nile di, yã irãf anĩ, agef naki fediyouf are, ã bun idi wal fediya bagai Negur ifounneĩf, age fiya sã de, ã momoiya naal bagai ado? ³¹ Anĩ nigin, to osi wog urõgouf, ‘Ere saaf ada tãf?’ oo ‘Ere naan ada tãf?’ oo ‘Ere gabar ada tafilaĩf?’ ³² Haiden idi enĩ ganan nigin meleid dimirēdig. ãgenei Temeĩ saa ilun lau gef anĩ ganan keleĩ. ³³ Anĩ ere, Negur nē tano ado yogon madur bagai ketem umirēg, ago ge di, safina eneidig ganan ifeneĩf. ³⁴ Age fiya nigin, naa nil nē anĩ nigin to osi wog, nil nē are yogo nigin osi youf. Naa mugu mugu nē morõ are idi dogo dalouf.

7

Tunĩ Es Fediya

(Luk 6:37, 38, 41, 42)

¹ “Taka to es wiyēg, ago gouf, ãg es yeĩf. ² Anĩ nigin, tunĩ es wedigef gen, ãg agef es yeĩf. ãgenei es fiya nē naab de tekelei bun ãg agef es yeĩf.

³ “Õ ere nigin turã mala teteur lo fen, õ ogon aa masak malã bun ibodok anĩ to ulef? ⁴ Aa masak ogon malã bun ibod mog, naig fe di, turã nigin dogol urokenek, ‘Utor len, aya ogon malã teteur alelkonõf?’ ⁵ Õ mala yaleya tamo, õ ogon malã bun ketem aa masak walel kelē wol fen, dum turã bun mala teteur walelauf.

⁶ “Ereb fateul anĩ gaũ to urakenēdig. ãgenei maaĩ tuwa meli bagai pel anĩ bor to urakenēdig. ã ago gouf, yedim lalai difouf. Age de fen, falei del, ã serek de fisik diyeyĩf.

To Wouf, Umirēf, Godu Wouf

(Luk 11:9-13)

⁷ “To gouf, agef ã ifeneĩf; umirēgouf, ã gurug gouf; godugodu gouf, ã sukar kã feneĩf. ⁸ Aibem taka to fef, yalouf; aibem taka imirek, gurug fouf; aibem taka godugodu fef, sukar kã fel kenēf.

⁹ “Ā anī takam, ī naal bret nigin to fef, ī meein ifenēf de? ¹⁰ Takag, ī gau nigin to fef, ī gogour ifenēf de? ¹¹ Seseneī bagai ā, āgenei kesu safina biya biya anī ifenēdiya ā keleī bagai, age fiyauf are, Temeī saa ilun ibodok, safina biya biya aib idi to difiyek, āgenei wenēdigedig anī wal fiya, idi ifenēdiyouf! ¹² Anī nigin, ereb ereb ganan bun, ereb taka idim age diyeīf anī oroyeik anī, āg idi nigin ago gouf. Od enī Lo od ado Profet od neid kaū.

Bobog Kidō Bobog Bilalā Fiya Ado
(Luk 13:24)

¹³ “Bobog kidō bun usorug ulagauf. Ere nigin, daū fiya bun ileya nigin bobog bilalā fiya, naab odug. Tamo kayau musei naab odug anī diledig. ¹⁴ Anī ere, mata tano bun ileya nigin bobog kidō, naab naal. Anī nigin, tamo kayau teke tekeleim dogol, anī fata difedig.

Aayū Yogon Faat Ado
(Luk 6:43, 44; 13:25-27)

¹⁵ “Idegēya profet anidi lo weledigei. Idi ege sipsip siwi difoun ken, ā garan disif, anī ere, idi namedin gaū kuī sane ado. ¹⁶ Idi neid faat yūf bun, ā idi dogo anibo be biya be ulogouf. Tamo kayau idi wei biya barik bun, gira udum bun daledig de? ¹⁷ Age fiya gen, aayū biya are faat biya yūdig, aayū anibo are faat anibo yūdig. ¹⁸ Aayū biya ī, faat sane yūya kisi feleya sā, aayū anibo are faat biya imaya kisi feleya sā. ¹⁹ Aayū ganan faat biya to imaf are, ditu dale yā malan dirāf. ²⁰ Age fiya nigin, idi neid faat yūdig bunem, ā idi nigin yaor keleī youf.

²¹ “Idi aya ‘Odug, Odug’ de fen dirokanadig, idi ganan saa tanon to dilauf. Aibem ī, neu Dei saa ilun ibodok in oroya dōf age fef anim dogol ilauf. ²² Naa anī bun, musei aya dirokanauf, ‘Odug, Odug, amā ō yanā nem profet od wogō maun, amā ō yanā nem kaa sesen maruid fen, ō yanā nem memelik musei manodin!’ ²³ Age de di, aya yaor arokenēdiyof, ‘Aya ā keleī sā. Ā sane gide gedig, uyaleleg!’

Fō Inoya Nē Keleī Tamo Neneya Tamo Ado
(Luk 6:47-49)

²⁴ “Age fiya nigin, taka ī neu od eneidi karī ye fen, dōf age fef, ī keleī tamo yogon fō meein teten inon gen. ²⁵ Sain uyē burabura isin, kuwei odug ile, solalā fel fen, yau odug fā ye fen, fō yoū fe di, to kubū yen, ere nigin, tor gariya meein teten inon. ²⁶ Anī ere, aib taka ī neu od eneidi karī ye fen, to dōf age fef, ī neneya tamo yogon fō subusir teten inon gen. ²⁷ Sain uyē burabura isin, kuwei odug ile, solalā fel fen, yau odug fā ye fen, fō yoū fe di, kubū ye narīf irailen.”

²⁸ Od ganan Jesus wogō ye idikele di, tamo kayau in od ifelnēdin anī nigin terē den, ²⁹ ere nigin, Jesus ifelnēdin are, taka ī yana adom gen age fiya od wogō fedin, idi neid lo ifelnēdiya tamo age difedig gen sā.

8

Tamo Lepra Dagi Ado
(Mak 1:40-45; Luk 5:12-16)

¹ Jesus arein tamal kutū yesi di, tamo kayau musei dō difiyen. ² Tamo lepra dagi ado isi, Jesus wagen ibor bobou fe fen, irokenen, “Odug, ō waū irom are, aya el fiyaya nigin kisi feleyam.”

³ Jesus ima iran, tamo anī kobūf fen, iron, “Aya wau irok, bouwā biyaf.” Age ye di, kaisā bagai yogon lepra dagi sa kelen.

⁴ Jesus irokenen, “Ō aib taka to urokenēf. Ō ogo pris wagen ule, bouwā ufelne ken, Moses nē od dō fen, safina sesewi wo, anī bunem ō biya lel anī, tamo kayau dilouf.”

Kusī Tamo Neid Orowa Nē Momoiya
(Luk 7:1-10)

⁵ Jesus Kapenaum taun wō ye di, Rom kusī tamo neid orowa Jesus wagen isi fen, isennēf nigin to fiyen. ⁶ Ī iron, “Odug, neu kabī tamo fō bun darau odug ado ilolaisin yenek.”

⁷ Jesus irokenen, “Aya ele, el afiyēf.”

⁸ Age ye di, kusī orowa aiten yale iron, “Odug, aya to biya nigin aya kisi afef, ō neu fō bun to usiyof. Malakaī, ō od dogol urō di, anī neu kabī tamo dagi sa kalauf. ⁹ Aya yug nigin age fiya, ayag neu odug anī farumen abodok, kusī tamo idig aya farumeun dibodok. Aya taka enī arokenek, ‘Ule’ afiyek, ī ilauf. Aya taka

arokenek, ‘Õ usi’ au di, ï isidig. Neu kabĩ tamo enĩ ago afiyek, ï agef age fedig.”

¹⁰ Od anĩ kusĩ orowa age irõ di, Jesus od anĩ karĩ ye, terẽ ye fen, tamo kayau dõ difiyen anidi irokenẽdin, “Aya ã momoi arokeneik, aya Israel bun ãgenei momoiya odug eig fiya taka to ailen. ¹¹ Aya arokeneik, musei fau gaa iseyan gaa ileyan temeledim disiyouf, idim modoũ dalel fen, saa tano nẽ tar odug bun, Abraham, Isak, Jakop geid saa tanon dibodõf. ¹² Anĩ ere, Israel tamo kayau musei Negurem idi nigin saa tano dodok fe kenẽdin anidi, fau dumeitur gugum bẽ mayarẽ irarãf, an inã odug ado firi de fen, goboreid kikokõ youf.”

¹³ Jesus age wogõ yel fen, kusĩ orowa irokenen, “Kel ule! Õ ogon momoiya kilei bagai, õ nigin dõf agef ifonõf.” Sain anĩ wogõ ye mog bagai, yogon kabĩ tamo dagi sa kelen.

*Jesus Dagi Tamo Kayau Musei El Fedin
(Mak 1:29-34; Luk 4:38-41)*

¹⁴ Jesus Pita nẽ fõ bun ilen, Pita nẽ mam bouwa uruwa odug ado fatarẽ yen mog, ilen. ¹⁵ Jesus kayau ima anĩ kobũ fe di, bouwa uruwa fara fiye kele di, kaisã bagai kayau fã yale, Jesus aruna yalen.

¹⁶ Gugum mog, tamo kayau kaa sesen adodo musei guri difeid, Jesus wagen disin. Age dife di, Jesus od nem kaa sesen iruid fen, dagi adodo ganan el fedin. ¹⁷ Jesus enĩ ganan age fen, are Negur ï, profet Asaia bunem od eig ye wogõ yen anĩ kisi falauf nigin:

“Ï yogo neda ilõyabiya yales,
neda dagi faali fen.”*

*Jesus Dõ Fiyëya Bun Kafĩ Fiya Fire Fire
(Luk 9:57-60)*

¹⁸ Sain anĩ Jesus mala iran, tamo kayau musei kalilĩ difiyẽ di, daliyou sitakã dibal dilauf nigin in dõ fiya tar irokenẽdin. ¹⁹ Age fiyeĩd mog, lo ifelnẽdiya tamo taka wagen isi fen, irokenen, “Tise, õ narib ulauf are, aya õ dõ ayõf.”

²⁰ Jesus aiten yale iron, “Gaũ kuĩ idi yenëya nẽ modoũ ku ado, ninã lalo bun

diyok idi uru ado, anĩ ere, Tamo Naal ï mudur inoya nẽ modoũ sã.”

²¹ In dõ fiya taka irokenen, “Odug, fau de, folõ wiya len, aya ele fen, neu dei mũ afel fen.”

²² Anĩ ere, Jesus ï irokenen, “Õ aya dõ wiya, laa tamo idi, laa tutur abob mumã difouf.”

Jesus Uyë Yau Ado Irokenẽdi Di, Kee Delen

(Mak 4:36-41; Luk 8:22-25)

²³ Jesus waag owor isile di, in dõ fiya tar ï geid dilen. ²⁴ Idi keleĩ sã mog, maaĩ daliyoun yau total fã yen. Agef mog, maaĩ odug fã ye, waag yũ di, waag anĩ naanũ imutkesilau fenẽ age fen. Anĩ ere, Jesus mulã yenen. ²⁵ In dõ fiya tar dilen, turĩ difiyẽ, diron, “Odug, usenamã! Amã mogo naanũ mamutatã gare mausiyou fenẽ!”

²⁶ Jesus aitedin yalen, “Ãgenei momoiya naal bagai, ere nigin ã fatuk kumĩ gef?” Age ye fen, ï fã ye, maaĩ yau ado ou fiyẽdi di, oditekei kee delen.

²⁷ Tamo idi terẽ de fen, to difen, “Tamo eĩ naig fiya bagai? Maaĩ yau ado karĩ difiye ken, dõ difef!”

*Tamo Uru Kaa Sesen Adodo El Fedin
(Mak 5:1-17; Luk 8:26-37)*

²⁸ Jesus Gadara neid teneub bun daliyou sitakã ilen, kaa sesen adodo tamo uru matmat bunem dile fen, Jesus tarabã difen. Tamo uru kuĩ bagai diledin nigin, tamo ganan naab anĩ to diyõdig. ²⁹ Anĩ idi diweig fen, diron, “Negur Naal, õ amã nigin ere naig wamãf? Õ naa wenen anĩ fau mog, gama bagai daig wamã fenẽ ein usif de?”

³⁰ Idi difaren sitakã gerõ nuwa an, bor musei saaf doko diyon. ³¹ Kaa sesen idi Jesus digonen, “Õ tamo eneidi bun tamal urumã fenëf are, amã bor musei namedin sur wamãf.”

³² Jesus kaa sesen irokenẽdin, “Uleleg!” Idi ulolõ deis fen, diselen bor namedin dilelen. Bor ganan gududu de bebeigir disil, daliyoun naanũ gare desin. ³³ Bor lo fiya tamo diya, taun disil fen, Jesus kaa sesen irudi di, bor gare den anĩ ganan wogõ den. Age de fen, idi ereb tamo uru

* 8:17: Asaia 53:4

kaa sesen adodo bun wõ yen anī nigineg wogõ den. ³⁴ Age de di, tamo kayau taun temeleid adok, Jesus ileya nigin dilen. Idi Jesus dile fen, idi neid fonõ anī itor ilauf nigin digonen.

9

Jesus Tamo Bouwa Ilolaisin Anī El Fiyen (Mak 2:1-12; Luk 5:17-26)

¹ Jesus waag taka sō ye, daliyou ibal fen, yogon taun ilen. ² Tamo tunī tamo bouwa ilolaisin gabgab bun yen mog, Jesus wagen diroulen. Idi neid momoiya Jesus ile fen, Jesus tamo bouwa ilolaisin irokenen, “Kesu, waū unois, ogon mosor alelkonok.”

³ Anī karī de fen, lo ifelnēdiya tamo tunī, idi neid kisi bun diron, “Tamo eī Negur kono fiyek!”

⁴ Idi neid kisi kelei ken, Jesus iron, “Ā ere nigin wauī bun kisi sane agef wõ yef? ⁵ Nanī anī irōya nigin karika: ‘Ogon mosor alelkonok,’ de? Oo ‘Fā, ufar uyok ule’? ⁶ Anī ere, Tamo Naal ī tenebur ein mosor yaleleya nigin yana ado anī ā keleī youf nigin...” Age ye fen, tamo bouwa ilolaisin irokenen, “Fā ufar, ogon gabgab wale urou, fonõ ule.” ⁷ Age ye di, tamo fā yale, fonõ ilen. ⁸ Tamo kayau guru difen ganan anī meledim dile fen, terē de kumī den. Negur yogo tamo yana enī ifenēdin anī nigin, idi Negur yana dalesen.

Jesus Matyu Iweignen (Mak 2:13-17; Luk 5:27-32)

⁹ Jesus an tamal iyok ile fen, mala irakelen, tamo yana Matyu takis yaleya fõ bun ibod mog, ilen. Jesus ī irokenen, “Aya dõ wiya.” Age ye di, Matyu fā yale, Jesus dõ fen.

¹⁰ Jesus Matyu nē fõ bun bõ saaf yõ mog, takis yaleya tamo, mosor ado tamo kayau musei disi fen, Jesus in dõ fiya tar geid weim saaf don. ¹¹ Farisia tamo idi anī dile fen, idi Jesus nē dõ fiya tar to difedin, “Ere nigin āgenei tise, takis yaleya tamo, mosor ado tamo kayau geid saaf doko?”

¹² Od anī Jesus karī ye fen, iron, “Idi bouweid biya bagai, dokta gein ileya nigin

to waud yenēdig, tamo dagi ado idim dogol, dokta gein ileya nigin waud yenēdig. ¹³ Uleg fen, od enī dir ge fen, kaū ere yeif anī keleī youf, ‘Aya wau ifenēya anī orouf, sesewi fiya sã.’* Anī nigin, aya tamo madur anidi iweignēdiya nigin to asin, aya mosor adodo anidi iweignēdiya nigin asin.”

Kuri Nigin Jesus To Difiyen (Mak 2:18-22; Luk 5:33-39)

¹⁴ Age ye mog, Jon naan igunēdiya tamo nē dõ fiya tar disin, Jesus to difiyen, “Naig fe di, amā Farisia tamo geid kuri mau di, ogon dõ fiya tar idi kuriya sak?”

¹⁵ Jesus aitedin yalen, “Tamo, kayau yalou fenē tar bun, ne tã tar disennek idi fau weim dibod ken, naig ī nigin waud gudū foug? Dum sain wõ ye di, an ne tã tar bun tamal yalelnēf bun anī, idi gama kuri douf.

¹⁶ “Tamo taka, gabar masak mata, gabar tubu ado baguf fen, to iwauf. Anī age foug, gabar masak matam gabar tubu dī fe di, tubu kudef, awa kanouf. ¹⁷ Takag, tamo idi wain mata anī meme gabar† tubu anī bun to ditinēf. Age difoug, meme gabar kude fele di, wain oho yalauf. Meme gabar sane lauf. Age fiya sã, idi wain mata are meme gabar mata bun ditinēf. Age fe di, uru idi kabī ifenēdiya nigin biya difarauf.”

Kayau Naal Laa Fen, Dagi Kayau Taka Ado (Mak 5:22-43; Luk 8:41-56)

¹⁸ Od enī Jesus fau wogõ ye mog, Juda neid uub fõ nē uyu irouya taka isin, Jesus wagen ibor bobou fe fen, iron, “Gama bagai neu barai laa fel. Ō uma fen, imā teten uno di, kayau naal baban kel mata ibodõf.” ¹⁹ Jesus fā yale, uruwom dile di, yogon dõ fiya tar idig dilen.

²⁰ Dile mog, kayau taka ogõ dagi faimud ado yar tuwelf iyon anī, Jesus dume dume isi fen, Jesus nē kolos iri kobū fen. ²¹ Kayau anī yogon kisi iron, “Aya de yogon kolos dogol kobū afoug, anī aya neu dagi sa kalauf.”

* 9:13: Hosia 6:6 † 9:17: Juda neid tobonunā, idi meme gabar nem darum diwadig.

²² Jesus falei yelen, kayau anī ile fen, iron, “Nau barai, waū unois, ogon moiya anim dagi sa kel konok.” Age ye mog bagai, kayau in dagi sa kelen.

²³ Jesus uyu irouya nē fō bun isour ilen, mala iran, tamo kayau musei kokū de, i de mog, iledin. ²⁴ Jesus iron, “Uyaleleg, kayau naal enī laa fiya sā, mulā yenek.” Age ye di, idi kasā difiyen. ²⁵ Tamo kayau mayarē irud laisi fen, Jesus aab namen ilen, kayau naal ima yale iron. Age fe di, kayau naal fā yen. ²⁶ Nenerī anī wogō de di, teneub anī ganan bun iyokelen.

Jesus Tamo Towo El Fedin, Uru Meleid Ifofakeleya Ado Taka Ait Ifokeleya

²⁷ Jesus modoū anī itor ken, iyok ile mog, tamo uru meleid ifofakeleya Jesus dō difiyen, diweig diron, “Dawid Naal, amā nigin waū inō!”

²⁸ Jesus fō aaben ile di, tamo uru meleid ifofakeleya wagen dilen, Jesus idi to fedin, “Ā momoi gef, aya ā meleī el afe di, lo gouf nigin kisi feleya?”

Idi aiten dalen, “Ao, Odug.”

²⁹ Age de di, Jesus imam meleid kobū feid fen, iron, “Momoi gef kilei, ā nigin age feneīf.” ³⁰ Idi neid meleid gama kelē delen. Jesus totol bagai katū feid fen, iron, “Enī nigin taka to urokenēgouf.” ³¹ Anī ere, idi kututū deis dile fen, Jesus age fen anī, teneub anī nē akor ganan bun od dinof diyon.

³² Idi Jesus ditornē dile mog, tamo taka kaa sanem ait ifokelen anī Jesus wagen dirousin. ³³ Kaa sane iru di, iyan, tamo ait ifokeleya wogō yen. Tamo kayau guru difen ganan terē de fen, diron, “Kulu nem isi gama, Israel bun eig fiya taka to tailen.”

³⁴ Anī ere, Farisia tamo idi diron, “Are kaa sane neid mudur yana bunem, ī kaa sesen irudif.”

Kabī Tamo Musei Sā

³⁵ Jesus taun ganan fonō fonō ganan bun iyo ken, nedi uub fō bun ifelneīd, saa tano nē biya od wogō feid fen, dagi gariya fire fire ganan el fedin. ³⁶ Sain Jesus mala iran, tamo kayau musei guru difen anī ileid fen, idi nigin wau yun, ere nigin, idi morō

adodo isennēdiya sā, idi sipsip marau sā age fiya gen. ³⁷ Anī yogon dō fiya tar irokenēdin, “Kabier saaf musei biya ima bure felen, anī ere, kabī tamo musei sā. ³⁸ Age fiya nigin, kusu fiya marau, Odug to wiyēg, kabī tamo susur fedi di, yogon kabier kusus fiya nigin dilauf.”

10

Jesus In Dō Fiya Tar Tuwelf Sur Fedin (Mak 3:13-19; Luk 6:12-16)

¹ Jesus in dō fiya tar tuwelf iweignēdi di, wagen guru difen, kaa sesen irudiya, dagi gariya fire fire ganan el difediyouf nigin megeir ifenēdin.

² Eī aposel tuwelf yeneid, Simon (in yana Pita dedig), yogon tura Endru, Jems Sebedi naal, ne tura Jon, ³ Filip, Batolomyu, Tomas, taka Matyu takis yaleya tamo, Jems Alfeus naal, taka Tadeus, ⁴ Simon Selot,* taka Judas Iskariot, ī anī Jesus kiwai ifenen.

Jesus In Dō Fiya Tar Tuwelf Kabī Ifenēdin

(Mak 6:7-13; Luk 9:1-6)

⁵ Idi tuwelf enidi, Jesus fadim enī ado dō difouf nigin sur fedin: “Idi ibor fire Juda ibor sā wagedin to ulagauf, Samaria neid taun taka taka buneg to uleg. ⁶ Israel atun idi sipsip fō delen anidi bun dogol ulagauf. ⁷ Sain ā ulagauf, od enī anī wogō gef uyōg, ‘Saa tano mogo melsak.’ ⁸ Dagi el wedig, gare den turī wedig, lepra dagi ado el wedig, kaa sesen urudig. Megeir anī ā na yaleya sā ege walegen, anī nigin, ege luwa wenēdigouf. ⁹ Ā gol moni, silwa moni, kapa moni be, āgenei kodolē taka to bagai ufeg. ¹⁰ Delē uyōgou fenē, delē iyōya nē faa sā, gabar uru, sendel uru, manig uru agog to guri gouf, tamo kabī dalef, idi de mala ereb lau difef anī difenēdiyadidig.

¹¹ “Narib gouf, taun be, fonō taka be bun ulegēf, ā meleī unog, tamo ā nigin sere yeīf, yogon fō bun ubodōg, dum utorōg uleg. ¹² Ā fō anī bun ulegēf, āgenei wau inosiya nē aanya wenēdigouf. ¹³ Fō anī bun tamo kayau biya diyeik, āgenei wau inosiya nē aanya an urofosisig, idi age

* **10:4:** Juda neid kusī mala taka, idi Rom gawaman ado kusī dedig.

fiya sãf, ãgenei wau inosiya nẽ aanya anĩ baban keg waleg. ¹⁴ Aib taka ã nigin to sere yeĩf, ãgenei od to karĩ youf, ãgenei yeĩ aasu tu weleg fen, fõ be taun anĩ utorõg ulagauf. ¹⁵ Aya momoi arokeneik, Sodom Gomora ado darau dalen anĩ wal fiya, es fouf naa anĩ bun, taun anĩ in darau odug bagai yalouf.

*Kafĩ Fiya Fire Fire Fau Isiyouf
(Mak 13:9-13; Luk 21:12-17)*

¹⁶ “Aya ã sur ayeik are, sipsip gaũ kuĩ atun sur fiya gen. Anĩ nigin, ã gogour age fedig gen, kisi ed ge waleg fen, ago gouf, ninã kuburir gen, imatkesiya ubodõgouf. ¹⁷ Æ tamo nigin lo walagauf, idi fau kaunsel imeid bun dineneĩ di, idi Juda neid uub fõ bun wagagã diyeĩf. ¹⁸ Idi aya nigin de fen, ã guri diyeĩ diroule, gawaman mudur, king ado wagedin difarnei ken, ã idi geid fen, haiden Israel sã anidi meleid bun, aya nigin wogõ gouf. ¹⁹ Anĩ ere, idi ã kot bun ifareya nigin gei diyeĩf, ã wauĩ to morõ ken, ere od tarõf, naig ta tarõf anĩ nigin to kisi fatuk walogouf. Sain anĩ bun, ã ereb od urõgouf nigin fau ifeneĩf. ²⁰ Are ãgem to urõgouf, ãgenei Temeĩ nẽ Awa Uur ã yogo ã bunem wogõ youf.

²¹ “Tura fã youf, tura nigin kiwai fen, idegẽ di, laa bun inenẽf, tamag naal ado age difouf, kesu fã douf, idi neid sina tama nigin kiwai dino fen, idi dogo laa bun dinenõdiyof. ²² Tamo ganan idi, aya nigin fau kiwai difeneĩf, anĩ ere, aib taka megeir ino ifar ile idikeleya bun ouf, Negur isennẽf. ²³ Teneub taka bun, ã darau odug difeneĩf are, uyu takã uyag uleg. Aya momoi arokeneik, ã fau Israel neid taun ganan bun to uyõg udikeleg mog, Tamo Naal kel isiyouf.

²⁴ “Skul kesu ã yogon tise to wal fouf, age fiya gen, ferfer ã yogon marau to wal fouf. ²⁵ Skul kesu ã yogon tise genẽf, are de. Takag, kabĩ tamo ã yogon orowa genẽf, are de. Fõ anĩ tama yana dun Belsebub,† anĩ nigin, fõ anĩ tamo ganĩ be dibodok idi yeneid sane bagai dalef!

*Negur Dogol Kumĩ Fiyẽya
(Luk 12:2-7)*

† **10:25:** Belsebub are Satan nẽ yana taka.

²⁶ “Age fiya nigin, ã idi to kumĩ wedig. Gama ereb ein dede fiya yenek, are fau lelek falauf, gama ereb iminẽyan yenek, are dum fau keleĩ youf. ²⁷ Gama ereb aya gugum bun wogõ ayeik, are fau gaa lalan bun wogõ gouf bagai; gama ereb kosesẽyam karĩ gef, dum fau fõ agaran ufareg fen, uweigig urõgouf bagai. ²⁸ Idi bouwa dukesif, anĩ ere, malakanon yuke-siya kisin sã anĩ to kumĩg. Anĩ ere, taka ã malakanon bouwa ado yũ orok fe, hel bun irãya kisi feleya anĩ dogol kumĩ gouf. ²⁹ Fisisir uru ten toea nem na nigin sur gedig. Anĩ ere, ãgenei Temeĩ yogon wau to irõ mog, taka tenebur to kubũ youf. ³⁰ Ægenei mudureĩ bun fatiyeĩg ganan iwes yalen. ³¹ Age fiya nigin, to kumĩg, ã Negur mala bun safina odug bagai, fisisir musei wal fediya.

*Kristus Nigin Kurõ Fesiya Ado Wa Fiya
(Luk 12:8, 9)*

³² “Aibem taka aya nigin tamo meleid bun kurõ falaisiyof, ayag ã nigin neu Dei saa ilun ibodok wagen kurõ afalaisiyof. ³³ Anĩ ere, aibem taka aya nigin tamo meleid bun wa fouf, ayag ã nigin neu Dei saa ilun ibodok wagen wa afouf.

*Wau Inosiya Sã, Anĩ Ere, Soworu
(Luk 12:51-53; 14:26, 27)*

³⁴ “Æ to kisi eig wog, aya tenebur ein wau inosiya irou isiya nigin asin gouf. Aya wau inosiya irou isiya nigin to asin, anĩ ere, aya soworu irou isiya nigin asin. ³⁵ Anĩ nigin, aya tubi kobõ fiya nigin asin,

“Tamo ã tama nigin kiwai inouf, ne barai yogon sina nigin kiwai inouf, yanawau ã sina yana nigin kiwai inouf.

³⁶ Tamo nẽ kiwai are, de tamo anĩ nẽ ibor bun tamalem fã de fen, kiwai difenẽf.’

³⁷ “Aibem taka ã, yogon tama sina nigin wau fatuk ifen ken, aya nigin to age fef, ã aya dõ fiya nigin to kisi falauf. Aibem taka ã, yogon naal be, ne barai be wau fatuk ifen ken, aya nigin to age fef, ã aya dõ fiya nigin to kisi falauf. ³⁸ Aibem taka ã, yogon aa tetek orowa to sef fen, aya dõ fiyaf, areg aya dõ fiya nigin to kisi falauf.

³⁹ Aib taka tenebur ein nē mata alouf ye fen imirek, yogon mata fō yalouf. Aib taka yogon mata aya nigin iraillef, yogon mata kel yalouf.

*Mala Solo
(Mak 9:41)*

⁴⁰ “Tamo aibem ā yaleyeik, are aya yaleyaf, tamo aibem aya yaleyaf, are aib ī aya sur fiyan ī yalef. ⁴¹ Aibem taka ī, ī profet nigin ye fen, profet taka yalef, ī profet mala yalouf, aibem taka ī, ī madur tamo nigin ye fen, madur tamo taka yalef, ī madur tamo nē mala yalouf. ⁴² Aibem taka, naan medir kap tekelei, tamo yeneid sā anī taka ifen yāf, ere nigin, ī neu dō fiya tamo, aya ā momoi arokeneik, ī yogon mala solo to bagai wal fiyēf.”

11

*Jesus, Jon Naan Igunēdiya Tamo Ado
(Luk 7:18-35)*

¹ Jesus yogon dō fiya tamo tuwelf tai feid bure fel fen, anenem tokō fel, Galili taun taka taka bun ifelneīd fen, biya od wogō fediyouf nigin ilen.

² Age fe di, Jon naan igunēdiya tamo kalabus bun ibod ken, Kristus kabī agef yalef de di, od anī karī yen, Jon yogon dō fiya tar Jesus to difiyēf nigin ³ sur fedī di, dīlen, to difiyen, “Tamo isiyouf den, ō ogo yeir de? Oo amā fau taka nigin tari mafouf?”

⁴ Jesus aitedin yalen, “Kekug uleg fen, ā wedereim karī gel, meleim ulegel anī Jon wogō wiyēg, ⁵ meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif. ⁶ Tamo aya nigin wau to firagagaū fef, Negur ī el fiyek.”

⁷ Jon nē dō fiya tamo ditornē dilele di, Jesus, tamo kayau guru difen anidi, Jon nigin irokenēdiya anī gariya inon, “Ā ere bagai anī ulogouf nigin, gerere tuan ulegen? Ā unin yaum walala fe di, ulogouf nigin ulegen de? ⁸ Anī sāf are, ere bagai ā ulogou fenē, ulegen? Tamo taka kolos biya bagai ifonun de? Sā, idi kolos biya

bagai difonuk age fiya are, king nē fō bun dibodok. ⁹ Ba, ere bagai anī ā ulogou fenē, ulegen? Profet taka de? Are de yeir, aya ā arokeneik, ī profet wal fediya. ¹⁰ Tamo anī, ī nigin Negur nē Itotoya bun eig ye itoton:

“ ‘Aya neu arū tamo sur afe di, ī ket uyu ilauf,

im uyulil ogon naab dodok fouf.’* ”

¹¹ Aya ā momoi arokeneik, kayau onoudi kesu dalen idi atun an, taka nem Jon naan igunēdiya tamo to wal difiyen, anī ere, aib taka saa tanon yana naal bagai ado ī Jon wal fiya. ¹² Jon naan igunēdiya tamo in sain bunem isi gama, saa tano, megeir ado bilalaū fedig, megeir ado tamom saa tano anī irou irouledig. ¹³ Profet ganan Moses nē Lo ado, saa tano nigin profet od wogō def disin, isi Jon bun daun. ¹⁴ Ā walogou fenē wauī oroīf are, ī Eliya, ī fau isif ya anī.

¹⁵ Aib ī weder adouf, karī youf.

¹⁶ “Tamo kayau sain enei bun, idi nigin ere bunem aya kisi afouf? Idi simom maket modoū bun dibod ken, abob di-weignēdidig gen:

¹⁷ “ ‘Amā ā nigin kelel maun, anī ere, ā to kui gen;

amā kanon seg malen,

anī ere, ā to wauī gudū fen.’ ”

¹⁸ Anī Jon isin, saaf to yon, wain to yon, idi dirōdig, ‘Ī kaa sane ado.’ ¹⁹ Tamo Naal isin, saaf yon, wain yon, idi dirōdig, ‘Ē saaf wan, wainei yedig, dobu irāya tamal, ī, takis yaleya tamo, mosor tamo ado geid nigal difedig.’ Anī ere, kisi biya ī in tobonunā anī bunem, biya yaoref.”

*Taun Tunī Waud Faleiya Sā Nigin
Isisnēdin
(Luk 10:13-15)*

²⁰ Jesus ī, taun tunī bun memelik musei inodin, anī ere, idi waud to falei den, anī nigin, Jesus ou fiyēdin. ²¹ “Korasin taun, ō malalon ado! Betsaida, ō malalon ado! Ā bun memelik musei anodin, age fiya gen anī Taia taun Saidon taun ado bun wō yem are, mogo kulu waud falei de fen, wau gudū fiya nē gabar difoun ken, aasur dibodom. ²² Anī ere, aya ā arokeneik, es fiya sain bun, morō Taia taun Saidon taun

* **11:10:** Malakai 3:1

ado dalouf anī wal fiya, ā walogouf. ²³ Ō Kapenaum, ō yanā anī saa ilun iselauf de? Sā bagai, ō laa neid modoū bun usilauf. Memelik ō bun wō yen anī age fiya, Sodom taun an wō yem are, ī gamag eig fe di, ibodom. ²⁴ Anī ere, aya ā arokeneik, es fiya sain bun, morō Sodom yalouf anī wal fiya, ō walouf.”

Morō Ado Aya Bun Usi, Waū Unoīs
(Luk 10:21, 22)

²⁵ Sain anī bun, Jesus iron, “Dei, saa ado teneub nē Odug, aya ō yanā alesef, ere nigin, safina eneidi, kisi biya ado keleī adodo to dilouf nigin ō unokon, ago fen, simō dibodon anidi bun yaor won. ²⁶ Ariya, Dei, enī are ogon waū filolō fiya biya bunem agon.

²⁷ “Ereb erēb ganān, neu Dei ī aya bun inon. Taka nem Naal keleī sā, Dei yogo dogol. Taka nem Dei keleī sā, Naal yogo, tunī idi Naalum Dei ifelnēdiyof nigin igirnēdif anidim dogol keleī.

²⁸ “Ā ganān morō yei ken, sii yeik, wageun usig, ago ge di, aya wau inosiya afeneīf. ²⁹ Neu sū waleg, oroweī seg fen, aya bun keleī walogouf, ere nigin, aya molol fen, aya imatkesiya. Ago gouf, meleīkanon siwo inoya gurug fouf. ³⁰ Ere nigin, neu sū karika fen, neu morō yal bagai.”

12

Jesus, Ī Sabat Naa Nē Odug
(Mak 2:23-28; Luk 6:1-5)

¹ Sain anī Juda neid Sabat naa* bun, Jesus wit kabī atu atu iyok ilen. Jesus in dō fiya tar naū feid fen, wit tunī gei fiya gariya dino fen, don. ² Farisia tamo idi anī dileid fen, idi Jesus dirokenen, “Ulef! On dō fiya tamo tar idi, itāfiya difodul ken, Sabat naa bun oug difef.”

³ Jesus aitedin yalen, “Dawid in kusī tamo anidi geid naū fedi di, Dawid age fen anī, ā Negur nē Itotoya bun to uwesegen de? ⁴ Ī Negur nē fō namen ilen, agef fen, ī in kusī tamo anidi geid, bret fateul anī don, anī idi age fiya kisi feleya sā, anī idi itāfiya difodul ken, age difen anī, prisem

sā age difoū nē anī. ⁵ Oo ā Lo od anī to be uwesegen de? Are Sabat naa bun, pris tempel namen kabī dalef bunem naa anī didodok, anī ere, anī mosor sā. ⁶ Aya ā arokeneik, tekelei ī tempel wal fiya anī, are yeir. ⁷ Ā od enī, ‘Aya wau ifenēya anī orouf, sesewi fiya sā,’† anī nē gariya keleim are, ā tamo morō sā ege mosor ado to wiyēdigem. ⁸ Ere nigin, Tamo Naal yogo dogol Sabat naa nē Odug.”

Tamo Taka Ima Sitakā Gege Fefu Fiya
(Mak 3:1-6; Luk 6:6-11)

⁹ Jesus modoū anī itor ken, iyok ile, Juda neid uub fō namen ilen, ¹⁰ tamo taka ima sitakā gege fefu fen, ī an ibodon. Idi Jesus bouwa bun od dinou fenē nigin naab dimir ken, abugā to difiyen, “Sabat naa bun tamo madur fiya anī idodōya sā de?”

¹¹ Jesus idi irokenēdin, “Ā anī taka, ā atun ī sipsip taka ado anī Sabat naa bun mekur isilauf, ā to uleg waleseg unenēgouf de? ¹² Tamo ī sipsip wal fiya bagai! Anī nigin, biya anī Sabat naa bun age tafef, are idodōya sā.”

¹³ Age ye fen, ī tamo anī irokenen, “Imā fara wol.” Age ye di, ī ima fara fele di, oditekei ima madur len, age fe di, ima sitakā gen wō yen. ¹⁴ Anī ere, Farisia tamo idi dilelel fen, Jesus yukesiya nigin katō difen.

Kabī Tamo Negurem Igirnen

¹⁵ Idi neid kisi keleī ken, Jesus modoū anī itoron. Tamo kayau musei ī dō difiyē di, ī idi neid dagi ganān el fedin, ¹⁶ tamo kayau ganān wedereid iron, ī aib yeya anī to yaor difouf nigin. ¹⁷ Enī Negur, profet Asaia bunem eig ye wogō yen anī kisi falauf nigin, agef wō yen:

¹⁸ “Eī neu kabī tamo ayam agirnen, ī nigin aya wau laa fedig, ī nigin aya wau kulī yedig;

aya neu Awa Uur ī bun anouf,
ī anī teneub ganān haiden bun Negur
nē madur bagai anī kurō fesiyof.

¹⁹ Ī to seye ye fen, ait bagam to iweig irōf; takam in ait naabur to karī youf.

²⁰ Werī felu reya ī to were fouf,

* **12:1:** Sabat naa anī, Juda neid uub nē naa. † **12:7:** Hosia 6:6

takag, lalan komomor fe mog, ï to gare falauf,
agef mog, Negur nē madur bagai anim ganan wal foug.

²¹ In yana bun, teneub ganan haiden, idi neid waud an yenēf.”†

Jesus Belsebub Ado Difiyen
(Mak 3:20-30; Luk 11:14-23)

²² Tamo taka kaa sanem irou di, mala sigor ado ifofakelen, idi anī dirousi di, Jesus ï el fiyen. Age fe di, ï mala kelē ye fen, od wogō yen. ²³ Tamo kayau adok waud bun terē de fen, diron. “Enī anī Dawid Naal de?”

²⁴ Anī ere, Farisia tamo idi karī de fen, diron, “Are kaa sane neid mudur Belsebub yana bunem dogol, tamo enī kaa sesen irudif.”

²⁵ Jesus idi neid kisi kelei ken, idi iro-kenēdin, “Tano ganan yogo kiwai ifen ken, fara foug, are sane lauf, taun ganan bun be, fō ganan bun be, idi dogo fara difoug, idi to difarauf. ²⁶ Satan ï yogo Satan iruf, ï yogo nigin faraf, yogo kiwai ifenek, naig fe fen, anī yogon tano ifarauf? ²⁷ Are aya Belsebub yana bunem kaa sesen arudif, ere bunem āgenei tamo kayau kaa sesen dirudidig? Anī nigin, idim ā es diyēif. ²⁸ Anī ere, aya Negur nē Awa Uur bunem kaa sesen arudif are, Negur nē tano mogo ā bun isil.

²⁹ “Takag, taka megeir ado nē fō bun ile, in safina bē yalou fenē, are ï tamo megeir ado anī ket ifokel fen, gama ï in safina fō bun bē yalouf.

³⁰ “Taka ï aya to fedē fiyaf, ï neu kiwai, takag, taka ï aya ado to guru mafef are, ï firagagaū fef. ³¹ Anī nigin, aya ā aro-keneik, mosor kono fiya ado ganan tamo bun wō yef, are yalelauf, anī ere, Awa Uur kono fiyek, are mosor to yalelauf. ³² Taka ï Tamo Naal nigin kiwai ifen ken, kobu yef are, in mosor yalelauf. Ani ere, taka ï Awa Uur Fateul nigin kiwai ifen ken, kobu yef are, in mosor to yalelauf, gama sain enī bun ado dumen isiyoug buneg to yalelauf.

Aa Taka Yogon Faat Ado
(Luk 6:43-45)

† 12:21: Asaia 42:1-4

³³ “Aa biya are faat biya yūdig, aa sane are faat sane yūdig, anī nigin, aa ganan faat bunem keleiyadig. ³⁴ Ā, gogour sane gere tar, naig fe di, ā sane anim ā biya nigin wogō goug? Ere b ā namein isokosef, are sigoreim kaaresi gef. ³⁵ Tamo biya, safina biya ï bun kuru fef anī irou isidig, age fe di, tamo sane, safina sane ï bun kuru fef anī irou isidig. ³⁶ Anī ere, aya ā arokeneik, tamo idi od kisi sā wogō den anī ganan, fau es fiya sain bun, idi fau dogo Negur mala bun, mugu mugu kurō difesiyoug. ³⁷ Anī nigin, ogon od bunem ō mosor sā yōf, ogon od bunem ō mosor ado yōf.”

Jona Nē Uris
(Mak 8:11, 12; Luk 11:29-32)

³⁸ Age fe di, Farisia tamo tunī, lo ifelnēdiya tamo tunī geid, idi Jesus diro-kenen, “Tise, amā ō bun memelik nē uris taka mailau fenē.”

³⁹ Jesus aitedin yalen, “Sane seseirā ibor, sain enei nē tamo kayau anī, memelik nigin to difef! Anī ere, taka to ifelneif, de profet Jona nē uris anim dogol ifelneif.

⁴⁰ Ere nigin, Jona naa towo bō towo, gau odug namen ibodon, age fiya gen, Tamo Naal naa towo bō towo, teneub akor ilon yenēf. ⁴¹ Niniwe tamo kayau fā de fen, es fiya naa bun, ibor enī, sain enei nē tamo kayau sane difiyēdiyoug, ere nigin, idi mogo Jona wogō ye di, waud falei den, gama taka Jona wal fiya are yeir. ⁴² Kuin Saut tamal fā ye fen, es fiya naa bun, ibor enī, sain enei nē tamo kayau sane fiyēdiyoug, ere nigin, kayau anī, King Solomon nē keleī biya karī youf nigin teneub idiyan tamal isin, gama taka King Solomon wal fiya are yeir.

Kaa Sane Kel Isiya Gen
(Luk 11:24-26)

⁴³ “Sain kaa sane tamo bun tamal ulō yeis fen, gerere tuan ile, si inoya modou imirek ile to fotou fef. ⁴⁴ Agef fen, ï irok, ‘Aya fō atoron anī bun baban kelauf.’ Sain ï kel isif, fō ani daku, waī difel fen, madur difen anī ilef. ⁴⁵ Anī nigin, ï ile fen, baban kaa sesen ï wal fiya sewen anī geif irou isif, age de fen, idi namen dile, an difaref. Age

dife di, tamo anī gai sane bagai lef, uruwa bun ne tobonunā anī wal fiya. Age fiya bagai, sain enei nē tamo kayau, ibor sane enī gama difaref, idi tobonunā anī adouf.”

Jesus Sina, Tura Tar Geid
(Mak 3:31-35; Luk 8:19-21)

⁴⁶ Sain Jesus tamo kayau wogō feid mog, in sina tura tar geid serē difar fen, ī geid od wogō douf nigin orodin. ⁴⁷ Takam ī irokenen, “Ogon sinā turā tar geid serē difaref, idi ō geid od wogō dou fenē orodif.”

⁴⁸ Jesus aiten yalen, “Ai anī neu naai, ai anī neu turau tar?” ⁴⁹ In dō fiya tar bun imam ifelneīd fen, ī iron, “Enidi anī neu naai, neu turau tar. ⁵⁰ Taka ī, neu Dei saa ilun ibodok anī nē oroya dōf age fef anī ī, neu turau, neu mainou, neu naai.”

13

Faat Irarāya Tamo Nē Yaab Od
(Mak 4:1-12; Luk 8:4-10)

¹ Naa de anī bun, Jesus aaben tamal kutū yeis ile, daliyou sirin ibodon. ² Guru fiya odug kalilī difiyē di, tamo kayau adok ubun difar mog, ī waag namen isil ibodon. ³ Agef fen, ereb ereb musei yaab od nem irokeneīd fen, iron, “Kabī marau taka, faat irarāf nigin ilen. ⁴ Sain ī irarak ile mog, tunī naab luwen kuku ren, are ninā disi dakasin. ⁵ Tunī meein tuar kuku ren, an teneub badagar. Are kaisā bagai fokū den, ere nigin, teneub are badagar bagai. ⁶ Anī ere, sain gaa ise di, bali are ilala di, laasi yedin, ere nigin, idi warumutei sā. ⁷ Faat tunī malū duri atun kuku ren, are malū duri anī fā ye fen, bali sile feledin. ⁸ Faat tunī teneub biya bun kuku ren, are idi biya imadin, taka biya handred, taka biya siksti, taka biya teti age fef ilauf. ⁹ Aib ī weder adouf, karī youf.”

¹⁰ In dō fiya tar ī wagen disi to difiyen, “Ere nigin ō yaab od nem tamo kayau urokenēdif?”

¹¹ Jesus aitedin yalen, “Saa tano nē waa keleī youf nigin are mogo ā ifenein, anī ere, tamo kayau to ifenēdin. ¹² Ereb taka aib ī ado are, anī wal fiya ifenēf, anī ī musei adouf. Ereb taka aib ī sā, ereb ereb

ī ado areg ī bun yalelauf. ¹³ Anī nigin, aya yaab od nem arokenēdif, ere nigin,

“Idi meledim diledig, anī ere, idi meleid fokōya sā,
idi wederedim karī dedig, anī ere, idi wedereid fokōya sā, to keleik.

¹⁴ Idi bun, Asaia nē profet od kisi felef:

“ ‘Ā wedereim karī gouf, anī ere, wedereī to fokō youf,
ā meleim ulogouf, anī ere, meleī to fokō youf.

¹⁵ Ere nigin, tamo kayau enei, idi waud katī felen,
idi wederedim karīya malai bagai, age de fen, idi meleid difofakelen, age fiya sam are, idi meledim dilem, wederedim karī dem ado, idi waud fokō ye fen,

falei de di, aya idi el afedim.’* ”

¹⁶ Anī ere, āgenei meleī nigin el fedif, ere nigin, ā ulegef, āgenei wedereī nigin el fedif, ere nigin, ā karī gef. ¹⁷ Anī aya ā momoi arokeneik, profet musei, madur tamo geid, ā ulegef anī dilou fenē nigin waud yenen, anī ere, idi meledim to dilen, takag, karīya ā karī gef anī karī dou fenē nigin waud yenen, anī ere, idi wederedim to karī den.

Jesus Faat Irarāya Tamo Nē Yaab Od Faded Fen
(Mak 4:13-20; Luk 8:11-15)

¹⁸ “Yaab od bun, faat irarāya tamo nē gariya anī karīg: ¹⁹ Taka ī, saa tanon nē od karī ye fen, ī weder to fokō yef, sane taka isi, faat yogon wau bun iraran anī son fiyek. Are faat naab luwen iraran anī age fiya. ²⁰ Takag, faat meein tuar kubū yen are, tamo ī od karī ye fen, kaisā bagai ī od anī yale fen, wau bun kulī yef. ²¹ Anī ere, ī warumutei sā, anī nigin, ī sain meluk to ibodōf. Sain, biya od nigin morō be, kafī fiya be isif, ī kaisā bagai irofosisif. ²² Takag, faat taka malū duri atun kubū yen are, tamo ī od karī yef, anī ere, tenebur mata ibodōya nē sii fiya, safina ado ibodōya nē kisi fiya anidim, biya od sile fe di, anim biya to yūf. ²³ Takag, faat teneub biya bun kubū yen are, tamo ī od karī ye fen, fokō

* 13:15: Asaia 6:9, 10

yef, are ï biya yũf, taka biya handred, taka biya siksti, taka biya teti agef imauf.”

Lili Nē Yaab Od

²⁴ Jesus yaab od taka irokenēdin, “Saa tano ï, tamo taka yogon kabī bun, wit faat biya iraran gen. ²⁵ Anī ere, tamo adok mulaī den mog, yogon kiwai isin, lili wit kabier irara ken, agef yen ilen. ²⁶ Sain wit bali fokū ye fen, biya olili den, agef mog, lilig wowā den.

²⁷ “Marau nē kabī tamo, ï wagen disin diron, ‘Tamo biya, ò faat biya on kabier to uraran de? Lili anī nainenem disin?’

²⁸ “Ī aitedin yalen, ‘Kiwai takam age fen.’

“Ne kabī tamom to difiyen, ‘Amā mele anī kususu mafelauf anī ò oroyok de?’

²⁹ “Ī aitedin yalen, ‘Sā, ere nigin, lili kususu ge mā, ā wit ado kususu gouf. ³⁰ Malakaī, weim difar mog, fau kusu fiya sain bun. Sain anī bun, aya kususu fiya tamo arokenēdiyof: Lili ketem kurug fen, ufafāg, dum yakur feid isaikalau f nigin; agog fen, wit kurug, neu kin gurig uleg.’”

Masted Faat Yis Ado Nē Yaab Od (Mak 4:30-32; Luk 13:18-21)

³¹ Jesus yaab od taka irokenēdin: “Saa tano ï, masted faat tamo takam yale fen, yogon kabier itenen gen. ³² Anī ï faat ganan nigin naal bagai, anī ere, ï odugouf, ï kabier saaf ganan wal fediya aa wō youf. Age fe di, ninā ilun temeleid disi, were bun dibodōf.”

³³ Jesus baban yaab od taka irokenēdin: “Saa tano ï, yis kayau takam yale fen, flawa odug ado falei fe di, ganan gē yedig gen.”

³⁴ Jesus od enī ganan, yaab od nem tamo kayau wogō fiyēdin. Ī od ganan to kurō falaisi irokenēdin, yaab od nem dogol. ³⁵ Anī bunem, Negur profet bunem eig ye wogō yen anī, agef kisi felen:

“Aya yaab od bunem sigoroum kurō afe-siyof,

gariya bun teneub ino fen, ereb ereb inokakan anī aya yaor afouf.”†

Jesus Lili Nē Yaab Od Faded Fen

³⁶ Jesus tamo kayau itorneid fen, fō namen ilen. In dō fiya tar ï wagen disi

fen, diron, “Kabier lili nē yaab od anī, amā faded wamā.”

³⁷ Jesus aitedin yalen, “Tamo tekelei faat biya iraran, are Tamo Naal. ³⁸ Kabī are tenebur tamo kayau, faat biya anī, are Negur nē tano nē gere tar, lili are Satan nē gere tar, ³⁹ kiwaim lili iraran, are Satan. Kusu fiya are saa teneub ado idiyēf bun, kususu fiya tamo are idi engel.

⁴⁰ “Anī nigin, lili kususu feid, yā yakur feid isaikalau f, age fiya gen, saa teneub ado idiyēf bun, age fouf. ⁴¹ Tamo Naal ï, yogon engel sur fediyof, idi yogon tano bun ereb ereb ganan mosor dinodig ado, tamo kayau ganan sane age difedig gei difeid fen, dalelnēdiyof. ⁴² Idi yā mala bobo rouf bun dirarāf, an inā odug ado firi de fen, goboreid kikokō youf. ⁴³ Age fe di, madur tamo idi, gaa gen nedi Temeid nē tanon fula difouf. Aib ï weder adouf, karī youf.

Safina Biya Bagai Inokon Ado Maaī Tuwa Meli Bagai Pel Nē Yaab Od

⁴⁴ “Saa tano ï, safina biya bagai kabier inokon gen. Tamo taka fotou fe fen, baban kabier inokon. Agef fen, wau al fef ile, safina adok ï ado anī, na nigin sur fe fen, akor anī na yalen.

⁴⁵ “Takag, saa tano ï, na yaleya tamo, maaī tuwa meli bagai pel biya, na nigin imirek gen. ⁴⁶ Ī meein medeīya taka moni odug nē anī fotou fe fen, ile, safina adok ï ado anī na nigin sur fe fen, meein medeīya anī na yalen.

Kakāg Nē Yaab Od

⁴⁷ “Takag, saa tano ï, kakāg daliyou bun gau bou fire fire gei fiya nigin dirādig gen. ⁴⁸ Sain kakāg isokose di, gau yaleya tamo dī dife, ubun ise di, anī idi dibod ken, gau biya gei de, karam namen difeid fen, sesen anī are dirarailen. ⁴⁹ Age fiya bagai, saa teneub ado idikalau f bun eig fouf. Engel idi disi fen, idi madur tamo atun sesen anidi gei de dale, ⁵⁰ yā mala bobo ref bun dirarāf, an inā odug ado firi de fen, goboreid kikokō youf.”

⁵¹ Jesus to fedin, “Ā od enī ganan wedereī fokō yef de?”

† 13:35: Sam 78:2

Idi diron, “Yo, amã karĩ mauf.”

⁵² Jesus idi irokenēdin, “Anĩ nigin, lo ifelnēdiya tamo ganan saa tano nigin ifelnēdin are, idi fõ tama gen, ï safina biya nē aaben tamal safina mata tubu ado irou isidig.”

Profet Yana Sã Gen

(Mak 6:1-6; Luk 4:16-30)

⁵³ Jesus yaab od eneidi bure fel fen, anenem iyok ilen. ⁵⁴ In fõ gariyan isi fen, ï an tamo kayau dogo neid uub fõ bun ifelnēdin, age fe di, idi terē den. Idi to difen, “Tamo eĩ, kisi biya ado memelik nē totol enei, nain yalen? ⁵⁵ ï kapenta naal sã de? In sina Maria sã de? In tura tar Jems, Josef, Simon, Judas ado sã de? ⁵⁶ In main tar ganan, ada weim to tabodok de? Tamo enĩ enei ganan nain yalen?” ⁵⁷ Age de fen, idi ï kiwai difenen.

Anĩ ere, Jesus idi irokenēdin, “Profet taka ï, in fõ gariyan ado in fõ bun dogol, ï yana sã.”

⁵⁸ ï an memelik musei to inon, ere nigin, idi to momoi den.

14

Jon Naan Igunēdiya Tamo Ula Gudū Fen

(Mak 6:14-29; Luk 9:7-9)

¹ Sain anĩ bun, Galili nē uyu irouya Herod Jesus nigin od karĩ ye fen, ² in kabĩ tamo irokenēdin, “Enĩ Jon naan igunēdiya tamo, ï laa fen anĩ kel fã yen! Anĩ nigin, memelik nē totol ï bun kabĩ yalef.”

³ Kulu Herod, in tura Filip nē aiwa, Herodias nigin, Jon yale ifõ, kalabus bun inenen. ⁴ Ere nigin, Jon ï irokenēdig, “Õ ïtãfiya ufodul ken, turã nē kayau walen.” ⁵ Herod Jon yukesiya nigin wau yenen, anĩ ere, tamo kayau kumĩ fedin, ere nigin, idi ï profet taka dedig.

⁶ Herod sina gõ fen anĩ nē naa bun, Herodias nē barai seg kui ye fen, dole kenēdi di, Herod wau al bagai fen. ⁷ Age fe di, ï wau adok kuturol fen, ne barai ereb taka nigin to fouf, de anĩ bagai ifenēf yen. ⁸ In sinam weder te yabi di, ï iron, “Beĩ taka bun Jon naan igunēdiya tamo mudur uno fen, ein wanauf.” ⁹ King ï wau togun, anĩ ere, wau kuturol fen, tamo kayau meleid bun kurõ fesin anĩ nigin, in

oro ya dõf anĩ bagai ifenēf nigin wogõ ye fen, tamo sur fe di, ¹⁰ Jon kalabus bun ula gudū fen. ¹¹ In mudur beĩ bun dino diroule, ne barai difenē di, ï sina gein irou ilen. ¹² Jon nē dõ fiya tar disi, in bouwa buru dale mũ difen. Age de fen, idi dilen, Jesus dirokenen.

Jesus Faif Tausen Tamo Saaf Ifenēdin

(Mak 6:30-44; Luk 9:10-17; Jon 6:1-14)

¹³ Jesus, Herod Jon ula gudū fen anĩ karĩ ye fen, ï mugu bagai waag bun moilin ilen. Tamo kayau idi anĩ karĩ de fen, taun temeleid yedim dõ difen. ¹⁴ Sain Jesus kutū yeis fen, mala iran, tamo kayau musei ileidin, ï idi nigin wau yu ken, idi neid dagi el fiyēdin.

¹⁵ Mogo bok isi di, in dõ fiya tar Jesus wagen disi diron, “Eĩ gerere tuan, sain mogo sa kelef. Tamo kayau susur wo di, dilalauf, ago di, idi fonõ fonõ dile fen, dogo neid saaf na dalouf.”

¹⁶ Jesus irokenēdin, “Idi ileya nigin kisi to yenēf. Saaf yõya nigin ägem wenēdigouf.”

¹⁷ Idi dirokenen, “Amã ein bret faif, gau uru ado dogol.”

¹⁸ ï iron, “Wageun gurig urousig.”

¹⁹ Tamo kayau fisir bun dibodadãf nigin Jesus irokenēdin. Bret faif gau uru ado, imam yale, saa ilun itad fen, ï Negur de fiye ken, bret mumã fen. Agef fen, in dõ fiya tar ifenēdi di, idim tamo kayau difenēdin. ²⁰ Idi ganan don anĩ kisi felen. Age fe di, in dõ fiya tar, tamo kayau bret dokon, tunĩ ditoraran anĩ fito difen, karam tuwelf eweid gere fen. ²¹ Tamo bret don anĩ, idi faif tausen age fiya, kayau kesu geid iwesediya sã.

Jesus Naan Teteatu Iyon

(Mak 6:45-52; Jon 6:15-21)

²² Kaisã bagai, Jesus, in dõ fiya tar waag bun idi ketem sitakã dilauf nigin sur fedin. Age de mog, ï tamo kayau irudin. ²³ Jesus idi irud le fen, ï yogo arein kosē youf nigin iselen. ï an mugu ibod mog, bõ irou isin. ²⁴ Anĩ ere, waag mogo teneub itoron gerõ ifaren, yau odug fã ye di, moloun wĩ ye fen, waag yũ di, ilef isif fen.

²⁵ Wef mog, Jesus daliyou teteatu idi gedin iyok ilen. ²⁶ Sain in dō fiya tar meleid diran, daliyou teteatu iyō mog, dile fen, idi tererē den. Idi diron, “Eī baraū,” kumī de fen, ui guru den.

²⁷ Anī ere, kaisā bagai Jesus irokenēdin, “Totol ufareg! Are ayam. To kumī wog.”

²⁸ Pita solof iron, “Odug, onom ouf are, urokana len, naan teteatu ō garan asiyouf.”

²⁹ Jesus iron, “Usi.”

Age fiyē di, Pita waag bun kutū yeis, naan teteatu Jesus wagen iyok ilen. ³⁰ Anī ere, ī yau ile fen, kumī ye di, gamai imutuk isil fen, iweig iron, “Odug, usenna!”

³¹ Kaisā bagai, Jesus ima iran, yalesne ken, irokenen, “Ō momoiya naal, ere nigin ō waū uru ado?”

³² Age ye fen, idi uru waag namen sosō de di, yau kee relen. ³³ Anī dile fen, idi waag namen difaren, Jesus nigin seli dabi diron, “Momoi bagai, ō anī Negur Naal.”

Jesus Genesaret Oun Dagi Adodo El Fedin (Mak 6:53-56)

³⁴ Sain idi daliyou sitakā dibal dilen, Genesaret teneub bun wō den. ³⁵ Tamo kayau fonō anī bun temeleid, Jesus kelei ken, idi fonō anī kalilī fiya fō fō ganan od dinon. Fonō fonō idi neid dagi tamo guri difeid, Jesus wagen disi fen, ³⁶ idi dagi tamo yogon gabar irig kobū difouf nigin, Jesus digonen. Ganan idi ī kobū difen, dagi fara feledin.

15

Amuyē Sā Ado Amuyē Ado (Mak 7:1-23)

¹ Sain anī bun, Farisia tamo tunī, lo ifelnēdiya tamo tunī geid, Jesus garan Jerusalem temeleid disi to difiyen, ² “Ere nigin on dō fiya tar, mudur ado neid tobonunā wal difedig? Idi neid imeid kulo fiya sā, saaf dōdig!”

³ Jesus solof irokenēdin, “Ere nigin ā āgenei tobonunēi dōg fen, Negur nē itāfiya wal gedig? ⁴ Ere nigin, Negur iron, ‘Ō sinā tamā yeneid wales,’* ‘Aibem taka sina

be tama be gelu fiyēf, ī laa bun dinenēf bagai.’† ⁵ Anī ere, ā urōgedig, “Tamo taka, sina be, tama be idi bun irōf, “Ereb taka ō isennōya nigin ayam ifonōya anī, ayam Negur afenem,” ⁶ ī age fef anī bunem in tama yana seli kulō fiya nigin to age fouf,’ gedig. Āgenei tobonunā age fiya bunem Negur nē od to dō gedig. ⁷ Ā mala yaleya tamo! Asaia ī, ā nigin profet od eig ye wogō yen in od tutuk:

⁸ “‘Tamo kayau enidi, nedi sigoredim aya selu kulō difedig, anī ere, idi neid waud aya nigin gerō ifaref.

⁹ Idi aya yanau dalesedig, are ege.

Idi neid ifelnēdiya are tamo nē keleī dogol dō difedig.’‡ ”

¹⁰ Jesus tamo kayau iweig laisi, irokeneid fen, iron, “Karīg fen, wedereī fokōf. ¹¹ Ereb taka mayarem tamo awa kurē isilef anim, ī amuyē to ifenēdig, anī ere, erob taka namenem awa kurem ulō yesif anim, ī amuyē ifenēdig.”

¹² Age ye di, in dō fiya tar ī garan disi to difiyen, “Farisia tamo idi od enī karī de fen, waud ō nigin to biyaf anī, ō karī wof de?”

¹³ Jesus aitedin yalen, “Aayū ganan, neu Dei saa ilun tamal im to itenanan, are warumutei ado kususou fouf. ¹⁴ Utornēdig; idi uyu irouya nigin meleid ifofakelen. Mala ifofakeleya tamo taka, mala ifofakeleya taka gim fiyēf are, idi uruwom mekur kuku douf.”

¹⁵ Pita iron, “Yaab od enī nē gariya faded wo urokanamā.”

¹⁶ Jesus to fedin, “Ā fau nene gef de? ¹⁷ Ā to ulegedig de? Ereb taka awa gerinem te namen isilef are te ado iledig. ¹⁸ Anī ere, erob taka awa bun wō yef are wauda bunem isedig anim, tamo amuyē ifenēdig. ¹⁹ Ere nigin, wauda bun tamal wō yef, are kisi sesen, tamo yukesiya, seseirā inoya, noli tobonunā, bē, kot bun idegēya od bou bun yūya, dumen od wogōya. ²⁰ Enī ganan anī tamo amuyē ifenēdig, anī ere, ima kulo fiya sā saaf doko anim, tamo amuyē to ifenēdig.”

* 15:4: Eksodas 20:12; Diuteronomi 5:16 † 15:4: Eksodas 21:17; Levitikas 20:9 ‡ 15:9: Asaia 29:13

*Kanan Kayau Nē Momoiya
(Mak 7:24-30)*

²¹ Jesus modoū anī itor ken, Taia Saidon ado neid teneub akoron ilen. ²² Haiden kayau Kanan tamal taka, melsā an tamal Jesus wagen isin iweig iron, “Odug, Dawid Naal, aya nigin malalon yō! Neu barai kaa sanem irou di, to biya bagai yenek.”

²³ Anī ere, Jesus od taka to solo fenen. Anī nigin, in dō fiya tar Jesus wagen disi, total bagai dirokenen, “Kayau sur wo di, ile, ere nigin, ī iweig fen, iweig fen, dō fadaf.”

²⁴ Jesus kayau aiten yalen, “Negur aya sur fiyan are, sipsip Israel atun fō delen anidi bun dogol.”

²⁵ Kayau anī isin, wagen ibor bobou fe fen, ī iron, “Odug, aya usenna!”

²⁶ Jesus aiten yalen, “Kesu nanaal neid saaf yale fen, gaū irarak kenēdiya are to biya.”

²⁷ Kayau anī iron, “Odug, are momoi, anī ere, gaū idig moroid tar tebol bun saaf dō di, momout kuku re di, dōdig.”

²⁸ Age ye di, Jesus aiten yalen, “Kayau, ō momoiya odug ado! Ogon waū irok agef ifonok.” Sain anī bun bagai, ī ne barai el felen.

*Jesus Fo Tausen Tamo Saaf Ifenēdin
(Mak 8:1-10)*

²⁹ Jesus an itor ken, Galili maaī yeri dō fen. Agef fen, ī arein isel ibodon. ³⁰ Tamo kayau musei wagen disin, yeid kirorōya, meleid ifofakelen, iborodim gogo dedig, aiteid ifofakelen, dagi fire fire museig, Jesus ye gariyan guri dife dirou disi di, ī el fedin. ³¹ Aiteid ifofakelen od wogō den, iborodim gogo dedig madur feid difaren, yeid kirorōya dion, meleid ifofakelen lo difen, anī ganan tamo kayau dile fen, terē den. Age fe di, idi Israel nē Negur yana dalesen.

³² Jesus, in dō fiya tar iweignēdi di, wagen disi di, irokenēdin, “Aya tamo kayau enidi nigin waud inaf, idi mogo aya geid naa towo dibodon, anī ere, gama ereb taka yōya sā. Aya, idi naū susur afedi di, dilauf anī to orouf, age afouf are, idi luwen kuku douf.”

³³ In dō fiya tar dirokenen, “Amā gerere tuan ein bret kisi feleya nain male fen, musei enī weit mafediyouf?”

³⁴ Jesus to fedin, “Bret ganī ā ado?”

Idi diron, “Bret sewen, gau nanaal teke tekelei ado.”

³⁵ Jesus tamo kayau tenebur dibodadāf nigin irokenēdin. ³⁶ Agef fen, Jesus, bret sewen gau ado, imam yale iroun, ī Negur de fiye ken, bret anī mumā feid fen, in dō fiya tar ifenēdi di, idi bagam tamo kayau difenēdin. ³⁷ Idi ganan don anī kisi felen. Dumen in dō fiya tar, tamo kayau bret dokon, tunī ditoraran anī fito difen, karam sewen eweid gere fen. ³⁸ Tamo bret don anī idi fo tausen, kayau kesu geid iwesediya sā. ³⁹ Jesus tamo kayau susur feid, dilele di, ī waag bun sō ye, Magadan akoron ilen.

16

*Farisia Tamo Sadusia Tamo Geid, Saa Ilun Nē Uris Nigin To Difen
(Mak 8:11-13; Luk 12:54-56)*

¹ Farisia tamo Sadusia tamo geid, Jesus wagen disi, kisi difiye ken, saa ilun nē memelik taka meledin inouf nigin to difiyen.

² Jesus aitedin yalen, “Sain aragau isi di, ā urōgedig, ‘Sain biyau fenē, ere nigin, saa giri yef,’ ³ bonimei di, ā urōgedig, ‘Gama uyē yau ado fouf, ere nigin, saa giri ye fen, budū iyokelef.’ Ā saa bun es fiya nigin keleī bagai, anī ere, ā ereb sain nē uris es fiya nigin kisi feleya sā. ⁴ Sain enei nē tamo kayau, ibor sane seseirā inoya nē anī, memelik nē uris dimirēdig, anī ere, taka to ifenēdiyof, de Jona nē uris dogol ifenēdiyof.” Age ye fen, Jesus idi itorneīd ilen.

*Farisia Tamo Ado Sadusia Tamo Neid Yis
(Mak 8:14-21)*

⁵ Sain idi daliyou sitakā dibal dilen, in dō fiya tar bret yaleya nigin wedereid tu kelen. ⁶ Jesus idi irokenēdin, “Lo welegei! Farisia tamo ado Sadusia tamo neid yis nigin, ā lo welegei.”

⁷ In dō fiya tar idi dogo dogol katō de fen, diron, “Ī agef irok, ere nigin, ada bret to tarousil nigin.”

⁸ Idi neid wogōya Jesus kelei ken, to fedin, “Ā momoiya naal bagai, ere nigin ā bret sã ge fen, aug tutur wogō gef? ⁹ Ā wedereĩ fau to fokō yef de? Ā to karĩ welegef, bret faif anĩ faif tausen don, age fe di, karam ganĩ ā kuru ge di, eweid gere fen? ¹⁰ Takag, bret sewen anĩ fo tausenem don, age fe di, karam ganĩ ā kuru ge di, eweid gere fen? ¹¹ Ā naig fe di, wedereĩ to fokō yef, aya bret nigin ā to arokeneim de? Anĩ ere, ā lo welegei, Farisia tamo ado Sadusia tamo neid yis nigin.” ¹² Age ye di, idi mogo wedereid fokō yen, ĩ yis bret bun dinodig anĩ nigin to wogō fedin, ĩ Farisia tamo ado Sadusia tamo neid ifelnēdiya anĩ nigin wogō fedin.

*Pita Kristus Nigin Kurō Fesin
(Mak 8:27-30; Luk 9:18-21)*

¹³ Sain Jesus Sisaria Filipai nediwon isi fen, in dō fiya tar to fiyēdin, “Tamo kayau Tamo Naal nigin ai dedig?”

¹⁴ Idi dirokenen, “Tunĩ dirok, ō Jon naan igunēdiya tamo, tunĩ dirok, ō Eliya, tunĩ dirok, ō Jeremaia oo profet taka be.”

¹⁵ Jesus to fedin, “Ba ā uleg? Aya nigin ā ai gef?”

¹⁶ Simon Pita aiten yalen, “Ō anĩ Kristus, Ō mata ibodōya Negur Naal.”

¹⁷ Jesus solof iron, “El fiya ō ado, Simon Jona nē naal, ere nigin, on keleĩ are tamo nē keleĩ bunem sã, are neu Dei saa ilun tamal in keleĩ bunem. ¹⁸ Anĩ nigin, aya ō arokonok, ō Pita,* meein enĩ teten neu sios anouf, laa nē megeir anim sios to wal fiyēf. ¹⁹ Aya saa tano nē ki ō afonōf, ereb ō tenebur ein ufok, are saa ilun ouneg ifōf, ereb ō tenebur ein biru wof, are saa ilun ouneg biru fouf.” ²⁰ Age ye fen, Jesus ĩ Kristus yeya anĩ, aib taka to dirokenēf nigin, in dō fiya tar wedereid iroun.

*Jesus Busuk Bun Laaf Fen, Mata Kel Fã Youf Yen
(Mak 8:31-9:1; Luk 9:22-27)*

* **16:18:** Pita, ani nē gariya, meein.

²¹ Sain anĩ bunem ilauf bun, Jesus yogo nigin in dō fiya tar yaor fe irokenēdin, ĩ Jerusalem ilauf bagai, an darau musei, mudur adodo, pris odudug, lo ifelnēdiya tamo imeid bun yalouf, an ĩ dukesiyouf, naa towo bure fele di, mata kel fã youf.

²² Pita Jesus yale, yerin irou ile ou fiyen, ĩ iron, “Odug, sã bagai! Enĩ ganan ō nigin to bagai wō youf!”

²³ Jesus falei yel, Pita irokenen, “Satan, dumeun ule! Ō aya naaburau gudū wof; on kisi are Negur nē sã, on kisi tamo nē dogol.”

²⁴ Age ye fen, Jesus in dō fiya tar irokenēdin, “Aib taka aya dō fiyau fenē, ĩ yogon oroya lai fesil fen, ĩ yogon aa tetek faali fe fen, anĩ aya dō fiyau. ²⁵ Ere nigin, aib taka yogon mata isennēf nigin oro fef are, fō yalauf, aib taka yogon mata, aya nigin irailauf are, mata anĩ gurug fouf. ²⁶ Tamo taka ĩ, teneub enĩ ganan kakarai fe fen, akorou yef, anĩ are, ĩ yogon malakanon irailauf, ere biya ĩ yalouf? Takag, tamo taka yogon malakanon nigin ere mala solof fen, ĩ kel yalouf? ²⁷ Tamo Naal, in Tama nē fula fiya medeīya ado in engel geid disiyouf, agef fen, tamo mugu mugu ereb age fef anĩ kilei, ĩ mala solo age fiya bagai ifenēdiyof. ²⁸ Aya momoi arokeneik, tunĩ ein difaref fau to gare de mog, idi Tamo Naal in tano bun isi di, dilouf.”

17

*Jesus Bouwa Falei Fen
(Mak 9:2-13; Luk 9:28-36)*

¹ Naa sigis bure fele di, Jesus, Pita, Jems, taka Jon Jems nē tura geif fen, idi mugu arei odug ilun diselen. ² An Jesus idi meleid bun bouwa falei felen. In nawa gaa gen fula felen, in kolos lalau fen, yal gen lalanen. ³ Agef mog, an idi meleid bun Moses, Eliya ado wō de fen, Jesus weim wogō den.

⁴ Pita Jesus irokenen, “Odug, ada ein ibodōya nigin biya bagai. Ō oroyōf are, aya salafat towo anouf, taka ogon, taka Moses nē, taka Eliya nē.”

⁵ Pita fau wogō ye mog, lalo lalau bagai idi kerub fedin, ait taka lalo namen iron, “Eī neu Kesu, ī nigin aya wau laa fedig, ī nigin aya wau kulī yedig. Ī karī wiyēg!”

⁶ Anī in dō fiya tar karī den, idi neweid kususur de fen, tenebur gurorō de tererē den. ⁷ Anī ere, Jesus isin, kobū feid fen, ī iron, “Fafāg, to kumīg.” ⁸ Idi ditadsen, taka to dilen, Jesus dogol.

⁹ Idi arei bun diyok disi fen, Jesus idi irokenēdin, “Ā ereb ulegel enī, aib taka to urokenēg, fau Tamo Naal laa bun tamal kel fā ye di.”

¹⁰ In dō fiya tar Jesus to difiyen, “Ere nigin lo ifelnēdiya tamo dirōdig, ‘Eliya ī ketem isiyouf bagai’ dedig?”

¹¹ Jesus aitedin yalen, “Momoī bagai, Eliya isi fen, ereb ereb ganān madur fediyouf. ¹² Anī ere, aya ā arokeneik, Eliya mogo isi bure felen, idi anī ī nigin to kelei ken, ereb ereb ganān idi waud iron kilei, ī nigin mogo age difen. Age fiya gen, Tamo Naal idi imeid bun darau yalouf.” ¹³ Jesus age wogō ye di, in dō fiya tar idi wedereid fokō yen, Jon naan igunēdiya tamo nigin irok den.

Jesus Kesu Kaa Sane Ado El Fiyen
(Mak 9:14-29; Luk 9:37-42)

¹⁴ Sain idi tamo kayau gedin disin, tamo taka Jesus wagen isi fen, ibor bobou fen. ¹⁵ Ī iron, “Odug, neu kesu nigin malalon yō. Ī mir yuk sain, sane bagai firi ye fen, sain musei yāg iledig, naanūg iledig. ¹⁶ Aya, ī, on dō fiya tar wagedin arou elen, anī ere, idi el fiyēya kisi feleya sā.”

¹⁷ Jesus solof iron, “Sain enei nē tamo kayau, ibor enī, sane, momoiya sā, sain ganī aya ā geid tabodōf? Sain ganī aya ā nigin wau aukesilauf? Kesu wageun ein urousig.” ¹⁸ Jesus kaa sane ou fiyē di, kesu bun tamal ulō yeis ile mog, kesu ī bou karika len.

¹⁹ Age fe di, in dō fiya tar mugun Jesus wagen disi to difiyen. “Ere nigin amā kaa sane iruya kisi feleya san?”

²⁰ Jesus irokenēdin, “Ere nigin, āgenei momoiya naal bagai nigin. Aya momoi arokeneik, ā momoiya naal masted faat

age fiya adouf are, ā arei enī urokenēgouf, ‘Ein tamal godō urou ule, oun ufar,’ ago ge di, ī dōf age fouf. Ereb ereb ganān ā age fiya kisi feleya.”*

Jesus Baban In Laa Nigin Iron
(Mak 9:30-32; Luk 9:43-45)

²² Sain idi disi, Galili guru difen, Jesus idi irokenēdin, “Tamo Naal ī fau tamo imeid bun dinouf. ²³ Idi fau ī dukesiyouf, anī ere, naa towō bure fele di, ī fau baban mata kel fā youf.” Age ye di, in dō fiya tar waud morō gudū fesin.

Tempel Nē Takis

²⁴ Jesus in dō fiya tar geid, Kapenaum taun disi di, tempel takis yaleya tamo, Pita wagen disi to difiyen, “Āgenei tise tempel nē takis to inodig de?”

²⁵ Pita iron, “Ariya, ī takis inodig.”

Sain Pita fō namen isi di, Jesus ket wogō yen, “Simon, ō ere kisi wof? Ai bunem tenebur nē king anidi takis daledig, idi neid kesu bunem de, oo tamo tunī bunem?”

²⁶ Pita solof iron, “Tamo tunī bunem.”

Jesus ī irokenen, “Anī nigin, kesu idi bunem sā. ²⁷ Anī ere, adam idi waud saneya to tafenēdiyof nigin, ō daliyoun ule, on mū urāf. Gau uruwa walouf anī awa gede fen, an silwa koin moni ulouf, wale fen, takis ogon ado neu nigin wenēdiyof.”

18

Saa Tanon Odug Ibodōya Nigin
(Mak 9:33-37; Luk 9:46-48)

¹ Sain anī bun, in dō fiya tar Jesus wagen disi, to difiyen, “Aim saa tanon odug bagai ibodok?”

² Ī kesu naal taka iweignē isi di, idi atun ifarnen. ³ Agef fen, ī iron, “Aya momoi arokeneik, ā kesu nanaal gen falei gouf anī dogol, age fiya sāf are, ā saa tanon to bagai ulagauf. ⁴ Anī nigin, aib taka yogo nigin kuru kel fen, kesu enī genēf are, ī saa tanon odug bagai ibodok.

⁵ “Takag, aib taka kesu naal eig fiya, aya yanau nem yalef are, ī aya yaleyaf. ⁶ Anī ere, aibem taka age fe di, kesu aya nigin

* 17:20: Itotoya tunī eig de ditoton: kisi feleya. 21 Anī ere, kaa sane eig fiya ege to ulō yeis ilauf, kurig fen, kosē ge di.

momoi def enidi taka, mosor bun kubū youf are, tamo anī meein odug guyutu bun ifo ken, maaīwō irāya nigin biya.

⁷ “Teneubur tamo kayau idi meleidlon ado, ere nigin, ereb to biya anī age fe di, tamo mosor bun dilalauf. Tobonunā age fiya bagai wō youf, anī ere, tamo nanī be bunem isif, ī malalon ado! ⁸ Ogon imam be, yem be mosor bun ineyōf are, gudū fen uraile. Ō imā tobega be, yē tobega ado mata bun ileyā nigin biya bagai, ere nigin, imā totoū be, yē totoū adouf are, yā faimud ibodkeleya anī bun an dirāyōf. ⁹ Age fiya bagai, ogon malam mosor bun ineyōf are, ubodol uraile. Ō malā tekelei ado mata bun ileyā nigin biya bagai, ere nigin, malā totoū adouf are, hel nē yā mala bun dirāyōf.

Sipsip Fō Yeleya Nē Yaab Od (Luk 15:3-7)

¹⁰ “Ā lo welegei, kesu nanaal enidi taka to meleī irim gouf. Ere nigin, aya ā arokeneik, idi neid engel saa ilun dibodok, sain ganān neu Dei saa ilun ibodok no diledig.*

¹² “Ā ere kisi ado? Tamo taka ī wan hundred sipsip ado, tekelei idi atun fō yalauf are, marau ī nainti-nain sipsip uya bun itorneīd fen, ile, tekelei fō yelen anī to imirēf de? ¹³ Aya ā momoi arokeneik, ī fata foug are, ī sipsip tekelei anī nigin wau kulīya odug, sipsip nainti-nain to fō delen nigin anī nē kulīya wal fiya. ¹⁴ Age fiya bagai, āgenei Temeī saa ilun ibodok, kesu nanaal enidi taka fō yeleya nigin to orodig.

Turā Taka Mosor Inoyōf

¹⁵ “Ogon turā taka mosor inoyōf, ule ā uruwom atun dogol in kū fenēya ufelnēf. Ī ō karī yōf, ō ogon turā mogo kel walel. ¹⁶ Anī ere, ī to karī yōf, baban tekelei be uru age fiya ō geid fen, ulagauf, ago di, ‘od ganān isennēya uruwom be, towom sig-oredim kurō difesiyouf anī megeir gouf.’† ¹⁷ Ī idi karī fediya nigin itorōf, sios uro-kenēf. Ī sioseg karī fiyēya nigin itorōf are,

ī haiden be takis yaleya tamo sane gen unenēf.

¹⁸ “Aya ā momoi arokeneik, ereb taka ā tenebur ein ufokalagauf, are saa iluneg ifokalauf, ereb taka ā tenebur ein biru walagauf, are saa iluneg biru falauf.

¹⁹ “Baban, aya ā arokeneik, tenebur ein ā uruwom ereb taka nigin wauī tekelei fen, to gouf, neu Dei saa ilun ibodok, ī dōf ā nigin age foug. ²⁰ Ere nigin, uruwom be, towom be, aya yanau nem guru difef, aya an idi geid mabodok.”

Kabī Tamo Wau To Yūdig Nē Yaab Od

²¹ Age ye di, Pita Jesus wagen isi, to fen, “Odug, neu turau aya nigin mosor inouf, sain ganī neu turau nē mosor nigin wederou tu kalauf? Wederou tu kelef ile, sewen daū de?”

²² Jesus aiten yalen, “Aya ō arokonok, ō sewen dogol to agouf, sewenti anī are sewenem tobol wouf.

²³ “Anī nigin, saa tano ī, king taka, ne ferfer geid in wareg madur fiya nigin oron gen. ²⁴ King ī wareg madur fiya nigin gariya inon, tamo taka ī bun ten milion kina yalen anī, ī wagen dirou disin. ²⁵ Ī wareg anī yukesiya kisi feleya sā nigin marau iron, ī yogo ado in aiwa, in gere tar ado in safina ganān na nigin sur fedi di, in wareg anī yukesiya kisi falauf yen.

²⁶ “Kabī tamo, marau wagen ibor bobou fe fen, igonen, ‘Ō aya nigin wauī unois fen, sain wana len, aya wareg anī ganān kisi afelkonōf.’ ²⁷ Kabī tamo anī nē marau, ī nigin wau yu ken, wareg anī ganān lai fesil fen, itornē di, ilen.

²⁸ “Anī ere, kabī tamo anī oreis ile fen, ī yogon kabī tura taka fotou fen, ī bun wareg wan hundred kina ado. Ī ka fe, ula irou fen, iron, ‘Ō aya bun wareg walēn anī kel wana!’

²⁹ “In kabī tura kubū ye, ibor bobou fe fen, igonen, ‘Ō aya nigin wauī unois fen, sain wana len, aya wareg anī mala kela afonōf.’

³⁰ “Anī ere, ī to karī fiyen. Ī tamo yale irou, kalabus bun iran, are de wareg inouf anī dogol. ³¹ Anī kabī tura tar tunī, ī age

* **18:10:** Itotoya tunī eig de ditoton: diledig. **11** Fō delen anī kel yaleya nigin Tamo Naal isin. † **18:16:** Diuteronomi 19:15

fen anī dile fen, idi waud odug sanen, anī nigin, dile, idi neid marau erēb age fen anī ganān wogō difiyen.

³² “Age de di, marau tamo, kabī tamo anī iweignē isi di, ī irokenen, ‘Ō kabī tamo sane. Aya ogon wareg ganān lai afonon, ere nigin, ō aya ugonan. ³³ Aya ō nigin wau inān gen, ō ogon kabī tura nigin waū inōya san de?’ ³⁴ In marau tamo name ise fen, darau ifenēya nigin kalabus lo fiya tamo imeid bun inenen, are de wareg ganān inouf anī dogol.

³⁵ “Age fiya bagai, neu Dei saa ilun ibodok, ā atun tureī tar neid mosor nigin wauī bun wedereī to tu kalauf are, āg age yeīf.”

19

Tamo Kayau Ado Bagu Fiya Anī Fara Fiya

(Mak 10:1-12)

¹ Jesus od enidi wogō ye bure fel fen, Galili distrik itor ken, Judia distrik ilen, Jordan naan sitakā. ² Tamo kayau musei dō difiyē di, ī an idi dagi el fedin.

³ Farisia tamo tunī ī wagen disi, kisi difiye ken, idi to difiyen, “Tamo taka, yogon kayau gariya fire fire bun iruf anī, lo dō fiya de?”

⁴ Jesus aitedin yalen, “Ā Negur nē Ito toya to uweseg ulegen de? Gariya bun, Negur erēb erēb kare fedin ī, ‘tamo ino kayau ino fen,’* ⁵ Negur iron, ‘Anī nigin, tamo ī in sina tama itorneīd fen, in kayau ado bagu difouf, idi uruwom bouweid tekelei.’† ⁶ Age difef, idi uru sã, idi tekelei. Anī nigin, Negur tamo kayau ado bagu fedin anī, tamom to fara fouf.”

⁷ Idi to difiyen, “Age fiyauf are, ere nigin Moses iron, tamo taka in kayau fara fiya nē pepa ifen ken, iru di, ilauf yen?”

⁸ Jesus idi irokenēdin, “Moses ī āgenei wauī total anī ile fen, āgenei kayau iruya nigin to katū yein. Anī ere, gariya bun age fiya sã. ⁹ Aya ā arokeneik, aib taka in kayau seseirã inoya sã mog, kayau iru fen, kayau taka yalef are, ī seseirã inof.”

¹⁰ In dō fiya tar Jesus dirokenen, “Tamo kayau atun morō agef yenek nigin, ī kayau to yalouf are biya bagai.”

¹¹ Jesus irokenēdin, “Tamo ganān od enī dō fiya kisi feleya sã, teke tekeleim Negurem age fedif anidi dogol. ¹² Tunī idi, sineid namenem, bouweid kesu irouya nigin tutuk sã gō fedidig, tunī are tamom korō difedidig, tunī saa tano nigin kisi de fen, kayau to daledig. Tamo taka kisi enī dō fiya nigin kisi falauf, dōf age fouf.”

Jesus Kesu Nanaal El Fiya Ifenēdin
(Mak 10:13-16; Luk 18:15-17)

¹³ Jesus ima tetedin ino fen, kosē fiyēdiyof nigin, kesu nanaal ī wagen guri de dirousin. Anī ere, in dō fiya tar, idi guri de dirousin anidi ou difiyēdin.

¹⁴ Jesus iron, “Utornēdig len, kesu nanaal aya wageun disiyof, idi to katū wedig, ere nigin, saa tano are eig fediya neid.” ¹⁵ Age ye fen, ī ima tetedin inol fen, an tamal tokō fel ilen.

Tamo Gaū Safina Musei Ado
(Mak 10:17-31; Luk 18:18-30)

¹⁶ Tamo taka Jesus wagen isi to fiyen, “Tise, ere biya anī aya age afe fen, mata ibodkeleya alouf?”

¹⁷ Jesus aiten yalen, “Ō ere nigin erēb biya nigin aya to wiyaf? Tekelei ī dogol biya. Mata ibodkeleya bun ulau fenē, ō itāfiya dō woid.”

¹⁸ Tamo Jesus irokenen, “Itāfiya nanī bagai?”

Jesus iron, “Ō tamo taka to ukesiyof, seseirã to unouf, to bē walouf, ō taka nigin idegēya od to urōf, ¹⁹ ogon sinã tamã yeneid walesauf,‡ ō ogo nigin waū laa fef gen, nē tā nigin ago. § ”

²⁰ Tamo gaū iron, “Anī ganān aya dō afen, ere taka anī aya fau dō fiya sã?”

²¹ Jesus ī irokenen, “Ō madur bagai you fenēf, ule, ogon safina ganān na nigin sur wo fen, maleg tamo wenēdiyof, agouf, ō saa ilun safina biya adouf. Agol fen, usi, aya dō wiya.”

* **19:4:** Jenesis 1:27 † **19:5:** Jenesis 2:24 ‡ **19:19:** Eksodas 20:12-16; Diuteronomi 5:16-20 § **19:19:** Levitikas 19:18

²² Od enī tamo gaũ karĩ ye fen, ĩ wau morõ fe di, itor ilen, ere nigin, ĩ safina musei ado.

²³ Age fe di, Jesus in dõ fiya tar irokenēdin, “Aya ā momoi arokeneik, safina musei ado tamo, saa tanon ileya nigin malai bagai. ²⁴ Baban aya ā arokeneik, kamel ĩ gabar iwaya nē nil ku bun ileya nigin karika bagai, safina musei ado tamo, Negur nē tano bun ileya nigin malai bagai.”

²⁵ Od enī in dõ fiya tar karĩ den, idi fatuk terē de fen, to difen, “Age fiyauf are, aim anī mata ibodkeleya yaleya kisi feleya?”

²⁶ Jesus idi lo feid fen, iron, “Tamo yogo bun age fiya kisi feleya sā, anī ere, Negur yogo bun erēb erēb ganān age fiya kisi feleya.”

²⁷ Pita Jesus aiten yalen, “Amā erēb erēb ganān mator ken, õ dõ mayok! Ere anī amā nemā mala solo malouf?”

²⁸ Jesus idi irokenēdin, “Aya ā momoi arokeneik, erēb erēb ganān mata falei fouf sain anī bun, Tamo Naal ĩ yogon king nē sia bun fula fiya medeīya ado ibodõf, ā aya dõ wiyagef, āg king nē sia tuwelf bun ubodõg fen, Israel ibor tuwelf es wedigouf. ²⁹ Taka fõ be, tura tar be, main tar be, tama, sina, gere tar, kabĩ, aya yanau nigin itoron, idi ganān mala solo wan handred wal fiya dalouf, mata faimud ibodkeleya anī dalouf. ³⁰ Anī ere, musei malabag dibodok, idi dumen dibodõf, musei dumen dibodok, idi malabag dibodõf.”

20

Wain Kabĩ Tamo Neid Yaab Od

¹ “Saa tano nē tobonunā are, teneub marau taka ĩ, bonimeĩ bagai ile fen, yogon wain kabier kabĩ dalouf nigin tamo oroi yaledin age fiya gen. ² Kabĩ marau naa tekelei nigin ten kina afeneĩf ye di, idi ganān anī yo de di, in wain kabier sur fedin.

³ “Nain kilok bonimeĩ age fiya, ĩ ilen, tamo tunĩ maket modoũ bun ege difar mog, iledin. ⁴ ĩ idi irokenēdin, ‘Āg uleg, neu wain kabier kabĩ waleg, ago gouf, mala de afeneĩf.’ ⁵ Age ye di, idi dilen.

“ĩ baban gaa atun ado aragau tri kilok age fiya ile feneg, de age fen. ⁶ Aragau faif kilok age fiya, ĩ ilen, tunīg fau difar mog, iledin. ĩ idi to fiyēdin, ‘Ere nigin ā ege bagai gaa ganān ein ufaregel?’

⁷ “Idi aiten dalen, ‘Ere nigin, taka nem amā to oroi yalemam.’

“ĩ idi irokenēdin, ‘Āg uleg, neu wain kabier kabĩ waleg.’

⁸ “Sain aragau di, wain kabĩ marau in kabĩ tamo neid orowa irokenen, ‘Kabĩ tamo uweigneĩd fen, dogo neid mala wenēdiyof, dumen disil idi bun gariya uno fen, ule, uyu disil bun ouf.’

⁹ “Kabĩ tamo aragau faif kilok age fiya kabĩ dalen disi fen, mugu mugu ten kina dalen. ¹⁰ Sain idi bonimeĩ nem ket iweignēdin anidi disin, idi kisi difen, amā idi wal fiya malouf den, anī ere, idig mugu mugu ten kina dalen. ¹¹ Sain idi moni dalel fen, idi teneub marau nigin nauseir den. ¹² Idi diron, ‘Tamo enidi dum bagai uweignēdi di, aua tekelei dogol kabĩ dalel, anī ere, amā, naa enī ganān bonimeĩ nem isi, gama yeiref, kabĩ total malel, gaa uruwa dõ famam, anī ere, õ amā idi geid ten kina dede wanamam.’

¹³ “Anī ere, kabĩ marau ĩ, idi neid taka solof irokenen, ‘Mou, aya õ sane to ayok. Õ ten kina nigin ada uruwom sigoroda to tekeleil de? ¹⁴ Ogon kabĩ mala wale fen, ule. Aya õ afonom age fiya, tamo dum bagai oroi aleyen anī, de age fiya afenēf nigin wau irok. ¹⁵ Aya neu safina erēb taka age fiya nigin wau irok anī, aya to age afouf de? Aya neu biya age afef nigin, õ aya kiyeĩ wanaf de?’

¹⁶ “Anī nigin, idi dumen dibodok anidi malabag dibodõf, idi malabag dibodok anidi dumen dibodõf.”

Jesus In Laa Nigin Irõ, Towo Fen (Mak 10:32-34; Luk 18:31-34)

¹⁷ Jesus Jerusalem iselau fenē, ĩ in dõ fiya tar tuwelf mugu bagai gei feid fen, irokenēdin, ¹⁸ “Ada Jerusalem teselef, an Tamo Naal ĩ pris odudug, lo ifelnēdiya tamo imeid bun dinenēf. Idi ĩ laa fouf nigin bou bun od dũf. ¹⁹ Age de fen, idi ĩ haiden Juda sā anidi imeid bun dino di, kono difiyē, wagĩ difiye ken, aa tetek bun

dukesiyouf. Naa towo bun, ĩ mata kel fã youf!”

Jems Jon Ado Neid Sineid, Ne Wau Iron Anĩ Jesus To Fiyen
(Mak 10:35-45)

²⁰ Age fe di, Sebedi nẽ kesu uru, sineid geid Jesus wagen disin. Idi neid sineid ibor bobou fe fen, wau irok anĩ Jesus to fiyen.

²¹ Jesus to fiyen, “Ere anĩ õ orok?”

Kayau iron, “Õ urõf, neu kesu uru enĩ, ogon tano bun taka ima biyalẽ ibodõf, taka ima kilẽ ibodõf.”

²² Jesus idi irokenẽdin, “Ã ereb to gef anĩ nẽ gariya, ã keleĩ sã, naan aya ãf anĩ ã yõya kisi feleya de?”

Idi aiten dalen, “Amã kisi feleya.”

²³ Jesus idi irokenẽdin, “Ã momoi neu kap bun naan are wãgauf, anĩ ere, imau biyalẽ ibodõya be, kilẽ ibodõya are, ayam ifenẽya kisi feleya sã. Modoũ anidi are, neu Dei idi nigin dodok fen anidi neid.”

²⁴ In dõ fiya tar ten, od anĩ karĩ de fen, uru tura ado nigin seye den. ²⁵ Jesus idi iweig laisi fen, iron, “Ã keleĩ, haiden idi dogo neid uyu irouya, tamo kayau lo fiya nigin total dinodig, idi dogo neid odudug, tamo kayau nigin megeir yaor difedig. ²⁶ Anĩ ere, ã bun kisi to agef yenẽf, ã atun aib taka odug ibodõf nigin orof, ĩ ãgenei kabĩ tamo ibodõf. ²⁷ ã atun aib taka uyun ibodõf nigin orof, ĩ ãgenei ferfer ibodõf. ²⁸ Age fiya gen, Tamo Naal ĩ disennẽf nigin to isin, anĩ ere, ĩ tamo kayau isenneid fen, tamo kayau musei idi neid mosor anĩ fotokar yogon mata ifenẽdiyof nigin isin.”

Tamo Uru Meleid Ifofakelen Anĩ Meleid Birikã Felen
(Mak 10:46-52; Luk 18:35-43)

²⁹ Jesus in dõ fiya tar geid Jeriko ditor dile mog, tamo kayau musei dõ difiyen.

³⁰ Tamo uru meleid ifofakelen naab yerin dibodon. Sain idi Jesus isi ilef yeya karĩ de fen, diweig diron, “Odug, Dawid Naal, amã nigin malalon yõ!”

³¹ Tamo kayau idi ou difiyeid fen, foro dalauf nigin dirokenẽdin, anĩ ere, idi wade

bagai diweig diron, “Odug, Dawid Naal, amã nigin malalon yõ!”

³² Jesus dẽ yel fen, idi iweigneid fen, ĩ to fedin, “Ere naig ayẽif nigin ã oroyeik?”

³³ Idi aiten dalen, “Odug, amã malamã fara wol kanamãf nigin oromak.”

³⁴ Jesus idi nigin meleidlon fe fen, idi meleid kobũ fedin. Kaisã bagai, idi meleid fara fele di, sã lo dife fen, idi Jesus dõ difen.

21

Jesus Tamo Yana Ado Gen Jerusalem Namen Ilen
(Mak 11:1-11; Luk 19:28-40; Jon 12:12-19)

¹ Idi Jerusalem kelẽ difiye ken, Moul Arei bun Betfage fonõ wõ den, Jesus in dõ fiya tar uru sur feid fen, ² ĩ idi irokenẽdin, “Fonõ wagein ifaref tokõ weleg, ulõ we-sig fen, kaisã bagai donki ifõya naal ado uledigouf. Idi biru weledig fen, wageun gurig usig. ³ Taka nem ã ereb yeif, ĩ urokenẽgouf, Odug ĩ kabĩ ifenẽdiyof fenẽ orof, ago ge di, kaisã bagai sur fediyof.”

⁴ Profet eig ye wogõ yen anĩ kisi falauf nigin agef wõ yen:

⁵ “Saion nẽ tamo kayau urokenẽgouf, Ulef, ogon king õ garan isif, imatkeis fen, donki bun ibodok, donki naal teten.’ ”*

⁶ In dõ fiya tar dilen, Jesus iron kilei age difen. ⁷ Idi donki naal ado dirousi di, tetedin idi neid gabar du difedi di, Jesus anĩ tetedin ibodon. ⁸ Tamo kayau musei, idi neid gabar naabur du difedin, tunĩ idi aa were kokour dife, naabur du difedin. ⁹ Tamo kayau uyu dilen ado, dume dõ difen diweig diron,

“Hosiana,† Dawid Naal bun!”

“Odug yana bunem isif, ĩ el fiya ado!”‡

“Hosiana, saa ilun bagai!”

¹⁰ Sain Jesus Jerusalem ulõ yesi di, taun anĩ bun tamo kayau ganan terẽ de fen, toti difen, “Tamo eĩ aim?”

¹¹ Tamo kayau diron, “Eĩ Jesus, profet Nasaret taun Galili teneub bun tamal.”

* **21:5:** Sekaraia 9:9 † **21:9:** Anĩ nẽ gariya, ‘Usennamã!’ Od anĩ tamo kayau Negur yana yaleseya nigin wogõ dedig. ‡ **21:9:** Sam 118:26

Jesus Tempel Bun

(Mak 11:15-19; Luk 19:45-48; Jon 2:13-22)

¹² Jesus tempel modoũ bun ile, wõ ye fen, na dale dile disi dife mog, an tamo kayau adok irudidin. Ì moni solo fediya neid tebol ado kuburir na sur fediya neid fatar eleg feledin. ¹³ Jesus idi irokenēdin, “Negur nē Itotoya irok, ‘Neu fõ ì kosē nē fõ douf,’ § anī ere, ā ‘bē tamo neid iminēya fõ’* unogen.”

¹⁴ Meleid ifofakeleya, yeid kirorõya, Jesus wagen tempel bun disi di, ì el fedin. ¹⁵ Anī ere, Jesus ereb biya bagai age fe di, kesu nanaal tempel modoũ bun diweig diron, “Hosiana, Dawid Naal bun,” age de di, pris odudug, lo ifelnēdiya tamo geid, idi anī dileid fen, seye den.

¹⁶ Idi Jesus to difiyen, “Kesu nanaal enidi ereb def, õ karī wof de?”

Jesus aitedin yalen, “Ariya, ā Negur nē Itotoya to uwesegen de?”

“ ‘Kesu momou kesu nanaal geid sigoreid bun selu kulõ fiya nigin Negur idi mogo saika fedin.’† ”

¹⁷ Agef fen, Jesus an tamal idi itorneid, taun anī itor ken, Betani fonõ ilen, an bõ tekelei ibodon.

Aa Fig Gariri Kelen

(Mak 11:12-14, 20-24)

¹⁸ Bonimeï bagai, Jesus Jerusalem kel ile fen, naab luwen naũ fen. ¹⁹ Mala irakelen, aa fig naab yerin ilen, Jesus iyok iselen fele fen, aa fig biya sã ege aarau dogol. Jesus aa fig irokenen, “Õ baban to bagai umauf!” Kaisã bagai, aa fig gariri kelen.

²⁰ In dõ fiya tar anī dile mã, idi terē de kulõ de fen, diron, “Naig fe di, aa fig kaisã bagai gariri kelen?”

²¹ Jesus aitedin yale iron, “Aya ā momoi arokeneik, ā wauĩ momoi ge mã, wauĩ to ilef isi foun, ā aa fig enī bun age afel dogol to ago gouf, sã arei enīg urokenēgouf, ‘Kusu fen, maaĩwõ irãyõf,’ are ì dõf age foun. ²² Æ momoi gouf are, ereb taka nigin tog fen, kosē gouf, ā walogouf.”

Jesus Aim Igirnen Anī To Difiyen

(Mak 11:27-33; Luk 20:1-8)

²³ Jesus tempel modoũ namen ulõ yeis fen, an tamo kayau od ifelneid mog, pris odudug, tamo kayau neid mudur adodo, ì wagen disi to difen, “Ere igirīya bunem õ ereb ereb enī ago wof? Aim õ igirīya enī ifonon?”

²⁴ Jesus aitedin yale iron, “Ayag to fiya tekelei afeneif. Æ solog urokanagauf are, ereb igirīya bunem ereb ereb enī age afef, aya ā arokeneif. ²⁵ Jon nē naan igunēdin, are nainenem isin? Are saa ilun tamal de, tamo bunem?”

Idi dogo dogol katõ de fen, diron, “Ada ì saa ilun tamal,’ tauf, ì irõf, ‘Ba anī, ere nigin ā ì nigin to momoi wiyēgen?’”

²⁶ Anī ere, ada ‘Tamo bunem’ tauf, ada tamo kayau nigin kumĩ tafedif, ere nigin, tamo kayau idi ganan Jon nigin profet taka dedig.”

²⁷ Anī nigin, idi Jesus ait solo de diron, “Amã kelei sã.”

Age de di, Jesus iron, “Ago gouf are, ayag, ere igirīya bunem ereb ereb enī age afef anī to arokeneif.”

Kesu Uru Bun Yaab Od

²⁸ “Æ ere kisi gef? Tamo taka ì naal uru adon. Tama ì kesu matu garan ile iron, ‘Neu kesu, gama wain kabier ule, kabĩ walouf.’”

²⁹ “Ì aiten yalen, ‘Aya tuwauf,’ dum ì in kisi falei ye fen, ilen.

³⁰ “Agef fen, tama kesu taka garan ile, od tekelei anī irokenen. Kesu aiten yalen, ‘Dei, aya age afouf,’ anī ere, ì ileyã sã.

³¹ “Idi uru atun, aim anī tama oron anī age fen?”

Idi aiten dalen, “Matum.”

Jesus idi irokenēdin, “Aya ā momoi arokeneik, takis yaleyã tamo, kayau bouweid na nē sur difedig geid, ā atun, idi ketem Negur nē tano bun uyu dilauf. ³² Ere nigin, Jon naan igunēdiya tamo ì, madur ibodõya nē naab ifelneif nigin ā garan isin, ā ì nigin to momoi gen, anī ere, takis yaleyã tamo, kayau bouweid na nē sur difedig geid, idi momoi den. Æ ì ulegeneg, ā wauĩ to falei ge fen, ì to momoi wiyēgen.

§ 21:13: Asaia 56:7 * 21:13: Jeremaia 7:11 † 21:16: Sam 8:2

*Tamo Kabī Lo Difedig Nē Yaab Od
(Mak 12:1-12; Luk 20:9-19)*

³³ “Yaab od taka nigin wedereī unog. Teneub marau taka ī yogon kabier aa wain itenen, ī kau ifō kalī felen, wain sumin asi fiya nigin ku yalen, kabī lo fiya nē fō inon. Agef fen, ī mala solo yalouf nigin wain kabī, kabī lo difedig tamo tunī imeid bun ino fen, uyu takā ilen. ³⁴ Sain biya bure fele di, teneub marau wain biya fito fiya nigin in ferfer susur fe di, kabī lo difedig tamo garan dilen.

³⁵ “Kabī lo difedig tamo, teneub marau nē ferfer dirouneīd fen, taka dun, taka dukesin, taka meein tulu difen. ³⁶ Age dife di, teneub marau ferfer tunī sur fedin, are idi musei uyulil sur fedin wal fiya. Age fe di, kabī lo difedig tamo uruwa age difen gen, baban yogon ferfer bun age difedin. ³⁷ Dum bagai, teneub marau yogon naal idi garan sur fiyen. Ī iron, ‘Idi neu kesu nigin fau karī difiyēf.’

³⁸ “Anī ere, kabī lo difedig tamo, naal anī dile fen, idi abob dirokenen, ‘Eī inim wain kabī akorouf. Usig, ada ī taukeis fen, yogon akor talouf.’ ³⁹ Age de fen, idi ī dale, wain kabī mayarē dira ken, dukesin.

⁴⁰ “Age fiya nigin, sain wain kabī nē marau isiyouf, ī kabī lo difedig tamo ere naig fediyouf?”

⁴¹ Idi Jesus aiten dalen, “Teneub marau, idi sane bagai sane ye fen, idenkesiyouf, ī wain kabī anī, kabī lo difedig tamo tunī imeid bun ino fen, na yaledi di, idi wain mayof sain bun fito de fen, yogon biya difenēf.”

⁴² Jesus idi irokenēdin, “Ā od Negur nē Itotoya bun yenek anī to uwesegen de?

“ ‘Meein are fō inoya tamom sane de fen, ditoron anī,
gama monog tor wō yen,
anī Odug yogo age fe di,
malamā yun.’ †

⁴³ “Anī nigin, aya ā arokeneik, Negur nē tano ā bun tamal son yeī yale, tamo kayau idi aayū faat biya yūf anidi ifenēdiyof.

⁴⁴ Aib taka meein anī teten kubū youf, mered fe fisik fouf, takag, aib taka meein anī ī teten kubū youf, ī danīf aas lauf.” §

⁴⁵ Sain pris odudug, Farisia tamo geid, Jesus nē yaab od karī den, idi kelein, Jesus idi nigin wogō yen. ⁴⁶ Idi Jesus irounēya nigin naab dimiren, anī ere, idi tamo kayau nigin kumī den, ere nigin, tamo kayau idi Jesus nigin profet taka dedig.

22

*Tamo Kayau Yalouf Bun Tar Nē Yaab Od
(Luk 14:15-24)*

¹ Jesus yaab od nem baban irokeneīd fen, iron: ² “Saa tano ī, king taka, ī naal kayau yalouf nigin tar dodok fen age fiya gen. ³ Ī yogon ferfer sur fedi di, tamo iweignēdin yogon tar bun disiyouf nigin dirokenēdin, anī ere, idi isiya ditoron.

⁴ “Ī baban ferfer tunī sur feid fen, iron, ‘Idi aya aweignēdin anī urokenēdig: Aya tar mogo saika afel. Aya bulmakau yaro biya biya ado adenen, ereb ereb ganan mogo dodok afelel. Bagu fiya tar bun usig.’

⁵ “Anī ere, idi to karī difiyēdin, idi diyalelen, taka yogon kabier ilen, taka ī yogon bisnis kabī yalen. ⁶ Tunī idi ferfer dirouneīd fen, tadū difiyēid didenkesin. ⁷ Anī nigin, king name odug sane fen, yogon kusī tamo sur fedi di, dilen, ferfer didenen anidi didenkeis fen, nedi taun yā dinon.

⁸ “Agef fen, king, ne ferfer irokenēdin, ‘Bagu fiya nē tar mogo dodok afelel, aya tamo aweigneīd fen, naa afenēdin anidi, dogo sane age difen nigin, isiya kisi feleya sã. ⁹ Anī nigin, ā ulagauf, naab kaleyan aib aib uledigouf are, urokenēdig len, idi tar bun disiyouf.’ ¹⁰ Age ye di, ferfer dilelen, naab naab diyo ken, tamo kayau dileid fen, biya ado sane ganan gou difedin, age dife di, tamo kayau ado bagu difedidig nē guru fiya modoū bun tamo kayau isokosen.

¹¹ “Age dife di, king namen isin, tamo kayau fele fedin, an ī tamo taka kolos biya ifonūya sã fotou fen. ¹² King ī to fiyen, ‘Mou, naig fe di, ō bagu fiya nē naki sã anī guru fiya enī namen usil?’ Tamo ī od sã ibodon.

† 21:42: Sam 118:22, 23 § 21:44: Itotoya tunī bun, itotoya 44 to ibodok.

13 “Age fe di, king yogon kabī tamo irokenēdin, ‘Ima ye ado ufōg, mayarē gugum bun urāg, an are wifirig ye fen, gobora kikokō yedyouf.’

14 “Anī nigin, tamo kayau musei iweignēdif, anī ere, teke tekelei igirnēdif.”

Sisa Bun Takis Inoya

(Mak 12:13-17; Luk 20:20-26)

15 Age fe di, Farisia tamo dilen, Jesus in od bun naig fe mog, talouf de fen, od katō difen. 16 Age de fen, Farisia tamo, idi neid dō fiya tar, Herod nē tamo tar geid, Jesus wagen sur difedi di, dilen, idi Jesus diroke-nen, “Tise, amā keleī, ō momoi wogōya nē tamo, anī ō Negur nē naab momoi bagai ufelnēdidig, ō tamom to wewu diyōdig, ere nigin, ō idi yana ado be sã anī to es wedig. 17 Anī amā urokanamā, ogon kisi ere wof? Sisa* takis ifenēya nigin biya de, sã?”

18 Anī ere, Jesus idi neid namedin kisi sane keleī ken, iron, “Å meleid yaleya tamo, ere nigin ā aya kisi wiyagef? 19 Takis ifenēya nigin koin moni ufelnag.” Idi koin moni taka wagen diroule di, 20 Jesus idi to fedin, “Eī ai nawa nē malakanon? Eī ai yana nē itotoya?”

21 Idi aiten dalen, “Sisa nē.”

Age de di, ī idi irokenēdin, “Ereb Sisa nē are Sisa wenēg, erab Negur nē are Negur wenēg.”

22 Od enī idi karī de fen, terē den. Age de fen, idi Jesus ditornē diya dilelen.

Kel Fāya Bun Ai Nē Kayau Ibodōf?

(Mak 12:18-27; Luk 20:27-40)

23 Naa de tekelei anī bun, Sadusia tamo idi dirōdig anī, laa bun tamal to ke de fã dedig, dedig anidim, Jesus wagen disi to difiyen. 24 Idi diron, “Tise, Moses iron, tamo taka kesu sã mog laa fef, in tura waab yale fen, tura fotokar kesu iroukenēf. 25 Amā atun, tura tura sewen dibodon. Matu ī kayau yalen laa fen, ī kesu sã, anī nigin, ī, in kayau, ne tura itorkenen. 26 Age fiya bagai, tura dō fiya īg age fen, anī dō fiya tri īg agef ile sewen adoken. 27 Idikeleya bun, kayau īg laa fen. 28 Anī nigin, kel fāya bun, idi sewen anī

atun, ī ai nē kayau bagai ibodōf? Ere nigin, idi ganan kayau anī dalen.”

29 Jesus aitedin yale irokenēdin, “Å od kū wenēgef, ere nigin, ā Negur nē Itotoya ado Negur nē megeir keleī sã. 30 Laa bun tamal kel fāya bun, an tamo kayau ado abob yalef ya sã, idi engel saa ilun difaref gen dibodōf. 31 Anī ere, laa bun tamal kel fāya nigin, Negur ā irokenein anī, ā to uwesegen de? 32 Negur iron, ‘Aya Abraham nē Negur, Isak nē Negur, Jakop nē Negur.’† Ī laa neid Negur sã, ī mata ibodōya neid Negur.”

33 Anī tamo kayau od enī karī de fen, ī agef ifelnēdin anī nigin terē den.

Ītāfiya Odug Bagai Ganān Wal Fiya

(Mak 12:28-34; Luk 10:25-28)

34 Jesus ī Sadusia tamo od bun sigoreid ifokelen anī karī de fen, Farisia tamo idi guru difen. 35 Idi atun, lo keleī tamo takam Jesus kisi fiye ken, eig fiyē to fiyen,

36 “Tise, ĩtāfiya nanī anī, ganān wal fiya odug bagai Lo bun irok?” 37 Jesus iro-kenen, “‘Ō, Odug ogon Negur waū adok, malākanon adok, kisi adok bunem, ī nigin waū laaf.’‡ 38 ĩtāfiya enī ī matu, Lo bun ganān wal fiya odug bagai irok. 39 Anī dō fiya are eig fiya, ‘Ō ogo nigin waū laa fef gen, nē tā niginēg ago waū laaf.’§ 40 Lo ado Profet neid od ganān, ĩtāfiya uru enī teten difaref.”

Ai Nē Naal Anī Kristus?

(Mak 12:35-37; Luk 20:41-44)

41 Sain Farisia tamo idi guru difesi di, Jesus idi to fedin, 42 “Kristus nigin ā kisi ai gef? Ai nē naal anī Kristus?”

Idi aiten dalen, “Dawid naal.”

43 Jesus idi irokenēdin, “Dawid naig fe di, anī Awa Uurem irokenen, ī nigin ‘Odug’ yen?” Ī nigin Dawid iron,

44 “ ‘Negur neu Odug irokenen:

“Imau biya melem ubod mog, ogon kiwai tar

on yē farume gō afalauf.” *

45 Dawid ī nigin ‘Odug’ yen ouf are, naig fe di, Kristus ī Dawid naal ouf?” 46 Taka nem, ī aiten yale solof irōya kisi feleya san, naa

* 22:17: Rom neid king odug. † 22:32: Eksodas 3:6

* 22:44: Sam 110:1

‡ 22:37: Diuteronomi 6:5 § 22:39: Levitikas 19:18

anĩ bunem ilen ganan, takam baban ĩ to fiyēya nigin kumĩ den.

23

Jesus Farisia Tamo Ado Lo Ifelnēdiya Tamo Ketē Fiyēdin

(Mak 12:38-40; Luk 11:39-52; 20:45-47)

¹ Dum Jesus, tamo kayau in dō fiya tar geid irokenēdin, ² “Lo ifelnēdiya tamo, Farisia tamo geid, Moses nē sia bun dibodōdig. ³ Anĩ nigin, ā idi karĩ wiyēdig fen, ereb idi ā ago gei de di, ā ago gouf. Anĩ ere, ereb idi age difef anĩ, ā to agog, ere nigin, idi dirōdig anĩ to dō de age difedig. ⁴ Idi morō odudug difofa ken, tamo kayau oroweid se difedig, anĩ ere, idi dogo bagai, morō enei dalesauf nigin imeid gege tekelei bagai gebeya nigin to orodidig.

⁵ “Idi ereb ereb ganan age difedig, are ege tamo meleid yaleya: Age de fen, idi tamo meleid yaleya nigin, lo ĩtāfiya bokis naal odudug nuwa bun difeid fen, demeid bun ado imeid dā bun difofādig, idi neid kolos nē malū meluluk adodo dinodidig. ⁶ Idi, saaf odudug bun ado Juda neid uub fō bun, modoũ malabag ibodōya anĩ orodidig. ⁷ Idi maket modoũ bun, tamo kayau idim sere difiyeĩd fen, ‘O tise’ difediyouf anĩ orodidig.

⁸ “Anĩ ere, ā tise to diyeĩf, ere nigin, ā Tise tekelei dogol ado, ā adok tura tura. ⁹ Ā tenebur ein aib taka to dei gouf, ere nigin, ā Temeĩ tekelei dogol ado, ĩ saa ilun ibodok. ¹⁰ Ā mudur ado to diyeĩf, ere nigin, ā Mudur Ado tekelei dogol, are Kristus. ¹¹ Ā atun, aib taka ganan wal fiya wō you fenē, ĩ āgenei kabĩ tamo ibodōf. ¹² Ere nigin, aib taka ĩ yogo yana yalesef, ĩ lai fesilauf, aib taka ĩ yogo nigin lai fesilauf, ĩ yana adouf.

¹³ “Lo ifelnēdiya tamo, Farisia tamo geid, ā meleid yaleya tamo, ā nigin meleĩlon ado! Ā tamo kayau meleid bun saa tano nigin sukar unogedig. Ā aug namen to

ulegedig, idi dilau fenē age difef, ā katĩ welegedig.*

¹⁵ “Lo ifelnēdiya tamo, Farisia tamo geid, ā meleid yaleya tamo, ā nigin meleĩlon ado! Ā, tamo tekelei waleg fen, ĩ āgenei dō fiya unenēgouf nigin, teneub bun uyokeleg fen, maaĩ naab bun uyōgefeg ago gedig, agog fen, tamo ĩ anĩ ufelnēge di, ĩ āgenei dō fiya wō yef are, ĩ ā hel nē gere tar ubodōgef wal yeĩya sane bagai wō yef.

¹⁶ “Mala ifofakeleya uyu irouya, ā nigin meleĩlon ado! Ā urōgedig, ‘Aib taka tempel yana bunem in od isen ken, total od irok, are ege, anĩ ere, aib taka tempel nē gol bunem in od isen ken, total od irok, ĩ dōf age foug.’ ¹⁷ Ā neneya, meleĩ ifofakeleya! Ere anĩ odug, gol de, oo tempel gol fateul ifenēdig anĩ? ¹⁸ Takag ā urōgedig, ‘Aib taka alta yana nem in od isen ken, total od irok, are ege, anĩ ere, aib taka sesewi fiya nē safina alta bun ifaref anĩ yana nem in od isen ken, total od irok, ĩ dōf age foug.’ ¹⁹ Ā, mala ifofakeleya tamo! Ere anĩ odug, safina de, oo alta sesewi fiya fateul ifenēdig anĩ? ²⁰ Anĩ nigin, aib taka alta yana nem in od isen ken, total od irok, ĩ alta ado safina ganan alta teten ifaref anim in od isen ken, total od irok. ²¹ Taka ĩ tempel yana nem in od isen ken, total od irok, ĩ tempel ado, Negur tempel namen ibodok anim in od isen ken, total od irok. ²² Taka ĩ saa yana nem in od isen ken, total od irok, ĩ Negur nē king sia ado, Negur ĩ an ibodok anim in od isen ken, total od irok.

²³ “Lo ifelnēdiya tamo, Farisia tamo geid, ā meleid yaleya tamo, ā nigin meleĩlon ado! Ā kabier tamal sako nanaaleg farag fen, ten tekelei unogedig, anĩ ere, ā, lo nē odug, are safina wal fiya anidi nigin to kisi gedig, are lo nē madur fiya, wau ifenēya, wau momoiya. Ā anĩ adok to tai gedig. Ā teten nē anĩ dōg fen, dum nē anĩg tai gem, are dem. ²⁴ Ā, mala ifofakeleya uyu irouya! Ā soloulā tar bun ibodok anĩ ulul nem yaleleya nigin kous gedig, anĩ ere, ā kamel tar bun ibodok anĩ utobogedig.

* **23:13:** Itotoya tunĩ eig de ditoton: welegedig. 14 Lo ifelnēdiya tamo, Farisia tamo geid, ā meleid yaleya tamo, ā nigin meleĩlon ado! Ā waab neid fō sosoin wedig kuwesig fen, tamo kayau meleid yaleya kosē meluk ago gedig. Anĩ nigin, ā darau odug bagai walogouf.

²⁵ “Lo ifelnēdiya tamo, Farisia tamo geid, ã meleid yaleya tamo, ã nigin meleilon ado! Æ kap beĩ ado agara anĩ kulo gedig, anĩ ere, name bun amuyē isokos fen, taka nē safina yaleya nigin imeĩ su lai ge fen fe tetenem yaleya ado, akorou yeya aug naumeĩ nigin dogol yenek. ²⁶ Farisia tamo, mala ifofakeleya! Kap beĩ ado name ket kulo wedig, ago ge di, teteneg fili youf.

²⁷ “Lo ifelnēdiya tamo, Farisia tamo geid, ã meleid yaleya tamo, ã nigin meleilon ado! Æ aau lalau nem matmat sigor naki fiya gen, teten lo fiya nigin biya bagai, namen anĩ are tamo gare den tuweid ado ereb ereb ganan amuyē isokosen. ²⁸ Age fiya bagai, ãg teten tamo kayau meleid bun madur tamo gen ubodōgedig, anĩ ere, nameneĩ mala yaleya ado sane bagai isokosen.

²⁹ “Lo ifelnēdiya tamo, Farisia tamo geid, ã meleid yaleya tamo, ã nigin meleilon ado! Æ profet neid matmat unog fen, madur tamo neid matmat garab wiyēgedig. ³⁰ Æ urōgedig, ‘Ada tubuda tar dibodon sain bun, ada tabodom are, ada idi geid to bagu tafem, profet naudeid to filu fadam.’ ³¹ Anĩ nigin, ã aug nigin yaor gef, ere nigin, ã idi profet didenkesin anidi neid ibor tar. ³² Ægenei tubuĩ tar neid mosor tobol ge di, isokosef!

³³ “Æ gogour bagai! Æ gogour sane gere tar! Æ naig ge fen, hel nē es fiyauf bun tamal uyagauf? ³⁴ Age fiya nigin, aya, profet, keleĩ biya tamo, tise ado ã bun sur afediyouf. Idi tunĩ udenkesigouf, tunĩ aa tetek bun udenēdigouf, tunĩ ãgenei uub fō bun wagagã gouf, fonō fonō idi darau wenēdig fen, urudigouf. ³⁵ Anĩ nigin, madur tamo Abel nē naud bun ile, Sekaraia Berekia naal, ĩ tempel alta ado atun ã ukesigen, in naud bun, madur tamo neid naudeid ganan teneub enĩ iroun nigin, anĩ nē mala solo sane ã bun isiyouf. ³⁶ Aya ã momoi arokeneik, mala solo kafĩ fiya enĩ ganan, tamo kayau sain enei bun dibodok anidi bun isiyouf.

*Jesus Jerusalem Nigin Wau Laa Fen
(Luk 13:34, 35)*

† 23:39: Sam 118:26 * 24:3: ‘Oliv Arei’ dedig.

³⁷ “O Jerusalem, Jerusalem, õ profet udenkeis fen, õ bun sur fedig anidi meein meein wedidig, sain musei aya õ wau afon ken, ogon gerē tar kuru afedig, tataro sina momou waye farumen kuru fedig gen, anĩ ere, ã utorōgedig. ³⁸ Ulogouf, ãgenei fō fonou lef. ³⁹ Anĩ nigin, aya ã arokeneik, ã aya baban to uleyagauf ile, ã fau urōgouf, ‘Odug yana bunem isif, ĩ el fiya ado,’† sain anĩ bun, ã aya uleyagauf.”

24

*Idikeleya Sain Nē Uris
(Mak 13:1-31; Luk 21:5-33)*

¹ Jesus tempel bun tamal kutū yeis, iyok ile mog, in dō fiya tar Jesus wagen disin, tempel fō tunĩ anĩ difelnen. ² Jesus to fedin, “Æ enĩ ganan ulegef de? Aya ã momoi arokeneik, meein enĩ taka, meein tura teten to yenēf, anĩ adok fau isog irailauf.”

³ Jesus Moul Arein* ibod mog, in dō fiya tar mugun wagen disin dirokenen, “Urokanamã, ere sain enĩ wō youf? Ere uris bagai anĩ, on isiya nē ado idikeleya nē?”

⁴ Jesus aitedin yalen, “Takam to idegneif nigin lo weleg. ⁵ Ere nigin, musei aya yanau nem disi dirōf, ‘Aya Kristus,’ age de fen, idi tamo kayau musei didegnēdiyof. ⁶ Æ kusĩ wōya karīg fen, tamo sigoredim kusĩ nigin wogō douf anĩ karĩ gouf, ã anĩ nigin to terē gei. Ereb ereb anĩ agef wō youf, anĩ ere, idikeleya sain fau dum isiyouf. ⁷ Teneub taka fã ye fen, ĩ teneub taka nigin kiwai ifenēf, tano taka ĩ tano taka nigin kiwai ifenēf. Naũ odug mimĩ ado, uyu taka taka bun wō youf. ⁸ Enei ganan, kayau kesu ibodōf nigin darau gariya inof gen.

⁹ “Sain age fouf bun, ã idi imeid bun ulagauf, darau odug laa bun dineneif, teneub ganan bun tamo kayau ã nigin to orodiyouf, ere nigin, aya yanau ã ado nigin. ¹⁰ Sain anĩ bun, musei momoiya dudum difouf, idi dogo tutur abob kiwai difenēf, idi abob to orodiyouf. ¹¹ Agef mog, idegēya profet musei wowã douf, idi tamo

kayau musei didegnēdiyof. ¹² Tobonunã sane anĩ fou yalauf nigin, tamo kayau musei wau laa fiya nigin folo rouf. ¹³ Anĩ ere, aib taka ĩ megeir ifar ile, idikeleya bun, Negur ĩ isennēf. ¹⁴ Saa tano nē biya od enĩ wogō difediyof anim, teneub ganan bun tamo kayau wedereid irou fen, uris gen ifenēdiyof, anĩ gama idikeleya isiyof.

¹⁵ “Sain ā log mog, ninir fonou inenēf,† are profet Daniel sigor bun wogō yen anĩ, Jerusalem fateul modoũ bun ifarauf are (ani uweseg keleĩ youf), ¹⁶ idi Judia teneub bun dibodok, arein diya diselauf. ¹⁷ Taka ĩ yogon fō sokor ibodok, ĩ to kel isil, aaben ereb ereb gei fouf. ¹⁸ Taka ĩ kabier ibodok, yogon gabar yalouf nigin to kel ilauf. ¹⁹ Naa anĩ bun, kayau bouweid ado, kayau kesu su ifenek ado, idi meleidlon adouf. ²⁰ Feluk sain Sabat naa bun ado, ā to uyagauf nigin Negur kosē gouf. ²¹ Sain anĩ bun, morō odug biya isiyof, morō age fiya gariya bun teneub inon isi gama, taka to wō yen, dum buneg taka to wō youf. ²² Negurem naa anĩ to godo falaisim are, taka to mata ibodom, tamo kayau igirnēdin idi nigin ye fen, naa anĩ godo falaisiyof. ²³ Sain anĩ bun, taka ā irokeneif, ‘Ulegēf, Kristus yeir!’ oo ‘Ī your!’ ā anĩ to momoi ge. ²⁴ Fau idegēya Kristus, idegēya profet ado wō de fen, idi kisi falauf are, Negur igirnēdin anidig didegnēdiyof nigin uris odug memelik ado difelnēdiyof. ²⁵ Karĩg, aya tetunem ā arokenein.

²⁶ “Anĩ nigin, takam ā irokeneif, ‘Kristus ĩ your, gerere tuan,’ ā to ulagauf, ‘Kristus ĩ yeir, aab namen,’ ā anĩ to momoi ge. ²⁷ Gaa iseyanem kolimei fili ye di, ile, gaa ileyaneg iledig, age fiya bagai, Tamo Naal in isiyof bun age fouf. ²⁸ Nain be ereb bouwa buru waaif nē an, tum guru difouf.

²⁹ “Morō sain anĩ bure fele di, kaisā bagai

“ ‘gaa gugum kalauf,
ogō to lalan youf,
saa ilun tamal barisa kuku rediyof,
saa nē megeir guyoyō douf.’

³⁰ “Sain anĩ bun, Tamo Naal nē uris saa bun wō youf, teneub ganan bun tamo kayau waud gudũ fouf. Idi Tamo Naal saa lalo bun, yogon fula fiya medeīya barikā megeir ado isi mog, dilouf. ³¹ Agef fen, ĩ yogon engel, taur ait odug ado susur fedidi, idi, yogon tamo kayau igirnēdin anidi, teneub akor ganan bun, saa akor ganan bun ado kuru difediyof.

³² “Gama ā, aa fig bun keleĩ walogouf: Susu bonuf fen, aarau inodif, ā keleĩ, saneya melsak. ³³ Age fiya nigin, ā anĩ ganan ulogouf are, ā keleĩ, in isiya mogo melsā, bobogē bagai ifaref. ³⁴ Aya ā momoi arokeneik, tamo kayau sain enei nē idi to sa kel mog, enĩ ganan wowā youf. ³⁵ Saa teneub ado sa kalauf, anĩ ere, neu od to bagai sa kalauf.

*Naa Sain Ado Takam To Keleĩ
(Mak 13:32-37; Luk 17:26-30, 34-36)*

³⁶ “Taka nem, anĩ nē naa sain ado to keleĩ, saa ilun engel idig sã, Naal ĩg sã, Dei yogo dogol keleĩ. ³⁷ Noa nē sain bun age fen age fiya bagai, Tamo Naal isiyof bun age fouf. ³⁸ Kuwei odug nē naa fau mog, tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. ³⁹ Idi ereb wō youf anĩ to keleĩ mog, kuwei isi, adok kuweir dilelen. Age fiya bagai, Tamo Naal ĩ isiyof bun age fouf. ⁴⁰ Tamo uru idi kabier kabĩ dalef difarauf, tekelei yalouf, taka itornēf. ⁴¹ Kayau uru idi falawa falei dife mog, tekelei yalouf, taka itornēf.

⁴² “Age fiya nigin, meleĩ unog fen, log, ere nigin, ā keleĩ sã, naa nanĩ be bun āgenei Odug isiyof. ⁴³ Ā keleĩ youf: Fō marau, bō ereb sain, bē tamo isiyof keleĩ youf are, ĩ mata ibod ken, bē tamo in fō to narĩ fouf nigin ololo fouf. ⁴⁴ Age fiya nigin, āg saika gouf, ere nigin, Tamo Naal ĩ fau sain to isiyof gouf bun isiyof.

*Ferfer Biya Ado Ferfer Sane
(Luk 12:42-46)*

⁴⁵ “Ferfer taka aim anĩ dō fiya kisi biya ado de? Ī yogon odugem, ĩ yogon odug nē fō bun anidi neid saaf, dogo neid sain kilei

† 24:15: Daniel 9:27; 11:31; 12:11

dōf ifenēdiyof nigin ima bun inon anī. ⁴⁶ Sain tamo odug kelouf bun, ferfer biya bagai age fe di, ilouf, tamo odug ī nigin biya fiyēf. ⁴⁷ Aya ā momoi arokeneik, tamo odug ī, yogon safina ganan ferfer anī ima bun inouf. ⁴⁸ Anī ere, ferfer taka sane ī wau bun irōf, ‘Neu tamo odug ilen, sain meluk biya gerō ibodok, ī kukula to isiyouf.’ ⁴⁹ Age ye fen, ī, in kabī tura tar idenēdiya gariya ino fen, gama ī yogo, saaf biya naan biya, aai sē fiya tamo geid dōdig. ⁵⁰ Ferfer anī nē tamo odug, in isiya nē naa, ferfer to isiyouf ye fen, kisif mog, in isiya sain, ī keleī sā mog, isiyouf. ⁵¹ Tamo odug, ferfer anī gudūf fisik fe fen, mala yaleya tamo geid nedi modoū bun inenēf, an are wifirig ye fen, gobora kikokō yediyouf.”

25

Kayau Taulei Ten Idi Bun Yaab Od

¹ Jesus tobol fe iron, “Sain anī bun, saa tano ī, kayau taulei ten, idi neid lam gei de diyok dilen, tamo mois tarabā difiyēf age fiya gen. ² Faif idi kisi neneya ado di, faif idi kisi biya ado. ³ Kisi neneya ado, idi neid lam gei difen, anī ere, keresin to dalen. ⁴ Anī ere, kisi biya ado, keresin kulumā ado lam dalen. ⁵ Tamo mois kaisā to isin, idi adok mulā fedi di, denenan.

⁶ “Bō atun ait taka iweig iron, ‘Ulegef, tamo mois mogo yeir, ulolō wesig fen, fotou wiyēg!’

⁷ “Kayau taulei ganan fafā de fen, lam wik koriri difeselen. ⁸ Kisi neneyam, kisi biya ado dirokenēdin, ‘Āgenei keresin tunī wanamāg, amā nemā lam gare felediyof fenē.’

⁹ “Kisi biya adodom, kisi neneya dirokenēdin, ‘Eo, keresin eī, ā ado amā ado to kisi falauf. Amam ifenēiya ban, uleg, oun keresin na nē dinodig bun, aug nigin na waleg.’

¹⁰ “Kisi neneya idi, keresin na nigin dile mog, tamo mois mogo isin. Kayau taulei idi ololo difiyen, weim bagu fiya nē tar bun, aaben dilelen. Age dife di, sukar kotū felen.

¹¹ “Dum, kisi neneya idig disin, idi diron, ‘Tamo odug, tamo odug, amā nigin sukar kā wo!’

¹² “Anī ere, tamo mois aitedin yalen, ‘Aya ā momoi arokeneik, aya ā keleī sā.’

¹³ “Age fiya nigin, ā lo weleg, ere nigin, naa kilok ado ā keleī sā.

Kabī Tamo Moni Gadō Fedin Nē Yaab Od (Luk 19:11-27)

¹⁴ “Takag, saa tano ī, tamo taka ī, uyu takā gerō naab ilau fenē nigin, ī yogon ferfer iweigneid fen, yogon safina kulatun de kenēf nigin, imeid bun inon age fiya gen. ¹⁵ Taka ī faif tausen kina ifenen, taka tu tausen kina ifenen, taka wan tausen kina ifenen, idi dogo mugu mugu neid safina kulatun fiya nē keleī kilei kilei ifeneid fen, ī uyu takā gerō naab ilen. ¹⁶ Tamo faif tausen kina yalen, kaisā bagai ilen, moni kabī bun ino fen, baban faif tausen kina yalen. ¹⁷ Tamo tu tausen kina yalen, īg agef fen, baban tu tausen kina yalen. ¹⁸ Tamo wan tausen kina yalen, anī ere, ī ile, meku yale fen, tamo odug nē moni teneub kur inokelen.

¹⁹ “Sain meluk bure fele di, ferfer neid odug kel isi fen, moni ferfer mugu mugu ifenēdin anī, idi naig dife kabī difenen anī, fated de dirokenēf nigin ferfer ganan iweig laisin. ²⁰ Tamo faif tausen kina yalen, ī baban faif tausen kina taka ado irou isi fen, ī iron, ‘Tamo odug, ō aya faif tausen kina wanan, ulef, aya baban faif tausen kina taka ado.’

²¹ “In tamo odug ī irokenen, ‘Ō de agon, ō ferfer biya dō fiya biya bagai! Ō safina naal bun kulatun biya ubodon nigin, aya ō imā bun safina musei anouf. Usi fen, ogon tamo odug nē kulīya namen ubod!’

²² “Tamo tu tausen kina yalen, īg isi fen, ī iron, ‘Tamo odug, ō aya tu tausen kina wanan, ulef, aya baban tu tausen kina taka ado.’

²³ “In tamo odug ī irokenen, ‘Ō de agon, ō ferfer biya dō fiya biya bagai! Ō safina naal bun kulatun biya ubodon nigin, aya ō imā bun safina musei anouf. Usi fen, ogon tamo odug nē kulīya namen ubod!’

²⁴ “Age fe di, tamo wan tausen kina yalen, ī isi fen, iron, ‘Tamo odug, aya keleī, ō tamo total ado, onom to utenen anī kusu wodig, onom faat to uraran anī fito wodig. ²⁵ Anī nigin, aya ō nigin

kumĩ au fen, ele, ogon moni teneub kur anokelen. Ulef, ogon safina yeir.’

²⁶ “In tamo odug ĩ irokenen, ‘Ō, ferfer sane fō tamal! Ō kelein, ayam to atenen anĩ kusu afedig, ayam faat to araran anĩ fito afedig de? ²⁷ Ō kisi agom, neu moni benk bun uno di, benk im kabĩ yalekanam, ago wom, sain aya kelauf bun, moni kabĩ yalen anĩ nē mala ado, moni ō benk wenen anĩ bagu fiya kel isin ado alem. Anĩ ō to agon.’

²⁸ “Age ye fen, ĩ ari fedin, ‘Wan tausen kina ĩ bun son ge fen, tamo ten tausen kina ado anĩ wenēg. ²⁹ Taka ĩ ereb ado, aya toru afouf, age fe di, ĩ musei adouf. Taka ĩ sã bagai, ereb taka ĩ adog, ĩ bun tamal son fouf. ³⁰ Ferfer sane anĩ mayarē gugum namen urāg, an are wifirig ye fen, gobora kikokō yediyouf.’

Sipsip Meme Ado

³¹ “Sain Tamo Naal, yogon fula fiya medeĭya ado engel ganan geid disiyouf, ĩ in ibodōya modoũ fula fiya medeĭya bun ibodōf. ³² Teneub ganan bun, tamo kayau ĩ wagen kuru difediyouf, age dife di, ĩ tamo kayau foi fediyouf, sipsip lo fiya tamo, sipsip meme ado foi fedig gen age fouf. ³³ ĩ sipsip ima biyalē inoid fen, meme ima kilē inodiyouf.

³⁴ “Agef fen, King ĩ, idi ima biyalē anidi irokenēdiyof, ‘Neu Deim el yeik ā, usig, āgenei akoreĩ waleg, gariya bun teneub inon bunem isi gama, tano āgenei nigin saika fen anĩ. ³⁵ Ere nigin, aya naũ fiya mog, ā yōya nē safina wanagen, aya naan ail fiya mog, ā naan yōya nigin wanagen, aya yaũ tamo abod mog, ā aabē urou uleyagen. ³⁶ Aya gemũ abod mog, ā gabar uflaĭnagen, aya dagi abod mog, ā kulatun wiyagen, aya kalabus bun abod mog, ā usig ki wiyagen.’

³⁷ “Age ye di, madur tamo kayau aiten dalen, ‘Odug, ere sain ō naũ ubod mog, amã saaf mafonon, ō naan ail yō mog, naan mafonon? ³⁸ Ere sain ō yaũ tamo mailiyo ken, amã nemã fō bun maleyon, ō gemũ ubod mog, gabar mafilaĭnon? ³⁹ Ere

sain ō dagi ubod mog, amã ō mailiyon, ō kalabus bun ubod mog, amã ki mayon?”

⁴⁰ “King aitedin yale irōf, ‘Aya ā momoi arokeneik, ā neu turau tar yeneid sã enidi taka el wiyēgen, are aya el wiyagen.’

⁴¹ “Age ye fen, ĩ ima kilē anidig irokenēdiyof, ‘Gelu yein ā, wageun uyag uleg, yā mala fitotoleya faimud, Satan in engel geid idi nigin dodok fen anĩ, an uleg. ⁴² Ere nigin, aya naũ abod mog, ā ereb taka to wanagen, aya naan ail fiya mog, ā naan to wanagen. ⁴³ Aya yaũ tamo abod mog, ā aabē to urou uleyagen, aya gemũ abod mog, ā gabar to uflaĭnagen, aya dagi abodon, kalabus bun abod mog, ā to kulatun wiyagen.’

⁴⁴ “Idig aiten dale dirōf, ‘Odug, ere sain ō naũ ubodon, naan sã ubodon, yaũ tamo ubodon, gabar sã ubodon, dagi ubodon, kalabus bun ubodon, amã ō to masen-non?”

⁴⁵ “King aitedin yale irōf, ‘Aya ā momoi arokeneik, ā neu idi yeneid sã enidi taka to el wiyēgen, are aya to el wiyagen.’

⁴⁶ “Age ye di, idi darau faimud ibodkeleya nē bun dilauf, madur tamo kayau idi mata faimud ibodkeleya nē bun dilauf.”

26

Jesus Yukesiya Nigin Naab Dimiren (Mak 14:1, 2; Luk 22:1, 2; Jon 11:45-53)

¹ Jesus od enĩ ganan wogō ye bure fel fen, ĩ in dō fiya tar irokenēdin, ² “Ā keleĩ, naa uru bure fele di, Pasa naa isiyouf, age fe di, Tamo Naal idi imeid bun dino di, aa tetek bun dukesiyouf.”

³ Dum pris odudug, tamo kayau neid mudur adodo, pris mudur ado in yana Kaiafas in fō bun guru difen. ⁴ An idi Jesus idegēya naab bun dale fen, dukesiyouf nigin katō difen. ⁵ Idi diron, “Sifa inoya bun to age tafouf, age tafouf, tamo kayau idi seye de fen, kusĩ dalesauf.”

Betani An Kayau Taka Jesus Mudur Bun Moul Fi Felen (Mak 14:3-9; Jon 12:1-8)

⁶ Jesus, Betani fonō an, Simon lepra dagi kulu adon in fō bun ibod mog, ⁷ kayau taka, Jesus wagen moul sumeĩ biya bagai

* 26:7: Meein alabasta nem dinon.

moni odug nem anī, moul ifeya nē gulub* ado irou isin anī, Jesus tebol bun saaf yoko ibod mog, ī mudur bun moul fi felen.

⁸ Anī in dō fiya tar dile mā, idi nameid sane fen, diron, “Ere nigin enī sekil fef?”

⁹ Moul enei na odug nem sur fiyam are, moni anī yale maleg tamo ifenēdiyam.”

¹⁰ Anī Jesus kelei ken, idi irokenēdin, “Ā, ere nigin kayau enī wau morō wenēgef? Kayau enī aya bun biya bagai age fel.

¹¹ Maleg idi ā geid faimud ubodōgouf, anī ere, aya ā geid faimud to tabodōf. ¹² Sain kayau moul enī, neu bouwau bun fi felel are, mekur ainēf nigin dodok fiyal. ¹³ Aya ā momoi arokeneik, tenebur ein nain be biya od enī wogō douf, ereb kayau anī age fen anīg wogō douf. Age dife di, idi ī nigin dum dum wogō de fen, karī dalauf.”

Judas Jesus Kiwai Tamo Imeid Bun Inoya Nigin Yo Yen

(Mak 14:10, 11; Luk 22:3-6)

¹⁴ Agef fen, dō fiya tar tuwelf idi atun taka, yana Judas Iskariot tamal, pris odudug wagedin ile fen, ¹⁵ to fedin, “Sain aya ī imeī bun ano di, ere anī ā aya wanagauf nigin kisi gef?” Age ye di, idi teti silwa koin moni anī diweskene ken, difenen. ¹⁶ De anenem, Judas ī Jesus kiwai tamo imeid bun inoya nigin naab imirek ilen.

Odug Nē Bō Saaf

(Mak 14:12-26; Luk 22:7-23; Jon 13:21-30; 1 Korin 11:23-25)

¹⁷ Bret yis sā sifa inoya naa matu anī bun, in dō fiya tar Jesus wagen disi to difiyen, “Ō amā nain anī Pasa saaf wāf nigin, amā dodok mafe konōf anī oroyok?”

¹⁸ Jesus iron, “Taun uleg, tamo taka wagen wōg fen, urokenēg, ‘Tise irok: Aya neu naa mogo melsā. Aya, neu dō fiya tar geid, ogon fō bun Pasa saaf male fen, sigigi mafouf.’” ¹⁹ Anī nigin, in dō fiya tar, Jesus iron anī dō de fen, Pasa saaf nigin dodok difen.

²⁰ Aragau di, Jesus, in tuwelf geid, tebol bun saaf doko dibodon. ²¹ Idi saaf dokon, Jesus iron, “Aya ā momoi arokeneik, ā

atun takam, aya kiwai tamo imeid bun ineyauf.”

²² Idi waud gudūf fen, mugu mugu wogō fiyēya nigin gariya dinon, “Odug, momoi bagai, aya sā?”

²³ Jesus aitedin yale iron, “Taka ī, amā uruwom imamā takai beī bun nu mafesil, im aya kiwai tamo imeid bun ineyauf.

²⁴ Tamo Naal, ī nigin Negur nē Itotoya irok kilei, agef bagai ilauf. Anī ere, tamo ī Tamo Naal kiwai tamo imeid bun inof, ī malalon ado! Ī sina to gō fem, are dem.”

²⁵ Age ye di, Judas, tamo ī Jesus kiwai tamo imeid bun inouf, iron, “Momoi bagai, aya sā, Rabi†?”

Jesus aiten yale iron, “Are ō ogo urok.”

²⁶ Idi saaf dokon, Jesus bret yale, Negur de fiye ken, bret anī mumāf, in dō fiya tar ifeneīd fen, iron, “Bret enei waleg fen, wōg, eī neu bouwau.”

²⁷ Agef fen, ī kap yale, Negur de fiye ken, kap anī ifeneīd fen, iron, “Ā ganan, enī bun wōg. ²⁸ Eī neu naudou bar itenēya nigin, are tamo kayau musei mosor yalel kenēdiyof nigin fi felef. ²⁹ Aya ā arokeneik, aya baban wain enī to āf, gaman ile, aya ā geid, neu Dei nē tano bun, wain mata tāf anī bun.”

³⁰ Anī bure fele di, idi seg taka dalel fen, idi Moul Arei bun diselen.

Pitam Jesus Wa Fiyēf Nigin Jesus Iron

(Mak 14:27-31; Luk 22:31-34; Jon 13:36-38)

³¹ Jesus idi irokenēdin, “Bō enī bun, ā ganan aya utornagauf, ere nigin, are Negur nē Itotoya irok kilei:

“‘Aya sipsip marau aukesi di,

sipsip ganan firagagaū difouf.†

³² Anī ere, aya, laa bun tamal kel fā au fen, aya ket Galili uyu alauf.”

³³ Pita, Jesus aiten yale iron, “Idi ganan ō ditornōfeg, aya are to bagai atornōf.”

³⁴ Jesus Pita irokenen, “Aya ō momoi arokonok, bō enī bun tataro kokorok yeya sā mog, ō aya nigin wa towo wouf.”

³⁵ Anī ere, Pita Jesus irokenen, “Momoi ada uruwom gare tau mogoufeg, aya ō

† 26:25: Rabi, anī nē gariya, Juda neid tise. ‡ 26:31: Sekaraia 13:7

nigin to bagai wa afouf.” Age ye di, dō fiya tar ganan, od tekelei anī diron.

*Getsemane Oun
(Mak 14:32-42; Luk 22:39-46)*

³⁶ Age de fen, Jesus in dō fiya tar geid, modoū taka yana Getsemane dilen. An, ī idi irokenēdin, “Aya oun ele, kosē au mog, ein ubodōgouf.” ³⁷ Jesus, Pita Sebedi gere tar uru gei feid fen, dile mā, ī wau gudūf fen, moro kalaisin. ³⁸ Age fe di, ī idi irokenēdin, “Neu malaukanon tobega le fen, wau morō gudū falaisi, laa nē daū bun ifaref. Ein ufareg fen, ā aya geid lo tafalauf.”

³⁹ Naal godof iroule fen, kubū ye, nawa tenebur kumokur fe fen, kosē yen, “Neu Dei, kisi falauf are, darau nē kap enī walel kanauf. Anī ere, neu oroya to dō wouf, on oroya anī dogol dō wo.”

⁴⁰ Age fel fen, Jesus in dō fiya tar gedin kel isin, mulā den mog, iledin, ī Pita to fiyen, “Tamo ā, aya geid aua tekelei lo fiya nigin to kisi feleya de? ⁴¹ Ā, lo weleg fen, kosē gouf, are ā kisi yeīya bun to kubū gouf nigin. Uur are orof, anī ere, bouwa anī malegef.”

⁴² Ī, anī dō fiya, baban kel ile, kosē yen, “Neu Dei, kap enī bun aya to āf are, ō kap enī yaleleya nigin kisi feleya sā, age fouf, ō ogon oroya dō wouf.”

⁴³ Ī kel isin, baban denena mog iledin, ere nigin, idi meleid morō gudū fesin. ⁴⁴ Agef fen, ī idi itorneid fen, baban kel ilen, kosē yen anim towo, od tekelei iron anī baban kosē yen.

⁴⁵ Agef fen, ī in dō fiya tar gedin kel ile, idi irokenēdin, “Ā fau si unog fen, yenēyai gef? Ulegef, sain mogo melsā, Tamo Naal mogo mosor tamo imeid bun ilef. ⁴⁶ Fafāg fen, teleg! Kiwai imeid bun inoya tamo yeir isif!”

*Jesus Dirounen
(Mak 14:43-50; Luk 22:47-53; Jon 18:3-12)*

⁴⁷ Jesus fau wogō ye mog, in dō fiya tar tuwelf idi anī atun taka, Judas isin. Tamo musei dimig adodo seburer adodo ī geid disin. Pris odudug, tamo kayau neid mudur adodo idim sur difedi di, disin.

⁴⁸ Gama Judas, Jesus kiwai tamon inoya tamo ī, Jesus yaor fiyēf nigin idi uris ifenēdin: “Tamo aya umā fiya bunem aan afiyēf anī, ī waleg.” ⁴⁹ Judas, kaisā bagai, Jesus wagen ile iron, “O Rabi, fel!” Age ye fen, ī umā fiyen.

⁵⁰ Jesus ī irokenen, “Mou, ereb wofon usif, are ago.”

Age ye mog, tamo Jesus wagen dile dirounen. ⁵¹ Age dife di, tamo Jesus weim difaren anidi takam, ima iran, dimig ul feis yalen, pris mudur ado nē ferfer weder salōf iran.

⁵² Jesus ī irokenen, “Ogon dimig in modoū bun uno, ere nigin, idi ganan dimig ul difeis dalef, dimig bun gare douf. ⁵³ Ā kisi gef are, aya, neu Dei isennauf nigin aweignē di, ī kaisā bagai, engel musei biya, sewenti-tu tausen wal fiya imau bun inoya kisi feleya sā de? ⁵⁴ Age afouf are, Negur nē Itotoya anī nigin iron enī ganan, naig fe kisi fel, agef wō youf?”

⁵⁵ Sain anī bun, Jesus tamo musei irokenēdin, “Ā bē tamo walegedig gen, aya ā dimig adodo seburer adodo waleyagau fenē usigef de? Naa ganan, aya tempel fofomala bun abod ken, od afelnēdidig, anī ere, ā aya to urouyagen. ⁵⁶ Anī ere, profet neid itotoya kisi falauf nigin, enī ganan wō yen.” Age ye di, in dō fiya tar ganan ditornē diyalelen.

Jesus Juda Kaunsel Neid Kot Mala Bun Ifaren

(Mak 14:53-65; Luk 22:54, 55, 63-71; Jon 18:13, 14, 19-24)

⁵⁷ Idi Jesus dalen, pris mudur ado Kaiafas garan dirou dilen, an lo ifelnēdiya tamo, tamo kayau neid mudur adodo geid guru difen. ⁵⁸ Anī ere, Pita, Jesus dume naal soso fiye ken, dōf tokō fel ile, pris mudur ado nē fofomalan wō yen. Ī namen ile fen, kabī tamo geid dibod ken, naig be difiyēf nigin lo fen.

⁵⁹ Pris odudug, Juda neid kaunsel ganan geid, Jesus laa bun dinenēf nigin, bou bun idegēya od dinou fenē dimiren. ⁶⁰ Musei wagen disi fen, disenneid fen, idegēya od diraran, anī ere, Jesus laa bun dinenēf nigin od gariya taka to dilen.

Dum tamo uru wõ den, ⁶¹ anidim diron, “Tamo enim iron, ‘Aya Negur nẽ tempel narĩ afel fen, naa towo bun baban anouf, are kisi feleya.’ ”

⁶² Age de di, pris mudur ado fã ye, ifar fen, Jesus irokenen, “Õ to solo urõf de? Eĩ ere od anĩ, tamo enidi õ nigin dirousif?”

⁶³ Anĩ ere, Jesus mutũ ifaren.

Pris mudur ado Jesus irokenen, “Õ mata ibodõya Negur mala bun urõf nigin, od arokonok. Õ momoi Kristus, Negur Naal be anĩ, amã urokanamãf.”

⁶⁴ Jesus aiten yalen, “Ao, õ ogo yer urok. Anĩ ere, aya ã ganan arokeneik: Dum bun, Tamo Naal Negur megeir ado ima biyalem ibod ken, saa lalo bun isi mog, ã ulogouf.”

⁶⁵ Jesus age ye di, pris mudur ado karĩ ye fen, in kolos serek fe fen, iron, “Ĩ Negur kono fel! Ere nigin ada od megeir fiya nigin tamo baban tamirẽf? Ulegef, ã gama Negur kono fel anĩ karĩ gel. ⁶⁶ Anĩ ã ere kisi gef?”

Idi aiten dalen, “Ĩ laa bun ilauf.”

⁶⁷ Age de fen, idi, Jesus nawa bun disisne ken, imedim dun. Tunim wala fã de fen, ⁶⁸ diron, “Kristus, kurõ weis urokanamã, aim õ inok?”

Pita Jesus Nigin Wa Fen

(Mak 14:66-72; Luk 22:56-62; Jon 18:15-18, 25-27)

⁶⁹ Pita, pris mudur ado nẽ fõ fofomalan ibod mog, kabĩ kayau momoul taka wagen isi iron, “Õg Jesus Galili tamal weim uyõgen.”

⁷⁰ Anĩ ere, ganan meleid bun ĩ waf fen, iron, “Õ od urok enĩ, aya keleĩ sã.”

⁷¹ Age ye fen, ĩ iyok ilen, bobog bun, an kayau momoul takam ile fen, tamo kayau an difaren idi irokenẽdin, “Tamo enĩ, Jesus Nasaret tamal ĩ geiden.”

⁷² ĩ baban waf fen, total od iron, “Tamo are aya keleĩ sã!”

⁷³ Sain naal ile di, idi an difaren Pita garan dile fen, diron, “Momoi bagai, õ idi neid taka, on od wogõya bun ogo yaor yok.”

⁷⁴ Age de di, ĩ mogo yogo bouwa geluf fen, total od irokenẽdin, “Tamo are aya keleĩ sã!”

Age ye mog, kaisã bagai tataro kokorok yen. ⁷⁵ Age fe di, Pita Jesus wogõ yen anĩ nigin weder fokõ yen, “Sain tataro kokorok yeya sã mog, õ aya nigin wa wo towo wouf.” Anĩ nigin, ĩ weder fokõ ye di, ĩ mayarẽ ile fen, inã odug yalen.

27

Judas ĩ Yogo Kosim Bun Ula Iseginen

(Mak 15:1; Luk 23:1, 2; Jon 18:28-32; Aposel 1:18, 19)

¹ Bonimeĩ bagai, pris odudug, tamo kayau neid mudur adodo geid, Jesus yuke-siya nigin od difon. ² Idi ĩ difõ dale diroule, gawaman nẽ mudur Pailat ima bun dinon.

³ Anĩ Judas, Jesus kiwai ifenen, ĩ lof mog, Jesus dukesiyouf nigin ĩ bou bun od dun anĩ ile fen, ĩ kisif wau yu ken, teti silwa koin moni kel iroule, pris odudug, tamo kayau neid mudur adodo geid ifenẽdin. ⁴ Judas iron, “Aya mosor anon, ere nigin, ĩ mosor sã mog, ayam kiwai anon.”

Age ye di, idi aiten dalen, “Amã ere mayõf? Are ogon sakir.”

⁵ Judas moni irou ile, tempel namen irara ken, ilen. Anĩ ĩ iya ile, yogo kosim bun ula iseginen.

⁶ Pris odudug moni gei de fen, diron, “Lo to wal tafouf nigin, moni enĩ tempel nẽ kolekta bokis bun to ufeg, ere nigin, moni enĩ naud mala.” ⁷ Katõ fiya bure difel fen, moni anim, mis inoya tamo nẽ teneub anĩ na dale fen, yaũ tamo mumã difediyouf nigin, idi kisi difon. ⁸ Anĩ bunem, gamag teneub anĩ yana, Naud nẽ Mayã dedig. ⁹ Are profet Jeremaia nẽ od, eig ye wogõ yen anĩ kisi felen: “Idi teti silwa koin moni dalen, moni anĩ Israel tamo kayau ĩ nigin digiren. ¹⁰ Idi moni anim, mis inoya tamo nẽ teneub na dalen, Odug aya agef irokanan kilei.”*

Jesus Pailat Mala Bun Ifaren

(Mak 15:2-15; Luk 23:3-5, 13-25; Jon 18:33-19:16)

* 27:10: Sekaraia 11:12, 13; Jeremaia 19:1-13; 32:6-9

11 Jesus, Rom gawaman nē mudur Pailat, mala bun ifare di, gawaman nē mudur Pailat ī to fiyen, “Ō Juda neid king de?”

Jesus iron, “Are de yer, ō urok anī.”

12 Sain pris odudug, tamo kayau neid mudur adodo geid, Jesus bou bun od dun, ī aitedin to yalen. 13 Pailat Jesus to fiyen, “Ō boū bun od dirarak to karī wof de?” 14 Anī ere, Jesus aiten to yalen, ī bou yūya od tekelei bagai nigin taka to solof iron. Age fe di, gawaman nē mudur, odug biya terē yen.

15 Gama gawaman mudur nē tobonunā, Pasa sifa naa bun, tamo kayau, tamo taka kalabus bun digirī di, yalishnēdig. 16 Sain anī bun, idi kalabus tamo taka, yana sane bagai adon, ī yana Barabas. 17 Bonimeī, tamo kayau, Pailat nē fō bun guru difesi di, Pailat to fedin, “Nanī ā aliskeneīf anī oroyeik, Barabas de oo Jesus ī Kristus dedig anī?” 18 Ere nigin, ī yogo kelein, tamo kayau neid mudur adodo idi, kiyeī bunem, Jesus ī ima bun dinon.

19 Pailat od es fiya modoū bun ibod mog, in aiwa od sur fen, “Tamo anī ī mosor sā, ī nigin ereb taka to ago wouf, ere nigin, aya, nor bō, ī nigin ami ken, morō odug ī nigin ailel.”

20 Anī ere, pris odudug, mudur adodo geid, tamo kayau od irōya nigin wedereid diroun, are idi Barabas yalishnēya nigin ado, Jesus dukesiyouf nigin nonī douf nigin age difen.

21 Gawaman nē mudurem to fedin, “Aya ā aliskeneīf nigin, uru enidi ā nanī oroyeik?”

Idi aiten dalen, “Barabas anī.”

22 Pailat to fedin, “Age fiyauf are, aya, Jesus, Kristus dedig nigin, ere naig afouf?”

Idi ganan diron, “Aa tetek bun ūf!”

23 Pailat to fedin, “Ere nigin? Ere mosor ī age fen?”

Anī ere, idi total bagai diweig diron, “Aa tetek bun ūf!”

24 Pailat ī anī ile fen, ī od irōya nigin naab taka sā, anī tamo kayau idi total bagai dino fen, kusī dou fenē age dife di, ī naan yale fen, tamo kayau meleid bun ima

kulof fen, ī iron, “Tamo enī naud aya bun sā, are āgenei sakir!”

25 Tamo kayau ganan aiten dale diron, “Yogon naud utor len, amā bun ado nemā kesu tar bun yenēf!”

26 Age de di, ī Barabas yalis ifenēdin. Agef fen, ī irō di, Jesus wagī de fen, ī aa tetek bun dūf nigin, kusī tamo imeid bun inon.

Kusī Tamo Jesus Diselinen

(Mak 15:16-20; Jon 19:2, 3)

27 Gawaman mudur nē kusī tamo, Jesus dale gawaman mudur nē fō namen dile fen, an mayā taka, kusī tamo ganan gou difalaisi salili difiyen. 28 Idi Jesus nē kolos dinukeis fen, kolos meluk giriya anī difounnen. 29 Age dife fen, idi malū duri ado dale, teter tanak kori de fen, ī mudur bun kurū difen. Idi werī tibog dale, ima biyalē dino fen, wagen bobou de fen, diselinen. Idi diron, “O Juda neid king gai gai ibodōf!” 30 Idi ī disisne ken, idi baban werī tibog ima bun tamal dale, mudur bun baba baban dun. 31 Idi diseline kel fen, kolos meluk giriya anī dinukeis, yogon kolos bagai anī baban difounnen. Age de fen, kusī tamom idi, ī aa tetek bun dūf nigin dirou diselen.

Jesus Aa Tetek Bun Dun

(Mak 15:21-32; Luk 23:26-43; Jon 19:17-27)

32 Sain idi mayā anī ditor diyok dile fen, idi Sairini tamal tamo taka fotou difen, yana Simon. Idi ī, Jesus nē aa tetek faali fouf nigin nugo difiyen. 33 Idi disel, modoū yana Golgota (anī nē gariya, Mudur Tuwa nē Modoū) wō den. 34 Kusī tamo idi, an wain makik ado falei difen anī, Jesus yāf nigin difenen. Anī ere, ī yō ile fen, yōya nigin itoron. 35 Sain idi ī aa tetek bun du kel fen, idi aisaī dira kodē de fen, yogon kolos morou morou gadō difen.† 36 Age de fen, idi an dibod ken, lo difiye kelen. 37 Ī bou bun od dinon anī, idi yogon mudur ilun ditoton: EĪ JESUS, JUDA NEID KING. 38 Age de fen, kusī tamo idi, bē tamo urug, ī geid aa tetek bun didenen, taka yogon ima

† 27:35: Itotoya tunī dum ditoton: gadō difen, are od profet wogō yen anī kisi falauf nigin: “Idi neu gabar idi atun gadō de fen, neu kolos nigin aisaī dira ken, kodē den.” (Sam 22:18)

biyalē, taka yogon ima kilē. ³⁹Tamo kayau dile disi dife, Jesus kono difiye ken, kasā difiyē, mudureid dira ken, ⁴⁰idi diron, “Ō onom tempel narī wol fen, baban naa towo bun anouf won, ō ogo nigin usennēf! Ō Negur Naal wouf are, aa tetek bun tamal kutū weis!”

⁴¹Age difiyen gen, pris odudug, lo ifelnēdiya tamo, tamo kayau neid mudur adodo, idi Jesus diselinen. ⁴²Idi diron, “Tunī anī isennēdin, anī ere, ī yogo nigin isennēya kisi feleya sā! Ī Israel nē king! Utornēg len, gama aa tetek bun tamal kutū yesiyouf. Age fe di, ada ī nigin momoi tauf. ⁴³Ī Negur nigin momoi yedig. Ī irōdig, ‘Aya Negur Naal,’ anī nigin, Negur ī nigin orouf are, utornēg len, gama Negurem ī isennēf.” ⁴⁴Age difiyen gen, bē tamo Jesus geid, aa tetek bun didenen idig, ī nigin kono fiya od in bou bun diran.

Jesus Laa Fen

(*Mak 15:33-41; Luk 23:44-49; Jon 19:28-30*)

⁴⁵Tuwelf kilok gaa ado nē ile, tri kilok aragaun, gugum isin, teneub ganān kerub fen. ⁴⁶Tri kilok age fiya mog, Jesus wade bagai iweig iron, “Eloi, Eloi, lama sabaktani?” –anī nē gariya, “Neu Negur, neu Negur, ere nigin ō aya utornal?”[†]

⁴⁷Tunī an difaren, anī karī de fen, diron, “Ī Eliya iweignek.”

⁴⁸Kaisā bagai, idi atun takam gudu re ile, sponsŒ yalen, wain kai ado bun nu feis fen, tibog bun ino fen, Jesus yāf nigin ifenen. ⁴⁹Tunī ganān diron, “Gama utornēg, Eliya isi isennē mog, tailauf.”

⁵⁰Jesus baban ait odug nem iweig di, in uur ul fe yale di, laa fen.

⁵¹Sain anī bun, gabar meluk odug tempel namen modoū fateul bun ibodon anī, serek fe uru fen, ilunenem irousil teneburen. Teneub yoūf fen, meein fara fedin.

⁵²Matmat bobog kā fedī di, tamo kayau fateul musei gare den idi, baban mata fafā den. ⁵³Idi matmat bunem fafā den anidi, Jesus kel fā ye di, Jerusalem fateul taun

dile fen, tamo kayau musei meleid bun wowā den.

⁵⁴Kusī tamo tunī, idi neid orowa geid, Jesus tari difiyen, teneub yoū fe di, ereb ereb ganān wowā ye di, dile fen, fatuk bagai terē de fen, diron, “Momoi bagai, Ī Negur Naal!”

⁵⁵Kayau musei an difaren, idi so del fen, lo difen. Idi Galili anenem Jesus aruna yaleya nigin dō difen anidi. ⁵⁶Idi atun Maria Magdala tamal, Maria Jems Joses ado neid sineid, taka Sebedi gere tar neid sineid.

Jesus Mū Difen

(*Mak 15:42-47; Luk 23:50-56; Jon 19:38-42*)

⁵⁷Aragau mog, safina ado tamo, Arimatea tamal, yana Josef isin, ī Jesus nē dō fiya tar anī nē taka. ⁵⁸Ī Pailat wagen ile, Jesus nē bouwa buru nigin to fiyē di, Pailat yo ye fen, Jesus nē bouwa buru ī ifenēya nigin, kusī tamo irokenēdin. ⁵⁹Josif bouwa buru yale gabar lalau amuyē sā anim sile fen. ⁶⁰Agē fen, ī yogon matmat mata sa bun ku yalen ani bun, Jesus nē bouwa buru inenen. Ī meein odug wele fe di, isi, matmat awa ku katī fel fen, ilen. ⁶¹Maria Magdala tamal, Maria taka ado, matmat wagen dibodon.

Kusī Tamo Matmat Lo Difen

⁶²Naa taka, Sabat naa nē dodok fiya naa anī bure fele di, pris odudug, Farisia tamo geid, Pailat wagen dilen. ⁶³Idi diron, “Tamo Odug, amā karī maulef, idegēya tamo ī matan iyo ken, iron, ‘Naa towo bure fele di, aya laa bun tamal, baban mata kel fā auf.’ ⁶⁴Age fiya nigin, ō urō len, naa towo bun matmat totol bagai tari difouf. Age fiya sāf, in dō fiya tar disi, bouwa buru bē dale mā, tamo kayau didegneid fen, ī laa bun tamal kel fā yel douf. Idegēya dum isiyouf anī gai sane bagai, uruwa nē wal fiyauf.”

⁶⁵Pailat iron, “Lo fiya tamo tekelei waleg. Uleg fen, ā, taka nem matmat bun ileyā nigin, totol bagai katī feleyā nigin, ā keleī anī kilei bagai, matmat agog totol bagai lo gouf.” ⁶⁶Anī nigin, idi dile,

[†] 27:46: Sam 22:1 § 27:48: Maaīwō tamal safina taka, ku nanaal musei ado naan dū fedig.

matmat bun meein teten wō dū dino fen, lo fiya tamo anī dinenen.

28

Jesus Laa Bun Tamal Mata Kel Fā Yen
(Mak 16:1-10; Luk 24:1-12; Jon 20:1-10)

¹ Sabat naa bure fele di, uub nē naa matu bun bonimei mumurei ado, Maria Magdala tamal, Maria taka ado matmat dilou fenē dilen.

² Sain anī bun kaisā bagai, mimī totol ado wō yen, ere nigin, Odug nē engel saa ilun tamal isin, matmat bun ilen, meein welef yerin ile di, teten ibodon. ³ Agef fen, in lo fiya kolimef filiya gen, in kolos lalau medeīya saa lalo lalau gen. ⁴ Matmat lo difen tamo, idi ī nigin kumī de, tererē de fen, laa tamo gen denenan.

⁵ Engel kayau irokenēdin, “To kumī wog, ere nigin, aya keleī, ā Jesus aa tetek bun dun anī umirnēgef. ⁶ Ī ein sā, ī iron kilei, mogo laa bun tamal mata kel fā yel. Usig fen, ī yenen modoū uleg. ⁷ Agog fen, kaisā bagai uleg, in dō fiya tar urokenēdig: ‘Ī laa bun tamal kel fā ye fen, ī ketem Galili ilef. An ā ī ulogouf.’ Aya mogo ā arokeneim.”

⁸ Age ye di, kayau idi, kaisā bagai matmat ditor dilen, kumī den, anī ere, waud kulīya ado, Jesus nē dō fiya tar dirokenēdiyof fenē nigin gududu den. ⁹ Age de mog, Jesus tarabā feid fen, iron, “Fel.” Idi ī wagen disin, in ye dirou fen, seli dabin. ¹⁰ Age dife di, Jesus idi irokenēdin, “Ā, to kumī wog, uleg fen, neu turau tar idi, Galili dilauf nigin urokenēdig; idi an aya dileyau f.”

Matmat Lo Fiya Tamo Neid Od

¹¹ Kayau naab luwe dile mog, matmat lo difen tamo tunī, taun namen dile, pris odudug bun, ereb ereb ganān wō yen anī nigin od dinon. ¹² Pris odudug, mudur adodo geid, guru de, kisi katō de fen, idi kusī tamo moni odug difenēdin. ¹³ Idi, matmat lo difen tamo dirokenēdin, “Ā urōgouf, ‘Jesus nē dō fiya tar bō disi fen, mainana kel mog, in bouwa buru bē dalen’ gouf. ¹⁴ Od enī gawaman nē mudur bun ilauf are, amā faded mafiyē di, ā morō to walogouf.” ¹⁵ Anī nigin, kusī tamo

moni dalen, idi diron kilei age difen. Od enī, Juda tamo kayau bun iyokelen, gamag agef yenek.

Jesus In Dō Fiya Tar Soosi Kabī Odug Ifenēdin

(Mak 16:14-18; Luk 24:36-49; Jon 20:19-23; Aposel 1:6-8)

¹⁶ Age fe di, in dō fiya tar ilewen Galili dilen, arei Jesus irokenēdin nē an dilen.

¹⁷ Sain idi Jesus dilen, idi seli dabinen, anī ere, tunī waud urun. ¹⁸ Age dife di, Jesus wagedin isin irokenēdin, “Megeir adok, saa ilun nē ado tenebur nē anī ganān, Negurem aya ifanan. ¹⁹ Anī nigin, ā, teneub ganān bun, tamo kayau ganān bun uleg fen, neu dō fiya tar unenādigouf, Dei yana nem, Naal yana bunem, Awa Uur Fateul yana bunem, idi naan ugunēdigouf. ²⁰ Agog fen, od aya ā arokenein anī ganān dō difouf nigin ufelnēdigouf. Momoi bagai, aya ā geid sain faimud tabodok, ile, sain idikalauf bun.”

Mak

Jon Naan Igunēdiya Tamo Naab Dodok Fenen

(Matyu 3:1-12; Luk 3:1-18; Jon 1:19-28)

¹ Jesus Kristus, Negur Naal nigin, biya od gariya inoya.

² Profet Asaia nē itotoya bun ibodok: “Aya neu arū tamo ī ket sur afe di, ī uyu ilauf, ogon naab dodok fouf.”*

³ “Ait taka gerere tuan iweig irok, ‘Odug nē naab dodok ge fen, madur wenēg.’”†

⁴ Age fiya nigin, Jon isin, tamo kayau gerere tuan od irokenēdi di, waud falei del, nedi mosor yaleleya nigin naan igunēdin. ⁵ Judia kalilī fiya, Jerusalem tamo kayau ganān, ī garan dilen. Idi neid mosor kurō difesi di, idi im Jordan naanū naan igunēdin. ⁶ Jon kamel siwi nem gabar diwan anī ifonūdig. Agef fen, gaar gabar nem lū diwan anim luwa gu fedig. Ī totobi nin te ado yōdig. ⁷ Eī enī yogon od iron, “Taka ī aya dumeun dō fīyau, anī ere, in megeir neu wal fiya. Aya to biya nigin, iborou bobou fe fen, in ye su nē malū biru fiya kisi feleya sã.‡ ⁸ Aya naan nem aguneik, anī ere, ī Awa Uur Fateulem iguneif.”

Jesus Naan Igun Ado Ī Bun Kisi Fiya Wō Yen

(Matyu 3:13-4:11; Luk 3:21, 22; 4:1-13)

⁹ Sain anī bun, Jesus Nasaret taun oun Galili nediwom isi, Jonem Jordan naan igunen. ¹⁰ Jesus naanum fã yale fen, ī lof mog, saa tano kāf fen, Awa Uur kuburir gen, ī bun isi mog, ilen. ¹¹ Age fe di, ait taka saa ilunem isin, “Ō neu Kesu, ō nigin aya wau laa fedig, ō nigin aya wau kulī yedig.”

¹² Kaisã bagai, Awa Uurem sur fīyē di, gerere tuan ilen. ¹³ Ī gerere tuan an, naa foti ibod mog, Satanem kisi fiyen. Ī gaar kuī geid difar mog, engel idim anī ī disennen.

Jesus Nē Dō Fiya Tar Uyulil Iweignēdin
(Matyu 4:12-22; Luk 4:14, 15; 5:1-11)

¹⁴ Jon kalabus bun dinenen ibod mog, Jesus Galili ile, Negur nē biya od anī kurō feis iron. ¹⁵ Ī iron, “Sain mogo isil. Negur nē tano mogo melsak. Wauī falei wog fen, biya od enī nigin wauī momoi gei!”

¹⁶ Jesus Galili maaī yeri iyo ken, ī Simon, ne tura Endru ado, daliyou bun kakāg dirā mog, ileidin, ere nigin, idi gau yaleya tamo. ¹⁷ Jesus iron, “Usig, dō wiyag, aya ā tamo gei fiya nigin aneyeif.” ¹⁸ Sain anī bun bai, nedi kakāg ditor ken, ī dō difiyen.

¹⁹ Sain ī naal iyok ile fen, ī Sebedi naal Jems, tura Jon ado, waag namen, idi neid kakāg dodok dife mog, ileidin. ²⁰ Kaisã bagai, ī iweignēdin. Age fe di, idi temeid Sebedi, in kabī tamo oroi yaledin anidi geid waag bun ditorneid fen, Jesus dō difiyen.

Jesus Kaa Sane Irun
(Luk 4:31-37)

²¹ Idi Kapenaum taun dilen. Sain Juda neid uub naa Sabat wō ye di, Jesus Juda neid uub fō namen ile fen, od ifelnēdiya gariya inon. ²² Tamo kayau in od nigin terē den, ere nigin, ī tamo yana adom gen ifelnēdin, ī lo ifelnēdiya tamo gen sã. ²³ Agef mog bai, tamo taka kaa sanem ironen anī, nedi uub fō namen an kāi ye iron, ²⁴ “Ō amã ere naig wamã fenē, Jesus Nasaret tamal? Ō amã daig wamã fenē nigin usil de? Aya ō nigin keleī, Negur nē Fateul bagai!”

²⁵ Jesus total ado iron, “Foro wol! Ī namen tamal ulō weis!” ²⁶ Kaa sane, tamo anī total bagai yokū fīyē, sur fīyē, ira ken, kāi ye, ulō yesin.

²⁷ Tamo kayau ganān terē de fen, abob toti difen, “Eī ere? Keleī mata, agef fen, total ado! Ī irō di, kaa seseneg dō difedig.”

²⁸ Ī age fen anī nē od kaisã bagai, Galili kalilī fiya fonō anī adok iyokelen.

Jesus Musei El Fedin
(Matyu 8:14-17; Luk 4:38-41)

* 1:2: Malakai 3:1 † 1:3: Asaia 40:3 ‡ 1:7: Juda neid tobonunã anī, sain tamo yana ado isi di, idi neid kabī tamo in ye su nē malū biru difedig.

²⁹ Sain Juda neid uub fō ditor ken, kututū desin, idi Jems Jon ado weim, Simon Endru ado neid fō bun dilen. ³⁰ Simon nē mam, i bouwa uruwa odug ado nigin fatarē yenen, anī idi i nigin Jesus dirokenen. ³¹ Anī nigin, Jesus kayau wagen ile, kayau ima yales irou isennē di, fā yen. Age fe di, bouwa uruwa anī kayau folo fiye kele di, kayau i aruneid yalen.

³² Aragau anī bun gaa kuru kel mog, tamo kayau dagi adodo, kaa sesen adodo ganan, Jesus wagen guri difeid, disin. ³³ Taun anī nē tamo kayau ganan, fofomala anī bun guru difen. ³⁴ Anī bun, Jesus, tamo kayau dagi fire fire adodo musei el fiyēdin, kaa sesen musei irudi di, diyawon. Anī ere, kaa sesen idi i nigin kelein. Anī nigin, idi to wogō douf nigin sigoreid ifofan.

Jesus Moilin Negur Kosē Fiyen (Luk 4:42-44)

³⁵ Bonimei bagai mumurei ado, Jesus fā yale, fō itor, moilin ile, an Negur kosē fiyen. ³⁶ Simon i, ne tā tar geid dimirne ken, dilen. ³⁷ An fotou difiye ken, idi dirokenen, “Tamo kayau ganan ō dimirnok!”

³⁸ Jesus aitedin yale iron, “Ada uyu takā talauf, fonō melsā anī bun. Aya aneg od arōf, anī nigin aya asin.” ³⁹ Age ye fen, Jesus Galili kalilī fiya ganan bun iyo ken, nedi uub fō fō bun od iro ken, kaa sesen irudi di, diyawon.

Tamo Taka Lepra Dagi Ado (Matyu 8:1-4; Luk 5:12-16)

⁴⁰ Tamo taka lepra dagi ado, i wagen isi, ibor bobou fe fen, igon, “Ō oroyōf are, el wiyauf.”

⁴¹ Jesus wau gudūf fen, ima irā, kobū fiye ken, i iron, “Aya wau irok, ō bouwā biyaf!” ⁴² Age ye di, kaisā bagai lepra guruma i itornē di, bouwa biya len.

⁴³ Jesus kaisā bagai totol bagai weder irou fen, sur fiyē di, ilen: ⁴⁴ “Karī welei, enī aib taka to urokenēf, anī ere, ō pris wagen ule, ō bouwā ufelnēf, ō bouwā biyal anī nigin Moses nē od irok anī dō fen, sesewi fiya wenēf, anī bunem yaore di, tamo kayau dilouf.” ⁴⁵ Anī ere, i iyok ile fen, kurō feis irō di, od anī iyokelen. Anī nigin,

Jesus mal atun taun taka bun to iledig, i moilin ibodon. Anī ere, tamo kayau firen firen temeleid fau fau i wagen disidig.

2

Jesus Tamo Bouwa Ilolaisin Anī El Fiyen (Matyu 9:1-8; Luk 5:17-26)

¹ Naa tunī bure fele di, Jesus baban Kapenaum taun ile di, tamo kayau idi, i fō taka bun ibodok yeya anī karī den. ² Anī nigin, tamo kayau musei guru difen, fō aaben ado fofomala dino dale di, modoū san. Age dife di, Jesus od irokenēdin. ³ Jesus od irokeneid mog, tamo tunī tamo ilolaisin anī tamo aiwa ifenēyam faali de, dirou disin. ⁴ Idi i Jesus garan irou ileya kisi feleya sā, ere nigin, tamo kayau musei, anī nigin, idi Jesus ibodok nē fō soko anī korō difel fen, tamo gabgab bun yen mog, folo folō dife di, isilen. ⁵ Jesus idi neid momoiya ile fen, i tamo ilolaisin irokenen, “Kesu, ogon mosor alelkonok.”

⁶ Age fe di, lo ifelnēdiya tamo tunī an dibodon, idi dogo namedin kisi difen, ⁷ “Ere nigin i age irok? I kono fef! Taka nem mosor yaleleya to yenek, Negur yogo dogol.”

⁸ Kaisā bagai, Jesus yogon kisi bun, idi waudim kisi difen anī kelein. Agef fen, i idi irokenēdin, “Ā ere nigin agog kisi gef? ⁹ Tamo ilolaisin anī irokenēya nigin nanī anī karika, ‘Ogon mosor alelkonok’ de, ‘Fā wo, ogon gabgab wale fen, uyok ule’? ¹⁰ Anī ere, Tamo Naal i tenebur ein mosor yaleleya nigin yana ado anī, ā keleī youf nigin...” Age ye fen, i tamo ilolaisin anī irokenen, ¹¹ “Aya ō arokonok, fā wo, ogon gabgab wale fen, fō bun ule.” ¹² I fā yale, ganan meleid bun in gabgab yale iyok ilen. Age fe di, tamo kayau ganan terē de fen, Negur yana dales diron, “Ada kulu ereb eig fiya taka to tailen!”

Jesus Lewi Iweignen (Matyu 9:9-13; Luk 5:27-32)

¹³ Jesus i baban daliyou sirin ilen. Tamo kayau musei i wagen disile di, i od gariya ino ifelnēdin. ¹⁴ I iyok ile, Lewi, Alfeus naal, takis yaleya fō bun ibod mog, ile fen,

irokenen, “Aya dō wiya.” Age ye di, ï fã yale, dō fiyen.

¹⁵ Jesus Lewi nē fō bun saaf yō mog, takis yaleya tamo musei, mosor adodo tamo kayau musei, ï, in dō fiya tar geid, weim saaf don, ere nigin, idi musei Jesus dō difiyen. ¹⁶ Sain lo ifelnēdiya tamo, Farisia tamo idi, Jesus ï takis yaleya tamo, mosor adodo tamo kayau geid, weim saaf doko dibod mog, dileid fen, idi in dō fiya tar anī to difiyēdin, “Ere nigin ï takis yaleya tamo, mosor adodo tamo kayau geid weim doko?”

¹⁷ Anī karī ye fen, Jesus idi irokenēdin, “Dagi sã anidim dokta bun ileyā nigin waud to yenek, dagi adodom dogol. Aya madur tamo anidi iweignēdiya nigin to asin, mosor adodo tamo anidi iweignēdiya nigin asin.”

*Kuri Nigin Jesus To Difiyen
(Matyu 9:14-17; Luk 5:33-39)*

¹⁸ Jon nē dō fiya tar, Farisia tamo geid, idi kuri den. Tamo tunī disi, Jesus to difiyen, “Naig fe di, Jon nē dō fiya tar, Farisia tamo nē dō fiya tar geid, idi kuri dedig, anī ere, ogon idi sã?”

¹⁹ Jesus aitedin yale iron, “Naig fe di, mois tamo ibod mog, in tamo tar idi kuri douf? Idi to age difouf, ere nigin, ï idi geid fau dibodok. ²⁰ Anī ere, naa fau isi di, anī bun mois tamo idi bun tamal yalelnē di, naa anī bun gama idi kuri douf.

²¹ “Tamo taka, gabar tubu, gabar masak mata ado baguf fen, to iwauf. Taka ï age fouf are, masak mata anim tubu arirī fe di, tubu kudef irailauf. ²² Takag age fiya, taka nem wain mata meme gabar* tubu bun to itinēf. ï age fouf are, wain anim age fe di, meme gabar gē ye fen, serek fouf. Age fe di, wain meme gabar ado sane lauf. Age fiya nigin, ï wain mata meme gabar mata bun itinēf.”

*Jesus ï Sabat Nē Odug
(Matyu 12:1-8; Luk 6:1-5)*

²³ Sabat naa† taka bun, Jesus in dō fiya tar geid, wit kabī atu diyok dile fen, idi wit biya tunī fito difen. ²⁴ Age dife di, Farisia

tamo idi Jesus dirokenen, “Ulef, ere nigin idi Sabat naa nē lo difodul ken, Sabat naa bun oug difef?”

²⁵ Jesus irokenēdin, “Sain Dawid, ne tā tar geid naū fedi di, saaf lau de fen, Dawid age fen anī, ã to uwesegen de? ²⁶ Abiata, pris mudur ado ibodon sain anī bun, Dawid ï Negur nē fō namen ile fen, bret fateul prisem dogol dōdig† an ibodon anī yokon, ï bret tunī, ne tā tareg ifenēdin.”

²⁷ Age ye fen, ï idi irokenēdin, “Tamo isennēya nigin Sabat naa inon, tamom Sabat naa anī isennēf nigin to inon. ²⁸ Anī nigin, Tamo Naal ï Odug, Sabat nēg ï Odug.”

3

*Tamo Taka Ima Sitakā Gege Fefu Fiya
(Matyu 12:9-14; Luk 6:6-11)*

¹ Sain taka, Jesus baban Juda neid uub fō bun ilen. Tamo taka ima sitakā gege fefu fen anī, an ibodon. ² Tamo tunī an difaren idi, Jesus bouwa bun od dinouf nigin naab dimiren, anī nigin, idi ï Sabat naa bun tamo anī el fiyē mog, dilouf nigin ololo difen. ³ Jesus tamo ima fefu fiya anī irokenen, “Ganan meleid bun fã, ufar.”

⁴ Age ye fen, Jesus idi to fedin, “Nanī anī Sabat naa bun lo dō fiya? Tobonunã biya age fiya anī de, tobonunã sane age fiya anī; isennē di, mata ibodōya anī de, yukesiya anī?” Anī ere, idi nin kē delen.

⁵ Jesus seye ye fen, idi fele fedin, idi waud togun nigin, ï wau odug gudūf fen, tamo anī irokenen, “Ogon imã yaī wo.” ï yaī fe di, in ima oditekei biya len. ⁶ Age fe di, kaisã bagai Farisia tamo idi kututū deis dile, Herod nē dō fiya tar weim, idi Jesus naig de dukesiyouf nigin od katō difen.

Tamo Kayau Musei Jesus Dō Difen

⁷ Jesus in dō fiya tar geid, daliyoun disile di, tamo kayau musei Galili temeleid dō difen. ⁸ Jesus ï ereb ereb ganān age fen anī karī de fen, tamo kayau musei Judia distrik, Jerusalem taun, Idumea distrik, Jordan naan kalilī fiya, Taia Saidon ado kalilī fiya adok, ï wagen disin. ⁹ Tamo

* **2:22:** Juda neid tobonunã, idi meme gabar nem darum diwadig. † **2:23:** Sabat naa anī, Juda neid uub nē naa. ‡ **2:26:** Lo bun, bret fateul anī, prisem dogol dōdig.

kayau museim Jesus to sile difiyēf nigin, ī yogon waag naal taka dodok de yenēf nigin, in dō fiya tar irokenēdin. ¹⁰ Ere nigin, ī mogo musei el fedin. Anī nigin, idi dagi adodo Jesus kobū fiya nigin abob susur difedin. ¹¹ Kaa sesen Jesus dilef sain ganan, idi ī wagen kuku de, den ken, diweig dirōdig, “Ō Negur Naal.” ¹² Anī ere, Jesus, ī aib anī, to wogō douf nigin total bagai katū fedin.

Jesus Aposel Tuwelf Igirnēdin
(Matyu 10:1-4; Luk 6:12-16)

¹³ Jesus arei wala bun isel ibod ken, idi ī aib aib oron anī iweignēdin. Age fe di, idi ī wagen disin. ¹⁴ Jesus ī tuwelf gei fen, aposel wowā douf nigin igirnēdin, are idi Jesus geid fen, dum biya od wogō douf nigin fau sur fediyouf, ¹⁵ idi total dale fen, kaa sesen dirudiyouf nigin age fen. ¹⁶ Jesus tuwelf igirnēdin enidi, are Simon (Jesus ī yana yun Pita), ¹⁷ Jems Sebedi naal, tura Jon ado (Jesus idi yeneid yun Boaneges, anī nē gariya, Kolimei Gere Tar), ¹⁸ Endru, Filip, Batolomyu, Matyu, Tomas, Jems Alfeus naal, Tadeus, Simon Selot* taka, ¹⁹ Judas Iskariot, ī dum Jesus kiwai imeid bun inenen.

Jesus Belsebub Ado Difiyen
(Matyu 12:22-32; Luk 11:14-23; 12:10)

²⁰ Jesus ī, fō taka bun ile di, tamo kayau musei baban guru difen. Anī nigin, Jesus in dō fiya tar geid, saaf yōya kisi feleya san. ²¹ Jesus nē tura tar od anī karī de fen, idi ī dale diroulauf nigin dilen, ere nigin, idi diron, “Ī neneya kisi ado.”

²² Age dife di, lo ifelnēdiya tamo Jerusalem temeleid disi diron, “Ī Belsebub ado, ī kaa sesen neid mudur yana bunem, kaa sesen irudidig.”

²³ Anī nigin, Jesus idi iweigneid fen, yaab od nem irokenēdin, “Satan ī naig Satan iruwauf? ²⁴ Tano tekelei anī, yogo faraf, kiwai ifenēf are, tano anī to ifarauf. ²⁵ Fō tekelei anī, yogo faraf, kiwai ifenēf are, fō anī to ifarauf. ²⁶ Takag, Satan ī yogo faraf, kiwai ifenēf are, ī to ifarauf, in sain mogo bure felef. ²⁷ Anī ere, taka

nem tamo total ado nē fō bun safina gei fou fenē, tamo total ado ket ifokel fen, anī ī yogon fō bun bē yalouf. ²⁸ Aya ā momoi arokeneik, tamo neid mosor ganan ado kono difef are, fau yalel kenēdiyof. ²⁹ Ani ere, aibem taka Awa Uur Fateul kono fiyek, in mosor to yalelauf, in mosor anī faimud ibodkalauf.”

³⁰ Jesus od enī iron, ere nigin, idi dirōdig, “Ī kaa sane ado.”

Jesus Nē Sina, Tura Tar Geid
(Matyu 12:46-50; Luk 8:19-21)

³¹ Age ye di, Jesus nē sina, tura tar geid disin. Mayarē difar mā, idi Jesus dirokenēf nigin taka sur difen. ³² Tamo kayau musei ī salili difiyek dibodon, idi ī dirokenen, “Ogon sinā, turā tar geid, mayarē ō dimirnok.”

³³ Jesus to fedin, “Ai anī neu naai, neu turau tar?”

³⁴ Age ye fen, ī, salili difiyē dibodon idi lo feid fen, ī iron, “Enidi anī neu naai, neu turau tar! ³⁵ Aib idi Negur nē oroya dō difedig anidi anī, neu turau, neu mainou, neu naai.”

4

Faat Irarāya Tamo Nē Yaab Od
(Matyu 13:1-23; Luk 8:4-15)

¹ Jesus baban daliyou sirin, gariya ino, od ifelnēdin. Tamo kayau guru de, salili difiyen anī gai musei biya, anī nigin, tamo kayau adok ubun difar mog, ī waag taka daliyoun ifaren anī namen isil ibodon.

² Agef fen, ereb ereb musei yaab od nem ifelneid fen, iron, ³ “Karī gei! Kabī marau taka faat irarāf nigin ilen. ⁴ Sain ī irarak ile mog, tunī naab luwen kuku ren, are ninā disi dakasin. ⁵ Tunī meein tuar kuku ren, an teneub badagar. Are kaisā bagai fokū den, ere nigin, teneub are badagar bagai.

⁶ Anī ere, sain gaa ise di, bali are ilalaid, laasi yedin, ere nigin, idi warumutei sā.

⁷ Faat tunī malū duri atun kuku ren, are malū duri anī fā ye fen, sile feledin, anī nigin, biya to yun. ⁸ Faat tunī teneub biya bun kuku ren, are idi fokū yedin, oduduge di, biya imadin, taka biya teti,

* **3:18:** Juda neid kusī mala taka, idi Rom gawaman ado kusī dedig.

taka biya siksti, taka biya wan handred, age fef ilauf.”

⁹ Age ye fen, Jesus iron, “Taka ï karïya nigin weder ado, ï karï youf.”

¹⁰ Sain Jesus ï yogo ibod mog, yogon dô fiya tar tuwelf, tamo tunï salili difiyen anidi geid, yaab od nigin ï to difiyen.

¹¹ Jesus idi irokenëdin, “Negur tano nê waa are Negur mogo ifenein, anï ere, idi dumeitur onudi nigin, ereb ereb ganan yaab od bunem wogõ yef, ¹² ere nigin,

“ ïdi meledim diledig, anï ere, idi meleid fokõya sã,

idi wederedim karï dedig, anï ere, idi gariya keleï sã.

Age fiya sãf are, idi waud falei de di, mosor yalel kenëdiyof.* ”

¹³ Age ye fen, Jesus idi irokenëdin, “Ã yaab od enï wauï to fokõ youf? Age fiyauf are, naig fe di, ã yaab od tunï nigin wauï fokõ youf? ¹⁴ Faat irarãya tamo, biya od irarak. ¹⁵ Tamo tunï idi faat naab luwen kuku ren gen, an biya od iraran. Idi karï de mog, kaisã bagai Satan isi, biya od idi namedin iraran anï yaleledig. ¹⁶ Tunï idi faat meein tuar iraran gen, idi od anï karï de fen, kaisã bagai dale fen, waud bun kulï dedig. ¹⁷ Anï ere, idi warumutei sã, anï nigin, idi sain meluk to dibodõf. Sain, biya od nigin, morõ be kafï fiya be isif, idi kaisã bagai dirofosis. ¹⁸ Tunïg faat malũ duri atun iraran gen, idi biya od karï den. ¹⁹ Anï ere, tenebur mata ibodõya nê sii fiya, safina ado ibodõya nê kisi fiya, oroya fire fire isif anidim, biya od sile fe di, anim biya to yũf. ²⁰ Tunï faat teneub biya bun iraran gen, idi biya od karï den, dale di, anï biya yũf, taka biya teti, taka biya siksti, taka biya wan handred, age fef ilauf.”

Lam Yoki Bun (Luk 8:16-18)

²¹ Jesus idi irokenëdin, “Ã lam urou usig, beï kuren be fatar farumen unogouf de? Age fiya ban, ã lam yogon yoki bun to useginnëgouf de? ²² Ereb ereb ganan iminëyan yenek anï ganan yaor fouf, ereb ereb ganan nar fen yenek anï ganan irou

isi, biru fel fen, yaau du fouf. ²³ Taka ï karïya nigin weder ado, ï karï youf.”

²⁴ Jesus idi irokenëdin, “Ã od karï gef anï, ed ge kisi gouf, ã idi nigin kisi gef gen, ã nigineg age de kisi difouf, anï tobol feneïf. ²⁵ Aib taka ï ado, wal fiya ifenëf, aib taka ï sã, ereb ereb ï ado anïg ï bun yalelauf.”

Faat Odugef Nê Yaab Od

²⁶ Takag Jesus iron, “Negur nê tano are eig fiya gen, tamo taka teneub bun faat irarak. ²⁷ Bõ ado gaa ado, tamo ï mulaï yenek, fã ye iyok, faat fokũ ye fen, odugef, anï ere, ï naig be fe odugef, ï keleï sã. ²⁸ Teneub yogo dogol biya inodig, uyulil bali, age fe di, turu, anï turu bun biya inodig. ²⁹ Biya bure fele di, kaisã bagai ï dimig gunõ willa ado inodig, ere nigin, biya yaleya sain isif.”

Masted Faat Nê Yaab Od (Matyu 13:31, 32, 34; Luk 13:18, 19)

³⁰ Baban Jesus iron, “Negur nê tano, ere taka age fiya tauf? Ere bunem yaab tafouf? ³¹ ï masted faat age fiya. ï faat memereis bagai ã teneub bun utenëgedig. ³² Anï ere, ï utenëge di, ï odugouf, ï kabier saaf ganan wal fediyof, in beneir odudug irara ken, buri ino di, ninã ilun temeleid disi dibodõf.”

³³ Jesus yaab od age fediya musei bunem, tamo kayau idi keleï youf kisin, od wogõ fiyëdin. ³⁴ ï tamo kayau ereb od irokenëdiyof fenë, yaab od bunem dogol. Anï ere, ï mugu yogon dô fiya tar geidef are, ereb ereb ganan faded fedidig.

Jesus Yau Uyë Ado Irokenëdi Di, Kee Delen (Matyu 8:23-27; Luk 8:22-25)

³⁵ Naa anï bun aragau di, Jesus in dô fiya tar irokenëdin, “Ada daliyou sitakã talauf.” ³⁶ Idi tamo kayau ditorneïd fen, Jesus waag bun ibod mog, idi ï dale dirou dilen. Waag tunïg weim dilen. ³⁷ Yau odug fã ye di, maaï fã ye, waag yu ken, maaï ifilege di, waag namen isokosen. ³⁸ Jesus ï, waagibun edë bun mulaï yen mog, idi ï turï difiyë dirokenen, “Tise, ada naanũ talalau fenë, õ to kisi walef de?”

* 4:12: Asaia 6:9, 10

³⁹ Ī fā yen, yau sakā fiye ken, maaī irokenen, “Kee resig fen, dē weleg!” Age ye di, yau dē yeleye di, maaīg oditekei dē yelen.

⁴⁰ Jesus in dō fiya tar irokenēdin, “Ere nigin ā kumī wogef? Ā fau momoiya sã de?”

⁴¹ Idi fatuk bagai kumī tererē de fen, abob toti difen, “Eī aim bagai? Ī irō di, yau maaī adog ait dō difef!”

5

Jesus Tamo Taka Kaa Sesen Musei Ado El Fiye

(Matyu 8:28-34; Luk 8:26-39)

¹ Idi naan daliyou dibal dile, Gerasa teneub bun wō den. ² Jesus waag bun tamal kutū yesi di, tamo taka kaa sane ado, matmat bunem ī fotou fiyē fenē isin.

³ Tamo matmat bun ibodon anī, taka nem ī ifōya nigin kisi feleya sã, sen nemeg ifōya kisi feleya sã. ⁴ Ī sain musei sen nem, ye ima ado difofādīg, anī ere, ī sen kokour fel, yem ain weweur fedig. Taka nem total ino fen, ī ifō di, dē yeleya kisi feleya sã. ⁵ Sain ganan bō ado gaa ado, ī matmat atun ado areineg iweig kaī ye fen, meeinem yogo bouwa kokour fedig.

⁶ Ī mala irakelen, Jesus gerom ile fen, gudu ref ile, Jesus wagen kubū ye, ibor bobou fen. ⁷ Ī ait odug nem iweig iron, “Ō aya ere naig wiyau fenē, Jesus, Negur Ilun Bagai nē Naal? Negur yana nem aya ō agonok, ō aya to daig wiyauf!” ⁸ Ere nigin, ī mogo kaa sane irokenen, “Ō tamo enī bun tamal ulō weis!”

⁹ Age ye fen, Jesus ī to fiyen, “Ō yanā ai?”

Ī iron, “Aya yanau Ami, ere nigin, amā musei biya.” ¹⁰ Jesus idi akor anī bun tamal to irudiyouf nigin, ī baba baban Jesus igonen.

¹¹ Melsã arei wala sirin, bor musei biya saaf doko difaren. ¹² Kaa sesen Jesus digonen, “Amā bor atun susur wamāf, yo wamā di, idi namedin malalauf.” ¹³ Jesus idi yo fedi di, kaa sesen ulolō deis disel, bor namedin dilelen. Bor, tu tausen age fiya, gududu de, bebeig sane baurin daliyoun disil, naanū gare desin.

¹⁴ Bor lo fiya tamo diya dile, od anī taun ado fonō fonō wogō den. Age dife di, tamo kayau ereb wō yen anī dilou fenē dilen.

¹⁵ Sain idi Jesus garan wō den, idi meleid dirā, tamo kaa sesen museim dirounen anī, an garab yel, kisi biya ado ibod mog, dilen. Anī nigin, idi kumī den. ¹⁶ Tamo idi meledim dilen anidim, kaa sesenem tamo diroun anī ado bor age difen anī nigin, tamo kayau wogō difiyēdin. ¹⁷ Age dife di, tamo kayau, Jesus ī idi neid teneub anī itor ilauf nigin digonen.

¹⁸ Age de di, Jesus ī waag bun sō ye mog, tamo kaa sesenem dalen anī, Jesus ado dilauf nigin nonī fiyen. ¹⁹ Jesus ī to awa yokon irokenen, “Ō fonō ogon ibor tar gedin ulauf, Odug ō nigin age fen anī ado, ī naig fe fen, ō nigin wau yun anī, idi urokenēdiyof.” ²⁰ Age ye di, tamo anī itor ilen, Jesus ī nigin age fen anī, Dekapolis* teneub bun tamo kayau wogō fiyēdi di, idi ganan terē den.

Kayau Naal Laa Fen Ado Dagi Kayau Taka

(Matyu 9:18-26; Luk 8:40-56)

²¹ Jesus baban waag bun ibal, naan daliyou sitakā ilen, ī daliyou yerin ibod mog, tamo kayau musei disi salili difiyen.

²² Age de mog, Juda neid uub fō lo fiya nē mudur taka, yana Jairus an isin. Ī Jesus ile fen, ī ye gariyan kubū yen. ²³ Ī igone ken, irokenen, “Nau barai naal oboim fef. Uma fen, imā teten uno di, ī biyal, matauf.” ²⁴ Anī nigin, Jesus ī uruwom dilen.

Tamo kayau musei dō difiyē, kitikiti de, susir difiyek dilen. ²⁵ Kayau taka idi atun an ifaren, ogō dagi faimud ado yar tuwelf iyon. ²⁶ Kayau anī dokta musei bun ilen, anī ere, bouwa bun morō odug idi bun yalen. Agef fen, yogon safina ganan irailen. Anī ere, kayau ī bouwa biya leya ban sane len. ²⁷ Sain kayau ī Jesus nigin karī yen, ī Jesus dume dōf, tamo kayau atu ile, in kolos kobū fen, ²⁸ ere nigin, kayau ī kisi fen, “Aya in gabar dogol kobū afouf, are deuf, aya fau biyauuf.” ²⁹ Kaisã bagai, kayau naud segē yelen. Age fe di, kayau ī yogo bouwa bun karī yen, are karika len.

* 5:20: Anī nē gariya, Ten Taun.

³⁰ Kaisā bagai, Jesus in total ï bun tamal ul fe yale mog, karī yen. Ì tamo kayau atun falei yel, to fedin, “Aim neu kolos kobū fel?”

³¹ In dō fiya tar Jesus dirokenen, “Tamo kayau musei ò kiti diyok, ule fen anī, ò ‘Aim aya kobū fiyal?’ wof.”

³² Anī ere, Jesus ï aibem age fen anī ilouf nigin, fau fau fai yen. ³³ Age fe di, kayau ï yogo ereb age fen kelei ken, Jesus wagen isi, ye gariyan kubū yen. Ì kumī tererē ye fen, momoi od ganan Jesus irokenen.

³⁴ Jesus kayau irokenen, “Nau barai, ogon momoiya anim el yom. Waū unois ule, dagi anim to ifōyōf.”

³⁵ Jesus fau od wogō ye mog, tamo tunī, Juda neid uub fō lo fiya mudur Jairus nē fō bunem disin. Idi diron, “Nē barai mogo laa fel. Ere nigin ò tise fau morō wenek?”

³⁶ Jesus od idi diron anī idod ken, Juda neid uub fō lo fiya mudur anī irokenen, “To kumī wo, momoi dogol wo.”

³⁷ Jesus ï takam dō fediya nigin katū fedin, Pita, Jems, ne tura Jon idim dogol.

³⁸ Idi Juda neid uub fō lo fiya mudur nē fō bun ulō deis fen, Jesus mala iran, tamo kayau waud gudūf fen, inā legur mog, iledin. ³⁹ Jesus aaben ile fen, idi irokenēdin, “Ere nigin ā fatuk bagai inaī gef? Kayau naal ï laa fiya sã, ï mulā yenek.” ⁴⁰ Anī ere, idi Jesus kasã difiyen.

Age dife di, Jesus idi irud le fen, ï kesu nē sina tama ado, in dō fiya tar geid, kesu yenen nē namen dilen. ⁴¹ Jesus ï imalē yalesne ken, irokenen, “Talita kum!” (anī nē gariya, “Kayau naal, aya ò arokonok, fã wo!”). ⁴² Kaisā bagai, kayau naal fã yale iyon (ï yar tuwelf ado). Anī nigin, idi oditekei terē den. ⁴³ Anī ere, taka to diro ken, karī youf nigin, Jesus total bagai katū fedin. Agef fen, ï kayau naal saaf difenē di, yãf nigin irokenēdin.

6

Profet Taka Fō Gariyan Yana Sã (Matyu 13:53-58; Luk 4:16-30)

¹ Jesus an itor ken, in dō fiya tar geid yogon fō gariyan dilen. ² Sabat naa wō ye di, Jesus Juda neid uub fō bun ifelnēdiya

gariya inon. Age fe di, musei ï karī difiye ken, terē de diron,

“Tamo enī ereb ereb enei nain gei fen? Eī ere kelei anī ï ifenen? Anī bunem ï memelikeg inodig. ³ Ì to kapenta de? Ì to Maria naal fen, Jems, Josef, Judas, Simon ado tureid de? In main tar ada to ein weim de?” Age de fen, idi ï kiwai difenen.

⁴ Jesus idi irokenēdin, “Profet taka ï, in fō gariyan, in sirag atun ado, in fō bun dogol, ï yana sã.” ⁵ Ì an memelik taka inoya kisi feleya sã, anī ere, ï dagi tamo teke tekelei dogol ima tetedin ino fen, el fedin. ⁶ Jesus idi neid momoiya to ile fen, terē yen.

Jesus In Dō Fiya Tar Tuwelf Sur Fedin (Matyu 10:5-15; Luk 9:1-6)

Agef fen, Jesus fonō fonō iyo ken, od ifelnēdin. ⁷ Jesus tuwelf iweignēdi di, idi ï wagen disin. Ì uru uru, sur feid fen, kaa sesen dirudiyouf nigin, idi megeir ifenēdin.

⁸ Ì fadim yu ken, iron, “Delē uyōgouf nigin ereb taka to walogouf, bret sã, kodol sã, moni sã, manig dogol. ⁹ Sendel ufonūg fen, gabar ufilaīgef dogol, taka to walogouf. ¹⁰ Ereb sain ā fō bun ulagauf, an ubodōgef uleg, taun anī utorōgouf. ¹¹ Fonō taka bun ā to daleyei ken, ā to karī diyeif, sain ā fonō anī utorōg fen, yeī aas tu welege di, idi ã kiwai difenein anī keleiif.”

¹² Tamo kayau waud falei youf nigin, idi dile, od wogō den. ¹³ Idi kaa sesen musei diruid fen, tamo kayau dagi ado musei moul diguneid, el difedin.

Jon Naan Igunēdiya Tamo Ula Gudū Difen (Matyu 14:1-12; Luk 9:7-9)

¹⁴ King Herod Jesus nigin od karī yen, ere nigin, Jesus nē yana fō fō ganan karī den. Tunī diron, “Jon naan igunēdiya tamo, ï laa bun tamal kel fã yen, anī nigin, memelik nē total ï bun kabī yalef.”

¹⁵ Tunī diron, “Ì Eliya.”

Tunī diron, “Ì profet taka, profet kulu temeleid taka gen.”

¹⁶ Anī ere, sain Herod od enī karī ye fen, ï iron, “Jon, tamo anī ayam ula gudū afen, ï laa fen anī kel fã yen!”

¹⁷ Ere nigin, kulu Herod ï irō di, Jon dale difo ken, kalabus bun dinenen. Are Herod yogo tura Filip nē kayau Herodias yalen nigin, ¹⁸ Jon Herod irokenēdig, “Ō turā nē kayau son won, are lo ufodulen.”

¹⁹ Herodias Jon nigin name sane fen, ï dukesiyouf nigin wau iron. Anï ere, ï kisi feleya sã, ²⁰ ere nigin, Herod Jon kumï fiye ken, ï, Jon anï madur fateul tamo ye fen, kulatun fedig. Sain Herod ï Jon nē od karï yedig, ï wau togudig, anï ere, ï in od karïya nigin orodig.

²¹ Dum sain biya wō yen, Herod ï sina gō fen anï nē naa bun, in kabï tamo odudug, in kusï mudur adodo, Galili teneub bun uyu irouya tamo anidi nigin tar inon.

²² Sain anï bun, Herodias nē barai isi, seg kui ye fen, dole di, Herod in tamo tar geid waud al fen.

Anï nigin, king kayau momoul irokenen, “Ereb taka nigin waū iro ken, to wiyau, are ō afonōf.” ²³ Age ye fen, ï wau adok kuturol fen, kayau momoul irokenen, “Ereb taka nigin ō to wiyau, aya neu tano anï fara af, uru afe fen, sitakã ifonōya kisin anï afonōf.”

²⁴ Kayau momoul ile, sina irokenen, “Ere bagai nigin aya to afiyēf?”

Sina iron, “Jon naan igunēdiya tamo nē mudur nigin.”

²⁵ ï kaisã bagai ile, king irokenen, “Aya gama bagai Jon naan igunēdiya tamo nē mudur, beï bun uno wanauf anï orouf.”

²⁶ King ï wau togun bagai, anï ere, in wau kuturol fen, tamo kayau meleid bun mogo iron nigin, ï kayau nē od yaleleya itoron. ²⁷ Anï nigin, king kaisã bagai ula gudū fedig kabï tamo, Jon nē mudur yale irou isiyouf nigin sur fiyen. Age fe di, ï ilen, kalabus bun Jon ula gudūf fen, ²⁸ mudur anï beï bun ino irou isin, kayau momoul ifenē di, ï bam yale, sina ifenen. ²⁹ Jon nē dō fiya tar anï karï de fen, disin, in bouwa dale, matmat bun mū difen.

Jesus Faif Tausen Tamo Saaf Ifenēdin
(Matyu 14:13-21; Luk 9:10-17; Jon 6:1-14)

³⁰ Aposel idi Jesus wagen guru de fen, idi ereb age difen ado difelnēdin anï adok, wogō difiyen. ³¹ Age de mog, tamo kayau

musei dilef disif difen, anï bunem, idi saaf yōya kisin san. Anï nigin, Jesus idi irokenēdin, “Ā aug dogol usig, aya geid talauf, modoū taka motikeleyan an si tanouf.”

³² Anï nigin, idi dogo dogol waag dale diya, moilin dilen. ³³ Anï ere, tamo kayau musei lo difeid mog, dilen nigin, idi nigin kelei ken, taun ganan bun temeleid idi yedim gududu de dile, idi ket an wowā den. ³⁴ Sain Jesus wō ye fen, mala iran, tamo kayau musei iledin, ï idi nigin wau yun, ere nigin, idi sipsip marau sã gen. Anï nigin, ï ereb ereb musei idi ifelnēdin.

³⁵ Sain anï bun, gaa mogo kuru kelen, anï nigin, in dō fiya tar ï garan disi diron, “Eï gerere tuan, sain mogo sa kelel.

³⁶ Tamo kayau susur wodi di, dilau, ago di, idi fonō kalilī fiya fonō fonō dile fen, dogo yōya nigin saaf na gei difouf.”

³⁷ Anï ere, ï aitedin yale iron, “Idi dāf nigin ereb āgem wenēdigouf.”

Idi ï dirokenen, “Tamo kayau musei nigin, saaf na yaleya moni odug biya. Ada tele, bret bun moni odug age fiya tara ken, tafenēdi di, dāf de?”

³⁸ Jesus idi irokenēdin, “Bret ganï ā ado? Uleg ulougouf.”

Idi kelei ken, Jesus dirokenen, “Bret faif, gau uru ado.”

³⁹ Age de di, Jesus, tamo kayau ganan, mala fire fire, fisir biya bun dibodadāf nigin, in dō fiya tar irokenēdin. ⁴⁰ Anï nigin, idi mala bun dibodadan, tunï wan hundred, wan hundred, tunï fifti, fifti.

⁴¹ Jesus bret faif gau uru ado yale, saa ilun itad fen, ï Negur de fiye ken, bret mumā fen. Agef fen, ï in dō fiya tar ifenēdin, tamo kayau wagedin dinodiyouf nigin. ï gau urug agef tamo kayau atun foif ifenēdin.

⁴² Idi ganan don kisi felen. ⁴³ In dō fiya tar, tamo kayau bret gau ado dokon, tunï ditoraran anï fito difen, karam tuwelf isokosen. ⁴⁴ Faif tausen tamo anidim bret don.

Jesus Naan Teteatu Iyon
(Matyu 14:22-33; Jon 6:15-21)

⁴⁵ Kaisã bagai, Jesus, in dō fiya tar waag bun, idi ketem Betsaida dilau nigin, sur fedin. Agef fen, ï tamo kayaug irudin.

⁴⁶ Jesus idi itorneïd fen, Negur kosë fiyëf nigin arein iselen.

⁴⁷ Aragau mog, waag daliyou atun ifaren, anī ere, Jesus ī yogo mugu teneub bun. ⁴⁸ Jesus in dō fiya tar total bagai ful dife mog, iledin, ere nigin, yau odug biya wewu fedin. Maur oboi wele ye mog, Jesus daliyou teteatu idi gedin iyok ilen. Ī wal fediyon fenē age fen. ⁴⁹ Anī ere, sain in dō fiya tar meleid diran, Jesus daliyou teteatu iyō mog, dile mā, idi kisi baraū de fen, idi ui guri den, ⁵⁰ ere nigin, idi ganān ī dile fen, kumī tererē den.

Kaisā bagai, Jesus idi irokenēdin, “Total unog! Are ayam. To kumī wog.” ⁵¹ Age ye fen, ī idi gediyouf nigin waag bun sō ye di, yau kee relen. Idi oditekei terē den, ⁵² ere nigin, idi bret bun waud to fokō yen, idi neid waud katī felen.

Jesus Genesaret Oun Dagi Adodo El Fedin

(Matyu 14:34-36)

⁵³ Idi sitakā dibabal dale, Genesaret teneub bun wō de fen, an waag difokel difaren. ⁵⁴ Idi waag bunem kututū deis mog, tamo kayau enei Jesus yeya idi kelein. ⁵⁵ Idi Jesus an ibodok yeya karī def are, idi fonō anī kalilī fiya adok gududu de fen, dagi tamo gabgab ado guri difedi di, disin. ⁵⁶ Sain ganān, modoū fire fire bun, Jesus ilen, fonō fonō, taun tunī, taun dumeitur, tamo kayau idi maket modoū bun dagi tamo dinenēdin. Idi yogon gabar iri kobū difouf nigin Jesus nonī difiyen. Ganān idi ī kobū difen, dagi fara feledin.

7

Amuyē Sā Amuyē Ado

(Matyu 15:1-20)

¹ Farisia tamo, lo ifelnēdiya tamo tunī geid, Jerusalem temeleid disī guru de fen, Jesus salili difiyen. ² Idi lo difeid mog, in dō fiya tar tunī amuyē ado imeid kulo fiya sā saaf don. ³ (Farisia tamo ado Juda tamo kayau ganān, saaf kaisā to dōdig. Idi imeid ket kulo difel fen, saaf dāf, ere nigin, idi mudur adodo biyeid neid tobonunā dō

difedig. ⁴ Idi maket bun tamal ke douf, idi saaf kaisā to dāf, idi imeid kulo de fen bagai. Idi tobonunā musei tunīg dō difedig, kap, darum, ketel kulo fiya age fiya.)

⁵ Anī nigin, Farisia tamo, lo ifelnēdiya tamo geid, Jesus to difiyen, “Ere nigin on dō fiya tar, mudur adodo biyeid neid tobonunā to dō de fen, amuyē ado imeid kulo fiya sā saaf dōdig?”

⁶ Jesus idi irokenēdin, “Asaia ī, ā mala yaleya tamo nigin wogō yen, in od tutuk, are eig ye itoton:

“Tamo kayau enidi neid sigoredim aya selu kulō difedig,

anī ere, idi waud aya nigin gerō ifaref.

⁷ Idi aya yanau dalesedig, are ege.

Idi tamo nē lo dogol anī difelnēdidig.”*

⁸ Jesus idi irokenēdin, “Ā Negur nē itāfiya utorōg fen, tamo nē tobonunā anī urougef.”

⁹ Age ye fen, ī idi irokenēdin, “Ā augeneī tobonunā dō fiya nigin ge fen, ā Negur nē itāfiya anī weleī sirin inoya keleī bagai!

¹⁰ Ere nigin, Moses iron, ‘Ō sinā tamā yeneid wales,’† ‘Aibem taka sina tama ado yeneid sane inouf, ī laa bun dineyēf.’‡

¹¹ Anī ere, ā urōgedig, tamo taka sina tama ado nigin irōf, ‘Ereb taka ā isenneīya nigin ayam ifeneīya, anī Koban’ (anī nē gariya, ‘ayam Negur afenem’), ¹² anī bunem, ā ī sina tama baban isennēdiya nigin katū wiyēgedig. ¹³ Anī nigin, tubuī tar neid tobonunā anī waleg uroug fen, Negur nē od tadū gedig. Agog fen, ā tobonunā fire fire musei ago gedig.”

¹⁴ Jesus baban tamo kayau iweignēdi di, wagen disi di, iron, “Ā adok aya karī wiyag, enei keleī youf. ¹⁵ Safina serē tamal tamo namen isilef anim, tamo amuyē to ifenēdig, anī ere, ereb taka tamo namenem wō yef anim, ī amuyē ifenēdig.”§

¹⁷ Jesus tamo kayau itorneïd fen, fō bun ile di, in dō fiya tar, yaab od enī nigin ī to difiyen. ¹⁸ Jesus idi irokenēdin, “Āg fatuk

* **7:7:** Asaia 29:13 † **7:10:** Eksodas 20:12; Diuteronomi 5:16 ‡ **7:10:** Eksodas 21:17; Levitikas 20:9 § **7:15:** Itotoya tunī eig de ditoton: ifenēdig. 16 Taka ī karīya nigin weder ado, ī karī youf.

nene gef de? Ereb taka serē tamal tamo namen isiledig anim, amuyē to ifenēdig anī, ā to ulegedig de? ¹⁹ Ere nigin, safina are tamo wau bun to iledig, anī ere, te namen isiledig, anenem bou dōf isil, ulō yesidig.” (Age ye iron anī bunem, Jesus kurō feis, saaf ganam amuyē sā yen.)

²⁰ Ī od tobol fe fen, iron, “Ereb tamo namenem ulō yesef anim, ĩ amuyē ifenēdig. ²¹ Ere nigin, tamo waud bunem kisi sesen wō yef, noli tobonunā, bē, tamo yukesiya, seseirā inoya, ²² neu mugu yeya, tobonunā sesen, idegēya, noli kisi, kiyēī, ne tā bou yūya, aya aya yeya, neneya tobonunā. ²³ Tobonunā sesen enei ganam, tamo namen tamal ulō yesef anim, tamo amuyē ifenēdig.”

*Sirofonisia Kayau Taka Nē Momoiya
(Matyu 15:21-28)*

²⁴ Jesus fonō anī itor ken, Taia* teneub bun ilen. Ī fō taka aaben ile fen, taka nem ĩ an ibodok yeya to keleī youf nigin wau iron. Anī ere, ĩ iminkel ibodōya nigin kisi feleya sā. ²⁵ Agef mog, kayau taka Jesus nigin od karī yen, ĩ, ne barai kaa sanem irounen anī isi fen, Jesus ye gariyan kubū yen. ²⁶ Kayau anī ĩ Grik† kayau, ĩ Siria nediwon Fonisia an sina gō fen. Ī, kaa sane, ne barai bun tamal iruwauf nigin Jesus nonī fiyen.

²⁷ Jesus kayau irokenen, “Kesu nanaal idi ereb orodif anī, idi ket dāf, ere nigin, kesu nanaal neid bret yale, gaū irarak-enēdiya, are to biya.”

²⁸ Kayau anī solof iron, “Odug, are momoi, anī ere, gaū idig, tebol farumen kesu nanaal neid saaf momout kuku re di, dōdig.”

²⁹ Age ye di, Jesus kayau irokenen, “Ago solo urok nigin, ō ule, kaa sane, nē barai mogo itornem.”

³⁰ Age ye di, kayau fō bun ilen, kaa sane, ne barai itornen anī, fatarē yen mog, ilen.

Jesus Tamo Taka Weder Sigor Ado Ifo-fakeleya El Fiyen

³¹ Jesus Taia teneub itor ken, Saidon teneub atu ilen, Dekapolis‡ teneub bun wō

ye fen, Galili maaīwō isilen. ³² An tamo kayau, tamo taka weder daabu leya tutuk wogōya kisi feleya sā anī, Jesus wagen dirou disin. Idi tamo anī bun, ima teten inouf nigin Jesus nonī difiyen.

³³ Jesus, ĩ tamo kayau atun yale, firen irou ile fen, in ima gege, tamo anī nē weder kur inodin. Agef fen, Jesus salina ira ken, tamo anī nē bale kobū fen. ³⁴ Jesus saa ilun itad fen, si odug yale fen, ĩ irokenen, “Efata!” (anī nē gariya, “Fokō weid!”). ³⁵ Kaisā bagai, tamo nē weder fokō yedin, in bale karika le di, ĩ od atata fel wogō yen.

³⁶ Jesus, taka irokenēya nigin idi katū fiyēdin. Ī baba baban irokenēdin, anī ere, musei wogō def dilen. ³⁷ Tamo kayau idi odug biya terē de fen, idi diron, “Ī ereb ereb ganam biya dogol age fen. Ī age fe di, weder daabuya karī yef, sigor ifokeleya wogō yef.”

8

*Jesus Fo Tausen Tamo Saaf Ifenēdin
(Matyu 15:32-39)*

¹ Sain anī bun, baban tamo kayau musei guru difen. Idi ereb taka yōya nigin san, anī nigin, Jesus in dō fiya tar ĩ garan iweig laisi fen, irokenēdin, ² “Aya tamo kayau enidi waud inaf, idi mogo aya geid, naa towo ereb taka yōya sā. ³ Aya idi naū ado fonō susur afouf are, idi luwen kuku douf, ere nigin, idi tunī egerō temeleid disin.”

⁴ In dō fiya tar aiten dale, Jesus dirokenen, “Gerere tuan eig fiya, taka nem bret kisi feleya nain yale fen, idi ifenēdiyof?”

⁵ Jesus to fedin, “Bret ganī ā ado?”

Idi diron, “Sewen dogol.”

⁶ Jesus tamo kayau tenebur dibodadāf nigin irokenēdin. Agef fen, Jesus bret sewen geif iroun, ĩ Negur de fiye ken, bret anī mumā feid fen, tamo kayau wagedin dinouf nigin, in dō fiya tar ifenēdi di, idi age difen. ⁷ Idi gau nanaaleg teke tekelei adon. Ī gau anidi nigineg Negur de fiye ken, idi gadō difediyof nigin in dō fiya tar irokenēdin. ⁸ Tamo kayau don kisi felen. Dum in dō fiya tar, tamo kayau bret dokon, tunī ditoraran anī fito difen, karam

* 7:24: Taia are taun taka. † 7:26: Grik, idi ibor fire, Juda sā. ‡ 7:31: Anī nē gariya, Ten Taun.

sewen isokosen. ⁹ Tamo fo tausen age fiya an difaren. Anĩ Jesus idi, nedi fonō fonō sur fedi di, ke de dilen. ¹⁰ Agef fen, Jesus in dō fiya tar geid, waag bun sosō de fen, Dalmanuta distrik dilen.

Farisia Tamo Saa Ilun Nē Uris Nigin To Difen

(Matyu 16:1-4)

¹¹ Farisia tamo disi, Jesus kisi difiye ken, saa ilun nē uris dilouf nigin to difiyen.

¹² Ī si odug yale fen, iron, “Ere nigin tamo kayau sain enĩ bun difaref eneidi, uris nigin aya to difiyaf? Aya ã momoi arokeneik, uris taka idi to dalouf.” ¹³ Age ye fen, ĩ idi itorneid, waag bun kel sō ye, maaĩ sitakā ibal ilen.

Farisia Tamo Geid Herod Geneid Yis
(Matyu 16:5-12)

¹⁴ In dō fiya tar bret taka to dalen, wedereid tu kelen. Bret tekelei dogol waag bun idi adon. ¹⁵ Jesus idi wedereid iroun, “Ã, Farisia tamo geid Herod geneid yis nigin lo welegei.”

¹⁶ In dō fiya tar idi dogo dogol katō de fen, diron, “Ada bret sã nigin age yel.”

¹⁷ Idi neid wogōya Jesus kelei ken, idi to fedin, “Ere nigin ã bret to urougel nigin wogō gef? Æ fau ileyã sã, wedereĩ fokōya sã de? Ægenei wauĩ total bagai lef de? ¹⁸ Æ meleĩ ado, anĩ ere, ã to ulegedig de? Æ wedereĩ ado, anĩ ere, ã to karĩ gedig de? Æ to karĩ welegef de? ¹⁹ Sain aya bret faif, faif tausen tamo nigin mumã afen, ã karam ganĩ bun, bret tunĩ kuru ge di, isokosen?”

Idi aiten dalen, “Karam tuwelf.”

²⁰ “Sain aya bret sewen, fo tausen tamo nigin mumã afen, ã karam ganĩ bun, bret tunĩ kuru ge di, isokosen?”

Idi aiten dalen, “Karam sewen.”

²¹ Jesus idi irokenēdin, “Æ fau to kisi fokō yef de?”

Tamo Taka Mala Ifofakeleya Oun Betsaida El Fiyen

²² Idi Betsaida disin. An tamo kayau tunĩ, tamo taka mala ifofakeleya diroule fen, Jesus imam kobũ fiyēf nigin nonĩ difiyen. ²³ Jesus, tamo mala ifofakeleya ima yale, sibof, fonō dumeitur dilen. Agef

fen, ĩ tamo mala bun salina ira ken, ima tamo mala bun ino fen, to fiyen, “Ere tau ulef?”

²⁴ Ī mala fara fel fen, iron, “Aya tamo kayau ailedif, idi aa gegen diyokesif.”

²⁵ Jesus baban in ima, tamo mala bun inon. Age fe di, tamo mala fara fele di, tutuk kelē yelen. Ereb ereb ganan ĩ yaor iledin. ²⁶ Jesus tamo anĩ in fō bun sur fiye ken, irokenen, “Fonō atu to ulauf.”

Pita Kristus Nigin Kurō Fesin
(Matyu 16:13-20; Luk 9:18-21)

²⁷ Jesus in dō fiya tar geid, Sisaria Filipai nediwon fonō fonō diyok dilen. Naabur ĩ to fedin, “Tamo kayau idi, aya nigin ai dedig?”

²⁸ Idi diron, “Tunĩ dirok, Jon naan igunēdiya tamo; tunĩ dirok, Eliya; tunĩ dirok, profet anidi taka.”

²⁹ Jesus to fedin, “Ba ã uleg? Aya nigin ã ai gef?”

Pita aiten yale iron, “Õ anĩ Kristus.”

³⁰ Age ye di, Jesus ĩ nigin taka to diro-kenēf nigin, idi wedereid iroun.

Jesus In Laa Nigin Iron
(Matyu 16:21-28; Luk 9:22-27)

³¹ Age ye fen, Jesus gariya ino, idi ifelneid fen, irokenēdin, Tamo Naal ĩ, dara musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ĩ dukesi di, naa towo bure fele di, kel fã youf. ³² Jesus od anĩ kurō fesi di, Pita Jesus yale, yerin irou ile, ou fiyen.

³³ Age fe di, Jesus falei yel, in dō fiya tar lo feid fen, ĩ Pita ou fiyen. Ī iron, “Satan! Dumeun ule. On kisi are Negur nē sã, on kisi tamo nē dogol.”

³⁴ Age ye fen, Jesus, tamo kayau in dō fiya tar geid iweigneid fen, irokenēdin, “Aib taka aya dō fiyau fenē, ĩ yogon oroya lai fesil fen, yogon aa tetek faali fe, aya dō fiyauf. ³⁵ Ere nigin, aib taka yogon bouwa buru mata ibodōf nigin oro fef, are fō yalauf, anĩ ere, aib taka yogon mata bouwa buru, aya nigin ado biya od nigin ye fen, irailauf, are kel yalouf. ³⁶ Tamo taka ĩ, teneub enĩ ganan kakarai fe, akorou ye fen, in malakanon irailauf,

ere biya ï yalouf? ³⁷ Takag, tamo taka, yogon malakanon nigin ere mala solof fen, ï kel yalouf? ³⁸ Aib taka, seseirã inoya,* mosor inoya nẽ tamo kayau eneidi bun, aya nigin ado neu od nigin mama fouf are, sain Tamo Naal in engel fateul geid, Tama nẽ fula fiya medeïya ado disiyouf bun, ïg ï nigin mama fouf.”

9

¹ Age ye fen, ï idi irokenẽdin, “Aya ã momoi arokeneik, tunĩ ein difaref, fau to gare de mog, idi Negur nẽ tano* megeir ado isi mog, dilouf.”

Jesus Bouwa Falei Felen
(Matyu 17:1-13; Luk 9:28-36)

² Naa sigis bure fele di, Jesus, Pita, Jems, Jon anidi geif fen, idi mugu arei odug ilun diselen. An Jesus idi meleid bun bouwa falei felen. ³ In kolos lalau medeïya bagai, lalau anĩ tenebur ein taka nem kulo fe di, agef filiya kisi feleya sã. ⁴ Agef mog, an idi meleid bun, Moses Eliya ado wowã de fen, Jesus weim wogõ den.

⁵ Pita Jesus irokenen, “Rabi,† ada ein ibodõya nigin biya bagai. Ada salafat towo tanouf, taka ogon, taka Moses nẽ, taka Eliya nẽ.” ⁶ (Ï wogõya tata fen, ere nigin, idi fatuk bagai kumĩ den.)

⁷ Agef mog, lalo isi, idi kerub feid fen, ait taka lalo bunem wõ yen, “Eĩ neu Kesu, ï nigin aya wau laa fedig. Ï karĩ wiyëg!”

⁸ Kaisã bagai, idi fai den, aib taka to weim difar mog, dilen, Jesus dogol.

⁹ Idi arei nem diyok disi fen, Jesus ereb idi dilen anĩ, Tamo Naal laa bun tamal fau fãya sã mog, taka to dirokenẽf nigin, idi katũ fedin. ¹⁰ Idi od anĩ dogo bun dogol ibod ken, ‘laa bun tamal kel fãya’ anĩ nẽ gariya nigin katõ difen.

¹¹ Age de fen, idi Jesus to difiyen, “Ere nigin lo ifelnẽdiya tamo, ‘Eliya ï ket uyu isi di, Mesia isiyouf,’ dedig?”

¹² Jesus aitedin yalen, “Momoi bagai, Eliya ket uyu isi fen, ereb ereb ganan madur fedif. Anĩ ere, ere nigin Tamo Naal ï darau musei yale fen, dudum difiyëf anĩ,

Negur nẽ Itotoya bun ibodok? ¹³ Anĩ ere, aya ã arokeneik, Eliya mogo isin, ï nigin Negur nẽ Itotoya bun yenek gen, ereb ereb ganan idi waud iron, ï nigin mogo age difen.”

Jesus Kesu Kaa Sane Ado El Fiyen
(Matyu 17:14-21; Luk 9:37-43)

¹⁴ Sain idi, in dõ fiya tar tunĩ ganan geredin disi fen, tamo kayau musei, idi salili difiyëid fen, lo ifelnẽdiya tamo geid, od nem abob fe fe de mog, diledin. ¹⁵ Kaisã bagai, tamo kayau ganan Jesus isi mog, dile fen, idi fatuk bagai terẽ den, aan difiyëf nigin gududu de dilen.

¹⁶ Jesus idi to fiyëdin, “Ã ere nigin idi geid, od nem abob fe fe gef?”

¹⁷ Guru fiya atun, tamo takam aiten yale iron, “Tise, aya neu kesu, õ gein arou asil, ï kaa sanem irou di, ait ifokelen. ¹⁸ Sain ganan kaa sanem irouf, ï yũ irã di, tenebur kubũ ye, sali mokuf, gobora kikokõ ye fen, bouwa teregein yedig. Aya on dõ fiya tar kaa sane diruwauf nigin to afedin, anĩ ere, idi kisi feleya sã.”

¹⁹ Jesus solof iron, “Tamo kayau eneidi momoiya sã, sain ganĩ aya ã geid tabodõf? Sain ganĩ aya ã nigin wau aukesilauf? Kesu wageun urousig.”

²⁰ Age ye di, idi kesu anĩ, ï garan dirou disi di, kaa sane Jesus ile fen, kaisã bagai kesu yũ iran. Kesu ï tenebur kubũ ye, wele yef, yen ken, awa bun sali moku fen.

²¹ Jesus kesu nẽ tama to fiyen, “Sain ganĩ ï eig fiya ibodon?”

Ï aiten yale iron, “Ï kesu naalun gariya inon. ²² Sain musei, ï yukesiyou fenẽ nigin yã bun ado naanũ irãdig. Anĩ ere, õ ereb taka age fiya nigin kisi feleyauf are, amã nigin waũ ino ken, usennamã.”

²³ Jesus ï irokenen, “‘Õ kisi feleyauf,’ wof de? Taka ï momoi youf, ereb ereb ganan age fiya nigin kisi feleya.”

²⁴ Kaisã bagai, kesu nẽ tama iweig iron, “Aya momoi auf, neu momoiya naal nigin usenna!”

²⁵ Age ye di, tamo kayau gududu de disi mog, anĩ Jesus ileid fen, ï kaa sane ou

* **8:38:** Seseirã inoya, anĩ nẽ gariya ein, Negur fotokar waitou fire fire nigin momoiya. * **9:1:** Negur nẽ tano an, Negur yogo ereb ereb ganan lo fef. † **9:5:** Rabi, anĩ nẽ gariya, Juda neid tise.

fiyen. Ī iron, “Ō daabuya ait ifokeleya kaa, aya ō arokonok, ĩ bun tamal ulō weis fen, baban ĩ namen to kel ulauf.”

²⁶ Kaa anī ui ye fen, kesu yū irā di, fatuk bagai tererē ye mog, ulō yeis ilen. Lo difen, kesu laa gen yenē di, musei diron, “Ī laa fel.” ²⁷ Anī ere, Jesus kesu anī ima irou fen, yalesnē di, ĩ ifaren.

²⁸ Jesus ĩ aaben ile ibod mog, in dō fiya tar mugun ĩ to difiyen, “Ere nigin amā kaa sane iruya nigin kisi feleya san?”

²⁹ Age de di, ĩ irokenēdin, “Eig fiya are, Negur kosē fiyēya† bunem dogol iyawauf.”

Jesus Baban In Laa Nigin Iron (Matyu 17:22, 23; Luk 9:43-45)

³⁰ Idi modoū anī ditor ken, Galili distrik atu diyok dilen. Taka nem idi an yeya kariya nigin, Jesus to oron, ³¹ ere nigin, ĩ in dō fiya tar ifelnēdin. Ī idi irokenēdin, “Tamo Naal ĩ, fau kiwai tamo imeid bun dinouf. Idi fau ĩ dukesiyouf, naa towo bure fele di, ĩ fau kel fā youf.” ³² Anī ere, idi od enī nē gariya nene de fen, ĩ to fiya nigin kumī den.

Ai Anī Odug Bagai? (Matyu 18:1-5; Luk 9:46-48)

³³ Idi Kapenaum taun disin. Jesus fō bun ibod ken, ĩ idi to fedin, “Ā naabur ere luwa urougel?” ³⁴ Anī ere, idi foro firi delen, ere nigin, naab luwen, aim anī idi atun odug bagai ibodok nigin luwa diroun.

³⁵ Jesus ibod ken, in dō fiya tar tuwelf iweig laisi fen, iron, “Taka ĩ uyu ifarau fenēf, ĩ gai dumen bagai youf. Agef fen, ĩ ganan neid kabī tamouf.”

³⁶ Ī kesu naal taka yale iroule, idi atun ifarnen. Ī imam yale koboi fiye ken, ĩ idi irokenēdin, ³⁷ “Aib taka aya yanau bunem, kesu naal eig fiya taka yalef are, ĩ aya yaleyaf. Aib taka ĩ aya yaleyaf are, ĩ aya dogol to yaleyaf, ĩ aya sur fiyan anīg yalef.”

Taka Ī Ada Nigin Kiwai To Inof, Are Neda (Luk 9:49, 50)

† **9:29:** Itotoya tunī eig de ditoton: kosē fiyēya ado kuriya. § **9:43:** Itotoya tunī eig de ditoton: nigin, 44 an idi neid mamat to gare dedig, yāg to gare feledig. * **9:45:** Itotoya tunī eig de ditoton: dirāyōf, 46 an idi neid mamat to gare dedig, yāg to gare feledig. † **9:48:** Asaia 66:24

³⁸ Jon iron, “Tise, tamo taka, ō yanā nem kaa sesen iruid mog, amā mailen. Anī nigin, amā ĩ katū mafiyen, ere nigin, ĩ neda takam sã.”

³⁹ Anī ere, Jesus iron, “To katū wiyēg, taka ĩ neu yanau nem memelik inof are, ĩ kaisā bagai aya nigin sane irōya kisi feleya sã, ⁴⁰ ere nigin, taka ĩ ada nigin kiwai to inof, are neda. ⁴¹ Aya ā momoi arokeneik, taka ĩ, aya yanau nem, ā Kristus nē nigin ye fen, kap naan ado ifeneif are, ĩ in mala solo momoi bagai yalouf.

Mosor Bun Ineyēf (Matyu 18:6-9; Luk 17:1, 2)

⁴² “Aibem taka age fe di, kesu aya nigin momoi def enidi taka, mosor bun ineyēf are, tamo anī meein odug guyutu bun ifo ken, maaīwō irāyam, are dem. ⁴³ Ogon imam mosor bun ineyōf, gudū wol. Ō imā tobega ado, mata bun ileyā nigin biya bagai, ere nigin, ima totoū adouf are, hel bun an yā faimud ibodkeleyan uleya nigin. § ⁴⁵ Age fiya gen, ogon yē anim, mosor bun ineyōf, gudū wol. Ō yē tobega ado mata bun ileyā nigin biya bagai, ere nigin, yē totoū adouf are, hel bun dirāyōf.* ⁴⁷ Takag, ogon malā anim, mosor bun ineyōf, ubodol uraile. Ō malā tekelei ado Negur nē tano bun ileyā nigin biya bagai, ere nigin, malā totoū adouf are, hel bun dirāyōf, ⁴⁸ an

“ ĩdi neid mamat to gare dedig,

yāg to gare feledig.†

⁴⁹ Tamo ganān, yā tetedin sol gen tu difouf.

⁵⁰ “Sol ĩ biya, anī ere, in kai sa kalauf, naig wo di, baban kai youf? Ā aug bun sol adouf, agog fen, abob nigin wau inosiya bun ubodōgouf.”

10

Tamo Kayau Ado Bagu Fiya Anī Fara Fiya

(Matyu 19:1-12; Luk 16:18)

¹ Jesus modoū anī itor ken, Judia distrik nē akor anī atu ile, Jordan naan sitakā ilen.

Baban tamo kayau mala odug ï wagen disi di, ï gai age fedig gen, od ifelnēdin.

² Farisia tamo tunī disi, kisi difiye ken, to difiyen, “Tamo taka yogon kayau iruf anī, are lo dō fiya de?”

³ Ì aitedin yale iron, “Moses, anī nigin ere od wogō yein?”

⁴ Idi diron, “Moses yo yen, are tamo bagu fiya anī fara fiya pepa itot fen, kayau od sã iru di, ilauf, yen.”

⁵ Jesus idi irokenēdin, “Moses lo anī itotkenein, ere nigin, āgenei wauī total bagai agef yeneīd. ⁶ Anī ere, gariya bun Negur ereb ereb ino fen, ‘tamo ino, kayau ino fen.’* ⁷ ‘Age fiya nigin, tamo ï in sina tama itorneīd fen, in kayau ado bagu difouf, ⁸ age fe di, idi uruwom bouweid tekelei youf.† Age dife di, idi uru sã, idi tekelei. ⁹ Anī nigin, ereb Negur bagu fedin anī, tamom to fara fouf.”

¹⁰ Sain idi baban fō bun dibod ken, in dō fiya tar od enī nigin Jesus to difiyen. ¹¹ Jesus idi irokenēdin, “Aib taka in kayau iru fen, kayau taka yalouf, ï kayau tubu morō ifen ken, seseirã inouf. ¹² Age fiya bagai, kayau taka in aiwa itorne ken, tamo taka yalouf are, ï seseirã inouf.”

*Kesu Nanaal Jesus Geid
(Matyu 19:13-15; Luk 18:15-17)*

¹³ Tamo kayau, kesu nanaal Jesus wagen kobū fediyouf nigin guri difeid disin, anī ere, in dō fiya tar, idi ou difiyēdin. ¹⁴ Jesus anī ile fen, wau sanen. Ì idi irokenēdin, “Utornēdig len, kesu nanaal aya wageun disiyouf, idi to katū wedig, ere nigin, Negur nē tano are eig fediya neid. ¹⁵ Aya ā momoi arokeneik, aib taka ï, Negur nē tano kesu naal age fiya gen to yalouf are, ï namen to bagai ilauf.” ¹⁶ Age ye fen, ï kesu nanaal koboi feid fen, in ima tetedin ino fen, el fiya ifenēdin.

*Tamo Gaū Safina Musei Ado
(Matyu 19:16-30; Luk 18:18-30)*

¹⁷ Jesus mogo naab iyok ile mog, tamo taka ï garan gudu ref isel, wagen kubū ye, ibor bobou fe fen, ï to fiyen, “Tise

biya, aya ere naig afouf anī, mata faimud ibodkeleya alouf?”

¹⁸ Jesus ï irokenen, “Ere nigin ò aya anī biya wiyaf? Aibem taka biya sã, Negur yogo dogol. ¹⁹ Ò ïtãfiya keleī: ‘Ò tamo taka to ukesiyouf, ò to seseirã unouf, ò to bē walouf, ò taka nigin idegēya od to urōf, ò idegēya bunem safina to walouf, sinã tamã sigoreid dō wouf.’‡ ”

²⁰ Ì Jesus irokenen, “Tise, enei ganan, aya kesu naalun dō afef asin.”

²¹ Jesus ï lof ile, ï nigin wau laaf fen, iron, “Tekelei anī ò inī sã. Ule, ogon safina ganan na nigin sur wo fen, maleg tamo weneīd, agouf anī, ò saa ilun safina biya adouf. Ago wol fen, usi, aya dō wiya.”

²² Od anī bunem, nawa kuru kele fen. Ì wau morō ado ilen, ere nigin, ï safina musei ado.

²³ Jesus falei yel fen, in dō fiya tar irokenēdin, “Safina musei ado tamo, Negur nē tano bun ileyã nigin gai malai bagai!”

²⁴ In dō fiya tar, in od anī nigin terē den. Anī ere, Jesus baban iron, “Nau kesu tar, Negur nē tano bun ileyã nigin gai malai bagai! ²⁵ Kamel ï gabar iwaya nil ku bun ileyã nigin karika bagai, safina musei ado tamo Negur nē tano bun ileyã nigin malai bagai.”

²⁶ Od anī bun, in dō fiya tar fatuk bagai terē de fen, abob toti difen, “Age fiyauf are, aim anī mata ibodkeleya yaleyã kisi feleya?”

²⁷ Jesus idi lo feid fen, iron, “Tamo bun are kisi feleyã sã, anī ere, Negur bun kisi feleyã. Ereb ereb ganan Negur bun kisi feleyã.”

²⁸ Pita Jesus irokenen, “Amã ereb ereb ganan mator ken, ò dō mayok!”

²⁹ Jesus solof iron, “Aya ā momoi arokeneik, aib taka fō, tura tar, main tar, sina, tama, gere tar be, kabī, aya nigin ado biya od nigin itoron, ³⁰ ï mala solo wan hundred wal fiya, sain enī bun, (fō, tura tar, main tar, sine tar, gere tar, kabī anidi ado morōg) yalouf, ï dumen isiyouf buneg mata faimud ibodkeleya yalouf. ³¹ Anī ere, musei malabag dibodok, idi dumen

* 10:6: Jenesis 1:27 † 10:8: Jenesis 2:24 ‡ 10:19: Eksodas 20:12-16; Diuteronomi 5:16-20

dibodōf; musei dumen dibodok, idi mal-abag dibodōf.”

*Jesus In Laa Nigin Irō, Towo Fen
(Matyu 20:17-19; Luk 18:31-34)*

³² Jesus uyu irou fen, idi Jerusalem naab diselen. Age fe di, in dō fiya tar idi terē de mog, idi dō difedin anī kumī den. Baban Jesus in dō fiya tar tuwelf firen gou feid fen, ī fau bouwa bun ere wō youf anī irokenēdin. ³³ Jesus iron, “Ada Jerusalem teselef, an Tamo Naal ī pris odudug, lo ifelnēdiya tamo imeid bun dinenēf. Idi ī laa foug nigin bouwa bun od dūf. Age de fen, idi ī haiden Juda sã anidi imeid bun dino di, ³⁴ idi ketē difiyēf, disisnēf, wagī difiye ken, dukesiyouf. Naa towo bure fele di, ī kel fã youf.”

*Jems Jon Ado Neid To Fiya
(Matyu 20:20-28)*

³⁵ Sebedi gere tar, Jems Jon ado, Jesus wagen disin. Idi diron, “Tise, amã ereb taka nigin to mafe di, õ agouf anī oromak.”

³⁶ Jesus idi irokenēdin, “Ã ere anī, aya age afeneif nigin oroyeik?”

³⁷ Idi aiten dale diron, “Ogon fula fiya medeīya bun, amã taka ogon ima biyalē ibodō di, taka ogon ima kilē ibodōf anī oromak.”

³⁸ Jesus idi irokenēdin, “Ã ereb to gef anī nē gariya ã keleī sã, aya naan ãf anī, ã yōya kisi feleya de? Agef mã, naan aya agūf anī, ã igūya kisi feleya de?”

³⁹ Idi aiten dale diron, “Amã kisi feleya.” Age de di, Jesus idi irokenēdin, “Naa aya ãf are, ã wãgouf, naan aya agūf are, ã ugūgouf, ⁴⁰ anī ere, imau biyalē ibodōya, kilē ibodōya are, ayam ifenēya kisi feleya sã. Modoū anidi are, idi nigin saika fen anidi neid.”

⁴¹ In dō fiya tar ten od anī karī de fen, Jems Jon ado nigin seye den. ⁴² Jesus idi iweig laisi fen, iron, “Ã keleī, haiden neid uyu irouya def anī, tamo kayau lo fiya nigin totol dinodig, idi dogo neid odudug, idi aruneid dalouf nigin megeir dinodig. ⁴³ Ã bun kisi to agef yenēf, ã atun, aib taka odug ibodōf nigin orof, ī āgenei kabī tamo ibodōf. ⁴⁴ Aib taka uyun ibodōf nigin orof,

ī ganan neid ferfer ouf. ⁴⁵ Ere nigin, Tamo Naal īg disennēf nigin to isin, anī ere, ī tamo kayau isenneid fen, tamo kayau musei idi neid mosor anī fotokar, yogon mata ifenēdiyof nigin isin.”

*Bartimeus Mala Ifofakelen Anī Mala Fara Felen
(Matyu 20:29-34; Luk 18:35-43)*

⁴⁶ Age de fen, idi Jeriko disin. Jesus, in dō fiya tar, tamo kayau mala odug geid, taun anī ditor dile mã, tamo taka mala ifofakeleya, Bartimeus (Timeus naal), ī naab yerin nonī yef ibodon. ⁴⁷ Sain ī Jesus Nasaret tamal yeya anī karī ye fen, ī iweig iron, “Jesus, Dawid Naal, aya nigin malalon yō!”

⁴⁸ Age ye di, tamo musei sakã difiye ken, foro yalauf nigin dirokenen, anī ere, ī wade bagai iweig iron, “Dawid Naal, aya nigin malalon yō!”

⁴⁹ Jesus dē yel fen, iron, “Uweignēg.” Age ye di, idi tamo mala ifofakeleya diweignen, “Waū el fe fen, fã wale! Ī õ iweignok.” ⁵⁰ Age de di, ī yogon gabar sirilē iraille fen, fã yale, Jesus wagen isin.

⁵¹ Jesus ī to fiyen, “Aya õ ere age afonōf ani, õ oroyok?”

Tamo mala ifofakeleya iron, “Rabi, aya kelē au fenē.”

⁵² Jesus iron, “Ule, ogon momoiya anim el yom.” Kaisã bagai, ī kelē yel fen, Jesus dōf, naab dilen.

11

*Jesus Tamo Yana Ado Gen Jerusalem Namen Ilen
(Matyu 21:1-11; Luk 19:28-40; Jon 12:12-19)*

¹ Idi Jerusalem kelē difiye ken, Moul Arei* bun Betfage Betani ado wō den, Jesus in dō fiya tar uru sur feid fen, ² ī idi irokenēdin, “Fonō wageik anī bun uleg, an wōg fen, donki naal difon anī ulougouf, are aibem taka anī bun to iyon. Anī biru weleg fen, ein urou usig. ³ Taka nem to yeif, ‘Ere nigin ã enī ago gef?’ youf are, urokenēgouf, ‘Odug orof nigin, fau mogo kaisã ein kel sur foug.’”

* 11:1: ‘Oliv Arei’ dedig.

⁴ Idi dile, donki naal naabur bobog ileyen difokelen ifar mog, fotou difen. Idi biru de mog, ⁵ tamo tunī an difaren anidim to difedin, “Ā ere naig gouf nigin, donki naal anī biru gef?” ⁶ Idi Jesus irokenēdin kilei, solo de dirokenēdin. Age de di, tamo ditornēdi di, dilen. ⁷ Idi donki naal anī Jesus wagen dirousi fen, idi neid gabar teten dirarā di, ī anī teten ibodon. ⁸ Tamo kayau musei, idi neid gabar naabur du difedin, age de mog, tunī idi kabier aa were aarau ado kokour difedin anī du difedin. ⁹ Tamo kayau uyu dilen ado dume dō difen, kakaī de diron,

“Hosiana!†”

“Oduḡ yana bunem isif, are ī el fiyek!”‡

¹⁰ “Neda tamada Dawid nē tano isif, are el fiyek!”

“Hosiana, ilun bagai!”

¹¹ Jesus Jerusalem wō ye fen, tempel ilen. Ī erēb erēb ganān kii fedin, anī ere, sain bure felen nigin, ī in dō fiya tar tuwelf geid Betani dilen.

Jesus Aa Fig Isisnen (Matyu 21:18, 19)

¹² We fele di, idi Betani ditor dile fen, Jesus naū fen. ¹³ Ī mala ira kel, aa fig aarau ile fen, ī faat ado be ye mā, ilouf nigin ilen. Ī non ilen, faat taka to ilen, aarau dogol, ere nigin, imaya sain sā. ¹⁴ Age fiya ile fen, ī aa irokenen, “Taka nem ō bun faat baban to yāf.” Agef irō mog, in dō fiya tar karī den.

Jesus Tempel Waī Fen

(Matyu 21:12-17; Luk 19:45-48; Jon 2:13-16)

¹⁵ Jerusalem wō de fen, Jesus tempel modoū namen ile, na dale dile disi dife mog, an irudidin. Ī moni solo fediya§ neid tebol ado, kuburir na nigin sur fediya neid bens eleg feledin. ¹⁶ Tamo ganān, tempel modoū bun safina na nē iroulediya nigin katū fiyēdin. ¹⁷ Agef fen, Jesus ifelneīd iron,

“‘Neu fō, teneub ganān nē kosēya fō douf,’*
are Negur nē Itotoya bun to yenek de?

are Negur nē Itotoya bun to yenek de?

Anī ere, ā ‘bē tamo neid iminēya fō† unogen.”

¹⁸ Age ye di, pris odudug, lo ifelnēdiya tamo geid, od enī karī de fen, Jesus duke-siyouf nigin naab dimiren. Idi Jesus kumī difiyen, ere nigin, tamo kayau ganān in ifelnēdin anī nigin terē den.

¹⁹ Aragau di, idi taun anī ditor dilen.

Aa Fig Gariri Kelen (Matyu 21:20-22)

²⁰ Bonimeī idi naab diyok dile fen, idi aa fig warei bunem gariri kelen anī dilen.

²¹ Pita weder fokō yel fen, Jesus irokenen, “Rabi, ulef! Ō aa fig usisin, are gariri kelen!”

²² Age ye di, Jesus solof irokenēdin, “Negur bun momoi wogei. ²³ Aya ā momoi arokeneik, aibem taka arei enī irokenēf, ‘Ō kusu urā, maaīwō usil,’ age ye fen, ī wau to uru fen, momoi aya orok anī agef wō youf, youf are, agef dō fenēf. ²⁴ Anī nigin, aya ā arokeneik, erēb taka nigin ā kosē bun tog fen, mogo malel ge, momoi gouf, are āgenei youf. ²⁵ Sain ā ufareg kosēg fen, ā takan nē sane nigin wauī bun yenēf are, wedereī tu kalauf. Ago ge di, āgenei Temeī saa tanon ibodok, āgenei mosor nigin weder tu kalauf.”‡

Jesus Aim Igirnen Anī To Difiyen (Matyu 21:23-27; Luk 20:1-8)

²⁷ Idi baban Jerusalem wō den, Jesus tempel fofomalan iyok ile mog, pris odudug, lo ifelnēdiya tamo, mudur adodo geid, ī wagen disin. ²⁸ Idi Jesus to difiyen, “Ere igirīya bunem, ō erēb erēb enī ago wof? Aim ō enī agouf nigin igirnon?”

²⁹ Jesus aitedin yale iron, “Aya to fiya tekelei afeneīf. Solog urokanage di, erēb igirīya bunem erēb erēb enī age afef anī, aya ā arokeneīf. ³⁰ Jon naan igunēdin,

† 11:9: Anī nē gariya, ‘Usennamā!’ Od anī tamo kayau Negur yana yaleseya nigin wogō dedig. ‡ 11:9: Sam 118:25, 26 § 11:15: Tempel takis inoya nigin, moni serē tamal ado tempel moni solo difedig. * 11:17: Asaia 56:7 † 11:17: Jeremaia 7:11 ‡ 11:25: Itotoya tunī eig de ditoton: kalauf. 26 Ā wedereī to tu kalauf are, āgenei Temeī saa tanon ibodok īg, āgenei mosor nigin weder to tu kalauf.

are saa ilun tamal de, tamo bunem? Urokanag!”

³¹ Idi dogo dogol katō de fen, diron, “Ada, ‘Saa ilun tamal,’ tauf, ī to fouf, ‘Age fe di, ere nigin, ā ī nigin to momoi gen?’”

³² Anī ere, ada, ‘Tamo bunem,’ tauf...” (Idi tamo kayau kumī difedin, ere nigin, tamo ganan, Jon ī momoi bagai profet den.)

³³ Anī nigin, idi Jesus ait solo de diron, “Amā keleī sā.”

Age de di, Jesus iron, “Ayag ā to arokeneif, ereb igrīya bunem aya ereb ereb enī age afedif.”

12

Tamo Kabī Lo Difedig Nē Yaab Od (Matyu 21:33-46; Luk 20:9-19)

¹ Age ye fen, Jesus yaab od nem idi irokenēdin, “Tamo taka wain kabī yalen. Ī kau ifō kalī felen, wain sumin asi fiya nigin ku yalen, kabī lo fiya tamo neid fō inon. Agef fen, ī mala solo yalouf nigin wain kabī, kabī tamo tunī imeid bun ino fen, uyu takā ilen. ² Fito fiya sain, ī, kabī tamo taka, wain kabī lo fiya tamo gedin, wain biya tunī, idi bun gei fouf nigin sur fen. ³ Anī ere, idi ī dale, du ken, sur difiyē di, ima sāsā ilen. ⁴ Age dife di, ī kabī tamo taka idi gedin sur fen. Idi tamo anī mudur bun du ken, mama difenē di, ilen. ⁵ Ī baban takag sur fen, areg idi dukesin. Ī musei tunīg sur fedin, age fe di, tunī diden ken, tunī didenkesin.

⁶ “Ī gama tekelei dogol sur fiya nigin ibodon, are yogo naal, ī yogon oboi bagai. Ī anī dumen bagai sur fiye ken, iron, ‘Idi neu kesu anī karī difiyēf.’”

⁷ “Anī ere, kabī lo fiya tamo, idi abob dirokenen, ‘Eī ī akorouf. Usig, ada ī tau keis fen, akor eī nedauf.’ ⁸ Anī nigin, idi ī dale, dukeis fen, wain kabī dumeitur diran.

⁹ “Age dife di, wain kabī marau naig fouf? Ī isi, kabī lo fiya tamo idenkeis fen, wain kabī anī tamo tunī ifenēdiyof. ¹⁰ Ā Negur nē Itotoya enī to uwesegen de?

“ ‘Meein are fō inoya tamom sane de fen, ditoron,
meein anī gama monog tor wō yen,

¹¹ anī Odug yogo age fe di,
malamā yū yalen.’* ”

¹² Age ye di, pris odudug, lo ifelnēdiya tamo, mudur adodo geid, Jesus ironēya nigin naab dimiren, ere nigin, idi kelein, ī idi nigin yaab od wogō yen. Anī ere, idi tamo kayau nigin kumī de fen, idi ī ditornē dilen.

Sisa Takis Ifenēya

(Matyu 22:15-22; Luk 20:20-26)

¹³ Dum idi, Farisia tamo tunī, Herod nē tamo tunī geid, Jesus garan in od bun kū fenē di, dirounēf nigin sur difedin. ¹⁴ Idi ī garan disi fen, diron, “Tise, amā keleī, ō momoi wogōya nē tamo. Ō tamom to wewu diyōdig, ere nigin, ō idi yeneid ado be, sā anī to es wedidig. Ago fen, ō momoi bagai Negur nē naab ufelnamādig. Sisa† takis ifenēya nigin biya de, sā? ¹⁵ Amā mafenēf de, sā?”

Anī ere, Jesus idi neid namedin kisi sane keleī ken, iron, “Ere nigin ā aya nigin kor unogef? Koin moni taka urousig len, aya ailau fenē.” ¹⁶ Idi koin moni taka dirousi di, ī idi to fedin, “Eī ai nē malakanon? Eī ai yana nē itotoya?”

Idi aiten dale diron, “Sisa nē.”

¹⁷ Age de di, Jesus idi irokenēdin, “Sisa nē are Sisa wenēg, Negur nē are Negur wenēg.”

Age ye di, idi ī nigin terē den.

Kel Fāya Bun Ai Nē Kayau Ibodōf

(Matyu 22:23-33; Luk 20:27-40)

¹⁸ Sadusia tamo idi dirōdig, laa bun tamal to ke de fā dedig anī, Jesus wagen disi to difiyen. ¹⁹ Idi diron, “Tise, Moses itotkanaman, are tamo taka laaf fen, aiwa itornen, anī ere, kesu sā, tamo ī waab anī yale fen, tura nē kesu diroukenēf. ²⁰ Gama tura tura sewen dibodon. Matu ketem kayau yalen, anī ere, kesu yaleya sā mog, laa fen. ²¹ Matu dō fiya bagam waab anī yalen, anī ere, īg kesu sā mog, laa fen. Idi dō fediyag de age fen. ²² Tura tura sewen anidi adok, kesu taka to dalen. Dum kayau areg laa fen. ²³ Dum laa bun tamal kel fāya sain bun, ī ai nē kayau ibodōf, ere

* **12:11:** Sam 118:22, 23 † **12:14:** Rom neid king odug.

nigin, tura tura sewen anidi adok, ï dale dogolen?”

²⁴ Jesus aitedin yale irokenēdin, “Ã od kũ wenēgef, ere nigin, ã Negur nē Itotoya ado Negur nē megeir keleĩ sã. ²⁵ Sain laa bun tamal kel fãya bun, an tamo kayau ado abob yalef ya sãf, idi engel saa ilun dibodok gen dibodõf. ²⁶ Gama, laa bun tamal fãya nigin, Moses nē od Negur nē Itotoya bun ibodok, are arein aa mata bun fotou fiyen Negur ï naig fe irokenen, ‘Aya Abraham nē Negur, Isak nē Negur, Jakop nē Negur’† anĩ to be uwesegen de? ²⁷ ï laa neid Negur sã, anĩ ere, ï mata ibodõya neid. ã fatuk bagai kũ wenēgef!”

*Ïtãfiya Odug Bagai Ganan Wal Fiya
(Matyu 22:34-40; Luk 10:25-28)*

²⁸ Lo ifelnēdiya tamo taka isi, idi od nem kusĩ de mog, karĩ fiyēdin. Jesus ï aiten, od biya irokeneĩd mog, karĩ ye fen, ï Jesus to fiyen, “Ïtãfiya ganan bun, ïtãfiya nanĩ anĩ ganan wal fiya?”

²⁹ Jesus iron, “Ïtãfiya ganan wal fiya are enĩ, ‘O Israel, karĩ wog, Odug neda Negur, Odug ï yogo tekelei. ³⁰ Õ, Odug ogon Negur ï nigin waũ adok, malãkanon adok, kisi adok, megeir adok bunem, ï nigin waũ laaf.’§ ³¹ Anĩ dõ fiya are eig fiya, ‘Õ ogo nigin waũ laa fef gen, nē tã nigineg ago waũ laaf.’* Ïtãfiya uru enim, ganan wal fiya.”

³² Lo ifelnēdiya tamo anĩ Jesus irokenen, “Tise, õ de urok. Negur ï tekelei, taka to ibodok, Negur yogo dogol wof, anĩ bun momoi urok. ³³ Õ Negur nigin waũ adok, kisi adok, megeir adok bunem waũ laaf fen, õ ogo nigin waũ laa fef gen, nē tã nigineg ago waũ laafei yeya anim, yã bun sesewi fiya ado sesewi fiya fire fire ganan wal fiya.”

³⁴ Jesus tamo anĩ keleĩ ado aiten yale di, ile fen, Jesus ï irokenen, “Õ Negur nē tano nigin egerõ sã.” Sain anĩ bunem ilen, taka nem baban to fiyēya nigin kumĩ den.

*Ai Nē Kesu Anĩ Kristus?
(Matyu 22:41-46; Luk 20:41-44)*

³⁵ Jesus tempel modoũ bun ifelneĩd fen, ï to fedin, “Naig fe di, lo ifelnēdiya tamo, Kristus ï Dawid nē naal dedig? ³⁶ Dawid ï yogo Awa Uur Fateul bunem wogõ ye fen, kurõ falaisin:

“Negur, neu Odug irokenen,
“Imau biya melem ubod mog,
ogon kiwai tar
on yē farumē gõ afalauf.” ’

³⁷ Dawid yogo, ï nigin ‘Odug’ yef, naig fe di, ï Dawid naal ouf?”

Tamo kayau musei waud el fiya ado karĩ difiyen.

³⁸ Jesus ifelneĩd fen, iron, “Lo ifelnēdiya tamo nigin lo welegei. Idi gabar meluluk difonunakel diyo ken, maket modoũ bun aan difiyēdiyof anĩ orodidig. ³⁹ Age de fen, idi Juda neid uub fõ bun, sia biyai biyai bun dibod ken, tar inoya bun modoũ malabag bun dibodõdig. ⁴⁰ Idi, kayau waab idegnēdiya bunem nedi fõ sosoin de fen, meleid yaleya nigin meluk bagai kosē dedig. Tamo age fediya, mala solo sane bagai dalouf.”

*Kayau Waab Nē Ofa
(Luk 21:1-4)*

⁴¹ Jesus ofa moni bogis sitakã ibod ken, tamo kayau lo feid mog, idi moni tempel bogis bun dinon. Tamo kayau safineid adodo musei moni odudug diraran. ⁴² Anĩ ere, kayau waab maleg taka isi, kapa koin moni giriya nanaal bagai uru inon. Are tu toea dogol.

⁴³ Jesus in dõ fiya tar iweig laisi fen, irokenēdin, “Aya ã momoi arokeneik, kayau waab maleg enĩ ï, ganan wal fediya, odug bagai bogis bun inol. ⁴⁴ Idi ganan dogo neid safineid bun tamal tunĩ dinon, anĩ ere, kayau maleg anĩ, ereb ereb adok ï isennēf anĩ ganan inon.”

13

*Idikeleya Sain Nē Uris
(Matyu 24:1-35; Luk 21:5-33)*

¹ Jesus ï tempel bunem kutũ yeis mog, in dõ fiya tar taka ï irokenen, “Ule, Tise! Ere meein odudug oug fediya! Ere fõ meli meli oug fediya!”

† 12:26: Eksodas 3:6 § 12:30: Diuteronomi 6:4, 5 * 12:31: Levitikas 19:18

² Age ye di, Jesus ï irokenen, “Fõ odudug enĩ ganan uledif de? Meein enĩ taka to abob teten yenēf, anĩ adok fau isog irailauf.”

³ Jesus Moul Arein tempel sitakā ibod mog, Pita, Jems, Jon, Endru anidim mugun Jesus to difiyen, ⁴ “Ere sain enidi wõ youf? Ere uris bagai anĩ, enĩ ganan kisi falauf nigin wõ youf? Anĩ urokanamã.”

⁵ Jesus idi irokenēdin, “Takam idegneïya nigin lo weleg. ⁶ Musei aya yanau nem disi dirõf, ‘Aya Kristus,’ age de fen, musei didegnēdiyof. ⁷ Sain ã kusĩ nigin karĩg fen, tamo sigoredim kusĩ nigin wogõ douf anĩ karĩ gouf, ã to tererē gei. Ereb ereb anidi agef wõ youf, anĩ ere, idikeleya sain fau dum isiyof. ⁸ Teneub taka fã ye fen, ï teneub taka nigin kiwai ifenēf, tano taka ï, tano taka nigin kiwai ifenēf. Uyu taka taka bun mimĩ wõ ye fen, naũ isiyof. Age fouf anĩ, kayau kesu gõ fouf nigin darau gariya inodig age fiya.

⁹ “Ã aug nigin lo weleg. Ã fau kaunsel imeid bun dinenei ken, uub fõ bun wagagã diyeif. Aya yanau nigin, ã gawaman mudur, king geid meleid bun ufareg fen, idi kurõ walaisig urokenēdigouf. ¹⁰ Biya od ketem teneub ganan bun iyokalauf. ¹¹ Sain ã gei diyei ken, kot bun dirouleyeif, ere mauf wog fen, to kisi musei waleg. Sain anĩ bun, ereb ifeneik anĩ wogõ gouf, ere nigin, are āgem to wogõ gouf, are Awa Uur Fateulem.

¹² “Turam, tura kiwai imeid bun ino di, dukesiyof, age fe di, tamam in kesu age fouf. Kesum sina tama kiwai difeneid fen, laa bun dinenēdiyof. ¹³ Tamo ganan aya nigin ã kiwai difeneif, anĩ ere, taka ï megeir ifaref ile ile idikeleyanouf, Negur ï yalouf.

¹⁴ “Sain ‘nimir anĩ fonou inouf nigin’* ï an to ifarau nē anĩ ulogouf (anĩ uweseg, keleĩ youf), idi Judia distrik bun dibodok, arein diya diselauf. ¹⁵ Taka ï yogon fõ agaran ibodok, ï kutũ yeis, aaben ile, ereb ereb to yalouf. ¹⁶ Taka ï kabier ibodok, yogon gabar yalouf nigin to kel ilauf. ¹⁷ Naa anĩ bun, kayau bouweid ado, kayau kesu su difenēdif ado, idi meleidlon ado!

¹⁸ Feluk sain bun, anĩ to wõ youf nigin, ã Negur kosē wiyēgouf, ¹⁹ ere nigin, naa anidi bun morõ odug biya adouf, morõ age fiya, gariya bun Negur teneub inon bunem isi gama, taka to wõ yen, dum buneg taka to wõ youf. ²⁰ Odug morõ odug nē naa anĩ to guru falaisim, taka to ibodom. Anĩ ere, tamo kayau ï igirnēdin nigin, ï naa anĩ guru falaisin. ²¹ Sain anĩ bun, taka ã irokeneif, ‘Ulegef, Kristus yeir!’ oo ‘Ï your!’ ã anĩ to momoi ge. ²² Fau idegēya Kristus, idegēya profet ado, wõ de fen, idi kisi falauf are, Negur igirnēdin anidi didegnēdiyof nigin uris memelik ado dinodiyof. ²³ Anĩ nigin, lo welegei, sain anĩ fau mog, aya ã ereb ereb ganan arokenein.

²⁴ “Anĩ ere, naa anidi bun, morõ anĩ dõ fiya,

“ ‘gaa gugum kalauf,
age fe di, ogõ lalan to ifenēf,

²⁵ saa ilun tamal barisa kuku rouf,
saa nē megeir ganan guyoyõ douf.’†

²⁶ “Sain anĩ bun, tamo idi, Tamo Naal lalo bun yogon megeir odug fula fiya medeïya ado isi mog, dilouf. ²⁷ Agef fen, ï yogon engel susur fedid di, yogon tamo kayau igirnēdin anidi, teneub akor ganan bun, gaa iseya nem ile gaa ileyen, gei de, kuru difediyof.

²⁸ “Gama ã, aa fig bun keleĩ walogouf. Susu bonuf fen, aarau inodif, ã keleĩ, saneya melsak. ²⁹ Age fiya gen, ã ereb ereb anĩ wõ youf ulogouf, ã keleĩ, are mogo melsã bagai bobogē ifaref. ³⁰ Aya ã momoi arokeneik, tamo kayau sain enĩ bun dibodok eneidi to gare de mog, enĩ ganan wõ youf. ³¹ Saa teneub ado sa kalauf, anĩ ere, neu od to bagai sa kalauf.

Naa Sain Ado Takam To Keleĩ Youf (Matyu 24:36-44)

³² “Taka nem naa sain ado to keleĩ youf, saa ilun engel idig sã, Naal ïg sã, Dei yogo dogol. ³³ Mata ubodõg fen, lo weleg! Ereb sain anĩ wõ youf, ã to keleĩ youf. ³⁴ Are tamo fõ itor ileyen gen. Ï yogon fõ itor ken, lo difouf nigin yogon ferfer imeid bun inon, idi mugu mugu kabĩ fire fire

* **13:14:** Daniel 9:27; 11:31; 12:11 † **13:25:** Asaia 13:10; 34:4

ifenēdin. Agef fen, ï tamo bobog bun anī mala inof ibodōf nigin irokenen.

³⁵ “Anī nigin, mata ubodōg fen, lo welegei, ere nigin, ā keleī sā, ereb sain fō marau kel isiyouf, aragau be, bō atun be, tataro yū mog be, wef mog be. ³⁶ ï isi tarabā yeīf, ā to wenēg mog, ileyēif, are deuf. ³⁷ Ereb aya ā arokeneik, aya adok ganan arokenēdif, ‘Lo weleg!’ ”

14

Kayau Taka Betani An Jesus Mudur Bun Moul Fi Felen

(*Matyu 26:1-16; Luk 22:1-6; Jon 11:45-53; 12:1-8*)

¹ Gama Pasa naa ado Bret Yis Sā Sifa naa, fau uru yen mog, pris odudug, lo ifelnēdiya tamo geid, Jesus idegēya naab bun dale dirou fen, dukesiyouf nigin naab dimiren. ² Idi diron, “Sifa sain bun to age tafouf, age tafouf are, tamo kayau seye de fen, kusī dalesauf.”

³ Jesus Betani an, Simon kulu lepra dagi adon tamo, in fō bun saaf yoko ibod mog, kayau taka ï wagen moul sumeī biya bagai moni odug nem, nad* nem dogol dinon anī, gulub† ado irou isin. Agef fen, kayau gulub anī karāf fen, Jesus mudur bun moul fi felen.

⁴ Age fe di, tunī an difaren are waud sane fen, abob dirokenen, “Ere nigin moul enī sekil fef? ⁵ Moul enei yar tekelei nē dimig mala wal feseya nem sur fiyam, agef fen, moni anī yale, maleg tamo ifenēdiyam, are dem.” Age de fen, idi ï totol bagai ou difiyen.

⁶ Jesus iron, “Utornēg, ā ere nigin ï wau morō wenēgef? Kayau enī aya nigin biya bagai age fel. ⁷ Maleg idi faimud ā geid ubodōgouf, anī nigin, ā idi isennēdiya oroyēif, are sain musei. Anī ere, aya faimud ā geid to tabodōgouf. ⁸ ï ereb age fiya kisin anī age fel. ï moul aya bouwau bun fi felel are, mekur ainēf nigin anī ketem dodok fel. ⁹ Aya ā momoi arokeneik, tenebur ein nain be, biya od enī wogō douf, ereb kayau enī age fel

anīg wogō douf. Age fe di, idi ï nigin kisi difouf.”

¹⁰ Age ye di, Judas Iskariot, tuwelf anidi atun taka, Jesus kiwai ifen ken, pris odudug imeid bun inouf nigin wagedin ilen. ¹¹ Pris odudug idi od enī karī de, waud al fe fen, ï moni difenēf nigin dirokenen. Anī nigin, ï Jesus idi imeid bun inouf nigin naab imirek ilen.

Odug Nē Saaf

(*Matyu 26:17-30; Luk 22:7-23; Jon 13:21-30; 1 Korin 11:23-25*)

¹² Bret Yis Sā Sifa inoya naa matu anī bun, sain anī are idi neid tobonunā, sipsip naal, Negur tubuid tar isennēdin anī kisi de fen, sesewi difedig anī, Jesus nē dō fiya tar Jesus to difiyen, “Ō amā nain anī Pasa naa nē saaf wāf nigin, amā dodok mafouf anī oroyok?”

¹³ Age de di, Jesus in dō fiya tar uru sur feid fen, irokenēdin, “Taun uleg fen, tamo taka darum naan ado isi fotou yeīf, ï dō gouf. ¹⁴ ï fō taka namen ile di, uleg fen, gama ā fō marau eig wiyēg urokenēgouf, ‘Tise to fel: Aya neu dō fiya tar geid, Pasa naa nē saaf māf nigin aab nain ibodok?’ ¹⁵ ï aab odug ilun anī ifelneif, an ereb ereb dodok de bure difelen. An neda nigin dodok gouf.”

¹⁶ In dō fiya tar taun dile fen, Jesus iron kilei, ereb ereb age fiya dilen. Anī nigin, idi Pasa naa nē saaf dodok difen.

¹⁷ Aragau di, Jesus in dō fiya tar tuwelf geid, an wō den. ¹⁸ Idi tebol bun si dino, saaf dokon, Jesus iron, “Aya ā momoi arokeneik, ā atun takam aya kiwai imeid bun inouf, taka aya uruwom moko anim.”

¹⁹ Idi waud gudūf fen, mugu mugu dirokenen, “Momoi bagai, ayam sā de?”

²⁰ Jesus aitedin yale iron, “Ā tuwelf atun takam, taka ï, imamā uruwom beī bun nu mafef anim. ²¹ Tamo Naal ï nigin ditoton agef bai ilauf. Anī ere, tamo ï Tamo Naal kiwai tamo imeid bun inof, ï malalon ado! ï sina to gō fem, are dem.”

²² Idi saaf dokon, Jesus bret yale, Negur de fiye ken, bret anī mumā fen. Agef fen,

* **14:3:** Fisir yana, fisir anī warumutei bun moul daledig. † **14:3:** Meein alabasta nem dinon.

in dō fiya tar ifeneīd fen, iron, “Waleg, eī neu bouwau.”

²³ Agef fen, ī kap yale, Negur de fiye ken, kap anī ifenēdin, age fe di, idi adok anī bun don.

²⁴ Jesus idi irokenēdin, “Eī neu naudou, ā Negur geid bar itenēya nigin, are tamo kayau musei nigin fi felef, ²⁵ aya ā moi arokeneik, aya baban wain enī to āf, gaman ile, aya Negur nē tano bun wain mata āf bun.”

²⁶ Idi seg taka dalel fen, idi Moul Arei bun diselen.

Pitam Jesus Wa Fiyēf Nigin Jesus Iron
(*Matyu 26:31-35; Luk 22:31-34; Jon 13:36-38*)

²⁷ Jesus idi irokenēdin, “Ā fau adok uyalalagauf, ere nigin, Negur nē Itotoya eig ye irok:

“ ‘Aya sipsip marau aū di, sipsip ganan firagagaū difouf.’

²⁸ Anī ere, aya kel fā auf bun, aya ket Galili uyu alauf.”

²⁹ Pita Jesus irokenen, “Ganan diyalalaufeg, aya sāf.”

³⁰ Jesus Pita irokenen, “Aya ō momoi arokonok, gama bō enī bun, tataro kokorok ye uru fiya sā mog, ō ogo aya nigin wa wo, towo wouf.”

³¹ Anī ere, Pita total bagai iron, “Momoi aya ō uruwom gare tauf nigin oufeg, aya ō nigin to bagai wa afouf.” Age ye di, idig ganan od de tekelei anī diron.

Getsemane Oun
(*Matyu 26:36-46; Luk 22:39-46*)

³² Idi modoū yana Getsemane dedig, an dilen. Age de fen, Jesus in dō fiya tar irokenēdin, “Ein ubodōg mog, aya kosē auf.” ³³ Ī, Pita, Jems, Jon anidi dogol geif fen, ī geid dilen. Agef fen, ī wau gūf fen, morō odug gudū fen. ³⁴ Jesus idi irokenēdin, “Neu malaukanon tobega le fen, wau morō gudū feis, laa nē daū bun ifaref. Ein ufareg fen, lo weleg.”

³⁵ Naal godof iroule fen, kisi falauf are, sain anī Jesus wal fiyēf nigin, ī tenebur kubū ye fen, kosē yen. ³⁶ Jesus iron, “Aba, † Dei, ereb ereb ganan, ō age fiya kisi feleya.

† 14:36: Anī nē gariya, Aram od bun ‘Dei.’

Kap enī walelkana. Anī ere, neu oroya anī to dō wo, on oroya dō wo.”

³⁷ Age fel fen, Jesus in dō fiya tar gedin kel isin, mulā den mog, iledin. Jesus Pita irokenen, “Simon, ō wenek de? Ō aua tekelei to mata ubodōf de? ³⁸ Ā, kisi yeīya bun to kubū gouf nigin lo weleg fen, kosē gouf. Uur are orof, anī ere, bouwa anī malegef.”

³⁹ Ī baban kel ile, uruwa kosē yen gen, dōf age fen. ⁴⁰ Ī kel isin, baban denena mog, iledin, ere nigin, idi meleid morō gudū fesin. Idi Ī ereb fiyēya nigin taka to kisi difen.

⁴¹ Jesus kel towo fe fen, in dō fiya tar irokenēdin, “Ā fau si unog fen, yenēyai gef? Bure! Sain mogo isil. Ulegef, Tamo Naal mogo mosor tamo imeid bun ilef. ⁴² Fafāg fen, teleg! Kiwai imeid bun inoya tamo yeir isif!”

Jesus Dirounen
(*Matyu 26:47-56; Luk 22:47-53; Jon 18:3-12*)

⁴³ Jesus fau wogō ye mog, tuwelf anidi atun taka, Judas wō yen. Tamo musei dimig adodo, seburer adodo, ī geid disin. Pris odudug, lo ifelnēdiya tamo, mudur adodo idim sur difedi di, disin.

⁴⁴ Gama Judas Ī Jesus yaor fiyēya nē uris nigin, idi faded fiyēdin: “Tamo aya umā afouf anī, Ī waleg fen, uroug uleg.”

⁴⁵ Judas kaisā bagai Jesus wagen ile iron, “Rabi!” Agef fen, umā fiyen. ⁴⁶ Tamo idi Jesus ka dife dirounen. ⁴⁷ Age dife di, tamo melsā difaren anī takam dimig ul feis yale, pris mudur ado nē kabī tamo weder salōf iran.

⁴⁸ Jesus iron, “Aya bē tamo gen, ā dimig adodo, seburer adodo, waleyagau fenē usigef de? ⁴⁹ Naa ganan, aya ā geid tabod ken, tempel fofomala bun afelnein, anī ā aya to urouyagen. Anī ere, Negur nē Itotoya bun ibodok anī kisi falauf nigin.” ⁵⁰ Age ye di, ganan ditornē diyalelen.

⁵¹ Tamo gaū taka, gabar lalau dogol ifonun Ī, Jesus dō fen. Sain idi Jesus ka dife di, ⁵² Ī gabar inū iraille, gemū iyawon.

Jesus Juda Kaunsel Neid Kot Mala Bun Ifaren

(*Matyu 26:57-68; Luk 22:54, 55, 63-71; Jon 18:13, 14, 19-24*)

⁵³ Idi Jesus dale, pris mudur ado wagen diroulen. Age dife di, pris odudug, mudur adodo, lo ifelnēdiya tamo geid, ganan disi guru difen. ⁵⁴ Pita Jesus dume dōf, tokō fel ile, pris mudur ado nē fō fofomalan wō yen. An ī kabī tamo geid dibod ken, yā imidirek ibodon.

⁵⁵ Pris odudug, kaunsel ganan geid, Jesus laa bun dinenēf nigin bouwa bun od dimiren. Anī ere, taka to dilen. ⁵⁶ Musei Jesus bouwa bun idegēya od diraran, anī ere, idi neid od tekelei sā.

⁵⁷ Age de fen, tamo tunī fafā de fen, Jesus bouwa bun idegēya od enī diran, ⁵⁸ “Amā karī mafiyē mog, iron, ‘Aya tempel tamom dinon anī narī afel fen, naa towo bun, taka, are tamom to inouf anī anouf.’”

⁵⁹ Anī ere, idi neid od anīg tekelei sā.

⁶⁰ Age de di, pris mudur ado wagedin fā ye ifar fen, Jesus to fiyen, “Ō to solo urōf de? Eī ere od anī tamo enidi dirousi, ō boū bun duk?” ⁶¹ Anī ere, Jesus ī mutū ifar fen, to solof iron.

Baban pris mudur adom, ī to fiyen, “Ō Kristus, Negur Naal de?”

⁶² Jesus iron, “Aya im, ā Tamo Naal Negur megeir ado ima biyalem ibod ken, saa lalo bun isi mog, ulogouf.”

⁶³ Age ye di, pris mudur ado in kolos serek fe fen, to fen, “Ere nigin ada od megeir fiya nigin tamo baban tamirēf?”

⁶⁴ “Ā kono fiya od mogo karī gel. Ā ere kisi gef?”

Idi ganan ī laa foug nigin diron. ⁶⁵ Age de fen, tunī Jesus disisnē, mala difofakel fen, imedim dun. Age de fen, idi diron, “Aim inok kurō weis urō!” Age dife di, kusī tamo Jesus dale fen, dun.

Pita Jesus Nigin Wa Fen

(*Matyu 26:69-75; Luk 22:56-62; Jon 18:15-18, 25-27*)

⁶⁶ Pita fō fofomalan tenebur ibod mog, pris mudur ado nē kabī kayau taka isin.

⁶⁷ Ī, Pita yā imidir mog, lo fel fen, iron,

“Ōg Jesus Nasaret tamal geiden.”

⁶⁸ Anī ere, ī waf fen, iron, “Ō od urok enī, aya keleī sā.” Age ye fen, ī bobogē iyok ilen.

⁶⁹ Kabī kayau anī Pita an ile fen, ī baban an difaren anī irokenēdin, “Tamo enī are idi neid taka.” ⁷⁰ Ī baban wa fen.

Sain naal ilele di, idi melsā difaren anidim Pita dirokenen, “Mmoi bagai, ō idi neid taka, ere nigin, ō Galili tamal.”

⁷¹ Ī mogo yogo bouwa geluf fen, total od irokenēdin, “Tamo ā urōgef anī, aya keleī sā.”

⁷² Age ye mog, kaisā bagai, tataro baban kokorok yen. Age fe di, Pita Jesus od irokenen anī weder fokō felen: “Tataro fau kokorok ye uru fiya sā mog, ō aya nigin wa wo, towo wouf.” Anī bunem, ī kusureis fen, inā yalen.

15

Jesus Pailat Mala Bun Ifaren

(*Matyu 27:1, 2, 11-26; Luk 23:1-5, 13-25; Jon 18:28-19:16*)

¹ Bonime bagai, pris odudug, mudur adodo, lo ifelnēdiya tamo, Juda neid kaunsel ganan geid, od difon. Idi Jesus difō dale dirou, Pailat ima bun dinon.

² Pailat Jesus to fiyen, “Ō Juda neid king de?”

Jesus solof iron, “Are de yer, ō urok anī.”

³ Pris odudug ī bouwa bun od musei dun. ⁴ Anī nigin, Pailat baban Jesus to fiyen, “Ō to solo wo urōf de? Ereb erob musei nigin bouwā bun od dinof anī ulef.”

⁵ Anī ere, Jesus fau od taka to solo fen. Age fe di, Pailat terē ye fen, kisi musei yalen.

⁶ Gawaman nē tobonunā are, Pasa Sifa inoya bun tamo kayau dirō di, kalabus bun tamo taka dalisnēdig. ⁷ Tamo taka yana Barabas ī, tamo kusī dales fen, tamo didenkesin, kalabus bun dinenan anidi neid taka. ⁸ Tamo kayau mala odug dise, Pailat gai age fedig anī, age fenēdiyof nigin to difiyen.

⁹ Pailat to fedin, “Ā aya Juda neid king anī aliskeneīf de?” ¹⁰ Pailat keleī, pris odudug idi kiyeī dino fen, Jesus ī ima bun dinon. ¹¹ Anī ere, pris odudug tamo kayau waud dale fen, dirokenēdi di, idi Jesus

ban Barabas anī Pailatem yaliskēdiyof nigin diron.

¹² Pailat idi to fiyēdin, “Juda neid king gedig anī, aya ī nigin naig afiyēf?”

¹³ Idi diweig diron, “Aa tetek bun ūf!”

¹⁴ Pailat idi to fiyēdin, “Ere nigin? Ere mosor ī age fen?”

Anī ere, idi totol bagai diweig diron, “Aa tetek bun ūf!”

¹⁵ Tamo kayau waud el foug nigin, Pailat Barabas yaliskēdin. Pailat irō di, Jesus wagī difiye ken, aa tetek bun dūf nigin, kusī tamo imeid bun inon.

Kusī Tamo Jesus Ketē Difiyen
(*Matyu 27:27-31; Jon 19:2, 3*)

¹⁶ Kusī tamo idi, Jesus dale dirou gawaman mudur nē fō aaben dile fen, kusī tamo ganan diweignēdi di, guru difen.

¹⁷ Idi gabar kadaū difounkenen, age de fen, idi malū duri ado dale, teter tanak kori de fen, ī mudur bun kurū difen. ¹⁸ Age de fen, idi ī diweig dirokenen, “O, Juda neid king gai gai ibodōf!” ¹⁹ Baba baban idi werī tibog nem mudur bun du ken, disisnen. Idi iboreid bobou de, kususu de fen, ketē difiyen. ²⁰ Idi ketē difiye kel fen, gabar kadaū dinukeis, yogon gabar bagai anī difounkenen. Age de fen, idi ī aa tetek bun dūf nigin dirou diselen.

Jesus Aa Tetek Bun Dun
(*Matyu 27:32-44; Luk 23:26-43; Jon 19:17-27*)

²¹ Tamo taka Sairini tamal, yana Simon, Aleksanda Rufus ado neid temeid, ī yogon fonom isi, luwen wal fediyōū mog, idi Jesus nē aa tetek faali foug nigin nugo difiyen. ²² Idi Jesus modoū yana Golgota (anī nē gariya, Mudur Tuwa nē Modoū) an dirou diselen. ²³ Age de fen, idi Jesus darau naal to karī youf nigin wain marasin* taka ado falei de difenen, anī ere, ī to yon. ²⁴ Idi ī aa tetek bun du ken, in gabar foi de fen, aibem ereb anī yalouf nigin aisaī kodē den.

²⁵ Bonimeid nain kilok bun, idi ī aa tetek bun dun. ²⁶ Jesus bouwa yūya od eig de

ditoton: JUDA NEID KING. ²⁷ Idi bē tamo urug, ī geid aa tetek bun didenen, taka Jesus ima biyalē, taka ima kilē.† ²⁹ Tamo kayau dile disi dife, kono difiye ken, kasā difiyē, mudureid dira ken, diron, “Ō, tempel narī afel fen, baban naa towo bun anouf, won, ³⁰ ō ogo nigin usenne ken, aa tetek bun tamal kutū weis!”

³¹ Age difiyen gen, pris odudug, lo ifelnēdiya tamo geid, idi dogo dogol wogō de fen, ī ketē difiyen. Idi diron, “Ī tunī isennēdidig, anī ere, ī yogo isennēya kisi feleya sā! ³² Kristus enī, Israel neid King, utornēg len, gama aa tetek bun tamal kutū yeis len, tail fen, momoi tauf.” Idi ī geid aa tetek bun didenēdineg, ī kono difiyen.

Jesus Laa Fen

(*Matyu 27:45-56; Luk 23:44-49; Jon 19:28-30*)

³³ Gaa atun tuwelf kilok bun, gugum isi, teneub ganan kerū fel ile, tri kilok aragaun. ³⁴ Aragau tri kilok bun, Jesus wade bagai iweig iron, “Eloi, Eloi, lama sabaktani?” –anī nē gariya, “Neu Negur, neu Negur, ere nigin ō aya utornal?”†

³⁵ Tunī melsā difaren, anī karī de fen, idi diron, “Karīg, ī Eliya iweignek.”

³⁶ Tamo taka gudu re ile, spons§ yalen, wain makik ado bun nu feis fen, tibog bun ino fen, Jesus yāf nigin ifenen. Agef fen, ī iron, “Gama utornēg. Eliya isi yaleisnē mog, tailauf.”

³⁷ Jesus ait odug nem iweig fen, laa fen.

³⁸ Tempel nē gabar faraf uru fen, ilunenem irousil teneburen. ³⁹ Kusī tamo neid orowa, Jesus wagen an ifaren anī, in kaīya anī karī ye, in laa anī ile fen, iron, “Momoi bagai, tamo enī Negur Naal!”

⁴⁰ Kayau tunī so del difar fen, lo difen. Idi atun, Maria Magdala, taka Maria, Jems naal bagai Joses ado neid sineid, taka Salome. ⁴¹ Galili an kayau enidi Jesus dō difiye ken, aruna dalen. Kayau musei, Jesus geid Jerusalem diselen anidig an difaren.

* **15:23:** Marasin nē yana, ‘mer (myrrh).’ † **15:27:** Itotoya tunī eig de ditoton: kilē. **28** Age de fen, Negur nē Itotoya enei kisi felen, “Ī lo difodulēdig anidi geid bagu difedin.” (Asaia 53:12) ‡ **15:34:** Sam 22:1 § **15:36:** Maaīwō tamal safina taka, ku nanaal musei ado naan dū fedig.

Jesus Mũ Difen

(*Matyu 27:57-61; Luk 23:50-56; Jon 19:38-42*)

⁴² Naa are dodok fiya nē naa (naa anī bure fele di, Sabat naa wō youf). Aragau mog, ⁴³ Josef, Arimatea tamal, ī kaunsel neid odug taka, ī yogo anī Negur nē tano tari fen, ī kumī sā Pailat garan ile, Jesus bouwa buru yalouf nigin to fiyen. ⁴⁴ Pailat Jesus mogo laa fel ya anī karī ye fen, terē yen. Ī kusī tamo neid orowa iweigne ken, Jesus mogo be laa fel anī, ī to fiyen. ⁴⁵ Sain ī kusī tamo neid orowa bun laa fel ya karī ye fen, ī Jesus bouwa buru yaleya nigin Josef yo fiyen. ⁴⁶ Age fe di, Josef gabar lalau na yale fen, bouwa buru yaleis, gabar lalau anim sile fen. Agef fen, ī matmat sa bun ku dalen anī kur inenen. Gama ī meein wele fe di, matmat bobog katī felen. ⁴⁷ Maria Magdala, Maria Joses nē sina ado, ī dinenen modoū anī dilen.

16

Jesus Mata Kel Fā Yen

(*Matyu 28:1-8; Luk 24:1-12; Jon 20:1-10*)

¹ Sabat naa bure fele di, Maria Magdala, Maria Jems sina, Salome anidim dile, Jesus bouwa bun wā difouf nigin, moul sumeī biya na gei difen. ² Uub nē naa matu bun* bonimeī bagai, we kurā fel mog, idi matmat bun naab diyok dile fen, ³ idi abob to difen, “Aim matmat bobog bun meein wele fel kanadauf?”

⁴ Age de fen, meleid diran, idi meein odug biya anī wele feleya dilen. ⁵ Idi meku namen dilen, tamo gaū taka gabar lalau ifounkel, ima biya melem ibod mog, dile fen, terē den.

⁶ Ī iron, “To terē wog, ā Jesus Nasaret tamal aa tetek bun dun anī umirnēgef. Ī mogo fā yel! Ī ein sā. Idi ī dinenē yenen modoū anī uleg. ⁷ Anī ere, uleg, in dō fiya tar Pita geid urokenēdig, ‘Ī ketem Galili ilef. An ī ulogouf, ī irokenein kilei.’ ”

⁸ Idi terē de fen, waud firagagaū felen, anī nigin, kayau idi ulolō deis, meku ditor diyawon. Idi kumī den nigin, aib taka to dirokenen.

* **16:2:** Are Sande.

[*Itotoya tunī kulu bagai od gariya dino fen, ditoton anī bun, Mak 16:9-20 to ibodok.*]

Jesus Maria Magdala Bun Wō Yen

(*Matyu 28:9, 10; Jon 20:11-18*)

⁹ Jesus, uub nē naa matu bun bonimeī bagai, fā ye fen, ī Maria Magdala bun ketem wō yen, kulu Jesus kaa sesen sewen kayau anī bun irudin. ¹⁰ Ī ile, idi Jesus geid diyon anidi, waud gudūf fen, marudim difen anī irokenēdin. ¹¹ Idi, Jesus mata fā yel, kayau ī ilel ya anī karī de fen, waud to momoi den.

¹² Dum in dō fiya tar uru naab diyok dile mog, Jesus bouwa fire bunem, idi atun wō yen. ¹³ Age fe di, idi keku de disi, an difaren anidi dirokenēdin, anī ere, idi nigineg to momoi den.

¹⁴ Dum idi llewen, saaf doko dibod mog, Jesus idi bun wō ye fen, ou fiyēdin, ere nigin, idi Jesus fā yel mog, dilen anī to momoi de fen, waud katī difelen nigin.

¹⁵ Jesus irokenēdin, “Ā teneub ganan bun uleg fen, biya od tamo kayau ganan urokenēdig. ¹⁶ Taka ī momoi ye fen, naan yalef are, ī kel yalouf, taka ī to momoi yef are, es fiya bun inenēf. ¹⁷ Momoi def idi, uris enidi idi bun wō youf, idi aya yanau nem kaa sesen dirudiyouf, idi od mata mata wogō douf. ¹⁸ Idi imedim gogour dale diroudiyouf, takag, laa nē mū sane dāf, to mū idenēdiyof, takag, idi dagi tamo bun imeid dino di, dagi sa kalauf.”

Jesus Saa Ilun Irou Iselen

(*Luk 24:50-53; Aposel 1:9-11*)

¹⁹ Odug Jesus irokeneīd bure fele di, Negur Jesus yale, saa ilun irou isel, Negur ima biyalē ibodok. ²⁰ Anī nigin, in dō fiya tar dile, teneub ganan bun biya od wogō den. Age dife di, Odug idi ado kabī yale di, uris bunem yogon od anī megeir fen.

Luk

Od Uyu Irouya

¹ Musei idi, amã atun ereb ereb wowã yen anĩ, ditotauf nigin age difen, ² are biya od nẽ kabĩ tamo uyulil dibod ken, meledim dilen anidi bun tamal, anĩ wogõ difaman. ³ Age fiya nigin, aya yug bagai, gariya bunem ereb wowã yen anĩ ganan amir ailen, are aya kisi afen, tamo odug Teofilus õ bun el fe, itotoya nigin biya bagai aun, ⁴ anĩ bunem, õ ereb ereb difel-non are momoi yeya anĩ keleĩ youf.

Jon Naan Igunẽdiya Tamo Gõ Fiya Sã Mog, Anĩ Ket Wogõ Yen

⁵ Herod Judia nẽ king ibodon sain bun, pris taka ibodon, in yana Sekaraia, ã Abiya nẽ pris bun tamal taka, in aiwa Elisabet ãg Aron nẽ ibor bun tamal. ⁶ Idi urom Negur mala bun madur dibodon, idi Odug nẽ ãtãfiya ganan ado nun el de, tutuk dõ difedig. ⁷ Anĩ ere, idi urom kesu sã, ere nigin, Elisabet ã dali, kesu gõ fiya kisi feleya sã, agef fen, idi urom tubau bagai.

⁸ Sain taka bun, Sekaraia, ne kabĩ tura tar geid kabĩ dale mog, ã Negur nẽ pris kabĩ yale fen, ⁹ pris idi neid tobonunã bunem, Odug nẽ tempel namen ile fen, aa gaula sumeĩ biya tõ fiya nigin aisaĩ kodẽ bunem ã digirnen. ¹⁰ Aa gaula sumeĩ biya tõ fiya saine di, idi Odug yana dalesedig ganan mayarẽ kosẽ den.

¹¹ Agef mog, Odug nẽ engel, ã bun wõ ye, alta aa gaula sumeĩ biya tõ fiyadig anĩ ima biyalẽ ifaren. ¹² Age fe di, Sekaraia ã ile fen, ã terẽ ye mã, kumĩ ye fen, dẽ yelen. ¹³ Anĩ ere, engel ã irokenen, “Õ to kumĩ wo, Sekaraia, ogon kosẽya are Negur ã karĩ yen. Ogon aiwã Elisabet ã, ogon kesu monog gõ foug, age fe di, in yana ã, Jon wouf. ¹⁴ ã bunem waũ kulĩya ado waũ al fiya õ bun ibodõf, age fe di, musei ã gõ foug bun waud al foug, ¹⁵ ere nigin, Odug mala bun ã yana odug adouf, ã wain be, aai naan total falei difef anĩg to yãf, agef fen, ã sina namenem Awa Uur Fateulem aura fiyẽf. ¹⁶ Israel tamo kayau musei fau

inim, Odug, nedi Negur wagen kel gurif irou ilauf. ¹⁷ Agef fen, ã Eliya nẽ uur ado megeir bunem, Odug fau ileya sã mog, ã ket uyu irou ile fen, temeid tar, naaluid tar nigin waud yenẽf nigin ado, fe temeleid idi madur ibodõya nẽ kisi biya bun ileya nigin falei fe fen, tamo kayau Odug nẽ anidi saika fediyouf.”

¹⁸ Sekaraia engel to fiyen, “Naig afe fen, aya enei keleĩ youf? Aya neu kayau ado urom mabodok masi, tubau bagaif.”

¹⁹ Engel aiten yale iron, “Aya Gabriel. Aya Negur mala bun afaredig, anĩ nigin, aya õ wogõ yõya nigin ado, biya od enei irokonõya nigin sur fiyal. ²⁰ Anĩ gama õ ait ufokol fen, od to wogõ wof ule, anĩ wõ youf naa bun, ere nigin, õ neu od to momoi wol, od enei are fau yogon sain bun bagai, kaũ wõ youf.”

²¹ Age fe di, tamo kayau Sekaraia tari de fen, idi ã sain meluk tempel namen ibodon nigin kisi musei dalen. ²² ã ulõ yesin sain bun, ã wogõ fiyẽdiya kisi feleya san. Age fe di, idi kelein, ã tempel namen mala seleulã kurãf fen, ereb taka ilel, ere nigin, ã imam dogol ifelneid fen, ã wogõya sã ibodok ilen.

²³ In kabĩ nẽ sain bure fele di, ã fõ bun kel ilen. ²⁴ Anĩ bure fele di, in aiwa Elisabet bou adon, agef fen, ogõ faif ã iminkel ibodon. ²⁵ ã iron, “Odugem enei age fanan. Naa eneidi bun, ã yogon oroya ado wau ifenõya ifelnan, agef fen, neu mama tamo kayau atun yalelkanan.”

Jesus Gõ Fiya Sã Mog, Anĩ Ket Wogõ Yen

²⁶ Ogõ sigis bun, Negur, engel Gabriel Nasaret taun, oun Galili teneub, sur fiyẽ di, ile, ²⁷ kayau taulei, tamo yana Josef, Dawid nẽ ibor bun tamalem yalouf nigin digirin gein ilen. Kayau taulei yana Maria. ²⁸ Engel ã gein ile fen, iron, “Fel, õ nigin Negur fatuk el yok. Odug õ ado ibodok.”

²⁹ Maria in od nigin wau fatuk togu fen, aanya enei naig fiya nigin ye fen, kisi musei yalen. ³⁰ Anĩ ere, engel ã irokenen, “Maria, õ to kumĩ wo, õ Negur nẽ wau el fiya gurug wol. ³¹ ã fau kesu ado fen, kesu monog gõ wouf, ago fen, yana ã, Jesus wouf. ³² ã fau odug wõ ye di, Negur Ilun Bagai Naal douf. Negur Odug yogo, king

nē modoũ tama Dawid nē anī, ī ifenēf.
³³ Age fe di, ī Jakop nē ibor bun king gai
 ibodkalauf, in tano to sa kalauf.”

³⁴ Maria engel to fiyen, “Aya fau mois, eī
 naig fe wō youf?”

³⁵ Engel ī aiten yale iron, “Awa Uur
 Fateul ō bun isiyouf, age fe di, Negur Ilun
 Bagai nē megeir kerub yōf. Anī bunem
 fateul bagai gō wouf are, yana Negur Naal
 douf. ³⁶ Ogon sirag Elisabeteg tubau mog,
 kesu yalouf, ī dali den, anī mogo ogō sigis
 ī bou ado ibodok. ³⁷ Ere nigin, ereb taka
 anī Negur bun malai sã.”

³⁸ Maria ī aiten yale iron, “Aya Odug nē
 kabī kayau, aya bun od sã, ō urok kilei od
 sã agef wō youf.” Age ye di, engel ī itornē
 ilen.

Maria Elisabet Ki Fiyen

³⁹ Sain anī bun, Maria dodok fel, kaisã
 bagai taun taka arei bun, Judia distrik
 nediwon ilen. ⁴⁰ An ī Sekaraia nē fō
 bun wō ye fen, Elisabet fel fiyen. ⁴¹ Sain
 Elisabet Maria nē fel ya anī karī ye fen,
 kesu sina namen ibodon anī okī yen, age fe
 di, Elisabet Awa Uur Fateulem aura fiyen.
⁴² Ī ait odugem iweig iron, “Kayau ganan
 atun, Negur ō el yok. Agef fen, kesu gō
 wouf anīg, Negur ī el fiyek! ⁴³ Anī ere,
 aya naig fiya bagai nigin, neu Odug nē sina
 anī aya bun isif? ⁴⁴ Ogon fel ya nē ait
 wederoun ile mog bagai, momou nameun
 al fe fen, okī yel. ⁴⁵ Kayau taka, ī ereb Odug
 ī irokenek are agef kisi fel wō youf, ye fen,
 momoi yef, are Negur ī el fiyek!”

Maria Nē Seg

⁴⁶ Age fe di, Maria iron:
 “Neu malaukanon Odug yana yalesef,
⁴⁷ agef fen, neu uur Negur Isennaya
 nigin kulī yef,
⁴⁸ ere nigin, ī, aya yogon kabī kayau maleg
 nigin
 kisi fatuk yalen.
 Sain enei bunem ilauf ganan, ibor ganan
 Negur ī el fiyen douf,
⁴⁹ ere nigin, Negur Megeir Barikã ī aya
 bun ereb odug age fel,
 ī yana fateul ibodok.
⁵⁰ In wau yūya, ī nigin anini def bun tobol
 fouf,

ibor gama ibodok enei ado, dumen
 isiyouf idi buneg gai gai ibodkalauf.

⁵¹ Ī yogo imam kabī total odug biya age
 fedin,
 ī idi neid kisi bun yeneid dalesef anī
 irudi di, firagagaũ difen.

⁵² Ī yeneid adodo, nedi modoũ bun yalel-
 neid fen,
 maleg anī yalesnēdin.

⁵³ Ī idi naũ fedif anī, ereb ereb biya ifeneid
 fen,
 idi safineid adodo daku irudin.

⁵⁴ Ī amã tubumã tar irokenēdin kilei,
 ī yogon kabī tamo Israel isennen,

⁵⁵ agef fen, Abraham ado in ibor nē tubu
 tar bun faimud,
 wau yūya ifenēdiya nigin karī
 yeledig.”

⁵⁶ Maria, Elisabet ado ogō towo age fiya
 dibod ken, fō bun kel ilen.

Jon Naan Igunēdiya Tamo Gō Fen

⁵⁷ Elisabet nē kesu gō fiya sain wō ye di,
 ī kesu monog gō fen. ⁵⁸ Ī ne tã tar, in sirag
 tar geid, Negur nē wau yūya odug ifelnen
 anī karī de fen, idi weim waud al fen.

⁵⁹ Naa eit bun, idi mulũ nigin kesu bou
 gudũ fiya nigin disin, age de fen, ī yana dũ,
 tama nē dait Sekaraia douf nigin age difen.

⁶⁰ Anī ere, ne sina aitedin yale iron, “Age
 fiya sã! Ī yana Jon ye yauf.”

⁶¹ Idi ī dirokenen, “Ogon sirag tar atun,
 yana age fiya taka sã.”

⁶² Age de fen, in tama bun kesu yana
 aib youf anī karī douf nigin, uris difenen.

⁶³ Age dife di, ī itotoya nē safina nigin to
 fiyēdin, agef fen, “Ī yana Jon,” ye itoto di,
 idi ganan terē den. ⁶⁴ Sain anī bun bagai, ī
 awa kakã ye di, bale faraf yale ulō yalaisi
 di, ī wogō ye fen, Negur yana yalesen.

⁶⁵ Ne tã tar terē de fen, anini den, age de
 fen, Judia neid arein, fonō fonō wogagã
 de fen, ereb wō yen anī ganan wogō den.

⁶⁶ Adok anī karī de fen, kisi musei dale fen,
 to difen, “Kesu enei naig fiya wō youf?”
 Ere nigin, Odug nē ima ī bun ibodon.

Sekaraia Nē Seg

⁶⁷ In tama Sekaraia Awa Uur Fateulem
 aura fiyē di, ī profet od eig ye wogō yen:

⁶⁸ “Odug seli tabiyouf, Israel neid Negur,

ere nigin, ï isi fen, in tamo kayau kafï fiya bun tamal kel gei fel.

69 ï yogon kabï tamo Dawid nê fõ bun, isennadaya megeir ado yalesel ifaref,

70 (are ï yogon profet fateul kulu temeleid sigoreid bun wogõ den kilei).

71 Nemã kiwai tar ado, amã nigin to orodif anï imeid bun tamal, kel yalemãf.

72 Nemã tamamã tar nigin wau yũya anï ifelneïd fen, ï yogon bar itenẽya fateul anï karï yelen.

73 ï wau kuturol fen, nemã tamamã Abraham irokenen.

74 Nemã kiwai tar imeid bun tamal kel gei famãf, agef fen, amã kumï sã ï aruna yaleya kisi falauf nigin.

75 Amã nemã mabodok malauf bun, ï mala bun gai fateul bagai fen, madur bagai mabodõf nigin.

76 “Age fe di, õ neu kesu, Negur Ilun Bagai nê profet douf, ere nigin, õ uyu urou fen, Odug nê naab dodok wouf.

77 In tamo kayau neid mosor nigin wedereid tu kalauf bunem, kel yalediyouf nê keleï wenëdiyouf.

78 Are nemã Negur molol nem wau yũya bunem, anï bun gaa kurã fiya, saa ilunem amã bun isiyouf.

79 Are idi gugum bun difaref ado, laa nê buri bun difaref anidi bun, fula fouf, age fe di, nemã yemã delë anidi bun madur marã di, wau inosiya bun malauf.”

80 Age fe di, kesu biya fen, uur orib yen, ï gerere tuan ibodok ile, dum ï Israel tamo kayau meleid bun wõ yen.

2

Jesus Gõ Fen (*Matyu 1:18-25*)

1 Sain anï bun, Sisa* Ogastus, Rom teneub ganan bun, tamo kayau an temeleid anï yeneid yaleya nigin od inon.

* 2:1: Rom neid king odug.

2 (Eï urug bagai, sain Kwirinius ï Siria nê gawaman mudur ibod mog, tamo kayau yeneid dalen.) 3 Anï nigin, ganan dogo dogo neid taun bun yeneid inoya nigin dilen.

4 Anï nigin, Josef ïg, oun Galili teneub Nasaret taun bun tamal Judia iselen, Betlehem Dawid nê taun bun iselen, ere nigin, ï Dawid nê fonõ ado in ibor bun tamal. 5 ï Maria ado yeneid dinouf nigin diselen, ï Maria aiwauwuf nigin digirin, anï ï bou ado. 6 Idi an dibod mog, kesu gõ fiya sain wõ yen. 7 Age fe di, kesu monog matu gõ fen. Maria ï gabar nem silef fen, yaro neid beï bun inenen, ere nigin, tamo irouya fõ bun modoũ isokosen.

Gaar Lo Fediya Tamo, Engel Geid

8 An gaar lo fediya tamo, melsã fonõ yerin dibod ken, bõ nedi gaar lo difedin. 9 Age de mog, Odug nê engel idi bun wõ yen, age fe di, Odug nê fula fiya medeïya kerub fedi di, idi kumï tererë den. 10 Anï ere, engel idi irokenëdin, “Ã to kumï wog, aya od biya, tamo kayau ganan waud al fouf nigin arou asif. 11 Ere nigin, gama Dawid nê taun bun, ägenei isenneïya wõ yel, ï anï Kristus Odug. 12 Enei ã bun uris. Æ momou taka gabar nem sile de fen, yaro neid beï bun dinenem yenek anï ulogouf.”

13 Kaisã bagai, engel musei saa ilun temeleid ulolõ deis, engel anï geid Negur yana dales diron,

14 “Negur ilun bagai bun fula fiya medeïya, age fe di, tenebur ein tamo kayau ï el fedif bun, wau inosiya ibodõf.”

15 Sain engel idi ditorneïd, saa ilun disele di, gaar lo fiya tamo abob dirokenen, “Odug ada irokanadal anï nigin, ada Betlehem teleg, ereb wõ yel anï taileg.”

16 Anï nigin, idi kaisã bagai dile, Maria, Josef ado diledin, momou yaro neid beï bun yen mog, dilen. 17 Idi ï dile fen, idi kesu anï nigin wogõ fiyëdin anï od wogõ de diyon. 18 Age dife di, ganan karï den idi, gaar lo fiya tamo wogõ difiyëdin anï nigin terë den. 19 Anï ere, Maria od anï ganan yale fen, waun ino fen, kisim dogol fen. 20 Gaar lo fiya tamo keku de fen, idi wogõ fiyëdin kilei, ereb idi karï den ado

dilen anī ganan nigin, Negur seli dabi fen, yana dalesen.

Jesus Tempel Bun Dirou Dilen

²¹ Naa eit bun, ī mulū ileyā saine di, ī yana dū, Jesus den, yana are sina fau bou ado ya sã mog, engelem yun.

²² Idi neid nonorou lilik fiya naa, Moses nē Lo ifaref kilei anī bure fele di, Josef Maria ado, Jesus Jerusalem, Odug ifenēya nigin dirou diselen, ²³ (are Odug nē Lo ito-toya bun ibodok kilei, “Kesu matu monog wō douf ganan, Odug wenēdigouf”*), ²⁴ idi Negur sesewi fiya difenēf nigin diselen, Odug nē Lo eig ye irok kilei, “kuburir uru be, kukutir balas uru be.”*

²⁵ Gama Jerusalem an tamo yana Simeon ibodon, ī madur bagai fen, Odug nigin karī yeledig. Ī Israel waud inosiya dalouf anī tari fedig, Awa Uur Fateul ī bun ibodon. ²⁶ Awa Uur Fateulem, ī fau to laaf mog, Odug nē Kristus wō ye di, ilouf nigin irokenen. ²⁷ Awa Uurem toli fiyē di, ī tempel nē modoū bun ilen. Sain tama sina ado, Lo irok kilei age difouf nigin, kesu Jesus dirou dile di, ²⁸ Simeon imam ī yales fen, Negur yana yales iron:

²⁹ “Odug, ō uron kilei, ō gama ogon ferfer wau inosiya ado sur wo di, ilauf.

³⁰ Aya malaum bagai ogon isennēya anī ailel.

³¹ Are ganan meleid bun saika won.

³² Are haiden Israel sã anidi bun, Negur nē oroya kurō falaisiya nē lalan, ago di, are ogon tamo kayau Israel bun fula fiya medeīya.”

³³ Kesu tama sina ado, od anī karī de fen, kisi bun terefeit den. ³⁴ Age dife di, Simeon el fiya ifeneīd fen, sina Maria irokenen, “Kesu enī, Israel tamo kayau musei kuku douf, musei fafā douf nigin ado, ī daū gen ifare di, ī dumen od sane dirōf nē uris wō youf nigin igirnen. ³⁵ Anī bunem, musei waud bun dinokok are yaorouf. Age fe di, ogon malākanon anīg dig otem borū fouf.”

³⁶ Profet kayau takag ibodon, Ana, Fanuel ne barai, Aser nē ibor bun tamal. Ī gai tubau bagai, ī tamo yale fen, aiwa ado yar sewen dibodon. ³⁷ Agef fen, ī waab ibodok

ile, in yar eiti-fo. Ī tempel to itoron, bō ado gaa ado kuri ye fen, kosē ye, Negur yana yalesedig. ³⁸ Sain anī bun bagai, ī idi gein isel, Negur de fiye ken, Jerusalem tamo kayau kafī fiya bun tamal kel yalediyouf nigin ganan tari de difaren anidi, kesu anī nigin wogō fiyēdin.

³⁹ Josef, Maria ado, Odug nē Lo irok anī ganan dō de kisi fele di, idi baban ke de, Galili teneub oun, nedi taun Nasaret dilen.

⁴⁰ An, kesu ī biya fen, total adon, ī kisi biya barikan, agef fen, Negur nē wau ifenēya ī bun ibodon.

Jesus Kesun Tempel Bun Ilen

⁴¹ Yar ganan bun, in tama sina Pasa Sifa naa bun Jerusalem taun diledig. ⁴² Sain ī tuwelf yar mog, idi neid tobonunā dō de fen, Sifa bun diselen. ⁴³ Sifa bure fele di, in tama sina fonō ke de dile mog, kesu Jesus ī fau Jerusalem ibodon, anī ere, idi to kelein. ⁴⁴ Idi weim melef den, age de fen, naa tekelei diyon. Age dife fen, idi mogo nedi sirag tar bun ado, nedi tā tar atun dimirnen. ⁴⁵ Idi ī to dile mā, idi ī dimirnē fenē nigin, Jerusalem taun baban ke de dilen. ⁴⁶ Naa towo bure fele di, idi ī tempel modoū bun ifelnēdiya tamo atun ibod, karī fiyeīd fen, to fiyeīd mog, fotou difiyen. ⁴⁷ Ganan ī karī difiyen are, in kariya nigin ado aiteid solo fen anī nigin, terefeit den. ⁴⁸ Tama sina ado ī dile fen, fatuk bagai terē den. Sina ī irokenen, “Neu kesu, ere nigin eig wamam? Aya tamā ado waumā morō ken, mamirnom.”

⁴⁹ Ī to fen, “Ere nigin ā aya umirnagel? Aya neu Dei nē fō bun abodōf ya, ā keleī sã de?” ⁵⁰ Anī ere, ī ereb irokenēdin are, idi to kelein.

⁵¹ Age dife di, ī weim Nasaret disil fen, sigoreid dōf el fen. Anī ere, in sina anī ganan yale, waun inon. ⁵² Jesus kisi biya ado bouwa orib yen, Negur ado tamo nē lo fiya bun biya len.

3

Jon Naan Igunēdiya Tamo Naab Dodok Fenen
(Matyu 3:1-12; Mak 1:1-8; Jon 1:19-28)

* 2:23: Eksodas 13:2, 12 * 2:24: Levitikas 12:8

¹ Taiberius, Sisa mudur ibodon yar fiftin bun, Pontius Pailat ĩ Judia distrik nē gawaman mudur ibodon, Herod ĩ Galili distrik lo fen, ĩ tura Filip Ituria distrik ado Trakonitis distrik lo fen, age fe di, Lisantias ĩ Abilene distrik lo fen. ² Anas Kaiafas ado pris mudur dibodon sain bun, Negur nē od gerere tuan oun Jon, Sekaraia naal bun isin. ³ ĩ Jordan naan kalilī fiya ganan bun iyo ken, waud falei de fen, naan digū di, mosor yalel kenēdiyof nigin biya od wogō yen. ⁴ Are profet Asaia nē itotoya bun ibodok kilei: “Ait taka gerere tuan iweig irok, ‘Odug nē naab dodok ge fen, madur wenēg. ⁵ Uus ganan bun kurokirīya yoso foug, arei ganan mudu ganan ado gudū falaisi tenebur ouf. Naab goigul yedin, madur foug, naab koūkī yediya yoso fediyouf. ⁶ Age fe di, tamo kayau ganan, Negur nē tamo kayau kel gei fiya anī dilouf.’ ”*

⁷ Tamo kayau Jonem naan igunēdiyof nigin guru difen anidi Jon irokenēdin, “Ā, gogour sane gere tar! Negur nē didi isiyof anī wal ge fen, uyagauf nigin, aim irokenein? ⁸ Wauī falei gef are, faat biya ũ goug. Ā aug nigin to eig ge urōg, ‘Abraham nemā tamamā.’ Aya arokeneik, meein enidi Negur sã irō di, Abraham gere tar wowã douf. ⁹ Safor aayū gariyan mogo ibodok, aayū ganan faat biya to yuk, are itu ira ken, yã malan irãf.”

¹⁰ Tamo kayau guru difen anidim to difen, “Age fiyauf are, amã naig mafouf?”

¹¹ Jon aitedin yale iron, “Tamo ĩ gabar uru adouf are, aib ĩ sã anī taka ifenēf, takag, taka ĩ saaf adouf, areg de age foug.”

¹² Takis yaleya tamog, naan igūya nigin disin, idi to difen, “Tise, amã ere naig mafouf?”

¹³ ĩ irokenēdin, “Ā yaleya kilei anī to wal woseg waleg.” ¹⁴ Age fe di, kusī tamo tunī to difiyen, “Ba amã ere naig mafouf?” Age de di, ĩ iron, “Ā nedi moni nigin ge fen, to fefu wiyēdig fen, idegēya bunem tamo kayau bouweid bun od to ũg. Āgenei kabī mala walegedig anī bun dogol al goug.”

¹⁵ Tamo kayau Kristus nigin tari difen, anī nigin, idi ganan waud bun Jon anī

Kristus be de fen, kisi musei dalen. ¹⁶ Jon idi ganan aitedin yale irokenēdin, “Aya naan nem naan aguneik. Anī ere, taka ĩ in megeir neu wal fiya fau isif, aya to biya nigin, ayam in su nē malū biru felediya kisi feleya sã. ĩ Awa Uur Fateul yã ado nem naan iguneif. ¹⁷ ĩ es fiya nē fok iman ado, ĩ yogon mayã waī foug, yogon wit biya are yogon ki bun kuruf fen, wit ido yã mala faimud bun an irãf.” ¹⁸ Agef fen, Jon od musei bunem, tamo kayau waud yale fen, biya od wogō fiyēdin.

¹⁹ Anī ere, Jonem, Herod tano anī nē mudur, tura nē aiwa Herodias nigin ado ereb ereb sane ganan age fen nigin ou fiyē di, ²⁰ Herod mosor ganan mosor enei ado baguf fen, ĩ Jon kalabus bun inenen.

Jesus Naan Igun Ado In Ibor Nigin (Matyu 1:1-17; 3:13-17; Mak 1:9-11)

²¹ Sain Jonem tamo kayau ganan naan iguneid fen, Jesus ĩg naan igunen. Age fe di, Jesus kosē ye mog, saa kã fele di, ²² Awa Uur Fateul kuburir bouwa bun genem ĩ bun isin. Age fe di, ait taka saa ilunem isin, “Ō neu Kesu, ō nigin aya wau laa fedig, ō nigin aya wau kulī yedig.”

²³ Gama Jesus yogo ĩ yar teti age fiya bun kabī gariya inon. Tamo kayau kisi difen, ĩ Josef naal den,
Heli naal, ²⁴ Matat naal,
Lewi naal, Melki naal,
Janai naal, Josef naal,
²⁵ Matatias naal, Amos naal,
Nahum naal, Esli naal,
Nagai naal, ²⁶ Mat naal,
Matatias naal, Semen naal,
Josek naal, Joda naal,
²⁷ Joanan naal, Resa naal,
Serubabel naal, Sieltiel naal,
Neri naal, ²⁸ Melki naal,
Adi naal, Kosam naal,
Elmadam naal, Er naal,
²⁹ Josua naal, Elieser naal,
Jorim naal, Matat naal,
Lewi naal, ³⁰ Simeon naal,
Juda naal, Josef naal,
Jonam naal, Eliakim naal,
³¹ Melea naal, Mena naal,
Matata naal, Natan naal,

* 3:6: Asaia 40:3-5

Dawid naal, ³² Jesi naal,
 Obed naal, Boas naal,
 Salmon naal, Nason naal,
³³ Aminadab naal, Ram naal,
 Hesron naal, Peres naal,
 Juda naal, ³⁴ Jakop naal,
 Isak naal, Abraham naal,
 Tera naal, Nahor naal,
³⁵ Serug naal, Reu naal,
 Peleg naal, Eber naal,
 Sela naal, ³⁶ Kainan naal,
 Arpaksad naal, Sem naal,
 Noa naal, Lamek naal,
³⁷ Metusela naal, Enok naal,
 Jared naal, Mahalalel naal,
 Kenan naal, ³⁸ Enos naal,
 Set naal, Adam naal,
 Negur naal.

4

Satan Jesus Kisi Fiyen

(*Matyu 4:1-11; Mak 1:12, 13*)

¹ Jesus Awa Uur Fateulem aura fiyen, Jordan naanum kel fen, Awa Uurem itonē, gerere tuan irou ilen. ² An ĩ naa foti ibod mog, Satanem kisi fiyen. ĩ sain anĩ bun ereb taka to yon, naa foti bure fele di, ĩ naũ fen.

³ Agef mog, Satanem Jesus irokenen, “Ō Negur Naal ouf are, meein enei urokenē di, bret falei fouf.”

⁴ Jesus Satan aiten yale iron, “Negur nē Itotoya bun eig ye irok, “Tamo bretem dogol to mata ifenēf.”*

⁵ Satan Jesus yale irou, modoũ ilun isel fen, kaisā bagai teneub enei nē tano ganan ifelnen. ⁶ Agef fen, Satan Jesus irokenen, “Aya ō teneub enei nē biya fiya megeir ado ganan afonōf, ere nigin, are aya ifanan, anĩ nigin, aya aib taka ifenēya orouf are afenēf. ⁷ Anĩ nigin, ō aya selu wabiyouf are, onou ganan are ogon ouf.”

⁸ Jesus Satan aiten yale iron, “Negur nē Itotoya bun eig ye irok, ‘Odug ogon Negur seli wabi fen, ĩ dogol aruna walouf.’*^{*}

⁹ Satan Jesus yale irou, Jerusalem taun ilen, an tempel fō soko ilun bagai inenē, ifaren. Satan iron, “Ō Negur Naal ouf are,

* **4:4:** Diuteronomi 8:3 * **4:8:** Diuteronomi 6:13 * **4:11:** Sam 91:11, 12 * **4:12:** Diuteronomi 6:16 * **4:16:** Juda neid uub naa, are Sarere. * **4:19:** Asaia 61:1, 2

ogo einenem ufū urā. ¹⁰ Ere nigin, Negur nē Itotoya bun eig ye irok:

“ ‘Negur ō nigin yogon engel ari fedo di, kulatun diyōf,

¹¹ idi ō imedim ololon daleyōf, age dife di, ō yē meein takam to itutu ouf.’*^{*}

¹² Jesus Satan aiten yale iron, “Eig ye irok, ‘Odug ogon Negur kisi fiya bun to unenē.’*^{*}

¹³ Satan kisi fiya enei ganan bure fel fen, ĩ Jesus itorne ken, ĩ fau sain taka anĩ tari fen.

Nasaret Tamo Kayau Idi Jesus Dudum Difiyen

(*Matyu 4:12-17; Mak 1:14, 15*)

¹⁴ Jesus Awa Uur nē megeir bunem Galili kel ilen, age fe di, ĩ nigin od Galili teneub fonō fonō ganan iyokelen. ¹⁵ ĩ idi neid uub fō fō bun biya od ifelnēdi di, ganan ĩ yana dalesen.

¹⁶ ĩ Nasaret ilen, ĩ an biyan nē, agef fen, Sabat naa* bun, idi neid uub fō namen ilen, gai age fedig gen. Agef fen, ĩ iwesauf nigin fā ye ifaren. ¹⁷ Age fe di, profet Asaia nē itotoya buk kori fiya anĩ difenen, age dife di, ĩ fara fel fen, eig ye itoton anĩ imiren:

¹⁸ “Odug nē Awa Uur aya bun ibodok, ere nigin, ĩ aya maleg anidi biya od wogō afediyouf nigin, igirna fen, mudurou bun mouf fi felen.

ĩ, aya kalabus bun difaref anidi karika dalouf nigin ado,

meleid ifofakeleya anidi meleid fara falauf nigin, kurō afalaisiyouf nigin sur fiyan.

Tamo kayau tunim kiwai difeneid fen, morō difenēdif anidi yalel kenēdiya nigin sur fiyan.

¹⁹ Takag, Odug nē biya fiya nē yar anĩ kurō afalaisiyouf nigin sur fiyan.”*^{*}

²⁰ Age yel fen, ĩ gaar gabar itotoya ado are korif fen, itotoya anĩ lo fedig tamo, kel ifen ken, ibodon. Juda neid uub fō anĩ bun difaren ganan bagai, Jesus lo difelen.

²¹ Age dife di, ĩ gariya ino fen, irokenēdin,

“Gama naa enī bun, Negur nē Itotoya enei, āgenei karīya bun kisi felel.”

²² Ganan ī yana dales fen, ī sigoron, wau ifenēya od wogō yen anī nigin terē den. Age de fen, idi to difen, “Eī Josef naal anī sã de?”

²³ Jesus idi irokenēdin, “Momoi bagai, aya nigin od enei tamo kayau musei wogō dedig wogō gouf, ‘Dokta, ō ogo ogon dagi el wo! Ereb Kapenaum taun oun agon karī maun anī, ogon fō gariyan ein ago wo.’ ”

²⁴ Ī od tobol fe fen, iron, “Aya ā momoi arokeneik, profet taka ī yogon fō gariyan to karī difiyēf. ²⁵ Aya ā momoi bagai arokeneik, Eliya nē sain bun, Israel oun kayau waab musei difar mog, yar towo ogō sigis saa katī fele di, teneub ganan bun uyē sã naū odug difaren. ²⁶ Age de mog, Negur idi anidi taka bun Eliya to sur fen, anī ere, waab taka Sarefat oun Saidon teneub bun sur fen. ²⁷ Takag, Israel oun profet Elisa nē sain bun, musei lepra dagi ado dibodon, anī ere, idi atun taka lepra dagi to loko felen, Naman, Siria tamalem dogol.”

²⁸ Juda neid uub fō bun, ganan anī karī de fen, waud sanen. ²⁹ Age de fen, idi fafã de fen, ī taun anī itor ilauf nigin dirun. Nedi taun are, arei bun nigin, siya sane bun dirãf nigin dirou dilen. ³⁰ Anī ere, ī tamo kayau atu iyok ile fen, yogon naab ilauf nē anī dōf ilen.

Jesus Kaa Sane Irun (Mak 1:21-28)

³¹ Agef fen, ī Kapenaum taun isilen, taun are Galili distrik bun ibodok, an Sabat naa bun, ī tamo kayau ifelnēdiya gariya inon. ³² Idi ī ifelnēdin anī nigin terē den, ere nigin, in od wogōya are megeir ado.

³³ Juda neid uub fō bun, tamo taka kaa sanem ironen anī an ibodon. Ī ait ilun feis iweig iron, ³⁴ “O, Jesus Nasaret tamal, ō amã ere naig wamã fenē? Ō amã daū wamã fenē nigin usil de? Aya ō nigin keleī, Negur nē Fateul anī!”

³⁵ Jesus total ado iron, “Foro wol! Ī namen tamal ulō weis!” Age ye di, kaa sane anī, tamo kayau ganan atun, tamo

anī tou fiyē ira ken, ulō yeis ilen, tamo are bouwa to daū fen.

³⁶ Tamo kayau ganan terē de fen, abob dirokenen, “Eī ere keleī eig fiya? Ī yana megeir adom irō di, kaa sesen ulō deis dilef.” ³⁷ Anī bunem, ī nigin od teneub anī kalilī fiya ganan bun iyokelen.

Jesus Musei El Fedin (Matyu 8:14-17; Mak 1:29-39)

³⁸ Jesus Juda neid uub fō itor ken, Simon nē fō bun ilen. Simon nē mam, ī bouwa uruwa odug ado nigin yenen anī, isennēf nigin Jesus to difiyen. ³⁹ Anī nigin, Jesus ī itirne ken, bouwa uruwa dagi ou fiyē di, itornen. Age fe di, kayau anī kaisã bagai fã yale, aruneid yalen.

⁴⁰ Gaa kuru kel mog, tamo kayau, dagi tamo dagi gariya fire fire adodo ganan, Jesus wagen guri difeid disin, age dife di, idi mugu mugu bun ima tetedin ino fen, ī idi el fedin. ⁴¹ Kaa sesen, tamo kayau musei bun, ulolō deis fen, diweig diron, “Ō anī Negur Naal!” Anī ere, ī sakã fiyeīd fen, to wogō douf nigin sigoreid ifofan, ere nigin, idi keleī, ī Kristus.

⁴² Bonimeī gugum ado, Jesus moilin ilen. Tamo kayau ī dimirnek dile, ī ibodon nē disī fen, ī idi to itornēdiyof nigin katū difiyen. ⁴³ Anī ere, ī iron, “Aya Negur nē tano nigin biya od, taun taka takag wogō auf, ere nigin, aya anī nigin sur fiyan.” ⁴⁴ Age ye fen, ī Judia distrik oun Juda neid uub fō fō bun, biya od wogō yef iyon.

5

In Dō Fiya Tar Enidi Ket Jesus Iweignēdin

(Matyu 4:18-22; Mak 1:16-20)

¹ Naa taka bun, Jesus Genesaret daliyou* yerin ifaren. Agef mog, tamo kayau ī salili difiye ken, Negur nē od wogō ye di, karī de difar mog anī, ² ī mala ira kel, waag uru naan yerin difar mog, ilen, are gau yaleya tamom an ditor yen ken, nedi kakãg kulo difen. ³ Ī waag anidi taka bun sō yen, are Simon nē waag, agef fen, waag naanū naal godof irou ilauf nigin to

* 5:1: Are, Galili Maaī.

fiyen. Agef fen, ï waag bun ibod ken, tamo kayau biya od ifelnēdin.

⁴ Sain ï wogōya bure fel fen, ï Simon irokenen, “Waag naan mala bun urou ule fen, gau yaleya nigin kakāg urofossil.”

⁵ Simon aiten yale iron, “Odug, amā bō odug kabī totol malel, anī ere, ereb taka to malel. Anī ere, ò urok nigin aya kakāg baban arofosilauf.”

⁶ Sain idi age difen, idi gau musei bagai gei difen, age dife di, nedi kakāg serek fou fenē melsan. ⁷ Anī nigin, idi, nedi tā tar waag taka bun temeleid disi disennēdiyof nigin, gale difiyēdin, age dife di, disi, waag uru bun gau dife isokos fen, waag uru are dimutū fenē melsan.

⁸ Sain Simon Pita enī ile fen, Jesus iboron bobou fe fen, iron, “Odug, aya utorna ule, aya mosor nē tamol!” ⁹ Ere nigin, ï ne tā tar geid gau gei difen anī nigin, terefeit den. ¹⁰ Sebedi gere tar Jems Jon ado, are Simon ne kabī tura tar idig age difen. Age dife di, Jesus Simon irokenen, “Ō to kumī wo, gama naa enī bunem ilauf ganan, ò tamo gei wouf.” ¹¹ Age fe di, idi neid waag fiteiwō didi dife di, isel fen, ereb ereb ganan ditorara ken, Jesus dō difen.

Tamo Lepra Dagi Ado (Matyu 8:1-4; Mak 1:40-45)

¹² Jesus taun taka bun ibod mog, tamo taka lepra guruma barikā anī isin. Sain ï Jesus ile fen, ï tenebur kubū ye kumokur fe, Jesus igone ken, iron, “Odug, ò oroyōf are, el wiyauf.”

¹³ Jesus ima irā, tamo anī kobū fiye ken, iron, “Aya wau irok, ò bouwā biyauauf.” Age ye di, kaisā bagai, lepra daga ï itornen.

¹⁴ Agef fen, Jesus tamo anī irokenen, “Ō aib taka to urokenēf, anī ere, ò pris wagen ule, ò bouwā ufelnef, ò bouwā biyal anī nigin Moses nē od irok anī dō fen, sesewi fiya wenēf, anī bunem yaore di, tamo kayau dilouf.”

¹⁵ Anī ere, ï nigin od fau fau iyok ilen, anī nigin, tamo kayau musei ï karī difiye ken, idi neid daga yalel kenēdiyof nigin disin. ¹⁶ Anī ere, Jesus sain taka taka moilin ile fen, kosē yedig.

Jesus Tamo Bouwa Ilolaisin Anī El Fiyen (Matyu 9:1-8; Mak 2:1-12)

¹⁷ Naa taka bun, ï biya od ifelneid mog, Farisia tamo, lo ifelnēdiya tamo geid, Galili distrik fonō ganan, Judia distrik ado Jerusalem temeleid idi an dibodon. Age de mog, daga el fediyof nigin Odug nē megeir, ï bun ibodon. ¹⁸ Tamo tunī, tamo ilolaisin anī, gabgab bun faali de dirou disi, Jesus wagen dinenēf nigin fō namen dirou dilau fenē age difen. ¹⁹ Idi anī age fiya nigin naab taka to dilen, ere nigin, tamo kayau ino yalen, idi fō sokoron disel, soko korō difel fen, ï gabgab ado folo folō dife di, tamo kayau atun, Jesus wagen bagai isilen.

²⁰ Jesus idi neid momoiya ile fen, ï iron, “Mou, ogon mosor alelkonok.”

²¹ Farisia tamo, lo ifelnēdiya tamo geid, idi dogo namedin kisi difen, “Eī aim bagai, kono fiya od wogō yef? Taka nem mosor yaleleya to yenek, Negur yogo dogol.”

²² Jesus idi kisi difen anī kelei ken, to fen, “Ā ere nigin namei bun agog kisi gef? ²³ Od nanī anī aya wogōya nigin karika, ‘Ogon mosor alelkonok’ de, ‘Fā wale fen, uyok ule?’ ²⁴ Anī ere, Tamo Naal ï tenebur ein mosor yaleleya nigin yana ado anī, ā kelei youf nigin...” Ī tamo ilolaisin anī irokenen, “Aya ò arokonok, fā wo, ogon gabgab wale fen, fonō ule.” ²⁵ Age ye mog bagai, ï fā ye, idi wagedin ifaren, yogon yenen gabgab yale, Negur yana yalesef, fonō ilen. ²⁶ Ganan terē de fen, Negur yana dalesen. Idi waud bun terefeit ye fen, diron, “Ada gama tobonunā fire bagai tailer.”

Jesus Lewi Iweignen (Matyu 9:9-13; Mak 2:13-17)

²⁷ Enei bure fel fen, Jesus ile, takis yaleya tamo yana Lewi, an yogon takis yaleya fō bun ibod mog, ilen. Jesus ï irokenen, “Aya dō wiya.” ²⁸ Age ye di, Lewi fā ye, ereb ereb adok itor yen, Jesus dō fiyen.

²⁹ Agef fen, Lewi yogon fō bun, Jesus nē saaf odug yabi di, takis yaleya tamo musei, tunī geid weim saaf don. ³⁰ Anī ere, Farisia tamo, idi neid lo ifelnēdiya

tamo geid, Jesus nē dō fiya tar bun nauseir den, “Ā ere nigin takis yaleya tamo, mosor adodo geid, saaf ado naan wōgef?”

³¹ Jesus idi aitedin yale iron, “Dagi sā anidim dokta nigin waud to yenēdig, dagi adodom dogol. ³² Aya madur tamo anidi iweignēdiya nigin to asin, mosor adodo tamo anidi waud falei douf nigin asin.”

*Kuriya Nigin Jesus To Difyen
(Matyu 9:14-17; Mak 2:18-22)*

³³ Farisia tamo idi ĩ dirokenen, “Jon nē dō fiya tar, idi kuri de fen, kosē dedig, Farisia tamo neid dō fiya tar idig age fiya, anī ere, ogon idi dobu dirak.”

³⁴ Jesus aitedin yale iron, “Mois ĩ fau ne tā tar weim dibod mog, ā ne tā tar idi kuriya nigin urokenēdigouf anī kisi feleya de? ³⁵ Anī ere, naa fau isi di, anī bun mois tamo idi bun tamal yalelnē di, naa anidi bun idi kuri douf.”

³⁶ Jesus yaab od enei idi irokenēdin, “Taka nem gabar masak mata serek fe fen, gabar tubu bun to iwadig. ĩ age foug are, ĩ gabar mata anī serek foug, takag, gabar mata bun tamal masak are tubu anī ado to susu falauf. ³⁷ Takag, taka nem wain mata meme gabar* tubu bun to itinēf. ĩ age foug are, wain mata anī, meme gabar gē ye fen, serek foug. Age fe di, wain anī oho yeis fen, meme gabar sane lauf. ³⁸ Age fiya sā, wain mata, meme gabar mata bun itinēf. ³⁹ Agef fen, taka nem wain tubu yakas fen, mata to orodig, ere nigin, ĩ irok, ‘Tubu are de biya.’”

6

*Jesus ĩ Sabat Naa Nē Odug
(Matyu 12:1-14; Mak 2:23-3:6)*

¹ Sabat naa taka bun, Jesus in dō fiya tar geid, wit kabī atu diyok dile fen, in dō fiya tar wit biya tunī fito difen, imeid bun orok de fen, nedi ilo don. ² Farisia tamo tunim to difen, “Ā ere nigin Sabat naa bun ĩtāfiya ufoduleg fen, tobonunā enei ago gef?”

³ Jesus aitedin yale irokenēdin, “Sain Dawid, ne tā tar geid naū fedi di, age fen anī, ā to uwesegen de? ⁴ ĩ Negur nē fō

namen ile fen, bret fateul prisem dogol dōdig* an ibodon anī yokon, ĩ bret tunī ne tā tareg ifenēdin.” ⁵ Age ye fen, Jesus idi irokenēdin, “Tamo Naal ĩ Sabat naa nē Odug.”

⁶ Sabat naa taka bun, ĩ Juda neid uub fō bun ile, biya od ifelnēdin, sain anī bun, tamo taka ima biya melem gege fefu fiya anī an ibodon. ⁷ Farisia tamo, lo ifelnēdiya tamo geid, idi Jesus bouwa bun od dinouf nigin naab dimiren, anī nigin, idi ĩ Sabat naa bun dagi el fe mog, mailauf de fen, ololo difen. ⁸ Anī ere, Jesus idi neid kisi kelei ken, tamo ima gege fefu fiya anī irokenen, “Fā wo fen, ganan meleid bun ufar.” Age ye di, ĩ fā yale, an ifaren.

⁹ Age fe di, Jesus idi irokenēdin, “Aya ā to ayeik, nanī anī Sabat naa bun lo dō fiya? Biya age fiya anī de, sane age fiya anī, oo, isennē di, mata ibodōya anī de, daū fiya anī?”

¹⁰ Jesus idi ganan fele feid le fen, tamo anī irokenen, “Imā yaī wo.” ĩ yaī fe di, in ima oditekei biya len. ¹¹ Anī ere, idi waud fatuk sane fen, mogo Jesus naig tafiyēf de fen, dogo tutur katō difen.

*Jesus Aposel Tuwelf Igirnēdin
(Matyu 10:1-4; Mak 3:13-19)*

¹² Anī sain bun naa taka, Jesus arein kosē youf nigin iselen, bō anī bun Negur kosē fiyen. ¹³ We fele di, bonimeis, Jesus in dō fiya tar wagen iweig laisi fen, idi atun tuwelf geif fen, idi anidi aposel wowā douf nigin igirnēdin. ¹⁴ Simon (Jesus ĩ yana yun Pita), in tura Endru, Jems, Jon, Filip, Batolomyu, ¹⁵ Matyu, Tomas, Jems Alfeus naal, Simon ĩ anī Selot* taka, ¹⁶ Judas ĩ Jems naal, Judas Iskariot, inim dum Jesus kiwai imeid bun inenen.

*El Fiya Ado Malalon
(Matyu 4:23-5:12)*

¹⁷ Jesus idi geid weim disil, teneub uus bun difaren. In dō fiya tar musei ado, tamo kayau musei biya, Judia distrik kalilī fiya ganan temeleid, Jerusalem temeleid, Taia Saidon taun ado neid ubun temeleid, an difaren, ¹⁸ tamo kayau anidi Jesus karī

* **5:37:** Juda neid tobonunā, idi meme gabar nem darum diwadig. * **6:4:** Lo bun, bret fateul anī, prisem dogol dōdig. * **6:15:** Juda neid kusī mala taka, idi Rom gawaman ado kusī dedig.

difiyē fenē nigin ado, idi neid dāgi el fediyouf nigin, disin. Idi kaa sesenem morō difenēdin are el fedin. ¹⁹ Tamo kayau ganān ī kobū difiyē fenē age difen, ere nigin, megeir ī bunem isi fen, idi ganān el fedin.

²⁰ Jesus in dō fiya tar lo fiyeīd fen, iron: “Ā aib maleg are el yeik, ere nigin, Negur nē tano are āgenei.

²¹ Ā gama naū ufaregef are el yeik, ere nigin, ā nameī isokosauf.

Ā gama maruī isif are el yeik, ere nigin, ā kasā gouf.

²² Tamo Naal nigin, tamo kayau sane diyeik, diruyei ken, kono diyeik, ā yeneī sane dile fen, to orodif are, Negur ā el yeik.

²³ “Naa anī bun, wauī kulī ye fen, wauī al fouf, ere nigin, āgenei mala solo odug oun saa ilun ibodok. Ere nigin, temeīd tar profet nigin de age difedin.

²⁴ “Anī ere, safineī ado ā meleīlon ado, ere nigin, āgenei wauī isenneīya mogo walegel.

²⁵ Nameī gama isokosef ā meleīlon ado, ere nigin, ā naū ulagauf.

Gama kasā gef ā meleīlon ado, ere nigin, ā fau wauī gudūf fen, maruī isiyouf.

²⁶ Ā nigin tamo ganān biya de fen, wogō def ā meleīlon ado, ere nigin, temeīd tar idegēya profet nigin de age difedin.

Kiwai Tar Nigin Wau Laa Fiya (Matyu 5:38-48; 7:12a)

²⁷ “Anī ere, ā aib aya karī wiyagef anī arokeneik: Āgenei kiwai tar nigin wauī laa fouf, ā kiwai difeneik anidi nigin biya ago gouf. ²⁸ Idi ā disisneik el fiya wenēdig, idi ā to biya diyeik anidi nigin kosē gouf. ²⁹ Tamo taka ogon walā sitakā fakā fouf, falei wel, walā sitakāg wenē. Tamo taka ogon saket yalouf are, ogon kolos yalouf nigineg to katū wiyē. ³⁰ Wenēdiyouf nigin to diyok are, wenēdiyouf, aib taka ogon safinā yalef are, anī baban kel yaleya nigin to urokenēf. ³¹ Ereb taka idim age difekeneīf anī oroyeik age fiya gen, āg idi bun ago gouf.

³² “Idi ā nigin waud laa fef anidi nigin dogol wauī laa fef are, ā nigin ere mala ado? Mosor adodo idig, idi nigin waud laa fef anidi nigin, waud laa fedig. ³³ Idi ā nigin biya diyeik anidi nigin biya ago gouf are, ā nigin ere mala ado? Mosor adodo idig age difedig. ³⁴ Idi anidi bun moni kel walogouf nigin kisig fen, moni wenēdigouf are, ā nigin ere mala ado? Mosor adodo idig, moni ganān kel yaleya nigin kisi de fen, mosor adodo tutur moni difenēdidig. ³⁵ Anī ere, āgenei kiwai tar nigin wauī laa fouf, idi nigin biya ago wedigouf, ereb taka kel yaleya nigin to kisig fen, wenēdigouf. Ago gouf are, āgenei mala solo odug biyauf, agef fen, ā Negur Ilun Bagai nē gere tar wowā gouf, ere nigin, Negur ī idi to de difiyēdig sesen anidi ado, biya fiyēdidig. ³⁶ Āgenei Temeī wau yūdig gen, āg idi nigin wauī ineīf.

Ne Tā Es Fiyēya (Matyu 7:1-5)

³⁷ “Taka to es wiyēg, to ago gouf are, āg Negur to es yeīf. Taka bouwa bun od to ūg, to ago gouf are, āg Negur bouweī bun od to yūf. Mosor nigin wedereī tu kalauf, ago gouf are, Negur āgenei mosor nigin weder tu kalauf. ³⁸ Wenēdig, ago gouf are, Negur ifeneīf. Ima su karikauf, lai fesil fen, baban teten ino isokose di, yokū fe di, awa gere fasauf, ā nigin gogū fouf. Tunī es wedigef gen, Negur āg agef es yeīf.”

³⁹ Jesus yaab od eneig irokenēdin, “Mala ifofakeleya tamo taka, mala ifofakeleya tura itonēya kisi feleya de? Idi urom bebeigir to kuku douf de? ⁴⁰ Skul kesu in tise to wal fef, anī ere, taka ī keleī ganān yalef, yogon tise gen wō youf.

⁴¹ “Ō ere nigin turā mala teteur lo fen, ō ogon aa masak malā bun ibodok anī to ulef? ⁴² Ō ogo aa masak ogon malā bun to ule fen, naig fe di, turā nigin dogol urokenek, ‘Turau, utor len, aya ogon malā teteur alelkonōf? Ō mala yaleya tamo, ō ogon malā bun ketem aa masak walel fen, anī malā kare kele di, turā bun mala teteur walelauf.

Aa Taka Yogon Faat Ado (Matyu 7:16-20; 12:33-35)

⁴³ “Aa biya ï faat sane to imadig, aa sane are faat biya to imadig. ⁴⁴ Aa mugu mugu yogon faat bun, tamo ï keleï youf. Tamo kayau idi, wei biya barik bun to daledig, gira udum bun to daledig. ⁴⁵ Tamo biya ï, yogon wau bun ereb biya kuru fedig anï bunem, tobonunã biya yaor fedig, age fiya gen, tamo sane, yogon wau bun ereb sane kuru fedig anï bunem, tobonunã sane yaor fedig. Yogon wau bun isokosef, yogon sigor bun wogõ yedig.

Fõ Inoya Nē Keleï Tamo, Neneya Tamo Ado
(Matyu 7:24-27)

⁴⁶ “Ere nigin ã aya nigin ‘Odug, Odug,’ ge fen, aya orok anï to ago gedig? ⁴⁷ Taka ï wageun isi, neu od karï ye fen, dõf age fef, ï naig fiya anï aya ã afelneïf. ⁴⁸ ï fõ inoya tamo taka, ku fatuk yale fen, meein teten fõ gariya inon gen. Sain kuwei isin, wï ye fen, fõ yun, anï ere, fõ anï yokũ fiya kisi feleya sã, ere nigin, fõ are total ado inon. ⁴⁹ Anï ere, taka ï neu od karï ye fen, to dõf age fef, ï tamo taka teneub bun fõ gariya sã inon gen. Sain kuwei wï ye fen, fõ yun, fõ anï kala fel, oditekei daũf irailen.”

7

Kusï Tamo Neid Orowa Nē Momoiya
(Matyu 8:5-13)

¹ Jesus tamo kayau karï douf nigin enei ganan wogõ bure fel fen, ï Kapenaum taun ilen. ² An kusï tamo neid orowa nē ferfer taka, in odug ï nigin wau laa fedig anï, dagi fen, laa fou fenē age fen. ³ Kusï orowa Jesus nigin karï ye fen, Juda neid mudur adodo Jesus garan susur fedi di, ï isi fen, yogon ferfer el fiyēf nigin to difiyen. ⁴ Idi Jesus garan disi fen, total bagai digonen, “Tamo enei, õ enï agouf nigin kisi feleya bagai, ⁵ ere nigin, ï nemã tamo kayau nigin wau laa fedig, nemã uub fõg inon.” ⁶ Anï nigin, Jesus idi geid dilen.

ï mogo fõ sirin mog, kusï orowa ne tã tar Jesus dirokenēf nigin sur fedin, “Odug, õ kabï total to walouf, ere nigin, aya to biya nigin aya kisi afef, õ neu fõ bun to usiyouf. ⁷ Aya to biya nigin, aya õ garan isiya nigineg to kisi afen. Anï ere, õ od

urõ di, neu kabï tamo dagi fara falauf. ⁸ Ere nigin, aya yug nigin age fiya, ayag neu odug anï farumen abodok, kusï tamo idig aya farumeun dibodok. Aya taka enï arokenek, ‘Ule,’ afiyek, ï ilauf. Aya taka arokenek, ‘Õ usi,’ au di, ï isidig. Neu kabï tamo enï ago afiyek, ï anï age fedig.”

⁹ Kusï orowa od enï irõ di, Jesus karï ye fen, ï nigin terē yen, agef fen, tamo kayau dõ difiyen anidi bun falei yel iron, “Aya ã arokeneik, aya Israel bun, momoiya odug eig fiya taka to ailen.” ¹⁰ Age ye di, kusï tamo sur fedin anidi, fõ bun ke de dile fen, ferfer anï dagi sã ibod mog, fotou difen.

Jesus Kayau Waab Taka Nē Kesu Turï Fen

¹¹ Anï dumen, Jesus taun taka Nain ilen, in dõ fiya tar, tamo kayau musei, ï geid weim dilen. ¹² ï mogo taun bobog kelē fiyē mog, laa tamo taka faali de disin, laa tamo anï kayau waab nē kesu tekelei bagai, tamo kayau musei taun temeleid kayau waab geid. ¹³ Sain Jesus kayau waab anï fele fiyen, in wau ï nigin gudũf fen, iron, “To inã wale.”

¹⁴ Age ye fen, ï isel, dege kobũ fe di, faali difen idi, dē delen. ï iron, “Tamo gaũ, aya õ arokonok, fã wale!” ¹⁵ Laa tamo anï fã ye ibod ken, od yen, age fe di, Jesus tamo anï ï sina kel ifenen.

¹⁶ Age fe di, idi ganan kumï ado terefeit de fen, Negur yana dalesen. Idi diron, “Profet odug taka, ada atun wõ yel. Negur yogon tamo kayau isennēdiyof nigin isil.”

¹⁷ Jesus nigin, od enei Judia distrik kalilï fiya ganan iyokelen. Jesus,

Jon Naan Igunēdiya Tamo Ado
(Matyu 11:2-19)

¹⁸ Jon nē dõ fiya tar, enei ganan nigin Jon dirokenen. Jon idi uru iweigneïd fen, ¹⁹ Odug eig de to difiyēf nigin sur fedin, “Tamo isiyof den, õ ogo yeir de, amã fau taka nigin malamã manouf?”

²⁰ Tamo Jesus garan disi diron, “Jon Naan Igunēdiya Tamo, õ to mayõf nigin amã sur famam, ‘Tamo isiyof den, õ ogo yeir de, amã fau taka nigin malamã manouf?’ ”

21 Sain anī bun bagai, Jesus, tamo kayau musei dagi adodo, darau adodo, kaa sesenem dirounēdin el feid fen, meleid ifofakeleya el fedi di, kelē den. 22 Jesus solof irokenēdin, “Kekug uleg fen, ā wedereim karī gel, meleim ulegel anī Jon wogō wiyēg, meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif. 23 Tamo aya nigin wau to firagagaū fef, Negur ī el fiyek.”

24 Jon nē arū tamo ditornē dilele di, Jesus, tamo kayau guru difen anidi, Jon nigin irokenēdin, “Ā ere bagai anī ulogouf nigin, gerere tuan ulegen? Ā unin yaum walala fe di, ulogouf nigin ulegen de? 25 Anī sāf are, ere bagai ā ulogou fenē, ulegen? Tamo taka kolos biya bagai ifonun de? Sā, idi kolos medeīya biya difoun ken, safineid inid adodo are, king nē fō bun dibodok. 26 Ere bagai anī ā ulogou fenē, ulegen? Profet taka de? Ariya, aya ā arokeneik, ī profet wal fediya. 27 Tamo anī, ī nigin eig ye itoton:

“‘Aya neu arū tamo sur afe di, ī uyu ilauf, im ket ogon naab dodok fouf.’* ”

28 Aya ā arokeneik, kayau onudi kesu dalen idi atun, taka nem Jon to wal difiyen, anī ere, aib taka Negur nē tanon yana naal bagai ado, ī Jon wal fiya.”

29 (Tamo kayau ganan, takis yaleya tamog, sain idi Jesus nē od karī de fen, Negur nē naab anī biya den, ere nigin, idi Jonem naan igunēdin. 30 Anī ere, Farisia tamo, lo keleī tamo geid, idi dogo nigin Negur nē oroya ditoron, ere nigin, idi Jonem naan to igunēdin.)

31 “Tamo kayau sain enei bun, idi nigin ere bunem aya kisi afouf? Idi ere gen? 32 Idi simō maket modoū bun dibod ken, abob diweignēdidig gen:

“‘Amā ā nigin kelel maun,
anī ere, ā to kui gen;
amā kanon seg malen,
anī ere, ā to inā walegen.’ ”

33 Aya enei wogō auf, ere nigin, Jon naan igunēdiya tamo isin, bret to yon, wain to yon, ā urōgef, ‘Ī kaa sane ado.’ 34 Tamo Naal isin, saaf yon, naan yon, ā urōgef, ‘Eī dobu irāya tamal, ī, takis yaleya tamo, mosor tamo adodo geid, uyu kū difedig.’ 35 Anī ere, kisi biya ī, in dō fiya ganan bunem, biya yaorouf.”

Mosor Kayaum Jesus Bun Moul Fi Felen

36 Farisia tamo takam, Jesus ī ado saaf dāf nigin iweignen, anī nigin, Jesus ī Farisia tamo anī nē fō bun ile fen, tebol bun ibodon. 37 Taun anī bun, kayau taka mosor ado ibodōdig, Jesus Farisia tamo anī nē fō bun, saaf yoko yeya karī ye fen, kayau, moul sumeī biya bagai anī gulub* ado irou isin. 38 Kayau ī Jesus dumen ye garan ifar, maru isi fen, Jesus ye lū fen. Agef fen, kayau yogon fatiyam Jesus ye waīf, umā fe, moul sumeī biya bagai, ye bun fi felen.

39 Sain Farisia tamo Jesus iweignen anim, enei ile fen, ī yogo kisi bun iron, “Tamo enei profet takauf, ī aibem kobū fiyek, ī ere kayau, ī mosor kayau taka anī, keleī youf.”

40 Jesus ī irokenen, “Simon, aya ereb taka arokonōf.”

Ī iron, “Tise, urokana.”

41 Jesus iron, “Tamo uru, moni tamo taka bun wareg dalen, taka faif tausen kina, taka faif hundred kina. 42 Idi urom wareg ifenēya moni sā, anī nigin, moni tamo dogo neid wareg gudū felen. Gama nanim anī, moni tamo nigin wau fatuk laa fouf?”

43 Simon solof iron, “Aya kisi afef, taka ī wareg odug yalen anī gudū fel kenen anim.”

Jesus iron, “Ō tutuk es wol.”

44 Age ye fen, Jesus falei yel, kayau wage ifen ken, Simon irokenen, “Ō kayau enei ulef? Aya ogon fō bun asil. Ō yeu kulo fiya nē naan taka to wanal, anī ere, kayau ī yogon marum yeu lūf fen, yogon fatiyam waī fel. 45 Ō to umā wiyal, anī ere, kayau enei, aya asour alel sain bun, ī yeu umā fel anī, fau fau umā fiyek. 46 Ō mudurou bun

* 7:27: Malakai 3:1 * 7:37: Meein alabasta nem dinon.

moul to unol, anī ere, kayau ī moul sumei biya bagai, yeu bun fi felel. ⁴⁷ Anī nigin, aya ō arokonok, kayau enī nē mosor musei yalelel, anī nigin, ī fatuk wau laa fen. Anī ere, aib taka mosor naal yalelen, ī wau laa fiya naal.”

⁴⁸ Age ye fen, Jesus kayau irokenen, “Ogon mosor alelkonok.”

⁴⁹ Tamo Jesus geid dibodon, tutur dogo dogol diron, “Eī aim, ī mosoreg yalelef?”

⁵⁰ Jesus kayau anī irokenen, “Ogon moiya anim isennom, waū inosiya ado ule.”

8

Faat Irarāya Tamo Nē Yaab Od (Matyu 13:1-23; Mak 4:1-20)

¹ Anī dumen, Jesus taun ado fonō fonō iyo ken, Negur nē tano nigin, biya od wogō yen. In dō fiya tar tuwelf weim, ² kayau tunī idi kaa sesen iruid fen, dagi el fedin idig weim: Maria (Magdala tamal) ī bun kaa sesen sewen irudi di, diyan, ³ Joana Kusa nē kayau, Kusa ī Herod nē fō lo fiya tamo, Susana, musei tunī geid. Kayau eneidi, idi neid safineid nem disennēdin.

⁴ Tamo kayau taun ganan bun temeleid, Jesus garan disi, moku de mog, ī yaab od eneiron, ⁵ “Kabī marau taka, faat irarāf nigin ilen. Sain ī irarak ile mog, tunī naab luwen kuku ren, are teten diyon, ninā ilun temeledim dakasin. ⁶ Tunī meein tuar kuku ren, are bali fokū yeid fen, laasi yedin, ere nigin, idi lumi sā. ⁷ Faat tunī malū duri atun kuku ren, are malū duri, faat anī ado, odudug fen, malū durim sile feledin. ⁸ Faat tunī teneub biya bun kuku ren, are fokū yedin, biya imadin, gariya tekelei yogon biya wan handred iman, biya anim gariya anī wal fiya.”

Sain ī enī wogō ye fen, ī iweig iron, “Taka ī karīya nigin weder ado, ī karī youf.”

⁹ In dō fiya tar, yaab od enī nē gariya nigin, ī to difiyen. ¹⁰ Jesus iron, “Negur tano nigin, iminēya od nē keleī are, Negur ā mogo ifenein, anī ere, tunī bun aya yaab od nem wogō auf, anī bunem,

“idi meledim diledig, anī idi meleid fokōya sā,
idi wederedim karī dedig, anī idi gariya keleī sā.”*

¹¹ “Yaab od anī nē gariya eig fiya. Faat are Negur nē od. ¹² Faat tunī naab luwen kuku ren are, tamo idi od karī den, Satan isi, biya od idi namedin ibodok anī yaleledig, anī bunem, idi to momoi de di, to isennēdiyof. ¹³ Faat tunī meein tuar iraran are, tamo idi od karī de fen, waud bun kulīya ado od daledig, anī ere, idi warumutei sā. Idi sain naal bagai momoi def, anī ere, kisi fiya isi di, fara furu de diyaleledig. ¹⁴ Faat malū duri atun kubū yen are, tamo idi od karī den, anī ere, idi diyok dile mog, tenebur mata ibodōya nē suwēya, safina ado ibodōya nē kisi, bouwa nē oroya anidim idi sile fedi di, idi faat to yūf. ¹⁵ Anī ere, faat teneub biya bun kubū yen are, tamo idi, kisi biya, karīya biya ado, waud bun ibodok, od karī de fen, kafī difelef, anī total difaref, faat biya yūf.

Lam Yoki Bun (Mak 4:21-25)

¹⁶ “Taka nem lam tōf fen, mis kur be, fatar farumen to inodig. Age fiya ban, ī yoki bun iseginē di, idi aaben disif, lalan dilouf. ¹⁷ Ereb ereb ganan iminēya yenek anī ganan yaor fouf, ereb ereb ganan nar fen yenek anī ganan irou isi, biru fel fen, yaau du fe di, keleī youf. ¹⁸ Anī nigin, ā kisi el ge waleg fen, ā karī gouf. Aib taka ī ado, aya toru afouf, age fe di, ī musei adouf. Taka ī sā bagai, ereb taka ī ado nigin ī kisi fef areg, ī bun tamal son fouf.”

Jesus Nē Sina, Tura Tar Geid (Matyu 12:46-50; Mak 3:31-35)

¹⁹ Jesus nē sina, tura tar geid, ī dilouf nigin disin. Anī ere, idi ī wagen ileya kisi feleya sā, ere nigin, tamo kayau musei. ²⁰ Takam Jesus irokenen, “Ogon sinā, turā tar geid, ō dileyōf nigin serē difaref.”

²¹ Jesus solof iron, “Neu naai ado turau tar, are idi Negur nē od karī de fen, dō difef anidi.”

* 8:10: Asaia 6:9

Jesus Yau Uyē Ado Irokenēdi Di, Kee Delen

(Matyu 8:23-27; Mak 4:35-41)

²² Naa taka bun, Jesus in dō fiya tar irokenēdin, “Ada daliyou sitakā talauf.” Anī nigin, idi waag bun sō de dilen. ²³ Idi solī de mog, Jesus mulaī yenen. Yau odug daliyou bun isi di, maaī waag namen isokosen. Idi morō odug fotou difen.

²⁴ In dō fiya tar dile, Jesus turī difiyē diron, “Odug, Odug, ada naanū talalau fenē!”

Ī fā yale, yau naan moloun wī yen ado, sakā fiyēdi di, yau uyē ado irorou kel, ganan dē delen. ²⁵ Jesus in dō fiya tar to fiyēdin, “Āgenei momoia nain?”

Idi kumī terē de fen, abob toti difen, “Eī aim bagai? Ī yau ado naaneg irokenēdi di, Ī ait dō difef.”

Jesus Tamo Taka Kaa Sesen Musei Ado El Fiyen

(Matyu 8:28-34; Mak 5:1-20)

²⁶ Idi Galili tamal daliyou dibal, Gerasa teneub bun dilen. ²⁷ Sain Jesus ubun kutū yesin, taun anī bun tamal, tamo taka kaa sesen ado Ī tarabā fiyen. Sain meluk, tamo enei kolos sā, fō buneg to ibodōdig, anī ere, Ī matmat bun ibodōdig. ²⁸ Ī Jesus ile fen, kaī ye, Jesus ye gariyan kubū ye, Ī ait odugem iweig iron, “Ō aya ere naig wiyau fenē, Jesus, Negur Ilun Biya nē Naal? Aya ō agonok, ō aya to daig wiyauf!” ²⁹ Ere nigin, Jesus mogo kaa sane tamo anī bun tamal ulō yesiyouf nigin irokenen. Sain musei kaa sanem ironē di, ye ima ado, sen nem difofādig, age de fen, tari difiyēdig, anī ere, Ī sen kokour fele di, kaa sanem wala ino di, moilin iledig.

³⁰ Age ye di, Jesus Ī to fiyen, “Ō yana ai?”

Ī solof iron, “Aya yanau Ami,” ere nigin, kaa museim Ī namen disilen. ³¹ Idi ku isil idīya sā modoū bun to sur fediyouf nigin, baba baban Jesus digonen.

³² Arei wala sirin, bor musei biya an saaf doko difaren. Kaa sesen idi, bor namedin dilauf nigin, Jesus digonē di, Jesus idi yo fedin. ³³ Kaa sesen, tamo anī bun tamal ulolō deis fen, bor namedin dilelen. Age dife di, bor gududu de, bebeig sane baurin daliyoun disil, naanū gare desin.

³⁴ Bor lo fiya tamo, ereb ereb wō yen anī dile fen, diya dile, od anī, taun ado fonō fonō wogō den. ³⁵ Age dife di, tamo kayau, ereb wō yen anī dilou fenē dilen. Sain idi Jesus garan disin, kaa sesen tamo anī bun tamal diyalelen tamo anī, garab yel, kisi biya ado, Jesus ye gariyan ibod mog, dile fen, idi kumī den. ³⁶ Tamo idi meledim dilen anidim, kaa sesenem tamo diroun anī, naig be el fiyen anī, tamo kayau wogō difiyēdin. ³⁷ Age dife di, Gerasa teneub bun, tamo kayau ganan, Jesus itorneīd ilauf nigin, Ī dirokenen, ere nigin, idi kumim lai fedin. Anī nigin, Jesus waag bun sō ye fen, itornēdin.

³⁸ Tamo Ī bun tamal kaa sesen diyalelen anī, Jesus ado dilauf nigin igonen, anī ere, Jesus Ī sur fiye ken, iron, ³⁹ “Fonō kel ule fen, Negur ō nigin age fen anī wogō wouf.” Age ye di, tamo anī itor ilen, Jesus Ī nigin age fen anī, taun ganan bun iyo ken, wogō yen.

Kayau Naal Laa Fen Ado Dagi Kayau Taka

(Matyu 9:18-26; Mak 5:21-43)

⁴⁰ Sain Jesus kele di, tamo kayau musei, Ī aan difiyen, ere nigin, idi ganan Ī nigin ololo difen. ⁴¹ Age de mog, Juda neid uub fō lo fiya nē mudur taka, yana Jairus isi, Jesus ye gariyan kubū ye fen, yogon fō bun ilya nigin igonen, ⁴² ere nigin, Ī ne barai tekelei bagai, Ī kayau naal tuwelf yar age fiya, mogo laa fou fenē.

Jesus naab ile mog, tamo kayau musei kiti de fen, kafī difiyē genen. ⁴³ Kayau taka an ifaren, ogō dagi faimud ado, yar tuwelf iyon. Anī ere, taka nem Ī to el fiyen. ⁴⁴ Kayau Ī Jesus dume ise, in kolos iri kobū fen, age fe di, kaisā bagai, kayau nē naud segē yelen.

⁴⁵ Jesus to fen, “Aim aya kobū fiyal?”

Idi ganan wa dife di, Pita iron, “Odug, tamo kayau musei kiti de fen, kobū diyok

⁴⁶ Anī ere, Jesus iron, “Aibem aya kobū fiyal. Aya keleī, total aya bun tamal ul fe yalel.”

⁴⁷ Age ye di, kayau Ī imin ken, ilya kisi feleya san, tererē ye fen, isi, Jesus ye gariyan kubū yen. Tamo kayau ganan meleid bun, Ī ereb nigin Jesus kobū fiyem

ado, naig be ï kaisã bagai biya lel anĩ, wogõ yen. ⁴⁸ Age ye di, Jesus kayau irokenen, “Nau barai, ogon momoiya anim el yom. Waũ inosiya ado ule.”

⁴⁹ Jesus fau od wogõ ye mog, tamo taka, Juda neid uub fõ lo fiya mudur Jairus nẽ fõ bunem isin. Ì iron, “Nẽ barai mogo laa fel. Baban õ tise morõ to wenẽf.”

⁵⁰ Jesus od enei karĩ ye fen, Jairus irokenen, “To kumĩ wo, momoi dogol wo, ago di, kayau fau el fiyẽf.”

⁵¹ Jesus Jairus nẽ fõ bun wõ ye fen, takam ï geid, aaben ileya nigin katũ fedin, Pita, Jon, Jems ado, kesu nẽ tama sina dogol. ⁵² Tamo kayau ganan, ï nigin waud gudũf fen, inã legur mog, Jesus iron, “To inã waleg. Kayau naal ï laa fiya sã, ï mulã yenek.”

⁵³ Idi Jesus kasã difiyen, idi keleĩ, kayau naal laa fel. ⁵⁴ Anĩ ere, Jesus ï ima yales fen, iron, “Neu kesu, fã wo!” ⁵⁵ Kayau nẽ uur kelen, age fe di, kaisã bagai, fã yale ifaren. Age fe di, Jesus, ï ereb taka ifen yõya nigin, idi irokenẽdin. ⁵⁶ Kayau nẽ sina tama terefeit de di, ereb wõ yel anĩ, taka to dirokenẽf nigin, Jesus idi katũ fedin.

9

Jesus In Dõ Fiya Tar Tuwelf Sur Fedin (*Matyu 10:5-15; 14:1-12; Mak 6:7-29*)

¹ Jesus in dõ fiya tar tuwelf iweigneĩd fen, kuru fedin. Agef fen, ï, idi kaa sesen ganan dirudiyouf nigin ado, dagi el difediyouf nigin total ifeneĩd fen, megeir fedin. ² Ì, idi Negur nẽ tano nigin wogõ douf nigin ado, dagi adodo el difediyouf nigin sur fedin. ³ Jesus idi irokenẽdin, “Delẽ uyõgouf nigin ereb taka to walogouf, manig sã, faa sã, bret sã, moni sã, kolos uru to walogouf, tekelei dogol. ⁴ Fõ nanĩ be bun sõ gouf, an ubodõg ile, taun anĩ utorõgouf. ⁵ Tamo kayau ã to daleyey ken, ã to karĩ diyeyf, sain ã nedi taun anĩ utorõg fen, yeĩ aas tu welege di, idi ã kiwai difenein anĩ keleif.” ⁶ Anĩ nigin, idi fafã de, fonõ fonõ diyo ken, modoũ ganan bun, biya od wogõ de fen, tamo kayau dagi el difedin.

⁷ Galili lo fiya nẽ mudur Herod, anĩ ganan wõ yef ilef anĩ, karĩ ye fen, wau togun, ere nigin, tunim dirok, Jon ï laa bun tamal mata kel fã yen, ⁸ tunim dirok, Eliya wõ yen, age fe di, tunig dirok, profet kulu temeleid anidi taka mata kel fã yen. ⁹ Anĩ ere, Herod iron, “Aya Jon ula gudũ afen. Enei aim, ï nigin karĩ auf?” Age ye fen, ï Jesus ileya nigin kisi fen.

Jesus Faif Tausen Tamo Saaf Ifenẽdin (*Matyu 14:13-21; Mak 6:30-44; Jon 6:1-14*)

¹⁰ Sain aposel idi keku den, idi age difen anĩ Jesus wogõ difiyen. Age de di, Jesus idi geif irou, idi mugu diya, taun taka Betsaida dilen. ¹¹ Anĩ ere, tamo kayau musei anĩ kelei ken, Jesus dõ difen. Jesus idi aan fiyeyd, Negur nẽ tano nigin wogõ fiyeyd fen, idi dagi el fiya nẽ anidi el fedin.

¹² Aragau di, in dõ fiya tar tuwelf, ï gein disidiron, “Tamo kayau susur wo di, idi fonõ kalilĩ fiya fonõ fonõ dile fen, saaf ado yeneya modoũ dilouf, ere nigin, ada ein gerere tuan tabodok.”

¹³ Jesus aitedin yale iron, “Idi dãf nigin ereb ãgem wenẽdigouf.”

Idi solo de diron, “Ada bret faif, gau uru ado dogol. Ada tele, tamo kayau enei ganan nigin saaf to na talouf, are kisi feleya sã.” ¹⁴ (Faif tausen tamo age fiya an dibodon.)

Anĩ ere, Jesus in dõ fiya tar irokenẽdin, “Tamo kayau, mala fire fire fifti age fiya bun, ubodnẽdig.” ¹⁵ In dõ fiya tar age dife di, ganan dibodadan. ¹⁶ Jesus, bret faif gau uru ado yale, saa ilun itad fen, ï Negur de fiye ken, anĩ mumã fedin. Agef fen, ï in dõ fiya tar ifenẽdin, tamo kayau wagedin gõ difouf nigin. ¹⁷ Idi ganan don kisi felen. In dõ fiya tar, tamo kayau bret gau ado dokon, tunĩ ifaren anĩ fito difen, karam tuwelf isokosen.

Pita Kristus Nigin Kurõ Fesin (*Matyu 16:13-28; Mak 8:27-9:1*)

¹⁸ Sain Jesus mugun kosẽ yen, in dõ fiya tar idi ï weim. Ì idi to fedin, “Tamo kayau idi, aya nigin ai dedig?”

¹⁹ Idi solo de diron, “Tunĩ dirok, Jon naan igunẽdiya tamo, tunĩ dirok, Eliya,

are tunĩg dirok, profet kulu temeleid anidi taka mata kel fã yen.”

²⁰ Jesus to fedin, “Ba ã uleg? Aya nigin ã ai gef?”

Pita aiten yale iron, “Õ anĩ Negur nẽ Kristus.”

²¹ Age ye di, Jesus enei taka to dirokenẽf nigin, idi wedereid total iron. ²² Age ye fen, ã iron, “Tamo Naal ã darau musei yale fen, mudur adodo, pris odudug, lo ifelnẽdiya tamo idim dudum difiyẽf. Age de fen, ã dukesi di, naa towo bure fele di, mata kel fã youf.”

²³ Age ye fen, Jesus idi ganan irokenẽdin, “Aib taka aya dõ fiyau fenẽ, ã yogon oroya dudum fe fen, yogon aa tetek, naa ganan faali fe, aya dõ fiyau. ²⁴ Aib taka, yogon bouwa buru, mata ibodõf nigin oro fef, are fõ yalauf, anĩ aib taka yogon mata bouwa buru, aya nigin ye fen, irailauf, are kel yalouf. ²⁵ Tamo taka ã teneub enĩ ganan kakarai fe, akorou ye fen, ã yogo bou fõ yalauf be irailauf, ere biya ã yalouf? ²⁶ Aib taka, aya nigin ado neu od nigin, mama foug are, sain Tamo Naal, in fula fiya medeïya, Tama nẽ ado, engel fateul neid fula fiya medeïya ado disiyouf bun, ãg ã nigin mama foug. ²⁷ Aya ã momoi arokeneik, tunĩ ein difaref, fau to gare de mog, idi Negur nẽ tano dilouf.”

Jesus Bouwa Falei Felen
(Matyu 17:1-8; Mak 9:2-8)

²⁸ Jesus enei irokel fen, naa eit age fiya ilele di, ã, Pita, Jon, Jems yale, kosẽ youf nigin arei ilun diselen. ²⁹ ã kosẽ ye mog, yogon nawa falei felen, agef fen, yogon kolos, kolimei filiya nẽ lalan gen, wõ yen. ³⁰ Tamo uru, Moses Eliya ado, ³¹ fula fiya medeïya ado wowã de fen, Jesus geid wogõ den. Idi Jesus teneub itorõf anĩ nigin wogõ den, anĩ ã Jerusalem oun kisi falauf. ³² Pita ã, ne tã tar geid, mulã nigin meleid morõ kelen, anĩ ere, idi oditekei meleid bi fel fen, idi Jesus nẽ fula fiya medeïya ado, tamo uru ã geid difaren anĩ dilen. ³³ Tamo idi Jesus ditornẽ mog, Pita Jesus irokenen, “Odug, ada ein ibodõya nigin biya bagai. Ada salafat towo tanouf, taka ogon, taka

Moses nẽ, taka Eliya nẽ.” (ã wogõ yen anĩ, ã yogo keleĩ sã.)

³⁴ Age ye mog, lalo isi, idi kerub fedi di, idi lalo bun dilel mog, kumĩ den. ³⁵ Ait taka lalo bunem wõ ye fen, iron, “Eĩ neu Kesu, ayam ã agirnen. ã karĩ wiyẽg.” ³⁶ Ait anĩ wogõ yele di, idi Jesus mugu dilen. In dõ fiya tar anidi, enei dogo bun dogol ibodon, idi ereb dilen anĩ, sain anĩ bun, taka to dirokenen.

Jesus Kesu Kaa Sane Ado El Fiyen
(Matyu 17:14-18, 22, 23; Mak 9:14-27, 30-32)

³⁷ Naa taka bun, idi arein tamal disi mog, tamo kayau musei Jesus tarabã di-fiyen. ³⁸ Guru fiya atun, tamo takam iweig iron, “Tise, aya õ agonok, õ neu kesu ulekanauf, ere nigin, ã neu kesu tekelei bagai. ³⁹ Kaa sanem ironẽ di, ã terẽ adod ye, ui yedig. Kaa sanem kesu yũ irã di, tererẽ ye fen, awa bun sali moku fedig. Agef fen, kaisã to folõ fiye kele fen, ã bouwa daũ fedig. ⁴⁰ Aya, on dõ fiya tar kaa sane diruwauf nigin agonẽdin, anĩ ere, idi kisi feleya sã.”

⁴¹ Jesus solof iron, “Sain enei bun, tamo kayau momoiya sã, sane bagai. Sain ganĩ aya ã geid tabod ken, ã nigin wau aukesilauf? Ogon kesu ein urousi.”

⁴² Kesu anĩ isi mog, kaa sanem kesu tenebur yũ irã di, tererẽ yen. Anĩ ere, Jesus kaa sane ou fiyen, agef fen, kesu anĩ el fiye ken, ã tama kel ifenen. ⁴³ Age fe di, idi ganan, Negur nẽ megeir odug nigin terefeit den.

Idi ganan, Jesus age fen anĩ ganan nigin, terẽ de mog, Jesus in dõ fiya tar irokenẽdin, ⁴⁴ “Ereb aya arokeneĩf anĩ wedereĩ unog. Tamo Naal ã fau kiwai tamo imeid bun dinou fenẽ.” ⁴⁵ Anĩ ere, idi od enĩ nẽ gariya nigin nene den. Idi nigin gariya anĩ inokon, anĩ nigin, idi od anĩ to keleĩ ken, ã to fiyẽya nigin kumĩ den.

Ai Anĩ Odug Bagai?
(Matyu 18:1-5; Mak 9:33-40)

⁴⁶ Jesus nẽ dõ fiya tar idi, aim anĩ idi atun odug ibodõf nigin, luwa diroun. ⁴⁷ Jesus idi neid kisi keleĩ ken, kesu naal taka yale iroule, ã sirin ifarnen. ⁴⁸ Agef

fen, i idi irokenēdin, “Aib taka, aya yanau bunem, kesu naal eig fiya taka yalef are, i aya yaleyaf. Aib taka i aya yaleyaf are, i aya sur fiyan anī yalef. Ā ganan atun, taka i naal bagai are, i anī odug bagai.”

⁴⁹ Jon iron, “Odug, tamo taka, o yanā nem kaa sesen iruid mog, amā mailen. Anī nigin, amā i katū mafiyēf nigin age mafen, ere nigin, i neda takam sã.”

⁵⁰ Anī ere, Jesus iron, “To katū wiyēg, taka i kiwai to ifeneik, are āgenei.”

Samaria Tamo Kayau Jesus Kiwai Difen

⁵¹ Jesus saa ilun yale irou iseleya nē naa dodole di, i Jerusalem ileya nigin wau kuturolen. ⁵² Age fe di, i arū tamo uyu sur fedī di, idi Jesus nē ereb ereb dodok fiya nigin, Samaria fonō dilen. ⁵³ Anī ere, tamo kayau an to aan difiyen, ere nigin, i Jerusalem ilauf nigin age fen. ⁵⁴ Sain in dō fiya tar Jems Jon ado, anī dile fen, idi to difen, “Odug, o amā yā saa ilun tamal maweig di, isi, idi daū fediyouf nigin oroyok de?” ⁵⁵ Anī ere, Jesus falei yel, ou fiyēdin, ⁵⁶ age de fen, idi fonō taka bun dilen.

Jesus Dō Fiyēya Bun Kafī Fiya Fire Fire (*Matyu 8:19-22*)

⁵⁷ Idi naab luwe dile fen, tamo taka Jesus irokenen, “Ō narib ulauf are, aya o dō ayōf.”

⁵⁸ Jesus aiten yale iron, “Gaū kuī idi, yenēya nē modoū ku ado, ninā lalo bun diyok idi, uru ado, anī ere, Tamo Naal i mudur inoya nē modoū sã.”

⁵⁹ Jesus tamo takag irokenen, “Dō wiya.”

Anī ere, tamo iron, “Odug, fau de, folō wiya len, aya ele, neu dei mū afel fen.”

⁶⁰ Jesus i irokenen, “Laa tamo idi, laa tutur abob mumā difouf. Anī ere, o ule, Negur nē tano nigin wogō wo.”

⁶¹ Baban takag iron, “Odug, aya o dō ayōf, anī ere, folō wiya len, kelau ele, neu ibor tar dabuo afiyēid fen.”

⁶² Jesus solof iron, “Taka i dur bun ima ino fen, koriri yedig anī, Negur nē tano nigin kabī yaleya to kisi falauf.”

10

Jesus In Dō Fiya Tar Sewenti-tu Sur Fedin

(*Matyu 11:20-27; 13:16, 17*)

¹ Anī dumen, Odug sewenti-tu tamo igirneid fen, idi, i taun ganan ado modoū ilauf nē bun, uyulil uru uru susur fedin. ² Jesus idi irokenēdin, “Kabier saaf musei biya bure felen, anī ere, kabī tamo musei sã. Age fiya nigin, kabī marau, Odug to wiyēg, kabī tamo sur fedī di, yogon kabier dilauf. ³ Uleg! Aya ā sipsip naal gen, gaū kuī atun sur ayeik. ⁴ Ā moni nē kodol be, faa be, su be to walogouf, agog fen, naab luwen taka to aan wiyēgouf.

⁵ “Fō taka aaben ulagauf, uruwa urōgouf, ‘Fō enei wau inosiya ado.’ ⁶ Tamo taka wau inosiya nē anī an ibodōf are, āgenei wauī inosiya i bun ibodōf, sãf are, ā bun kel isiyouf. ⁷ Fō anī bun ubodōgouf, saaf ado naan yōya nigin idi difeneif, are wāgauf, ere nigin, kabī tamo i mala solo yaleya kisi feleya. Fō fō to walegef uyōg.

⁸ “Ā taun taka bun ulege di, idi ā aan diyēif, ā ereb wagein dinouf anī wāgauf. ⁹ Dagi adodo an difaref, el wiyēdig fen, idi urokenēdigouf, ‘Negur nē tano mogo ā nigin melsã.’ ¹⁰ Anī ere, ā taun taka bun ulege di, idi ā to aan diyēif, naab toko tokō ge fen, urōgouf, ¹¹ ‘Āgenei taun nē aas yemā bun degē fen anīg, amā kema ā bun tu mafef. Anī ere, ā enei keleī youf bagai, Negur nē tano mogo melsã.’ ¹² Aya ā arokeneik, es fiya naa anī bun, taun anī, in darau Sodom taun darau dalen anī wal fiya, yalouf.

¹³ “Korasin taun, o malalon ado! Bet-saida taun, o malalon ado! Ā bun memelik musei anodin, age fiya gen anī, Taia ado Saidon taun bun wō yem are, mogo kulu waud falei de fen, wau gudū fiya nē gabar difoun ken, aasur dibodom. ¹⁴ Anī nigin, es fiya sain bun, ā, morō Taia ado Saidon taun dalouf anī wal fiya, walogouf. ¹⁵ Ō Kapenaum taun, o yanā anī saa ilun ise-lauf de? Sã bagai, o laa neid modoū bun usilauf.

16 “Taka ĩ karĩ yeik, aya karĩ fiyaf, taka ĩ ā iruyeik, are aya iruyaf, anĩ ere, taka ĩ aya iruyaf, are ĩ aya sur fiyan anĩ iruf.”

17 Sewenti-tu tamo idi, kulĩya ado keku de, disu diron, “Odug, ō yanā bunem kaa seseneg morō di, dō difen.”

18 Jesus solof iron, “Aya, Satan saa ilunem kolimei lalan gen kakur fen, kubū ye mog, ailen. 19 Aya, ā, gogour, ambei lalai wedig fen, kiwai nē totol ganan wal gouf nigin, megeir afenein. Ereb takam to tadū yeif. 20 Anĩ ere, kaa sigoramā dō difel ge fen, to wauĩ kulĩ youf, anĩ ere, āgenei yeneĩ saa ilun itoton nigin, wauĩ kulĩ youf.”

21 Sain anĩ bun, Jesus, Awa Uur Fateul bunem, kulĩya isokos fen, iron, “Dei, saa ado teneub nē Odug, aya ō yanā alesef, ere nigin, safina eneidi, kisi biya ado keleĩ adodo to dilouf nigin, ō unokon, ago fen, simō gen dibodon anidi bun yaor won. Dei, enĩ are ogon waũ filolō fiya biya bunem agon.

22 “Ereb ererb ganan, Dei ĩ aya bun inon. Taka nem Naal ĩ ai ya nigin keleĩ sã, Dei yogo dogol keleĩ. Taka nem Dei ĩ ai ya nigin keleĩ sã, Naal yogo dogol ado, tunĩ idi Naalum Dei ifelnēdiyof nigin igirnēdif anidim dogol keleĩ.”

23 Age ye fen, Jesus falei yel, in dō fiya tar lo feid fen, idi dogol irokenēdin, “Meleim ā ulegedif anĩ dilef are el fedif. 24 Ere nigin, aya ā arokeneik, profet musei, king geid, ā ulegedif anĩ dilou fenē nigin waud yenen, anĩ ere, idi meledim to dilen, idi ā karĩ gef anĩ karĩ dou fenē nigin waud yenen, anĩ ere, idi wederedim to karĩ den.”

Samaria Tamo Tobonunã Biya Ado Nē Yaab Od

25 Sain taka bun, lo keleĩ tamo taka fã ye fen, Jesus kisi fiyen. ĩ Jesus to fiyen, “Tise, aya naig afe di, mata faimud ibodkeleya anĩ alouf?”

26 Jesus ĩ irokenen, “Negur nē Itotoya bun Lo ere yef? Ō uwesedig anĩ, ere yōdig?”

27 Lo keleĩ tamom Jesus solof irokenen, “Ō, Odug ogon Negur ĩ nigin waũ adok,

malākanon adok, ogon megeir adok, ogon kisi adok bunem, waũ laaf yenēf.’* Takag, ‘Ō ogo nigin waũ laa fef gen, nē tā nigineg ago waũ laa fouf.’**”

28 Jesus tamo anĩ irokenen, “Ō de tutuk solo wol. Enei ago di, ō mata ibodkeleya walouf.”

29 Anĩ ere, lo keleĩ tamo ĩ, Jesus ĩ nigin keleĩ biya sã fiyēf anĩ itor ken, Jesus to fiyen, “Age fiyauf are, ai anĩ neu tā?”

30 Jesus solof iron, “Tamo taka Jerusalem taun tamal Jeriko taun isil mog, bē tamo imeid bun ilen. Idi yogon kolos dinukeis dū di, laa gen yen mog, ditornē diyalelen.

31 Sain anĩ bun, pris taka naab tekelei anĩ dōf isilen, tamo are de ile fen, ĩ fasis fe tokō felen. 32 Age fiya gen, Lewi tamo takag modoũ anĩ bun isi, tamo are de ile fen, ĩ fasis fe tokō felen. 33 Anĩ ere, Samaria tamo taka iyok isin, tamo yenen nē isi, wō ye, tamo anĩ ile fen, ĩ nigin wau yun. 34 ĩ wagen ilen, moul wain ado gudū fiya bun fi fel fen, ifokenen. Agef fen, tamo are yales, yogon donki teten ino irou ilen, tamo irouya fō bun ino fen, kulatun fiyen. 35 Naa taka di, ĩ tu silwa koin moni yalis, tamo irouya fō marau ifen ken, iron, ‘Kulatun wiyēf, sain aya kelauf bun, ō baban mala teten be uran, are aya kela afonōf.’

36 “Ō kisi wof, towo eneidi atun, ai anĩ, bē tamo imeid bun ilen anĩ ĩ ne tā?”

37 Lo keleĩ tamo solof iron, “Tamo ĩ nigin wau yun anĩ.”

Jesus ĩ irokeken, “Ule, ĩ age fen gen, ago.”

Marta Maria Ado Neid Fō Bun

38 Jesus, in dō fiya tar geid, naab luwe dile fen, Jesus fonō taka bun wō yen, an kayau yana Marta yogon fō bun Jesus ilauf nigin, Jesus irokenen. 39 ĩ tura yana Maria, ĩ anĩ, Odug ye gariyan ibod ken, ĩ wogō yen anĩ karĩ yen. 40 Anĩ ere, Marta ererb dodok fiya anĩ bun kisi yen ken, Jesus wagen isi to fiyen, “Odug, neu turau itorna di, aya mugu kabĩ alef anĩ nigin, ō to kisi wof de? ĩ uroken, aya isenna!”

41 Age ye di, Odug aiten yalen, “Marta, Marta, ō ererb ererb musei nigin suwē wo

* 10:27: Diuteronomi 6:5 * 10:27: Levitikas 19:18

fen, waũ morok, ⁴² anĩ ere, tekelei dogol õ nigin biya. Maria ĩ biya ani igirim, anĩ taka nem to yalelkenēf.”

11

Jesus Kosēya Nigin Ifelnēdin (*Matyu 6:9-13; 7:7-11*)

¹ Naa taka bun, Jesus modoũ taka bun kosē yen. Sain ĩ bure fele di, yogon dō fiya tamo takam Jesus irokenen, “Odug, amā kosēya nigin ufelnamā, Jon, ne dō fiya tar ifelnēdin gen.”

² Jesus idi irokenēdin, “Sain ā kosē gouf, eig ge urōgouf:

“ ‘Dei,
õ yanā fateul ibodōf,
ogon tano isiyouf.

³ Naa mugu mugu bun, naa anĩ nē saaf wanamāf.

⁴ Ganan amā bun mosor dinof, amā idi neid mosor nigin wederamā tu kelef,

age fiya bagai, õg amā nemā mosor nigin wederē tu kel.

Ago fen, kisi famāya bun to uroulemāf.’ ”

⁵ Age ye fen, ĩ idi irokenēdin, “Āgenei taka ĩ, ne mou ado, anĩ bō atun ĩ gein ile fen, irokenēf, ‘Mou, bret towo nem usenna, ⁶ ere nigin, aya neu tã taka, aya bun delē isil, anĩ ere, aya ĩ yōya nē ereb taka sã.’

⁷ “Age ye di, ĩ aaben tamal anim irōf, ‘Aya kabĩ totol to wana. Sukar mogo kotũ felel, aya neu kesu tar geid mogo fataren mainek. Aya fã au fen, ereb taka ifonōya kisi feleya sã.’ ⁸ Aya ā arokeneik, ĩ, ne mou nigin to fã ye fen, bret ifenēf, anĩ ere, tamo are kukiãya sã kinĩ yei fiyē di, fã ye fen, ereb ĩ orof anĩ kilei ifenēf.

⁹ “Anĩ nigin, aya ā arokeneik, to gouf, agef ā ifeneif; umirēgouf, ā gurug gouf; godu godu gouf, ā sukar kã feneif.

¹⁰ Aibem taka to fouf, yalouf; aibem taka imirek, gurug fouf; aibem taka godu godu fouf, sukar kã fel kenēf.

¹¹ “Ā tama tar, aim āgenei kesu gau nigin to fef, anĩ ban gogour wenēgouf de?

¹² Takag, ĩ tataro faat nigin to fef, ĩ ambei wenēgouf de? ¹³ Ā seseneĩ bagai, anĩ ere, āgenei kesu safina biya biya anĩ ifenēdiya,

ā keleĩ bagai youf are, āgenei anĩ wal fiya, Temeĩ saa ilun ibodok, Awa Uur Fateul aib idi to difiyek, idi ifenēdiyof bagai!”

Jesus Belsebub Ado Difiyen

(*Matyu 12:22-30, 43-45; Mak 3:20-27*)

¹⁴ Jesus ait ifokeleya nē kaa sane irun. Sain kaa sane iyawo di, tamo ait ifokelen od wogō yen, age fe di, tamo kayau musei terē den. ¹⁵ Anĩ ere, tamo tunĩ diron, “Are kaa sane neid mudur Belsebub yana bunem, ĩ kaa sesen irudif.” ¹⁶ Tunĩ Jesus kisi difiye ken, saa ilun tamal uris nigin to difen.

¹⁷ Jesus idi neid kisi kelei ken, idi irokenēdin, “Tano taka yogo kiwai ifen ken, fara fouf, are sane lauf, fō taka yogo kiwai ifen ken, fara fouf, are kubũ youf. ¹⁸ Satan ĩ yogo kiwai ifen ken, fara fouf are, yogon tano naig fe ifarauf? Aya enĩ orok, ere nigin, ā urōgef, aya Belsebub yana bunem kaa sesen arudif. ¹⁹ Are aya Belsebub yana bunem kaa sesen arudif are, ere bunem āgenei dō fiya tar kaa sesen dirudidig? Anĩ nigin, idim ā es diyeif. ²⁰ Anĩ ere, aya Negur nē ima gege bunem kaa sesen arudif are, Negur nē tano mogo ā bun isil.

²¹ “Tamo megeir ado taka, ĩ waila kisi feleya ado yogon fō lo fef are, in safina are totoũ. ²² Anĩ ere, taka ĩ yogon megeir wal fiya anim ironē lai fiye ken, yogon waila ĩ anĩ bun totol yaledig anĩ son fe fen, in safina gadō fouf.

²³ “Taka ĩ aya to fedē fiyaf, ĩ neu kiwai, takag, ĩ aya ado to kuru mafef are, ĩ firagagaũ fef.

²⁴ “Sain kaa sane tamo bun tamal ulō yeis fen, gerere tuan ile, si inoya modoũ imirek ile to fotou fef. Agef fen, ĩ irok, ‘Aya fō atoron anĩ bun baban kelauf.’ ²⁵ Sain ĩ kel isif, fō ani waĩ difel fen, madur difen anĩ ilef. ²⁶ Anĩ nigin, ĩ ile fen, baban kaa sesen ĩ wal fiya sewen anĩ geif irou isif, age de fen, idi namen dile difaref. Age dife di, tamo anĩ gai sane bagai lef, uruwa bun nē tobonunā anĩ wal fiya.”

²⁷ Jesus eneidi nigin wogō ye mog, tamo kayau atun kayau taka iweig iron, “Sinā õ gō yo ken, su ifonon, are ĩ el fiyek.”

²⁸ ĩ solof iron, “Age fiya ban, Negur nē od karĩ de fen, dō difef anidi, el fedif.”

Jona Bun Uris
(*Matyu 12:38-42*)

²⁹ Tamo kayau guru fiya mala oduge di, Jesus iron, “Tamo kayau, gama sain enei bun dibodok, are sane bagai. Idi memelik nigin to difef, anī ere, taka to afenēdiyof, de profet Jona nē uris anī dogol afenēdiyof. ³⁰ Jona are Niniwe taun tamo kayau bun uris, age fiya bagai, Tamo Naal īg sain enei nē tamo kayau bun uris. ³¹ Es fiya sain bun, Kuin Saut tamal fā ye fen, tamo kayau sain enei bun geid, idi neid mosor nigin kurō falaisiyof, ere nigin, kayau anī Solomon nē keleī karī youf nigin, teneub idiyan tamal isin, gama taka Solomon wal fiya are yeir. ³² Es fiya sain bun, Niniwe tamo kayau fā de fen, tamo kayau sain enei bun geid, idi neid mosor nigin kurō difalaisiyof, ere nigin, idi mogo Jona wogō ye di, waud falei den, gama taka Jona wal fiya are yeir.

Bouwa Nē Lam
(*Matyu 5:15; 6:22, 23*)

³³ “Taka nem lam tōf fen, to iminēyan be, beī kur inodig, age fiya ban, in yoki bun iseginēdig, age fe di, idi aabē disif anidi lalan dilouf. ³⁴ Malā are bouwā nē lam. Ō malā biyauf are, ogon bouwā gananeḡ lalan barikāf. Anī ere, ō malā sesen lauf are, ogon bouwāḡ gugum kalauf. ³⁵ Anī nigin, lalan ō ado anī gugum keleya nigin lo walauf. ³⁶ Age fiya nigin, ogon boū gananeḡ lalan barikāf fen, siri sitakā to gugum ouf are, lam nē lalan ō bun so fe di, yaor ledig gen, bouwa gananeḡ oditekei lalan ouf.”

Jesus Farisia Tamo Ado Lo Ifelnēdiya Tamo Isisnēdin
(*Matyu 23:1-36; Mak 12:38-40*)

³⁷ Sain Jesus wogō ye bure fele di, Farisia tamo takam ī, Jesus ado saaf dāf nigin iweignē di, aaben ile, tebol bun ibodon. ³⁸ Anī ere, Farisia tamo ī, Jesus ima ketem kulo fiya sā, saaf nigin ibodon anī ile fen, terē yen.

³⁹ Age fe di, Odug ī irokenen, “Farisia tamo ā, kap ado beī agara kulo gedig, anī ere, ā namein akorouya ado sanem barikā. ⁴⁰ Ā neneya tamo! Negur agara inon anī, nameḡ to inon de? ⁴¹ Anī

ere, ereb beī namen ibodok anī maleḡ wenēdigouf, ago ge di, ereb ereb gananeḡ bun filiya ibodōf.

⁴² “Farisia tamo ā meleīlon ado, ere nigin, ā āgenei edē, bakso ado, kabier tamal ereb ereb gananeḡ farag fen, ten tekelei Negur wenēgedig, anī ere, ā lo es fiya ado Negur nigin wau laa fiya utorōgedig. Ā dum nē anī dōḡ fen, uruwa nē anīḡ to utorōḡem, are dem.

⁴³ “Farisia tamo ā meleīlon ado, ere nigin, ā Juda neid uub fō bun modoū malabag ibodōya ado, maket modoū bun tamo kayau idim sere diyeik anī oroyeik.

⁴⁴ “Ā meleīlon ado, ere nigin, ā tamo mekura dede fiya gen, tamo idi keleī sa ken, teten diyōdig.”

⁴⁵ Lo keleī tamo taka Jesus irokenen, “Tise, ō enei urō di, ō amāḡ kono wamak.”

⁴⁶ Jesus solof iron, “Lo keleī tamo, āḡ meleīlon ado, ere nigin, ā tamo kayau, morō idi faali fiya nigin malai bagai anī wenēdigedig, anī ere, ā aug imeī gege tekelei idi isennēdiya nigin to fitei yedig.

⁴⁷ “Ā meleīlon ado, ere nigin, ā profet neid matmat unogedig, anī ere, ā tubuī tareḡ idi didenkesin. ⁴⁸ Anī nigin, āgenei tubuī tar profet age difedin anī, ā megeir ge fen, yaor gef, ere nigin, idi profet didenkesin, ā idi neid matmat unogedig. ⁴⁹ Age fiya nigin, Negur yogon kisi biya bunem iron, ‘Aya fau idi bun profet, aposel ado sur afediyof, age afe di, idi tunī didenkeis fen, tunī kafī fiya difenēdiyof.’ ⁵⁰ Anī nigin, teneub inon gariya bunem isif, profet gananeḡ neid naudeid fī felen anī nē mala solo, tamo kayau gama sain enei bun idim dalouf, ⁵¹ Abel nē naud bunem ile, Sekaraia ī tempel alta ado atun dukesin in naud bun. Aya ā momoi arokeneik, naud enī gananeḡ nē mala solo, tamo kayau gama sain enei bun idim dalouf.

⁵² “Lo keleī tamo, ā meleīlon ado, ere nigin, ā keleī nē ki walelegen, ā aug namen ileya sa ken, ā idi namen dilef anidi neid sukar katī welegef.”

⁵³ Sain Jesus modoū anī itoron, Farisia tamo, lo ifelnēdiya tamo geid, ī bun kiwai totol dino, to fiya fire fire musei to difiyen,

⁵⁴ ereb od wogō youf bun dirounēf nigin tari difiyouf.

12

Weder Irouya Ado Tai Fiya (Matyu 10:26-33)

¹ Dirub kele di, tamo kayau tausen musei biya guru difen, anī bun idi abob tete tete lalai de difaren, age dife di, Jesus in dō fiya tar ketem irokeneīd fen, iron, “Ā, Farisia tamo neid yis nigin lo welegei, are mala yaleya tobonunā. ² Gama ereb dede fiya yenek, are ganan fau lelek falauf, gama ereb iminēyan yenek, are ganan fau yaorouf. ³ Ā gugum bun wogō gen anī, fau gaa lalan bun karī douf, ā aaben wedereim kosesē gen anī, fau fō sokoronem kurō difesiyouf.

⁴ “Neu mou tar, aya ā arokeneik, idi bouwa dukeis fen, anī dumen ereb taka baban age fiya kisi feleya sã anidi to kumī wodig. ⁵ Anī ere, ā aib kumī wiyēgouf anī afelneīf: Ī bouwa yukeis fen, dumen ā hel bun irāyeīf nigin megeir ado anī kumī wiyēgouf. Ariya, aya ā arokeneik, ĩ kumī wiyēg. ⁶ Fisisir faif, tuwenti toea nē nem na nigin to sur gedig de? Anī ere, Negur ĩ anidi taka nigin to weder tu keledig. ⁷ Momoi, Negur āgenei mudureī bun fatiyeī ganan iwes yalen. To kumī wog, ā fisisir musei wal fediya.

⁸ “Aya ā arokeneik, aibem taka, aya nigin tamo meleid bun kurō falaisiyouf, Tamo Naal ĩg, ĩ nigin Negur nē engel meleid bun kurō falaisiyouf. ⁹ Anī ere, taka ĩ, aya nigin tamo meleid bun wa fouf, ayag ĩ nigin Negur nē engel meleid bun wa afouf. ¹⁰ Taka ĩ, Tamo Naal nigin kiwai ifen ken, kobu yef are, in mosor yalelauf. Ani are, taka ĩ, Awa Uur Fateul kiwai ifen ken, kono fiyek, in mosor to yalelauf.

¹¹ “Sain ā Juda neid uub fō bun guri diyeī diroule, mudur adodo yeneid adodo meleid bun difarneīf, an wauī moro ken, aug isenneīf nigin naig mafouf, ere mauf, wog fen, to sii yeīf, ¹² ere nigin, sain anī bun, Awa Uur Fateul ereb wogō gouf nigin, ifelneīf.”

Neneya Tamo Safina Ado Nē Yaab Od

¹³ Tamo kayau musei atun, tamo takam Jesus irokenen, “Tise, neu turau urokenē di, amā urom akor foi mafouf.”

¹⁴ Jesus solof iron, “Aim aya ā atun es fiya tamo be, foi fiya tamo igirnan?” ¹⁵ Age ye fen, Jesus idi irokenēdin, “Lo welegei, ereb ereb ganan bun akorouya anī lo welegei, tamo nē mata in safina musei bun to ibodok.”

¹⁶ Age ye fen, ĩ yaab od enei idi irokeneīdin, “Tamo taka safina musei ado, ne teneub bun saaf musei yaledig. ¹⁷ Ī kisi yalen, ‘Aya naig afouf? Aya neu saaf inoya nē modoū sã.’

¹⁸ “Agef fen, ĩ iron, ‘Aya eig afouf anī de. Neu ki narī afeleid fen, odug nuwa anodiyouf, an neu saaf ado ereb ereb ganan anouf. ¹⁹ Age afel fen, aya yug nigin orōf, “Ō ereb ereb biyai biyai musei biya, yar musei nē unof. Ibodōya karika, saaf, naan wokon, waū el fouf.”’

²⁰ “Anī ere, Negur ĩ irokenen, ‘Ō neneya! Bō enei bun bagai, aya ogon mata alelkonōf. Age afe di, aim ogo nigin dodok won anī yalouf?’ ²¹ “Taka ĩ yogo nigin, agef safina kuru fef, anī ere, Negur mala bun maleg ibodok, ĩ bun eig bagai fe, wō youf.”

To Osig (Matyu 6:25-34)

²² Age ye fen, Jesus in dō fiya tar irokeneīdin, “Age fiya nigin, aya ā arokeneik, ā āgenei bouweī mata ibodōf nigin to osig fen, ere saaf tãf gouf, ā āgenei bouweī nigin to osig fen, ere gabar tafilaīf gouf.

²³ Mata anī saaf wal fiya, bouwa anī gabar wal fiya. ²⁴ Ā kalog uledigedig, idi saaf to diteneīdig, idi saaf to u difedig, idi ki be, udū inoya modoū sã, anī ere, Negur ifoutnēdidig. Ā ninā anidi wal fediya bagai! ²⁵ Ā takam yogon mata nigin osi ye fen, aua tekelei tobol fiya kisi feleya de? ²⁶ Ā naal bagai enei age fiya kisi feleya sã nigin, ere nigin anī ā ereb ereb tunī nigin osi gef?

²⁷ “Aa munī naig fe odugedig anī ulegedig. Idi kabī to daledig, to diwadig. Anī ere, aya ā arokeneik, kulu King Solomon yogon fula fiya medeīya bun naki gegē biya biya ifonun animeg, aa

munĩ taka to wal fen. ²⁸ Anĩ ere, Negur dubur aa munĩ gama dogol ifarauf, nile di, yã irãf anĩ, agef naki fediyouf are, ã idi wal fediya bagai, Negur naig fe ã ifounneĩf, ã momoiya naal bagai ado! ²⁹ Anĩ nigin, ã wauĩ ere saaf wãgauf be, ere naan wãgauf anĩ bun to unog, anĩ bun to osig. ³⁰ Are haiden idi enĩ ganan nigin meleid dimirẽdig. Āgenei Temeĩ ã lau gef anĩ ganan keleĩ. ³¹ Anĩ ere, Negur nẽ tano umirẽg, ago ge di, safina eneidig ifeneĩf.

³² “Musei sã ã, to kumĩ wog, ere nigin, āgenei Temeĩ, tano anĩ ã ifeneĩya nigin wau al fen. ³³ Āgenei safineĩ na sur ge fen, maleg wenẽdigouf. Ā mugu mugu moni nẽ kodol to serek fouf anĩ uwagauf, agog fen, saa ilun nẽ safina biya biya to sa kalauf anĩ kuru gouf, an bẽ tamo non to isidig, tutũ to dãf. ³⁴ Āgenei safina biya biya ibodok nẽ an, wauĩg an yenẽf.

*Jesus Kel Isiyouf Nigin Ololo Fiya
(Matyu 24:43-51)*

³⁵ “Kabĩ nẽ naki ufonũg fen, āgenei lam tōg saika wog, ³⁶ tamo idi, nedi odug, tamo kayau ado bagu fiya nẽ tar bunem kelouf nigin tari difedig, anĩ bunem, sain ĩ isi, sukar godu godu fe di, idi sã kaisã bagai ĩ sukar kã difelkenẽf anidi gen ago gouf. ³⁷ Ferfer anidi ololo dife mog, nedi odug isi ilediyof anĩ, idi nigin deuf, aya ã momoi arokeneik, ĩ fau yogo kabĩ nẽ naki ifoun kel, ferfer tebol bun ibodneĩd fen, isi, aruneid yalouf. ³⁸ Ferfer anidi saika difel mog, nedi odug, bõ atun be, we ado be isi ilediyof anĩ, idi nigin deuf. ³⁹ Anĩ ere, ã enei keleĩ youf: Fõ marau ĩ, sain nanĩ be bun, bẽ tamo isiyouf anĩ keleĩ youf are, ĩ yogon fõ lo fe di, to narĩ fouf. ⁴⁰ Āg saika gouf, ere nigin, Tamo Naal ĩ fau sain to isiyouf gouf bun isiyouf.”

⁴¹ Pita to fen, “Odug, õ yaab od enei amã nigin de, ganan nigin urok?”

⁴² Odug solof iron, “Ferfer taka aim anĩ, dõ fiya biya, kisi biya ado de? ĩ, yogon odugem ĩ yogon odug nẽ fõ bun, anidi neid saaf dogo neid sain kilei, dõf ifenẽdiyof nigin, ima bun inof. ⁴³ Sain tamo odug kelouf bun, ferfer biya bagai age fe di,

ilouf, tamo odug ĩ el fiyẽf. ⁴⁴ Aya ã momoi arokeneik, tamo odug ĩ, yogon safina ganan, ferfer anĩ ima bun inouf. ⁴⁵ Anĩ ere, ferfer taka ĩ wau bun irõf, ‘Neu tamo odug isiya nigin sain meluk yalef,’ age ye fen, ĩ gariya ino, tamo ferfer ado kayau ferfer iden ken, ĩ yogo saaf biya naan biya yokon, aai sẽ fedig. ⁴⁶ Ferfer anĩ nẽ tamo odug, in isiya nẽ naa ferfer to isiyouf ye fen, kisiif mog, in isiya sain ĩ keleĩ sã mog, isiyouf. Tamo odug, ferfer anĩ gudũf fisik fe fen, momoiya sã geid, nedi modoũ bun inenẽf.

⁴⁷ “Ferfer taka ĩ, yogon tamo odug nẽ oroya kelei ken, to dodok fef be, yogon odug orof anĩ to dõf age fef, ĩ fau wõf musei fouf. ⁴⁸ Anĩ ere, taka ĩ to kelei ken, darau yaleya nẽ anĩ age fef, ĩ musei to wõ fouf. Aib taka ĩ musei ifenen, ĩ bun musei yaleya nigin irokenẽf, agef fen, taka ĩ lo fouf nigin musei biya ifenen, ĩ bun musei biya yalouf nigin to fiyẽf.

*Jesus Maur Gudũ Fiya Nigin To Isin,
Isoreya Nigin
(Matyu 10:34-36)*

⁴⁹ “Aya tenebur yã arou asiyouf nigin asin, yã mala kaur mogom are, aya orou bagai fiyam. ⁵⁰ Anĩ ere, aya naan igũya taka fau alouf, anĩ nigin, aya wau fatuk morok ile, anĩ kisi falauf. ⁵¹ Ā kisi gef, aya tenebur ein maur gudũ fiya arou asiyouf nigin asin de? Sã bagai, aya ã arokeneik, isoreya nigin asin. ⁵² Gama ilauf bun, ibor tekelei bun, idi faif fara de fen, towom uru kiwai difenẽdi di, urum towo kiwai difenẽdiyof. ⁵³ Idi fara de fen, tamam kesu kiwai ifenẽ di, kesum tama kiwai ifenẽf, sina, ne barai kiwai ifenẽ di, ne barai sina kiwai ifenẽf, sina yanawau kiwai ifenẽ di, yanawau kayau sina kiwai ifenẽf.”

*Sain Nigin Es Fiya
(Matyu 16:2, 3)*

⁵⁴ Jesus tamo kayau musei irokenẽdin, “Sain ã gaa ileyan budũ fã ye di, uleg fen, ã kaisã bagai urõgedig, ‘Uyẽ isiyouf,’ ago ge di, age fedig. ⁵⁵ Takag, yau karag maaĩ ubunem fũ fef, ã urõgedig, ‘Uruwa dõ fadauf,’ are agef wõ yedig. ⁵⁶ Ā mala yaleya tamo! Teneub saa ado suma dinof

anī uleg fen, es gouf nigin ā keleī. Naig fe di, sain enei nē suma es fiya nigin ā to keleik de?

⁵⁷ “Ere nigin ā aug erēb biya anīg to es gedig? ⁵⁸ Ō ogon kiwai ado medistret bun uleg fen, naab luwen ogon kiwai ado od madur wouf, to agouf are, ī ō yale, es fiya tamo bun inenōf, age fe di, es fiya tamo ō polis bun inenō di, polis ō kalabus bun inenōf. ⁵⁹ Aya ō arokonok, ō wareg ganān to unolauf are, ō kalabus bun to kutū wesiyouf.”

13

Wauī Falei Gouf, Sāf, Inanakalauf

¹ Sain anī bun, tunī an difaren anidim, Pailat Galili temeleid tunī neid naudeid ado dogo neid sesewi fiya nē safina ekul fen anī, Jesus dirokenen. ² Jesus solof iron, “Ā kisi gef, Galili temeleid eneidi age de darau dalen nigin, idi neid mosor Galili temeleid ganān neid mosor wal fiya de? ³ Aya ā arokeneik, sā bagai! Anī ere, ā wauī to falei gouf are, āg ganān inanakalauf. ⁴ Takag, Siloam fō meluk tamo kayau bun kubū ye fen, idi eitn idenkesin. Ā kisi gef, idi neid mosor, tamo kayau ganān Jerusalem taun difaref neid mosor wal fiya de? ⁵ Aya ā arokeneik, sā bagai! Anī ere, ā wauī to falei youf are, āg ganān inanakalauf.”

⁶ Age ye fen, Jesus yaab od enei iron, “Tamo taka, aa fig tekelei yogon wain kabier itenen, anī ī ile, faat nigin mala itoton, anī ere, taka to ilen. ⁷ Anī nigin, ī wain kabī lo fiya tamo irokenen, ‘Yar towo aya asi, aa fig enei bun faat nigin malau atoton, anī ere, taka to ailen. Utu urā! Ere nigin teneub gīguru yakasif?’

⁸ “Kabī lo fiya tamo solof iron, ‘Odug, baban yar tekelei utorkana len, aya gariyan ku kalī afel, yaro te anouf. ⁹ Yar taka bun biyauf, are deuf! Sāf are, utu urā.’”

Jesus, Kayau Taka Bagiya Fe Fesen, Sabat Naa Bun El Fiyen

¹⁰ Sabat naa taka bun, Jesus Juda neid uub fō taka bun od ifelnēdin. ¹¹ Kayau taka, yar eitn kaa sanem ironen nigin dagi ado, an ibodon. Kayau ī bagiya fe

fesen, agef fen, ī madur ifareya kisi feleya sā bagai. ¹² Sain Jesus kayau anī lof fen, ī wagen iweigne ken, ī irokenen, “Kayau, ō ogon dagi bun tamal ō karika afonok.” ¹³ Age ye fen, Jesus ī bun ima ino di, kaisā bagai kayau ī madur le ifar fen, Negur yana yalesen.

¹⁴ Juda neid uub fō nē mudur, Jesus Sabat naa bun dagi el fiyen nigin, name sane fen, tamo kayau irokenēdin, “Kabī yaleya nigin naa sigis ado. Anī nigin, naa anidi bun usig el yeīf, Sabat naa bun sā.”

¹⁵ Odug ī irokenen, “Ā, mala yaleya tamo! Ā mugu mugu Sabat naa bun, āgenei bulmakau be, donki be difaredig modoū bun tamal birug fen, naan ifenēdiya nigin to gurig ulegedig de? ¹⁶ Kayau enei, ī Abraham nē barai, ī Satanem sain meluk yar eitn ifokelnen, ī ifōya anī bun tamal Sabat naa bun to karika afenēf de?”

¹⁷ Jesus od enei wogō ye di, yogon kiwai tar ganān mama fedin, anī ere, Jesus erēb erēb biya bagai age fen ganān nigin, tamo kayau musei ganān waud al fen.

Masted Faat Yis Ado Nē Yaab Od (Matyu 13:31-33; Mak 4:30-32)

¹⁸ Anī nigin, Jesus to fen, “Negur nē tano anī, ere taka gen? Ere bun aya kisi afe di, susu falauf? ¹⁹ Are masted faat gen, anī tamo takam yale fen, yogon kabier itenen. Anī odug fen, aa wō ye di, ninā ilun temeleid disi, were bun dibodadan.”

²⁰ Baban ī to fen, “Negur nē tano anī, ere taka bun aya kisi afe di, susu falauf? ²¹ Are yis gen, anī kayau takam yale fen, flawa odug ado falei fe di, ganān gē yen.”

Bobog Kidō (Matyu 7:13, 14, 21-23)

²² Jesus Jerusalem taun ilauf nigin naab luwen iyok ile fen, taun ado fonō fonō ile, od ifelnēdin. ²³ Takam Jesus to fiyen, “Odug, are teke tekelei dogol kel yalediyouf de?”

Jesus idi irokenēdin, ²⁴ “Bobog kidō anī ileyā nigin kabī total walogouf, ere nigin, aya ā arokeneik, musei idi namen dilauf nigin age difouf, anī ere, to kisi falauf. ²⁵ Sain fō marau fā ye fen, sukar inolalauf,

ã serẽ ufareg fen, godu godu ge ugonẽgouf, 'Odug, sukar kã wanamãf.'

"Anĩ ere, ĩ solof irõf, 'Aya ã keleĩ sã, ã nainenem usigen.'

²⁶ "Age ye di, ã urõgouf, 'Amã õ geid saaf naan ado ton, ago fen, õ nemã naab bun od ufelnamak uyon.'

²⁷ "Anĩ ere, ĩ solof irõf, 'Aya ã keleĩ sã, ã nainenem usigen. ã sane ago gedig ganan, aya malau bun uyaleleg!'

²⁸ "Sain Abraham, Isak, Jakop, profet ganan geid, Negur nẽ tano bun uledig fen, ã aug mayarẽ irarãyeĩf, an inã wifirig fen, goboreĩ kikokõ youf. ²⁹ Tamo kayau gaa ıseyan temeleid, gaa ıleyan temeleid, yat temeleid, fa temeleid disı, Negur nẽ tanon tar bun idi neid modoũ dalouf. ³⁰ Momoi, an idi dumen dibodok fau malabag dibodõf, idi malabag dibodok fau dumen dibodõf."

Jesus Jerusalem Nigin Wau Gudũ Fen (Matyu 23:37-39)

³¹ Sain anĩ bun, Farisia tamo tunĩ Jesus garan disı dirokenen, "Modoũ enei utor ken, taka bun ule. King Herod ĩ õ inoke-siyou fenẽ."

³² Jesus solof iron, "Uleg, gaũ kuĩ anĩ urokenẽg, 'Gama ado nil, aya kaa sesen aruid fen, tamo kayau el afediyouf, age afe fen, naa towo bun, aya neu kabĩ anĩ uyu katõ afalauf.' ³³ Anĩ ere, aya gama, nil, arã toko tokõ afouf, momoi bagai profet taka Jerusalem taun to ito ken, firen laa fouf!

³⁴ "O Jerusalem, Jerusalem, õ profet udenkeis fen, õ bun sur fedig anidi, meein meein wedidig, sain ganĩ aya õ wau afon ken, ogon gerẽ tar kuru afediyouf nigin age afedig, tataro sina momou waye farumen kuru fedig gen, anĩ ere, õ utorõdig! ³⁵ Ulegouf, ãgenei fõ ã bun fonou lef. Aya ã arokeneik, ã aya baban to uleyagauf ile, ã fau urõgouf, 'Odug yana bunem isif ĩ el fiya ado.'* Sain anĩ bun, ã aya uleyagauf."

14

Jesus Farisia Tamo Taka Nẽ Fõ Bun

¹ Sabat naa taka bun, Jesus, Farisia tamo uyu irouya taka nẽ fõ bun, saaf yõya nigin

ilen, idi an Jesus ololo difen. ² Jesus wagen an, tamo taka bou didiãya nigin darau yaledig anĩ ibodon. ³ Jesus, Farisia tamo, lo keleĩ tamo geid to fedin, "Sabat naa bun, dagi el fediya anĩ lo dõ fiya de, sã?" ⁴ Anĩ ere, idi mutũ difaren. Anĩ nigin, Jesus tamo anĩ yale, el fiye kel sur fiyẽ di, ilen.

⁵ Agef fen, ĩ idi to difen, "Ã taka, Sabat naa bun, kesu be, bulmakau be taka kuren isilauf, ã kaisã bagai to dı wasagauf de?"

⁶ Age ye di, idi od solof irõya kisi feleya sã.

⁷ Jesus, tamo tebol bun modoũ malabag anĩ gei dife di, ile fen, ĩ idi yaab od enei irokenẽdin, ⁸ "Tamo kayau ado bagu fiya nẽ tar bun, aib õ iweignõf are, modoũ malabag anĩ to walouf, ere nigin, tamo taka õ wal yõya iweignen be. ⁹ Age fouf are, ã uru iweigneim marau isi, õ irokonõf, 'Ogon modoũ anĩ, tamo enei wenẽ.' Age ye di, õ mama yo ken, modoũ dumen bagai anĩ walouf. ¹⁰ Anĩ ere, õ iweignõf are, modoũ dumen anĩ walouf, ago di, iweignom marau isiyouf, ĩ õ irokonõf, 'Mou, modoũ biya bun godo urou usel.' Age fe di, õ modoũ malabag anĩ wale di, ã iweigneim turã tar ganan meleid bun õ yanã odug adouf. ¹¹ Ere nigin, aib taka yogo yana yalesef, fau lai fesilauf, aib taka ĩ yogo yana lai fesilef, Negur ĩ yana yalesauf."

¹² Age ye fen, Jesus fõ marau irokenen, "Sain õ gaa atun saaf be, bõ saaf wenẽdiyof fenẽ, ogon mou tar, naud turã tar, sirag tar be, nẽ tã tar safina inid adodo to uweignẽdiyof, agouf, idi aba diweignõf, anĩ bun õ mala solo difonõf. ¹³ Anĩ ere, sain õ tar unouf, maled, bouweid sesen, yeid kirorõya, meleid ifofakeleya anĩ uweignẽdiyof, ¹⁴ agouf, Negur õ el yõf. Idi aba õ ke de difonõya kisi feleya sã, anĩ ere, madur tamo neid mata kel fãya bun, Negur õ mala solo ifonõf."

Tar Odug Nẽ Yaab Od (Matyu 22:1-10)

¹⁵ Tamo tebol bun weim dibodon anidi takam, od enei karĩ ye fen, ĩ Jesus irokenen, "Negur nẽ tanon tar bun tamo saaf yãf anĩ, ĩ el fiya ado."

* 13:35: Sam 118:26

¹⁶ Jesus solof iron, “Tamo taka tar odug dodok fe fen, musei iweignēdin. ¹⁷ Tar sain bun, i iweignēdin anidi irokenēdiyof nigin yogon ferfer sur fen, ‘Usig, gama erab erab ganan dodok felel.’

¹⁸ “Anī ere, idi ganan de tekelei gen galā od dinon. Uyulil i iron, ‘Aya gama bagai kabī na alen, anī nigin, aya anī ailau fenē alauf. O malalon ado, aya to asiyof.’

¹⁹ “Taka iron, ‘Aya bulmakau ten na alen, anī idi naig fiya anī ailau fenē elef. O malalon ado, aya to asiyof.’

²⁰ “Takag iron, ‘Aya gama bagai kayau mata alen nigin, aya isiya kisi feleya sã.’

²¹ “Ferfer kel ile, ne odug od enei irokenen. Age fe di, fō marau name sane fen, yogon ferfer irokenen, ‘Kaisã bagai ule, taun nē naab odug, naab nanaal ado dō wo fen, maleg, bouweid sesen, meleid ifofakeleya, yeid kirorōya anidi guri urou usi.’

²² “Ferfer iron, ‘Odug, ō urom are mogo age afel, anī ere, modoū fau lolokã.’

²³ “Age ye di, odug yogon ferfer irokenen, ‘Naab uyok ule fen, fonō fonō naabur tamo kayau idi anī disiyof nigin totol bagai urokenēdi di, disi, neu fō isokosauf. ²⁴ Aya ã arokeneik, aya tamo idi aweignēdin anidi taka, neu tar bun saaf bagai to kobū de dilouf.’ ”

Kisi Es Wo Fen, Jesus Dō Wouf (Matyu 10:37, 38)

²⁵ Tamo kayau musei, Jesus weim dile fen, i falei yel, idi irokenēdin, ²⁶ “Taka i aya gein isif, ne tama, sina, ne kayau, kesu tar, ne tura tar, main tar, yogon matag to itorōf are, i neu dō fiya tamo wō youf nigin kisi feleya sã. ²⁷ Takag, taka i yogon aa tetek to faali fe fen, aya dō fiyaf, i neu dō fiya tamo wō youf nigin kisi feleya sã.

²⁸ “Ã taka, fō meluk taka inoya nigin orouf are, i tetun ibod ken, fō inolau nigin moni kisi feleya ado be anī es foug, age fiya sã de? ²⁹ Ere nigin, i fō gariya ino mā, inoleya to kisi falauf are, tamo kayau ganan anī dile fen, kasã difiye ken, ³⁰ dirōf, ‘Tamo enei fō kare fen, anī ere, inoleya kisi feleya sã.’

³¹ “Takag, king taka, king taka ado kusī douf nigin, i ten tausen kusī tamo adom, king taka tuwenti tausen kusī tamo ado kusī disif anī, kusī bun wal fiyēya kisi feleya be sã be anī, tetun ibod ken, es foug, age fiya sã de? ³² I to kisi falauf are, i king taka fau gerō ifar mog, wowor fiya tamo sur fedi di, idi komo fiya nigin to difiyēf. ³³ Age fiya gen bagai, ã taka i, erab erab ganan i ado anī to itorōf are, i neu dō fiya tamo wō youf nigin kisi feleya sã.

³⁴ “Anī nigin, sol i biya, anī ere, in kai sa kalauf are, naig fe di, i baban kai youf? ³⁵ Sol age fiya are, teneub ado falei fiya nigin ado, gaar te ado falei fiya nigin to biya, anī nigin dirailedig.

“Aib i karīya nigin weder ado, utornē karī youf.”

15

Sipsip Fō Yelen Nē Yaab Od (Matyu 18:12-14)

¹ Takis yaleya tamo, mosor adodo geid ganan, Jesus karī difiyēf nigin i non disin. ² Anī ere, Farisia tamo, lo ifelnēdiya tamo geid, nauseir de fen, diron, “Tamo enei, mosor adodo aan fiyeid fen, weim saaf doko.”

³ Age de di, Jesus yaab od enei irokenēdin, ⁴ “Ã taka wan hundred sipsip ado, anī tekelei iminkalauf are, i nainti-nain sipsip yaorin itorneid fen, iminkelen anī imirek ile fotou fedig, age fiya sã de? ⁵ Sain i fotou foug, i wau adod fen, yale, benerin orowa sef, ⁶ fō bun ilauf. Agef fen, i ne mou tar ado, ne tã tar gou feid irōf, ‘Ã aya geid kulī tauf. Aya neu sipsip fō yelen anī fotou afel.’ ⁷ Aya ã arokeneik, age fiya gen bagai, mosor ado tamo taka wau falei yef bun, saa ilun kulīya odug adouf anim, nainti-nain madur tamo baban faleiya nē sã idi nigin kulīya wal fiya.

Silwa Koin Moni Iminkelen Nē Yaab Od

⁸ “Takag, kayau taka silwa koin moni ten ado, anī tekelei iminkalauf are, i lam tōf, fō waif fen, el fe imirek ile fotou foug, age fiya sã de? ⁹ Sain i fotou foug, i ne mou tar ado, ne tã tar gou feid irōf, ‘Ã aya geid kulī tauf. Aya neu silwa koin moni iminkelen

anī fotou afel.’ ¹⁰ Age fiya gen bagai, aya ā arokeneik, mosor ado tamo taka wau falei yef ī nigin, Negur nē engel meleid bun kulīya odug wō yef.”

Kesu Fō Yelen Nē Yaab Od

¹¹ Jesus tobol fe iron, “Tamo taka kesu uru adon. ¹² Ibuyem tama irokenen, ‘Dei, akor neu anī fara wana.’ Anī nigin, temeid yogon safina idi atun foi fen.

¹³ “Anī bure fel fen, sain meluk to ilele di, kesu ibuye, safina ī ado ganan kuruf yale irou, teneub taka bun gerō biya ilen, an in safina tobonunā to biya bun daū felen. ¹⁴ Ī ereb ereb ganan daū fele di, teneub anī bun naū odug wō yen, age fe di, ī bun lau fiya wō yen. ¹⁵ Anī nigin, ī ile, fō morou taka bun kabī yalouf nigin to fiyē di, fō moroum ī bor saaf ifenēdiyof nigin yogon kabier sur fen. ¹⁶ Ī naū bagai nigin bor saaf dō di, īg anī yōya nigin orodig, anī ere, takam ereb taka to ifenēdig.

¹⁷ “Ī kisi kelen sain, ī iron, ‘Neu dei ī kabī tamo musei ado, idi saaf barikā. Aya ein naum laa fiyau fenē! ¹⁸ Aya fā au, neu dei garan kelau fen, ī arokenēf: Dei, aya saa ilun ado ō bun mosor anon. ¹⁹ Aya to biya nigin, neu kesu to wouf, ogon kabī tamo oroi waledin taka gen waleyauf.’ ²⁰ Anī nigin, ī fā ye, tama gein ilen.

“Anī ere, ī fau gerō iyok isi mog, tama ī kesu ile fen, ī nigin wau fatuk yū di, kesu gein gudu ref ile, kakarai fiye ken, umā fiyen.

²¹ “Kesum tama irokenen, ‘Dei, aya saa ilun ado ō bun mosor anon. Aya to biya nigin, neu kesu to wouf.’

²² “Anī ere, tama ī yogon ferfer iro-kenēdin, ‘Gamanem kolos biya bagai waleg urousig, ī ufounnēg, ima gege bun sai unog fen, ye bun su unokenēg. ²³ Bulmakau lubu bou dīya waleg urousig ukesig. Ada tar tano tokon, sigigi tafouf. ²⁴ Ere nigin, neu kesu enei laa fen anī baban matal, ī fō yelen anī baban fotou tafiyem.’ Anī nigin, idi gariya dino sigigi difen.

²⁵ “Sain anī bun, kesu matu ī kabier ibodon. Dum ī iyok isi, fō kelē fiye ken, fō non kui de gurū de mog, karī yen.

²⁶ Agef fen, ī kabī tamo taka iweigne ken,

to fiyen, ‘Oun ere naig difef?’ ²⁷ Kabī tamo ī aiten yale iron, ‘Turā kel isil, anī tamā bulmakau lubu bou dīya yum, ere nigin, tamam ī bouwa totoū biya bagai ado kel yalel.’

²⁸ “Age ye di, tura matu name sane fen, fō bun ileyā nigin itoron. Age fe di, tama mayarē ile wowor fiyen. ²⁹ Anī ere, kesu ī tama solof irokenen, ‘Ulefe, yar enei ganān aya ō sigor taka to wal afe fen, arunā alef asin. Anī ere, ō aya meme lubu taka wana di, neu mou tar geid to sigigi mafen. ³⁰ Anī ere, ō naal enei are, ogon safina, kayau bouweid na nē sur difedig anidi bun daū fel fen, fonō isi di, ō bulmakau lubu bou dīya ukenem!’

³¹ “Tama iron, ‘Neu kesu, ō aya ado faimud tabodōdig. Safina ganān aya ado, are ogon. ³² Anī ere, ada sigigi tafe fen, wauda al fem bagai, ere nigin, turā enei laa fen anī baban matal, ī fō yelen anī baban fotou tafiyem.’ ”

16

Kabī Tamo Neid Orowa Tobonunā Sane Kisi Biya Ado Nē Yaab Od

¹ Takag, Jesus in dō fiya tar irokenēdin, “Safina musei ado tamo taka, ī yogon kabī tamo neid orowam in safina daū fef yeya karī yen. ² Anī nigin, ī iweignē ile di, to fiyen, ‘Eī ere od anī ō nigin karī auf? Ogon kabī walen anī faded wo di, karī auf, ere nigin, ō baban kabī tamo neid orowa to ubodōf.’

³ “Kabī tamo neid orowa yogo nigin iron, ‘Gama aya naig afouf? Neu odug neu kabī yalelkanaf. Aya meku yaleyā nigin totolou sā, agef māg, aya nonīya nigin mama ado.

⁴ Aya naig be afouf are aya keleī, anī bunem sain aya neu kabī ein atorōf are, tamo kayau neid fō bun ileyā nigin aan difiyauf.’

⁵ “Age ye fen, ī, yogon odug bun wareg dalen anidi mugu mugu iweignēdi di, disin. Ī tamo uyulil anī to fiyen, ‘Ō neu odug bun wareg ganī walen?’

⁶ “Ī aiten yale iron, ‘Eit handred galen aa oliv moul alen.’ ” Kabī tamo neid orowa ī irokenen, ‘Ogon wareg ditoton wale, kaisā ubod ken, fo handred utot.’

⁷ “Age ye di, ï uyulil dô fiyen anï to fiyen, ‘Ba ò wareg ganï walen?’

“Ï solof iron, ‘Wan hundred wit bek alen.’

“Kabï tamo neid orowam ï irokenen, ‘Ogon wareg ditoton wale, eiti utot.’

⁸ “Yogon odug ï, kabï tamo neid orowa idegëya tamal, ï kisi el fe yale fen, age fen nigin, yana yalesen. Ere nigin, tamo kayau teneub enei bun temeleid kisi el de dale fen, ereb dogo neid nigin tamo kayau lalan bun temeleid wal fediya age difedig. ⁹ Aya ã arokeneik, teneub enei nẽ safina bunem ã aug nigin neï mou tar waledigouf, anï bunem, sain safina sa kalauf, mata gai ibodkeleya bun aan diyef.

¹⁰ “Taka ï ereb naal bagai el fe lo fef, odug buneg agef lo fouf, taka ï naal bagai bun idegek, odug buneg idegëf. ¹¹ Anï nigin, ã tenebur enei nẽ safina to el ge lo gen ouf are, aim ã momoi nẽ safina lo fiya nigin ineneïf? ¹² ã takan nẽ safina to el ge kulatun gen ouf are, aim anï ã safineï ifeneïf?

¹³ “Kabï tamo takam odug uru bun to kabï yalouf. Taka nigin to wau yen ken, taka nigin wau laa fouf be, taka anï aruna yale fen, taka anï to awa yãf. ã Negur nigin ado moni nigin aruna yaleya kisi feleya sã.”

¹⁴ Farisia tamo moni nigin waud laa fedig anï, od enei ganan karï de fen, Jesus kasã difiyen. ¹⁵ Age dife di, Jesus idi irokenëdin, “ã bagai anï, tamo meleid bun, ã aug nigin biya age mafef gedig, anï ere, Negur ï wauï keleï bagai. Tamo ereb nigin waud fatuk difenek, are Negur mala bun ninir bagai.”

Ifelnëdiya Od Tobol Fiya

¹⁶ “Lo nẽ od ado, profet neid od wogõ def disi, Jon bun daun. Sain anï bunem, Negur nẽ tano nigin biya od wogõ def disif, age fe di, ganan namen ileyã nigin mugu mugu teïbir def. ¹⁷ Saa teneub ado iminkeleya nigin are karika, anï ere, Lo bun itotoya togo fiya naal bagai taka to iminkalauf.

¹⁸ “Taka ï aiwa iru fen, kayau taka yalouf are, ï seseirã inof, taka ï kayau tamo takam irun anï yalouf are, ï seseirã inof.

Safina Musei Tamo Ado Lasarus

¹⁹ “Safina musei ado tamo taka, naa ganan bun kolos naki biya, saaf biya, ibodöya biya ibodödüg. ²⁰ Maleg taka yana Lasarus, gurumam barikã, safina musei ado tamo ne bobogë yenëdig. ²¹ Agef fen, ï, safina musei ado tamo nẽ tebol bunem kuku ref anï yãf nigin orodüg. Gaüg disi, guruma seum difedig.

²² “Dum maleg tamo laa fe di, engelem Abraham wagen dirou diselen. Safina musei ado tamog laa fe di, mü difen. ²³ Laa neid modoü bun, safina musei ado tamo darau odug yale fen, ï gerö mala irakel, Lasarus Abraham wagen ibod mog, ilen. ²⁴ Agef fen, ï Abraham iweigne ken, iron, ‘Dei Abraham, aya nigin waü ino ken, Lasarus sur wiyë di, ima gege uyum naan kobüf fen, irousi baleu felu kouf, ere nigin, aya yã enei bun darau odug alef.’

²⁵ “Anï ere, Abraham aiten yale iron, ‘Kesu, ò mata ubodon sain, ò ereb ereb biya wale mog, Lasarus ï ereb ereb to biya yalen, anï karï wo, anï ere, gama ein ï wau wã fe di, ò darau odug bun ubodok. ²⁶ Takag, enei ganan teten, amã ã geid atun meku odug inon, anï bunem, idi ein tamal ã gein isiya nigin kisi feleya sã, takam an tamal amã gein ibal isiya nigineg kisi feleya sã.’

²⁷ “Ï aiten yale iron, ‘Age fiyauf are, Dei, aya ò agonok, neu dei nẽ fõ bun Lasarus sur wiyë di, isilauf, ²⁸ ere nigin, aya turau tar faif dibodok. Utornë len, wedereid irouwauf, age fe di, idig darau odug nẽ modoü enei bun to disiyouf.’

²⁹ “Abraham solof iron, ‘Idi Moses nẽ itotoya ado profet neid itotoya ado, utorneïd len, idi anidi bun wedereid dinouf.’

³⁰ “Ï iron, ‘Age fiya sã, Dei Abraham, laa bun tamal takam idi bun isilauf are, idi waud falei youf.’

³¹ “Anï ere, Abraham tamo anï irokenen, ‘Idi Moses nẽ od ado profet neid od nigin to wedereid dinouf are, laa bun tamal takam fã ye fen, idi irokenëdiyofeg to karï douf.’ ”

17

Jesus Mosor Ado Momoiya Nigin Ifelnēdin

(*Matyu 18:6, 7, 21, 22; Mak 9:42*)

¹ Jesus in dō fiya tar irokenēdin, “Ereb ereb tamo mosor bun inenēdiyof anī isiyouf bagai, anī ere, tamo nanī be bunem isif, ī malalon ado. ² Taka ī nanaal enidi taka mosor bun inenēya ban, ī meein odug guyutu bun ifo ken, maaīwō irāya nigin biya bagai. ³ Anī nigin, ā lo welegei. “Ō turā mosor inouf, ou wiyēf, anī ī falei youf are, ō in mosor nigin wederē tu kel. ⁴ Ī naa tekelei bun, ō bun mosor ino sewen fouf, ī ō gein isi, sewen fe irōf, ‘Aya awaul,’ ō in mosor nigin wederē tu kel.”

⁵ Aposel idi Odug dirokenen, “Nemā momoia odug wouf!”

⁶ Jesus solof iron, “Ā momoia naal, masted faat gen adouf are, aa enei urokenēgouf, ‘Kusu wale, usil maaīwō ufa-rauf,’ ago ge di, ā sigoreī dō fouf.

⁷ “Ā taka, yogon ferfer kabier teneub yūf be, sipsip lof fen, kabierem isi mog, ne maraum tau, ‘Kaisā bagai saaf yōya nigin usi ubod,’ fiyēf de? ⁸ Age fiya ban, ī eig youf, ‘Neu saaf dodok wol fen, ō naki wol, arunau wale, akas bure afele di, gama ō saaf ado naan wāf.’ ⁹ Ī irokenē di, dōf age fen nigin, maraum ferfer tau de wiyal fiyēf de? ¹⁰ Anī nigin, ā ereb ereb irokeneik anī ganan dōg, ago weleg fen, āg eig ge urōgouf, ‘Amā ferfer to biya, amā nemā kabī anī dogol malel.’”

Jesus Tamo Ten Lepra Dagi Adodo El Fedin

¹¹ Jesus Jerusalem ileya nigin, Samaria ado Galili distrik daū atu iyok ilen. ¹² Ī fonō taka bun ile mog, tamo ten lepra dagi adodo, ī fotou difiyen. Idi gerom difar fen, ¹³ aiteid odug nem diweig diron, “Jesus, Odug, amā nigin malalon yō!”

¹⁴ Sain ī idi ileid fen, iron, “Uleg, aug bouweī pris ufelnēdigouf.” Age ye di, idi dile mog, bouweid biya len.

¹⁵ Idi neid taka bouwa biya len anī ile fen, kel isi, ait odugem Negur yana yalesen. ¹⁶ Jesus ye gariyan kubū ye yen ken, de wiyal fiyen, ī Samaria tamal.

¹⁷ Age fe di, Jesus to fen, “Ten ganan to biya ledin de? Tamo nain idi nain difaref? ¹⁸ Takam to kel isi, Negur yana yalesel, yaū enei dogol de?” ¹⁹ Jesus age ye fen, ī irokenen, “Fā wale fen, ule, ogon momoiam ō el yom.”

Jesus Negur Nē Tano Nigin Wogō Yen

(*Matyu 24:23-28, 37-41*)

²⁰ Sain taka, Farisia tamom, Negur nē tano ere sain isiyouf nigin Jesus to difiyē di, Jesus solof iron, “Negur nē tano, malam ileya kisi feleya sā bunem isidig, ²¹ tamo to ‘Eī yeir,’ be, ‘Your oun,’ be douf, ere nigin, Negur nē tano are ā atun ibodok.”

²² Age ye fen, Jesus yogon dō fiya tar irokenēdin, “Sain isi di, Tamo Naal nē naa taka ileya nigin oroyēif, anī ere, ā anī to ulougouf. ²³ Tamom dirokeneif, ‘Ī your!’ be, ‘Ī yeir!’ douf. Ā, to uleg, idi to dō wedig. ²⁴ Ere nigin, Tamo Naal, yogon naa bun, kolimei filiya lalan saa gariyanem irou, idikeleyan isiledig gen. ²⁵ Anī ere, uruwa ī darau musei yale di, tamo kayau sain enei bun dibodok anidi ī dudum difiyēf.

²⁶ “Noa nē sain bun age fen gen, age fiya bagai Tamo Naal nē sain buneg age fouf. ²⁷ Tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. Agef mog, kuwei isi fen, idi ganan daū fedin.

²⁸ “Lot nē sain buneg de age difen, tamo kayau saafem, naanem difen, na dalef, na sur difef, saaf diton, fō dino mog, difen. ²⁹ Anī ere, naa Lot Sodom taun itor ilen bun, yā ado meein salfa, saa bunem uyē gen kukur fen, idi ganan daū fedin.

³⁰ “Age fiya gen bagai, Tamo Naal yaorouf nē naa bun, agef wō youf. ³¹ Naa anī bun, taka ī yogon fō agaran ibod mog, in safina namen ibodok anī yalouf nigin to kel isilauf. Age fiya bagai, taka ī kabier ibodok, yogon safina yalouf nigin to kel ilauf. ³² Lot nē kayau bun kisi gouf! ³³ Taka ī yogon mata yalouf nigin kisi fouf, ī mata anī fō yalauf. Taka ī yogon mata anī itorōf are, ī yogon mata irou kafī falauf. ³⁴ Aya ā arokeneik, bō anī bun, tamo uru idi fatar tekelei bun denēf, tekelei yalouf,

taka itornĕf. ³⁵ Kayau uru idi wit ditutu mog, tekelei yalouf, taka itornĕf.”* ³⁷ Idi to difen, “Odug, ò urok anĭ nain wō youf?” Jesus idi irokenĕdin, “Nain be laa yenek nĕ an, tum guru difouf.”

18

Kayau Waab Tuwa To Yu Kelen Nĕ Yaab Od

¹ Age ye fen, Jesus, in dō fiya tar idi faimud kosĕya nigin tuweid to yŭf anĭ ifelnĕdiyof nigin, yaab od taka irokenĕdin. ² Ī iron, “Taun taka bun, es fiya tamo taka ibodon, ĩ Negur to kumĭ fiyĕdig, tamog to iwesnĕdig. ³ Taun anĭ bun an, kayau waab taka ibodon, ĩ es fiya tamo bun toku kel fen, yogon kiwai mala solo ifenĕf nigin irokenĕyai yedig.

⁴ “Es fiya tamo ĩ kaisā to karĭ fiyen, anĭ ere, dum ĩ yogo nigin iron, ‘Aya Negur to kumĭ afiyek, tamog to awesnĕdif, ⁵ anĭ ere, kayau waab enei toku morō ifanaf nigin, in morō anĭ ail fen, kayau ĩ irok anĭ age afouf, anĭ bunem ĩ to kel fen, morō ifanauf!’ ”

⁶ Jesus age ye fen, iron, “Es fiya tamo sane, ereb ĩ iron anĭ karĭg. ⁷ Negur yogon igirnĕdin anidi, bō ado gaa ado diweig dirokenĕdig nigin, ĩ lo nĕ madur fiya to ifenĕdiyof de? Ī sain meluk to karĭ fiyĕdiyof de? ⁸ Aya ā arokeneik, ĩ kaisā bagai lo nĕ madur fiya ifenĕdiyof. Anĭ ere, Tamo Naal isiyof sain bun, tenebur ein ĩ momoiya fotou fof de?”

Farisia Tamo Taka, Takis Yaleya Tamo Ado Nĕ Yaab Od

⁹ Tunĭ idi dogo nigin amā madur bagai de fen, tunĭ meleid irim lai difedidig anidi bun, Jesus yaab od eneig irokenĕdin, ¹⁰ “Tamo uru tempel bun kosĕ douf nigin diselen, taka Farisia tamo, taka takis yaleya tamo. ¹¹ Farisia tamo ifar fen, yogo nigin kosĕ yen, ‘Negur ò de ayok, aya tamo tunĭ gen sã, bĕ diledig, sane age difedig, seseirã dinodig, takis yaleya tamo enei geneg sã. ¹² Aya uub tekelei bun naa uru

kuri au fen, ereb ereb ganan aya alef anĭ, ten teke tekelei ò afonōdig.’

¹³ “Anĭ ere, takis yaleya tamo ĩ so rel ifaren. Ī saa iluneg to itad fen, anĭ ere, ĩ akor yu ken, iron, ‘Negur, aya nigin waŭ inōf, aya mosor temelou.’

¹⁴ “Aya ā arokeneik, Farisia tamo anĭ sã, takis yaleya tamo enei, Negur mala bun ĩ madur fen, fō bun ilen. Ere nigin, taka ĩ yogo yana yalesef, Negur ĩ yana lai fof, taka ĩ yogo yana lai fef, Negur ĩ yana yalesauf.”

Kesu Nanaal Jesus Geid

(Matyu 19:13-15; Mak 10:13-16)

¹⁵ Takag, tamo kayau, Jesus kesu momoug kobŭ fediyof nigin ĩ wagen guri difeid disin. Age dife di, in dō fiya tar anĭ dile fen, idi ou difiyĕdin. ¹⁶ Anĭ ere, Jesus kesu ĩ wagen iweigneid fen, iron, “Utorneidig len, kesu nanaal aya wageun disiyof, idi to katŭ wedig, ere nigin, Negur nĕ tano are eig fediya neid. ¹⁷ Aya ā momoi arokeneik, aib taka ĩ, Negur nĕ tano, kesu naal age fiya gen to yalouf are, ĩ Negur nĕ tanon to bagai ilauf.”

Uyu Irouya Tamo Safina Musei Ado

(Matyu 19:16-30; Mak 10:17-31)

¹⁸ Uyu irouya tamo taka Jesus to fiyen, “Tise biya, aya ere naig afe fen, mata faimud ibodkeleya alouf?”

¹⁹ Jesus ĩ irokenen, “Ere nigin ò aya anĭ biya wiyaf? Aibem taka biya sã, Negur yogo dogol. ²⁰ Ò itãfiya keleĭ: ‘Ò seseirã to unouf, ò tamo taka to ukesiyof, ò to bĕ walouf, ò taka nigin idegĕya od to urōf, sinã tamã yeneid walesauf.’*”

²¹ Age ye di, ĩ iron, “Enei ganan aya kesu naalun dō afef asin.”

²² Jesus enei karĭ ye fen, ĩ irokenen, “Ò fau tekelei anĭ inĭ sã. Ogon safina ganan na nigin sur wo fen, maleg tamo weneid, agouf anĭ ò saa ilun safina biya adouf. Ago wol fen, usi, aya dō wiya.”

²³ Anĭ ere, ĩ od enei karĭ ye fen, wau fatuk gudŭ fen, ere nigin, ĩ safina musei biya ado. ²⁴ Jesus ĩ lege fiye ken, iron, “Safina musei adodo tamo, Negur

* **17:35:** Itotoya tunĭ eig de ditoton: itornĕf. **36** Tamo uru idi kabier difarauf, tekelei yalouf, taka itornĕf. * **18:20:** Eksodas 20:12-16; Diuteronomi 5:16-20

nē tano bun ileyā nigin, gai malai bagai!
²⁵ Momoi, kamel ī, gabar iwaya nē nil ku bun ileyā nigin, karika bagai, safina musei ado tamo, Negur nē tano bun ileyā nigin, malai bagai.”

²⁶ Idi od anī karī de fen, to difen, “Age fiyauf are, aim anī mata ibodkeleya anī valeyā nigin kisi feleya?”

²⁷ Anī ere, Jesus solof iron, “Ereb tamom age fiya nigin kisi feleya sã anī, Negur age fiya nigin kisi feleya.”

²⁸ Pita Jesus irokenen, “Ulef, amã õ dõ mayõf nigin, ereb ereb ganān amã ado anī matoron!”

²⁹ Age ye di, Jesus idi irokenēdin, “Aya ã momoi arokeneik, aib taka fõ, kayau, tura tar, sina tama tar be, gere tar, Negur nē tano nigin itoron, ³⁰ ī mala solo musei bagai sain enī bun yalouf, ī dumen isiyouf buneg mata faimud ibodkeleya yalouf.”

*Jesus In Laa Nigin Irõ, Towo Fen
 (Matyu 20:17-19; Mak 10:32-34)*

³¹ Age ye fen, Jesus, in dõ fiya tar tuwelf firen geif iroule irokenēdin, “Ulegef, ada Jerusalem teselef, ereb ereb ganān Tamo Naal nigin profet ditoton anī, fau kisi falauf. ³² Ī fau haiden Israel sã anidi imeid bun ilauf. Idi ī fau diselinēf, kono difiyēf, disisnēf, wagī difiye ken, dukesiyouf. ³³ Naa towo bun, ī fau baban mata kel fã youf.”

³⁴ Anī ere, dõ fiya tar, enei ganān taka to kelein. Od anī nē gariya idi bun iminen, agef fen, idi ī ereb nigin irok anī to kelein.

*Maleg Tamo Mala Ifofakeleya Anī Mala Fara Felen
 (Matyu 20:29-34; Mak 10:46-52)*

³⁵ Sain Jesus Jeriko kelē fiyē mog, tamo taka mala ifofakeleya, naab yerin nonī yef ibodon. ³⁶ Ī tamo kayau musei disi dilef ya karī ye fen, ereb wõ yef anī nigin to fedin. ³⁷ Idi ī dirokenen, “Jesus Nasaret tamal isi ilef.”

³⁸ Age de di, ī iweig iron, “Jesus, Dawid Naal, aya nigin malalon yõ!”

³⁹ Tamo uyu dilen anidim sakã difiye ken, foro yalauf nigin dirokenen, anī ere, ī wade bagai iweig iron, “Dawid Naal, aya nigin malalon yõ!”

⁴⁰ Jesus dē yel fen, tamo ī wagen dirou disiyouf nigin irokenēdin. Ī isi melsã di, Jesus ī to fiyen, ⁴¹ “Aya õ ere age afonõf ani, õ oroyok?”

Tamo anī solof iron, “Odug, aya malau kelē yalau fenē.”

⁴² Age ye di, Jesus ī irokenen, “Malã fara wol, ogon momoiya anim el yom.” ⁴³ Kaisã bagai, ī mala fara fel fen, Jesus dõf, Negur yana yalesen. Tamo kayau ganān anī dile fen, idig Negur yana dalesen.

19

Sakeus, Takis Yaleyā Tamo

¹ Jesus Jeriko taun wõ ye fen, atu iyok ilen. ² Tamo taka yana Sakeus an ibodon. Ī takis yaleyā tamo neid mudur, safina musei ado. ³ Ī Jesus ī ai bagai anī ilouf nigin oron, anī ere, ī tobega tamo nigin ī kisi feleya sã, ere nigin, tamo kayau musei dinonolnen. ⁴ Anī nigin, ī ket gudu ref ile, Jesus ilouf nigin aa fig ilun sõ yen, ere nigin, Jesus naab anī dõf, are isi ilauf.

⁵ Sain Jesus modoũ anī bun ulõ yeis fen, mala ilun ira ken, ī irokenen, “Sakeus, kaisã bagai kutū weis. Gama aya ogon fõ bun abodõf bagai.” ⁶ Age ye di, ī kaisã kutū yeis fen, wau sere fiya ado Jesus aan fiyen.

⁷ Tamo kayau ganān enei dile fen, kos-esē kurã den, “Ī mosor ado tamo nē fõ bun mogo ilef.”

⁸ Anī ere, Sakeus ifar fen, Jesus irokenen, “Odug, ulef! Gama yeir aya neu safina atun fara afe fen, sitakã maleg tamo afenēdiyof, aya idegēya bunem tunī neid safina alen are, aya idi mugu mugu mala solo aiwa ifenēya teten ano fen, afenēdiyof.”

⁹ Age ye di, Jesus ī irokenen, “Gama kel yaleyā anī fõ enei bun isil, ere nigin, tamo enī, ĩg Abraham naal taka. ¹⁰ Ere nigin, Tamo Naal fõ delen anidi imirneid fen, kel gei fof nigin isin.”

*Ferfer Ten Moni Imeid Bun Inon Nē Yaab Od
 (Matyu 25:14-30)*

¹¹ Idi od enei karī de mog, Jesus tobol fe, yaab od taka irokenēdin, ere nigin, ī mogo Jerusalem melsã ifaref, anī nigin,

tamo kayau Negur nê tano kaisã bagai wõ youf de fen, kisi difen. ¹² Anĩ nigin, ĩ iron, “Tamo taka yana odug ado, ĩ king dinenē di, kel isiyouf nigin fõ takã gerõ bagai ilen. ¹³ Anĩ nigin, ĩ yogon ferfer ten iweig laisi fen, moni wan tausen kina mugu mugu ifeneĩd fen, irokenēdin, ‘Moni enei kabĩ wenēg mog, aya kelauf.’

¹⁴ “Anĩ ere, yogon tamo tar kiwai difen ken, eig de dirõf nigin ĩ dumen arũ tamo sur difen, ‘Amã tamo enei nemã king wõ youf nigin to oromak.’

¹⁵ “Anĩ ere, ĩ king yana yale fen, fonõ kel isin. Agef fen, ĩ, ferfer moni ifenēdin idi moni ado naig de kabĩ dalen anĩ ilouf nigin, iweignēdi di, disin.

¹⁶ “Tamo uyu ĩ isi iron, ‘Odug, aya ogon wan tausen kina bun, ten tausen kina taka alen.’

¹⁷ “Age ye di, yogon odug solof irokenen, ‘Õ ferfer biya, õ de agon! Õ safina naal bagai bun kabĩ biya walen nigin, taun ten lo weid.’

¹⁸ “Ĩ dõ fiya taka isi iron, ‘Odug, aya ogon wan tausen kina bun, faif tausen kina taka alen.’

¹⁹ “Age ye di, yogon odug ĩg irokenen, ‘Õ taun faif lo weid.’

²⁰ “Age fe di, ferfer taka isi iron, ‘Odug, ogon moni yeir. Aya moni anĩ gabar masak nem sile afe fen, anokon. ²¹ Aya õ nigin kumĩ aun, ere nigin, õ tamo total ado. Õ ereb to unokon anĩ waledig, onom to utenen anĩ kusu wodig.’

²² “Yogon odug ĩ irokenen, ‘Aya ogon od bunem es ayõf, õ ferfer sane! Õ kelein, aya tamo total ado, ayam to anokon anĩ aledig, ayam to atenen anĩ kusu afedig de? ²³ Ere wo fen, neu moni benk bun to unon? Ago wom are, sain aya kelauf bun, moni kabĩ yalen anĩ nê mala ado, moni õ benk wenen anĩ bagu fiya kel isin ado alem.’

²⁴ “Age ye fen, odug idi difaren anidi irokenēdin, ‘Yogon moni son ge fen, tamo ten tausen kina ado anĩ wenēg.’

²⁵ “Age ye di, idi ĩ dirokenen, ‘Odug, ĩ mogo ten tausen kina ado!’

²⁶ “Odug solof iron, ‘Aya ã arokeneik, taka ĩ ado, aya teten anouf, anĩ ere, taka ĩ

sã bagai, ereb taka ĩ ado areg, ĩ bun tamal son fouf. ²⁷ Anĩ ere, neu kiwai tar, aya nedi king ibodõya nigin to orodin anidi, ein wageun gurig urousig fen, malau bun udenkesig.’ ”

Jesus Tamo Yana Ado Gen Jerusalem Ilen

(Matyu 21:1-11; Mak 11:1-11; Jon 12:12-19)

²⁸ Jesus od enei wogõ yel fen, Jerusalem iseleya nigin, ĩ ketem uyu iselen. ²⁹ Jesus Moul Arei* bun Betfage ado Betani fonõ kelē fiye ken, in dõ fiya tar uru sur feid irokenēdin, ³⁰ “Fonõ wageik anĩ bun uleg, an wõg fen, donki naal difon anĩ ulogouf, are aibem taka anĩ bun to iyon. Anĩ biru weleg fen, ein urou usig. ³¹ Taka nem to yeif, ‘Ere nigin ã anĩ biru gef?’ urokenēgouf, ‘Odug anĩ kabĩ ifenēf nigin.’ ”

³² Anĩ nigin, uyu sur fedin idi dile, Jesus irokenēdin kilei bagai anĩ fotou difen. ³³ Idi donki naal biru de mog, anĩ nê marau tamo idi to difiyēdin, “Ã ere nigin donki naal anĩ biru gef?”

³⁴ Idi ĩ solo de dirokenen, “Odug anĩ kabĩ ifenēf nigin.”

³⁵ Idi donki naal anĩ Jesus wagen dirousi fen, idi neid gabar teten dirara ken, ĩ anĩ teten dinenē ibodon. ³⁶ Jesus iyok ile mog, tamo kayau idi neid gabar naabur du difedin.

³⁷ Sain ĩ iyok isi, naab Moul Arei bunem isileya non, in dõ fiya tar ganan, memelik ganan inodin dilen nigin, waud al fiya ado aiteid odug nem Negur yana dalesen:

³⁸ “King, Odug yana bunem isif, are ĩ el fiya ado!”*

Saa ilun wau inosiyã ado, ilun bagai fula fiya medeĩya ado!”

³⁹ Tamo kayau atun, Farisia tamo tunĩ Jesus dirokenen, “Tise, ogon dõ fiya tar sakã wiyeĩd!”

⁴⁰ Anĩ ere, Jesus solof iron, “Aya ã arokeneik, idi foro dalauf are, meein eneidi diweig dirõf.”

⁴¹ ĩ Jerusalem kelē fiye ken, taun anĩ ile, wau gudũ fe di, inã yale, ⁴² iron, “Õ Jerusalem naa enei bun, õ nigin erebem

* **19:29:** ‘Oliv Arei’ dedig. * **19:38:** Sam 118:26

waũ inosiya irou isif anĩ õ keleim, are dem, anĩ ere, gama õ malã bun iminek. ⁴³ Sain taka õ bun isiyouf, ogon kiwai tar, õ bun teneub mudu dino, salili diyokel, afi diyokalauf. ⁴⁴ Idi õ tenebur dale dirãyoř, õ ado gerẽ tar ogon kau namen difaref geid. Idi meein taka taka teten ditorõ di, to ibodõř, ere nigin, Negur õ bun isin nẽ naa anĩ to ulegen nigin.”

Jesus Tempel Bun

(*Matyu 21:12-17; Mak 11:15-19; Jon 2:13-22*)

⁴⁵ Jesus tempel modoũ bun ile, idi ereb ereb na nigin sur de mog, an irudidin. ⁴⁶ Agef fen, Jesus idi irokenẽdin, “Negur nẽ Itotoya bun ibodok, ‘Neu fõ are, kosẽya nẽ fõ ibodõř,* anĩ ere, ãgem ‘bẽ tamo neid iminẽya fõ* unogen.”

⁴⁷ Naa ganan Jesus tempel bun ifelnẽdidin. Anĩ ere, pris odudug, lo ifelnẽdiya tamo, tamo kayau neid mudur adodo geid, Jesus dukesiyouf nigin naab dimiren. ⁴⁸ Anĩ ere, idi age difouf nigin naab taka to dilen, ere nigin, tamo kayau ganan in od anĩ diroun.

20

Jesus Aim Igirnen Anĩ To Difiyen

(*Matyu 21:23-27; Mak 11:27-33*)

¹ Naa taka bun, Jesus tempel bun tamo kayau ifelneid fen, biya od wogõ yen. Agef mog, pris odudug, lo ifelnẽdiya tamo, mudur adodo geid, ã gein disin. ² Idi diron, “Aim õ igirnõ di, õ ereb ereb enĩ ago wof anĩ urokanamã. Aim õ igirnon?”

³ Jesus aitedin yale iron, “Ayag to fiya taka afeneif. Solog urokanag, ⁴ Jon naan igunẽdin are saa ilun tamal de, tamo bunem?”

⁵ Idi dogo dogol katõ de fen, diron, “Ada, ‘Saa ilun tamal,’ tauf are, ã to fouf, ‘Ere nigin ã ã nigin to momoi wiyẽgen?’ ⁶ Anĩ ere, ada, ‘Tamo bunem,’ tauf are, tamo kayau ganan meeinem dinadauf, ere nigin, idi Jon ã profet den.”

⁷ Anĩ nigin, idi solo de diron, “Ĩ nain be tamal are amã keleĩ sã.”

⁸ Age de di, Jesus iron, “Ayag ã to aro-keneif, aim aya igirna di, aya ereb ereb enĩ age afedif.”

Tamo Kabĩ Lo Difedig Nẽ Yaab Od (*Matyu 21:33-46; Mak 12:1-12*)

⁹ Jesus tobol fe, yaab od enei tamo kayau irokenẽdin, “Tamo taka wain kabĩ yale, ã mala solo yalouf nigin wain kabĩ, kabĩ tamo tunĩ imeid bun ino fen, sain meluk uyu takã ilen. ¹⁰ Fito fiya sain, ã ferfer taka wain kabĩ lo fiya tamo gedin, wain biya tunĩ difenẽř nigin sur fen. Anĩ ere, idi ã du ken, sur difiyẽ di, ima sãsa ilen. ¹¹ ĩ ferfer taka sur fen, anĩ ere, idi tamo anĩg du ken, mama difenẽ di, ima sãsa ilen. ¹² ĩ baban takag sur fe di, idi ĩg darau difen ken, dumeitur diran.

¹³ “Age dife di, wain kabĩ marau iron, ‘Aya ere naig afouf? Aya neu kesu, oboiyou, sur afouf. Idi ã anĩ karĩ difiyẽř be.’

¹⁴ “Anĩ ere, kabĩ lo fiya tamo idi ã dile fen, abob dirokenen. Idi diron, ‘Eĩ ã akorouf. Ada ã taukeis fen, akor eĩ nedauf.’ ¹⁵ Anĩ nigin, idi ã wain kabĩ dumeitur dira ken, dukesin.”

Age dife di, wain kabĩ marau naig fediyouf? ¹⁶ ĩ isi, kabĩ lo fiya tamo idenkeis fen, wain kabĩ anĩ tamo tunĩ ifenẽdiyof.”

Sain tamo kayau od enei karĩ de fen, idi diron, “Enei to bagai agef wõ youf!”

¹⁷ Anĩ ere, Jesus idi lo feid le fen, to fedin, “Age fiyauf are, ere gariya nigin Negur nẽ Itotoya bun eig ye irok:

“ ‘Meein are fõ inoya tamom sane de fen, ditoron,

meein anĩ gama monog tor wõ yen’*?”

¹⁸ Aib taka meein anĩ teten kubũ youf, mereb fe fisik fouf, takag, aib taka meein anĩ ã teten kubũ youf, ã danĩř aas lauf.”

¹⁹ Lo ifelnẽdiya tamo, pris odudug geid, Jesus kaisã bagai ironẽya nigin naab dimiren, ere nigin, idi kelein, ã idi nigin yaab od enei wogõ yen. Anĩ ere, idi tamo kayau nigin kumĩ den.

Sisa Takis Ifenẽya

(*Matyu 22:15-22; Mak 12:13-17*)

²⁰ Anĩ nigin, idi Jesus ololo difiye ken, kofo tamo sur difedin, kofo tamo idi

* **19:46:** Asaia 56:7 * **19:46:** Jeremaia 7:11 * **20:17:** Sam 118:22

idegēya bun madur tamo gen dilen. Idi Jesus ereb od wogōya bun kū fenē di, diroune ken, Rom gawaman mudur nē lo fiya ado megeir bun dinenēf nigin kisi difen. ²¹ Anī nigin, kofo tamo Jesus to difiyen, “Tise, amā keleī, ogon wogōya ifelnēya ado madur. Ō takam in oroya dō wouf nigin wewu yō di, in oroya dō fen, taka wau morō to wenēdig, anī ere, ō momoi bun Negur nē naab ufelnamādig. ²² Amā Sisa takis mafenēf anī lo dō fiya de, sã?”

²³ Anī ere, Jesus idi namedin idegēya anī ile fen, irokenēdin, ²⁴ “Koin moni taka ufelnag. Ai nē malakanon ado itotoya anī bun ibodok?”

²⁵ Idi aiten dale diron, “Sisa nē.” Age de di, Jesus idi irokenēdin, “Age fiyauf are, Sisa nē are Sisa wenēg, Negur nē are Negur wenēg.”

²⁶ An Jesus mal atun wogō yen bun, idi ī ironunēya kisi feleya sã. Idi ī solof iron anī bunem terefeit de fen, foro delen.

Mata Kel Fāya Bun Ai Nē Kayau Ibodōf?
(Matyu 22:23-33; Mak 12:18-27)

²⁷ Sadusia tamo idi dirōdig, laa bun tamal mata to ke de fã dedig, dedig anī tunim, to fiya eig fiya ado Jesus wagen disin.

²⁸ Idi diron, “Tise, Moses itotkanaman, are tamo taka, ne tura laaf fen, aiwa itornen, anī ere, kesu sãf are, tamo ī kayau waab anī yale fen, tura nē kesu diroukenēf.

²⁹ Gama tura tura sewen dibodon. Matu ketem kayau taka yalen, anī ere, kesu yaleya sã mog, tamo laa fen. ³⁰ Matu dō fiya bagam kayau anī yalen, ī laa fe di,

³¹ ī dō fiya bagam kayau anī yalen, age de dile dile, tura tura sewen ganan kesu sã gare desin. ³² Dum kayau areg laa fen.

³³ Anī nigin, dum laa bun tamal mata kel fāya sain bun, ī ai nē kayau ibodōf, ere nigin, tura tura sewen anidi adok ī dale dogolen?”

³⁴ Jesus aitedin yale iron, “Gama sain enei bun, tamo kayau yalef, kayau tamo yalef ya ibodok. ³⁵ Anī ere, sain anī bun, idi laa bun tamal mata kel fāya sain bun dibodōf nigin kisi feleya anidi, an tamo kayau yalef, kayau tamo yalef ya sãf, ³⁶ idi

baban gare deyag kisi feleya sã, ere nigin, idi engel gen. Idi laa bun tamal mata ke de fã def nigin, idi Negur nē gere tar. ³⁷ Anī ere, arein aa yã wō yen nigin Negur nē Itotoya bun, Moseseg tamo gare den anī mata ke de fã douf nigin ifelnen, ere nigin, ī Odug nigin iron, ‘Abraham nē Negur, Isak nē Negur, Jakop nē Negur.’* ³⁸ Ī laa neid Negur sã, ī mata ibodōya neid Negur, ere nigin, ī bun ganan mata dibodok.”

³⁹ Lo ifelnēdiya tamo tunī aiten dale diron, “Tise, ō de urok!” ⁴⁰ Anī bunem idi kumī de fen, taka nem ereb taka nigin baban Jesus to, to fiyen.

Ai Nē Kesu Anī Kristus?
(Matyu 22:41-23:7; Mak 12:35-40)

⁴¹ Age dife di, Jesus idi irokenēdin, “Naig fe di, idi Kristus ī Dawid nē Naal dedig?”

⁴² Dawid ī yogo Buk Sam bun kurō falaisin: “ ‘Negur neu Odug irokenen,

“Imau biya melem ubod mog,

⁴³ ogon kiwai tar

on yē inoya nē sawa anouf.”**

⁴⁴ Dawid ī nigin ‘Odug’ yef, age fiyauf are, naig fe di, ī Dawid naaluouf?”

⁴⁵ Tamo kayau ganan karī difiyē mog, Jesus in dō fiya tar irokenēdin, ⁴⁶ “Lo ifelnēdiya tamo nigin lo welegei. Idi gabar meluluk difonunakel diyo ken, maket modoū bun aan difiyēdiyof anī orodidig. Age de fen, idi Juda neid uub fō bun sia biyai biyai bun dibod ken, tar inoya bun modoū malabag malabag bun dibodōdig.

⁴⁷ Idi kayau waab idegnēdiya bunem nedi fō sosoin difeid fen, meleid yaleya nigin meluk bagai kosē dedig. Tamo age fediya, mala solo darau sane bagai dalouf.”

21

Kayau Waab Nē Safina Negur Ifenēya
(Mak 12:41-44)

¹ Jesus mala irã, tamo kayau safineid adodo, nedi kolekta moni tempel bogis bun dino mog, iledin. ² Takag, ī lof mog, kayau waab maleg taka isi, peni giriya moni nanaal uru inon. ³ Agef fen, Jesus iron, “Aya ã momoi arokeneik, kayau waab maleg enī ī, ganan wal fediya, odug

* 20:37: Eksodas 3:6 * 20:43: Sam 110:1

bagai bogis bun inol. ⁴ Tamo kayau enei ganan, dogo neid safineid bun tamal, nedi kolekta moni dinon, anī ere, kayau anī, maleg bun ī mata ibodōf nē anī ganan inon.”

Idikeleya Sain Nē Uris
(*Matyu 24:1-35; Mak 13:1-31*)

⁵ In dō fiya tar tunī, tempel meein biya biya nem ado, safineid biyai Negur difenen anim, tempel naki difiyen anī nigin wogō den. Anī ere, Jesus iron, ⁶ “Ā ulegef enei nigin, sain fau isiyouf, meein enī taka to abob tete tete yenēf, anī adok fau isog irailauf.”

⁷ Idi to difen, “Tise, ere sain eneidi wō youf? Ere uris anī, eneidi kisi falauf nigin wō youf?”

⁸ Age de di, Jesus iron, “Takam to idegneif nigin lo weleg. Ere nigin, musei aya yanau nem disi dirōf, ‘Aya Kristus,’ takag, ‘Sain mogo melsak.’ Age de di, to dō wiyēdig. ⁹ Ā kusī nigin ado, kantri bun kiwai fen, gawaman narī difef ya karī gouf, ā to tererē gei. Ereb ereb enidi ketem wō youf bagai, anī ere, idikeleya anī, sain anī bun bagai to wō youf.”

¹⁰ Age ye fen, Jesus idi irokenēdin, “Teneub taka fā ye fen, ī teneub taka nigin kiwai ifenēf, tano taka ī tano taka nigin kiwai ifenēf. ¹¹ Mimī odug wowā youf, naū odug ado dagi total, modoū taka taka bun wowā youf, ereb ereb kumīya nē ado uris odudug, saa bun wowā youf.

¹² “Anī ere, eneidi ganan fau to wō ye mog, idi kaka diyēi ken, kafī fiya difeneif. Idi Juda neid uub fō bun ado kalabus bun dineneif. Age de fen, ā king ado gawaman mudur adodo meleid bun dirouleyeif, anī ganan aya yanau nigin de fen, age diyēif.

¹³ Naab enei bunem, ā idi meleid bun, aya nigin kurō wesigouf. ¹⁴ Anī ere, ā idi meleid bun aug isenneīya nigin dodok ge fen, to wogō gouf nigin ā kisi ketem ufokeleg. ¹⁵ Ere nigin, aya, od ado kisi biya, āgenei kiwai tar takam solof irōya be, kiwai ifenēya kisi feleya sā anī afeneif.

¹⁶ Anī ere, ā fau sineī temeī tarem, tureī tarem, sirag ado neī mou taremeg kiwai difenei ken, ā tunī laa bun dineneif.

¹⁷ Tamo ganan, aya yanau nigin de fen,

ā kiwai difeneif. ¹⁸ Anī ere, mudureī bun, fatiyeī tekelei bagai to iminkalauf. ¹⁹ Megeir ifareya bunem, mata walogouf.

²⁰ “Sain ā Jerusalem kusī tamom salili dife mog, ulogouf, ā keleī youf, Jerusalem fonou inenēya anī melsak. ²¹ Age fiya ulogouf, idi Judia distrik bun dibodok, arein diya diselauf, idi taun anī bun dibodok, anenem diyalalauf, idi taun yerin difaref, namen to dilauf bagai. ²² Ere nigin, sain enei are, Negur nē Itotoya bun ibodok ganan kisi falauf nigin darau ifenēya nē sain. ²³ Naa anī bun, kayau bouweid ado, kayau kesu su difenek ado, idi meleidlon ado. Teneub anī bun, morō odug wō ye fen, Negur nē didi, tamo kayau enei bun isiyouf. ²⁴ Idi dimig nem didenkeis, kalabus tamo gei difeid fen, teneub ganan bun diroulediyouf. Jerusalem fau haiden Israel sā anidim lalai difeid dile, haiden Israel sā anidi neid sain anī kisi falauf.

²⁵ “Uris gaa bun, ogō bun ado, barisa bun wō youf. Tenebur ein, teneub ganan bun moloun fire bagai fā ye fen, maaī gugu re di, idi kisi gurū ye fen, nene douf. ²⁶ Tamo kayau, teneub bun ere wowā youf de fen, kumī de, meleid waī youf, ere nigin, saa nē megeir guyoyō douf. ²⁷ Sain anī bun, tamo idi, Tamo Naal lalo bun megeir ado fula fiya medeīya barikā isi mog, dilouf. ²⁸ Ereb ereb enei gariya ino, wō ye di, ufareg fen, mudureī utadseg, ere nigin, kel yaleyeīya are melsak.”

²⁹ Age ye fen, Jesus yaab od enei irokenēdin, “Ā aa fig ado aa ganan ulogouf. ³⁰ Sain idi aarau ifiraūd mog, anī ā aug uleg fen, ā keleīdig, saneya melsak. ³¹ Age fiya bagai, ereb ereb eneidi wō ye mog, ulogouf are, āg keleī youf, Negur nē tano are mogo melsak.

³² “Aya ā momoi arokeneik, tamo kayau sain enei bun dibodok anidi to gare de mog, ereb ereb eneidi ganan wō youf.

³³ Saa teneub ado sa kalauf, anī ere, neu od to bagai sa kalauf.

³⁴ “Lo walagauf, sāf are, saafei ge, aai naanuei ge fen, tenebur mata ibodōya nigin sii fiya anim, āgenei wauī bun kafī yeī di, ā keleī sā mog, Negur nē naa kor gen ā bun isiyouf. ³⁵ Naa are, tenebur tamo

kayau ganan bun wō youf. ³⁶Eneidi ganan wowā you fenē anī wal fiya kisi falauf nigin ado, Tamo Naal mala bun ufaragauf nigin, ā faimud ololo wog fen, kosē gouf.”

³⁷Naa ganan, Jesus tempel bun ifelneid fen, aragau ganan, Moul Arein isel fen, bō an ibodōdig. ³⁸Age fe di, tamo kayau ganan, tempel bun karī difiyēf nigin, bon-imeī bagai disidig.

22

Judas Jesus Mudur Adodo Imeid Bun Inouf Nigin Yo Yen

(*Matyu 26:1-5; Mak 14:1, 2, 10, 11; Jon 11:45-53*)

¹Gama Bret Yis Sā Sifa naa, Pasa naa dedig melsā di, ²pris odudug, lo ifelnēdiya tamo geid, Jesus yukesiya nigin naab dimiren, ere nigin, idi tamo kayau nigin kumī den. ³Age fe di, Satan, Judas, Iskariot tamal dedig, tuwelf dō fiya tar atun taka, ī namen ilen. ⁴Age fe di, Judas ile, pris odudug ado tempel lo fiya tamo neid uyu irouya bun wō ye fen, idi geid ī naig fe Jesus kiwai imeid bun inouf nigin katō difen. ⁵Idi od enī karī de, waud al fe fen, ī moni difenēf nigin dirokenen. ⁶Judas ī yo ye fen, tamo kayau to guru de mog, Jesus idi imeid bun inouf nigin naab imirek ilen.

Jesus In Aposel Geid Idikeleya Nē Bō Saaf Don

(*Matyu 26:17-35; Mak 14:12-31; Jon 13:21-30, 36-38*)

⁷Anī dumen, Bret Yis Sā anī nē naa wō yen, anī bun idi Pasa naa nigin sipsip naal diden ken, sesewi difedig. ⁸Jesus, Pita Jon ado sur feid fen, iron, “Uleg, ada Pasa naa nē saaf tāf nigin dodok wanadag.”

⁹Idi Jesus to difiyen, “Ō, amā nain anī, Pasa naa nē saaf tāf nigin, dodok mafouf anī oroyok?”

¹⁰Age de di, Jesus idi irokenēdin, “Taun wōg fen, tamo taka darum naan ado isi fottou yeif, ī fō bun ilauf anī dōg uleg. ¹¹Agog fen, ā fō marau eig wiyēg urokenēgouf, ‘Tise ō irokonok: Aab nanī bun an, aya neu dō fiya tar geid, Pasa naa nē saaf māf?’ ¹²Age ge di, ī aab odug ilun anī ifelneif, an ereb ereb dodok de bure difelen. An neda nigin dodok gouf.”

¹³Age ye di, idi dile, Jesus irokenēdin kilei ereb ereb age fiya dilen. Anī nigin, idi Pasa naa dodok difen.

¹⁴Sain wō ye di, Jesus in aposel geid tebol bun dibodon. ¹⁵Age de fen, Jesus idi irokenēdin, “Aya darau yaleya sā mog, ā geid Pasa naa nē saaf tāf anī orouf bagai. ¹⁶Ere nigin, aya ā arokeneik, aya baban Pasa naa nē saaf to āf ile, anī fau Negur nē tano bun kisi falauf.”

¹⁷Age ye fen, ī kap yale, Negur de fiye ken, iron, “Enei waleg fen, ā atun foig. ¹⁸Aya ā momoi arokeneik, aya baban wain to āf ile, Negur nē tano isiyouf.”

¹⁹Age ye fen, Jesus bret yale, Negur de fiye ken, mumā fen. Agef fen, ī in dō fiya tar ifeneid fen, iron, “Eī neu bouwau, ā nigin afeneik. Enei agog fen, aya nigin kisi gouf.”

²⁰Age fiya bagai, saaf bure difel fen, Jesus kap yale, iron, “Kap enei, neu naudou bun, ā Negur geid bar itenēya mata, naudou are ā nigin fi felef. ²¹Anī ere, taka aya kiwai imeid bun inoyauf, are ein tebol bun urom imamā manof. ²²Momoi, Tamo Naal ī nigin iron kilei agef ilauf, anī ere, tamo ī kiwai ifenek, ī malalon ado.” ²³Age ye di, idi dogo dogol toti difen, idi atun aim bagai tobonunā enei age fouf.

²⁴Takag, idi atun aim anī odug bagai ibodōf nigin luwa diroun. ²⁵Age dife di, Jesus idi irokenēdin, “Haiden neid king, dogo neid tamo kayau lo difedig, idi dogo neid megeir tamo kayau bun yaor difedig, are ada biya difadauf dedig. ²⁶Anī ere, ā age fiya anī to ago gouf. Age fiya ban, ā atun odug ibodok are, kesu naal gen ibodōf, takag, uyu irouya tamo ī, aruna yaleya tamo gen ibodōf. ²⁷Ai anī odug, taka tebol bun ibodok anī de, taka ī aruna yalef anī? Taka ī tebol bun ibodok anī sā de? Anī ere, aya ā atun aruna yaleya tamo gen abodok. ²⁸Ā anī, neu kisi fiya isi di, aya bun toku ufaregen. ²⁹Neu Dei tano aya ifanan gen, ayag tano ā afeneik. ³⁰Age afe di, ā neu tanon, tebol bun saaf ado naan wāgauf, king nē sia bun ubodōg fen, Israel ibor tuwelf es gouf.

³¹“Simon, Simon, tamo wit biya ado wit ido foi fiya nigin age fedig gen, Satan

Ī āgenei momoiya kisi yeī fenē nigin to fen. ³² Anī ere, aya, Simon ō nigin ogon momoiya to urofosiyouf nigin kosē aun. Anī nigin, sain ō kelouf, turā tar megeir wediyouf.”

³³ Anī ere, Pita aiten yale iron, “Odug, aya ō ado kalabus bun ado, laa bun ileya nigin dodok afel.”

³⁴ Age ye di, Jesus iron, “Pita, aya ō arokonok, gama fau tataro kokorok yeya sā mog, ō wa fen, aya nigin keleī sā wo, towo wouf.”

³⁵ Age ye fen, Jesus idi to fedin, “Sain aya ā moni nē kodol, faa be, su sā sur ayein, ā ere taka lau gen de?” Idi solo de diron, “Sā.”

³⁶ Age de di, Jesus idi irokenēdin, “Anī ere, gama taka ĩ moni nē kodol adouf, yalouf, faag age fiya, taka ĩ dimig sā, yogon gabar na nigin sur fe fen, taka na yalouf.

³⁷ Negur nē Itotoya bun eig ye ibodok, “Ī tamo sesen geid bagu difedin.”* Aya ā arokeneik, enei aya bun kisi fel, agef wō youf. Ariya, aya nigin itoton are mogo kisi felef.”

³⁸ In dō fiya tar diron, “Ulef, Odug, dimig uru yeir.” Age de di, ĩ iron, “Are de.”

Jesus Moul Arein Kosē Yen

(Matyu 26:36-46; Mak 14:32-42)

³⁹ Agef fen, Jesus aabē tamal ulō yeis fen, gai age fedig gen, Moul Arein iselen, age fe di, in dō fiya tareg ĩ dō difiyen.

⁴⁰ Modoū anī bun wō de fen, Jesus in dō fiya tar irokenēdin, “Kisi fiya bun to kubū gouf nigin kosē wog.” ⁴¹ Jesus yogon dō fiya tar itorneīd, meein irā di, ile kubū youn age fiyan ile, ibor bobou fe fen, kosē yen, ⁴² “Dei, ō oroyōf are, kap enī aya bun walelauf. Anī ere, neu oroya to dō wouf, on oroya dō wo.” ⁴³ Engel taka saa ilun tamal, ĩ bun wō ye fen, megeir ifenen. ⁴⁴ Age fe di, Jesus wau morō fatuk fe di, ĩ total bagai kosē yen, age fe di, maab, naud isidig gen, tenebur kuku ren.

⁴⁵ Ī kosē yel fen, fā ye, in dō fiya tar gedin kel ile, waud gudū falaisil, den mog, iledin.

⁴⁶ Agef fen, Jesus idi to fedin, “Ere nigin

mulaī wenēgef? Ā kisi fiya bun to kuku gouf nigin fafāg fen, kosēg.”

Jesus Dirounen

(Matyu 26:47-56; Mak 14:43-50; Jon 18:3-11)

⁴⁷ Jesus fau wogō ye mog, tamo musei disin, tuwelf in dō fiya tar idi anī atun taka, Judas dedig inim uyu iroukenēdin. Ī Jesus umā fiyēf nigin non ilen. ⁴⁸ Anī ere, Jesus ĩ to fiyen, “Judas, ō umāya bunem Tamo Naal kiwai wenēf de?”

⁴⁹ Sain Jesus nē dō fiya tar, ereb wō you fenē age fe di, dile fen, idi diron, “Odug, amā nemā dimig nem madenauf de?” ⁵⁰ Age de fen, idi takam, pris mudur ado nē ferfer weder biyalē anī salōf iran.

⁵¹ Anī ere, Jesus iron, “Baban enei to ago gouf!” Age ye fen, ĩ tamo anī nē weder kobūf fen, el fiyen.

⁵² Agef fen, Jesus, pris odudug, tempel lo fiya tamo neid uyu irouya geid, mudur adodo, ĩ nigin disin anī irokenēdin, “Ā bē tamo ounēgouf gen, ā dimig adodo seburer adodo usigef de?” ⁵³ Naa ganan, aya ā geid tempel bun tabodon, anī ere, ā aya bun imeī taka to unogen. Anī ere, eī āgenei sain, are gugum irouneik nigin.”

Pita Jesus Nigin Wa Fen

(Matyu 26:57, 58, 69-75; Mak 14:53, 54, 66-72; Jon 18:12-18, 25-27)

⁵⁴ Idi Jesus dale, diroune ken, pris mudur ado nē fō bun dirou dilen. Pita ĩ so rel fen, dumeid dō fen. ⁵⁵ Anī ere, sain idi fofomala atun yā kū de dibodon, Pita ĩg an weim dibodon, ⁵⁶ Kabī kayau momoul taka, Pita yā sirin ibod mog, ilen. Kayau momoul anī Pita lo fel fen, iron, “Tamo eneig ĩ geid.”

⁵⁷ Anī ere, Pita waf fen, iron, “Kayau, aya ĩ keleī sā.”

⁵⁸ Sain naal ile di, taka nem ĩ ile fen, iron, “Ōg idi neid taka.”

Anī ere, Pita iron, “Mou, aya sā!”

⁵⁹ Aua tekelei age fiya ile di, taka bagam ĩ nigin total iron, “Momoī bagai, tamo eneig ĩ geid diyon, ere nigin, ĩg Galili tamal.”

⁶⁰ Anī ere, Pita aiten yale iron, “Tamo, ō urok anī aya keleī sā!” Ī irō mog bagai,

* 22:37: Asaia 53:12

tataro kokorok yen. ⁶¹ Odug falei yel, Pita lo felen. Age fe di, Pita Jesus wogō fiyen anī nigin weder fokō yen, “Gama fau tataro kokorok yeya sã mog, ò aya nigin wa wo, towo wouf.” ⁶² Age fe di, ì mayarē ile fen, inã fatuk yalen.

Kusī Tamo Jesus Diselinen
(*Matyu 26:67, 68; Mak 14:65*)

⁶³ Tamo Jesus dirounen idi, ì diseline ken, wagī difiyen. ⁶⁴ Age dife fen, idi Jesus mala difofakel fen, to difiyen, “Kurō weis urokanamã! Aim ò inok?” ⁶⁵ Age de fen, idi kono fiya od musei dirokenen.

Jesus Juda Kaunsel Neid Kot Mala Bun Ifaren

(*Matyu 26:59-66; Mak 14:55-64; Jon 18:19-24*)

⁶⁶ We fele di, tamo kayau neid mudur adodo neid kaunsel, are pris odudug, lo ifelnēdiya tamo geid, weim guru de mog, Jesus idi gedin dirou dilen. ⁶⁷ Idi diron, “Ò Kristus ouf are, amã urokanamã.”

Anī ere, Jesus aitedin yale iron, “Aya ã arokeneif are, ã to momoi gouf, ⁶⁸ agef fen, aya ã to ayeifeg, ã to solog urōgouf. ⁶⁹ Anī ere, gama sain enei bunem ilauf ganan, Tamo Naal ì, Negur megeir ado ima biyalem ibodōf.”

⁷⁰ Age ye di, idi ganan to difiyen, “Age foug are, ò anī Negur Naal de?”

Ì aitedin yale iron, “Ã de urōgef, aya anī.”

⁷¹ Age ye di, idi diron, “Ere nigin ada, ì nigin od megeir fiya nigin tamo baban tamirēf? Ada ì sigoron bagai karī taul.”

23

Jesus Pailat Herod Ado Meleid Bun Ifaren

(*Matyu 27:1, 2, 11-26; Mak 15:1-15; Jon 18:28-19:16*)

¹ Age de fen, guru fiya ganan fã de, Jesus Pailat bun dirou dilen. ² Age de fen, idi mogo gariya dino, ì bouwa bun od du ken, diron, “Amã, tamo enei nemã tamo kayau ganan idegēya bunem sanen guri feid irou ile mog, mailen. Ì Sisa takis ifenēya nigin

katū fiyeid fen, ì yogo nigin aya Kristus, aya king yen.”

³ Anī nigin, Pailat Jesus to fiyen, “Ò Juda neid king de?” Jesus solof iron, “Are de yer, ò urok anī.”

⁴ Age ye di, Pailat ì, pris odudug, tamo kayau geid irokenēdin, “Aya tamo enei bou bun mosor taka to ailel.”

⁵ Anī ere, idi total dinon, “Ì Judia distrik ganan bun, in ifelnēya bunem tamo kayau waud yalen. Ì Galili an gariya ino fen, tokō fel eineg isin.” ⁶ Pailat anī karī ye fen, ì Galili tamal be anī to fen. ⁷ Pailat ì, Jesus Herod nē tano bun tamal yeya kelei ken, Herod gein sur fen, Herod ìg sain anī bun Jerusalem ibodon.

⁸ Herod Jesus ile fen, wau fatuk kulī yen, ere nigin, sain meluk bagai ì iley a nigin oron. Ì nigin karī yen nigin, Herod ì Jesus bun memelik tunī ilouf nigin age fen.

⁹ Herod Jesus musei bagai to fiyen, anī ere, Jesus taka to solof iron. ¹⁰ Pris odudug, lo ifelnēdiya tamo geid an difaren, ì bou bun od total bagai dinon. ¹¹ Age dife di, Herod yogon kusī tamo geid, Jesus kasã difiye ken, kono difiyen. Age dife fen, kolos biya difounne ken, Pailat wagen sur difiyē di, kel ilen. ¹² Naa anī bun, Herod Pailat ado nigal dun, uruwa bun idi uruwom kiwain.

¹³ Pailat ì, pris odudug, mudur adodo, tamo kayau geid iweigneid fen, ¹⁴ irokenēdin, “Ã tamo enei, tamo kayau waud yale fen, sane nigin weleid inon ge fen, waleg, urou usigel. Aya ã meleī bun to afiyem, anī ere, ã ì bou bun od unogen anī, tamo enei bun gariya taka to ailel. ¹⁵ Herod ìg age fiya, anī nigin, ì kel sur fe di, ada gein isil. Anī ulogouf, ì yukesiya nigin ereb sane taka to age fen. ¹⁶ Anī nigin, aya darau dogol afen ken, atornēf.”*

¹⁸ Anī ere, idi sigoreid takai fen, diweig diron, “Tamo enei ukesiyouf! Barabas walis kanamã!” ¹⁹ (Barabas ì anī taun oun kusī yales fen, tamo yukesin nigin, kalabus bun dinenen.)

²⁰ Pailat, Jesus yalisnēya nigin baban total bagai irokenēdin. ²¹ Anī ere, idi baba

* **23:16:** Itotoya tunī eig de ditoton: atornēf.” ¹⁷ Gama ì, kalabus bun tamal tamo taka, Sifa bun yalis kenēdiyouf bagai.

baban diweig diron, “Aa tetek bun ūf! Aa tetek bun ūf!”

²² Age de di, Pailat ī irō, towo fen sain bun anī irokenēdin, “Ere nigin? Tamo enei, ere mosor inon? Aya ī yukesiya nē gariya anī, ī bun taka to ailel. Anī nigin, aya ī darau afen ken, atornēf.”

²³ Anī ere, idi aiteid odudug fen, ī aa tetek bun yūf nigin, baba baban dirokenen. Age dife di, dogo neid aitedim, Pailat nē od lai difiyen. ²⁴ Anī nigin, Pailat, nedi oroya dō fiya nigin kisi yale fen, irokenēdin. ²⁵ Pailat ī, tamo kusī yales fen, tamo yukesi di, kalabus bun dinenen ī nigin tamo kayau to difiyen anī, yalisne ken, dogo neid oroya dō difouf nigin Jesus ifenēdin.

Jesus Aa Tetek Bun Dun

(Matyu 27:32-44; Mak 15:21-32; Jon 19:17-27)

²⁶ Idi Jesus dirou dile fen, Simon Sairini tamal, ī yogon fonom isi mog, luwen ī dale, aa tetek orowa se dife di, faali fe, Jesus dō fen. ²⁷ Tamo kayau musei, kayau idi ī nigin waud gudūf fen, inā dalen geid, dō difiyen. ²⁸ Anī ere, Jesus idi bun falei yel, idi irokenēdin, “Jerusalem nē barai tar, aya nigin inā to waleg, ā aug nigin ado gereī tar nigin inā waleg. ²⁹ Ere nigin, sain fau isiyouf bun, idi dirōf, ‘Kayau dali, kayau fau kesu gō fiya sã, kayau kesu su ifenēya sã anidi el fedif!’ ³⁰ Age de fen, “‘idi arei dirokenēdiyof, “Teteman kukug!”

arei mudu dirokenēdiyof, “Kerub wamãg!”>*

³¹ Tamo, aa mata mog, enei age difedif are, meti youf sain bun, ere wō youf?”

³² Lo wal fiya tamo uru idig, ī geid laa bun dinenēdiyof nigin dirou dilen. ³³ Sain idi modoū yana Mudur Tuwan dedig wō de fen, an Jesus aa tetek bun dun, lo wal fiya tamo uru geid, taka biya melem, taka ki melem. ³⁴ Age dife di, Jesus iron, “Dei, idi neid mosor nigin weder tu kel, ere nigin, idi keleī sa ken, enei age difef.” Age fe di, idi aisã kodē de fen, yogon kolos idi atun foifu difen.

* **23:30:** Hosia 10:8

³⁵ Tamo kayau difar fen, lo difeid mog, mudur adodomeg ī kasã difiyē diron, “Ī tunī isennēdin, ī Kristus Negur igirnen ouf are, utornēg len, yogo bouwa isennēf.”

³⁶ Kusī tamog dise fen, diselinen. Idi wain makik ado difen ken, ³⁷ diron, “Ō Juda neid king ouf are, ogo boū usennēf.”

³⁸ Ī muduren itotoya eig ya yenen: EĪ JUDA NEID KING.

³⁹ Lo wal fiya tamo aa tetek bun difaren anī takam, Jesus kono fiyē iron, “Ō Kristus ouf are, ō ogo usenne ken, amã usennamãf!”

⁴⁰ Anī ere, lo wal fiya tamo taka im, ne tã ou fiye ken, iron, “Ō kafī fiya tekelei walef, anī ere, ō Negur to kumī wiyek de? ⁴¹ Ada urom darau talef, are de, ere nigin, ada urom sane age tafen anī mala solo. Anī ere, tamo enei ereb sane to age fen.”

⁴² Age ye fen, ī Jesus irokenen, “Jesus, sain ō ogon tano bun usel fen, aya karī wiyalauf.”

⁴³ Age ye di, Jesus tamo anī irokenen, “Aya ō momoi arokonok, gama ō aya ado paradis bun tabodōf.”

Jesus Laa Fen

(Matyu 27:45-56; Mak 15:33-41; Jon 19:28-30)

⁴⁴ Gaa atun tuwelf kilok age fiya bun, teneub ganan bun gugum kelef ile, tri kilok aragaun, ⁴⁵ ere nigin, gaa mala ifoke-len. Age fe di, tempel nē gabar anī atusil serek fe, uru wō yen. ⁴⁶ Jesus ait odug nem iweig iron, “Dei, neu uur ō imã bun anof.” Agef iro ken, ī oboi irour yalen.

⁴⁷ Kusī tamo neid orowa, Jesus age fiya ile fen, Negur yana yales iron, “Momoi, tamo eī madur tamo.” ⁴⁸ Tamo kayau ganan idi lo fiya nigin guru difen, ereb anī wō ye di, meledim dilen, are idi waud gudūf fen, akoreid du ken, fragagaū difen. ⁴⁹ Anī ere, idi Jesus keleī anidi ganan, idi atun kayau Galilim ī dō de disin anidig, so del difar fen, eneidi wō ye di, lo difen.

Jesus Mū Difen

(Matyu 27:57-61; Mak 15:42-47; Jon 19:38-42)

⁵⁰ Tamo taka yana Josef, ï kaunsel taka, madur tamo biya bagai, ⁵¹ anï nigin, ï idi neid tobonuneid ado od difon anï nigin to yo yen. Ï Judia distrik bun Arimatea taun tamal, ï Negur nê tano isiyouf anï tari fen. ⁵² Josef ï, Pailat gein ile, Jesus bou buru yalouf nigin to fiyen. ⁵³ Agef fen, ï Jesus bou buru yale, irou isil, gabar lalau nem silef fen, matmat sa bun ku dalen an inenen, ku anï bun an taka to dinenen. ⁵⁴ Naa anï dodok fiya naa, Sabat naa mogo gariya inou fenê melsã.

⁵⁵ Kayau Jesus geid Galilim disin, Josef dõ de, matmat ado, Jesus bouwa buru naig de dinof anï, lo difen. ⁵⁶ Age difel fen, idi fonõ dile, bou wã fiya nê marasin ado moul sumeï biya bagai dodok difen. Anï ere, idi Sabat naa nigin ïtäfiya dõ de fen, si dinon.

24

Jesus Mata Kel Fã Yen

(Matyu 28:1-10; Mak 16:1-8; Jon 20:1-10)

¹ Uub nê naa matu bun* bonimeï bagai mumurei ado, kayau idi, bou wã fiya nê marasin dodok difen anï dale fen, matmat bun dilen. ² Age dife fen, idi matmat bun meein wele feleya dilen. ³ Anï ere, sain idi meku namen dilen, idi Odug Jesus nê bouwa buru an to dilen. ⁴ Idi enei nigin kisi musei dale mog bagai, tamo uru kolos medeïya barikã siridin difaren. ⁵ Age dife di, kayau kumï de fen, kususu de, teneub lo difen, anï ere, tamo idi kayau dirokenëdin, “Ã ere nigin laa atun mata tamo umirnëgef? ⁶ Ï ein sã, ï mogo fã yel! Ï Galili oun ã geid ubodõg fen, irokenein anï, wedereï fokõ youf, ⁷ ï iron, “Tamo Naal mosor adodo imeid bun dino di, ï aa tetek bun dukesiyouf, age dife di, naa towo bun, ï baban mata kel fã youf.” ⁸ Age de di, kayau idi, in od anï wedereid fokõ yen.

⁹ Sain idi matmat bunem ke de, disi fen, aposel ilewen tunï ganan geid, enei ganan wogõ difiyëdin. ¹⁰ Kayau idi are Maria Magdala tamal, Joana, Maria Jems nê sina. Kayau anidi, kayau tunïg geid, enei aposel wogõ difiyëdin. ¹¹ Anï ere, idi kayau nigin

to momoi den, ere nigin, kayau neid od, idi bun auya gen. ¹² Anï ere, Pita fã yale, matmat bun gudu re ilen. Ï ku bun itin, gabar lalau dogol yen mog, ilen, agef fen, erab anï wõ yen anï nigin, ï kisi musei yalef ile, yogon fõ bun ilen.

Emaus Naab Luwen *(Mak 16:12, 13)*

¹³ Naa de anï bun, idi neid tamo uru, fonõ taka yana Emaus dilen, Jerusalem anenem Emaus are ilewen kilomita age fiya. ¹⁴ Idi urom, erab erab ganan wõ yen anï abob dirokenek dilen. ¹⁵ Idi eneidi nigin diro ken, katõ de dile mog, Jesus yogo isi, weim diyok dilen. ¹⁶ Anï ere, idi Jesus keleïya nigin meleid ifofakelen.

¹⁷ Age dife di, Jesus idi to fedin, “Ã ere nigin naab luwen katõ ge usigef?” Idi dë del fen, idi neweid wau gudũ fiya ado agogon delen. ¹⁸ Idi taka yana Kleopas Jesus solof irokenein, “Õ ege Jerusalem nê ki tamo nigin, naa eneidi bun an erab erab wõ yen anï, õ keleï sã de?”

¹⁹ Age ye di, Jesus idi irokenëdin, “Ere bagai?” Idi Jesus dirokenein, “Jesus Nasaret tamal nigin. Ï profet taka, Negur ado tamo kayau ganan meleid bun, od ado tobonunã bun megeir barikã. ²⁰ Pris odudug, neda mudur ado idim, ï laa bun dinenëf nigin imeid bun dino di, aa tetek bun dukesin. ²¹ Anï ere, amã waumã iron, im anï Israel tamo kayau kel gei fouf maun. Anï dogol sã, enei ganan wõ yen are, gama naa eneim mogo naa towo ilef. ²² Takag, amã nemã kayau tunïg, amã terë difamam. Gama bonimeï bagai, idi matmat bun dilel, ²³ anï ere, idi yogon bouwa buru to dilel. Idi dile, meleid seleulã kurãf fen, engel diledin, engel idi dirokenëdil, Jesus ï mata ibodok, difiyëdi di, disi, amã dirokanamam. ²⁴ Age de di, amã tunï matmat bun dile, kayau wogõ del gen bagai dilel, anï ere, idi Jesus to dilel.”

²⁵ Jesus idi irokenëdin, “Ã neneya bagai, ã profet wogõ den anï ganan, wauï bun momoiya nigin folo reya bagai! ²⁶ Kristus ï darau enei yale fen, yogon fula fiya medeïya namen to ilauf de?” ²⁷ Age ye

* **24:1:** Are Sande.

fen, ï Moses ado profet ganan neid itotoya bunem gariya ino fen, yogo nigin Negur nē Itotoya ganan bun ibodok anī, idi faded fedin.

²⁸ Idi fonō dilef nē anī kelē difiye ken, Jesus tokō feleya nigin suma ino genen. ²⁹ Anī ere, idi total bagai dirokenen, “Amā geid tabodōf, ere nigin, gaa mogo kuru kelef, gugum irousif.” Anī nigin, Jesus idi geid dibodōf nigin namen ilen.

³⁰ Sain ï idi geid tebol bun dibod ken, ï bret yale, Negur de fiyē, mumāf fen, gariya ino ifenēdin. ³¹ Age fe di, idi meleid fara fele di, idi Jesus nigin kelein. Age dife di, ï idi meleid bun iminkelen. ³² Idi abob dirokenen, “Sain ï naab luwen wogō fada fen, Negur nē Itotoya faraf ifelnadal mog, ada namedan wauda to tōf yalel de?”

³³ Age de fen, idi fā de dale, kaisā bagai Jerusalem keku de dilen, an idi aposel ñlewen, tamo tunī idi geid, guru de difar mog, fotou difedi di, ³⁴ diron, “Are momoi! Odug fā ye fen, Simon bun wō yen.” ³⁵ Age de di, tamo uru ereb naab luwen wō yen ado, Jesus ï bret mumā fe di, idi Jesus nigin naig de kelein anī wogō den.

Jesus In Dō Fiya Tar Bun Wō Yen
(Matyu 28:16-20; Mak 16:14-18; Jon 20:19-23; Aposel 1:6-8)

³⁶ Idi fau enei nigin wogō de mog, Jesus yogo idi atun ifar fen, irokenēdin, “Wau inosiya ā ado ibodōf.”

³⁷ Idi baraũ mailef de fen, terē de fen, kumī den. ³⁸ Age dife di, Jesus idi irokenēdin, “Ere nigin ā wauī morō fef, ere nigin ā wauī bun kisi uru wō yef?” ³⁹ Aya imau yeu ado feleg. Eī aya yug bagai! Kobū wiyag fen, uleg. Baraũ ï aya bouwau ado, tuwau ado uleyagef gen sā, ï bou sā, tuwa sā.”

⁴⁰ Jesus enei iro ken, ï ima ye ado ifelnēdin. ⁴¹ Age fe di, idi waud kulīya ado terēya bunem, fau waud to momoi de di, Jesus idi to fiyēdin, “Ā ereb yōya nē taka ein tau ado?” ⁴² Idi gau yā tamal masak taka difenen, ⁴³ age dife di, Jesus gau yale, meledin yon.

⁴⁴ Jesus idi irokenēdin, “Enei are, aya fau ā geid tabodon sain bun arokenein. Ereb ereb ganan, aya nigin Moses nē Lo bun,

profet neid itotoya bun ado, Buk Sam bun ditoton anī ganan kisi falauf bagai.”

⁴⁵ Agef fen, Jesus idi Negur nē Itotoya keleī youf nigin, waud kā fenēdin. 4624

⁴⁶ ĩ idi irokenēdin, “Negur nē Itotoya bun eig ye irok: Kristus ï fau darau yale fen, laa bun tamal naa towo bun mata kel fā youf, ⁴⁷ age fe di, wau faleiya ado, mosor nigin weder tu keleya nē od anī, fau ï yana bunem teneub ganan bun, Jerusalem anenem gariya dino fen, wogō de dilauf. ⁴⁸ Ā enei ulegen nigin kurō walaisi gouf. ⁴⁹ Aya esel fen, neu Dei sur afouf yen anī, ā bun sur afouf, anī ere, taun anī bun ubodōgef uleg, ā megeir saa ilun tamal anim ifounneif.”

Jesus Saa Ilun Iselen

(Mak 16:19, 20; Aposel 1:9-11)

⁵⁰ Sain Jesus idi gurif irou, Betani non dilen, an ï ima yales fen, el fiya ifenēdin.

⁵¹ ĩ idi el feid le fen, ï itornēdi di, saa ilun irou iselen. ⁵² Age fe di, idi ï yana dales fen, waud kulīya odug ado, Jerusalem ke de dilen. ⁵³ Age de fen, idi tempel bun toku dibod ken, Negur yana dalesedig.

Jon

Od Anī Tamo Wō Yen

¹ Gariya bun Od anī ibodon, Od anī Negur ado dibodon, Od anī Negur. ² Gariya bun ī Negur ado dibodon.

³ Ī bunem ereb ereb ganan inon, Od anī sã bun ereb inodin taka to ibodok. ⁴ Mata ī bun ibodon, mata anī tamo neid fula fiya. ⁵ Fula fiya anī gugum bun lalan ifenek, anī ere, gugum ī fula fiya anī to kelein.

⁶ Tamo taka Negurem sur fe di, isin, ī yana Jon. ⁷ Ī fula fiya anī yaor fe, kurō fesiyouf nigin isin, are tamo kayau ganan ī bunem momoi douf nigin age fen. ⁸ Ī anī fula fiya sã, ī fula fiya anī kurō fesiyouf nigin isin. ⁹ Fula fiya bagai yogo tamo kayau ganan lalan ifenēdif, ī tenebur isin.

¹⁰ Ī teneub bun ibodon, are ī bunem teneub inon, anī ere, tamo kayau tenebur ein, ī to kelein. ¹¹ Ī yogon bagai anidi bun isin, anī ere, yogon bagai anidi ī to daleyen. ¹² Anī ere, idi ī daleyen, ī yana nigin momoi den anidi bun, Negur idi Negur nē gere tar wowã douf nigin igirnēdin. ¹³ Sina tama nē naud bunem to Negur gere tar wowã den, bouwa nē oroya bunem sã, tamo nē wau irōya buneg sã, anī ere, Negur yogo age fe di, wowã den.

¹⁴ Od anī tamo wō ye fen, ada atun ibodon. Ada yogon fula fiya medeīya tailen, fula fiya medeīya are Naal Tekelei Yogo Dogol nē, ī Tama bun tamal wau ifenēya ado momoi barikã isin.

¹⁵ Jon ī nigin kurō falaisi wogō yen. Ī iweig fen, iron, “Ī enei nigin aya arokenein, ‘Taka ī aya dumeun isif, ī aya wal fiyaya, ere nigin, ī ket ibodon.’ ” ¹⁶ In wau ifenēya barikã bunem, ada adok el fiya tale fen, anī teten el fiya musei talen. ¹⁷ Are Moses bunem lo anī talen, anī ere, wau ifenēya ado momoi anī, Jesus Kristus bunem isin. ¹⁸ Taka nem Negur to bagai ilen, anī ere, Negur Naal Tekelei Yogo Dogol, ī Tama wagen ibod ken, ī nigin yaor fen.

* **1:23:** Asaia 40:3

Jon Naan Igunēdiya Tamo Ī Yogo Nigin, Aya Kristus Sã, Yen

(*Matyu 3:1-12; Mak 1:1-8; Luk 3:1-18*)

¹⁹ Juda tamo Jerusalem temeleid idim, pris tunī, Lewi nē ibor geid sur difedi di, Jon ī aim yeya anī to difiyē di, Jon ī eig ye kurō fesin. ²⁰ Ī wa fiya sã, kurō falaisi, “Aya Kristus sã,” yen.

²¹ Idi ī to difiyen, “Age fiyauf are, ò ai? Ò Eliya de?”

Ī iron, “Aya ī sã.”

Idi diron, “Ò Profet amã tari mafef anim de?”

Ī iron, “Sã.”

²² Age ye di, idi diron, “Ò ai bagai? Ò amã urokanamã len, idi amã sur difaman anidi gein ke ma malauf. Ò ogo nigin ere wof?”

²³ Jon profet Asaia nē od bun solof iron, “Aya anī, ait taka gerere tuan iweig irok, ‘Odug nē naab madur gouf.’ ”*

²⁴ Farisia tamo tunī sur difedin anidim ²⁵ to difiyen, “Ò Kristus sãf, Eliya sãf, Profet anī sãf are, ere nigin naan ugunēdif?”

²⁶ Jon aitedin yale iron, “Aya naan nem naan agunēdif, anī ere, ã atun, taka ã keleī sã anī ifaref. ²⁷ Ī anī aya dumeun dō fiyaf, aya to biya nigin, in ye su nē malū biru fediya kisi feleya sã.”

²⁸ Enei ganan Betani oun Jordan naan sitakã, Jon naan igunēdin nē an wō yen.

Jesus, Negur Nē Sipsip Naal

²⁹ Naa taka di, Jon, Jesus wagen iyok isi mog, ile fen, iron, “Ulegef, Negur nē Sipsip Naal, ī tamo ganan neid mosor yaleledif!

³⁰ Enei nigin au fen, oron, ‘Taka ī aya dumeun isif, ī aya wal fiyaya, ere nigin, ī ket ibodon.’ ³¹ Aya yug ī keleī san, anī ere, aya asi, naan nem naan agunēdif nē gariya are, Israel tamo kayau bun ī yaor foug nigin.”

³² Age ye fen, Jon enei kurō feis iron, “Aya, Awa Uur saa ilun tamal kuburir gen isi, ī bun ibod mog, ailen. ³³ Aya ī to kelein, anī ere, taka ī, aya naan nem naan agunēdiyof nigin sur fiyan im irokanan, ‘Tamo anī, Awa Uur isi, ī bun ibod mog, ulouf, im Awa Uur Fateul nem

naan igunēdiyof.’ ³⁴ Aya ailen nigin kurō afeis, ‘Eī Negur Naal,’ auf.”

Jesus In Dō Fiya Tar Uyulil Iweignēdin

³⁵ Naa taka di, Jon, in dō fiya tar uru geid, baban an difaren. ³⁶ Ī, Jesus isi ile di, ile fen, ĩ iron, “Ulegef, Negur nē Sipsip Naal!”

³⁷ Sain Jon nē dō fiya tar uru enei karī de fen, idi Jesus dō difiyen. ³⁸ Jesus falei yel, idi ĩ dō difiyē mog, ile fen, to fedin, “Ā ere oroyeik?”

Idi diron, “Rabi (anī nē gariya, Tise), ō nain ubodōdig?”

³⁹ Ī iron, “Umag fen, ulogouf.”

Age ye di, idi dile, ĩ ibodōdig anī dile fen, naa anī bun, ĩ geid dibodon. Are aragau fo kilok age fiya.

⁴⁰ Endru, Simon Pita ne tura ĩ, idi uru-wom ereb Jon wogō yen anī karī de fen, Jesus dō difiyen anī taka. ⁴¹ Erebu uruwa Endru age fen are, ĩ tura Simon imir ile fen, irokenen, “Amā Mesia (anī Kristus) fotou mafen.” ⁴² Age ye fen, Endru, Pita Jesus wagen irou ile di,

Jesus Pita lo fiye ken, iron, “Ō Simon, Jon naal. Ō yanā Sifas douf” (Sifas falei fiyauf are, Pita).

Jesus Filip Nataniel Ado Iweignēdin

⁴³ Naa taka di, Jesus Galili ileya nigin kisif fen, Jesus Filip fotou fiye ken, irokenen, “Aya dō wiya.”

⁴⁴ Filip ĩ, Endru Pita ado geid, Betsaida taun temeleid. ⁴⁵ Filip Nataniel fotou fiye ken, ĩ irokenen, “Amā ĩ nigin Moses nē Lo bun itoton ado profet idig ditoton, Jesus Nasaret tamal, Josef naal anī, fotou mafen.”

⁴⁶ Nataniel to fen, “Nasaret! Erebu biya taka, anenem wōya nigin kisi feleya de?”

Filip iron, “Usi ule.”

⁴⁷ Sain Jesus Nataniel non iyok isi mog, ile fen, ĩ nigin iron, “Eī Israel tamo bagai, ĩ bun ereb idegēya taka sã.”

⁴⁸ Nataniel Jesus to fiyen, “Naig wo fen, ō aya keleī?”

Jesus aiten yale iron, “Aya ō Filip iweignōya sã mog, aa fig farumen ubod mog, ailiyon.”

⁴⁹ Age ye di, Nataniel Jesus irokenen, “Rabi, ō Negur Naal, ō Israel neid King.”

⁵⁰ Jesus iron, “Aya ō aa fig farumen ailiyon aul nigin, ō momoi wof. Ō anī wal fiya ereb ereb odug ulouf.” ⁵¹ Ī tobol fe iron, “Aya ā momoi bagai arokeneik, ā, saa bobog kã fele di, Negur nē engel Tamo Naal bun diselef disif dife mog, ulogouf.”

2

Jesus Irō Di, Naan Wain Falei Felen

¹ Naa uru bure fele di, naa towo bun, tamo kayau ado bagu fiya, Galili distrik oun Kana fonō wō yen. Jesus sinag an ibodon. ² Jesus in dō fiya tar geid idig, tamo kayau ado bagu fiya bun di-weignēdin. ³ Sain wain sa kele di, sinam Jesus irokenen, “Idi wain taka sã.”

⁴ Jesus iron, “Kayau, ō ere nigin aya kababal wiyaf? Neu sain fau isiya sã.”

⁵ Jesus sina, kabī tamo irokenēdin, “Ereb ĩ irokeneif anī dōg, ago gouf.”

⁶ Nodin meein gulub sigis naan ifotūya nē difaren, are Juda neid tobonuneid bun imeid kulo fiya nigin, idi teke tekelei 100 lita age fiya naan iroudig.

⁷ Jesus kabī tamo irokenēdin, “Gulub bun naan utinēdig.” Age ye di, idi ditineid eweid gere fesedin.

⁸ Age difele di, Jesus idi irokenēdin, “Gama tunī lolob ge fen, sifa marau uroule kenēg.”

Age ye di, idi age difen. ⁹ Sifa marau naan wain falei fen anī yō ilen. Ī wain anī nainenem be isin anī to kelein, anī ere, kabī tamo naan lolob difen idi kelein. Agef fen, sifa marau ĩ, kayau marau yerin iweignē, ile di, ¹⁰ irokenen, “Ganan idi wain biya anī ket dirousi di, tamo disif idi anī fatuk dō mog, to biya gen anī dum dirousidig, anī ere, ō biya bagai urou ubodom anī, gama bagai urousif.”

¹¹ Jesus memelik gariya inon are enei bun, oun Galili distrik Kana fonō. Anī bun, ĩ yogon fula fiya medeīya yaor fe di, yogon dō fiya tar dogo neid momoiya ĩ bun dinon.

Jesus Tempel Waï Fen

(*Matyu 21:12, 13; Mak 11:15-17; Luk 19:45, 46*)

¹² Enei bure fele di, Jesus ī, sina, tura tar ado, yogon dō diya tar geid, Kapenaum disilen. An naa musei to dibodon.

¹³ Juda neid Pasa naa sain melsā mog, Jesus Jerusalem iselen. ¹⁴ Tempel modoū bun, tamo, bulmakau, sipsip ado, kuburir na sur difeid fen, tunīg tebol bun dibod ken, moni solo de mog, iledin. ¹⁵ Anī ile fen, ī malū nem wip inon, agef fen, tempel modoū bun tamal, sipsip ado bulmakau ganan irudi di, serē dilelen, ī moni solo fiya tamo neid koin moni daūf firagagaū fe fen, ī dogo neid tebol yale, falei feledin.

¹⁶ Idi kuburir na sur difen anī irokenēdin, “Eneidi ein waleledig, neu Dei nē fō anī maket modoū to unog!”

¹⁷ Dum in dō fiya tar, eig ye itotoya anī nigin wedereid fokō yen, “Ogon fō nigin wau itenēya anim nameun isainaf.”*

¹⁸ Age ye di, Juda tamo Jesus dirokenen, “Ere memelik anī ufelnamā di, enei ganan agof anī nigin ō igirīya ado mauf?”

¹⁹ Jesus idi irokenēdin, “Tempel enei narī weleg len, naa towo bun baban ale-sauf.”

²⁰ Juda tamo diron, “Tempel enei dinon are, foti-sigis yar yalen, anī ō naa towo bun walesauf de?” ²¹ Anī ere, tempel ī wogō yen are, yogo bouwa nigin. ²² Ī laa bunem kel fā yen anī bure fele di, in dō fiya tar, ī iron anī, wedereid fokō yen. Anī bunem, idi Negur nē Itotoya ado Jesus wogō yen anī nigin momoi den.

²³ Gama ī Jerusalem oun sain Pasa Sifa bun ibod ken, tamo kayau musei memelik inodin anī dilen, anī bun ī yana nigin momoi den. ²⁴ Anī ere, Jesus ī yogo bagai, idi nigin to momoi yen, ere nigin, ī tamo ganan nigin keleī. ²⁵ Jesus ī, tamo takam taka nigin ī irokenēya anī kisi feleya san, ere nigin, ereb tamo name bun ibodok, ī yogo keleī.

3

Jesus Nikodemus Ifelnen

* 2:17: Sam 69:9

¹ Farisia tamo taka, yana Nikodemus ibodon, ī Juda uyu irouya neid kaunsel taka. ² Ī bō Jesus wagen isi fen, iron, “Rabi, amā keleī, ō tise Negur bunem usin. Ere nigin, taka nem Negur ī ado to ibodōf are, memelik ō unodif anī inodiya kisi feleya sā.”

³ Jesus aiten yale iron, “Aya ō momoi bagai arokonok, taka nem Negur nē tano to ilouf, ī baban mata gō fiyēf dogol.”

⁴ Nikodemus Jesus to fiyen, “Tamo ī biyan anī, sina naig fe baban gō foug? Momoi bagai, ī sina namen baban ile di, gō fiyēya kisi feleya sā!”

⁵ Jesus solof iron, “Aya ō momoi bagai arokonok, taka ī, naan ado Awa Uurem mata to wō youf are, ī Negur nē tano bun ileyā kisi feleya sā. ⁶ Bouwam gō fef are, bouwa nē, anī ere, Awa Uurem gō fef are, uur nē. ⁷ Ō neu od eig au wogō auf bun, kisi to gurū wouf, ‘Ā de baban mata wō goug.’ ⁸ Yau in oroya bun isi iledig. Ō ait dogol karī wodig, anī ere, ō nainenem isif be, nain be ilef, to keleī youf. Ganān idi Awa Uurem gogū fedif are, age fiya bagai.”

⁹ Nikodemus Jesus to fiyen, “Are naig fe, agef wō youf?”

¹⁰ Jesus iron, “Ō Israel neid tise, anī ere, ō enei to keleik de? ¹¹ Aya ō momoi bagai arokonok, ereb amā keleī anī wogō mauf, age ma fen, ereb amā mailen anī kurō mafesif, anī ere, tamo kayau ā fau amā nemā od to walegef. ¹² Aya ā ereb tenebur tamal nē anī wogō ayeik, anī ere, ā to momoi gef, saa ilun tamal nē anī wogō ayeifeg, naig ge momoi goug? ¹³ Aibem taka saa ilun to iselen, Tamo Naal saa ilunem isin yogo dogol. ¹⁴ Moses gerere tuan gogour yalesen, age fiya bagai, Tamo Naaleg age de dalesnēf. ¹⁵ Are ganān idi ī nigin momoi def, mata faimud ibodkeleya adouf nigin.

¹⁶ “Negur, tamo kayau teneub enei bun ganān nigin fatuk wau laa fen nigin, yogon Naal tekelei bagai anī ifenēdin, are taka ī, ī nigin momoi youf are, to fō yalauf, mata faimud ibodkeleya adouf nigin age fen. ¹⁷ Negur ī, yogon Naal teneub enei bun, tamo kayau es fediya nigin to sur

fen, ï bunem tamo kayau teneub enei bun, kel gei foug nigin sur fen. ¹⁸ Taka, ï nigin momoi yef are, to es fiyek, anï ere, taka, ï nigin momoiya sã are, ï mogo es fiya bun ifaref, ere nigin, ï Negur Naal tekelei bagai yana nigin to momoi yen. ¹⁹ Foi fiya eig fiya, fula fiya teneub enei bun mogo isin, anï ere, tamo idi dogo neid tobonuneid sane nigin, fula fiya ditor ken, gugum nigin waud laa fen. ²⁰ Tamo idi sane age difef are, lalan to orodidig, ere nigin, dogo neid tobonuneid sane anï yaoreya kumï de fen, lalan namen to disiyouf. ²¹ Anï ere, aib taka ï momoi bun age fef, lalan namen isidig, age fe di, ereb ï age fen are, Negur bunem age fen anï, yaor dilouf.”

Jon Naan Igunëdiya Tamo, Jesus Nigin Kurō Fesin

²² Anï bure fele di, Jesus in dō fiya tar geid, Judia teneub bun dilen, an ï idi geid sain naal dibod ken, naan igunëdin. ²³ Joneg Ainon Salim non naan igunëdin, ere nigin, an naan musei bagai, anï nigin, tamo kayau naan igunëdiyof nigin toku disidig. ²⁴ (Are Jon fau kalabus bun to dinenë mog.) ²⁵ Jon nē dō fiya tar tuni, Juda tamo taka geid, dogo neid tobonuneid dō de fen, imeid kulo difedig anï nigin luwa diroun. ²⁶ Idi Jon wagen disi dirokenen, “Rabi, tamo ò uruwom Jordan naan sitakã ufareg fen, ï nigin kurō weis uron, ï naan igunëdif, age fe di, ganan ï bun dilef.”

²⁷ Jon solof iron, “Tamo ï, ereb saa ilun tamal ifenek anï dogol yalouf. ²⁸ Æ aug aya oron anï sã kurō walaisi gef, ‘Aya Kristus sã, anï ere, aya ï ket sur fiyan.’ ²⁹ Mois kayau are, mois tamo nē. Mois nē mou ï, bagu fiya bun ifar fen, karï fiyek, ï mois tamo nē ait anï karï ye fen, kulïya odug ado. Kulïya are neu, anï gama kisi felef. ³⁰ Æ yana odug iseles di, aya yanau tenebur isilauf.

³¹ “Taka ï ilunem isif, ï ganan wal fiya, taka ï tenebur tamal are, tenebur nē, anï nigin, tenebur nē anï wogō yedig. Taka ï saa ilunem isif, ï ganan wal fiya. ³² Ereb ï ilen ado karï yen anï, kurō falaisif, anï ere, yogon od taka nem to yalef. ³³ Taka ï yogon od yalen anim, Negur ï momoi bagai ye fen, anï megeir ifenen. ³⁴ Taka

ï Negurem sur fiyen are, ï Negur nē od wogō yef, ere nigin, Negur ï Awa Uur idikeleya sã ifenek. ³⁵ Tama ï Naal nigin wau laaf fen, ereb ereb ganan ï ima bun inon. ³⁶ Aib ï Naal nigin momoi yef are, mata gai ibodkeleya ado, taka ï Naal nigin itorok are, ï mata to ilouf, Negur nē didi ï bun ibodok.”

4

Jesus Samaria Kayau Ado Wogō Den

¹ Jesus Jon wal fiye ken, in dō fiya tar musei geif naan igunëdif ya anï, Farisia tamo karï den. ² Anï ere, momoi bagai Jesusem naan igunëdiya sã, are in dō fiya tar anidim. ³ Sain Odug enei kelei ken, ï Judia distrik itor ken, baban Galili kel ilen.

⁴ Gama ï Samaria atu ilauf. ⁵ Anï nigin, ï Sikar taun oun Samaria, Jakop, ne naal Josef teneub kulu ifenen non, iyok isin. ⁶ An Jakop nē naan ifotokon tutuwō ibodon, Jesus naab meluk iyok isi, tuwa yu keles di, naan ifotokon tutuwō sirin ibodon. Are mogo gaa atun age fiya.

⁷ Agef mog, Samaria kayau taka naan ifotūya nigin isi di, Jesus kayau irokenen, “Aya naan tau wana di, æf.” ⁸ (In dō fiya tar, taun saaf na yaleya nigin dilelen.)

⁹ Samaria kayau Jesus irokenen, “Ò Juda tamo di, aya Samaria kayau. Naig fe di, ayam ò naan afon, wãf nigin to wiyaf?” (Juda tamo kayau idi, Samaria tamo kayau geid to yu katō difedig.)

¹⁰ Jesus kayau irokenen, “Ò safina ege luwa Negur ifonok ado, aibem naan nigin to yok anï keleim are, ò ï to wiyē di, mata ifenēya nē naan anï ifonom.”

¹¹ Kayau iron, “Odug, ò ifotūya nē safina sã, naan ï ilon bagai. Ò mata ifenēya nē naan are nain walouf? ¹² Tamamã Jakop naan ifotok kanama ken, ï yogog gere tar ado gaareg anï bun don, ò ï wal fiya de?”

¹³ Jesus kayau aiten yale iron, “Ganan naan enei doko, idi baban naan ail fediyouf. ¹⁴ Anï ere, taka ï aya naan anï afenē di, yoko, ï baban to bagai naan ail foug. Naan aya ï afenek, warur naan ï namen faimud ulō yef yenē di, anim mata gai ibodkalauf.”

¹⁵ Kayau Jesus irokenen, “Odug, naan enei wanauf, ago di, aya baban naan ail to fiya fen, naan enei bun ifotūya nigin toku ein to kelauf.”

¹⁶ Ī kayau irokenen, “Ule, ogon tamo uroken ken, kel usig.”

¹⁷ Kayau iron, “Aya tamo sā.”

Jesus kayau irokenen, “Ō tamo sā wof are, ō tutuk urok. ¹⁸ Ere nigin, ō mogo tamo faif adon, tamo gama ō ado are, ogon aiwā sā. Ō ogo urom, are momoi bagai.”

¹⁹ Kayau iron, “Odug, aya ō ailiyok, ō profet taka. ²⁰ Amā tamamā tar, arei enei bun Negur yana dalesedig, anī ere, Juda ā urōgedig, Negur yana yaleseya modoū are oun Jerusalem dogol.”

²¹ Jesus kayau irokenen, “Kayau, aya momoi wiya, sain fau isi di, baban arei enei bun ado, Jerusalemeg an, Dei yana to walesagauf. ²² Samaria ā, ereb ā keleī sā anī yana walesegedig, amā ereb amā keleī anī yana malesedig, ere nigin, tamo kayau kel yaleya nē are, Juda ibor bun tamal. ²³ Sain isiyouf are, gama mogo yeir isil, Negur momoi bagai yana dalesedig are, uur ado momoi bunem Dei yana dalesauf, ere nigin, idi age fediya anī Dei ĩ imirnēdif. ²⁴ Negur ĩ uur, anī nigin, ĩ yana dalesedig idi, uur ado momoi bunem, yana dale-sauf.”

²⁵ Kayau iron, “Aya keleī, Mesia (Kristus dedig) fau isif. Ī isiyouf sain bun, ereb ereb ganan faded famāf.”

²⁶ Age ye di, Jesus kayau irokenen, “Aya inim yeir od ayok.”

Jesus Nē Dō Fiya Tar Keku De Disi, Jesus Geiden

²⁷ Agef mog bagai, in dō fiya tar keku de disī, Jesus kayau anī ado od de mog, dileid fen, terē den. Anī ere, taka nem to, to fiyen, “Ō ere oroyok?” be “Ō ere nigin ĩ ado od gef?”

²⁸ Kayau, ne naan gulub itor yen, taun kel ile, tamo kayau irokenēdin, ²⁹ “Umag, tamo taka, aya ereb ereb ganan age afef asin irokanal anī uleg. Ī anī Kristus be.”

³⁰ Idi taun ditor disī, Jesus garan dilen.

³¹ Age de mog, in dō fiya tar Jesus total bagai dirokenen, “Rabi, ereb taka wō.”

³² Anī ere, ĩ idi irokenēdin, “Aya saaf ā keleī sā anī āf nigin ado.”

³³ Age ye di, in dō fiya tar abob diroke-nen, “Taka nem mogo saaf irousi ifenem de?”

³⁴ Jesus iron, “Neu saaf are, aya sur fiyan in oroya dō afe fen, in kabī bure afalauf anī. ³⁵ Ā eig ge to urōgedig de, ‘Ogō fo bure fele di, kusu fiya sain wō youf?’ Aya ā arokeneik, meleī fara weleg fen, kabī onoudi ulogouf! Idi mogo kusu fiya nē mayo bure felen. ³⁶ Kusu fiya tamo ĩ gama mala solo yalef, ĩ gama mata faimud ibodkeleya nē biya kusus fef, anī bun, itenēya tamo ado kusu fiya tamo waud al fouf. ³⁷ Anī nigin, od enei momoi bagai, ‘Tamo takam itenēdig, tamo takam kusu fedig.’ ³⁸ Aya, ā kabī to walegen nē an, kusu fiya nigin sur ayein. Tunim kabī total dalen, anī ā idi neid maab mala anī kusu gen.”

Samaria Tamo Kayau Musei Momoi Den

³⁹ Samaria tamo kayau, taun anī bun temeleid musei, ĩ nigin momoi den, ere nigin, kayau anī eig ye kurō fesin, “Ī ereb ereb ganan age afef asin anī irokanal.”

⁴⁰ Anī nigin, Samaria tamo kayau ĩ gein disī, ĩ idi geid dibodōf nigin total bagai dirokenē di, ĩ naa uru, idi geid dibodon.

⁴¹ In od bunem, musei fau fau momoi den.

⁴² Idi kayau anī dirokenen, “Amā ogon od bun dogol to momoi mauf, ere nigin, amā mug karī mau fen, amā keleī, tamo enei momoi bagai teneub ganan enei nē Isennēya.”

Jesus, King Nē Kabī Mudur Naal El Fiyen

⁴³ Naa uru bure fele di, Jesus Galili ilen.

⁴⁴ Jesus ĩ yogo iron, ‘Profet taka, yogon fō gariyan, ĩ yana sā.’ ⁴⁵ Sain ĩ Galili wō yen, Galili tamo kayau ĩ daleyen. Idi Jerusalem Pasa Sifa bun, ĩ ereb ereb age fen ganan dilen, ere nigin, idig an weim difaren.

⁴⁶ Ī baban Galili distrik oun Kana fonō ki fen, kulu an ĩ naan wain falei felen. Sain anī bun, king nē kabī mudur taka nē naal Kapenaum taun an dagi yenen. ⁴⁷ Tamo enei, Jesus Judia distrik tamal Galili isin anī karī ye fen, ĩ Jesus gein ile, ne naal laa melsā yenen anī, isi el fiyēf nigin igonen.

48 Jesus ï irokenen, “Ã memelik uris ado anï to ulogouf are, ã to bagai momoi gouf.”

49 King nê kabï mudur iron, “Odug, neu kesu fau laa fiya sã mog, õ usiyouf.”

50 Jesus ï irokenen, “Õ wadã ule. Õ naal fau mata ibodõf.”

Tamo anï, Jesus nê od momoi ye fen, ilen. 51 Ì fau naab iyok ile mog, yogon ferfer ï fotou difiye ken, yogon kesu mata ibodok anï wogõ difiyen. 52 Age de di, ï gaa mala ganï bun, ne naal dagi karikan anï to fiyêdin. Idi ï dirokenen, “Bouwa uruwa, nor wan kilok aragau folõ fiye kelen.”

53 Age de di, tama ï kelein, sain anï bun bagai, Jesus irokenen, “Õ naal fau mata ibodõf.” Anï nigin, ï yogo, ne fõ tura tar ganan geid, momoi den.

54 Jesus Judia distrik bun tamalem Galili isi fen, memelik inon, are eneim anï uru.

5

Jesus Dagi Tamo Betesta Naan Kolili Fiyen El Fiyen

1 Dum, Jesus Judia neid sifa bun Jerusalem iselen. 2 Jerusalem an Sipsip Bobog non, naan kolili fiya taka Hibru od nem Betesta dedig ibodok, naan kolili fiya anï sirin meein torem fõ faif dinodin dibodok. 3 An dagi tamo kayau musei denenãdig, meleid ifofakeleya, yeid kirorõya, bouweid ilolaisidin.* 5 Difaren nê an, tamo taka dagi ado ibodok ile, teti-eit yar yalen. 6 Sain Jesus ï an yen mog, ile fen, ï sain meluk dagi ado an yenen anï kelei ken, ï to fiyen, “Õ biya leya oroyok de?”

7 Dagi tamo iron, “Odug, sain naan moyõ fe di, taka nem isenna di, naanũ isileya to ibodok. Aya asilauf au mog, taka ketem uyu wal fiya fen, isiledig.”

8 Age ye di, Jesus ï irokenen, “Fã wo! Ogon gogoũ wenêdig anï wale fen, uyok ule.” 9 Age ye di, tamo kaisã bagai dagi sa kelei di, ï yogon gogoũ yale fen, iyok ilen.

Anï wõ yen naa are, Sabat naa. 10 Anï nigin, Judia tamo idi, tamo dagi sa kelen

anï dirokenen, “Naa eï Sabat naa.† Õ ogon gogoũ irouya nigin lo katũ yef.”

11 Anï ere, ï aitedin yale iron, “Tamo ï el fiyal anim, ‘Ogon gogoũ wenêdig anï wale fen, uyok ule,’ fiyal.”

12 Anï nigin, idi ï to difiyen, “Tamo enei nanim, ‘Ogon gogoũ wale fen, uyok ule,’ yom?”

13 Tamo el fiyen, ï aib ya anï nene yelen, ere nigin, Jesus ï an guru difen anï namen iwaikelen.

14 Dum Jesus tamo anï tempel bun fotou fiye ken, irokenen, “Ulef, õ baban biya lel. Baban mosor to uno, are ereb sane bagai uruwa nê wal fiya anï, õ bun to wõ youf nigin.” 15 Tamo are ile, Judia tamo irokenêdin, ‘Aya el fiyal tamo are Jesus,’ yen.

Negur Naal Bunem Mata Ibodõya

16 Jesus Sabat naa bun enei age fedig nigin, Judia tamo idi ï morõ difenen. 17 Jesus idi irokenêdin, “Neu Dei ï faimud kabï yalef isi, gama naa enei buneg kabï yalef, anï nigin, ayag kabï alef.” 18 Jesus age yen nigin, Judia tamo idi ï dukesiyouf nigin kabï totol dalen, Sabat naa nê lo wal fiya bun nigin dogol sã, ï Negur nigineg neu Dei ye fen, aya Negur ado tekelei yen nigin.

19 Anï nigin, Jesus od enei idi irokenêdin, “Aya ã momoi bagai arokeneik, Naal ï yogon oroyam ereb taka to age fouf, ï Tama age fef anï dogol ile fen, ïg age fedig, ere nigin, ereb Tama age fef are Naaleg age fouf. 20 Tama ï Naal nigin wau laaf fen, ï ereb ereb age fedig anï ganan ifelnek. Ì ereb ereb enei wal fiya Naal ifelnêf, anï bun ã terê gouf. 21 Tama ï laa turï feid fen, mata ifenêdidig, age fiya bagai, Naal ïg aib ï orof anï mata ifenêdig. 22 Tama ï aib taka to es fiyêf, anï ere, ï es fiya kabï ganan Naal bun inon, 23 are tamo kayau ganan idi Temeid yana dalesedig gen, Naal nigineg yana dalesauf nigin ï age fen. Taka ï Naal yana to yalesef, ï Tamam Naal sur fiyen anï yana to yalesef.

* 5:3: Itotoya tunï eig de ditoton: ilolaisidin. Idi naan moyõ fouf nigin tari difedig. 4 Sain taka taka Odug nê engel taka isi, naan moyõ fedig. Taka ï moyõ mugu mugu ile fen, ï ket naanũ isilef, ï ereb dagi ado are el feledig. † 5:10: Sabat naa anï, Judia neid uub nê naa.

²⁴ “Aya ã momoi bagai arokeneik, taka ï neu od karï ye fen, aya sur fiyan ï nigin momoi yef, ï mata faimud ibodkeleya ado fen, es fiya bun to ilauf. ï laa bun tamal ibal fen, mata bun ilen. ²⁵ Aya ã momoi bagai arokeneik, sain fau isif, are mogo yeir isil, laa tamo Negur Naal nẽ ait karï douf, idi karï def anidi mata dibodõf. ²⁶ Tama ï yogo bun mata ado, age fiya bagai, ï mata de anï Naaleg adouf nigin ifenen. ²⁷ Agef fen, Tama ï Naal es fediyouf nigin megeir ifenen, ere nigin, ï Tamo Naal.

²⁸ “Eig fiya bun to terẽ gouf, sain fau isif, ganan nedi matmat bun dibodok idi, yogon ait karï de fen, ²⁹ ulolõ desiyouf, idi biya age difen anidi mata dibodõf nigin fafã douf, idi sane age difen anidi es fedidi, hel bun dilauf nigin fafã douf. ³⁰ Aya neu oroyam, ereb taka to naig be afouf. Aya karï auf kilei bagai, aya es afef, neu es fiya are madur bagai, ere nigin, aya yug nigin au fen, to age afedig, anï ere, aya sur fiyan ï wau al fouf nigin au fen, age afedig.

Jesus Yogo Nigin Kurõ Fesin

³¹ “Aya yug nigin aya mugu wogõ auf are, neu wogõya are, momoi be sã be anï yaor sã. ³² Taka ï aya nigin kurõ fesidig, agef fen, aya keleï, ï aya nigin kurõ fesif are momoi.

³³ “Ã Jon garan tamo tunï sur wedige di, ï aya nigin momoi od anï kurõ falaisi irokenẽdin. ³⁴ Aya tamom aya nigin kurõ fesif anï to aroudig, anï ere, aya ã isenneïf au fen, od anï wogõ aun. ³⁵ Jon ï lam futur fen, lalan ifenen, age fe di, ã sain tobega bagai waleg fen, in lalan nigin wauï al fen.

³⁶ “Neu kurõ fesiya anï Jon nẽ wal fiya, ere nigin, kabï aya bure afalauf nigin Dei ifanan alef anim, Dei ï aya sur fiyan anï kurõ fesif. ³⁷ Dei ï sur fiyan ï yogo, aya nigin kurõ fesin. ã ï ait to karï gen, nog to ulegen, ³⁸ in odeg ã bun to ibodok, ere nigin, ã sur fiyen anï ï nigin to momoi gedig. ³⁹ ã Negur nẽ Itotoya keleï youf nigin kabï total walegedig, ere nigin, ã kisi gef, anï bunem amã mata faimud ibodkeleya malef ge fen, ago gedig. Negur nẽ Itotoya enei, aya nigin kurõ fesif. ⁴⁰ Anï

ere, ã mata yaleya nigin, aya wageun isiya utorõgedig.

⁴¹ “Aya tamom yanau dalesauf nigin to orok, ⁴² anï ere, aya ã nigin keleï. Aya keleï, ã wauï bun Negur nigin wauï laa fiya to ibodok. ⁴³ Aya neu Dei yana bunem asin, anï ã aya to waleyagen, anï ere, aibem taka yogo yana bunem isif are, ã walogouf. ⁴⁴ ã abob yana yaleseya anï oroyei ken, yana yaleseya Negur Tekelei bunem isif anï to total unog walogouf are, ã naig ge momoi gouf?

⁴⁵ “Anï ere, ã ayam Dei mala bun ãgenei sane anï kurõ afesiyouf ge fen to kisig. ãgenei sane kurõ fesiya are Moses, ï bun ãgenei wauï iseya unogedig anï. ⁴⁶ ã Moses nigin momoi gem are, aya nigineg momoi gem, ere nigin, im aya nigin itoton. ⁴⁷ Anï ere, ereb ï itoton anï to momoi gef nigin, naig ge fen, aya wogõ auf enei nigineg momoi gouf?”

6

Jesus Faif Tausen Tamo Saaf Ifenẽdin (Matyu 14:13-21; Mak 6:30-44; Luk 9:10-17)

¹ Enei dumen, Jesus Galili Maaï ub sitakã ibal ilen (Galili Maaï anï, yana taka Taiberias Maaï). ² Age fe di, tamo kayau musei ï dõ difiyen, ere nigin, ï dagi tamo kayau bun memelik ino di, meledim dilen. ³ Agef fen, Jesus arein isel, yogon dõ fiya tar geid dibodon. ⁴ Juda neid sifa inoya Pasa naa melsã mog.

⁵ Sain Jesus mala irakel, tamo kayau musei ï garan disi mog, ileid fen, ï Filip irokenen, “Ada tamo kayau eneidi dãf nigin, bret nain na talouf?” ⁶ ï Filip kisi fiye ken, enei to fen, ere nigin, Jesus ï ereb age fouf nigin are ï keleï.

⁷ Filip Jesus aiten yalen, “Ogõ eit nẽ mala anim, idi mugu mugu nigin bret na talouf are, tunï to dõ dilouf.”

⁸ In dõ fiya tamo taka Endru, Simon Pita nẽ tura anï Jesus irokenen, ⁹ “Kesu taka yeir baali bret faif gau uru ado, anim musei ganen enei tau kisi falauf?”

¹⁰ Jesus iron, “Tamo kayau urokenẽdig len, dibod.” Modoũ anï bun fisir musei

ado, an tamo dibodadan faif tausen age fiya. ¹¹ Gama Jesus bret anī geif, Negur de fiye ken, idi dibodadan neid oroya kilei, anī gadō fedin. Ī gau buneg de age fen.

¹² Idi ganan dō kisi fele di, Jesus in dō fiya tar irokenēdin, “Tunī ditoraram anī kurug. To sekil fiyauf.” ¹³ Anī nigin, baali bret faif anī idi dokon, masak tunī ifaredin anī kuru dife di, karam tuwelf isokosedin.

¹⁴ Tamo kayau memelik inon anī dile fen, idi diron, “Momoi bagai, enei are Profet teneub enei bun isiyouf ya anī.”

¹⁵ Idi disi, Jesus king ibodōf nigin nugo difiyēf ya anī, ĩ kelei ken, baban mugu arein kel iselen.

Jesus Naan Teteatu Iyon (Matyu 14:22-33; Mak 6:45-52)

¹⁶ Gugumek isi di, yogon dō fiya tar daliyoun disilen. ¹⁷ An idi waag taka bun sosō de daliyou dibal fen, Kapenaum luwe dile mog, mogo gugumen, anī Jesus fau idi garan to isin. ¹⁸ Yau total isi di, maaī moloun wī yen. ¹⁹ Idi waag sur de dira ken, ful de dile, faif kilomita be, sigis kilomita age fiya mog, Jesus naan tetenem waag garan iyok isi mog, dile fen, kumī tererē den. ²⁰ Anī ere, ĩ idi irokenēdin, “Are ayam, to kumī wog.” ²¹ Age ye di, ĩ waag bun dalesnēf nigin waud yenen, kaisā bagai, idi dilauf nē waud iron ub anī bun, waag goro fen.

²² Naa taka di, tamo kayau daliyou ub sitakā difaren idi kelein, waag tekelei dogol an ibodon, anī Jesus in dō fiya tar geid to sō den, idi dogo dogol dilen. ²³ Waag tunī Taiberias temeleid, Odug, bret Negur de fiye ken, tamo kayau ifeneīd don modoū anī non, goro difen. ²⁴ Tamo kayau, Jesus in dō fiya tar geid an to dibodon anī kelei ken, idi waag sosō de fen, Jesus dimirnēf nigin Kapenaum dilen.

Jesus Mata Nē Bret

²⁵ Sain tamo kayau idi, daliyou sitakā Jesus fotou dife fen, idi ĩ to difiyen, “Rabi, ere sain ō ein usin?”

²⁶ Jesus aitedin yalen, “Aya ā momoi bagai arokeneik, ā aya umirnagef, ā memelik ulegen nigin sã, anī ere, ā bret

ifoutneī di, wōg eweī gere fen nigin. ²⁷ Saaf sane ledig anī nigin to kabī waleg, anī ere, saaf to sane le fen, mata faimud ibodkeleya bun ibodōdig anī nigin kabī waleg, are Tamo Naalem ifeneīf. Ī dogol Tama Negurem igrine ken, yoya nē megeir ganan ifenen.”

²⁸ Age ye di, idi ĩ to difiyen, “Amā Negur nē kabī malouf nigin, naig bagai mafouf?”

²⁹ Jesus solof iron, “Negur nē kabī are yeir, Negurem sur fiyen ĩ nigin momoi gouf.”

³⁰ Anī nigin, idi ĩ to difiyen, “Ere memelik bun uris wanamā di, mail fen, ō momoi mayōf? Ere anī ō unouf? ³¹ Amā nemā tubumā tar gerere tuan mana don, Negur nē Itotoya bun eig ye yenek kilei, ‘Ī idi saa ilun tamal bret dāf nigin ifenēdin.’* ”

³² Jesus idi irokenēdin, “Aya ā momoi bagai arokeneik, Moses im bret saa ilun tamal to ifenein, anī ere, neu Dei ĩ yogo bret kaū bagai saa ilun tamal ifeneik.

³³ Ere nigin, Negur nē bret saa ilun tamal isi fen, teneub enei mata ifenek.”

³⁴ Idi diron, “Odug, gama ilauf enei bun bret anī wanamā.”

³⁵ Jesus idi irokenēdin, “Aya anī mata nē bret. Taka ĩ aya bun isif, to bagai naū ilauf, taka ĩ aya nigin momoi yef, to bagai naan ail fouf. ³⁶ Anī ere, aya ā arokenein kilei, ā mogo uleyagen, anī fau to momoi gef. ³⁷ Idi ganan Deim ifanaf, aya bun disiyouf, taka ĩ aya bun isif, aya to bagai aruwauf. ³⁸ Aya saa ilun tamal asin, aya neu oroya dō afouf nigin sã, anī ere, aya sur fiyan nē oroya dō afouf nigin. ³⁹ Aya sur fiyan nē oroya are yeir, idi ganan ĩ ifanan taka to folō afalauf, anī ere, aya idikeleya naa bun alesnēdiyof. ⁴⁰ Neu Dei nē oroya anī, taka ĩ Naal ile fen, ĩ nigin momoi yef, mata faimud ibodkeleya yalouf, idikeleya naa bun aya alesnēf.”

⁴¹ Od enei Juda tamo karī de fen, ĩ nigin nauseir den, ere nigin, Jesus iron, “Aya bret saa ilun tamal asin.” ⁴² Idi diron, “Eī Jesus sã de? Josef naal, in sina tama ado ada keleī. Naig fe di, ĩ irok, ‘Aya saa ilun tamal asin?’”

* **6:31:** Eksodas 16:4; Nehemaia 9:15; Sam 78:24, 25

⁴³ Jesus solof iron, “Ã aug to nauseir gouf. ⁴⁴ Taka yogon oroyam, aya wageun isiya kisi feleya sã, anĩ ere, Dei aya sur fiyan inim, ĩ namen kabĩ yale fen, aya garan irou isiyouf. Age fe di, idikeleya naa bun, aya ĩ alesnëf. ⁴⁵ Profet neid itotoya bun eig ye yenek, ‘Idi ganan Negurem ifelnëdiyof.’† Taka ĩ Dei karĩ fiye ken, ĩ bun keleĩ yalef, aya bun isidig. ⁴⁶ Taka nem Dei to ilen, Negur bunem isin im dogol. ĩ yogo dogol Dei ilen. ⁴⁷ Aya ã momoi bagai arokeneik, taka ĩ momoi yef, mata faimud ibodkeleya ado. ⁴⁸ Aya mata në bret. ⁴⁹ Ægenei tubuĩ tar gerere tuan mana don, anĩ ere, idi gare den. ⁵⁰ Anĩ ere, bret enei saa ilun tamal isif, are tamo yãf, to laa fouf. ⁵¹ Aya mata ibodõya bret, are saa ilun tamalem isin. Taka ĩ bret enei yoko, ĩ mata faimud ibodõf. Bret enei aya bouwau, are teneub ganan bun, tamo kayau mata dalouf nigin afenëdiyof.”

⁵² Age ye di, Juda tamo dogo dogol fatuk bagai luwa diroun, “Naig fe fen, tamo enei yogon bouwau ifanada tãf?”

⁵³ Jesus idi irokenëdin, “Aya ã momoi bagai arokeneik, ã Tamo Naal në bouwau to wãgauf, in naud to wãgauf are, ã namein mata to ibodok. ⁵⁴ Taka ĩ neu bouwau yokon, neu naudou yoko, ĩ mata faimud ibodkeleya ado, anĩ aya fau idikeleya naa bun alesnëf. ⁵⁵ Ere nigin, neu bouwau are saaf bagai, neu naudou are naan bagai. ⁵⁶ Taka ĩ neu bouwau yokon, neu naudou yoko, ĩ aya nameun ibodok, aya ĩ namen abodok. ⁵⁷ Mata ibodõya Dei aya sur fiya di, aya Dei bunem mata abodok gen, taka ĩ aya yõyaf, aya bunem mata ibodõf. ⁵⁸ Bret enei saa ilun tamal isin. Ægenei tubuĩ tar mana don are gare desin, anĩ ere, taka ĩ bret enei yoko, faimud mata ibodkalauf.” ⁵⁹ ĩ od enei Kapenaum taun an, Juda neid uub fõ bun ifelneĩd fen, wogõ yen.

In Dõ Fiya Tar Musei Jesus Ditornen

⁶⁰ Od enei karĩ de fen, in dõ fiya tar musei diron, “Ifelnadaf eĩ total bagai. Aim anĩ keleĩ youf?”

⁶¹ In dõ fiya tar od enei nigin nauseir de di, Jesus anĩ keleĩ ken, idi irokenëdin, “Od

enei ã morõ ifeneik de? ⁶² Ba, Tamo Naal ĩ ibodon në kel isel mog ulogouf are, ã ere kisi gouf? ⁶³ Awa Uurem mata ifenëdig, bouwau are gorõ. Od aya wogõ ayein are Uur, od anĩ mata ifenëdig. ⁶⁴ Anĩ ere, ã tunĩ momoiya sã.” Ere nigin, Jesus idi nigin gariya bun kelein, aiyaim ĩ nigin to momoi den, aim ĩ nigin kiwai inouf. ⁶⁵ ĩ od tobol fe iron, “Anĩ nigin, aya od enei arokenein, Dei ĩ nigin wau to yalouf, ĩ aya bun isiya kisi feleya sã.”

⁶⁶ Od enei bunem, in dõ fiya tar musei keku den, baban Jesus to dõ difiyen.

⁶⁷ Jesus in dõ fiya tar tuwelf to fedin, “Æg aya utornag ulagauf de?”

⁶⁸ Simon Pita solof iron, “Odug, amã ai bun malauf? Õ mata faimud ibodkeleya në od ado. ⁶⁹ Amã momoi mau fen, keleĩ, õ anĩ Negur në Fateul.”

⁷⁰ Age ye di, Jesus idi irokenëdin, “Tuwelf ã ayam to agirnein de? Anĩ ere, ã atun taka are Satan.” ⁷¹ (ĩ Judas, Simon Iskariot naal nigin kisif fen, iron. Idi tuwelf anĩ taka Judas, fau dum Jesus kiwai ifenen.)

7

Jesus Salafat Në Sifa Bun Ilen

¹ Enei dumen, Jesus Galili an iyon, Judia distrik so fiyen, ere nigin, an Juda tamo ĩ dukesiyouf nigin ololo difen. ² Anĩ ere, Juda neid Salafat në Sifa naa melsã di, ³ Jesus tura tarem ĩ dirokenen, “Õ ein utor ken, Judia ulauf, ago di, ogon dõ fiya tar, memelik uno di, dilouf. ⁴ Tamo taka ĩ, tamo kayau meleid bun mala yaor wõ you fenë, ĩ iminëyan kabĩ to yaledig. Õ eneidi agof, õ ogo tamo kayau ganan ufelnëdiyof.” ⁵ ĩ yogon tura tar bagaig, ĩ nigin to momoi den.

⁶ Anĩ nigin, Jesus idi irokenëdin, “Aya neu sain bagai fau isiya sã, ã nigin sain ganan kisi feleya bagai. ⁷ Tenebur tamo kayau idi, ã to kiwai difeneik, aya nigin kiwai, ere nigin, ereb sane age difef anĩ kurõ afesidig. ⁸ Æ Sifa bun ulagauf, aya nigin fau Sifa enei bun to eselauf, ere nigin, neu sain bagai fau isiya sã.” ⁹ Jesus

† 6:45: Asaia 54:13

od enei wogō yel fen, Galili distrik an ibodon.

¹⁰ Anī ere, tura tar Sifa bun diselel mog, īg iselen, anī ere, mala yaor sã, iminēyan.

¹¹ Sifa bun, Juda tamo idi, ī nigin meleid dino fen, to difen, “Tamo are nain?”

¹² Tamo kayau atun, ī nigin fatuk bagai kosesē kurã den. Tunī diron, “Ī tamo biya.”

Tunī solo de diron, “Eo, ī tamo kayau idegnēdidig.” ¹³ Anī ere, taka nem ī nigin yaor to kurō fesin, ere nigin, idi Juda tamo nigin kumī den.

Jesus Sifa Bun Ifelnēdin

¹⁴ Sifa mogo atusil ifar mog, Jesus tempel modoū bun isel fen, od ifelnēdin.

¹⁵ Juda tamo idi terē de fen, diron, “Tamo enei tai fiya yaleya sã mog, naig fe fen, keleī eig fiya ado?”

¹⁶ Jesus solof iron, “Neu ifelnēya are neu sã, aya sur fiyan ī bunem isif. ¹⁷ Taka ī Negur nē oroya dō fiya nigin orof are, neu ifelnēya Negur bunem isif be, aya neu oroya nem wogō auf be anī, ī keleī youf. ¹⁸ Taka ī yogon kisim wogō yef are, ī yogo yana yaleseya nigin age fef, anī ere, taka ī sur fiyen nē yana yaleseya nigin kabī yalef, tamo are momoi nē. Ī bun idegēya taka sã. ¹⁹ Moses lo anī to ifenein de? Anī ere, ā atun, taka nem lo to dō fedig. Ere nigin ā aya unakesigouf nigin ago gef?”

²⁰ Tamo kayau solo de diron, “Ō kaa sane ado. Aim ō inokesiyouf nigin age fef?”

²¹ Jesus idi irokenēdin, “Aya memelik taka ano di, ā ganan terē gen. ²² Anī ere, Mosesem mulū ileyā ifenein nigin, ā kesu Sabat naa bun mulū ileyā wenēgedig (mulū ileyā are, Moses bunem to isin, teneub te bunem isin). ²³ Moses nē lo to wal gouf nigin, Sabat naa bun kesu nē mulū ileyā wenēgedig, ere nigin aya Sabat naa bun, tamo bou adok el afe di, ā aya nigin nameī sanedig? ²⁴ Mala yaor anī dogol uleg fen, to es gei, tutuk bagai el ge, es gei.”

Jesus Anī Kristus De?

²⁵ Sain anī bun, Jerusalem tamo kayau tunī diron, “Tamo enei are idi ī dukesiyouf nigin age difef anī sã de? ²⁶ Ī de yeir,

mal atun wogō ye di, ereb od taka to dirokenek. Mudur adodo idi, ī anī Kristus ya anī mogo tutuk keleī de? ²⁷ Anī ere, tamo enei nain be tamal, are amā keleī. Sain Kristus isiyouf, taka nem ī nainenem be isif to keleī youf.”

²⁸ Age de di, Jesus fau tempel modoū bun ifelneīd fen, iweig iron, “Are de, ā aya nigin keleī, aya nainenem asin are ā keleī. Aya ein neu oroyam to asin, anī ere, ī aya sur fiyan are momoi. Ā ī keleī sã, ²⁹ anī ere, aya ī keleī, ere nigin, aya ī bun tamal, im aya sur fiyan.”

³⁰ Od enei bun, idi ī dirounēf nigin age difen, anī ere, taka nem ī bun ima to inon, ere nigin, yogon sain fau isiya sã.

³¹ Anī ere, tamo kayau musei fau ī nigin momoi de fen, diron, “Sain Kristus isiyouf, ī memelik tamo enei inodif anī wal fiya inodiyouf de?”

³² Tamo kayau ī nigin age de, kosesē kurã de mog, Farisia tamo idi karī den. Age de fen, pris odudug Farisia geid, tempel lo fiya tamo Jesus dalouf nigin sur difedin.

³³ Jesus iron, “Aya ā geid sain modeg tabodok, age afe fen, aya ī aya sur fiyan bun alauf. ³⁴ Ā aya umirnagauf, anī ere, ā to fotou wiyagauf. Aya abodōf nē an, ā isiya kisi feleya sã.”

³⁵ Juda tamo abob dirokenen, “Tamo enei nari bagai ile di, anī ada ī to fotou tafouf? Ada neda tamo kayau firagagaū difen, Grik tamo kayau atun dibodok nē an, ī ile fen, Grik tamo kayau ifelnēdiyof de? ³⁶ Ere gariya nigin ī iron, ‘Ā aya umirnagauf, anī ere, ā to fotou wiyagauf. Aya abodōf nē an, ā isiya kisi feleya sã?’”

³⁷ Sifa naa odug idikeleya bun, Jesus ifar fen, iweig iron, “Taka ī naan ail fouf, aya bun isi fen, naan yāf. ³⁸ Taka ī aya nigin momoi yef, Negur nē Itotoya iron kilei, warur naan ī namenem ulō ulō yef yenēf.” ³⁹ Ī od enei Awa Uur nigin wogō yen, are idi Jesus nigin momoi den anidi fau dalouf. Sain anī bun, Awa Uur isiya san, ere nigin, Jesus fau fula fiya medeīya yaleya sã.

⁴⁰ Od enei karĩ de fen, tamo kayau tunĩ diron, “Momoĩ bagai, tamo enei Profet ada tari tafef anĩ.”

⁴¹ Tunĩ diron, “Ĩ Kristus.”

Tunĩg diron, “Kristus ouf are, naig fe fen, Galilim isiyouf? ⁴² Kristus Dawid nẽ ibor bunem, Betlehem taun Dawid ibodon nẽ anenem isiyouf, anĩ Negur nẽ Itotoya to irok de?” ⁴³ Anĩ nigin, tamo kayau Jesus nigin fara furu difen. ⁴⁴ Tunĩ Jesus ka difiyẽf nigin age difen, anĩ ere, taka nem ĩ bun ima to inon.

Juda Neid Mudur Adodo Momoiya Sã

⁴⁵ Tempel lo fiya tamo idi, pris odudug Farisia tamo gedin keku de dile di, to difedin, “Ere nigin ã ĩ to urou usigel?”

⁴⁶ Tempel lo fiya tamo solo de diron, “Taka nem, tamo enei wogõ yedig gen to wogõ yedig.”

⁴⁷ Farisia tamo solo de diron, “Ĩ ãg ideg-nein de? ⁴⁸ Mudur adodo Farisia tamo geid atun, taka ĩ nigin momoi yen de? ⁴⁹ Sã, anĩ ere, tamo kayau eneidi idi lo keleĩ sã, idi Negurem gelu fedif.”

⁵⁰ Nikodemus, idi neid taka, tetunem Jesus garan ilen, ĩ irokenẽdin, ⁵¹ “Ada neda lo bun, taka ĩ ereb age fef anĩ ileyã nigin ketem karĩ tafiye ken, es tafedig. Age fiya sã de?”

⁵² Idi solo de diron, “Õg Galili tamal de? Umir ken, fau keleĩ youf, profet taka Galilim to isif.”

[Itotoya tunĩ kulu bagai od gariya dino fen, ditoton anĩ bun, Jon 7:53-8:11 to ibodok.]

⁵³ Age de fen, idi mugu mugu dogo neid fonõ fonõ dilen.

8

¹ Anĩ ere, Jesus Moul Arei bun iselen. ² Bonimeĩ mumurei ado, ĩ baban tempel modoũ bun wõ yen, an tamo kayau ganã guru de salili difiyẽ di, ĩ ifelnẽdiyof nigin ibodon. ³ Lo ifelnẽdiya tamo Farisia tamo geid idi, kayau taka noli ye mog, dale dirou disi, guru fiya mala bun dinenẽ di, ifaren. ⁴ Age dife fen, Jesus dirokenen, “Tise, kayau enei noli tobonunã ino di, malel. ⁵ Lo bun, kayau age fediya meein tulu fiya nigin Moses irokanaman. Gama

õ ere wof?” ⁶ Idi ĩ bou bun od yũya nigin kor dino fen, age de, to difiyen.

Anĩ ere, Jesus obũ yeis fen, ima gegem teneub bun itoton. ⁷ Idi ĩ to difiyẽtu di, ĩ fã ye, saules fen, irokenẽdin, “Ã atun, aib taka ĩ mosor sãf, ĩ ketem kayau bun meein irãf.” ⁸ Baban ĩ obũ yeis fen, teneub bun itoton.

⁹ Idi od anĩ karĩ de fen, idi mugu mugu ul de, diyalelen, biyedim uyu dirou di, age de dile, Jesus kayau ifaren anĩ ado dogol ditornẽdin. ¹⁰ Jesus saules fen, kayau to fiyen, “Kayau, idi nai difef? Idi takam baban õ bun od to yuk de?”

¹¹ Kayau iron, “Odug, takam to age fef.”

Jesus iron, “Ayag õ boũ bun od to auk. Ule fen, sain enei ĩlauf ganã, mosor baban to uno.”

Jesus Nẽ Wogõya Are Momoĩ

¹² Jesus baban tamo kayau irokeneĩd fen, ĩ iron, “Aya tenebur enei nẽ fula fiya. Taka ĩ aya dõ fiyauf, ĩ gugum namen to bagai iyõf, anĩ ere, ĩ mata nẽ fula fiya adouf.”

¹³ Age ye di, Farisia tamo idi Jesus dirokenen, “Õ ogo nigin wogõ wof, anĩ nigin, ogon wogõya are, momoi be sã be anĩ yaor sã.”

¹⁴ Jesus solof irokenẽdin, “Aya yug nigin wogõ auf, anĩ ere, neu wogõya are momoi, ere nigin, aya nainenem asin, nain be alauf anĩ, aya keleĩ. Anĩ ere, ã, aya nainenem asin, nain be alauf anĩ, keleĩ sã.

¹⁵ ã tamo nẽ tobonunã bunem es gedig, aya aib taka to es afedig. ¹⁶ Anĩ ere, aya es afouf are, neu es fiya are tutuk, ere nigin, aya mugu sã. Aya Dei inim sur fiyan ado mafaref. ¹⁷ ãgenei Lo bun itotoya irok, tamo urom wogõ tekelei dinof, are momoi. ¹⁸ Aya yug nigin kurõ afalaisidig, age afe di, Dei aya sur fiyan ĩ, aya nigin kurõ fesidig.”

¹⁹ Age ye di, idi Jesus dirokenen, “Õ tamã nain?”

Jesus solof iron, “Ã aya nigin ado neu Dei nigineg keleĩ sã. ã aya nigin keleim are, neu Dei nigineg keleim.” ²⁰ ĩ tempel bun kolekta inoya nẽ modoũ non ifelneĩd fen, od enei wogõ fiyẽdin. Anĩ ere, takam

ĩ to ima ka fen, ere nigin, in sain fau isiya sã.

²¹ Jesus baban idi irokenēdin, “Aya atorņeĩ di, ã umirnagauf, agog fen, ã āgenei mosor bun gare gouf. Aya elef nē an, ã isiya kisi feleya sã.”

²² Anĩ bunem, Juda tamo idi diron, “Ĩ yogo bouwa yukesiyouf de? Anĩ nigin, ĩ, ‘Aya elef nē an, ã isiya kisi feleya sã,’ yef de?”

²³ Anĩ ere, Jesus tobol fe fen, irokenēdin, “Ã tenebur temeļeĩ, aya ilun temelou. Ã teneub enei nē, aya teneub enei nē sã.

²⁴ Anĩ nigin, aya, ã āgenei mosor bun gare gouf ayein. Aya yug nigin, aya im audig anĩ, to momoi gouf are, ã momoi bagai āgenei mosor bun gare gouf.”

²⁵ Age ye di, idi ĩ to difiyen, “Õ ai?”

Jesus idi irokenēdin, “Aya aib anĩ, mogo gariya bunem arokeneik asin. ²⁶ Aya ã nigin wogōya musei ado, es fiya nigineg musei. Anĩ ere, sur fiyan ĩ, momoi bagai, anĩ nigin, ereb aya ĩ bun karĩ aun anĩ, tamo kayau tenebur ein arokenēdif.”

²⁷ Idi, ĩ Tama nigin irokenēdif ya anĩ, to kisi fokō yen. ²⁸ Anĩ nigin, Jesus iron, “Sain ã Tamo Naal walesagauf bun, aya yug nigin aya im audig anĩ, ã keleĩ youf, aya neu oroyam ereb taka to age afedig, anĩ ere, aya Dei ifelnan anĩ dogol wogō audig anĩ, ã keleĩ youf. ²⁹ Aya sur fiyan ĩ, amã urom mabodok, ĩ mugu to itornal, ere nigin, aya faimud, ereb ĩ wau al foug anĩ, age afedig.” ³⁰ Age wogō ye di, musei ĩ nigin momoi den.

Abraham Gere Tar

³¹ Jesus, Juda tamo ĩ momoi difiyen anidi irokenēdin, “Aya afelnein anĩ uroug tokō walagauf are, ã momoi bagai neu dō fiya tar. ³² Agog fen, ã momoi anĩ keleĩ youf, momoi anim kafĩ fiya bun tamal yalelneĩf.”

³³ Idi aiten dale dirokenen, “Amã Abraham nē ibor nē tubu tar, amã aib taka nē ferfer to mabodon. Ere wo fen, amã kafĩ fiya bun tamal yalelnamãya nigin urok?”

³⁴ Jesus aitedin yale iron, “Aya ã momoi bagai arokeneik, taka ĩ mosor inof are, ĩ mosor nē ferfer. ³⁵ Ferfer ĩ, ibor anĩ bun gai ibodkeleya modoũ sã, anĩ ere,

modoũ are naal nē faimud ibodkalauf. ³⁶ Anĩ nigin, Naal ĩ kafĩ fiya bun tamal yalelneĩf are, ã momoi bagai karika lauf.

³⁷ ã Abraham nē ibor nē tubu tar are, aya keleĩ. Anĩ ere, ã aya unakesigouf nigin dodok gef, ere nigin, ã neu od nē modoũ namein to ibodok. ³⁸ Ereb aya Dei mala bun ailen anĩ, aya ã arokeneik, āg ereb āgenei temeļ bun karĩ gen anĩ ago gedig.”

³⁹ Idi aiten dale dirokenen, “Abraham ĩ tamamã.”

Age de di, Jesus iron, “Ã Abraham gere tarem are, Abraham age fedin anĩ ago gem. ⁴⁰ Gama ã, aya Negur bun momoi anĩ karĩ au fen, arokenein anĩ, unakesigouf nigin naab umirēgef. Abraham ĩ to age fen. ⁴¹ ã temeļ age fedig anĩ ago gef.”

Age ye di, idi Jesus dirokenen, “Amã se-seirã inoya naab bun temelamã sã. Nemã Tamamã are Negur yogo dogol.”

Satan Gere Tar

⁴² Jesus idi irokenēdin, “Negur ĩ Temeim are, ã aya nigin wauĩ laa fem, ere nigin, aya Negur bunem asi fen, yeir afaref. Aya neu oroyam to asin, im sur fiyan. ⁴³ Ere nigin neu od nigin wauĩ to fokō yef? Are aya wogō auf anĩ, ã karĩya kisi feleya sã nigin. ⁴⁴ ã, temeļ Satan nē, anĩ nigin, ã temeļ nē oroya dō fiya nigin oroyeik. ĩ gariya bunem isin, ĩ yukesiya kaa, momoi to iroudig, ere nigin, ĩ namen momoi sã. Ereb sain ĩ idegēya od wogō yedig, ĩ yogon od bagai wogō yedig, ere nigin, ĩ kori tamal, idegēya tama. ⁴⁵ Anĩ ere, aya momoi anĩ wogō audig nigin, ã to momoi wiyagedig! ⁴⁶ ã takam, aya neu mosor anĩ tau kurō fesiya kisi feleya? Aya momoi wogō auf are, ere nigin ã to momoi wiyagef? ⁴⁷ Aib ĩ Negur nē, ĩ Negur ereb yef anĩ karĩ yedig. ã to karĩ gef anĩ nē gariya are, ã Negur nē sã nigin.”

Jesus Yogo Nigin Iron

⁴⁸ Juda tamo aiten dale dirokenen, “Amã õ Samaria tamal, kaa sanem ironon mauf are, momoi to morok de?”

⁴⁹ Jesus solof iron, “Aya kaam to ironan, anĩ ere, aya neu Dei yana seli abidig, ã aya selu to wabigedig. ⁵⁰ Aya yug nigin fula fiya medeĩya to amirek, anĩ ere,

taka ï anï imirek are ibodok, ï anï es fiya tamo. ⁵¹ Aya ã momoi bagai arokeneik, taka ï neu od irou kafï falauf are, ï laa to bagai gurug fouf.”

⁵² Juda tamo, anï bun Jesus dirokenen, “Gama amã keleï, õ kaa sanem ironon! Abraham laa fen, profeteg gare den, anï ere, õ, taka ï ogon od irou kafï falauf are, ï laa to bagai kobũf ilouf, wof. ⁵³ Õ tamamã Abraham wal fiya de? Ï laa fen, profeteg age difen. Õ kisi wof, õ ai?”

⁵⁴ Jesus aitedin yale iron, “Aya yug selu alesauf are, neu seli alef are ege. Neu Dei, ï anï ãgenei Negur gef, ï aya yanau yalesedig. ⁵⁵ ã ï keleï sã, anï ere, aya ï keleï. Aya ï keleï sã auf are, aya ã gen idegëya tamouf, anï ere, aya ï keleï bagai, in od dõ afedig. ⁵⁶ Temeï Abraham ï, neu naa anï ilouf nigin kisif fen, wau al fen. Ï anï mogo ile fen, kulï yen.”

⁵⁷ Anï nigin, Juda tamo Jesus dirokenen, “Õ fau yar fifti yaleya sã, anï õ mogo Abraham ulen de?”

⁵⁸ Jesus idi irokenëdin, “Aya ã momoi bagai arokeneik, Abraham gõ fiya sã mog, aya abodon.” ⁵⁹ Anï nigin, idi ï meein tulu difouf nigin meein gei difen, anï ere, Jesus bouwa inokel fen, tempel modoũ bun tamal iya ilen.

9

Jesus Tamo Taka Mala Ifofakeleya Gõ Difiyen Anï El Fiyen

¹ Jesus iyok ile fen, tamo taka mala ifofakeleya gõ difen anï ilen. ² In dõ fiya tar Jesus to difiyen, “Rabi, aim mosor ino di, ï mala ifofakeleya gõ difen, tamo enei yogo de, sina tamam de?”

³ Jesus aitedin yale iron, “Tamo eneimeg sã, sina tama adomeg sã, anï ere, Negur nẽ kabï ï bunem yaorouf nigin eig fiya wõ yen. ⁴ Eï fau gaa ado, aya sur fiyan in kabï talouf bagai. Bõ fau isif, sain anï, taka nem kabï yaleya kisi feleya sã. ⁵ Sain aya tenebur abodok, aya teneub enei nẽ fula fiya.”

⁶ Age wogõ yel fen, ï tenebur isis fen, salina buru ado falei fe fen, tamo mala bun inon. ⁷ Jesus ï irokenen, “Ule, Siloam

naan kukor ugũ” (Siloam nẽ gariya, are ‘Sur fiyen’). Anï nigin, tamo ile, naan igun, agef fen, mala kelẽ yel, fõ bun isin.

⁸ In fõ tura tar ado, idi ï nonï ye mog diledig anidi diron, “Tamo de eneim ibod ken, nonï yedig anï sã de?” ⁹ Idi tunï diron, “Im.”

Tunï diron, “Im sã, taka ï genem.”

Anï ere, ï yogo iron, “Aya de tamo anim.”

¹⁰ Idi ï dirokenen, “Naig fe di, õ malã kelẽ yeledin?”

¹¹ Ï aitedin yale iron, “Tamo yana Jesus dedig im, buru falei fe fen, malau uru bun inodin. Ï, aya ele, Siloam naan agũf nigin irokanan. Anï aya ele, naan agun, age afe fen, aya malau kelẽ aun.”

¹² Idi ï to difiyen, “Tamo are nain?”

Ï iron, “Aya keleï sã.”

Farisia Tamo Idi Mala El Fiyen Nẽ Gariya Dimiren

¹³ Idi tamo mala ifofakelen anï, Farisia tamo gedin dale dirou disin. ¹⁴ Jesus buru falei fe fen, tamo mala el fedin nẽ naa are Sabat naa. ¹⁵ Anï nigin, Farisia tamo idig, ï naig fe fen, mala kelẽ yedin anï to difiyen. Tamo are irokenëdin, “Ï malau buru inodin, age fe di, agun, anï aya gama kelẽ auf.”

¹⁶ Farisia tamo tunï diron, “Tamo enei Negur bun tamal sã, ere nigin, ï Sabat naa to dõ fef.”

Anï ere, tunï diron, “Naig fe di, mosor tamo memelik age fediya inoya kisi feleya?” Anï nigin, idi fara difen.

¹⁷ Idi baban tamo mala ifofakelen anï dirokenen, “Ï õ malã el fen anï, õ ï nigin ere wof?”

Age de di, ï iron, “Ï profet.”

¹⁸ Juda tamo idi, tamo mala ifofakeleya mala kelẽ yelen anï, fau to momoi den. Anï nigin, idi tamo anï sina tama diweignëdin. ¹⁹ Idi to difen, “Eï ã naaluï de? De ï anï mala ifofakeleya gõ mafen gef? Naig fe di, ï gama sã mala kelẽ yelef?”

²⁰ Sina tama diron, “Amã keleï, ï nemã kesu, anï ï mala ifofakeleya gõ mafen.

²¹ Anï ere, ï naig fe fen, gama sã lo fef, aim ï mala el fedin anï, amã keleï sã. Yogo to wiyëg, ï biya, yogo nigin wogõ youf.”

²² Sina tama idi, Juda tamo kumï difiyeïd

fen, age de diron, ere nigin, Juda tamo idi mogo od difon, aib taka Jesus anī Kristus youf are, Juda neid uub fō bun dalelnēf.

²³ Age fiya nigin, sina tama eig de diron, “Ī biya, yogo to wiyēg.”

²⁴ Baban Juda tamo idi, mala ifofakelen anī diweigne ken, diron, “Negur yana wales fen, momoi nē od dogol urōf, amā keleī, tamo are mosor tamal.”

²⁵ Ī solof iron, “Ī mosor ado be sã be, aya keleī sã. Tekelei aya keleī are, aya malau ifofakelen, anī ere, gama lo afedig.”

²⁶ Age ye di, idi ĩ to difiyen, “Ī ō ere naig yon? Naig fe di, ō malã birikã fedin?”

²⁷ Ī aitedin yale iron, “Aya ã mogo arokenein, anī ere, ã to karī gen. Ere nigin ã baban karī gou fenē? Āg in dō fiya tar wowã gou fenē de?”

²⁸ Age ye di, idi kono difiye ken, diron, “Ō tamo enei nē dō fiya taka! Amã are Moses nē dō fiya tar! ²⁹ Negur Moses wogō fiyen are amã keleī, anī ere, tamo enei nigin, ĩ nainenem isin areg, amã keleī sã.”

³⁰ Tamo anī aitedin yale irokenēdin, “Ago ge di, terē auf. Ī nainenem isin, ã keleī sã, anī ere, aya malau birikaũ fedin.

³¹ Amã keleī, Negur ĩ mosor dinodidig anī to karī fiyēdidig, anī ere, taka ĩ Negur anini fiye ken, Negur nē oroya dō fef are, Negurem ĩ karī fiyēdig. ³² Gariya bunem isi gama, taka nem, tamo mala ifofakeleya gō difen anī birikã fedin yeya to karī yedig.

³³ Tamo enei Negur bun tamal sam are, ĩ ereb taka to naig fem.”

³⁴ Age ye di, idi diron, “Ō mosor barikã gō diyon, naig fe di, ō amã ufelnamak?” Age de fen, idi ĩ mayarē diru dirã di, isin.

Uur Bun Mala Ifofakeleya

³⁵ Jesus, idi tamo anī serē diran yeya anī karī yen. Jesus ĩ fotou fiye ken, iron, “Ō Tamo Naal nigin momoi wof de?”

³⁶ Tamo to fen, “Odu, ai anī ĩ? Urokana di, aya ĩ nigin momoi auf.”

³⁷ Jesus iron, “Ō gama ĩ ulel, de ĩ anī urom wogō gef.”

³⁸ Age ye di, tamo iron, “Odu, aya momoi auf.” Agef fen, ĩ Jesus seli yabin.

³⁹ Jesus iron, “Es fiya nigin aya tenebur ein asin, are mala ifofakeleya meleid kelē youf, age fe di, idi meleid kelē yef, are meleid ifofakalauf nigin.”

⁴⁰ Farisia tamo tunī Jesus geid difaren anī, agef wogō ye di, karī de fen, to difen, “Ere? Amãg malamã ifofakeleya de?”

⁴¹ Jesus iron, “Ā momoi bagai meleī ifofakeleyam are, ã mosor sam, anī ere, gama ã malamã kelē yef gef, anī nigin, āgenei mosor fau ibodok.

10

Sipsip Lo Fiya Tamo Yogon Sipsip Geid

¹ “Aya momoi bagai arokeneik, tamo taka ĩ, sipsip nē kauwor bobog bunem to ilauf, anī ere, naab taka bunem gar ye isilauf are, ĩ bē tamo, bē yaledig. ² Tamo ĩ bobog bunem ilef are, ĩ yogo sipsip marau.

³ Lo fedig tamo ĩ bobog kãf kenēdidig, age fe di, sipsip ĩ ait karī dedig. Ī yogon sipsip yana yaleid fen, mayarē guri feid, irouledig. ⁴ Sain ĩ yogon ganan mayarē guri feid iroule fen, ĩ ketem uyu iledig, age fe di, yogon sipsip dō difedig, ere nigin, idi yogon ait keleī. ⁵ Anī ere, idi tamo urug to dō difedig, idi ĩ mā diyawauf, ere nigin, ĩ ait urug nigin idi keleī sã.” ⁶ Jesus yaab od enei nem wogō fiyēdin, anī ere, ĩ idi ereb gariya nigin irokenēdin anī, idi to kelein.

⁷ Anī nigin, Jesus baban iron, “Aya ã momoi bagai arokeneik, aya sipsip neid bobog. ⁸ Ganan uyulil disin are, idi bē tamo, bē daledig, anī ere, sipsip idi to karī difiyēdin. ⁹ Bobog are aya, taka ĩ aya bunem isiyof are, mata kel yalouf. Ī namen isi fen, ulō yeis ilauf, agef fen, fisir yōya nē fotou fouf. ¹⁰ Bē tamo are bē nigin, yukesiyof nigin ado, narī fouf nigin dogol isif, aya idi mata dale fen, barikãuf nigin asin.

¹¹ “Aya sipsip lo fiya tamo biya, sipsip lo fiya tamo biya, yogon mata sipsip nigin itorōdig. ¹² Oroi tamo are ĩ sipsip marau sã. Anī nigin, ĩ gaũ kuī isi di, ile fen, sipsip itorarã iyadig. Age fe di, gaũ kuī sipsip kaka feid fen, firagagaũ fedidig. ¹³ Tamo are iyadig, ere nigin, ĩ oroi tamo, sipsip nigin to karī yedig.

14 “Aya sipsip lo fiya tamo biya, aya neu sipsip keleĩ, neu sipsip idi aya keleĩ, 15 are Dei ĩ aya keleĩ, aya Dei keleĩ gen. Anĩ nigin, aya neu mata sipsip nigin atorok. 16 Aya sipsip tunĩ ado, are sipsip kau enei bun temeleid sã, aya idig de guri afeid, arou asiyouf. Idig aitou karĩ douf, age fe di, idi uũ tekelei, sipsip lo fiya tamo tekelei youf. 17 Neu Dei, aya nigin wau laa fef nẽ gariya are, aya neu mata baban kel yalouf nigin anĩ atorok. 18 Taka nem neu mata to son fiyauf, anĩ ere, aya neu oroyam neu mata atorok. Aya neu mata itorõya nigin megeir ado, kel yaleya nigineg megeir ado. Od enei neu Dei bun tamal alen.”

19 Juda tamo od enei nigin baban fara difen. 20 Musei idi diron, “Ī kaa sane ado, agef fen, wadak. Ere nigin ĩ karĩ wiyēgef?”

21 Anĩ ere, tunĩ diron, “Wogõya enei are, tamo kaa sane ado nẽ sã. Kaa sane ĩ mala ifofakeleya birikã feleya kisi feleya de?”

Juda Tamo Idi To Momoi Den

22 Sain anĩ bun, Negur bun Kel Inoya nẽ Sifa naa Jerusalem wõ yen. Are saneya sain. 23 Anĩ Jesus tempel modoũ bun, Solomon nẽ Waranda dõ fef iyon. 24 Juda tamo guru de, Jesus salili difiye ken, diro-kenen, “Sain ganĩ amã lo wamã di, nene mauf? Õ Kristus ouf are, amã el wo, faded wamãf.”

25 Jesus aitedin yale irokenēdin, “Aya mogo arokenein, anĩ ere, ã to momoi gef. Memelik neu Dei yana nem anodif, are aya nigin irok. 26 Anĩ ere, ã to momoi gef, ere nigin, ã neu sipsip sã. 27 Neu sipsip aya aitou karĩ dedig, aya idi keleĩ, anĩ nigin, idi aya dõ difiyadig. 28 Aya idi mata faimud ibodkeleya afenēdidig, age afe di, idi to bagai inanakalauf. Takam idi imaun tamal to sosoin fiyauf. 29 Neu Dei idi aya ifanan ĩ, ereb ereb ganan wal fiya. Takam idi neu Dei ima bun tamal son fiya kisi feleya sã. 30 Aya Dei ado tekelei.”

31 Juda tamo baban ĩ meein tulu difiyēf nigin, meein gei difen. 32 Anĩ ere, Jesus idi irokenēdin, “Aya Dei bun tamal, ã memelik odudug musei afelnein. Anidi atun nanĩ anĩ nigin, ã aya meein tulu wiyagau fenē?”

33 Juda tamo aiten dale diron, “Amã anidi taka nigin meein to tulu mayõf, anĩ ere, Negur kono fiya nigin, ere nigin, õ tamo maug anĩ, ‘aya Negur’ wof.”

34 Jesus idi aitedin yale irokenēdin, “Ãgenei Lo bun itotoya anĩ to ibodok de, ‘Aya aron, ã waitou’*? 35 Negur nẽ od idi bun isin are, Negur idi anĩ waitou yen. Negur nẽ Itotoya are narĩ fiya kisi feleya sã. 36 Age yen ouf are, Dei yogon bagai igirna fen, ein tenebur sur fiyan anĩ, aya Negur Naal aul anĩ, ere nigin aya kono afel wiyagef? 37 Aya ereb neu Dei age fedig anĩ, to age afef are, aya to momoi wiyagau. 38 Anĩ ere, aya age afe di, ã neu od to momoi goufeg, memelik anodif anĩ momoi gouf, anĩ bunem Dei aya bun ibodok, aya Dei bun abodok ya anĩ, ã karĩg fen, keleĩ youf.” 39 Idi baban Jesus ka difiyēf nigin age difen, anĩ ere, ĩ oreis iyawon.

40 Agef fen, Jesus ĩ, Jordan naan sitakã, uruwa bun Jon naan igunēdin modoũ bun, kel ile, an ibodõ di, 41 tamo kayau musei ĩ garan disi diron, “Jon memelik taka to inon, anĩ ere, Jon tamo enei nigin wogõ yen ganan, are momoi.” 42 Age de fen, an musei idi Jesus nigin momoi den.

11

Lasarus Laa Fen

1 Gama tamo Lasarus dedig dagin. Ī Betani tamal, Maria ĩ tura Marta ado neid fonõ. 2 Maria de anim, kulu moul sumeĩ biya ado, Jesus bun fi fel fen, fatiyam Jesus ye waĩ fen. Ī main Lasarus gama dagi yenek. 3 Anĩ nigin, main tar Jesus garan od sur difen, “Odug, ĩ nigin waũ laa fedig are dagi.”

4 Jesus ĩ enei karĩ ye fen, iron, “Dagi eneim to laa ilauf, are Negur nẽ fula fiya medeĩya nigin, anĩ bunem, Negur Naal yana dalesauf.” 5 Marta, tura ado, maineid Lasarus nigin, Jesus wau laa fen. 6 Anĩ ere, Jesus ĩ Lasarus dagi yenek ya karĩ ye fen, ĩ ibodon nẽ an baban naa uru ibodon.

* 10:34: Sam 82:6: Negur ĩ od enei Juda nẽ es fiya tamo ifenēdin.

⁷ Anĩ bure fele di, Jesus in dō fiya tar irokenēdin, “Ada Judia distrik baban keku tagauf.”

⁸ Anĩ ere, idi diron, “Rabi, õ gama bagai Juda tamo meein tulu diyōf nigin age difen, anĩ õ an kel ulau fenē de?”

⁹ Jesus irokenēdin, “Gaa tekelei bun aua tuwelf to ado de? Anĩ ege aa luwan to ilalauf. Tamo ĩ gaa ado iyok, ĩ ye to tũ fedig, ere nigin, ĩ teneub enei nē lalan anim lo fedig. ¹⁰ Sain ĩ bõ iyōf are, ye tũ foug, ere nigin, ĩ lalan sã.”

¹¹ Enei irokel fen, Jesus idi irokenēdin, “Neda mou Lasarus ĩ mulã yenek, anĩ ere, aya turĩ afiyēf nigin an elef.”

¹² In dō fiya tar Jesus solo de diroke-nen, “Odug, ĩ yenek are, ĩ fau karikauf.”

¹³ Lasarus laa fen nigin Jesus iron, anĩ ere, in dō fiya tar kisi difen, ĩ mulã yenēya maug bagai nigin irok den.

¹⁴ Anĩ nigin, Jesus idi faded feid, iro-kenēdin, “Lasarus laa fen. ¹⁵ Ā nigin au fen, aya an to abodon anĩ nigin, aya wau al fef, ere nigin, anĩ bunem ā momoi gouf. Anĩ ere, ada ĩ gein talauf.”

¹⁶ Anĩ nigin, Tomas Didimus dedig, dō fiya tar tunĩ ganan irokenēdin, “Weim gare tauf nigin, adag talauf.”

Jesus Lasarus Main Tar Waud Wã Fen

¹⁷ Sain Jesus ile wõ yen are, Lasarus mogo matmat bun naa fo ilelen anĩ karĩ yen. ¹⁸ Betani are Jerusalem melsã, tri kilomita age fiya. ¹⁹ Juda tamo kayau musei, Marta Maria ado maineid laa fen anĩ, waud yo difoug nigin idi gedin disin. ²⁰ Marta Jesus isif ya karĩ ye fen, Jesus fotou foug nigin ilen, anĩ ere, Maria ĩ fõ bun ibodon.

²¹ Marta Jesus irokenen, “Odug, õ ein udobom are, mainou to laa fem. ²² Anĩ ere, aya keleĩ, gamag õ ereb taka nigin Negur urokenēf are, ifonōf.”

²³ Jesus Marta irokenen, “Nē main ba-ban kel fã youf.”

²⁴ Marta Jesus aiten yale iron, “Aya keleĩ, idikeleya naa kel fãya sain bun, ĩ baban kel fã youf.”

²⁵ Jesus ĩ irokenen, “Aya dogol kel fãya nē ado mata nē. Taka ĩ aya nigin momoi yef are, ĩ mata ibodōf, laa foug, ĩ mata

ibodōf. ²⁶ Taka ĩ mata ibod ken, aya nigin momoi yef are, ĩ to bagai laa foug. Õ enei momoi wof de?”

²⁷ Marta Jesus irokenen, “Momoi, Odug, aya momoi auf, õ Kristus, Negur Naal, teneub enei bun usin.”

²⁸ ĩ agef irokel fen, ĩ kel ile, tura Maria iweigne ken, mugun irokenen. ĩ iron, “Tise yeir, ĩ iweignok.” ²⁹ Maria od enei karĩ ye fen, ĩ kaisã bagai fã yale, Jesus garan ilen. ³⁰ Jesus fonõ wõya sã, ĩ fau Marta fotou fiyen modoũ anĩ bun ibodon. ³¹ Juda tamo kayau, Maria geid, fõ bun dibod ken, ĩ wau wã difenen, ĩ kaisã bagai fã yale, ulõ yeis ile di, dile fen, ĩ matmat bun inã yaloug nigin ilef de fen, dõ difiyen.

³² Sain Maria Jesus ibodon nē modoũ anĩ bun wõ ye, Jesus ile fen, ĩ ye gariyan kubũ ye fen, iron, “Odug, õ ein ubodom are, mainou to laa fem.”

³³ Sain Maria inã yalen ado, Juda tamo kayau Maria geid disin idig inã dalen, Jesus anĩ ile fen, wau fatuk bagai gudũf morõ fen. ³⁴ Jesus to fen, “Ī nain mũ gen?”

Idi diron, “Odug, usi fen, ule.”

³⁵ Jesus ĩ inã yalen.

³⁶ Age fe di, Juda tamo kayau diron, “Ulegef, ĩ nigin fatuk bagai wau laa fen anĩ!”

³⁷ Anĩ ere, idi tunĩ diron, “Ī tamo mala ifofakeleya birikã fedin, tamo eneig laa bun ileya nigin katĩ feleya to kisi feleyan de?”

Jesus Lasarus Laa Bun Tamal Turĩ Fen

³⁸ Jesus baban wau fatuk bagai gudũf fen, matmat bun isin. Matmat are ku, meein nem bobog katĩ difelen. ³⁹ Jesus iron, “Meein waleleg.”

Marta, laa tamo nē main iron, “Anĩ ere, Odug, are gama waai sane, ere nigin, ĩ an naa fo ibodon.”

⁴⁰ Age ye di, Jesus iron, “Õ momoi wof are, Negur nē fula fiya medeĩya uloug, to age ayon de?”

⁴¹ Anĩ nigin, idi meein are dalelen. Age dife di, Jesus itad fen, iron, “Dei, õ aya karĩ wiyal nigin, õ de ayok. ⁴² Aya kelein, õ faimud aya karĩ wiyadig, anĩ ere, aya tamo kayau yeir difaref nigin od enei orom, are

idi onom aya sur wiyān anī momoi douf nigin.”

⁴³ Jesus od enei wogō yel fen, ait odug nem iwegin, “Lasarus, ulō weis!” ⁴⁴ Laa tamo, ye, ima gabar masak nem filu difen ado, nawa gabarem sile difen ulō yesi di,

Jesus idi irokenēdin, “Gabar waleleg fen, utornēge di, ile.”

Jesus Dukesiyouf Nigin Od Difon

(*Matyu 26:1-5; Mak 14:1, 2; Luk 22:1, 2*)

⁴⁵ Anī nigin, Juda tamo kayau musei Maria gein disin, Jesus ereb age fen anī dile fen, ī nigin momoi den. ⁴⁶ Anī ere, idi tunī Farisia tamo gedin dile fen, Jesus ereb age fen anī dirokenēdin. ⁴⁷ Anī nigin, pris odudug Farisia tamo geid, katō difouf nigin Juda uyu irouya neid kaunsel guru fiya diwegin.

Idi diron, “Ada naig tafouf? Ere nigin, tamo enei memelik musei inodif. ⁴⁸ Ada lo tafe di, ī enei eig fef ilauf are, tamo ganān ī nigin momoi douf, age dife di, neda ibodōya ado teneub, Rom tamom disi dalouf.”

⁴⁹ Age de di, idi atun taka, yana Kaiafas, ī yar anī bun pris neid mudur ibod ken, wogō yen, “Ā ereb taka keleī sā! ⁵⁰ Tamo kayau ganān inanakalauf ban, tamo tekeleim tamo kayau nigin laa fouf, are ā nigin deuf anī, ā to kisi gef.”

⁵¹ Ī yogon kisi bunem od enei to iron, anī ere, ī yar anī bun pris neid mudur ibodon nigin, profet od wogō yen, Jesus Juda tamo kayau ganān nigin laa fouf yen.

⁵² Are Juda tamo kayau nigin dogol sā, Negur gere tar firagagaū difen anidig, guri feid irousi kuru fedi di, idi tekelei youf nigin, Jesus laa fouf yen. ⁵³ Anī nigin, naa anī bunem ilen, idi Jesus dukesiyouf nigin naab dimiren.

⁵⁴ Age dife di, Jesus ī, Juda tamo kayau meleid bun mala yaor to iyon, ī an iminkele fen, teneub akor taka, gerere tuan melsā, fonō yana Efraim ilen, an yogon dō fiya tar geid dibodon.

⁵⁵ Sain anī Juda neid Pasa naa melsā, musei fonō fonō temeleid, dogo neid nonorou lilik fiya nigin, Pasa naa wōya sā mog, Jerusalem diselen. ⁵⁶ Idi Jesus nigin meleid dinof diyon. Idi tempel modoū bun

difar fen, abob to difen, “Ā ere kisi gef? Ī Sifa bun to isiyouf de?” ⁵⁷ Anī ere, pris odudug Farisia tamo geid, taka nem Jesus nain be ibodok ya anī ile fen, irokenēdi di, dirounēf nigin wedereid diroun.

12

Betani Oun Jesus Ye Bun Maria Moul Fi Felen

(*Matyu 26:6-13; Mak 14:3-9*)

¹ Pasa nē naa wōya nigin, naa sigis fau ibod mog, Jesus Betani wō yen, an Lasarus ibodon, ī Jesusem laa bun tamal turī fiyen. ² An Jesus nigin waud el fe fen, bō saaf dabin, anī Marta aruna yalen. Idi Jesus geid tebol bun dibodon atun, Lasarus ibodon. ³ Age de mog, Maria moul sumeī biya, hap lita nad nem dinon, are moni odug nē anī yale fen, Jesus ye bun fi fel fen, fatiyam ye wā fen. Age fe di, moul sumeī biyam, fō anī ino yalen.

⁴ Anī ere, Judas Iskariot, in dō fiya taka, fau dum im Jesus kiwai imeid bun inouf, im iron, ⁵ “Ere nigin moul sumeī biya enei, na nigin sur fe fen, moni anī maleg tamo to ifenēdiyam? Are yar tekelei bun, kabī tamo nē mala yaledig kilei.” ⁶ Ī maleg tamo nigin kisif fen, enei to iron, ī yogo bē tamo nigin age yen. Ī moni nē kodol lo fiya tamo, moni nē kodol bun dinodig are bē yaledig.

⁷ Anī nigin, Jesus iron, “Kayau are utornēg, ī aya mū difiyauf naa nē nigin, moul sumeī biya enei irouwauf. ⁸ Maleg idi, ā geid sain faimud ubodōgouf, anī ere, aya, ā geid sain faimud to tabodōf.”

⁹ Age de mog, Juda tamo kayau musei, Jesus an ibodok ya keleī ken, disin, are ī nigin dogol sā, Lasarus Jesusem laa bun tamal turī fiyen īg dilouf nigin. ¹⁰ Anī nigin, pris odudug Lasarus īg dukesiyouf nigin naab dimiren, ¹¹ ere nigin, Lasarus bunem, Juda tamo kayau musei Jesus garan dile fen, ī nigin momoi den.

Jesus Tamo Yana Ado Gen Jerusalem Ilen

(*Matyu 21:1-11; Mak 11:1-11; Luk 19:28-40*)

¹² Naa anī ile di, tamo kayau musei Sifa bun disin, Jesus Jerusalem isif ya anī karī den. ¹³ Idi pam aarau anā aarau gen anī guri de, Jesus tarabā difiyēf nigin dile fen, diweig diron,

“Hosiana!”*

“Odug yana bunem isif, ī el fiya ado!”†

“Israel neid King, ī el fiya ado!”

¹⁴ Jesus donki naal fotou fe fen, teten ibodon, are Negur nē Itotoya eig ye irok kilei,

¹⁵ “To kumīg, Saion nē tamo kayau, uleg, āgenei king,

donki naal teten ibod ken, isif.”‡

¹⁶ Uruwa bagai, in dō fiya tar, enei ganan nigin wedereid fokōya san. Dum Negur Jesus fula fiya medeīya ifenē di, enei ī nigin ditoton ado, enei tamo kayau ī bun age difen anī, wedereid fokō yen.

¹⁷ Tamo kayau Jesus geid difar fen, ī Lasarus matmat bun tamal iweigne ken, laa bun tamal turī fe di, lo difen idim wogagā def, dile di, od iyokelen. ¹⁸ Tamo kayau musei, Jesus memelik anī inon karī den nigin, ī fotou difiyēf nigin dilen. ¹⁹ Age dife di, Farisia tamo idi abob dirokenen, “Ulegef, ada kabī ege talegef. Lo gouf are, tamo kayau ganan ī dō difiyek!”

Jesus Yogon Laa Nigin Iron

²⁰ Sifa bun Negur yana dalesauf nigin diselen idi atun, Grik tunī difaren. ²¹ Idi Filip Betsaida tamal Galili teneub bun, ī garan disi fen, to difiyē diron, “Tamo biya, amā Jesus mailau fenē.” ²² Age de di, Filip ile, Endru iroken ken, uruwom Jesus dirokenen.

²³ Jesus idi irokenēdin, “Negur Tamo Naal fula fiya medeīya ifenēf nigin, sain anī mogo yeir isil. ²⁴ Aya ā momoi bagai arokeneik, wit faat taka teneub bun kubū ye fen, to burauf are, faat tekelei dogol agef ibodōf, anī ere, ī burauf are, faat musei wowā douf. ²⁵ Tamo ī yogon mata nigin wau laa fef are, ī mata anī itornēf, anī ere, tamo ī teneub enei bun, yogon mata atorok bagai ye fen, itorok are, ī ironnek ile, mata ibodkeleya bun ilauf. ²⁶ Taka ī aya arunau yalef, ī aya dō fiyauf

bagai. Aya abodok nē an, neu kabī tamo īg an ibodōf. Taka ī arunau yalef, neu Dei ī yana yalesauf.

²⁷ “Gama neu wau morok, anī aya ere auf? ‘Dei sain enei bun usenna,’ auf de? Sā, gariya enei nigin bagai, sain enei bun asin. ²⁸ Dei ogo yanā selī kulō!”

Age ye di, ait taka saa ilunem isin, “Aya mogo anī selu abin, aya baban anī selu abiyouf.” ²⁹ Tamo kayau an difaren anī karī de fen, diron, kolimei den, tunī diron, engel takam wogō fiyem.

³⁰ Jesus iron, “Ait enei, ā isenneī di, momoi gouf nigin, aya nigin sā. ³¹ Gama Negur ī, teneub enei nē tamo kayau es fedif, gama teneub enei nē mudur iruwauf. ³² Anī ere, aya tenebur tamal dalesauf sain, aya tamo ganan aya bun, didī afediyouf.” ³³ Jesus yogo naig fe, laa fouf anī ifelnēdiyof nigin, od enei wogō yen.

³⁴ Tamo kayau aiten dale diron, “Lo bun amā Kristus gai gai ibodōf ya anī karī maun, naig fe di, ō urok, ‘Tamo Naal ī dalesnēf bagai?’ Ai anī Tamo Naal?”

³⁵ Age de di, Jesus idi irokenēdin, “Sain naal bagai ā lalan adouf. Ā lalan ado mog, uyōg, anī bunem gugum to irusi kerū yeif. Tamo ī gugum bun iyok, ī naib ilef are keleī sā. ³⁶ Ā lalan ado mog, āgenei momoiya lalan bun unog, ago gouf, ā lalan gere tar wowā gouf.” Jesus od enei wogō yel fen, ī itorneīd ile, iminkelen.

Juda Tamo Kayau Jesus Nigin Fau To Momoi Den

³⁷ Jesus idi meleid bun memelik musei inodin, anī ere, idi fau ī nigin to momoi den. ³⁸ Enei are profet Asaia nē od kisi falauf nigin wō yen:

“Odug, aim nemā od nigin momoi yen?

Aiyai bun Odug nē megeir yaor fen?”

³⁹ Gariya enei nigin, idi momoiya kisi feleya sā, ere nigin, Asaia baban od enei iron:

⁴⁰ “Negur idi meleid ifofa ken, waud ifofakelen,

* **12:13:** Anī nē gariya, ‘Usennamā!’ Od anī tamo kayau Negur yana yaleseya nigin wogō dedig. † **12:13:** Sam 118:25, 26 ‡ **12:15:** Sekaraia 9:9

anī bunem, idi meledim ileya kisi feleya sã,
 waud fokōya kisi feleya sã,
 waud faleiya kisi feleya sã, age fiya sam, aya el afedim.”§

⁴¹ Asaia od enei iron, ere nigin, ī Jesus nē fula fiya medeīya ile fen, ī nigin iron.

⁴² Mudur adodo idi atun, museig ī nigin momoi den. Anī ere, Farisia tamo idim Juda neid uub fō bun dirudidiya nigin kumī de fen, dogo neid momoiya to yaor difen. ⁴³ Ere nigin, idi Negurem yeneid yaleseya ban, tamom yeneid dalesauf anī orodidig.

⁴⁴ Jesus iweig iron, “Tamo ī aya nigin momoi yef, ī aya nigin dogol to momoi yef, ī aya sur fiyan nigineg momoi yef. ⁴⁵ Ī aya lo fiyaf, im aya sur fiyan anī ilef. ⁴⁶ Aya lalan anī, tenebur ein asin, are taka ī aya nigin momoi yef, ī gugum bun to ibodōf nigin age afen.

⁴⁷ “Taka ī neu od karī ye fen, to dō fef, aya ī to es afiyek, ere nigin, aya tamo kayau es fiya nigin to asin, aya kel gei fiya nigin asin. ⁴⁸ Taka ī aya itorna fen, neu od to irouf, ī nigin es fiya tamo ibodok. Od de wogō aun anim, idikeleya naa bun ī es fiyēf. ⁴⁹ Ere nigin, aya neu kisi nem to wogō aun, anī ere, Dei aya sur fiyan im, ere anī wogō auf, naig afe wogō auf anī, toli fiya di, wogō aun. ⁵⁰ Aya keleī, yogon si fiya are mata faimud ibodkeleya bun ileya nē, anī nigin, ereb aya wogō auf, Dei aya wogō auf nigin irokanan kilei bagai, aya wogō auf.”

13

Jesus In Dō Fiya Tar Yeid Kulo Fedin

¹ Pasa nē Sifa fau wōya sã mog, Jesus kelein, ī teneub enei itor ken, Tama garan ileya nē sain mogo wō yel. Ī yogon tamo tar tenebur ein dibodok anidi nigin wau laa fedig, ī idi nigin wau laa fen are iroule idikeleya bun.

² Bō saaf dō mog, Satanem Judas Iskar-iot, Simon naal namen Jesus kiwai imeid bun ifenēf nigin, kisi mogo ifenen. ³ Tama ī ereb ereb ganan, Jesus ima bun inon, ī

Negur bunem isin anī, Negur bun kel ilef, are Jesus ī keleī. ⁴ Jesus saaf bun ibodon anī fā ye, yogon kolos teten inukeis fen, taul yale, luwa gu fen. ⁵ Age fel fen, ī naan yale, beī bun yu ken, yogon dō fiya tar yeid kulo fiya gariya inon, agef fen, taul luwa gu fen anim yeid waī fedin.

⁶ Jesus Simon Pita garan isi di, ī Jesus irokenen, “Odug, ō aya yeu kulo wou fenē de?”

⁷ Jesus Pita aiten yale irokenen, “Ereb aya age afef, ō gama keleī sã, anī ere, fau dum ō keleī youf.”

⁸ Pita iron, “Aya yeu to bagai kulo wouf.” Jesus Pita irokenen, “Aya ō to kulo ayōf are, ō aya ado nigal fiya sã.”

⁹ Simon Pita Jesus irokenen, “Odug, agouf are, yeu dogol sã, imau mudrou adog kulo wouf.”

¹⁰ Jesus aiten yale iron, “Taka ī naan igukelel, ye dogol kulo fouf, bouwa ganan filiya. Ā filiya ba, anī ere, ā ganan sã.”

¹¹ Jesus ī aibem kiwai ifenēf anī keleī, anī nigin, ganan filiya sã yen.

¹² Jesus yeid kulof bure fel fen, yogon kolos ifounkel, yogon modoū bun kelen. Agef fen, ī idi to fedin, “Aya ereb ā bun age afel anī, ā wedereī fokō yef de? ¹³ Ā aya ‘Tise’ ado ‘Odug’ gedig, are tutuk, ere nigin, aya de anī. ¹⁴ Aya āgenei Tise ado Odug, ā yeī kulo afel, anī nigin, āg abob ye kulo gouf. ¹⁵ Aya malakanon anokeneim, are ā nigin age afel gen, āg ago gouf. ¹⁶ Aya ā momoi bagai arokeneik, ferfer takam yogon odug to wal fiyēdig, arū tamom ī sur fiyen to wal fiyēdig. ¹⁷ Gama ā enei keleī, anī nigin, enei dōg ago gouf are, ā el yeīf.

Jesus Ī Kiwai Imeid Bun Inenēf Nigin Iron

(*Matyu 26:20-25; Mak 14:17-21; Luk 22:21-23*)

¹⁸ “Aya ā ganan nigin to wogō auf. Aya agirnēdin idi, aya keleī, anī ere, enei are Negur nē Itotoya bun yenek anī kisi falauf nigin, “Taka ī aya urom neu bret moko, ī aya kiwai ifana fen, dā fiyal.”*

¹⁹ “Anī fau to wō ye mog, gama aya ā arokeneik, anī bunem, anī wō youf sain

bun, aya de Im ya anī momoi gouf. ²⁰ Aya ā momoi bagai arokeneik, taka ayam sur afe di, ī yalef are, ī aya yaleyaf, taka ī aya yaleyaf are, ī aya sur fiyan anī yalef.”

Jesus Judasem Kiwai Ifenēf Yen

(*Matyu 26:20-25; Mak 14:17-21; Luk 22:21-23*)

²¹ Jesus od enei wogō yel fen, ī wau moro ken, kurō feis iron, “Aya ā momoi bagai arokeneik, āgenei takam aya kiwai ifanauf.”

²² Yogon dō fiya tar idi abob loli difen, ai nigin bagai wogō yef de fen, nene den.

²³ Idi neid taka, dō fiya taka Jesus ī nigin wau laa fedig ī, Jesus sirin ibodon.

²⁴ Simon Pita, dō fiya tamo enei mudurem fiye ken, ī iron, “Ī ai nigin irok anī to wiyē.”

²⁵ Dō fiya tamo anī, Jesus akoron mudur isen ken, to fen, “Odug, ō ai wof?”

²⁶ Jesus aiten yale iron, “Tamo bret enei beī bun nu afe fen, afenēf anī.” Age ye fen, ī bret nuf fen, Judas Iskariot, Simon naal ifenen ²⁷ Judas bret anī yale di, Satan ī namen ilen.

Jesus Judas irokenen, “Ereb agou fenē, kaisā bagai ago.” ²⁸ Anī ere, saaf bun dibodon anī takam, ere nigin Jesus od enei Judas irokenen anī, kisi to fokō yen. ²⁹ Judas ī moni lo fiya tamo nigin, tunī kisi difen, Sifa nē erēb erēb na yalouf nigin be, maleg erēb erēb ifenēdiya nigin be, Jesusem Judas irokenē di, ilef den. ³⁰ Judas ī bret yale fen, kaisā bagai oreis ilen. Sain anī bō.

Pita Nē Wa Fiya Nigin Jesus Iron

(*Matyu 26:31-35; Mak 14:27-31; Luk 22:31-34*)

³¹ Judas iya ile di, Jesus iron, “Gama Tamo Naal fula fiya medeīya yale di, Negur fula fiya medeīya Tamo Naal bun yalef. ³² Negur fula fiya medeīya Naal bun yalef are, Negur ī fula fiya medeīya Yogo bun Naal ifenēf, fula fiya medeīya anī kaisā bagai Naal ifenēf.

³³ “Neu kesu tar, aya ā geid sain naal bagai tabodōf. Ā aya umirnaauf. Aya Juda tamo arokenēdin kilei, gama ā arokeneik, aya elef nē an, ā isiya kisi feleya sã.

³⁴ “Aya ĩtãfiya mata afeneik, abob nigin wauī laa fouf. Aya ā nigin wau laa fedig kilei, āg abob nigin wauī laa fouf bagai.

³⁵ Ā abob nigin wauī laa fouf, anī bunem tamo ganani idi keleī youf, ā neu dō fiya tamo tar.”

³⁶ Simon Pita Jesus to fiyen, “Odug, ō nai ulef?”

Jesus iron, “Aya elef nē an, ō gama aya dō fiyaya kisi feleya sã, anī ere, ō fau dum dō wouf.”

³⁷ Pita to fen, “Odug, ere nigin gama aya ō dō yōya kisi feleya sã? Aya ō nigin neu mata atorōf.”

³⁸ Age ye di, Jesus iron, “Ō aya nigin ogon mata utorōf de? Aya ō momoi bagai arokonok, tataro fau kokorok yeya sã mog, ō aya nigin wa wo, towo wouf!”

14

Jesus In Dō Fiya Tar Neid Waud Wā Fen

¹ “Ā wauī to morō yeī. Negur nigin momoi gouf, aya nigineg momoi gouf. ² Neu Dei nē fō bun aab musei ado, age fiya sam are, arokeneim. Aya eselef nē an, āgenei modoū dodok afouf. ³ Aya esel, āgenei modoū dodok afel fen, aya ā geid tabodōf nigin, aya kelau gei ayeīf, are āg aya abodok nē an ubodōgouf nigin. ⁴ Aya eselef nē naab anī, ā keleī.”

Negur Bun Ileya Naab, Jesus

⁵ Tomas Jesus irokenen, “Odug, ō narib ulef are, amā keleī sã, anī nigin, naig mafe fen, amā naab anī keleī youf?”

⁶ Jesus Tomas irokenen, “Aya dogol naab anī, aya dogol momoi anī, aya dogol mata anī. Taka ī naab taka bunem, Dei wagen to isiyouf, aya bunem dogol. ⁷ Ā aya keleim are, ā neu Deig keleim. Gama sain enei bun ilauf, ā ī keleī, ī ulegel.”

⁸ Filip iron, “Odug, Tamada ufelnamã, anī amã nigin deuf.”

⁹ Jesus iron, “Filip, aya ā geid sain meluk tabodon, anī ere, ō aya keleī sã de? Taka ī aya ileyan are Dei ilen. Naig fe di, ō urok, “Tamada ufelnamã”? ¹⁰ Aya Dei bun abodok, Dei aya bun ibodok anī to momoi wof de? Od aya wogō ayeik are, aya yug bun tamal sã, are Dei aya bun ibodok ī kabī yalef. ¹¹ Aya Dei bun abodok, Dei ĩ

aya bun ibodok anī, momoi wiyagauf, sãf are, aya kabī aledig bun, momoi wiyagauf. ¹² Aya ã momoi bagai arokeneik, taka ĩ aya nigin momoi yef, ereb aya age afedig, ĩg age fouf, enei age afedig anī wal fiyag age fouf, ere nigin, aya Dei gein eselef. ¹³ ã ereb taka nigin, aya yanau nem to gouf, aya age afouf, anī bunem, Dei ĩ Naal bun, fula fiya medeīya yalouf. ¹⁴ Ereb taka nigin, aya yanau nem to wiyagauf are, aya age afouf.

Jesus Awa Uur Fateul Sur Afouf Yen

¹⁵ “ã aya nigin wauĩ laa fouf are, neu ĩtãfiya anī dõ gouf. ¹⁶ Aya Dei arokenē di, ĩ Isenneīya taka, ã geid gai gai ibodõf nigin ifeneĩf, ¹⁷ are momoi nē Awa Uur. Tenebur ein tamo kayau ĩ to dalouf, ere nigin, idi ĩ to dilef, to keleĩ. Anī ere, ã ĩ keleĩ, ere nigin, ĩ ã geid ibodok, ã bun ibodõf. ¹⁸ Aya ã madmad gen to atorneĩf. Aya ã gein asiyouf. ¹⁹ Sain naal bagai ile di, tenebur ein tamo kayau, aya to dileyauf, anī ere, ã uleyagauf. Aya mata abodok nigin, ãg mata ubodõgouf. ²⁰ Naa anī bun, aya neu Dei bun abodok, ã aya bun ubodõgef, aya ã bun abodok anī, ã keleĩ youf. ²¹ Taka ĩ neu ĩtãfiya irou dõ fef, ĩ aya nigin wau laa fedig. ĩ aya nigin wau laa fedig anī, neu Dei ĩ nigin wau laa fouf, ayag ĩ nigin wau laaf fen, aya yug ĩ bun yaor afouf.”

²² Age ye di, Judas taka (Judas Iskariot anī sã) iron, “Odug, ere nigin õ ogo, amã bun dogol õ yaorõf, tenebur ein tamo kayau bun sã?”

²³ Jesus iron, “Taka ĩ aya nigin wau laa fef, ĩ neu od dõ fouf. Neu Dei ĩ nigin wau laa fouf, anī amã ĩ gein masi, weim mabodõf. ²⁴ Taka ĩ aya nigin to wau laa fef, ĩ neu od to dõ fouf. Od enei ã karĩ gef, are aya bun tamal sã, are Dei aya sur fiyan nē od.

²⁵ “Aya fau ã geid tabod ken, od enei ganan wogõ ayein. ²⁶ Anī ere, Isenneīya, Awa Uur Fateul anī, Deim aya yanau nem sur fouf, Awa Uur Fateul ĩ, ereb ereb ganan ifelnei ken, aya arokenein anī ganan wedereĩ fokõf fen, kisi turĩ fouf.

²⁷ Wau inosiya atorkeneik, neu wau inosiya afeneik, aya afeneik are, tenebur ein tamo kayau wau inosiya difeneik gen sã. ã wauĩ to morõ yei ken, kumīg.

²⁸ “Aya eig au di, karĩ gel, ‘Aya ele fen, ã gein kelau asiyouf.’ ã aya nigin wauĩ laa fem are, aya Dei bun elef anī nigin, ã kulīya adom, ere nigin, Dei ĩ aya wal fiyaya. ²⁹ Anī wõya sã mog, aya mogo arokeneim, anī bunem, agef wõ ye di, ã momoi gouf. ³⁰ Aya ã geid, sain meluk to wogõ tauf, ere nigin, teneub enei nē mudur mogo isif. Anī ere, ĩ aya lai fiyaya nigin megeir sã, ³¹ anī ere, tenebur ein tamo kayau keleĩ bagai youf, are aya Dei nigin wau laa fef, anī nigin, neu Dei irokanan kilei bagai age afedig.

“Fafãg fen, modoũ enei tatorõg.

15

Aa Wain Gariya Ado Yogon Were

¹ “Aya aa wain bagai, neu Dei ĩ kabī marau. ² Were aya bun biya to yuk anī ganan, Deim kokour falauf, were biya yuk anī ganan, Deim dē fe di, biya musei imauf. ³ Aya od wogõ ayein anim, ã amuyē sã, ã mogo fliya. ⁴ ã aya bun ubodõgouf, ayag ã bun abodõf. Were taka aa wain luwa ado to susu falauf are, yogo biya yūya kisi feleya sã. Age fiya bagai, ãg aya bun to ubodõgouf are, biya yūya kisi feleya sã.

⁵ “Aya aa wain gariya, ã were. Taka ĩ aya bun ibodõ di, ayag ĩ bun abodõf are, ĩ biya musei imauf. Aya utornagauf are, ã ereb taka to ago gouf. ⁶ Taka ĩ aya bun to ibodõf are, ĩ were diraille di, meti ledig gen. Were age fediya are gei de fen, yã dirarã di, isasaikediyouf. ⁷ ã aya bun ubodõge di, neu od ã bun ibodõf are, ereb taka oroyei ken, urokanage di, ifeneĩf. ⁸ Biya musei ũg fen, neu dõ fiya tar wowã gouf are, neu Dei ĩ fula fiya medeīya yalouf.

⁹ “Neu Dei aya nigin wau laa fedig kilei, ayag ã nigin wau laa fedig. Gama ã neu wau laa fiya anī bun ubodõg. ¹⁰ Aya neu Dei nē ĩtãfiya dõ afe fen, yogon wau laa fiya bun abodok kilei, ã neu ĩtãfiya dõ gouf are, neu wau laa fiya bun ubodõgouf.

¹¹ Aya enei arokeneim, are neu kulīya ā namein ibod ken, āgenei kulīya barikāf nigin. ¹² Neu itāfiya are yeir, aya ā nigin wau laa fedig gen, āg abob nigin wauī laa foug. ¹³ Wau laa fiya enei wau laa fiya ganān wal fiya, are yogon mou tar nigin yogon mata itorok anī. ¹⁴ Ā aya ereb itāfiya arokenein anī dōg, ago gouf are, ā neu mou tar. ¹⁵ Aya baban ā to ferfer ayeif, ere nigin, ferfer ī yogon tamo odug nē kabī keleī sā. Anī ere, aya ā neu mou tar ayeim, ere nigin, ereb ereb ganān aya Dei bun karī aun anī, aya ā afelneim. ¹⁶ Āgem aya to ugirnagen, aya ā agirnei ken, uleg, biya ūg fen, biya anī ibodkalauf nigin ā ayein. Agog fen, aya yanau nem, ereb taka nigin Dei urokenēge di, ifeneif. ¹⁷ Enei anī neu itāfiya, abob nigin wauī laa foug.

Tenebur Tamo Kayau, Dō Fiya Tamo Tar Nigin Kiwai Difenēdiyof

¹⁸ “Tenebur tamo kiwai difeneif are, aya ketem kiwai difanan anī, ā keleī youf. ¹⁹ Ā teneub enei nēf are, ā yogon nigin, ā nigin wau laa foug. Anī ere, ā teneub enei nē sā, aya ā tenebur tamal gei ayei ken, agirnein. Anī nigin, tenebur ein ā kiwai difeneik. ²⁰ Aya od arokenein anī, ā karī walagauf, ‘Ferfer taka yogon odug to wal fedig.’* Idi aya darau difanan are, āg age de darau difeneif. Idi neu od dō difen are, idi āgeneig age de dō difoug. ²¹ Idi enei ganān ā bun age difoug, ere nigin, aya yanau ā ado, are aya sur fiyan idi ī keleī sā nigin. ²² Aya to asi fen, arokenēdim are, idi mosor sam. Anī ere, idi neid mosor nigin to galā dūf. ²³ Taka ī aya kiwai ifanaf, ī neu Deig kiwai ifenek. ²⁴ Taka nem to age fen anī, aya idi atun to age afem are, idi mosor sam. Anī ere, gama idi memelik dile fen, aya neu Dei ado kiwai difanaman. ²⁵ Anī ere, enei, idi neid Lo bun ditoton yenek anī, kisi falauf nigin, ‘Idi aya mura sā kiwai difanan.’†

²⁶ “Awa Uur Isenneīya are, ayam Dei bun tamal ā bun sur afe di, isiyouf, are momoi nē Awa Uur, Dei bun tamal ulō yeis isi fen, ī aya nigin kurō fesiyouf. ²⁷ Āg agog kurō

wesigouf bagai, ere nigin, ā aya geid fen, gariya bunem tasin.

16

¹ “Ā to felu rogouf nigin, od enei ganān mogo ā wogō ayeim. ² Idi ā Juda neid uub fō bun diruyeif. Takag, sain fau isiyouf bun, taka ī ā ideneikeis fen, kisi foug, Negur sesewi afiyek youf. ³ Idi enei age difoug, ere nigin, idi Dei keleī sā, aya nigineg keleī sā. ⁴ Aya enei mogo arokeneim, are sain isiyouf bun, ā wedereī aroul anī, karī walagauf nigin. Aya enei tetun to arokenein, ere nigin, aya ā geiden.

Awa Uur Fateul Nē Kabī

⁵ “Gama aya ī sur fiyan gein eselef, anī ere, ā takam to aya to fiyaf, ‘Ō nai ulef?’ ⁶ Aya enei arokeneim nigin, ā fatuk bagai wauī gudū fef. ⁷ Anī ere, aya momoi arokeneik, aya āgenei biya fiya nigin eselef. Aya to eselauf are, Isenneīya anī ā bun to isiyouf, aya eselauf are, aya ī, ā bun sur afoug. ⁸ Sain ī isiyouf, tenebur ein tamo kayau bun, mosor nigin, Negur nē madur fiya nigin ado, Negur nē es fiya nigin, idi neid kū fenēya anī yaor fe, faded fediyouf. ⁹ Mosor are, idi aya nigin to momoi def nigin. ¹⁰ Negur nē madur fiya are, aya Dei gein esele di, ā aya to uleyagauf nigin. ¹¹ Negur nē es fiya are, teneub enei nē mudur mogo es fiyen nigin.

¹² “Aya ā irokeneīya nigin musei biya, anī ere, ā gama keleīya kisi feleya sā. ¹³ Anī ere, sain momoi nē Awa Uur isiyouf bun, momoi nē anī ganān bun, im itoneif. Ī yogon kisim to wogō youf, ereb ī karī yef anī wogō youf, agef fen, ereb fau wō youf anī irokeneif. ¹⁴ Ī neu bun tamal yale fen, ā ifelneif, anī bunem, aya fula fiya medeīya ifanauf. ¹⁵ Dei nē ganān are neu, anī nigin, aya arom, Awa Uur neu bun tamal yale fen, ā ifelneif aul.

¹⁶ “Sain naal bagai ile di, ā to uleyagauf, agef fen, baban sain naal bagai ile di, aya uleyagauf.”

In Dō Fiya Tar Waud Gudū Fef Are Fau Kulī Douf

* 15:20: Jon 13:16 † 15:25: Sam 35:19; 69:4

¹⁷ In dō fiya tar tunī abob dirokenen, “Ere gariya nigin eig ye irok, ‘Sain naal bagai ile di, ā to uleyagauf, agef fen, baban sain naal bagai ile di, aya uleyagauf,’ takag, ‘Ere nigin, aya Dei gein eselef nigin,’ yef?” ¹⁸ Idi anī fau fau wogō den, “Ī ere ye fen, ‘sain naal bagai’ yen? Ī irok anī, amā gariya keleī sā.”

¹⁹ Idi enei nigin Jesus to difou fenē mog, Jesus anī ile fen, idi irokenēdin, “Aya eig aul anī nē gariya nigin abob to wiyēgef de, ‘Sain naal bagai ile di, ā to uleyagauf, agef fen, baban sain naal bagai ile di, aya uleyagauf’?” ²⁰ Aya ā momoi bagai arokeneik, ā fau maruī isi fen, wauī gudū fouf, tenebur tamo kayau kulī de mog. Ā wauī gudū fouf, anī ere, āgenei wauī gudū fiya falei yel kulī youf. ²¹ Kayau kesu ibodō fenē darau fef, ere nigin, yogon naa wō yel, anī ere, yogon kesu wō ye di, darau weder tu kelef, ere nigin, kesu tenebur wō yel nigin kulī yef. ²² Āg age fiya, gama āgenei wauī gudū fiya nē naa, anī ere, aya baban ailiyeī di, ā kulī gouf, taka nem āgenei kulīya to yalelkeneīf. ²³ Naa anī bun, ereb taka nigin ā to, to wiyagauf. Aya ā momoi bagai arokeneik, aya yanau bunem, ereb taka nigin neu Dei to wiyēgouf are, ifeneīf. ²⁴ Uruwa bunem isi gama, aya yanau nem, ereb taka nigin to, to gen. To gouf, walogouf, ago gouf, ā kulīya barikāf.

²⁵ “Aya yaab od wogō audig, anī naa taka isiyouf bun, aya yaab od to wogō auf, anī ere, neu Dei nigin yaor arokeneīf. ²⁶ Naa anī bun, aya yanau bunem to gouf. Aya ā nigin Dei to afiyēf ya anī to arokeneik, ²⁷ ere nigin, ā aya nigin wauī laaf fen, aya Negur bun tamal asin anī, momoi gedig nigin, Dei ā nigin wau laa fedig. ²⁸ Aya Dei bun tamal ulō aus fen, tenebur asin, gama aya teneub enei ator ken, Dei bun kelauf.”

²⁹ Age ye di, Jesus nē dō fiya tar diron, “Gama ō yaor wogō wof, yaab od nem sā. ³⁰ Gama amā mailef, ō ereb ereb ganan keleī, are taka nem to yōf anīg to tari wodig. Anī bunem, ō Negur bun tamal usin anī, momoi mauf.”

³¹ Jesus aitedin yale iron, “Ā gama momoi gef de? ³² Anī ere, naa fau isif, are mogo isil, anī bun, ā firagagaū yeī, āgenei fonō fonō yeīf. Ā aya mugu utornagauf. Anī ere, aya mugu sā, ere nigin, neu Dei Ī aya ado.

³³ “Ā aya bun wauī inosiya adouf nigin, od enei arokeneim. Tenebur ein ā morō adouf, anī ere, total ado ufaragauf! Aya teneub enei nē megeir mogo wal afen.”

17

Jesus Yogo Nigin Kosē Yen

¹ Jesus od enei wogō yel fen, saa ilun itad fen, kosē yen:

“Dei, naa mogo isil, fula fiya medeīya ō Naal wenē, ago di, ō Naal ō selī kulō fouf. ² Are ō Naal, idi ganan ō wenen bun, mata faimud ibodkeleya ifenēdiyof nigin, tamo kayau ganan lo fediya nē megeir ō wenen. ³ Mata faimud ibodkeleya are yeir, ō momoi Negur tekelei ado Jesus Kristus ō sur won anī, idi keleī youf anī. ⁴ Kabī ō wanan anī adikelen bunem, tenebur ein aya ō bun fula fiya medeīya arou asin. ⁵ Dei, teneub kare fiya sā mog, ada urom fula fiya medeīya adon anī, ō malā bun fula fiya medeīya anī gama wana.

Jesus In Dō Fiya Tar Nigin Kosē Yen

⁶ “Aya teneub enei bun tamal ō wanan idi bun, ō yaor ayon. Idi ogon, anī ere, ō idi wanan, ago di, idi ogon od dō difedig. ⁷ Gama idi keleī, ereb ereb ganan aya wanan are ō bun tamal. ⁸ Aya od wanan anī afenēdi di, idi dalen. Aya ō bun tamal asin anī, idi momoi bagai kelein, idi onom aya sur wiyān anī momoi den. ⁹ Aya idi nigin kosē auf. Aya teneub enei nē tamo kayau nigin to kosē auf, anī ere, idi ō wanan anidi nigin kosē auf, ere nigin, idi ogon. ¹⁰ Neu ganan are ogon, ogon are neu. Idi bunem, aya fula fiya medeīya alel. ¹¹ Aya tenebur ein to abodōf, anī ere, idi fau tenebur dibodok, aya ō gein esef. Dei Fateul, ō yanā wanan nē megeir bunem, kulatun wediyof, anī bunem, ada tekelei gen

idig tekelei youf. ¹² Sain aya idi geid mabodon, ò aya yanã wanan anĩ bunem, kulatun afeid el afen. Taka to fõ yelen, tamo ì fõ yalauf nē dogol fõ yelen, are Negur nē Itotoya kisi falauf nigin.

¹³ “Gama aya ò gein esef, neu kulĩya idi namedin barikãf nigin, tenebur ein fau abod ken, od enei arok. ¹⁴ Aya ogon od afenēdi di, teneub enei nē tamo kayau idi kiwai difenēdin, ere nigin, gama aya teneub enei nē sã, age fiya gen, idig teneub enei nē sã. ¹⁵ Aya teneub enei bun tamal walelnēdiyof nigin to kosē auf, anĩ ere, wadãgen tamo sane isi fen, daũ fediya nigin, kulatun wediyof anĩ kosē auf. ¹⁶ Aya teneub enei nē sã, age fiya gen, idig teneub enei nē sã. ¹⁷ Momoĩ bunem fateul unenēdiyof, ogon od are momoĩ. ¹⁸ Ò tenebur ein sur wiyan gen, ayag teneub enei bun sur afiyēdin. ¹⁹ Idi nigin, aya yug adok bagai afonok, are idig momoĩ bagai dogo adok Negur difenēf nigin.

Jesus Momoiya Tamo Kayau Ganan Nigin Kosē Yen

²⁰ “Aya neu kosēya are idi nigin dogol sã, idi neid od bunem, aya nigin momoĩ douf anidi nigineg, aya kosē auf, ²¹ idi ganan tekelei youf nigin kosē auf, Dei ò aya bun ubodok, aya ò bun abodok gen, idig ada bun dibodõ di, teneub enei nē tamo kayau, onom aya sur wiyan anĩ, momoĩ douf nigin. ²² Fula fiya medeĩya ò wanan anĩ, idi afenēdin, are ada tekelei gen, idig tekelei youf nigin. ²³ Aya idi bun, ò aya bun, are idi tekelei youf nigin, anĩ bunem, onom aya sur wiya fen, aya nigin waũ laa fedig gen, idi nigineg waũ laa fedig anĩ, teneub enei nē tamo kayau keleĩ youf.

²⁴ “Dei, idi ò aya wanan anidi, aya abodok nē an, aya geid mabodõf anĩ orouf, are idi neu fula fiya medeĩya dilouf nigin, fula fiya medeĩya anĩ teneub kare fiya sã mog, ò aya nigin waũ laaf fen, wanan anĩ.

²⁵ “Dei madur bagai, teneub enei nē tamo kayau idi ò keleĩ sã, anĩ ere, aya ò keleĩ, neu dõ fiya tar idi, onom aya sur wiyan anĩ keleĩ. ²⁶ Aya ò anĩ afelnēdi di, idi ò keleĩ, ò nigin fau fau afelnēdif alauf, are ò aya nigin waũ laa fiya anĩ, idi bun ibodõf ado, ayag idi bun abodõf nigin.”

18

Jesus Dirounen

(*Matyu 26:47-56; Mak 14:43-50; Luk 22:47-53*)

¹ Jesus od enei wogõ yel fen, ì yogon dõ fiya tar geid, Kidron naan uus atu dilen. Kidron sitakã kabĩ taka ibodon, ì yogon dõ fiya tar geid, kabĩ atu dilen.

² Kiwai tamo Judas ì modoũ anĩ keleĩ, ere nigin, sain musei Jesus in dõ fiya tar geid an guru difedig. ³ Anĩ nigin, Judas, kusĩ tamo tunĩ ado, tempel lo fiya tamo tunĩ pris mudur adodo Farisia tamo geid idim sur difedin anidi geif fen, kabier uyu ile di, dilen. Idi yal, lam, kusĩ nē waila guri de fen, dilen.

⁴ Jesus, ì bun wõ youf anĩ ganan kelein, ì iyok ile to fedin, “Ã ai umirnēgef?”

⁵ Idi diron, “Jesus Nasaret tamal.”

Jesus iron, “Aya im.” Kiwai tamo Judas, idi geid an difaren. ⁶ Sain Jesus iron, “Aya im,” ye di, idi soso de dile, tenebur kuku den.

⁷ Jesus baban idi to fedin, “Ã ai umirnēgef?”

Idi diron, “Jesus Nasaret tamal.”

⁸ Jesus iron, “Aya ã arokeneim, aya im. Aya anĩ umirnagauf are, tamo eneidi utornēdig len, dile.” ⁹ Agef iron are, od Jesus wogõ yen anĩ kisi falauf nigin, “Aya ò wanan anidi taka to folõ afelen.”*

¹⁰ Age dife di, Simon Pita ì, dimig adon anĩ ul feis yale, pris neid mudur nē ferfer weder biya melem salõf iran. Ferfer anĩ yana Malkus.

¹¹ Age fe di, Jesus Pita irokenen, “Ogon dimig yogon modoũ bun kel uno! Dei aya naan kap ifanan anĩ, aya to ãf de?”

Jesus Anas Garan Dirou Dilen

* **18:9:** Jon 6:39

¹² Age ye di, kusī tamo, nedi mudur, Juda neid tempel lo fiya tamo geid, Jesus dalen. Idi ī difo ken, ¹³ Anas garan ket dirou dilen, Anas ī, Kaiafas ne ten, yar anī bun Kaiafas ī pris neid mudur ibodon. ¹⁴ Kaiafas im, Juda tamo kayau wedereid irou fen, tamo tekeleim tamo kayau ganan nigin laa fouf, are deuf, yen.

Pita Jesus Nigin Wa Fen

(*Matyu 26:69, 70; Mak 14:66-68; Luk 22:55-57*)

¹⁵ Simon Pita, Jesus nē dō fiya tar taka ado, Jesus dō difen. Pris neid mudur, dō fiya tar taka anī keleī, anī nigin, ī Jesus ado, pris neid mudur nē fofomalan kau namen dilen. ¹⁶ Anī ere, Pita ī serē bobogen ifaren. In dō fiya taka ī pris neid mudur ī nigin keleī, ī baban serē ke len, bobog lo fiya kayau iroken ken, Pita yale irou, namen dilen.

¹⁷ Kabī kayau bobog lo fedig ī, Pita to fiyen, “Ōg be, in dō fiya tamo taka anī sã de?”

Pita iron, “Aya sã.”

¹⁸ Menig nigin, ferfer, tempel lo fiya tamo geid, yã kũ de fen, salili de, bouweid diroron. Pita ĩg weim difar fen, bouwa ironon.

Pris Neid Mudur Jesus To Fiyen

(*Matyu 26:59-66; Mak 14:55-64; Luk 22:66-71*)

¹⁹ Fō namen, pris neid mudur, Jesus ī, in dō fiya tar nigin ado, yogon od tai fedin nigin to fiyen.

²⁰ Jesus solof iron, “Aya tamo kayau atun, mala yaor wogō aun. Aya sain faimud Juda neid uub fō bun be, tempel bun, Juda tamo kayau ganan guru de mog, wogō audig. Aya iminēyan taka to wogō aun. ²¹ Ere nigin anī aya to wiyaf? Idi aya wogō au di, karī difiyan onou idi to wiyēid. Ere b aya wogō aun, idi keleī.”

²² Jesus age ye irō di, tempel lo fiya tamo taka non ifaren anim, Jesus wala fãf fen, iron, “Pris neid mudur anī, ō ago urokenēdig de?”

²³ Jesus solof irokenen, “Aya ereb kũ fenēya arom are, ō ereb kũ fenēya anī urōf. Anī ere, aya momoi arom are, ere nigin ō walau fã wol?” ²⁴ Age ye di, Anas

Jesus difon ado, pris neid mudur Kaiafas gein sur fen.

Pita Jesus Nigin Baban Wa Fen

(*Matyu 26:71-75; Mak 14:69-72; Luk 22:58-62*)

²⁵ Simon Pita bouwa irorouk ifar mog, idi ī to difiyen, “Ōg be, in dō fiya tamo taka anī sã de?”

Ī waf fen, iron, “Aya sã.”

²⁶ Pris mudur nē ferfer taka, ī Pitam weder salōf iran nē sirag anim iron, “Aya ō ī urom kabier to ailiyeim de?” ²⁷ Pita baban waf mog, kaisã bagai tataro kokorok yen.

Jesus Pailat Mala Bun Ifaren

(*Matyu 27:1, 2, 11-31; Mak 15:1-20; Luk 23:1-25*)

²⁸ Age fe di, Juda tamo, Jesus Kaiafas bun tamal dale dirou, Rom gawaman mudur nē fō bun dilen. Are bonimeī bagai, Juda tamo idi Pasa nē saaf dãf nigin, kal sese de fen, gawaman mudur nē fō namen to dilen. ²⁹ Anī nigin, Pailat idi gedin ulō yeis isi fen, to fedin, “Ere od ã tamo enei bou bun unogouf?”

³⁰ Idi solo de diron, “Ī lo wal fiya tamo sam are, amã ō gein to marou masim.”

³¹ Pailat idi irokenēdin, “Ã aug ī waleg fen, āgenei lo bun es wiyēg.”

Juda tamo idi Pailat dirokenen, “Amam tamo yukesiya nigin Rom gawaman to yo faman.” ³² Are Jesus ī naig be fe, laa fouf nigin wogō yen anī, kisi falauf nigin agef wō yen.

³³ Age de di, Pailat aaben kel ile, Jesus iweigne ken, to fiyen, “Ō Juda neid king de?”

³⁴ Jesus solof iron, “Ō ogon kisim od enei urok de, tunim be aya nigin ō dirokono?”

³⁵ Pailat solof iron, “Aya Juda tamo de? Ō ogon tamo kayaum pris odudug geid, aya bun dirousiyom. Ō ere taka tau agon?”

³⁶ Jesus iron, “Aya neu tano teneub enei nē sã. Aya neu tano teneub enei nem are, neu kabī tamo, Juda tamom aya to daleyauf nigin kusī dem. Anī ere, neu tano teneub enei nē sã.”

³⁷ Age ye di, Pailat Jesus irokenen, “Age fouf, ō king de?”

Jesus solof iron, “Õ ogo yer urok, aya king. Enei nigin aya wõ aun, are momoi anĩ wogõ auf nigin, anĩ nigin, aya tenebur asin. Momoi nẽ ganan, aya karĩ difiyadig.”

³⁸ Pailat to fen, “Ere anĩ momoi?” Age yel fen, ï baban Juda tamo gedin serẽ ile, idi irokenẽdin, “Aya ï bun mosor taka to ailef. ³⁹ Anĩ ere, ãgenei tobonuneĩ eig fiya, Pasa naa bun, kalabus tamo taka aliskeneĩdig. ã Juda neid king aliskeneĩf anĩ oroyeik de?”

⁴⁰ Idi baban diweig, solo de diron, “Sã, ï sã! Barabas anĩ wanamãf!” Barabas ï anĩ bẽ tamal.

19

Pailat Jesus Aa Tetek Bun Dũf Nigin Iron

¹ Age de di, Pailat Jesus yale fen, irõ di, wagĩ difiyen. ² Kusĩ tamo malũ duri ado dale, teter tanak kori de fen, ï mudur bun kurũ difiyen. Idi gabar kadaũ dale difounne ken, ³ idi baba baban ï wagen dile fen, diron, “O Juda neid king gai gai ibodõf!” Age de fen, wala fã difen.

⁴ Pailat baban serẽ kel isi fen, Juda tamo irokenẽdin, “Ulegef, aya ï bun mosor taka to ailef anĩ, ã keleĩ youf nigin, ï ã gein arou asif.” ⁵ Sain Jesus malũ duri kurũ difiyen, gabar kadaũ difounnen ado, serẽ isi di, Pailat idi irokenẽdin, “Tamo are yeir!”

⁶ Pris odudug, tempel lo fiya tamo geid, ï dile fen, diweig diron, “Aa tetek bun ùf! Aa tetek bun ùf!”

Anĩ ere, Pailat idi irokenẽdin, “ã aug waleg, aa tetek bun ùg. Aya ï bun mosor taka to ailef.”

⁷ Juda tamo idi solo de diron, “Amã nemã lo ado, lo anĩ kilei ï laa foug, ere nigin, ï yogo aya Negur Naal yedig.”

⁸ Od enei Pailat karĩ ye fen, fatuk bagai kumĩ yen. ⁹ ï baban fõ aaben kel ile fen, Jesus to fiyen, “Õ nain tamal?” Anĩ ere, Jesus aiten to yalen. ¹⁰ Pailat Jesus irokenen, “Õ aya od to urokanauf de? Aya õ kafĩ fiya bun tamal yalelnõya nigin megeir ado, õ aa tetek bun inõya nigin megeir ado anĩ, õ keleĩ sã de?”

¹¹ Jesus solof iron, “Ilun tamal megeir õ to ifonom are, aya ogon megeir farumen

to abodom. Anĩ nigin, tamo taka ï aya õ imã bun inenan, ï yogon mosor odug bagai, ogon wal fiya.”

¹² Jesus Pailat age fiyẽ di, Pailat Jesus kafĩ fiya bun tamal yalisenẽf nigin, naab imiren, anĩ ere, Juda tamo idi diweig diron, “Õ tamo enei utornẽ di, ilauf are, õ Sisa* nẽ mou sã. Taka ï yogo anĩ king yef, ï Sisa kiwai ifenek.”

¹³ Pailat od enei karĩ ye fen, Jesus serẽ yale irou isi fen, es fiya tamo nẽ sia, Meein Bedu dedig modoũ bun ibodon (Meein Bedu are, Hibu od nem yana Gabata).

¹⁴ Naa are Pasa Sifa nigin dodok fiya naa, gaa atun age fiya, naa anĩ ilele di, Pasa naa wõ youf.

Pailat Juda tamo idi irokenẽdin, “ãgenei king yeir.”

¹⁵ Anĩ ere, idi diweig diron, “Uru uraile! Uru uraile! Aa tetek bun ù!”

Pailat to fen, “Aya ãgenei king aa tetek bun aũf de?”

Pris odudug solo de diron, “Amã king taka sã, Sisa dogol.”

¹⁶ Anĩ nigin, Pailat Jesus aa tetek bun dũf nigin, idi imeid bun inon.

Jesus Aa Tetek Bun Dun

(*Matyu 27:32-44; Mak 15:21-32; Luk 23:26-43*)

Anĩ nigin, kusĩ tamo Jesus dalen. ¹⁷ ï yogon aa tetek faali fe, modoũ Mudur Tuwan (Hibu od nem Golgota dedig) iselen. ¹⁸ An idi Jesus aa tetek bun dun, tamo uru idig, ï geid aa tetek bun didenen, idi urom si sitakã, Jesus atun.

¹⁹ Pailat irõ di, eig de ditot fen, aa tetek bun degẽ difen: JESUS NASARET TAMAL, JUDA NEID KING. ²⁰ Juda tamo kayau musei itotoya enei diwesen, ere nigin, Jesus aa tetek bun dun modoũ are taun non. Itotoya are Hibu od nem, Rom od nem, Grik od nem. ²¹ Juda neid pris odudug Pailat dirokenen, “To ‘Juda neid King’ wo utot, anĩ ere, tamo enei yogo aya Juda neid king yen, ago utot.”

²² Pailat aitedin yale iron, “Ereb aya atoton, are de agef ibodõf.”

²³ Sain kusĩ tamo Jesus aa tetek bun du ken, Jesus nẽ kolos gei difeid, aiwa adodo

* **19:12:** Rom neid king odug.

foi difen, are teke tekelei kusī tamo mugu mugum gei difen, kolos meluk ilon tamal dogol foi fiya sã. Kolos are meluk tekelei tokō feleya diwan.

²⁴ Idi abob dirokenen, “Ada anī to serek tafouf, ada aisaī tara ken, aibem yalouf anī tailauf.”

Negur nē Itotoya eig ye irok anī kisi falauf nigin, agef wō yen,

“Neu kolos idi atun foi difeid fen,

neu kolos meluk nigin aisaī diran.”†

Anī nigin, kusī tamo idi enei age difen.

²⁵ Jesus nē aa tetek sirin, Jesus sina, sina nē tura, Maria Kolopas aiwa, Maria Magdala tamal an difaren. ²⁶ Sain Jesus mala irã, sina ado in dō fiya tamo taka ī nigin wau laa fedig non difar mog, ileid fen, Jesus ī sina irokenen, “Kayau, ō naal yeir.” ²⁷ Age ye fen, Jesus yogon dō fiya tamo irokenen, “Enei ogon sinã.” Naa anī bunem ilen, dō fiya tamo enei sinawau yale, yogon fō bun iroule, kulatun fiyen.

Jesus Laa Fen

(*Matyu 27:45-56; Mak 15:33-41; Luk 23:44-49*)

²⁸ Anī dumen, Jesus keleī, ereb ereb ganan mogo gama bure felel, Negur nē Itotoya bun ibodok anī kisi falauf nigin, Jesus iron, “Aya naan ail fiyaf.” ²⁹ Wain makik yag ado an ibodon, idi spons dale, wain bun nu dife, aa hisop werē bun dino fen, dales, Jesus sigoron dinon. ³⁰ Jesus wain makik anī yale fen, iron, “Gama bure.” Age yel fen, guyu kureis, yogon uur itoron.

³¹ Gama naa are dodok fiya nē, we fele di, are Sabat naa, Sabat anī are, uub odug. Juda tamo idi, Sabat naa bun, bouweid aa tetek bun ifareya ditorōdig, anī nigin, idi yeid weweur difeid, bouweid gei difalaisiyouf nigin, Pailat dirokenen. ³² Anī nigin, kusī tamo disin, tamo taka ket ye weweur difen, takag age difen, idi Jesus geid, aa tetek bun didenen anidi. ³³ Anī ere, idi Jesus wagen disi fen, ī mogo laa fen anī dilen, anī nigin, idi ī ye to weweur difen. ³⁴ Anī fotokar, kusī tamo takam, ot nem Jesus siri gilī fe di, naud naan ado

fi felen. ³⁵ Tamo enei ilen im wogō yen, yogon wogōya are momoi, ī keleī, ī momoi wogō yef, are āg momoi gouf nigin wogō yef. ³⁶ Negur nē Itotoya enei kisi falauf nigin agef wō yen, “Yogon tuwa taka to were fouf,”‡ ³⁷ agef fen, Negur nē Itotoya takag irok, “Idi siri gilī difen tamo ī, idim dilouf.”§

Jesus Mū Difen

(*Matyu 27:57-61; Mak 15:42-47; Luk 23:50-56*)

³⁸ Anī dum, Josef Arimatea tamal, Jesus bouwa buru yalouf nigin Pailat irokenen. Josef ī, Jesus nē dō fiya tamo taka, anī ere, ī Juda tamo nigin kumī ye fen, im-inēyan Jesus dō fen. Pailat yo ye di, ī isi, Jesus bouwa yalen. ³⁹ Josef ī Nikodemus ado fen, disin, kulu tamo anim, bō Jesus gein ilen. Nikodemus ī, marasin yana mer (myrrh) aloi (aloe) ado falei difen anī iroulen, anī nē morō teti kilogram age fiya. ⁴⁰ Idi urom Jesus bouwa dale, marasin ado gabar lalau nem filu difen. Juda neid tamo mū fiya tobonunã bunem age difen. ⁴¹ Jesus aa tetek bun dun nē modoū an, kabī taka ado, kabier an, ku mata taka ado, taka an to goro difen. ⁴² Naa are Juda neid dodok fiya nē naa nigin ado, tokō kug melsã nigin, idi Jesus an goro difen.

20

Matmat Gorō Ibodon

(*Matyu 28:1-8; Mak 16:1-8; Luk 24:1-12*)

¹ Uub nē naa matu Sande bun, bonimeī bagai gugum ado, Maria Magdala tamal matmat bun ile fen, mala irã, bobog bun meein yaleleya ilen. ² Anī kayau, Simon Pita, dō fiya taka Jesus ī nigin wau laa fedig anidi gedīn gudu ref ile, irokenēdin, “Idi Odug matmat bun tamal dale diroulen, ī nain be dinon, ada keleī sã!”

³ Anī nigin, Pita, dō fiya tamo taka ado, matmat bun dilen. ⁴ Urom gududu den, anī ere, dō fiya tamo takam Pita wal fe, ī ket matmat bun wō yen. ⁵ Ī iti ken, fai yen, gabar lalau filu difen anī an yen mog, ilen, anī ere, ī kuren to ilen. ⁶ Age fe di, Simon Pita dum dō fiyen, wō ye fen, tokō fel,

† 19:24: Sam 22:18 ‡ 19:36: Eksodas 12:46; Namba 9:12; Sam 34:20 § 19:37: Sekaraia 12:10

matmat kuren ile, gabar lalau filu difen an yen mog, ilen,⁷ mū difen gabar Jesus mudur sile difen anīg ilen. Mudur sile difen gabar are, yogo fire kori fel, gabar lalau filu difen anī firen ibodon.⁸ Age fe di, dō fiya tamo taka, ī ket matmat bun wō yen īg, kuren ilen. Ī ile fen, momoi yen.⁹ (Jesus laa bun tamal kel fā youf ya, Negur nē Itotoya bun yenek anī, idi fau wedereid fokōya sã.)

Jesus Maria Magdala Tamal Bun Wō Yen
(Matyu 28:9, 10; Mak 16:9-11)

¹⁰ Age de fen, dō fiya tar, nedi fō bun ke de dilen. ¹¹ Anī ere, Maria matmat serē inā yalef ifaren. Ī inā ado inā ado iti ken, matmat namen fai yen. ¹² Agef fen, ī, engel uru kolos lalau adodo, Jesus yenen modoū bun dibod mog, ileidin, taka muduren, taka yen.

¹³ Idi ī to difiyen, “Kayau, ō ere nigin inā walef?”

Maria iron, “Idi neu Odug dale diroulen, ī nain be dinon anī, aya keleī sã.” ¹⁴ Age ye fen, ī falei yel, Jesus an ifar mog ilen, anī ere, are Jesusem ya anī to kelein.

¹⁵ Jesus iron, “Kayau, ō ere nigin inā walef? Ō ai anī umirnek?”

Maria kisi fen, ī kabī lo fedig anim ye fen, irokenen, “Tamo biya, onom ī wale uroulen ouf are, nain be unon anī, aya urokana di, aya ī alouf.”

¹⁶ Jesus ī irokenen, “Maria.”

Maria ī falei yel, Jesus wage ifen ken, Hibru od nem irokenen, “Raboni!” (anī nē gariya, Tise).

¹⁷ Jesus iron, “Aya to urouna, ere nigin, aya Dei gein fau kel iseleya sã. Anī ere, neu turau tar gedīn ule urokeneīd, ‘Aya neu Dei, āgenei Temeī, neu Negur, āgenei Negur bun kelau eselauf.’ ”

¹⁸ Anī nigin, Maria Magdala tamal, in dō fiya tar gedīn ile irokenēdin, “Aya Odug ailel!” Age ye fen, Maria Jesus od enei irokenen anī, idi wogō fiyēdin.

Jesus In Dō Fiya Tar Meleid Bun Wō Yen
(Matyu 28:16-20; Mak 16:14-18; Luk 24:36-49)

* **21:1:** Yana taka are Galili Daliiyou.

¹⁹ Uub nē naa matu Sande aragau anī bun, Jesus nē dō fiya tar, Juda tamo nigin kumī de fen, sukar kotū difel, aaben guru de dibod mog, Jesus isi, idi atun ifar fen, iron, “Wau inosiya ā ado ibodōf!” ²⁰ Od enī irokel fen, ī ima siri ado idi ifelnēdin. In dō fiya tar idi, Odug dile fen, fatuk bagai kulī den.

²¹ Jesus baban iron, “Wau inosiya ā ado ibodōf! Dei aya sur fiyan gen, ayag ā sur ayeik.” ²² Age ye fen, idi bun fuu fiyeīd fen, iron, “Awa Uur Fateul waleg. ²³ Ā, tamo neid mosor nigin, wedereī tu kalauf are, idi neid mosor nigin weder tu kelef, ā idi neid mosor nigin, wedereī to tu kalauf are, idi neid mosor nigin weder to tu kelef.”

Jesus Tomas Mala Bun Wō Yen

²⁴ Anī ere, Jesus in dō fiya tar meleid bun wō yen sain, tuwelf idi neid taka Tomas (yana taka Didimus), idi geid to ibodon.

²⁵ Anī nigin, dō fiya tar tunim ī dirokenen, “Amā Odug mailen!”

Anī ere, ī idi irokenēdin, “Aya yogon ima bun tuti ba to ailau, aya imau gege tuti ba bun to ano fen, aya imau siri bun to anouf, aya to momoi auf.”

²⁶ Uub tekelei ilele di, in dō fiya tar baban fō bun dibodon, are Tomas geid. Sukar kotū difedin, anī ere, Jesus isi, idi atun ifar fen, iron, “Wau inosiya ā ado ibodōf!” ²⁷ Agef fen, Jesus Tomas iroke-nen, “Ogon imā gege ein uno, neu imau uleid. Imā urā siru bun uno. Waū to ilef isif fouf, momoi dogol wo.”

²⁸ Tomas Jesus irokenen, “Neu Odug, neu Negur!”

²⁹ Age ye di, Jesus Tomas irokenen, “Ō malam aya uleyaf nigin, momoi wof. Idi meledim to dile fen, momoi def, are el fedif.”

³⁰ Jesus, in dō fiya tar meleid bun, memelik musei inodin, are buk enei bun itotoya san. ³¹ Anī ere, Jesus ī Kristus, Negur Naal anī ā momoi ge fen, ī yana nigin momoiya bunem, ā mata walougouf nigin enei itoton.

21

Jesus Gau Yaleyā Bun Memelik Inon

¹ Anī dum, Jesus baban in dō fiya tar gedin, Taiberias daliyoun* wō yen. Anī eig fe wō yen. ² Simon Pita, Tomas (yana taka Didimus), Nataniel Kana tamal Galili teneub bun, Sebedi gere tar ado, dō fiya tar uru anidim guru de dibodon. ³ Simon Pita idi irokenēdin, “Aya gau nigin ayō fenē.” Idi diron, “Amāg ō geid talauf.” Anī idi dile, waag bun sosō den, anī ere, bō anī bun, gau taka to dalen.

⁴ Bonimeī bagai, Jesus maaī yerin ifaren, anī ere, dō fiya tar idi, Jesusem ya anī to kelein.

⁵ Ī idi iweig irokenēdin, “Mou tar, ā gau taka tau walegel?”

Idi aiten dalen, “Sā.”

⁶ Ī irokenēdin, “Waag siri biya melem kakāg urāg fen, tunī gei gouf.” Idi age difen sain, idi kakāg dī fiya kisi feleya san, ere nigin, gau musei biya.

⁷ Anī in dō fiya tamo Jesus ĩ nigin wau laa fedig ĩ, Pita irokenen, “Are Odugem!” Ī, “Are Odugem,” ye di, Simon Pita karī ye fen, ĩ kolos teten tamal inū inon anī yale, luwa guf fen, naanū ifū iran. ⁸ In dō fiya tar tunī ganān, waag bun disī, kakāg gau isokosen ado dī de dilen, ere nigin, are idi daliyou yeri gerō sā, handred mita age fiya. ⁹ Sain idi kutū desin, yā kaureya anī bun, gau yā bē bret tunī ado dilen.

¹⁰ Jesus idi irokenēdin, “Ā gau gama bagai walegel tunī ousig.”

¹¹ Simon Pita waag sō ye fen, kakāg dī falaisi, maaī yerin irosin. Kakāg are gau odudug isokosen, gau are 153, gai musei biya, anī ere, kakāg to kokour fen. ¹² Jesus idi irokenēdin, “Usig, saaf wōg.” In dō fiya tar kukī de fen, takam ĩ to, to fiyen, “Ō aim?” Idi keleī, are Odug yogo. ¹³ Jesus isi, bret yale fen, idi ifenēdin, gaug de age fen. ¹⁴ Jesus laa bun tamal kel fā ye fen, in dō fiya tar meleid bun wō yen are, gama eneim towo fen.

Jesus Pita Baban Wau Yalen

¹⁵ Sain idi saaf dakas fen, Jesus Simon Pita irokenen, “Simon Jon naal, ō aya nigin fatuk waū laa fef, tunī eneidi neid wal fiya de?”

Pita iron, “Odug, momoi, ō keleī, aya ō nigin wau laa fef.”

Jesus iron, “Neu sipsip momou ufoutneīd.”

¹⁶ Baban Jesus iron, “Simon Jon naal, ō aya nigin waū laa fef de?”

Pita solof iron, “Odug, momoi, ō keleī, aya ō nigin wau laa fef.”

Jesus iron, “Neu sipsip kulatun wiyēdiyof.”

¹⁷ Jesus Pita iroken towo fe fen, iron, “Simon Jon naal, ō aya nigin waū laa fef de?”

Pita wau moron, ere nigin, Jesus ĩ to fiyē towo fen, “Ō aya nigin waū laa fef de?” Pita iron, “Odug, ereb ereb ganān ō keleī, ō keleī, aya ō nigin wau laa fef.”

Jesus iron, “Neu sipsip ufoutneīd. ¹⁸ Aya ō momoi bagai arokonok, sain ō gaun, ō naki rel, ogon oroya dō fen uledig, anī ere, sain ō tubau bun, imā walese di, taka nem ifōyo ken, ō to oroyok nē an ĩrouleyōf.” ¹⁹ Pita naig be fe, laaf fen, Negur fula fiya medeīya ifenēf anī nigin, Jesus od enei iron. Age ye fen, Jesus Pita irokenen, “Aya dō wiya!”

²⁰ Pita falei yel fen, dō fiya taka Jesus ĩ nigin wau laa fedig anī, dō feid mog, ilen. (Tamo enei bō saaf yōya bun, Jesus akoron mudur isen ken, iron, “Odug, aim anī ō kiwai ifonōf?”) ²¹ Sain Pita tamo anī ile fen, Jesus to fiyen, “Odug, tamo enei ĩ naig fouf?”

²² Jesus solof irokenen, “Tamo enei mata ibod mog, aya kelauf anī aya orouf aufeg, ō nigin ere yok? Ō de aya dō wiyauf.” ²³ Enei nigin, dō fiya tar idi atun, od enei iyokelen, are dō fiya tamo enei to laa fouf den. Anī ere, Jesus, tamo anī to laa fouf ya nigin to iron, Jesus ĩ eig ye iron, “Tamo enei mata ibod mog, aya kelauf anī aya orouf aufeg, ō nigin ere yok?”

²⁴ In dō fiya tamo enei, anī ganān wogō ye fen, itoton. Amā keleī, in od are momoi.

²⁵ Jesus ĩ ereb ereb museig age fen. Aya kisi afef, anī ganān buk bun ditotlem are, teneub ganān bun modoū sam.

Aposel

Jesus Saa Ilun Yale Irou Iselen

¹ Teofilus, uruwa buk aya atoton anī bun, Jesus gariya ino, ereb ereb age fen ado ifelnēdif ile, ² aposel ī igirnēdin anidi Awa Uur Fateul bunem faded fiye keleid fen, Jesus saa ilun iselen nē naa bun, aya anī ganan nigin atoton. ³ Ī darau yale fen, laa fen, mata kel fā ye fen, tamo eneidi meleid bun wō yen, agef fen, idi ī mata ibodok ya anī momoi douf nigin, ereb ereb musei age fen. Naa foti anī namen, ī idi meleid bun wō ye fen, Negur tano nigin wogō fiyēdin. ⁴ Jesus idi geid saaf doko dibod ken, ī idi eig ye fadim yukenēdin, “Ā Jerusalem to utorōgouf, anī ere, ereb aya wogō au di, karī gen, are neu Dei ereb sur afouf yen anī tari gouf. ⁵ Are Jon ī naan nem dogol igunein, anī ere, naa tunī ilele di, ā Awa Uur Fateulem naan iguneif.”

⁶ Anī nigin, sain idi takai guru de dibod ken, idi ī to difiyen, “Odug, ō sain enei bun, Israel neid tano baban unouf de?”

⁷ Jesus idi irokenēdin, “Are Dei ī yogon megeir bunem, sain nanī be naa inon ibodok anī, ā to keleif youf. ⁸ Anī ere, ā fau sain Awa Uur Fateul ā bun isiyouf are, megeir walogouf, agog fen, ā aya age afen anī nigin wogōg fen, Jerusalem bun, Judia distrik ado Samaria distrik ganan bun ile, teneub idikeleya buneg, aya nigin wogō gouf.”

⁹ Ī enei irokel fen, idi meleid bun bagai, ī yale irou iselen, ī lalo bun iminkele di, to dilen.

¹⁰ Jesus isele di, idi saa ilun ditad se, lo difef den mog, kaisā bagai tamo uru kolos lalau adodo, idi siridin difaren. ¹¹ Idi diron, “Galili tamo ā, ere nigin ein ufareg utadseg fen, saa ilun lo gef? Jesus enei ā bun tamal yale irou, saa ilun iselel, ā ī saa ilun isel mog, ulegel kilei bagai, agef ī kel isiyouf.”

Judas Fotokar Matias Digirin

¹² Age de fen, idi Moul Arei dedig bun tamal, Jerusalem keku de dilen, Moul Areinem Jerusalem ileya are wan kilomita age fiya, anī nigin, Sabat naa* bun iyōya kisi feleya. ¹³ Sain idi Jerusalem wō de fen, idi aab ilun dibodōdig nē an diselen, idi eneidim, Pita, Jon, Jems, Endru, Filip, Tomas, Batolomyu, Matyu, Jems Alfeus naal, Simon Selot† taka, Judas Jems naal. ¹⁴ Idi ganan guru de, waud tekelei dino fen, toku kosē dedig, kayau tunī geid, Maria Jesus sina, Jesus tura tar geid.

¹⁵ Sain anī bun, Pita, momoiya tamo kayau handred tuwenti age fiya idi atun, ifar fen, iron, ¹⁶ “Turau tar, kulu Awa Uur Fateulem Dawid sigoron, Judas ī tamo uyu iroukenēdi di, Jesus dalen ī nigin wogō yen anī, Negur nē Itotoya bun ibodok, are de agef kisi felen. ¹⁷ Ī amā nemā taka, ī amā weim kabī enei malen.”

¹⁸ (Judas yogon sane bunem moni yale fen, teneub taka na yalen, an ī kubū ye mudur iten ken, yogon bouwa faraf fen, te galelei adok ulō yesin. ¹⁹ Age fe di, tamo kayau Jerusalem dibodon anī ganan, od anī karī den, anī nigin, teneub anī, dogo neid od nem yana dū Akeldama den, anī nē gariya, Naud Teneub.)

²⁰ Pita wogō tobol fe, irokeneg iron, “Buk Sam bun eig ye itoton, “Yogon modoū are fonou inouf, an taka nem to ibodōf,† takag,

“Taka nem ī fotokar yogon kabī yalouf.’§

²¹ Anī nigin, Odug Jesus ada atun kabī yale ilef isif mog, ²² Jon naan igunēdin sain bunem ile, Jesus ada bun tamal, yale irou iselen sain bun, sain ganan ada weim tabodon anidi taka tagirnēf. Are idi eneidi atun, takam Jesus mata kel fāya nigin, ada geid od wogō tauf.”

²³ Anī nigin, idi tamo uru dinenēdin, Josef Basabas dedig (yana taka Jastus), taka Matias. ²⁴ Age de fen, idi kosē de fen, diron, “Odug, tamo ganan neid waud ō keleif, uru eneidi bun, ō aib uginin anī ufelnamā, ²⁵ are Judas ī itor ken, yogon modoū bun ilen anī, ī fotokar aposel kabī

* **1:12:** Sabat naa anī, Juda neid uub nē naa. † **1:13:** Juda neid kusī mala taka, idi Rom gawaman ado kusī dedig. ‡ **1:20:** Sam 69:25 § **1:20:** Sam 109:8

yalouf nigin.” ²⁶ Age de fen, idi aisaĩ dira ken, aisaĩ Matias wagen kubũ yen, anĩ bunem, Matias ĩ aposel ilewen baguf weimen.

2

Awa Uur Fateul Pentikos Naa Bun Isin

¹ Sain Pentikos naa* isi di, idi ganan modoũ tekelei bun, guru de dibodon. ² Idi an dibod mog, kaisã bagai, ait yau total ado gugu redig gen, saa ilun tamal isi fen, fõ aab ino yalen. ³ Idi ereb yã bale gen isi di, dile mog, fara furu feid, idi mugu mugu tetedin ibodon. ⁴ Age fe di, idi ganan Awa Uur Fateulem aura fiyēdi di, gariya dino, od fire fire bunem wogõ den, Awa Uurem fiyēdi di, age difen.

⁵ Sain anĩ bun, Juda tamo Negur nigin momoi den idi, teneub ganan bun temeleid disi, Jerusalem dibodon. ⁶ Sain idi ait anĩ karĩ de fen, tamo kayau musei idi nene de fen, guru difen, ere nigin, idi mugu mugu dogo neid od bun wogõ den anĩ karĩ den. ⁷ Idi fatuk bagai terē de fen, diron, “Tamo od wogõ def eneidi ganan, Galili temeleid sã de? ⁸ Naig fe di, ada mugu mugu, idi neda od bunem wogõ de di, karĩ tauf? ⁹ Ada fire firen temelada, Patia, Media, Elam kantri, Mesopotamia, Judia distrik, Kapadosia, Pontus, Asia provins, ¹⁰ Frigia, Pamfilia distrik, Isip kantri ado Libia distrik tunĩ Sairini taun non. Amã tunĩ Rom kantri temelamã, Juda temeleid ado haiden Juda neid momoiya bun falei maun, ¹¹ Krit nuyo ado Arabia distrik. Ada mugu mugu neda od bun, Negur kabĩ odug age fen anĩ wogõ de di, karĩ tauf.” ¹² Idi terē de nene de fen, abob toti difen, “Eĩ ere gariya nigin?”

¹³ Anĩ ere, tunĩ idi weli difiyeĩd diron, “Idi wain fatuk domõ.”

Pita Tamo Kayau Meleid Bun Wogõ Yen

¹⁴ Pita aposel ilewen geid difar fen, ait odugem tamo kayau wogõ fiyēdin, “Juda tamo kayau ado ã ganan Jerusalem ubodõgef, utorõg len, aya ã enei faded ayeĩf, kee releg fen, aya wogõ auf anĩ karĩg. ¹⁵ Æ kisi gef, tamo eneidi wain

domõ gef, age fiya sã, gama eĩ nain kilok bonimeĩ! ¹⁶ Anĩ ere, eĩ are Profet Joel eig ye wogõ yen:

¹⁷ “ ‘Negur irok, idikeleya naa bun, aya neu Awa Uur, tamo kayau ganan bun gõ afalauf.

Age afe di, ãgenei kesu, kayau momoul ado, profet od wogõ douf, ãgenei tamo gaũ meleid bun seleulã kurã fouf, ãgenei tamo tubau dimĩdiyof.

¹⁸ Neu ferfer tamo ado kayau geid buneg, aya neu Awa Uur naa anĩ bun gõ afalaisi di, idi profet od wogõ douf.

¹⁹ Aya saa ilun, memelik fire fire afelnēdiyof, tenebur ein uris anodiyof. Naud, yã ado, kaau tubutubuya wõ youf.

²⁰ Odug nē Naa odug fula fiya medeĩya ado, fau to isi mog, gaa gugum kele fen, ogõ naud gen wõ youf.

²¹ Age fe di, aib taka ĩ, Odug yana yale iweignēf are, Odug ĩ kel yalouf.’†

²² “Israel tamo kayau, od enei karĩg, ã aug keleĩ, Negur ã atun, Jesus Nasaret tamal bunem memelik, ereb urug bagai ado, uris inodin, anĩ bunem Jesus ĩ Negurem sur fiyen anĩ, Negur ã ifelnein.

²³ Tamo enei nigin, Negurem ereb ereb wõya sã mog, yogon keleĩ ado kisi bunem, ĩ ã imeĩ bun inon, age fe di, ã tamo sesenem disenneĩ di, ĩ laa fouf nigin, aa tetek bun tuti nem ũgen. ²⁴ Anĩ ere, Negur ĩ laa bun tamal turĩ fe di, mata kel fã yen, laa nē darau bun tamal yalelnen, ere nigin, laa anim ĩ ironēya kisi feleya sã. ²⁵ Are Dawid ĩ nigin iron:

“ ‘Odug sain faimud malau bun ifar mog, ailedig.

Ĭ aya imau biyalem ibodok nigin, aya to kumĩ au fen, terē auf.

²⁶ Anĩ nigin, neu wau seref fen, sigorou seli abidig,

* **2:1:** Naa anĩ are, Pasa naa bunem naa fifti ilele di, wõ yedig. † **2:21:** Joel 2:28-32

aya, ereb Negur aya bun biya age foug anī tari afedig,
²⁷ ere nigin, ō neu malaukanon to utornē di, bouwau laa neid modoū bun ibodōf,
 ō ogon Fateuleg to utorō di, bura lauf.
²⁸ Ō mata bun ileya nē naab ufelna fen,
 ō malā bun kulīya barikā wiyauuf.†
²⁹ “Turau tar, aya ā yaor arokeneik, tubuda Dawid ī laa fe di, mū difen. Yogon matmat, ada atun naa enei bun fau ibodok. ³⁰ Anī ere, ī profet taka, anī nigin, ī keleī, Negur wau kuturol fen, Dawid yogon ibor nē tubu tar bun tamal taka, yogon king nē sia bun inenēf nigin irokenen. ³¹ Dawid ī ereb fau wōya sā mog, anī tetunem ile fen, Kristus mata kel fā youf nigin eig ye wogō yen, ‘ī laa neid modoū bun to ibodōf, ī bouwag to bura lauf,’ yen. ³² Negur Jesus enei turī fe di, ī mata kel fā yen anī, amā ganan mailen. ³³ Negur ī ima biyalem yalesnē di, Jesus ī, Tama bun Awa Uur Fateul Negur afeneīf yen anī yale fen, fi felen, are ā gama ulegef ado karī gef anī. ³⁴ Dawid saa ilun to iselen, anī ere, ī iron, “Negur neu Odug irokenen:
 “Imau biya melem ubod mog,
³⁵ ogon kiwai tar
 ogon ye inoya nē sawa anodiyouf.” †
³⁶ “Anī nigin, Israel tamo kayau ganan enei keleī bagai youf, Jesus enei ā aa tetek bun ukesigen anī, Negur yogo, Odug ado Kristus inenen.”
³⁷ Tamo kayau od enei karī de fen, idi waud gudū fe di, Pita aposel tunī ganan geid dirokenēdin, “Turamā tar, amā naig mafouf?”
³⁸ Pita solof irokenēdin, “Ā mugu mugu wauī falei wog fen, Jesus yana bunem naan iguneī di, āgenei mosor nigin weder tu kalauf, ago ge di, ege luwa are Awa Uur Fateul walogouf. ³⁹ Promis od are āgenei, āgenei kesu tar ado, idi gerō difaref ani ganan neid, are Odug neda Negur iweignēdiyof anī ganan neid.”
⁴⁰ Age ye fen, Pita od musei bun, idi wedereid irou fen, totol irokenēdin, “Ā aug isenneīf nigin, tamo kayau sane sain enei bun tamal urab uraileg.” ⁴¹ Yogon od

dalen idi naan igunēdin, age dife di, naa anī bun, tri tausen tamo kayau age fiya, idi neid bun tobol difen.

Momoiya Tamo Kayau Neid Uyu Kū Fiya

⁴² Idi aposel neid ifelnēdiya, uyu kū fiya, saaf weim yōya, kosēya bun, idi neid kisi adok dino fen, age difen. ⁴³ Tamo kayau ganan terē de inid ifitin. Age dife di, aposel idi, uris ado memelik musei dinon. ⁴⁴ Momoiya tamo kayau ganan weim dibod ken, safineid ganan gadō difedig. ⁴⁵ Safineid na nigin sur difeid fen, taka ī lau fef anī difenēdig. ⁴⁶ Naa ganan idi toku waud tekelei fen, tempel modoū bun guru difedig. Idi dogo neid fō fō bun, kulīya ado waud adok an yen ken, weim saaf dōdig. ⁴⁷ Idi Negur yana dalesedig, tamo kayau ganan, idi nigin biya difiyēdidig, age dife di, Odug naa ganan bun, tamo kayau kel gei feid fen, idi neid bun tobol fedig.

3

Pita Tamo Nonī Tamal Ye Ilolaisin El Fiyen

¹ Naa taka bun, Pita Jon ado, tri kilok aragau kosēya sain nigin, tempel bun diselen. ² Tamo taka sina namen ye ilolaisin gō fen, tempel bobog yana ‘Meli Bagai’ dedig an faali de diroulen, an naa ganan bun dinenē di, ibod ken, tempel bun dilef anidi moni nigin nonī fiyēdidig. ³ Sain Pita Jon ado, tempel namen dilau fenē age dife di, ileid fen, moni nigin irokenēdin. ⁴ Anī ere, Pita Jon ado, ī lo difel fen, Pita iron, “Amā lo wamā!” ⁵ Age ye di, ī ereb difanauf ye fen, lo feidlen.

⁶ Age fe di, Pita iron, “Silwa be gol are aya sā, anī ere, ereb aya ado anī, ō afonok, are Jesus Kristus Nasaret tamal yana bunem uyō.” ⁷ Age ye fen, Pita tamo ima biyalē yale iroune ken, isennē yalesnen, kaisā bagai tamo nē ye guyu totoledin. ⁸ Ī gurusā ye ifar fen, iyōya gariya inon. Agef fen, ī weim tempel namen dilen, iyō, gurusā ye fen, Negur yana yalesen. ⁹ Tamo kayau ganān ī iyo ken, Negur yana yalese di, dile fen, ¹⁰ idi, im bagai tempel bobog yana ‘Meli Bagai’

† 2:28: Sam 16:8-11 § 2:35: Sam 110:1

dedig bun ibod ken, nonĩ yedig den. Idi ĩ bun ereb wõ yen anĩ nigin, fatuk bagai terẽ de fen, inid ifitin.

Pita Tempel Bun Od Wogõ Yen

¹¹ Solomon nẽ Waranda dedig an, nonĩya tamo anĩ, Pita Jon ado ironẽdi di, tamo kayau ganan terẽ de fen, gududu de, idi gedin disin. ¹² Pita anĩ ile fen, idi irokenẽdin, “Israel tamo, ere nigin eneim ã terẽ yeik de? Ere nigin nemã megeir bunem be, nemã Negur aniniya bunem, tamo enei el mafiyen gen amã lo wamãglef? ¹³ Abraham, Isak, Jakop idi neid Negur, tubuda tar neid Negur im, yogon kabĩ tamo Jesus fula fiya medeĩa ifenen. ã ĩ dukesiyouf nigin wenẽdig fen, Pailat ĩ itornẽ di, ilauf nigin kisi ino mog, ã Pailat mala bun ĩ nigin wa gen. ¹⁴ ã, ĩ Fateul Madur tamo anĩ wag fen, tamo yukesiya tamo anĩ yaliskeneĩf nigin urokenẽgen. ¹⁵ ã mata nẽ gariya anĩ ukesigen, anĩ ere, Negur ĩ laa bun tamal yalesnen. Amã enei mailen nigin wogõ mauf. ¹⁶ Jesus yana nigin momoiya bunem, Jesus yana anim, tamo enei ã kelei ken, ulegedig anĩ total ifenem. Momoiya ĩ bunem isif anim, tamo enei ã ganan log mog, el fiye kelel.

¹⁷ “Turau tar, aya kelei, ã ãgenei uyu irouya geid, kelei sã nigin ago gen. ¹⁸ Anĩ ere, enei wõya sã mog, Negur profet ganan bun wogõ yen, are yogon Kristus darau yalouf bagai, anĩ Negurem agef kisi felen. ¹⁹ Anĩ nigin, wauĩ falei ge fen, Negur bun uleg, anĩ bunem ãgenei mosor isasalauf. Ago gouf, wauĩ mata wõya nẽ sain Odug bunem isi fen, ²⁰ Negur, Kristus ã nigin igirin, are Jesus sur fouf. ²¹ Jesus fau de saa ilun ibod mog, Negur ereb ereb ganan mata inouf nẽ sain wõ youf, kulu yogon profet fateul sigoreid bun Negur wogõ yen kilei. ²² Moses iron, ‘Odug ãgenei Negur, profet taka aya gen, tamo kayau ã atun wõ ye keneĩf. ã ereb irokeneĩf ganan, karĩ gouf bagai. ²³ Taka nem profet anĩ to karĩ fiyẽf, ĩ tamo kayau atun gai gai gudũf irailauf.’*

²⁴ “Age fiya gen, profet ganan Samuel bun gariya ino fen, isin idig, gama naa eneidi bun ereb wowã yef isin anĩ nigin wogõ den. ²⁵ ã profet neid gere tar, Negur ãgenei tubuĩ tar geid bar itenẽya inon, ã bar itenẽya anĩ nẽ gere tar. Negur Abraham irokenen, ‘Ogon ibor bunem, tamo kayau teneub ganan bun el fediyouf.’† ²⁶ Negur yogon kabĩ tamo yalesne ken, ãgenei sane bun tamal, ã mugu mugu ganan falei ge di, el yeĩf nigin, ã bun ket Jesus sur fen.”

4

Pita Jon Ado Juda Neid Uyu Irouya Meleid Bun Difaren

¹ Pita Jon ado, tamo kayau od dirokeneĩd mog, pris tunĩ, tempel lo fiya tamo neid mudur, Sadusia tamo tunĩ geid, idi gedin disin. ² Idi fatuk bagai waud moron, ere nigin, aposel idi tamo kayau difelneĩd fen, Jesus laa bun tamal mata kel fã yen anĩ wogõ den. ³ Idi Pita Jon ado dirouneĩd fen, aragau nigin idi kalabus bun dinenẽdi di, ile we felen. ⁴ Anĩ ere, od karĩ den idi musei momoi den, momoiya tamo faif tausen age fiya wõ den.

⁵ Naa taka di, nedi uyu irouya, mudur adodo, lo ifelnẽdiya tamo geid, Jerusalem guru difen. ⁶ Pris neid mudur Anas an ibodon, Kaiafas, Jon, Aleksanda, pris mudur neid ibor tunĩ ganan idig an dibodon. ⁷ Idi Pita Jon ado guri de dirousi, atũ difeid fen, to difedin, “Ere megeir bunem be, ere yana bunem enei ago gen?”

⁸ Age de di, Pita Awa Uur Fateulem aura fiyen ĩ, idi irokenẽdin, “Tamo kayau neid uyu irouya, mudur adodo! ⁹ Amã gama, tamo ye ilolaisin bun ereb biya age mafe di, naig fe el fiyen nigin to wamãgouf are, ¹⁰ ã, Israel tamo kayau ganan geid enei kelei youf, ã Jesus Kristus Nasaret tamal aa tetek bun ukesigen, anĩ ere, Negur ĩ laa bun tamal yalesnen, ĩ yana bunem, tamo ã meleĩ bun ifaref enei el fiyen. ¹¹ Tamo are “ ‘meein fõ inoya tamo ãgem sane ge fen, utorõgen,

anĩ gama monog tor wõ yen.’*

* **3:23:** Diuteronomi 18:15, 18, 19 † **3:25:** Jenesis 22:18; 26:4 * **4:11:** Sam 118:22

12 Taka bun tamo kel gei fiya to ibodok, ere nigin, ada kel gei fadauf nigin, saa farumen yana taka to tamo ifenēdin.”

13 Pita Jon ado skul ileya sã, fonõ tamo, are idi kelein, anĩ ere, idi kumĩ sã wogõ de di, dile fen, terē den. Age de fen, idi kelein, tamo eneidim Jesus geid diyon. 14 Anĩ ere, tamo el difiyen anĩ, Pita Jon ado geid difar mog, dilen nigin, idi ereb od irõya nigin od sã. 15 Anĩ nigin, Juda uyu irouya neid kaunsel guru fiya anĩ ditor dilauf nigin, idi dirokeneid, ditor dile di, idi dogo dogol katõ difen. 16 Idi diron, “Tamo eneidi ere naig tafiyēdiyof? Idi memelik enei fire bagai dinon anĩ, Jerusalem dibodok idi ganan keleĩ, are ada wa fiya kisi feleya sã. 17 Anĩ ere, enei, tamo kayau bun to iyokalauf nigin, tamo eneidi Jesus yana bunem taka to wogõ difiyēf nigin, ada wedereid tarouwauf bagai.”

18 Age de fen, idi baban namen di-weigneid, disidi, Jesus yana bunem to bagai wogõ douf be difelnēdiyof nigin, total bagai dirokenēdin. 19 Anĩ ere, Pita Jon ado solo de dirokenēdin, “Negur mala bun, Negur dõ fiya ban, ã dõ mayeif, are tutuk de, sã de anĩ, ã aug es wog. 20 Ereb amã mailen, karĩ maun nigin, sigoramã ifõya kisi feleya sã.”

21 Uyu irouya idi baban kumĩ od difeneid le fen, folõ difeid le di, dilen. Uyu irouya idi darau ifenēdiya nigin kisi taka to dalen, ere nigin, tamo kayau ganan ereb wõ yen anĩ nigin, Negur yana dalesen. 22 Tamo memelik dino fen, el difiyen are, yar foti wal feseya.

Momoiya Tamo Kayau Neid Kosēya

23 Sain Pita Jon ado dalisnēdi di, idi dogo neid tamo kayau bun keku de dile fen, pris odudug mudur adodo geid, od dirokenēdin anĩ ganan wogõ difiyēdin. 24 Idi od anĩ karĩ de fen, idi aiteid tekelei dales fen, Negur kosē difiyē diron, “Odug ereb ereb ganan nē Marau, õ saa, teneub, maaĩ, anidi namen ereb ereb ganan unodin. 25 Tamamã Dawid, ogon kabĩ tamo sigor bun Awa Uur Fateulem wogõ won:

“ ‘Ere nigin haiden idi Odug bun seye de fen,
tamo kayau idi kiwai nē kisi are ege bagai dinof?

26 Tenebur nē king idi kusīya nigin dodok difef,
uyu irouya tamo guru de fen,
Odug bun ado
yogon Kristus bun kiwai dinof.”†

27 Momoi, Herod, Pontius Pailat idim, haiden, Israel tamo kayau geid, taun enei bun guru de fen, ogon kabĩ tamo fateul Jesus õ ogo uginin ĩ kiwai difenen. 28 Õ ogon megeir ado oroya bunem agef wõ youf wo fen, tetun ufon anĩ kilei, idi age difen. 29 Odug, gama idi dogo neid kumĩ od dinon anĩ kisi fen, amã ogon ferfer, ogon od kumĩ sã megeir ado wogõ mauf nigin megeir wanamã. 30 Imã ura ken, dagi el wo, ago fen, ogon kabĩ tamo fateul Jesus yana bunem memelik uris ado unodiyof.”

31 Kosē de bure difel mog, idi guru difen nē modoũ anĩ guyoyõ fen. Age fe di, idi ganan Awa Uur Fateulem aura fiyeid fen, toli fedi di, kumĩ sã Negur nē od wogõ den.

Momoiya Tamo Kayau Dogo Neid Safina Weim Dile Dogolen

32 Momoiya tamo kayau ganan waud ado kisi tekelein. Taka nem, yogon sa-fina taka to neu mugu yen, anĩ ere, ereb ereb ganan idi ado are weim dile dogolen. 33 Aposel idi megeir odug nem, Odug Jesus mata kel fã yen nigin wogõ den, age dife di, Negur nē wau ifenēya odug, idi ganan bun ibodon. 34 Age fe di, idi atun taka nem ereb taka to lau fen, ere nigin, teneub be fõ adodo anĩ na nigin sur difeid fen, moni dale dirou disidi, 35 aposel imeid bun dinodig, anĩ gadõ de fen, taka ĩ lau fef anĩ difenēdig.

36 Josef, Lewi ibor taka, Saipras nuyo tamal, aposel idi ĩ anĩ Banabas dedig (anĩ nē gariya, Wau Yaleya Tamo), 37 ĩ yogon teneub na nigin sur fe fen, moni yale, aposel imeid bun inon.

† 4:26: Sam 2:1, 2

5

Ananias Safira Ado

¹ Tamo taka yana Ananias, aiwa Safira ado, nedi safina taka na nigin sur difen. ² Ī, yogon aiwa anī ganan keleī mog, moni tunī yogon nigin irou fen, tunī anī yale iroule, aposel imeid bun inon.

³ Age fe di, Pita iron, “Ananias, naig fe di, Satan waū bun isokose di, Awa Uur Fateul udegne ken, moni teneub nē walen anī tunī ogon nigin urouf? ⁴ Fau na sur fiya sā mog are ogonen, na nigin sur wol fen, moni areg ogonek. Ere nigin ō waū bun enei ago wouf nigin kisi unol? Ō tamo to udegñedil, are ō Negur udegñem.”

⁵ Ananias od enei karī ye fen, ĩ kubū ye laaf yenen. Ganan od enei karī den, idi kumī tererē den. ⁶ Age fe di, tamo gaū gaū disi, yogon bouwa sile de, faali de diroule, mū difen.

⁷ Tri aua age fiya ilele di, aiwa gober ereb wō yen anī keleī sa ken, isin. ⁸ Age fe di, Pita kayau to fiyen, “Urokana, ō aiwā ado teneub nē moni de enei kilei walegen de?”

Kayau iron, “Ao, de enei kilei dogol.”

⁹ Age ye di, Pita kayau irokenen, “Naig fe di, ō aiwā ado wauī tekelei fen, Odug nē Awa Uur kisi wiyēgel? Ulef, tamo idi ogon aiwā mū difel, idi neid yebureid yer bobogē, ōg idi age de faali de dirouleyōf.”

¹⁰ Agef irokenē di, kaisā bagai, Pita ye gariyan, kayau are kubū ye laa fen. Age fe di, tamo gaū namen disi, kayau laa fel dile fen, faali de diroule, aiwa mū difen sirin mū difen. ¹¹ Sios adok, tamo kayau ganan od enei karī den idi geid, fatuk bagai kumī den.

Aposel Idi Tamo Kayau Musei El Difedin

¹² Aposel idi tamo kayau atun memelik uris ado musei dinodin. Age dife di, momoiya tamo kayau ganan Solomon nē Waranda bun guru difedig. ¹³ Tamo kayau idi nigin yeneid dalesedig, anī ere, idi kumī de fen, taka nem idi geid to bagu difen. ¹⁴ Anī ere, tamo kayau musei Odug nigin momoi de di, momoiya tamo kayau baba baban tobol fef iselen. ¹⁵ Aposel age difef ya anī keleī ken, tamo kayau dagi

adodo naabur guri difedi di, fatar bun ado gogoū bun dinenādin, are Pita ile di, yogon burig idi tunī bun irā di, el be fediyouf de fen, age difen. ¹⁶ Tamo kayau musei Jerusalem kalilī fiya taun temeideg, dogo neid dagi adodo, kaa sesenem darau difenēdin anidi guri de dirou disi di, idi ganan el difiyēdin.

Idi Aposel Darau Difenēdin

¹⁷ Age dife di, pris neid mudur ĩ, yogon katō tura tar are Sadusia tamo geid, kiyēi beberīdin. ¹⁸ Idi aposel dirouneid fen, kalabus bun dinenēdin. ¹⁹ Anī ere, bō anī bun, Odug nē engel kalabus fō sukar kā feleid, gurif, mayarē disi fen, irokenēdin, ²⁰ “Ulagauf, tempel bun ufareg fen, tamo kayau mata enei nē od ganan urokenēdig.”

²¹ Idi irokenēdin kilei, bonimeī bagai idi tempel bun dile fen, tamo kayau ifelnēdiya gariya dinon.

Sain pris neid mudur, yogon katō tura tar geid disi di, idi Israel neid uyu irouya ganan neid guru fiya yana Sanhedrin dedig anī diroun, age de fen, idi aposel kalabus bun temeideg guri difeid dirou disiyouf nigin tamo sur difedin. ²² Anī ere, sain kabī tamo kalabus fō bun dilen, aposel an to diledin. Anī nigin, idi keku de dile dirokenēdin, ²³ “Amā kalabus fō kotū feleya ado lo fiya tamo bobog bun difar mog, mailedil, anī ere, sukar kā mafel fen, an taka nem to ibod mog maillel.” ²⁴ Od anī karī de fen, tempel lo fiya tamo neid mudur, pris odudug geid, nene de fen, enei bunem naig be fe wō youf de fen, sii fedin.

²⁵ Age de mog, taka nem isi iron, “Ulegef! Tamo kalabus bun unenēdigen idi tempel bun difar fen, tamo kayau difelnēdif.”

²⁶ Age ye di, tempel lo fiya tamo neid mudur, yogon kabī tamo geid, dile, aposel gei difeid fen, dirou disin. Idi to sibu difiyeid fen, daū difiyēdin, ere nigin, idi tamo kayau meein tulu difiyēdiya nigin kumī difiyēdin.

²⁷ Idi aposel gei de dirousi, Israel uyu irouya neid guru fiya meleid bun difarnēdi di, pris neid mudur idi to fiyeid ²⁸ iron, “Amā yana enei bunem

to ufelnēdigouf nigin, total bagai katū mayein, anī ere, ā wogō ge di, ā ufelnēdigen anī Jerusalem ganan bun iyokelen, ago ge di, tamo enei nē naud amā bouwamā bun unogef.”

²⁹ Pita aposel ganan geid aiten dale diron, “Amā tamo aiteid dō fiya ban, Negur ait anī dō mafouf bagai. ³⁰ Jesus laa fouf nigin aa bun useginnēgen, anī ere, tamada tar neid Negurem Jesus laa bun tamal yalesnen. ³¹ Ī Negurem yalesne ken, ima biyalē neda King, neda Kel Gei Fadaya inenen, are Negurem Israel tamo kayau waud falei fe di, nedi mosor weder tu kalauf nigin age fen. ³² Amā enei mailen anī yaor ma wogō mauf, Awa Uur Fateul, are Negur dō difef anidi ifenēdin, ĩg age fef.”

³³ Idi od enei karī de fen, idi seye de, didenkesiyouf nigin age difen. ³⁴ Anī ere, Farisia tamo taka yana Gamaliel, ĩ lo ifelnēdiya tamo, tamo kayau ganan ĩ yana dalesedig, ĩ guru fiya atun ifar fen, aposel idi sain naal mayarē dinenēdiyof nigin irokenēdin. ³⁵ Age dife di, ĩ idi irokenēdin, “Israel tamo, ā tamo eneidi ereb naig wiyēdigou fenē are, ā kisi el ge waleg le fen, ago gouf. ³⁶ Kulu sain taka bun, Teudas ĩ yogo anī tamo odug ye fen, wō yen, age fe di, fo handred tamo age fiya dō difiyen, anī ere, ĩ dukesi di, yogon dō fiya tar ganan firagagaū dife, ege sa kelen. ³⁷ Tamo enei dumen, Judas Galili tamal, tamo kayau yeneid iweseya sain bun wō ye fen, tamo kayau geif yalen, anī ere, ĩg dukesi di, yogon dō fiya tar ganan firagagaū difen. ³⁸ Anī nigin, enei nigin aya ā arokeneik, tamo eneidi utornēdig len dile! Idi ereb kisi difef be, ereb age difef, are tamo bun tamal ouf are, fau sa kalauf. ³⁹ Anī ere, enei Negur bun tamal ouf are, ā tamo eneidi katū fiyēdiya kisi feleya sã, age fiya ban, ā aug Negur geid kusī gef anī ulogouf.”

⁴⁰ Age ye di, idi yogon od diroun. Idi aposel diweigneid, namen dile di, wagagã difedin, age de fen, idi baban Jesus yana bunem to wogō douf nigin dirokeneid fen, ditornēdi di, dilen.

⁴¹ Aposel idi kaunsel guru fiya anī ditor dile fen, kulī den, ere nigin, Negur kisi fen, are idi Jesus yana nigin mama dalouf nigin kisi feleya. ⁴² Naa ganan, tempel bun ado fō bun fō bun dile, toku difelneid fen, biya od wogō de, Jesus ĩ Kristus den.

6

Tamo Sewen Digirnēdin

¹ Sain anī bun, dō fiya tamo kayau musei di, Juda tamo kayau Grik od wogō dedig anidim, Juda tamo kayau Hibu od wogō dedig anidi nauseir difiyēdin, ere nigin, idi neid kayau waab naa ganan saaf gadō fiya bun ditornēdidig. ² Anī nigin, aposel tuwelf idim, dō fiya tamo kayau ganan kuru difeid fen, diron, “Amam Negur nē od wogōya kabī mator ken, saaf lo fiya kabī malouf, are to biya. ³ Anī nigin, turamā tar, ā atun tamo sewen Awa Uur ado kisi biya barikā nigin yeneid wale-segedig anidi ugirnēdig. Kabī enei amā idi bun manouf. ⁴ Age ma fen, amā, kosēya ado od wogōya kabī bun dogol, kabī total malouf.”

⁵ Od enei karī de fen, idi ganan yo den. Idi digirin, Stiwen, ĩ tamo momoiya ado Awa Uur Fateul barikā, taka Filip, Prokos, Nikanor, Timon, Pamenas, Nikolas Antiok tamal ĩ Juda neid momoiya bun falei ye fen, Kristus nē momoiya yalen. ⁶ Age dife fen, idi, tamo anidi aposel wagedin dinenēdi di, aposel idi kosē del fen, imeid tetedin dinon.

⁷ Negur nē od iyokelen. Jerusalem an, dō fiya tamo kayau tobol fe, musei biya wowā den. Age dife di, pris musei idig momoiya anī dō difen.

Idi Stiwen Ka Difen

⁸ Stiwen ĩ, Negur nē wau ifenēya ado megeir barikā tamo, ĩ tamo kayau atun memelik uris ado odudug inodin. ⁹ Anī ere, fefeya yenen, Friman* dedig neid uub fō bun temeleid tamo, are idi Juda tamo Sairini ado Aleksandria taun temeleid ado, Silisia ado Asia provins bun temeleid anidim, Stiwen geid fefe den. ¹⁰ Anī ere, Stiwen ĩ kisi biya ado Awa Uur bunem

* **6:9:** Are idi Juda tamo kulu ferfer dibodon, anī ere, idi gama ferfer sã.

wogō yen anī, idim wal fiyēya kisi feleya sã.

¹¹ Age fe di, idi iminēyan, tamo tunī eig de dirōf nigin waud dalen, “Stiwen ī Moses ado Negur nigin kono fiya od wogō ye di, karī maun.”

¹² Idi od anim, tamo kayau, uyu iroudiya tamo ado, lo ifelnēdiya tamo geid nameid dalesen. Age dife di, idi Stiwen ka dife, Juda uyu irouya tamo neid guru fiya bun diroulen. ¹³ Idi, tamo tunī idegēya od wogō douf nigin, guri de disi di, diron, “Tamo enei faimud sigor taka to ifōdig, Negur nē tempel enei nigin ado, Moses nē Lo nigin, kiwai od wogō yedig. ¹⁴ Ere nigin, amã karī mafiyē mog, ī iron, Jesus Nasaret tamal eneim, modoū enei narī fel fen, Moses nē tobonunã ifanadan anī falei foug yen.”

¹⁵ Ganan kaunsel guru fiya anī bun dibodon idi, Stiwen lo difelen, ī nawa engel nawa gen dilen.

7

Juda Uyu Irouya Neid Guru Fiya Meleid Bun Stiwen Wogō Yen

¹ Age de fen, pris neid mudur Stiwen to fiyen, “Od wogō den enei, are momoi de?”

² Stiwen solof iron, “Turau tar ado Dei geg, karī wiyag, tubuda Abraham Haran taun fau ileya san, Mesopotamia ibod mog, fula fiya medeīya nē Negur ī bun wō yen. ³ Negur Abraham irokenen, ‘Ogon teneub ado ogon tamo kayau utorneid fen, teneub aya afelnōf nē an ulauf.’* ”

⁴ “Anī nigin, ī Kaldia teneub itor ken, Haran ile ibodon. Dum yogon tama laa fe di, Negur ī sur fiyē di, teneub gama ubodōgef enei bun ibodon. ⁵ Negur Abraham ein teneub taka to ifenen, teneub masak bagaig taka to ifenen. Anī ere, Negur, Abraham ī dumen yogon ibor nē tubu tar geid, teneub anī afenēdiyof yen, anī ere, sain anī bun Abraham ī kesu san. ⁶ Negur Abraham eig ye irokenen, ‘Ogon ibor nē tubū tar, yaū tamo teneub taka bun dibodōf, an idi ferfer dibodōf, fo handred yar to biya difiyēdiyof. ⁷ Anī ere, aya, idi ferfer dibod ken, aruneid dalef

neid teneub darau afenēf, anī dumen, idi teneub anī bun tamal diya disi, modoū enī bun aya arunau dalouf.’† ⁸ Agef fen, Negur Abraham bar itenēya nē uris, mulū anī ifenen. Age fe di, Abraham naal Isak wō ye, naa eit ilele di, mulū ifenen, dumen Isak naal Jakop wō yen, Jakop ī tubuda tar tuwelf neid temeid ibodon.

⁹ “Tubuda tar, Josef kiyeī difen ken, Josef Isip neid ferfer wō youf nigin, na nē sur difen. Anī ere, Negur ī adon, ¹⁰ agef fen, Negur Josef morō ganan bun isennen. Negur ī, Josef Isip nē king Farao mala bun, kisi biya ado wau ifenēya anī ifenē di, Farao ī, Josef Isip teneub ado yogon fō ganan lo fiya nigin uyu irouya inenen.

¹¹ “Age fe di, Isip teneub ado Kanan teneub ganan bun, naū odug wō ye di, morō odug dalen, age fe di, tubuda tar saaf fotou fiya kisi feleya san. ¹² Anī ere, Jakop, Isip oun saaf ado ya karī ye fen, tamada tar urug bagai sur fedin. ¹³ Idi baban dile di, Josef ī yogo nigin tura tar bun yaor fen, age fe di, Farao ī Josef nē ibor nigin kelein. ¹⁴ Anī dumen, Josef, tama Jakop ado yogon ibor ganan Isip dilauf nigin od sur fen, idi ganan sewenti-faif. ¹⁵ Age fe di, Jakop Isip ilen, an ī ado tubuda tar gare desin. ¹⁶ Idi neid bouweid keku de, Sikem taun guri de diroule, kulu Abraham Sikem oun, Hamor gere tar bun moni nem matmat na yalen anī bun mumã difen.

¹⁷ “Negur Abraham irokenen anī kisi falauf nigin sain dodol mog, Isip oun neda tamo kayau musei biya isoran. ¹⁸ Age dife di, king taka ī Josef nigin keleī sã, ī bagam Isip nē king wō yen. ¹⁹ Ī ada neda tamo kayau idegneid fen, darau ifenēdin, are tubuda tar nugo fiyēdi di, idi neid kesu momou sineid gogū difedif anī, mayarē dirarã di, gare douf nigin age fen.

²⁰ “Sain anī bun, Moses wō yen, ī Negur mala bun kesu meli bagai. Ogō towo, tama nē fō bun kulatun difen. ²¹ Sain ī mayarē dinenē di, Farao ne baraim yalen, ī yogon kesu ouf nigin yale iroulen. ²² Moses ī, Isip neid keleī biya adok difelnē di, wogōya bun ado ereb ereb age fediya nigin, tamo megeir ado wō yen.

* 7:3: Jenesis 12:1 † 7:7: Jenesis 15:13, 14

23 “Moses ï yogon yar foti mog, ï Israel tura tar ki fediyouf nigin kisi fen. 24 Moses ï, idi neid taka Isip tamom to biya fiyē mog, ilen, anī nigin, ï Israel tura isenne ken, aba solof Isip tamo anī yukesin. 25 Moses kisi fen, yogon tamo kayau keleī youf, are Negurem idi kafī fiya bun tamal gei fediyouf nigin, ï itonek, anī ere, idi to kelein. 26 We fele di, Israel tamo kusī de mog, Moses wō yen. Ì, idi komo difouf nigin daū gudūf fen, iron, ‘Are ā tutur, ere nigin ā abob darau wenēgef?’

27 “Anī ere, tamo ï, ne tā darau ifenen anim, Moses sur fiyē ira ken, iron, ‘Aim ò amā bun, uyu irouya ado es fiya tamo inenon? 28 Ò nor Isip tamo ukesin gen, ayag ago unakesiyou fenē de?’† 29 Moses od enei karī ye fen, ï Midian teneub bun iya ilen, an ï yaū tamo ibod ken, kesu monog uru adon.

30 “Yar foti ilele di, engel taka, gerere tuan Sinai Arei non, aa balai duri ado an yā bale namen, Moses bun wō yen. 31 Moses anī ile fen, terefeit yen. Ì tutuk ilouf nigin aa non iyok ile mog, ï Odug nē ait karī yen, 32 ‘Aya tubuī tar neid Negur, Abraham, Isak, Jakop idi neid Negur.’§ Moses kumī tererē ye fen, lo fiya itoron.

33 “Age fe di, Odug Moses irokenen, ‘Ogon sendel unukakā, ere nigin, modoū ò ufaref nē are fateul teneub. 34 Momoi, aya neu tamo kayau Isip oun darau fatuk bagai dale mog, ailen. Aya idi neid kaiya karī au fen, idi kafī fiya bun tamal alelnēdiyof nigin asin. Anī nigin, gama usi, aya sur ayō di, Isip kel ulauf.*

35 “Moses enei, idi kulu ï nigin eig de diro ken, ditoron, ‘Aim ò amā bun uyu irouya ado es fiya tamo inenon?’ De ï anī, Negurem idi uyu iroukenēdiyof nigin ado kafī fiya bun tamal yalelnēdiyof nigin, engel aa balai bun yā bale namen Moses mala bun wō yen anī bunem sur fiyen. 36 Moses ï, tamo kayau Isip temeleid uyu iroukeneīd fen, Isip an, Maaī Giriya bun ado, yar foti gerere tuan, memelik uris ado inodin.

37 “Moses de anim, Israel tamo kayau eig ye irokenēdin, ‘Negur ï, āgenei tamo kayau bun tamal, profet taka aya gen sur feneīf.’† 38 Ì, engel Sinai Arei bun wogō fiyen anī ado tubuda tar geid, gerere tuan tamo kayau guru fiya atun ibod ken, mata ibodōya od ifenēdi di, tobol fe isi, ā bun isiyouf nigin od anī yalen.

39 “Anī ere, tubuda tar, Moses nē od dō fiya ditoron. Idi Moses anī ditor ken, Isip kel ileya nigin waud iron. 40 Age de fen, idi Aron dirokenen, ‘Uyu diroukanamāf nigin, waitou uneye kanamādiyof. Ere nigin, Moses enei, Isip tamal gei famā irousin ï bun ereb wō yen are, amā keleī sā.’‡ 41 Sain anī bun, idi idegēya waitou bulmakau lubu dinon. Idi anī bun sesewi dife fen, idi imedim dinon anī nigin seli dabiyou fenē, tar odug dinon. 42 Anī nigin, Negur idi itornēdi di, saa ilun nē megeir anī seli dabiyouf nigin folō feid len. Are profet neid buk bun itotoya yenek kilei:

“ ‘O Israel tamo kayau, ā gerere tuan oun, foti yar bun, sesewi fiya ado ofa wanagen, anī ere, ā aya yanau to seli wabigen.

43 Æ idegēya waitou Molek nē salafat unog fen, āgenei waitou Refan nē barisa yana walesegen, are idegēya waitou ā selid wabidigouf nigin unodigen.

Anī nigin, aya ā āgenei teneub bun tamal alelnei ken, oun Babilon kantri ubodōgouf nigin sur ayeīf.’§

44 “Sain neda tubuda tar gerere tuan dibodon, idi Negur nē salafat adon, salafat anī bun Negur ibod ken, od wogō yedig. Salafat are, Negur Moses irokenē di, Negur Moses ifelnen kilei bagai dinon. 45 Neda tubuda tar, salafat dalen anī dirou fen, Josuam uyu irou di, Negur tubuda tar meleid bun haiden irud iraille, diya di, teneub anī dalen an salafat dirou disin. Salafat anī, teneub anī bun ibodon, ile Dawid nē sain bun. 46 Negur Dawid isennē el fe di, Dawid wau el fen, anī Jakop nē Negur ibodōf nē modoū, inim inouf nigin

† 7:28: Eksodas 2:14 § 7:32: Eksodas 3:6 * 7:34: Eksodas 3:5, 7, 8, 10 † 7:37: Diuteronomi 18:15 ‡ 7:40: Eksodas 32:1 § 7:43: Amos 5:25-27

Negur irokenen. ⁴⁷ Anī ere, Dawid naal Solomon im, Negur nē fō inon.

⁴⁸ “Anī ere, Negur Ilun Bagai ī, tamo imedim fō dinof anī bun to ibodōdig, are profet eig ye irok kilei:

⁴⁹ “ ‘Odug irok, saa are neu king nē sia, teneub are yeu inoya nē sawa.

Ā ere fō anī aya unokanagauf?

Neu si inoya nē modoū nain ibodok?

⁵⁰ Aya imaum eneidi ganan to anodin de?)*

⁵¹ “Ā uleī teregein yediya tamo, ā wauī ado wedereī fitok yukeledin! Ā āgenei tubuī tar gen, faimud Awa Uur Fateul dudum wiyēgedig! ⁵² Tubuī tar profet taka to darau difenen de? Tubuī tar idi, Madur Tamo anī fau isiyouf de fen, wogō den tamo anidig didenkesin. Are gama Madur Tamo anī kiwai wenēg fen, ukesigen. ⁵³ Ā, lo engel bunem kabī bun difenen anī walegen, anī ere, ā anī to dō gen.”

Stiwen Meein Tulu Difiyen

⁵⁴ Idi enei karī de fen, idi nameid fatuk bagai sane fen, ī nigin goboreid kikokō yedin. ⁵⁵ Anī ere, Stiwen, Awa Uur Fateulem barikā, saa ilun mala ira ken, Negur nē fula fiya medeīya ado Negur ima biya melē Jesus ifar mog, ilen. ⁵⁶ Agef fen, Stiwen iron, “Ulegef, aya saa kā fele di, Tamo Naal Negur ima biyalē ifar mog, ailef.”

⁵⁷ Age ye di, idi aiteid odugem kakaī de, imedim wedereid fitok du ken, idi adok ī garan gududu den. ⁵⁸ Idi taun tamal Stiwen dī de dirou dile, serē meein tulu difiyen. Age dife mog, Stiwen bou bun od dun idi, nedi kolos dinukaka ken, tamo gaū yana Sol ī ye gariyan gō difen.

⁵⁹ Idi Stiwen meein tulu difiyē mog, Stiwen kosē yen, “Odug Jesus, neu uur wale.”

⁶⁰ Age ye fen, ī ibor itenana ken, wade iweig iron, “Odug, mosor age difef enei mala solo to wenēdiyof.” Ī agef irokfel fen, laa fen.

8

¹ Sol ī Stiwen dukesiyouf nigin, idi geid waud tekelein.

Sol Sios Darau Ifenen

* **7:50:** Asaia 66:1, 2

Naa anī bun, darau odug Jerusalem sios bun wō yen. Age fe di, momoiya tamo kayau ganan firagagaū dife, Judia ado Samaria distrik bun dilelen, aposel dogol Jerusalem difaren. ² Negur oroya dō difedig tamo tunī Stiwen mū difel fen, ī nigin waud fatuk gudūf, inā loguren. ³ Anī ere, Sol gariya ino, sios daū fouf nigin age fen. Ī fō bun fō bun ile fen, momoiya tamo kayau geif fen, kalabus bun inenēdin.

Filip Samaria Ilen

⁴ Momoiya tamo kayau firagagaū de dilelen, idi dilelen nē an biya od wogō den. ⁵ Filip Samaria neid taun taka bun ile fen, an Kristus nigin wogō yen. ⁶ Tamo kayau, Filip nē od karī den ado ī memelik inodin anī dile fen, idi ganan Filip wogō yen anī bun kisi fatuk dino, karī difiyen. ⁷ Tamo kayau musei bun tamal, kaa sesen kakaī de ulolō deis diyalelen, ilolaisin musei ado yeid fefu fedin musei el fedin. ⁸ Anī nigin, taun anī bun kulīya odug adon.

Idegēya Waitou Kosē Fiyēdig Tamo Simon

⁹ Tamo taka yana Simon dedig an ibodon, ī taun anī bun idegēya kosē inodidig, anī bunem Samaria tamo kayau ganan terē fiyēdidig. Ī yogo nigin anī, aya tamo odug yedig. ¹⁰ Age fe di, tamo kayau yeneid adodo, yeneid sāsā geid ganan, ī bun kisi fatuk dino karī difiye ken, diron, “Tamo enei, Negur nē megeir, Megeir Odug dedig anī.” ¹¹ Idi ī bun kisi fatuk dino karī difiyen, ere nigin, ī sain meluk idegēya kosē bunem terē fiyēdidig. ¹² Anī ere, sain Filip Negur nē tano ado Jesus Kristus yana nigin biya od wogō ye di, idi in od momoi den, age dife di, idi naan igunēdin, tamo ado kayau geid. ¹³ Simon īg momoi ye di, naan igunen. Agef fen, Filip nain be ilef are, ī dō felef iyo ken, memelik uris ado odudug wō yedin anī ileid fen, terē yen.

¹⁴ Aposel Jerusalem dibodon idi, Samaria tamo kayau, Negur nē od mogo dalen anī karī de fen, idi, Pita Jon ado, idi gedin sur difedin. ¹⁵ Idi an wō de fen, Samaria tamo kayau Awa Uur Fateul

dalouf nigin kosē den, ¹⁶ ere nigin, Awa Uur Fateul idi taka bun fau isiya san, idi Odug Jesus yana bunem naan igunēdin dogol. ¹⁷ Age dife fen, Pita Jon ado, imeid idi tetedin dino di, idi Awa Uur Fateul dalen.

¹⁸ Aposel imeid tamo kayau tetedin dino di, tamo kayau Awa Uur ifenēdin, Simon anī ile fen, aposel moni ifenēdiyof nigin agef fen, ¹⁹ iron, “Ayag megeir enei wan-age di, taka teten imau ano di, Awa Uur Fateul yalouf.”

²⁰ Age ye di, Pita ī irokenen, “Ogon moni ō ado inanakalauf, ere nigin, ō Negur nē ege luwa, Awa Uur Fateul moni nem na yaleya kisi feleya wol. ²¹ Ō amā nemā kabī bun, amā geid katō tekelei sã, nemā kabī taka to walef, ere nigin, Negur mala bun waū tutuk sã. ²² Ani nigin, sane enei nigin waū falei wo fen, Odug bun kosē wo. Ō waū bun kisi agef yenek anī nigin Odug weder tu kalauf be. ²³ Ere nigin, ō waū bun dirikeī bagai fen, mosorem ironok anī ailef.”

²⁴ Age ye di, Simon solof iron, “Ereb ā wogō gel anī, aya bun to wō youf nigin, Odug kosē wiyēg.”

²⁵ Pita Jon ado, Odug nē od kurō difeis fen, wogō difiyēdin, age difel fen, idi Jerusalem keku de, naab luwen Samaria fonō musei bun biya od wogō de dilen.

Filip Itiopia Tamo Ado

²⁶ Odug nē engel Filip irokenen, “Fã wo fen, ō saut melem naab gerere tuan ibodok an ule, naab are Jerusalemem isil, Gasa taun wō yen.” ²⁷ Anī nigin, Filip fã ye fen, ilen, luwen Itiopia tamo faat korō feleya anī ī ket ile mog, fotou fiyen, tamo are Itiopia nē kuin Kandasi nē safina ganan lo fiya tamo, yana odug ado. Ī Negur yana yalesauf nigin Jerusalem ilen, ²⁸ ī karis bun ibod ken, kel yogon fonō naab yale ile fen, profet Asaia nē buk iwesef ilen. ²⁹ Awa Uur Filip irokenen, “Karis anī garan ule fen, non ufar.”

³⁰ Age ye di, Filip karis anī garan gududu ye isel, tamo anī profet Asaia nē buk iwes

mog, karī ye fen, to fiyen, “Ō uwesef anī nē gariya keleī de?”

³¹ Ī iron, “Tamo takam to faded fiyauf are, naig fe di, aya keleī youf?” Anī nigin, ī Filip isel, urom karis bun dibodōf nigin irokenen.

³² Faat korō feleya tamo are, Negur nē Itotoya bun yenek enei iwesen:

“Ī sipsip dukesiyof nigin dirou dilen gen dirou dilen,

ī, sipsip momou siwi gudū fiya tamo wagen dē yeledig gen, od taka to wogō yen.

³³ Ī lai difiye ken, ī to tutuk es difiyen.

Taka nem yogon ibor nē tubu tar nigin to wogō youf,

ere nigin, yogon mata tenebur ein dalelen.”*

³⁴ Faat korō feleya tamo Filip to fiyen, “Profet ai nigin enei wogō yef anī urokana, ī yogo nigin de, tamo taka nigin?” ³⁵ Age ye di, Filip Negur nē Itotoya enei bun gariya ino fen, Jesus nigin biya od wogō fiyen.

³⁶ Idi naab diyok dile fen, naan taka bun disif fen, faat korō feleya tamo iron, “Ulef, naan yeir, erem anī aya naan igunauf nigin katū fiyaf?”† ³⁸ Age ye fen, ī karis irou dē yalauf nigin irokenen. Age fe di, ī Filip ado kututū deis, naanū disil fen, Filipem naan igunen. ³⁹ Sain idi naanū tamal disele di, Odug nē Awa Uur Filip yale irou ilen, age fe di, faat korō feleya tamo Filip baban to ilen, anī ere, ī kulīya odug ado naab iyok ilen. ⁴⁰ Anī ere, Filip Asdot taun wō ye, naab iyok ile fen, taun ganan bun biya od wogō yef ile, Sisaria taun wō yen.

9

Sol Wau Falei Yen (Aposel 22:6-16; 26:12-18)

¹ Sain anī bun, Sol ī fau fau Odug nē dō fiya tar idenkesiya nigin wau ifokel fen, kumī ifenēdif isin. Anī nigin, ī pris neid mudur garan ile fen, ² Damaskus taun oun Juda neid uub fō fō bun pas itotkenēdiyof nigin irokenen, are ī an Odug nē naab dō

* **8:33:** Asaia 53:7, 8 † **8:36:** Itotoya dum ditoton tunī eig ye irok: fiyaf?” ³⁷ Age ye di, Filip ī irokenen, “Ō waū adok momoi youf are, ō naan agunōf.” Faat korō feleya tamo solof iron, “Aya momoi auf, Jesus Kristus ī Negur Naal.”

difef anidi, tamo be kayau be, taka fotou fiyēf are, ifokel yale, Jerusalem irou ilauf nigin age fen. ³ Sol ī ile Damaskus wō you fenē mog, kaisā bagai, fula fiya taka saa ilun tamal, ī bun fulaf irailen. ⁴ Age fe di, ī tenebur kubū ye isil fen, ait taka wogō fiyē mog, karī yen, “Sol, Sol, ere nigin ō aya daig wiyaf?”

⁵ Age ye di, Sol to fen, “Odug, ō aim?”

Ī iron, “Aya Jesus, ō daig wiyaf anim.

⁶ Fā wale fen, taun ule, an ō ereb ago wouf nigin irokonōf.”

⁷ Tamo tunī Sol geid dilen idi, an terefeit de mā, mutū difaren. Idi ait karī den, anī ere, aib taka to dilen. ⁸ Sol tenebur tamal fā yale, mala birikā felen, anī ere, ī ereb taka ileyā kisi feleya san. Anī nigin, idi ima gim de, Damaskus diroulen. ⁹ Ī naa towo lo fiya kisi feleya san, agef fen, saaf ado naaneg to yon.

¹⁰ Damaskus an, dō fiya tamo taka yana Ananias ibodon. Ī mala seleulā kurā fen sain, Odug ī irokenen, “Ananias!” fiyē di, ī iron, “Odug, aya yeir.”

¹¹ Odug Ananias irokenen, “Fā wale, naab yana Naab Madur dedig an, Judas nē fō bun ule fen, tamo taka Tasus tamal, yana Sol nigin to wouf. Ī kosē yef ibodok. ¹² Ī mala seleulā kurāf fen, tamo taka yana Ananias isi, baban mala lo fouf nigin ima teten ino mog, ilen.”

¹³ Ananias solof iron, “Odug, aya tamo enī nē od, Jerusalem oun ogon tamo kayau fateul daig fiyēdin, are museim mogo dirokana di, karī aun. ¹⁴ Ī, tamo kayau ganān ō yana seli dabidig anidi, kafī fiya bun inenēdiyof nigin, pris odudug bun tamal megeir yale fen, ein isin.”

¹⁵ Anī ere, Odug Ananias irokenen, “Ō ulauf, tamo enei are, neu yanau, haiden, dogo neid king ado, Israel tamo kayau bun irou ilauf nigin agirnen. ¹⁶ Ī aya yanau nigin darau naig be fiya yalouf are, fau aya yug afelnēf.”

¹⁷ Age ye di, Ananias fō anī bun ilen, aaben ile fen, ima Sol teten ino fen, iron, “Turu Sol, Odug Jesus ō ein usi mog, naabur ō bun wō yen ī, ō baban malā kelē wol fen, Awa Uur Fateul aura yōf nigin sur

fiyal.” ¹⁸ Kaisā bagai, Sol mala bun tamal, ereb gau genī gen anī kuku ralaisin, age fe di, ī baban mala kelē yelen. Ī fā yale di, naan igunen. ¹⁹ Age fel fen, saaf yō di, ī bouwa baban total kel yalen.

Sol Ī Damaskus Ado Jerusalem An Biya Od Wogō Yen

Sol ī, Damaskus an, naa tunī dō fiya tar geid dibodon. ²⁰ Ī kaisā bagai gariya ino, Juda neid uub fō fō bun od wogō ye iron, Jesus ī Negur Naal yen. ²¹ Idi ganān ī karī difiyen idi terē de fen, to difen, “Im anī, Jerusalem oun Jesus yana diweignēdig tamo kayau tadū fedin anī sā de? Im anī, tamo kayau ifofā, pris odudug gedin irou ilauf nigin isin anī sā de?” ²² Anī ere, Sol nē od wogōya totolef ilen, agef fen, Jesus anī Kristus ye yaor fe, wogō ye di, Juda tamo idi Damaskus dibodon anidi, yogon od solo fiyēya kisi feleya sā.

²³ Naa musei ilele di, Juda tamo idi, Sol yukesiya nigin kisi katō difen, ²⁴ anī ere, Sol idi kisi dinon are kelein. Idi Sol dukesiyof nigin, naa ganān bō ado gaa ado, taun nē kau bobog bun ololo difiyen. ²⁵ Anī ere, bō taka bun, in dō fiya tar ī dale, karam bun dife fen, kau kurenem folo folō dife di, tenebur isilen.

²⁶ Sain Sol Jerusalem ile fen, dō fiya tar geid weim bagu difouf nigin age fen. Anī ere, idi Sol ī dō fiya tamo taka wō yen anī to momoi de fen, ganān ī nigin kumī den. ²⁷ Anī ere, Banabas ī Sol yale, aposel gedin iroule fen, Sol ī naab luwen Odug ile di, ī wogō fiyen ado, Sol Damaskus oun, kumī sā Jesus yana bunem wogō yen anī, aposel faded fedin. ²⁸ Anī nigin, Sol idi weim dibod ken, Jerusalem oun karika bagai iyo ken, Odug yana bunem, kumī sā biya od wogō yef iyon. ²⁹ Ī Juda tamo Grik od wogō dedig anidi geid, od wogō de fefe den, ani ere, idi ī dukesiyof nigin age difen. ³⁰ Kabī tura tar enei kelei ken, idi ī dale, Sisaria taun dirou dilen, anenem Tasus taun sur de dirā di, ilen.

³¹ Anī nigin, sios an Judia, Galili ado Samaria teneub ganān bun, idi wau inosiyā sain biya ado fen, megeir ifenēdin.

Idi Awa Uur Fateul nem waud yalese di, Odug nigin aniniya ado dibodok dile di, momoiya tamo kayau musei len.

Ainias Dokas Ado

³² Pita ï modoũ ganan iyokelen, agef fen, ï Lida tauneg Negur nē tamo kayau ki fediyouf nigin ilen. ³³ Pita, an tamo taka yana Ainias bouwa ilolaisin, ï yar eit fataren yenēyai yedig fotou fiyen. ³⁴ Pita Ainias irokenen, “Ainias, Jesus Kristus õ el yok. Fã wale fen, ogon bedu madur wo.” Kaisã bagai, Ainias fã yalen. ³⁵ Tamo kayau, Lida taun ado Saron fonõ dibodon idi ganan ï dile fen, waud falei ye, Odug nigin momoi den.

³⁶ Jopa an, dõ fiya kayau taka, yana Tabita (anĩ Grik od bun Dokas dedig) ibodon. ï faimud tobonunã biya inodidig ado maleg isennēdidig. ³⁷ Sain anĩ bun, Tabita dagi yale fen, laa fen. ï laa fe di, yogon bouwa buru naan digune kel, fõ aab ilun dinenē di, yenen. ³⁸ Lida taun are Jopa taun non. Anĩ nigin, dõ fiya tar, Pita Lida ibodok yeya karĩ de fen, tamo uru sur dife di, ï gein dile, totol bagai dirokenen, “Kaisã bagai talauf!”

³⁹ Anĩ nigin, Pita idi geid dile, an ulõ yesi di, idi Pita fõ aab ilun dale dirou diselen. Kayau waab ganan an Pita salili difiye ken, idi inã dale fen, Dokas ï fau matan ibod ken, kolos ado saket iwadin anĩ ganan difelnen.

⁴⁰ Anĩ ere, Pita idi ganan mayarē sur feid fen, ï ibor bobou fe kosē yen. Agef fen, ï falei yel, kayau nē bouwa buru irokenen, “Tabita, fã wale.” Kayau ï mala birikã feid, Pita ile fen, fã yale ibodon. ⁴¹ Age fe di, Pita kayau ima irou yalesnē di, ï fã ye ifaren. Age fel fen, Pita, momoiya tamo kayau ado kayau waab geid iweigneĩd fen, Dokas ï mata kel fã yel anĩ ifelnēdin. ⁴² Pita enei age fen are, Jopa taun ganan od iyokelen, age fe di, tamo kayau musei Odug nigin momoi den. ⁴³ Pita Jopa an, gaar gabar el fiya tamo yana Simon dedig ï ado, naa musei dibodon.

10

Konelius Pita Bun Od Sur Fen

¹ Sisaria taun oun, tamo taka yana Konelius ibodon, ï wan handred kusĩ tamo neid orowa taka, ‘Itali kusĩ tamo mala’ dedig anĩ bun tamal. ² ï Rom tamal, Juda tamo sã, anĩ ere, Negur yana yalesedig, agef fen, ï yogon ibor adok geid, Negur nigin anini dedig. ï Juda maleg tamo musei isennēdidig, takag, ï toku Negur kosē fiyēdig. ³ Naa taka bun tri kilok aragau age fiya, Konelius ï mala seleulã kurãf fen, ï yaor bagai ilen, Negur nē engel isi fen, irokenen, “Konelius!”

⁴ Konelius kumĩ ado lo fiyekel fen, ï to fen, “Odug, ere?”

Engel ï irokenen, “Ogon kosē ado wau sã maleg tamo bun agodig are, Negur wagen sesewi fiya gen ise le di, Negur wau kulĩ yen. ⁵ Gama tamo tunĩ Jopa taun sur wodi di, dile, tamo taka yana Simon, Pita dedig dirou disiyouf. ⁶ ï gaar gabar el fiya tamo Simon ado dibodok, Simon nē fõ are maaĩ yerin ibodok.”

⁷ Engel Konelius od wogõ fiyekel fen, ï itornē di, Konelius yogon kabĩ tamo uru ado kusĩ tamo taka iweigneĩdin, kusĩ tamo are Negur yana yalesedig ado Konelius aruna daledig anidi taka. ⁸ Konelius ï, ereb wõ yen anĩ ganan irokeneĩd le fen, Jopa taun sur fedin.

Pita Mala Seleulã Kurãf Fen, Ilen

⁹ Naa anĩ ile di, idi naab diyok dile, Jopa taun kelē difiyē mog, Pita kosē youf nigin, fõ sokoron iselen, are gaa atun age fiya. ¹⁰ Pita ï naũ fe di, ereb taka yõya nigin oron. Saaf dodok dife mog, ï mulã fe di, yen mog, mala seleulã kurã fen. ¹¹ ï, saa kã fele di, anenem ereb taka gabar odug gen, iri aiwa adodo kaleya bun irou fen, tenebur folõ fele di, isil mog, ilen. ¹² Anĩ namen, gaar fire fire yeid imeid adodo, gaar luwedim diyõdig ado, ninã ilun temeleid dibodon. ¹³ Anĩ ait taka Pita irokenen, “Pita, fã wale, udenkeis fen, wõ.”

¹⁴ Anĩ ere, Pita iron, “Odug, sã bagai! Aya sesen amuyē adodo yõya nigin katũ difaman taka to bagai õdig.”

¹⁵ Ait anĩ baban Pita wogõ fiyen, “Ereb taka Negur ï amuyē sã inon anĩ, to amuyē ado wouf.”

¹⁶ Agef towo fe fen, kaisã bagai gabar kel yale, saa ilun irou iselen.

¹⁷ Pita mala seleulã kurãf fen, ilen anĩ nẽ gariya nigin, nene ye kisif mog, Konelius tamo sur fedin idi, Simon nẽ fõ nain be ifaref anĩ to dife kelei ken, dile, fõ bobogẽ difaren. ¹⁸ Idi diweig fen, Simon, yana taka Pita dedig an ibodok be anĩ to difen.

¹⁹ Pita ã mala seleulã kurãf fen, ilen anĩ nigin fau kisif mog, Awa Uur ã irokenen, “Simon, tamo towo õ dimirnok. ²⁰ Ani nigin, fã wale, tenebur kutũ weis usil. Idi geid ileyã nigin to utor, ere nigin, ayam idi sur afedin.”

²¹ Pita kutũ yeis isil fen, idi irokenẽdin, “Aya anĩ umirnagef. Anĩ ã ere nigin usigel?”

²² Idi diron, “Amã Konelius kusĩ tamo neid orowa takam sur famã di, masil. Ì madur tamo, Negur nigin anini yedig. Juda tamo kayau ganã, ã tamo biya difiyẽdig. Engel fateul, õ Konelius nẽ fõ bun ule fen, õ urõf anĩ Konelius karĩ youf nigin ã irokenen.” ²³ Age de di, Pita, idi bõ anĩ bun an denẽf nigin, aabẽ geif iroulen.

Pita Konelius Nẽ Fõ Bun Ilen

We fele di, Pita ã fã yale, tamo anidi weim dilen. Jopa taun temeleid kabĩ tura tar tunĩg, Pita geid weim dilen. ²⁴ Naa anĩ ile di, Pita Sisaria taun wõ yen. Konelius idi tari feid fen, ã yogon sirag tar ado mou tar melsã difaref anidi geid iweig laisi difaren. ²⁵ Pita Konelius nẽ fõ aaben isour iroule di, Konelius ã tarabã fiye ken, ã yogo lai feis, ye gariyan bobou fen. ²⁶ Anĩ ere, Pita ã yalesne ken, iron, “Ufar, ayag tamo maug.”

²⁷ Pita Konelius aaben wogõ fiyek dile fen, tamo kayau musei guru difen anĩ iledin. ²⁸ Pita idi irokenẽdin, “Ã aug kelei bagai, Juda tamo taka, haiden tamo taka ado nigal difouf be, ã ki fiyẽf, are lo wal fiya. Anĩ ere, aya, tamo taka sane be, amuyẽ ado be, to age auf nigin, Negur aya mogo ifelnan. ²⁹ Anĩ nigin, aya uweignag fen, tamo sur wedigen sain, aya wau uruya sã asil. Anĩ nigin, aya to ayeik, ere nigin ã uweignagen?”

³⁰ Konelius iron, “Naa fo mogo ilelen, sain anĩ bun, aya neu fõ bun sain

eig fe mog, tri kilok aragau kosẽ aun. Kaisã bagai, tamo taka kolos medeĩya ado, wageun ifar fen, ³¹ iron, ‘Konelius, Negur, ogon kosẽya karĩ yen ado, maleg bun ogon wau sã ifenẽya anĩ karĩ yelen. ³² Anĩ nigin, oun Jopa taun, tamo Simon, yana taka Pita dedig gein, tamo sur wo di, idi Pita õ bun isiyouf nigin dirokenẽf. Ì gaar gabar el fiya tamo Simon nẽ fõ maaĩ yerin ifaref an ibodok.’ ³³ Anĩ nigin, aya kaisã bagai õ bun tamo sur afedin, õ usil are de agol. Odug, urokanamãf nigin irokonon anĩ ganã karĩ mauf nigin, amã ganã Negur mala bun gama yeir.”

³⁴ Age ye di, Pita iron, “Aya gama momoi bagai kelei, are Negur ã taka nigin dogol to wau yenẽdig, ³⁵ anĩ ere, teneub ganã bun, tamo taka ã Negur nigin anini ye fen, tobonunã biya age fedig are, Negur ã nigin wau yenek. ³⁶ Israel tamo kayau bun, Negur od sur fen anĩ ã kelei, biya od eig ye wogõ yen, Jesus Kristus, ã ganã neid Odug, ã bunem maur gudũ fiya wõ yen. ³⁷ ã kelei, Jon naan igunẽdiya nigin od wogõ yele di, Galili distrik oun gariya ino fen, Judia distrik ganã bun ereb wõ yen anĩ. ³⁸ ã kelei, Negur, Jesus Nasaret tamã bun, Awa Uur Fateul ado megeir fi fele di, Jesus iyo ken, tobonunã biya agef fen, Satan nẽ megeir farumen dibodok anidi ganã el fiyẽdin, ere nigin, Negur ã ado ibodon.

³⁹ “Amã, Jerusalem ado Juda neid teneub bun, ereb Jesus age fen anĩ ganã malamã mailen. Idi ã aa tetek bun dũ di, laa fen. ⁴⁰ Anĩ ere, Negur ã naa towo ilele di, laa bun tamã ã turĩ fiyẽ di, tamo kayau dilouf nigin age fen. ⁴¹ Anĩ ere, tamo kayau ganã ã dilouf nigin to age fen, Negur mogo igirnẽdin anidim dogol dilouf nigin age fen, are amã Jesus laa bun tamã mata kel fã ye fen, weim saaf ado naan mon anim. ⁴² Ì, amã tamo kayau biya od wogõ mafiyẽid fen, Jesus ã mata nẽ ado laa nẽ es fiya tamo ã Negurem igirnen anĩ, kurõ mafesiyouf nigin irokanaman. ⁴³ Profet ganã ã nigin kurõ difeis wogõ den, are taka ã Jesus nigin momoi youf are, Jesus yana bunem yogon mosor nigin weder tu kalauf.”

⁴⁴ Pita ï fau od enei wogõ ye mog, Awa Uur Fateul od karĩ den anidi ganan bun isin. ⁴⁵ Juda momoiya tamo mulũ bun temeleid Pita geid disin idi, Negurem Awa Uur Fateul wau sã haiden buneg fi fele di, dile fen, terefeit den. ⁴⁶ Ere nigin, haiden idi od fire fire bun wogõ de, Negur yana dales mog, karĩ den.

Age dife di, Pita iron, ⁴⁷ “Taka nem, tamo kayau eneidi naan igunēdiya nigin katũ fediyof de? Idi amã Awa Uur Fateul malen age fiya bagai dalel.” ⁴⁸ Anĩ nigin, Pita, idi Jesus yana bunem naan digunēdiyof nigin irokenēdin. Age fe di, Pita idi geid naa tunĩ dibodõf nigin idi Pita dirokenen.

11

Pita Age Fen Anĩ Faded Fiyēdin

¹ Aposel ado, momoiya tamo kayau Judia distrik ganan bun dibodon anidi, haiden idig Negur nē od dalen yeya anĩ karĩ den. ² Sain Pita Jerusalem isele di, Juda momoiya tamo mulũ bun temeleid kekeir od diroken ken, ³ diron, “Õ haiden mulũ to dilen neid fõ bun ule fen, weim saaf wõgen.”

⁴ Age de di, Pita gariya ino, ereb ereb ganan wõ yen anĩ dir fe faded fiyēdin, ⁵ “Aya Jopa taun abod ken, kosē au mog, aya mulam malau gelele fe, malau seleulã kurãf fen, ailen. Aya ereb taka gabar odug gen, iri aiwa adodo kaleya bun irou fen, saa ilun tamal, aya abodon nē an folõ fele di, isil mog, ailen. ⁶ Aya anĩ fele afe fen, tenebur tamal gaar fire fire yeid imeid adodo, gaar kuĩ, gaar luwedim diyõdig ado, ninã ilun temeleid ailedin. ⁷ Agef fen, ait taka karĩ au mog, irokanan, ‘Pita, fã wale, udenkeis fen, wõ.’

⁸ “Anĩ ere, aya aron, ‘Odug, sã bagai! Aya sesen amuyē adodo yõya nigin katũ difaman taka to bagai õ ailen.’

⁹ “Ait anĩ baban saa ilunem wogõ yen, ‘Ereb taka Negur ï amuyē sã inon anĩ, to amuyē ado wouf.’ ¹⁰ Agef towo fe fen, anĩ ganan baban kel dīf, saa ilun irou iselen.

¹¹ “Sain anĩ bun bagai, tamo towo aya gein Sisariam sur difedin idi, fõ aya abodõdig nē an wõ den. ¹² Awa Uur aya idi

weim ileyã to atorõf nigin irokanan. Kabĩ turau tar sigis eneidig, aya weim mele, tamo anĩ nē fõ namen melen. ¹³ Age mafe di, ï engel taka naig be fe fen, yogon fõ bun wõ ye fen, eig ye irokenen, ‘Jopa taun oun, Simon yana taka Pita dedig gein tamo sur woid. ¹⁴ Õ ado ogon ibor tar ganan kel gei yeif nigin, ï od õ gein irou isiyof,’ ye di, ilen anĩ irokanaman.

¹⁵ “Aya od gariya ano, wogõ au mog, Awa Uur Fateul uruwa bun ada bun isin gen, idi buneg agef isin. ¹⁶ Age fe di, aya Odug eig ye iron anĩ, wederou fokõ yen, ‘Jon ï naanem igunēdin, anĩ ere, ã Awa Uur Fateulem igunēif.’ ¹⁷ Anĩ nigin, ada Odug Jesus Kristus nigin momoi tau di, Negur wau sã ege luwa ifanadan anĩ, idig ifenēdin anĩ youf are, aya ai nigin Negur naabura gudũ afiyēf?”

¹⁸ Idi od enei karĩ de fen, idi kekeir od ditor ken, Negur yana dales diron, “Age fiyauf are, Negur ï haiden idig waud falei de fen, mata bun dilauf anĩ ifenēdin.”

Sios Oun Antiok Taun

¹⁹ Stiwen dukesin sain bun, kafĩ fiya wõ ye di, momoiya tamo kayau firagagaũ dife fen, tunĩ Fonisia distrik, Saipras nuyo ado, Antiok taun dile fen, Juda tamo kayau bun dogol biya od wogõ difiyēdin. ²⁰ Anĩ ere, idi tunĩ Saipras nuyo ado Sairini taun temeleid, Antiok taun dile fen, Grik tamo kayau buneg wogõ de fen, Odug Jesus nigin biya od dirokenēdin. ²¹ Odug nē megeir idi adon, age fe di, tamo kayau musei momoi de fen, Odug bun falei den.

²² Od enei, Jerusalem taun oun sios bun iyokele di, idi Banabas Antiok taun sur difiyen. ²³ Banabas an wõ ye, Negur wau ifenēdin anĩ ilen, ï kulĩ ye fen, idi waud adok Odug bun momoi dibodõf nigin ganan waud yalesen. ²⁴ Banabas ï tamo biya, Awa Uur Fateul ado momoiya barikã. Tamo kayau musei Odug bun geif iroulen.

²⁵ Age dife di, Banabas Sol imirnēf nigin Tasus ilen. ²⁶ Banabas Sol fotou fiye ken, Sol Antiok taun irou isin. Agef fen, Banabas Sol ado yar tekelei adok, sios geid dibod ken, tamo kayau musei difelnēdin.

Antiok an, dō fiya tar anidi bun yana mata dun, are Kristen den.

²⁷ Sain anī bun, profet tunī Jerusalem anenem Antiok disin. ²⁸ Idi neid taka, yana Agabus fā ye fen, Awa Uur bunem profet od wogō yen, kadir odug Rom teneub ganan bun iyokalauf yen. (Sisa* Klodius nē sain bun, kadir enei wō yen.) ²⁹ Dō fiya tar, idi mugu mugu, dogo neid megeir bunem, momoiya tamo kayau Judia distrik bun dibodon anidi disennēdiyof nigin, kisi difon. ³⁰ Idi enei age de fen, moni wau sã Banabas Sol ado imeid bun dino, sios nē uyu irouya anidi bun sur difen.

12

Pita Kalabus Bun Tamal Yalisnen

¹ Sain anī bun, King Herod sios bun temeleid tunī kafī fiya ifenēdiyof nigin, gei fedin. ² Ī irō di, Jon tura Jems dimig nem dukesin. ³ Herod Ī Jems laa fe di, Juda tamo kayau waud al fen anī ile fen, Ī Pitag dalouf nigin ari fedin. Enei are, Bret Yis Sã Sifa sain bun wō yen. ⁴ Idi Pita dale di, Ī kalabus bun inenen, Ī kusī tamo mala aiwa adodo, mala mugu mugu kusī tamo aiwa adodom lo difouf nigin idi imeid bun inon. Herod Ī, Pasa naa ilele di, ganan meleid bun, Pita kot bun inenēf nigin kisi yalen.

⁵ Anī nigin, Pita kalabus bun dinenē ibodon, anī ere, sios idi Pita nigin Negur total bagai kosē difiyen.

⁶ Herod Ī Pita fau nil kot bun ifarauf ye mog, bō anī bun, Pita sen uru nem ifokeleya ado kusī tamo uru atun mulā yenen, kalabus bobog lo fiya tamo, bobog tari de difaren. ⁷ Kaisã bagai, Odug nē engel wō ye di, kalabus Pita ibodon aab namen fula felen. Agef fen, engel Pita siri yu ken, turī fiyē iron, “Gama nem, fã wale!” Age fe di, Pita ima bun tamal sen irokakakesin.

⁸ Age fe di, engel Pita irokenen, “Ogon let luwã gu fen, sendel ufoukel.” Age fele di, engel Pita irokenen, “Ogon kolos meluk ufoukel, dō wiya.” ⁹ Pita engel dōf kalabus bun tamal ilen, anī ere, Ī engel age

fen are, momoi bagai be anī to kelein, Ī malau seleulã kurã fe di, ailef yen. ¹⁰ Idi, kusī tamo kalabus bobog lo difedig uyulil ado anī dō fiya, wal difeid fen, taun isileya ain bobog bun disi di, sukar are yogo kã fel kenēdin, age fe di, idi ulolō desin. Idi naab taka luwe diyok disil fen, kaisã bagai engel Pita itornen.

¹¹ Age fe di, Pita weder fokōf mã, iron, “Momoi bagai aya gama keleī, Odug engel sur fe di, aya Herod nē megeir bun ado Juda tamo idi ereb wōya nigin kisi difen anī ganan bun tamal yalelnal.”

¹² Enei nigin weder fokō yel fen, Pita Ī, Jon yana taka Mak dedig sina Maria nē fō bun ilen, an tamo kayau musei guru de fen, kosē def dibodon. ¹³ Pita fō sukar godu godu fe di, kabī kayau taka yana Roda dedig sukar kã fouf nigin isin. ¹⁴ Ī Pita ait karī ye fen, fatuk bagai kulī ye fen, Ī sukar kã fiya sã, kel gudu ref ile fen, iron, “Pita yeir bobogē ifaref!”

¹⁵ Idi Ī dirokenen, “Ō wadak.” Anī ere, kayau Ī total bagai ino fen, agef irō di, idi diron, “Are Pita nē engel.”

¹⁶ Age de mog, Pita Ī fau fau sukar godu godu fe di, idi sukar kã difel, Pita dile fen, terē den. ¹⁷ Pita foro dalauf nigin imam dogol fiyeid le fen, Odug Ī kalabus bun tamal yalis irou isil anī faded fiyeid fen, iron, “Jems tura tar geid od enei urokenēdigouf.” Age ye fen, Pita idi itorneid, uyu takã ilen.

¹⁸ Bonime di, kusī tamo Pita to dile fen, fatuk bagai nene de, abob to difen. ¹⁹ Herod Pita dimirnēf nigin irokenēdin, anī ere, idi Ī to fotou difiyēn. Age dife di, Herod kalabus lo fiya tamo Pita lo difen idi to fiyeid le fen, kalabus lo fiya tamo anidi didenkesiyof nigin irokenēdin.

Herod Laa Fen

Agef fen, Herod Judia distrik bun tamal Sisaria taun ile, sain naal an ibodon. ²⁰ Herod Ī, Taia ado Saidon taun tamo kayau nigin name fatuk bagai sanen, anī ere, gama idi waud tekelei fen, Herod dilouf nigin disin. Uyulil idi Blastus, king nē ibodōya modoū nē lo fiya mudur, Ī idi isennēdiyof nigin dirokenē di, Blastus yo

* 11:28: Rom neid king odug.

yen. Age de fen, idi Herod garan dile, maur gudū fiya nigin dirokenen, ere nigin, idi king nē akor bun tamal saaf daledig.

²¹ Naa inon anī bun, Herod ī king nē kolos ifounkel, king nē sia bun ibod ken, tamo kayau od wogō fiyēdin. ²² Tamo kayau diweig diron, “Eī waitou ait, tamo nē sã.” ²³ Kaisã bagai, Odug nē engel Herod yū iran, ere nigin, ī Negur yana to yalesen. Ī mamatem dō di, laa fen.

²⁴ Anī ere, Negur nē od bilalaū fel iyoke-len.

²⁵ Banabas Sol ado, dogo neid kabī bure difel fen, Jerusalemem keku de disin, idi Jon, yana taka Mak dedig dale fen, weim disin.

13

Idi Banabas Sol Ado Sur Difedin

¹ Antiok sios bun, profet ado tise difaren, are Banabas, Simeon yana taka Karos dedig, Lusius Sairini taun tamal, Manain (ī king Herod ado bibiyedin) ado, Sol. ² Idi Odug yana dales fen, kuri de mog, Awa Uur Fateul idi irokenēdin, “Banabas Sol ado kabī aya agirkenēdin anī dalouf nigin, gadi weleid kanag.” ³ Anī nigin, idi kuri de kosē del, imeid idi tetedin dino fen, sur difedin.

Oun Saipras Nuyo

⁴ Awa Uur Fateul, Banabas Sol ado sur fedi di, idi Selusia taun dile fen, anenem waag dale, Saipras nuyo dilen. ⁵ Idi Salamis taun wō de fen, Negur nē od Juda neid uub fō fō bun wogō den. Jon idi isennēdiyof nigin, ī dale weim dilen.

⁶ Idi nuyo anī ganan atu diyok dile, Pafos taun wō den. Idi an idegēya kosē tamo taka, idegēya profet Juda tamal, yana Bar-Jesus dedig fotou difen. ⁷ Bar-Jesus ī nuyo anī nē gawaman mudur Segius Paulus ado dibodon. Segius Paulus ī tamo kisi biya ado. Gawaman mudur ī, Negur nē od karī youf nigin, Banabas Sol ado iweignēdin. ⁸ Anī ere, idegēya kosē tamo Elimas (yana are Grik od nem ‘idegēya kosē tamo’) idi naabureid gudū fe di, gawaman mudur to momoi youf nigin age fen. ⁹ Age fe di, Sol, yana taka Pol dedig, Awa Uur Fateul barikã, ī idegēya kosē tamo lo fiyekel fen,

iron, ¹⁰ “Ō Satan naal, ō Negur nē madur fiya ganan nē kiwai! Idegēya ado sesen ganan, ō bun isokosef. Ō ere sain anī, Odug nē naab madur anī, idegēya bun falei fiyai wodig utorlauf? ¹¹ Gama Odug ima, ō teten isif. Ō malã ifofakalauf, ō sain naal meluk, gaa lalan to ulouf.”

Kaisã bagai, budū ado gugum isi, kerub fiyē di, ī taka nem ima gim fouf nigin, ima ra yef iyon. ¹² Gawaman mudur ī agef wō yen anī ile fen, ī momoi yen, ere nigin, ī Odug nigin ifelnē di, ilen anī nigin terē yen.

Pisidia Distrik Nediwon Antiok Taun

¹³ Pol yogon kabī tura tar geid, waag dale, Pafosem, Pamfilia provins oun Perga taun dilen, an Jon idi itorneid fen, Jerusalem kel ilen. ¹⁴ Idi Perga taun anenem, Pisidia distrik nediwon Antiok taun dilen. Sabat naa bun, idi Juda neid uub fō bun dile dibodon. ¹⁵ Lo ado profet neid itotoya diwesleid fen, Juda neid uub fō nē mudur adodo, Banabas Pol ado gein od sur dife fen, diron, “Turamã tar, ã tamo kayau waud yaleseya nigin od adouf are, wogōg.”

¹⁶ Pol fã ye, foro dalauf nigin imam fiyeid le fen, iron, “Israel tamo kayau ado, haiden Juda tamo kayau geid Negur nigin anini gedig ã, karī wiyag! ¹⁷ Israel tamo kayau neid Negur, tubumã tar igrineid fen, idi Isip dibodon sain, Negurem age fe di, idi fulus difen. Negur ī megeir odug nem, idi Isip tamal gurif irou ilen. ¹⁸ Negur ī, foti yar age fiya gerere tuan, idi tobonunã sane age difen anī lolou fesif isin. ¹⁹ Ī Kanan teneub bun, tamo ibor sewen adok daūf iraile fen, dogo neid teneub, yogon tamo kayau idi akorouf nigin ifenēdin. ²⁰ Enei ganan fo handred fifti yar age fiya ilelen.

“Enei bure fele di, Negur ī, Israel tamo kayau es fiya tamo ifenēdif ile, profet Samuel nē sain bun. ²¹ Anī bure fele di, tamo kayau king nigin dirō di, Negur, Sol Kis naal, Benjamin nē ibor bun tamal ifenēdin, Sol foti yar king ibodon. ²² Negur Sol yalelne ken, ī Dawid idi neid king inenen. Negur Dawid nigin eig ye iron, ‘Aya, Jesi naal Dawid ī, tamo aya wau

irok kilei anī ailen, ī ereb ereb ganan, neu oroya yenek anī dōf age fouf.’

²³ “Negur ī age afouf yen kilei, Dawid nē ibor nē tubu tar bun tamal, kel yaleya tamo Jesus Israel ifenēdin. ²⁴ Jesus fau isiya sā mog, Jon Israel tamo kayau ganan waud falei ye di, naan igunēdiyof nigin od wogō yen. ²⁵ Jon ī yogon kabī idikalau fenē mog, ī iron, ‘Aya nigin ā aim gef? Aya tamo ī tari gef anim sā. Anī ere, ī aya dumeun dō fiyaf, aya to biya nigin yogon su malū biru fediya kisi feleya sā.’

²⁶ “Turau tar, Abraham gere tar ado, haiden ā Negur nigin anini gedig, Negur tamo kayau kel yaleya nē od, amā bun sur fen. ²⁷ Jerusalem tamo kayau, dogo neid mudur adodo geid, Jesus ado, profet neid od Sabat naa ganan bun diwasedig anī to kelei ken, Jesus bouwa bun od dun, anī bunem profet neid od kisi fel wō yen. ²⁸ Idi Jesus dukesiyof nigin, gariya taka to dilen, anī ere, idi ī dukesiyof nigin, Pailat dirokenen. ²⁹ Idi Jesus nigin Negur nē Itotoya bun yenek anī ganan, dō de age difel fen, idi ī aa tetek bun tamal dalisne ken, matmat bun dinenen. ³⁰ Anī ere, Negur Jesus laa bun tamal kel turī fe di, mata kel fā yen. ³¹ Agef fen, Jesus, tamo idi, ī geid Galili teneub bun tamal Jerusalem dilen anidi bun, naa musei wō yen. Idi anidim gama, tamo kayau bun, ī nigin wogō def dilef.

³² “Amā biya od ā marokeneik, Negur tubumā tar age afouf fiyēdin are, ³³ Jesus kel turī fiyen anī bunem, amā idi gereneid tar kisi fel naman. Sam tu bun itotoya yenek kilei:

“ Ō neu Kesu,
aya gama ō Tamā wō aul.’* ”

³⁴ Negur ī laa bun tamal kel turī fiyē di, ī to bagai bura lauf nigin, Negur eig ye iron:

“ ‘Aya momoi bagai nē ado fateul nē el fiya, are aya Dawid afenēf aun anī, ā afeneif.’ † ”

³⁵ Negur nē Itotoya taka buneg eig ye irok:
“ Ō ogon Fateul Tamo to utorō di, bura lauf.’ ‡ ”

³⁶ “Dawid ī yogon sain bun, Negur nē oroya anī aruna yale fen, laa fen. Ī tubu tar geid mū dife di, bouwa bura len. ³⁷ Anī ere, Negurem laa bun tamal kel turī fiyen ī, bura leya san.

³⁸ “Anī nigin, turau tar, ā keleī youf, Jesus bunem mosor weder tu keleya nigin od wogō yeik. ³⁹ Tamo ganan Jesus nigin momoi def, mosor ganan yalelkeneid fen, madur fedif, anī ere, Moses nē Lo bunem, tamo neid mosor ganan yalelkeneid fen, madur fediya kisi feleya sā. ⁴⁰ Anī nigin, profet wogō den anī, ā bun to wō youf nigin lo weleg:

⁴¹ “ ‘Ulegef, ā kono fiya tamo!
Terēg fen, gare gouf,

ere nigin, aya āgenei sain bun ereb taka age afouf,
are taka nem irokeneifeg,
ā to bagai momoi gouf.’ § ”

⁴² Pol Banabas ado, Juda neid uub fō ditor dile mog, tamo kayau, Sabat naa taka bun, od enei baban tobol difouf nigin dirokenēdin. ⁴³ Tamo kayau dilele di, Juda tamo kayau musei ado, haiden Juda neid momoiya bun falei de fen, Negur nigin anini dedig musei idi, Pol Banabas ado dō difedin. Age dife di, Pol Banabas ado weim wogō de fen, idi Negur nē wau ifenēya bun toku dibodōf nigin waud dalesen.

⁴⁴ Sabat naa taka bun, taun dibodōdig anidi musei ganan, Odug nē od karī douf nigin guru difen. ⁴⁵ Anī ere, Juda tamo idi, tamo kayau guru difen anidi dileid fen, kiyeim aura fiyēdi di, Pol wogō yen anī nigin kiwai difen ken, kono difiyen.

⁴⁶ Age dife di, Pol Banabas ado kumī sā wogō eig de diron, “Amā Negur nē od, ā bun ketem sā wogō mayeim. Anī ere, ā Negur nē od utorōg fen, amā to biya nigin mata faimud ibodkeleya to malouf gen. Anī nigin, amā gama haiden gedin melef. ⁴⁷ Are Odug eig ye irokanaman:

“ ‘Aya ō haiden neid lalan anenon,
anī bunem, teneub idikelediya bun,
tamo kayau usenneid, kel gei wediyof.’* ”

* 13:33: Sam 2:7 † 13:34: Asaia 55:3 ‡ 13:35: Sam 16:10 § 13:41: Habakuk 1:5 * 13:47: Asaia 49:6

⁴⁸ Haiden idi od enei karĩ de fen, waud kulĩ ye, Odug nẽ od seli dabin. Mata faimud ibodkeleya nigin igirnẽdin anidi ganan momoi den.

⁴⁹ Age dife di, Odug nẽ od, teneub anĩ ganan bun iyokelen. ⁵⁰ Anĩ ere, Juda tamo idi, haiden kayau yeneid adodo Negur nigin anini dedig ado, taun uyu irouya tamo anidi nameid dalesen. Idi Pol Banabas ado darau difenẽdiyof nigin, tamo kayau nameid dalese di, dogo neid teneub bun tamal dirudidin. ⁵¹ Anĩ nigin, Pol Banabas ado, idi neid tobonunã sane anĩ difelnẽdi di, keleĩ youf nigin, yeid aas tu difel fen, Ikonium taun dilen. ⁵² Dõ fiya tar idi, kulĩya ado Awa Uur Fateul barikan.

14

Oun Ikonium Taun

¹ Oun Ikonium taun, Pol Banabas ado, idi gai age difedig gen, Juda neid uub fõ bun dile fen, an tamo waud yaleya bun wogõ de di, Juda tamo kayau ado Grik tamo kayau musei momoi den. ² Anĩ ere, Juda tamo momoiya sã anidim, haiden idi nameid dalese di, haiden idi, momoiya tamo kayau kiwai difenẽdin. ³ Anĩ nigin, Pol Banabas ado, sain meluk an dibod ken, Odug nigin kumĩ sã wogõ den. Age dife di, Odug ĩ, idi memelik uris ado dinodiyof nigin, megeir ifenẽdin, anĩ bunem, Odug yogon wau ifenẽya nẽ od anĩ megeir fen. ⁴ Tamo kayau taun temeleid faraf fen, tunĩ Juda tamo geideid, tunĩ aposel geid. ⁵ Age de fen, Juda tamo ado haiden, dogo neid uyu irouya geid, aposel to biya difiyẽd fen, meein tulu difiyẽdiyof nigin age difen. ⁶ Anĩ ere, aposel idi anĩ kelei ken, idi diya, Likonia distrik nediwon Listra taun, Derbe taun, anĩ kalilĩ fiya bun diyok dile fen, ⁷ an biya od wogõ den.

Oun Listra ado Derbe Taun

⁸ Oun Listra taun, tamo taka ye ilolaisin ibodon, ĩ sina namenem ye ilolaisin wõ yen, anĩ to iyõdig. ⁹ ĩ, Pol od wogõ ye mog, karĩ fiyen. Pol ĩ lo fiyekel fen, ĩ bouwa biya lauf nigin momoiya ado anĩ ile fen, ¹⁰ Pol ait odugem iweig iron, “Fã wale ufar!” Age ye di, ĩ gurusã ye, iyok ilen.

¹¹ Tamo kayau musei Pol age fen anĩ dile fen, Likonia od nem diweig diron, “Waitou tamo falei difel fen, ada gein disil!” ¹² Idi Banabas ĩ Sus difiye ken, Pol ĩ Hermes difiyen, ere nigin, Pol ĩ ait ado tamo. ¹³ Waitou Sus nẽ tempel, taun yerin ibodon. Waitou Sus nẽ pris, bulmakau bobõ gĩ fediya adodo, taun bobogẽ irou isin, ere nigin, ĩ tamo kayau musei geid, aposel sesewi fiya difenẽdiyof nigin age fen.

¹⁴ Anĩ ere, aposel Banabas Pol ado, anĩ karĩ de fen, dogo neid kolos serek difeid fen, tamo kayau musei atun gududu de dile diweig diron, ¹⁵ “Tamo kayau, ã ere nigin enei ago gef? Amãg tamo maug, ã gen. Amã ã gein biya od marou masif, are ã kaũ sã enei utorõg fen, mata ibodõya Negur ĩ, saa, teneub, maaĩ ado, anidi namen ereb ereb ganan inodin, ĩ bun falei gouf nigin marokeneik. ¹⁶ Kulu Negur ĩ tamo kayau teneub ganan bun itornẽdi di, dogo neid oroya dõ difen. ¹⁷ Anĩ ere, Negur ĩ yogo nigin yaor fiya to itor ken, faimud ereb ereb biya age fedig anĩ bunem, yogo nigin yaor fedig. ĩ saa bunem uyẽ ado, saaf dogo neid sain dõf fen, ifeneĩdig. ĩ saaf musei biya ifenei ken, wauĩ bun kulĩya ifeneĩdig.” ¹⁸ Od enei nemeg, tamo kayau musei aposel sesewi difenẽdiyof nigin age difen, anĩ ere, aposel idi naabureid gudũ difenẽdiyof nigin lakĩ difen.

¹⁹ Age dife di, Juda tamo tunĩ, Antiok ado Ikonium taun temeleid disi fen, tamo kayau musei waud dalen. Age de fen, idi Pol meein tulu difiyẽ, laa fel de fen, taun yerin diror diroulen. ²⁰ Anĩ ere, dõ fiya tar guru de, Pol salili difiyẽ di, ĩ fã yale fen, baban taun kel ilen. Naa taka di, ĩ Banabas ado Derbe taun dilen.

Aposel Siria Distrik Oun Antiok Taun Keku Den

²¹ Idi taun anĩ bun biya od wogõ de fen, dõ fiya tar musei dalen. Age difel fen, idi Listra, Ikonium ado, Antiok taun keku de dile, ²² dõ fiya tar megeir difiyẽd fen, idi momoiya bun dibodõf nigin waud dalesen. Idi diron, “Ada Negur nẽ tano bun ileyã nigin, morõ musei talouf bagai.” ²³ Pol Banabas ado, sios mugu mugu

bun, uyu irouya digirneïd fen, kosēya ado kuriya bunem, Odug idi ï nigin momoi dedig, ï ima bun dinenēdin. ²⁴ Idi Pisidia distrik atu diyok dile, Pamfilia provins bun wowā den. ²⁵ Age de fen, idi Perga taun an od wogō del fen, Atalia taun disilen.

²⁶ Idi Ataliam waag dale, Antiok keku de dilen, kulu an, sios, kabī gama bure difelex anī nigin, aposel idi Negur nē wau ifenēya bun dinenēdin. ²⁷ Idi Antiok taun wowā de fen, sios kuru difeid fen, Negur idi bunem ereb age fen anī ganān ado, Negur ï haiden momoi douf nigin sukar kā fen anī, wogō difiyēdin. ²⁸ Age dife fen, idi, dō fiya tar geid, sain meluk an dibodon.

15

Guru Fiya Oun Jerusalem

¹ Tamo tunī, Judia distrik bun temelexid Antiok taun disi fen, momoiya tamo kayau eig de difelnēdin, “Ā Moses nē tobonunā kilei, mulū to ulagauf are, ā kel gei yeīya kisi feleya sā.” ² Od enei nigin, idi Pol Banabas ado geid fatuk bagai fefe de fen, luwa diroun. Anī nigin, momoiya tamo kayau enei nigin Jerusalem disel fen, aposel ado uyu irouya geid to difiyēdiyof nigin, Pol Banabas ado momoiya tamo tunī geid digirnēdin. ³ Sios idi sur difedi di, Fonisia ado Samaria distrik atu dile fen, haiden idi Negur bun falei den anī dirokenēdin. Od eneim, momoiya tamo kayau ganān fatuk bagai kulī den. ⁴ Idi Jerusalem wō de di, sios, aposel geid, uyu iroudiya anidim idi aan difiyēdin. Age dife di, Negur idi bunem ereb age fen anī ganān, sios, aposel geid, uyu iroudiya wogō difiyēdin.

⁵ Age dife di, momoiya tamo tunī Farisia mala bun temelexid, fā de fen, diron, “Haiden idi mulū dile fen, Moses nē Lo dō difouf nigin dirokenēdiyof bagai.”

⁶ Age de di, aposel idi, uyu iroudiya geid, od enei nigin guru de katō difen.

⁷ Od musei sain meluk katō difen sain, Pita fā yale irokenēdin, “Turau tar, ā keleī, kulu, sain taka bun, haiden idi aya sigorou bun biya od karī de fen, momoi douf nigin, ā atun Negur aya igirnan. ⁸ Negur

ï, tamo nē wau keleī, ï Awa Uur Fateul, ada ifanadan gen, haiden idig ifenēdin anī bunem, idig yaledin anī ifelnēdin. ⁹ Negur, ada ado idi geid atun daū taka to inon, ere nigin, momoiya bunem ï waud kulo feledin. ¹⁰ Anī ere, ere nigin ā gama Negur kisi wiyēg fen, morō adag age fiya, tubuda tareg faali fiya kisi feleya san anī, dō fiya tar tetedin unogouf nigin ago gef? ¹¹ Sā! Ada, idi agef kel gei fedif gen, neda Odug Jesus nē wau ifenēya bunem, adag agef kel gei fadaf anī momoi tauf.”

¹² Tamo kayau ganān guru difen anidi ganān foro del fen, Banabas Pol ado, Negur idi bunem memelik ado uris fire fire haiden atun inodin anī wogō de di, karī den. ¹³ Idi wogō dele di, Jems ï iron, “Neu turau tar, karī wiyag. ¹⁴ Simon mogo faded fadal, are Negur ï yogo yana nigin ye fen, haiden atun tamo kayau yaledin anī bunem, ï urug bagai haiden nigin wau yenen anī ifelnadan. ¹⁵ Profet neid od are, enei ado susu felef, are Negur nē Itotoya bun eig ye irok kilei:

¹⁶ “‘Enei dumen, aya kelau fen,
Dawid nē salafat kubū yen anī baban alesauf.

Aya sesen ledin anī madur afelexid fen,
baban anouf,

¹⁷ anī bunem, tamo kayau ganān atun tunī ado, haiden ganān neu nigin agirnēdin geid,
Odug dimirnef.’*
¹⁸ Odug ï enei kulu bagai yaor fen, ï anī agef irok.

¹⁹ “Anī nigin, neu es fiya bun, ada haiden Negur bun falei def anidi, morō to tafenēdiyof. ²⁰ Age fiya ban, ada pas tatot fen, idi saaf idegēya waitou bun sesewi difen anī to dāf nigin, noli tobonunā bun to dilauf nigin, yaro ulexid kakā difeid fen, didenkesif anī to dāf nigin ado, yaro naud adodo to dāf nigin torokenēdiyof. ²¹ Ere nigin, sain meluk bagai, Moses nē Lo taun ganān bun wogō de fen, Sabat naa ganān bun Juda neid uub fō fō bun diwesedig.”

Guru Fiya Nē Pas Haiden Momoiya Tamo Kayau Bun Sur Difen

* 15:17: Amos 9:11, 12

²² Age ye di, aposel idi, uyu iroudiya ado, sios ganan geid, idi atun tamo tunī digirneīd fen, Pol Banabas ado weim Antiok taun sur difediyouf nigin kisi difon. Idi Judas (yana taka Basabas dedig) ado Sailas digirnēdin, tamo uru anidi, momoiya tamo kayau atun, idi uyu irouya.

²³ Idi bun pas eig de ditoton anī sur difen: Amā aposel, uyu iroudiya geid, āgenei tureī tar,

haiden bun temeleī turamā tar Antiok taun, Siria ado, Silisia provins bun ubodōgef aan mayeik.

²⁴ Amā nemā tamo tunī, yoya to dale fen, dile, idi neid wogōya bunem gelele diyei ken, wauī morō difenein anī, amā karī maun. ²⁵ Anī nigin, amā ganan kisi tekelei mano fen, tamo tunī magirneīd fen, nemā oboimā tar bagai Banabas Pol ado geid ā gein sur mafedif. ²⁶ Banabas Pol ado idi, neda Odug Jesus Kristus yana nigin, dogo neid mata itorōya nigin to fese den. ²⁷ Anī nigin, amā matokeneik anī sigoredim megeir fiya nigin, Judas Sailas ado sur mafedif. ²⁸ Awa Uur Fateul, amā geid, kisi tekelei fen, ā bun nun enei teten baban morō taka to mafeneīf nigin yo maun: ²⁹ Ā saaf idegēya waitou bun sesewi difen anī to wāgauf, yaro naud adodo to wāgauf, yaro uleid kakā difeid fen, didenkesif anī to wāgauf ado, noli tobonunā bun to ulagauf. Ā enei adok irok kilei sese gouf are, ā nigin deuf.

Dabuo.

³⁰ Tamo idi sur difedi di, Antiok taun disil, sios kuru difeid fen, pas anī difenēdin. ³¹ Tamo kayau pas anī diwes fen, waud yaleseya od anī nigin kulī den. ³² Judas Sailas ado, idi dogo profet, momoiya tamo kayau waud dales fen, megeir difenēdiyof nigin od fatuk wogō den. ³³ Idi an sain naal meluk dibodon, age dife di, momoiya tamo kayaum waud inosiya ado sur difedi di, idi sur difedin anidi gedin keku de dilen.† ³⁵ Anī ere, Pol Banabas ado Antiok dibodon, an idi tunī

museig geid fen, Odug nē od difelneīd fen, wogō den.

Pol Banabas Ado Waud Tekelei San

³⁶ Naa tunī ilele di, Pol Banabas iroke-nen, “Ada keku tau fen, taun ganan Odug nē od wogō tafiyēdin nē an turada tar ki tafiyēid fen, idi naig difef anī tailauf.”

³⁷ Banabas ī, Jon yana taka Mak dedig, idi geid dilauf nigin oron, ³⁸ anī ere, Pol ī weim dilauf are to biya ye kisi fen, ere nigin, Jon ī Pamfilia provins oun idi itorneīd fen, idi geid kabī to dalef dilen.

³⁹ Idi fatuk bagai fe de fen, fara difen. Banabas ī Mak yale fen, waag bun Saipras nuyo dilen, ⁴⁰ anī ere, Pol ī Sailas igirnē di, momoiya tamo kayaum Odug nē wau ifenēya bun dinenēdi di, dilen. ⁴¹ Ī Siria ado Silisia provins atu ile fen, sios megeir fiyēdif ilen.

16

Timoti Ī Pol Sailas Ado Weim Dilan

¹ Pol ī Derbe taun isi fen, anenem Lистра taun ilen, an dō fiya tamo taka yana Timoti ibodōdig, ī sina Juda tamal momoiya kayau, anī ere, ī tama Grik tamal.

² Momoiya tamo kayau Lистра ado Ikonium taun temeleid, Timoti biya difiyēdig. ³ Pol ī Timoti ado dilauf nigin oron, anī nigin, ī, Juda tamo modoū anī bun dibodōdig anidi nigin, Timoti mulū inenen, ere nigin, idi ganan keleī, Timoti ī tama Grik tamal. ⁴ Idi taun mugu mugu bun diyok dile fen, oun Jerusalem aposel idi uyu iroudiya tamo geid, tamo kayau dō difouf nigin od difon anī wogō difiyēdif dilen. ⁵ Anī bunem, sios idi momoiya megeir dale fen, naa ganan momoiya tamo kayau ifagaf ilen.

Pol Mala Seleulā Kurāf Fen, Masedonia Tamo Taka Ilen

⁶ Pol yogon kabī tura tar geid, Frigia distrik ado Galesia provins bun diyok dilen, ere nigin, Awa Uur Fateul, idi Asia provins bun od wogōya nigin katū fiyēdin. ⁷ Idi Misia distrik nē daū bun disi fen, Bitinia provins bun dilauf nigin age difen, anī ere, Jesus nē Awa Uur ī katū fiyēdin. ⁸ Anī nigin, idi Misia distrik wal dife fen, Troas

† 15:33: Itotoya tunī eig ye irok: dilen. 34 Anī ere, Sailas ī an ibodōf nigin kisi fen.

taun disilen. ⁹ Bõ anī bun, Pol mala seleulā kurāf fen, Masedonia provins tamal tamo taka ifar fen, igonen, “Masedonia usi fen, usennamā,” fiyē mog, ilen. ¹⁰ Pol mala seleulā kurāf fen, anī ilen, age fel fen, amā kaisā bagai Masedonia provins malauf nigin dodok mafen, ere nigin, amā kisi mafen, Negur idi bun biya od wogō mauf nigin iweignaman.

Filipai Taun Oun Lidia Jesus Nigin Momi Yen

¹¹ Troas taun anenem, amā waag bunem madur kilei Samotres nuyo melen, naa taka di, Neapolis melen. ¹² Anenem amā Filipai melen, Filipai are Rom gawamanem lo fedig, Masedonia provins bun taun anī uyu irouf. An naa tunī mabodon.

¹³ Sabat naa bun, amā taun mator ken, taun bobog serē naan yerin an, amā kosēya nē modoū mamirēf nigin melen. Amā mabod ken, kayau an guru difen anidi wogō mafiyēdin. ¹⁴ Idi neid taka karī faman, kayau anī yana Lidia, Taiataira taun tamal, ī gabar kadaū na nigin susur fedig, ī Negur yana yalesedig. Odug, ī Pol nē od karī youf nigin wau bun sukar kāf kenen. ¹⁵ Kayau anī yogon ibor tar geid naan diguneīd kele di, ī yogon fō bun malauf nigin irokanama ken, iron, “Aya Odug nigin momoi auf agef kisi gouf are, umag, neu fō bun ubodōg.” Ī nugo famā di, amā dō mafiyen.

Pol Sailas Ado Kalabus Bun

¹⁶ Naa taka bun, kosēya nē modoū bun mele mog, ferfer kayau momoul taka fottou faman, ī kaa sane ado, anī bunem ereb fau wō youf anī wogō yedig. Yogon marau tar, ī ereb fau wō youf anī wogō yedig anī bunem, moni musei daledig. ¹⁷ Kayau momoul enei, amā Pol geid dō fama ken, iweig iron, “Tamo eneidi Negur Ilun Bagai nē ferfer tar. Idi ā isennēya walogouf nē naab dirokeneik.” ¹⁸ Kayau ī naa musei age fe di, Pol wau fatuk bagai moro ken, falei ye, kaa sane irokenen, “Jesus Kristus yana bunem, aya ī bun tamal ulō wesiyouf nigin arokonok!” Sain anī bun bagai, kaa sane kayau anī itornen.

¹⁹ Ferfer kayau momoul nē marau tar, moni yaleya nē naab gudū felen anī kelei ken, Pol Sailas ado gei de didū difeid, maket modoū bun yeneid adodo tamo gedin dirouledin. ²⁰ Idi Rom neid lo es fiya tamo bun guri difeid dile fen, diron, “Tamo eneidi are Juda temeleid, idi neda taun bun morō odug dinof. ²¹ Idi tobonunā difelnēdif are neda lo to irok anī, ada Rom tamo, anī nigin, ada tobonunā enei to talouf, to dō tafouf.”

²² Age de di, tamo kayau, idi geid bagu de fen, Pol Sailas ado kiwai difenēdin. Age dife di, Rom es fiya tamo kolos dinukaka keneīd fen, wagagā difediyouf nigin dirokenēdin. ²³ Idi fatuk bagai wagagā difiyeīd kele fen, kalabus bun dinenēdin. Age dife fen, kalabus lo fiya tamo el fe lo fediyouf nigin dirokenen. ²⁴ Kalabus lo fiya tamo od anī yale fen, kalabus fō aab namen ineneīd fen, yeid aam kotū feledin.

²⁵ Bõ atun age fiya, Pol Sailas ado Negur kosē difiye ken, seg dale mog, kalabus tamo ganan karī difiyēdin. ²⁶ Kaisā bagai, mimī odug fā ye fen, kalabus fō gariya anī guyō fen. Kaisā bagai, kalabus fō nē sukar ganan kā feleid fen, kalabus tamo ganan bun sen irokaka kalaisi keledin. ²⁷ Kalabus lo fiya tamo irik yel fen, kalabus fō nē sukar kā felediya ilen, agef fen, ī kisi fen, kalabus tamo diyalelel ye fen, yogon dimig ul feis, yogo bouwa yukesiyouf nigin age fen. ²⁸ Anī ere, Pol iweig iron, “Ō ogo bouwā to tū wo! Amā ganan yeir!”

²⁹ Kalabus lo fiya tamo yal nigin iweig fen, namen gudu ref ile, Pol Sailas ado yedin kubū ye, tererē yen. ³⁰ Agef fen, idi gurif irou, mayarē isi fen, to fiyēdin, “Tamo bibiyeī, aya naig afe fen, isennēya alouf?”

³¹ Idi diron, “Odug Jesus nigin momoi wouf are, ō isennōf, ō ogon ibor tar geid.”

³² Age de fen, idi Odug nē od, ī ado ganan yogon fō bun dibodon anidi geid, wogō difiyēdin. ³³ Sain anī bun bagai bõ, kalabus lo fiya tamo, Pol Sailas ado gurif iroule, bouweid gali gedin anī kulo fedin. Age fel fen, kaisā bagai ī yogon ibor tar ganan geid, naan digunēdin. ³⁴ Kalabus lo fiya tamo, idi yogon fō aaben gurif iroule, saaf

ifenēdin. Ī wau kulīya barikan, ere nigin, ĩ Negur nigin momoi yen, yogon ibor tar ganan geid.

³⁵ We fele di, Rom es fiya tamo, dogo neid kabī tamo anidi bun, kalabus lo fiya tamo gein od sur difen, “Tamo anidi walisneīd.” ³⁶ Age difiyē di, kalabus lo fiya tamo Pol irokenen, “Rom es fiya tamo, ō Sailas ado alisneīf nigin dirokanal. Gama ā wadā ulagauf. Wauī inosiya ado ulagauf.”

³⁷ Anī ere, Pol kabī tamo irokenēdin, “Amā Rom tamo ba, anī ere, idi to es difama ken, amā mal atun wagagā difaman. Age dife fen, amā kalabus bun dinenaman. Anī gama idi iminēyan dirumā fenē de? Sā! Idi dogo disi, dalisnama ken, dinenamāf.”

³⁸ Kabī tamo, od enei Rom es fiya tamo dirokenēdin. Pol Sailas ado idi Rom tamo yeya anī karī de fen, idi kumī den. ³⁹ Idi Pol Sailas ado gedin bobo difiyēdiyof nigin disi fen, kalabus bun tamal dalis dinenēdin. Age dife fen, Rom es fiya tamo idi, Pol Sailas ado taun anī ditor dilauf nigin dirokenēdin. ⁴⁰ Pol Sailas ado, kalabus bun tamal ulolō deis fen, Lidia nē fō bun dilen, idi an momoiya tamo kayau fotou difeid, waud dales le fen, ditorneīd dilen.

17

Oun Tesalonika Taun

¹ Pol Sailas ado, Amfipolis ado Apolonia taun atu diyok dile fen, Tesalonika taun wō den, an Juda neid uub fō ibodon. ² Pol ĩ gai age fedig gen, Juda neid uub fō bun ilen. Sabat naa towo bun, ĩ Negur nē Itotoya bun ibodok anī, tamo kayau geid katō de, ifelneīd fen, ³ Kristus ĩ darau yale fen, laa bun tamal mata kel fā youf bagai nigin, el fe faded fiyēdin. Pol iron, “Jesus enei aya ā arokeneik are, ĩ anī Kristus.” ⁴ Juda tamo kayau tunī karī de, momoi de fen, Pol Sailas ado dō difedin, Grik tamo kayau museig Negur nigin anini dedig ado, kayau yeneid adodo museig age difen.

⁵ Anī ere, Juda tamo, Pol Sailas ado kiyeī difeneīd fen, maket modoū bun tamo sesen tunī kuru difeid waud dalese di, tamo kayau guru difalasi fen, taun anī

bun kakaī den. Idi Pol Sailas ado, tamo kayau bun diroulediyof nigin, Jeson nē fō bun dile dimirnēdin. ⁶ Anī ere, idi Pol Sailas ado to fotou difeid fen, Jeson momoiya tamo tunī geid didū difeid, taun nē uyu iroudiya gedin dirouleid fen, diweig diron, “Tamo eneidi teneub ganan bun morō difenēdin anī gama yeir disin. ⁷ Age dife di, Jeson idi aan fiyeīd fen, yogon fō aaben gurif iroulen. Idi ganan Sisa nē lo difodul ken, king taka yana Jesus dedig ibodok, age de wogō dedig.” ⁸ Tamo kayau ado, taun nē uyu iroudiya geid, od enei karī de fen, ninibur den. ⁹ Age dife fen, taun nē uyu iroudiya, Jeson ado tamo tunī geid kot na dalouf nigin dirokenēdi di, na dalen, age difele di, ditornēdi di, dilen.

Oun Berea Taun

¹⁰ Bo kele di, kaisā bagai momoiya tamo kayau, Pol Sailas ado Berea taun sur difedin. Idi an wō de fen, Juda neid uub fō bun dilen. ¹¹ An Berea tamo kayau idi, Tesalonika tamo kayau gen sā, idi wedereid dino fen, od karī dedig. Idi waud adod fen, od karī den, age de fen, idi Pol wogō yen anī, momoi be dilouf nigin, naa ganan Negur nē Itotoya felei difedig. ¹² Juda tamo kayau musei momoi den, age fiya bagai, Grik kayau yeneid adodo musei ado Grik tamo museig momoi den.

¹³ Tesalonika taun an Juda tamo idi, Pol Negur nē od oun Berea tauneg irok ya karī de fen, idig an dile, tamo kayau nameid dalese di, seye den. ¹⁴ Age dife di, momoiya tamo kayau, kaisā bagai Pol maaī ubun sur difiyen, anī ere, Sailas Timoti ado idi an Berea taun dibodon. ¹⁵ Tamo tunī Pol dinenekel fen, weim Atens taun dilen, Pol ĩ, Sailas Timoti ado kaisā bagai ĩ gein disiyof nigin, irokenēdi di, idi keku de dilen.

Oun Atens Taun

¹⁶ Pol, oun Atens Sailas Timoti ado tari fedin, agef fen, ĩ idegēya waitou taun anī bun isokosen anī ile fen, wau fatuk moron. ¹⁷ Anī nigin, Pol ĩ, Juda tamo kayau ado, Grik tamo kayau Negur nigin anini dedig geid, Juda neid uub fō bun wageid yalouf nigin od solo difedin, ĩ naa ganan maket modoū bun, tamo kayau idi dilef disif

difedig geideg, wageid yalouf nigin od solo difedin. ¹⁸ Epikurian ifelnēdiya tamo* tunī ado, Stoik ifelnēdiya tamo† tunīg, Pol geid fefe den. Idi tunī to difen, “Golē tamal enei, ere od wogō you fenē?” Tunī diron, “Ī yaū waitou nigin wogō yef be.” Idi age de diron, ere nigin, Pol ĩ Jesus nigin ado, laa bun tamal mata kel fāya nigin, biya od wogō yen. ¹⁹ Age fe di, idi Pol dale, taun uyu irouya neid guru fiya, yana Areopagus dedig, an dirou dile fen, diron, “Keleī mata enei urokanamak anī, amā tau keleī youf? ²⁰ Ō keleī mata bagai wederaman urou usif, ereb gariya nigin irok anī, amā keleī you fenē.” ²¹ (Atens tamo kayau ganan ado yaū tamo kayau an difaredig idi, sain ganan kisi mata mata nigin karī yei dedig, wogoī dedig, idi kabī taka to daledig.)

²² Age de di, Pol Areopagus guru fiya atun ifar fen, iron, “Atens tamo, ereb ereb ganan bun, ā waitou karī fiyēya nigin kisi fatuk unogedig anī ailef. ²³ Ere nigin, aya ayo ken, ereb ereb yana walesegedig fele afedin, aya alta takag itotoya enei ado ailen: WAITOU, ADA KELEĪ SĀ ANĪ BUN. Ā keleī sā anī yana walesegedig nigin, aya yaor afe arokeneik.

²⁴ “Negur ĩ, teneub ado ereb ereb ganan anī namen difaref inodin, ĩ anī, saa ado teneub nē Odug nigin, ĩ tamo imedin tempel dinodin anī bun to ibodōdig. ²⁵ Ī ereb taka to lau fedig, anī nigin, tamo imam ereb taka ifenēya kisi feleya sā, ere nigin, ĩ yogo tamo ganan mata, si neseya ado, ereb ereb ganan ifenēdidig. ²⁶ Tamo tekelei bunem, ĩ tamo kayau fire fire ganan inodin, idi teneub adok ino yalouf nigin age fen. Ī dogo neid sain ifeneīd fen, idi ibodōya nē modoū daū fire fire ifenēdin. ²⁷ Tamo ĩ dimirnēf nigin, imeid ra de dimirek dile, fotou difiyēf nigin be, ĩ age fen. Anī ere, ĩ ada mugu mugu bun gerō to ibodok. ²⁸ ‘Ī bun ada mata tabod ken, telef tasif tafef, tabodok.’ Āgenei itotoya tamo tunīg eig de diron, ‘Ada yogon gere tar.’

²⁹ “Age fiya bagai, ada Negur nē gere tar, anī nigin, ada kisi to eig tauf, waitou ĩ, gol nem, silwa nem, meein nem be, tamo nē kisi ado imam malakanon inodig age fiya, to tauf. ³⁰ Tamo kayau Negur nigin to kelein sain, idi to kelei ken, age difedig anī, Negur to eweid yon, anī ere, gama ĩ, tamo kayau adok teneub ganan bun waud falei youf nigin irokenēdif. ³¹ Ī naa inon anī bun, ĩ tamo igrinen ĩ bunem, teneub ganan madur fiya bun es foug. Negur ĩ laa bun tamal mata kel turī fe di, fā yen anī bunem, enei agef wō youf anī tamo ganan ifelnēdin.”

³² Laa bun tamal mata kel fāya nigin, Pol wogō yen anī karī de fen, tunī Pol kasā difiyen, anī ere, tunī diron, “Amā enei nigin baban karī mayō fenē.” ³³ Age de di, Pol guru fiya anī itor ilen. ³⁴ Tamo tunī Pol dō dife fen, momoi den. Idi atun, Dionisius, guru fiya yana Areopagus neid taka, kayau taka yana Damaris ado, tunī geid, dibodon.

18

Oun Korin Taun

¹ Enei bure fel fen, Pol Athens taun itor ken, Korin taun ilen. ² Pol ĩ, an Juda tamo taka yana Akwila, Pontus provins tamal, fotou fiyen, Akwila ĩ aiwa Prisila ado Italim disi dibod dirubkelen, ere nigin, Sisa Klodius, Juda tamo kayau ganan Rom taun ditorōf nigin total od irokenēdin. Pol idi ilediyof nigin ilen. ³ Agef fen, Pol ĩ an idi geid dibod ken, weim kabī dalen, ere nigin, ĩg idi gen salafat inoya tamo. ⁴ Sabat naa ganan, Pol Juda neid uub fō bun, Juda tamo kayau ado Grik tamo kayau geid, od kuruwa difedig, are idi kisi falei de momoi douf nigin age fedig.

⁵ Sailas Timoti ado Masedoniam disi di, Pol ĩ Juda tamo kayau bun, Jesus ĩ anī Kristus fiyeīd fen, wogō ye kurō fesin, ĩ yogon sain adok kabī anī bun inon. ⁶ Anī ere, Juda idi Pol kiwai difen ken, kono difiyē di, ĩ so fiyeīd fen, yogon kolos tu fel fen, irokenēdin, “Ā naudeī aug mudureī bun ibodōf! Aya to kababal fiyauf. Gama

* **17:18:** Epikurian tamo idi bouwa buru nē oroya nigin al difedig. † **17:18:** Stoik tamo idi bouwa buru nē oroya lai fiya nigin al difedig.

sain enei bunem ilef, aya haiden gedin alauf.”

⁷ Pol age ye fen, Juda neid uub fō itor ken, Negur yana yalesedig tamo Titius Justus nē fō bun ilen, fō are Juda neid uub fō anī non. ⁸ Krispus, Juda neid uub fō nē mudur, ī yogon ibor ganan geid, Odug nigin momoi den. Korin tamo kayau museig biya od karī de fen, momoi den. Age dife di, naan dalen.

⁹ Bō taka bun, Pol mala seleulā kurāf fen, Odug ī wogō fiyē mog, karī yen, “To kumī wo, ō od wogōya tobol wof ulauf, ait to ufokalauf, ¹⁰ ere nigin, aya ō ado. Taka nem to ironokon, tadū yōf, ere nigin, taun enei bun, neu tamo kayau musei dibodok.” ¹¹ Anī nigin, Pol ī yar tekelei ado ogō sigis an ibod ken, tamo kayau Negur nē od ifelnēdin.

¹² Galio ī Akaia provins nē gawaman mudur ibod mog, Juda tamo kayau idi weim kori de, Pol kiwai difen ken, ī kot bun diroulen. ¹³ Idi diron, “Tamo enei neda lo wal fe fen, tamo kayau waud yale di, Negur yana, tobonunā fire bun dalesauf nigin age fef.”

¹⁴ Pol od wogō you fenē mog, Galio ī Juda tamo kayau irokenēdin, “Juda tamo kayau ā, mosor be, tobonunā sane nigin urokanagauf are, aya ā karī yeīya nigin kisi feleya. ¹⁵ Anī ere, morō enei, od nigin, yeneid nigin ado, āgenei lo nigin ouf are, ā aug madur gouf. Aya age fediya to es afouf.” ¹⁶ Age ye fen, ī idi kot bun irudidin. ¹⁷ Age fe di, idi Juda neid uub fō mudur Sostenes dale fen, kot fofomala bun dun. Anī ere, Galio to eweid yon.

Prisila, Akwila, Apolos Anidim

¹⁸ Pol ī oun Korin taun naa musei ibodon. Agef fen, ī momoiya tamo kayau itorneid fen, Prisila Akwila ado weim waag dale, Siria distrik dilen. Ī fau waag sōya sā mog, Senkria taun an yogon fatiya gudū difelen, ere nigin, ī Negur mala bun wau kuturol fen, iron, age afouf yen. ¹⁹ Idi Efesus taun wowā den, an Pol, Prisila Akwila ado itornēdin. Pol ī yogo Juda neid uub fō bun ile fen, Juda tamo kayau geid od kuruwa difen. ²⁰ Ī idi geid sain naal meluk dibodōf nigin dirokenē di, itoron.

²¹ Anī ere, ī ilau fenē mā, idi irokenēdin, “Negur orouf are, aya kelauf.” Age ye fen, ī waag bun Efesus taun itor ilen. ²² Pol ī Sisaria taun kutū yeis fen, Jerusalem isel, sios aan fiyēdin. Agef fen, ī Antiok taun isilen.

²³ Pol sain naal an Antiok taun ibodkele fen, anenem fā ye, Galesia provins ado Frigia distrik ganan bun iyo ken, dō fiya tamo kayau ganan megeir fiyēdin.

²⁴ Sain anī bun, Juda tamo taka yana Apolos, Aleksandria fō morou, Efesus isin. Ī keleī biya ado tamo, Negur nē Itotoya bun ibodok anī nigin keleī biya bagai ado.

²⁵ Ī Odug nē naab anī difelnen, age dife di, ī total ado wogō ye fen, Jesus nigin tutuk bagai ifelnēdidig, anī ere, ī Jon nē naan igūya anī dogol kelein. ²⁶ Ī Juda neid uub fō bun, kumī sā od wogō yen. Prisila Akwila ado, ī wogō yen anī karī de fen, idi ī dogo neid fō bun dale diroule, Negur nē naab tutuk faded difiyen.

²⁷ Age difel fen, Apolos Akaia provins bun ilauf nigin age fe di, momoiya tamo kayau idi ī wau dales fen, Akaia teneub an dō fiya tamo kayau ī aan difiyēf nigin, pas ditotkenēdin. Apolos an wō ye fen, Negur nē wau ifenēya bunem momoi den idi, fatuk bagai isennēdin. ²⁸ Ere nigin, ī Juda tamo kayau geid mal atun fefe de fen, od megeir ado nem lai feid fen, Negur nē Itotoya bun Jesus ī anī Kristus ya anī, agef ifelnēdin.

19

Pol Ī Oun Efesus Taun

¹ Apolos ī fau Korin taun ibod mog, Pol ī teneub atu iyok ile, Efesus taun wō yen. An ī, dō fiya tamo kayau tunī fotou fiyeid fen, ² to fiyēdin, “Ā momoi ge fen, Awa Uur Fateul walegen de?”

Idi ī dirokenen, “Sā, amā Awa Uur Fateul ibodok ya anīg to karī maun.”

³ Age de di, Pol idi to fedin, “Age fiyauf are, ere naan anī ā walegen?”

Idi ī dirokenen, “Jon nē naan igūya anī.”

⁴ Pol iron, “Jon nē naan igūya are wau faleiya nē naan igūya. Jon ī yogo, dumen tamo taka isif ī nigin momoi douf nigin, tamo kayau irokenēdin, tamo are Jesus.”

⁵ Idi od enei karī de fen, Odug Jesus yana bunem naan dalen. ⁶ Pol ima tetedin ino di, Awa Uur Fateul idi bun isin. Age fe di, idi od fire fire nem wogō de fen, profet odeg wogō den. ⁷ Idi ganan tamo tuwelf age fiya.

⁸ Pol Juda neid uub fō bun ile fen, an ogō towo bun, kumī sã od wogō yen, ī tamo kayau geid od kuruwa de, idi waud falei ye, Negur nē tano nigin momoi douf nigin age fen. ⁹ Anī ere, idi tunī waud total le fen, to momoi den. Age dife fen, idi mal atun Odug nē naab nigin od sesen diron. Anī nigin, Pol idi itorneīd fen, dō fiya tamo kayau geif fen, naa ganan Tiranus nē ifelnēya fō bun od katō difen. ¹⁰ Enei age fen are yar uru ilelen, anī bunem, Juda tamo kayau ado, Grik tamo kayau ganan Asia provins an dibodon idi, Odug nē od karī den.

¹¹ Negur ī Pol bunem memelik fire bagai age fedin, ¹² are hankisip ado gabar masakeg, Pol bouwa kobū dife fen, dagi tamo bun diroule dinodi di, dagi el feledin, are kaa sesen idi ditornēdin.

¹³ Juda tamo tunī, kaa sesen dirudiyouf nigin diyōdig, idi kaa sesenem dirounēdin anidi bun Odug Jesus yana dale fen, idi eig de dirōdig, “Jesus ī nigin Pol wogō yedig, ī yana bunem, aya ō ulō wesiyouf nigin arokonok.” ¹⁴ Juda neid pris odug taka, Skeba nē gere tar sewen idig age difedig. ¹⁵ Naa taka bun, kaa sanem idi irokenēdin, “Aya Jesus keleī, aya Pol nigin keleī, anī ere, ā aiyaim?” ¹⁶ Age ye fen, tamo kaa sane ado tetedin gurusã ye, ganan lalai feid fen, fatuk bagai idenēdin. Age fe di, idi fō anī bun tamal, gemū naud adodo diyalelen.

¹⁷ Juda tamo kayau ado Grik tamo kayau Efesus taun dibodon idi, enei karī de fen, idi ganan fatuk bagai kumī de, Odug Jesus yana ilun bagai dalesen. ¹⁸ Tamo kayau momoi den musei disi, sane age difedig anī, mal atun yaor dife, kurō difesin. ¹⁹ Idi idegēya bunem kosē dedig musei, dogo neid buk kori fiya guri de dirousi, kuru de, mal atun yã diraran. Idi buk kori fiya anī nē mala diwesen, are fifti tausen silwa

moni* wō yen. ²⁰ Anī bunem, Odug nē od bilalaū fe fen, megeiref ilen.

²¹ Enei ganan agef wō yele di, Pol Masedonia ado Akaia provins atu iyok ile anenem, Jerusalem ilauf nigin kisi yalen. Ī iron, “Aya an wō au fen, aya Romeg ki afouf.” ²² Age ye fen, ī yogon isennēya tamo uru, Timoti Erastus ado Masedonia provins bun sur feid fen, ī Efesus an Asia provins bun sain naal ibodon.

Efesus Taun Oun Kiwai Kuru Dalesen

²³ Sain anī bun, Odug nē Naab nigin, kiwai ado monēya odug wō yen. ²⁴ Silwa nem ereb ereb inoya tamo, yana Demetrius, ī silwa nem kayau waitou yana Artemis dedig anī nē tempel malakanon inodig, anī bunem yogon kabī tamo moni musei daledig. ²⁵ Demetrius ī, yogon kabī tamo tar ado, yogon kabī gen age fiya tutur iweig laisi fen, irokenēdin, “Tamo ā, ā keleī, ada kabī enei bun moni biya taledig. ²⁶ Anī ā gama uleg fen, karī gef, tamo Pol enei, ein Efesus ado mogo Asia provins ganan melsã bagai bun, tamo kayau musei waud yale fen, eig ye irok, tamo ima nem waitou inodif are anī waitou sã, yef. ²⁷ Are karīya sane yenek, ada neda moni kabī yana sane yalouf, takag, karīya sane yenek are, kayau waitou odug Artemis nē tempel are ege bagai kaū sãf. Age fe di, kayau waitou, Asia provins ganan bun ado teneub adok ganan bun, yana dalesedig, ī yana odug iseledig are lai difesilauf.”

²⁸ Idi od enei karī de fen, fatuk bagai seye ise di, kakaī de diweig diron, “Efesus neid Artemis ī odug bagai!” ²⁹ Age de di, taun anī bun ganan kuru dalesen. Tamo kayau idi, Gaius Aristakus ado, are idi Masedonia temeleid Pol geid diyōdig anidi, kaka difeid, guru fiya nē fō odug namen, tamo tekeleim gudu ref ileyã gen gududu den. ³⁰ Pol ī guru fiya atun ilauf nigin age fen, anī ere, dō fiya tamo kayau Pol katū difiyen. ³¹ Asia gawaman nē uyu irouya tunī, are Pol nē mou tar idig, Pol guru fiya nē fō anī bun to ilauf nigin digone ken, od sur difenen.

* **19:19:** Silwa moni tekelei are, naa tekelei bun kabī tamo nē mala.

³² Guru fiya anī bun nene delen. Tunī od taka diweig dirō di, tunī od fire taka diweig diron. Musei ganan ereb nigin an guru difen anī, idi kelei san. ³³ Juda tamo kayau, Aleksanda, tamo kayau wagedin mal atun sur dife, isel ifare di, tamo kayau tunī ĩ dile fen, Aleksanda ĩ anī morō gariya den. Age dife di, Aleksanda ĩ tamo kayau meleid bun yogo bouwa isennēf nigin, ĩ foro dalauf nigin imam dogol fiyēdin. ³⁴ Anī ere, idi ĩ Juda tamo ya kelei ken, idi ganan aiteid tekelei dino fen, aua uru age fiya eig de diweig diron, “Efesus neid Atemis ĩ odug bagai!”

³⁵ Age de di, taun uyu irouya nē kabī tamo ĩ, tamo kayau foro weleg fiyēdi di, foro delen, age dife di, iron, “Efesus tamo ā, teneub ganan bun tamo kayau ganan, Efesus taun anī, Atemis odug nē tempel ado yogon malakanon saa ilunem isin anī nē kulatun fiya taun anī, idi to kelei de? ³⁶ Taka nem enei wa fiya kisi feleya sã, anī nigin, ā foro weleg fen, age fiya nigin to buroro gei. ³⁷ Tamo eneidi ereb taka tempel buneg to bē dalen, idi neda kayau waitoug to kono difiyen, anī ere, ā idi ein guri wedig urousigel. ³⁸ Age fiyauf are, Demetrius yogon kabī tura tar geid, tamo taka nigin nauseirya adouf are, kot ibodok, gawaman nē mudur adodo difaref. Idi an nauseirya anī diroulauf. ³⁹ Ā nauseir anī teten ereb taka manouf gouf are, tamo kayau neid kot guru fiya bun madur gouf. ⁴⁰ Gama wō yel enei nigin, karīya sane yenek, kuru talesel enei nigin are ada kot bun dinenadauf. Age difouf are, ada guru fiya sane enei nigin faded fiya kisi feleya sã, ere nigin, are gariya sã.” ⁴¹ Agef irokel fen, ĩ guru fiya anī irudin.

20

Pol Masedonia Ado Grik Teneub Atu Ilen

¹ Kuru anī bure fele di, Pol ĩ od ino di, dō fiya tamo kayau disin, age dife di, idi waud yales le fen, dabuo fiyeid lel, Masedonia provins ilen. ² Pol ĩ Masedonia provins atu iyok ile, wau yaleseya od musei tamo kayau irokenēdif ile, Grik kantri bun ulō yeis fen, ³ ĩ an ogō towo

ibodon. ĩ waag bun Siria distrik bun ilauf nigin agef mog, Juda tamo idi, ĩ dukesiyouf nigin lalī difiyek anī karī yen. Anī nigin, ĩ Masedonia provins atu kel ilauf nigin kisi yalen. ⁴ Pirus naal Sopata Berea taun tamal, Aristakus, Sekundus Tesalonika taun tamal, Gaius Derbe taun tamal, Timoti, Tikikus Trofimus ado Asia provins temeleid anidim, Pol geid diyon. ⁵ Tamo eneidi idi ket Troas taun dile, an tari difaman. ⁶ Anī ere, Bret Yis Sã nē Sifa bure fele di, amã waag male, Filipai taun mator ken, naa faif ilele di, Troas taun wō mau fen, fata mafiyēdin, an naa sewen mabodon.

Troas Taun Oun Yutikus Laa Bun Tamal Kel Turī Fiyen

⁷ Uub nē naa matu bun, amã weim bret mumã mafouf nigin guru mafalaisin. Pol tamo kayau od wogō fiyēdif ile bō atunen, ere nigin, ĩ, we fele di, itornēdiyof nigin kisi fen. ⁸ Guru mafen nē aab ilun an, lam musei futu redin. ⁹ Tamo gaū yana Yutikus, yau yaleya bobog ilun sō yesel ibod ken, mulã kusu yalen. Pol od wogō yef ile mog, ĩ mulã kusu yalef ile yen kele fen, fō ilunenem tenebur kubū ye isilen. Age fe di, idi ĩ laa dalesnen. ¹⁰ Anī ere, Pol isil, tamo anī teten kubū ye, kakarai fiye ken, iron, “To terēg, ĩ mata!” ¹¹ Age ye fen, ĩ baban fō ilun isel, bret mumãf fen, yon. ĩ wogō yef ile we fele di, ĩ itorneid ilen. ¹² Tamo kayau, tamo gaū anī mata dale dirou, fō bun dile fen, waud el bagai fen.

Pol Efesus Sios Neid Uyu Irouya Dabuo Fiyēdin

¹³ Amã ket waag bun mele, sō mau fen, Asos taun melen, an Pol waag bun malouf nigin kisi mafen. Pol ĩ, amã age mafouf nigin tetun irokanaman, ere nigin, ĩ ye naab iyok ile, an ilauf yen. ¹⁴ ĩ oun Asos fotou famã di, amã ĩ waag bun male fen, Mitilin taun melen. ¹⁵ Anenem waag bun mele, we fele di, Kios nuyo non wō maun. Naa anī ile di, Samos taun mele wō maun, naa anī ile di, Miletus taun mele wō maun. ¹⁶ Pol ĩ, Asia provins bun an sain taka to ilalauf nigin, waag bun Efesus wal fouf nigin kisi yalen, ere nigin, kisi falauf are, ĩ

Jerusalem Pentikos naa bun wō youf nigin sibu yen.

¹⁷ Miletus taun an, Pol ī Efesus sios neid uyu irouya fata difiyēf nigin od sur fen. ¹⁸ Idi disi wō de di, ī irokenēdin, “Aya Asia provins bun, uruwa bagai asi wō au fen, aya ā geid tabod ken, sain ganan naig be afe abodon are ā keleī. ¹⁹ Juda tamo idi aya kiwai difana fen, kisi sane dinon anim fatuk bagai kisi fiyan, anī ere, aya wau aukesil, maru ado fen, Odug aruna alen. ²⁰ Ā keleī, aya ā isenneīf nigin ereb taka wogōya bun to afon, are aya mal atun ado fō fō bun afelnein. ²¹ Aya Juda tamo kayau ado Grik tamo kayau idi waud falei ye, Negur bun dino fen, neda Odug Jesus nigin momoi douf nigin totol bagai arokenēdin.

²² “Gama aya Awa Uurem toli fiyaf anī bunem, Jerusalem elef, an aya bun ereb wō youf are aya keleī sā. ²³ Taun ganan bun Awa Uur Fateul, kalabus ado morō tari difiyaf anī nigin wederou irouf, anī dogol aya keleī. ²⁴ Anī ere, aya neu naab adikalauf nigin ado, kabī Odug Jesus ifanan, are Negur nē wau ifenēya nē biya od wogōya kabī anī bure afalauf nigin dogol, kisi afef. Anī kisi afalauf are, aya neu mata are ege au fen, neu mata nigin to kisi afef.

²⁵ “Aya ā atun ayo ken, Negur nē tano nigin wogō ayein, are gama aya keleī, ā atun takam baban to ileyau. ²⁶ Anī nigin, naa enei bun, aya tutuk bagai yaor afe arokeneik, tamo ganan neid naudeid nigin, aya neu mosor sā. ²⁷ Ere nigin, aya Negur nē oroya ganan yaor afe arokeneīf nigin, taka to afokelen. ²⁸ Ā aug nigin ado, sipsip ganan Awa Uur Fateulem lo wedigouf nigin imeī bun inon anī nigin, meleī adouf. Negur nē sios, ī yogon naud bunem na yalen anī nē sipsip lo fiya tamo ubodōgouf. ²⁹ Aya keleī, aya atorņeī mog, gaū kuī sane ā atun disi, sipsip daū difeidlauf. ³⁰ Ā tutur buneg tamo tunī fā de, dō fiya tamo tunī momoi bun tamal didegneīd fen, idi dō difediyouf nigin weleid dino diroulauf. ³¹ Anī nigin, ā lo welegei! Yar towo bun, bō ado gaa ado, maru ado ā mugu mugu ganan wedereī aroun anī karī walagouf.

³² “Gama aya ā, Negur ado yogon wau ifenēya nē od bun, aneneik, od anim ā totolouf nigin megeir ifenei ken, yogon momoiya tamo tar ganan atun, in akor mata ibodkeleya anī ifeneīf. ³³ Aya takan nē silwa be, gol be, kolos yaleya nigin to wau yenen. ³⁴ Ā aug keleī, aya imau eneim kabī ale di, aya neu kabī turau tar geid, ereb lau mafen anī ifanaman. ³⁵ Ereb ereb ganan aya age afen anī bunem, aya ā afelnein, are ada kabī totol age taf tale fen, anī bun tamalem maleg tasennēdiyof. Odug Jesus yogo eig ye iron anī karī taulauf, ‘Ifenēya are el fiya barikā, yaleya nē wal fiya.’”

³⁶ Pol ī od enei wogō yel fen, ī ibor bobou fe, idi ganan geid kosē den. ³⁷ Idi ī kakarai difiyē, umā difiye ken, ganan inā dalen. ³⁸ Idi ī nawa baban to dilouf fiyēdin od anim waud gudū fen. Age dife fen, idi weim waag bun dinenen.

21

Pol Jerusalem Ilen

¹ Amā dabuo mafiyeīd matorneīd fen, waag sō mau, Kos nuyo tokō mafelen. Naa anī ile di, amā Rodes nuyo mele fen, anenem Patara taun melen. ² Amā waag taka Fonisia distrik bun ile mog, fotou mafe fen, waag anī sō mau melen. ³ Amā Saipras nuyo mail fen, wal mafe, anī ki melem Siria provins melen. Amā Taia taun kututū maun, ere nigin, an waag udū gei falaisiyouf nigin age fen. ⁴ Amā an dō fiya tamo kayau fotou mafeid fen, weim naa sewen mabodon. Idi Awa Uurem Pol Jerusalem to ilauf nigin totol bagai diroke-nen. ⁵ Anī ere, nemā sain bure fele di, amā matorneīd fen, delē mayon. Dō fiya tamo ganan dogo neid kayau kesu tar geid, taun tamal dinenamā, mele, maaī ubun ulō maus fen, an amā iboramā bobou mafe fen, kosē maun. ⁶ Amā abob dabuo mafiye ken, amā waag sō mau di, idi fonō keku de dilen.

⁷ Amā Taia taun anenem tokō mafel, Ptolemais taun kututū maun, an amā momoiya tamo kayau aan mafiyeīd fen, idi geid naa tekelei mabodon. ⁸ Naa anī ile di, amā matorneīd mele, Sisaria taun wō mau

fen, an biya od wogōya tamo Filip nē fō bun mabodon, ī kulu oun Jerusalem momoia tamo sewen digirnēdin anidi taka. ⁹ Filip ī, ne barai tar aiwa adodo tamo sāsā, idi profet od wogō dedig.

¹⁰ An naa tunī mabodon, age mā mog, profet taka yana Agabus Judia distrik bun tamal isin. ¹¹ Ī amā garan isi, Pol nē lū yale fen, yogo ye ima ado ifofa ken, iron, “Awa Uur Fateul eig ye irok, ‘Jerusalem oun Juda tamo idi lū enei nē marau eig de difo ken, haiden imeid bun dinenēf.’ ”

¹² Amā od enei karī mau fen, amā an tamo kayau geid Pol Jerusalem to ilauf nigin magonen. ¹³ Age mafe di, Pol iron, “Ā ere nigin inā walege di, aya wau gudū fef? Aya Odug Jesus yana nigin, Jerusalem oun difōyauf nigin ado laa fiyauf nigineg, dodok afel.” ¹⁴ Amā ī wala inoya kisi feleya sa ken, folō mafiye kele fen, moron, “Odug nē oroya anī kisi falauf.”

¹⁵ Age mafel fen, amā dodok mafel, Jerusalem meselen. ¹⁶ Dō fiya tamo tunī Sisaria taun temeleid dinenama ken, Nason nē fō bun mabodōf nē an dirouleman. Nason ī, dō fiya tamo uruwa bun temeleid anidi taka, Saipras nuyo tamal.

Pol Jerusalem Wō Yen

¹⁷ Amā Jerusalem wō mau di, momoia tamo idi waud sere fiya ado aan difaman. ¹⁸ Naa anī ile di, amā Pol geid Jems mailauf nigin melen, sios uyu irouya ganan an difaren. ¹⁹ Pol idi aan fiyeid fen, yogon kabī bunem Negur haiden atun ereb age fen anī, teke tekelei dir fenēdin.

²⁰ Idi od enei karī de fen, Negur yana dalesen. Age dife fen, idi Pol dirokenen, “Turamā, ō ulef, ganī tausen Juda idi momoi den, anī ere, idi ganan Moses nē Lo dō fiya nigin waud totol bagai yenek. ²¹ Ō, Juda idi haiden neid teneub bun difaref ganan, Moses nē Lo ditor ken, dogo neid kesu tar mulū bun to dinenēdiyof, dogo neid tobonunā to dō difouf nigin ufelnēdin ya anī, idi mogo karī den. ²² Idi ō usil ya anī fau karī douf. Age difouf are, ada ere naig tafouf? ²³ Anī nigin, amā marokonok anī, ago dō wo. Tamo aiwa adodo Negur mala bun age mafouf bagai den, idi yeir amā geid. ²⁴ Tamo

eneidi geid uleg fen, nonorou lilik fiya nē tobonunā bun ulagauf. Agog fen, na walekenēdiyof, ago di, idi fatiyeid korere difalauf. Ago ge di, ō nigin od enei are momoi sā, ō ogo Moses nē Lo dō wedig anī, tamo kayau ganan keleī youf. ²⁵ Haiden tamo kayau idi momoi den anidi bun, amā kisi mafon anī matotkenēdin, are idi saaf idegēya waitou bun sesewi difen anī to dāf, yaro naud adodo to dāf, yaro uleid kakā difeid fen, didenkesif anī to dāf ado, noli tobonunā bun to dilauf.”

²⁶ Naa anī ile di, Pol tamo anidi geif fen, ī yogo weim nonorou lilik difen. Age difel fen, ī tempel bun ile, ere sain nonorou lilik fiya naa bure fele di, idi mugu mugu sesewi difouf anī, pris keleī youf nigin irokenēdin.

Rom Kusī Tamo Pol Dalen

²⁷ Naa sewen anī bure falau fenē mog, Juda tamo tunī Asia provins temeleid idi, tempel bun Pol dilen. Idi tamo ganan waud dalese di, seye de fen, Pol dale, ²⁸ diweig diron, “Israel tamo, usen-namāg! Tamo enei anī, neda tamo kayau, neda lo ado, modoū enei nigin, od sane teneub ganan bun, tamo ganan ifelnēdidig. Takag, ī Grik tamo tempel modoū bun gurif isi di, fateul modoū enei amuyē ifenen.” ²⁹ (Idi uruwa bun, Trofimus Efesus taun tamal, Pol ado an taun diledin, anī nigin, idi kisi difen, Trofimus Pol im tempel modoū namen iroulen den.)

³⁰ Taun tamo kayau ganan fafā de fen, naab uyu fire fire bunem gududu de disin. Idi Pol dale, tempel bun tamal dī de diror diroule di, kaisā bagai sukar kotū difeledin. ³¹ Idi Pol dukesiyou fenē age de mog, od isel, Rom kusī tamo neid odug, Jerusalem taun tamo kayau ganan kuru dalesef ya anī karī yen. ³² Kaisā bagai, kusī tamo neid odug ī, kusī tamo neid orowa tunī ado kusī tamo geif fen, tamo kayau musei gedin gududu de disilen. Tamo kusī dalesen idi, kusī tamo neid odug ado yogon kusī tamo geid dileid fen, Pol dun anī folō difelen.

³³ Kusī tamo neid odug isi, Pol dale, sen uru nem difōf nigin iron. Age ye fen, Pol ī ai anī, ereb ī age fen anī ado nigineg,

Juda tamo to fiyēdin. ³⁴ Tamo kayau musei atun, tunī od gariya fire diweig diron, tunim od gariya fire taka diweig diron. Kusī tamo neid odug ī, idi kuru dalesen nigin momoi od yaleya kisi feleya san anī nigin, ī Pol kusī tamo neid fō bun dirou dilauf nigin irokenēdin. ³⁵ Pol lata garan wō ye mog, tamo musei idi didid aus fele di, kusī tamom Pol faali difiyen. ³⁶ Tamo musei idi dō difeid fen, diweig diron, “Ukesig!”

Pol Tamo Kayau Musei Wogō Fiyēdin

³⁷ Kusī tamo idi, Pol kusī tamo neid fō aaben diroulau fenē mog, ī kusī tamo neid odug to fiyen, “Aya od taka tau arokonōf?”

Ī aba solof iron, “Ō Grik od wogō wodig de? ³⁸ Ō Isip tamal sā de? Kulu gawaman kiwai wene ken, gerere tuan fo tausen kiwai tamo uyu urou ulen anī.”

³⁹ Pol iron, “Aya Juda tamo, Silisia provins oun Tasmus taun tamal, taun yana ado nē fō morou. Utorna len, tamo kayau od arokenēdiyof.”

⁴⁰ Kusī tamo neid odug yo fiyē di, Pol lata bun ifar fen, tamo kayau imam fiyēdin. Idi ganan foro dele di, Pol Hibru od nem irokenēdin,

22

¹ “Turau tar ado dei geg, gama aya yug nigin isennēya od enei karī wog.” ² Pol Hibru od nem irokenēdi di, karī de fen, idi fatuk foro delen.

Age dife di, Pol iron, ³ “Aya Juda tamo, Silisia provins oun Tasmus taun an wō au fen, taun enei bun biyaun. Aya Gamaliel bun tubuda tar neid lo nigin tai fiya fatuk alen. Age afe fen, ā ganan gama ago gef gen, ayag Negur nigin kisi total alen.

⁴ Aya Naab enei dō difedig tamo kayau, darau afeneīd fen, adenkesin, tamo ado kayau gei afeid fen, kalabus araran. ⁵ Pris neid mudur ado, kaunsel neid uyu irouya ganan geideg, aya age afen anī nigin wogō douf. Aya tureid tar Juda idi oun Damaskus taun difaref anidi bun paseg idi bun ale fen, tamo kayau eneidi darau difenēdiyof nigin afofa ken, Jerusalem guri afeid alauf nigin an elen.

⁶ “Gaa atun age fiya, aya ele, Damaskus wō au fenē mog, kaisā bagai, lalan fula

fiya taka saa ilun tamal aya bun fula felen. ⁷ Aya tenebur kubū au asil fen, ait taka wogō fiya mog, karī aun, ‘Sol, Sol, ere nigin ō aya daig wiyaf?’

⁸ “Aya to afen, ‘Odug, ō aim?’

“Ī solof irokanan, ‘Aya Jesus Nasaret tamal, ō daig wiyaf anim.’ ⁹ Neu kabī turau tar fula fiya anī dilen, anī ere, idi ait wogō fiyan anī to karī den.

¹⁰ “Aya to afen, ‘Ere naig afouf?’

“Odug iron, ‘Fā wale fen, Damaskus taun ule, an ō ereb agouf nigin Negur igirkonon anī ganan irokonōf.’ ¹¹ Neu kabī turau tar, imau gim de, Damaskus dirouleyan, ere nigin, lalan fula fiya anim malau gugum kelen.

¹² “Tamo taka yana Ananias ileyauf nigin isin. Ī lo el fe dō fedig tamo, Juda idi an difaref ganan, ī nigin biya difiyēdig. ¹³ Ī aya sirun ifar fen, iron, ‘Turau, Sol, ō malā kelē yalauf!’ Sain anī bun bagai, aya ī ileya kisi feleyan.

¹⁴ “Age afe di, ī iron, ‘Tubuda tar neid Negur, ō yogon oroya keleī youf nigin, Madur Bagai Tamo anī ulouf nigin ado, ī awa bun od karī wouf nigin igirnon. ¹⁵ Ō ereb ulen ado karī won anī, tamo ganan bun ī nigin wogō wouf. ¹⁶ Anī gama ō ere tari wof? Fā wale, naan wale, ī yana uweigne ken, ogon mosor kulo wol.’

¹⁷ “Aya Jerusalem kelau ele fen, tempel bun kosē au mog, malau seleulā kurāf fen, ¹⁸ Odug wogō ye mog, ailen. Ī aya irokanan, ‘Gama nem, kaisā bagai Jerusalem utou ule, ere nigin, idi aya nigin ogon od to karī douf.’

¹⁹ “Age ye di, aya oron, ‘Odug, idi dogo keleī, are aya Juda neid uub fō fō bun ele fen, ō nigin momoi den anidi kalabus bun aneneīd fen, adenēdidig. ²⁰ Takag, ogon od wogō yedig tamo Stiwen naud fi felen sain bun, ayag an afaren, ī dukesiyof nigin wau iro ken, tamo idi ī dukesin neid kolos tari afen.’

²¹ “Age au di, Odug irokanan, ‘Ule, aya haiden gedin gerō sur ayōf.’”

Pol Ī Rom Tamo Anī Kurō Fesin

²² Tamo kayau musei Pol karī difiyek dile, ī od enei irō di, idi kakaī de fen,

diweig diron, “Ukesig, tenebur tamal urai-leg! Ī mata ibodōya to biya!”

²³ Idi diweig diro ken, dogo neid kolos dinukakā dirara ken, aas ilun diraran. ²⁴ Age dife di, kusī tamo neid odug, Pol kusī tamo neid fō bun dirou dilauf nigin irokenēdin. Tamo idi Pol eig de diweig dirokenen anī nē gariya keleī youf nigin, Pol wagī difiye ken, to difiyēf nigin, ĩ irokenēdin. ²⁵ Idi ĩ wagī difiyēf nigin yaī difiyē mog, Pol kusī tamo neid orowa an ifaren anī irokenen, “Ā, Rom tamo, mosor ado be ya keleī sa ken, wagī fiya are lo dō fiya de?”

²⁶ Kusī tamo neid orowa od enei karī ye fen, ĩ kusī tamo neid odug garan ile fen, ĩ irokenen, “Ō ere naig wou fenē? Tamo enei ĩ Rom tamo.”

²⁷ Kusī tamo neid odug Pol garan ile fen, to fiyen, “Ō urokana, ō Rom tamo de?”

Pol ĩ iron, “Are momoi.”

²⁸ Age ye di, kusī tamo neid odug iron, “Aya Rom tamo wō auf nigin, moni odugem na alen.”

Pol iron, “Anī ere, aya Rom tamo gō difiyan.”

²⁹ Age ye di, tamo Pol to difiyēf nigin age difen idi, kaisā bagai folō difelen. Kusī tamo neid odug ĩg, Pol ĩ Rom tamo, sen nem ifon anī weder fokō yel fen, kumī yen.

Juda Neid Uyu Irouya Guru Fiya Meleid Bun

³⁰ Naa anī ile di, kusī tamo neid odug ĩ, Juda idi Pol bou bun od dun anī nē gariya tutuk bagai keleī youf nigin oron, anī nigin, ĩ Pol yalisne ken, pris odudug ado Juda neid uyu irouya ganan guru difouf nigin irokenēdin. Agef fen, ĩ Pol yale irusi, idi wagedin ifarnen.

23

¹ Pol guru fiya anī lo feid le fen, iron, “Turau tar, aya Negur kabī ifanan anī, wau karētut bagai ado age alef asi, gama naa enei bun.” ² Od enī irō di, pris neid mudur Ananias, tamo Pol non difaren anidi ĩ sigor daū difouf nigin irokenēdin. ³ Age ye di, Pol Ananias irokenen, “Negur ō inō irāf, ō pen lalaum garaī naki fiya!

* 23:5: Eksodas 22:28

Ō lo kilei es wiyauf nigin an ubodok, anī ere, ō lo wal wo fen, aya dinauf nigin urokenēdif!”

⁴ Tamo Pol non difaren anidim ĩ dirokenen, “Ō Negur nē pris neid mudur kumī sā kono wiyek de?”

⁵ Age de di, Pol iron, “Turau tar, ĩ pris neid mudur anī aya to kelein. Are Negur nē Itotoya bun ibodok, ‘Ogon tamo kayau neid uyu irouya nigin od sane to urōf.’* ”

⁶ Age ye fen, Pol idi tunī Sadusia tamo, tunī Farisia tamo anī keleī ken, uyu irouya neid guru fiya mala bun iweig iron, “Turau tar, aya Farisia tamo taka, Farisia tamo naaluid. Aya laa bun tamal mata kel fāya nigin wau iseya ado nigin, kot bun afaref.” ⁷ Pol od enei irō di, Farisia tamo ado Sadusia tamo geid fefe de fen, guru fiya anī faraf uru fen. ⁸ (Sadusia tamo idi dirōdig, laa bun tamal mata kel fāya sā, engel sā, uureg sā, anī ere, Farisia tamo idi dirōdig, anī ganan are dibodok.)

⁹ Aiteid oduduge di, lo ifelnēdiya tamo tunī, idig Farisia bun temeleid fafā de fen, totol bagai fe de diron, “Amā tamo enei bun kū fenēya taka to mailef. ĩ uurem be engel takam be irokenen are, naig fiyauf?”

¹⁰ Fefeya anī ile, sane le di, kusī tamo neid odug Pol fisik difouf ye fen, kumī yen. Anī nigin, ĩ kusī tamo disil, imedin tamal totol ado son difeid, kusī tamo neid fō bun diroulauf nigin, irokenēdin.

¹¹ Bō anī bun, Odug Pol non ifar fen, iron, “Totol uno! Ō Jerusalem ein, aya nigin wogō wol gen, ō Rom ouneg ago wogō wouf.”

Pol Dukesiyouf Nigin Naab Dimiren

¹² Bonimeī di, Juda idi guru de fen, Pol yuke-siya nigin kisi katō difen. Pol yuke-siya sā mog, idi saaf ado naan to dāf nigin waud kuturol fen, od difon. ¹³ Tamo foti wal fiya anidim, enei nigin kisi katō difen.

¹⁴ Idi pris odudug ado uyu iroudiya bun dile fen, diron, “Pol yuke-siya sā mog, amā ereb taka to māf nigin waumā kuturol fen, od mafon. ¹⁵ Anī nigin, gama ā uyu irouya neid guru fiya geid, tamomoi ge fen, Pol nigin tutuk bagai keleī youf ge fen, ĩ ā gein

dirou disiyouf nigin, kusī tamo neid odug urokenēgouf. Amā, ī ein wōya sā mog, ī maukesiyouf nigin dodok mafef.”

¹⁶ Anī ere, Pol main nē naal kisi enei karī ye fen, ī kusī tamo neid fō bun ile fen, Pol irokenen.

¹⁷ Age ye di, Pol kusī tamo neid orowa taka iweignē isi di, iron, “Tamo gaū enei wale, kusī tamo neid odug gein uroule. Ī od taka irokenēf nigin ado.” ¹⁸ Anī nigin, ī kusī tamo neid odug garan yale iroule fen, iron,

“Kalabus tamo Pol iweigna fen, tamo gaū enei ō gein arou asiyouf nigin irokanal, ere nigin, ī od taka irokonōf nigin ado.”

¹⁹ Kusī tamo neid odug, tamo gaū ima yale irou, yerin dile fen, to fiyen, “Aya ere od anī urokanau fenē?”

²⁰ Tamo gaū iron, “Juda idi waud tekeleil, tamomoi de fen, Pol nigin tutuk bagai keleī youf de fen, nil uyu irouya neid guru fiya mala bun, ī diroulauf nigin dirokonōf. ²¹ Are idi to karī wiyēdiyof, ere nigin, tamo foti wal fiya anidim ī nigin dimin ken, tari difef. Pol yukesiya sā mog, idi saaf ado naan to dāf nigin waud kuturol fen, od difon. Idi dodok difel fen, Pol idi garan sur fiya nigin ogon yoya anī tari difef.”

²² Kusī tamo neid odug tamo gaū anī weder irou fen, sur fen, “Ō enei urokanal anī, aib taka to urokenēf.”

Pol Sisaria Taun Diroule Dinene

²³ Age fel fen, ī kusī tamo neid orowa uru iweigneīd, disi di, irokenēdin, “Kusī tamo tu hundred ado, kusī tamo sewenti hos adodo, kusī tamo tu hundred ot adodo anidim, bō nain kilok Sisaria taun ulagauf nigin, dodok gouf. ²⁴ Pol teten ibod ken, Gawaman nē Mudur Feliks bun biya ile wō youf nigin, hos tunī dodok gouf.”

²⁵ Ī pas eig ye itoton:

²⁶ Aya Klodius Lisias,

Odug Gawaman nē Mudur Feliks aan ayok.

²⁷ Tamo enei Juda tamom dale fen, dukesiyou fenē age difen, anī ere, aya neu kusī tamo geid masi masennen, ere nigin, aya ī nigin kelein, ī Rom tamo.

²⁸ Idi ī bun od dun anī, aya gariya keleī youf nigin, ī dogo neid uyu irouya guru fiya bun aroulen. ²⁹ Ī bun od dun are dogo neid lo nigin age difen, anī ere, ī laa fiya nē be, kalabus ilauf nē ererb taka to age fen anī aya kelein. ³⁰ Aya ī dukesiyouf nigin naab dimirek ya anī karī au fen, aya kaisā bagai ī, ō gein sur afiyen. Ī bou bun od dun idig, ō malā bun nedi morō yaor difouf nigin arokenēdin.

³¹ Anī nigin, kusī tamo idi irokenēdin kilei, dō def age difen, idi bō Pol dale dirou, Antipatris taun dilen. ³² We fele di, idi, kusī tamo hos adodo, Pol geid dilauf nigin dirokeneīd fen, idi kusī tamo neid fō bun keku de dilen. ³³ Kusī tamo hos adodo Sisaria taun wō de fen, pas anī gawaman nē mudur difen ken, Pol ī ima bun dinon. ³⁴ Gawaman nē mudur ī pas anī iwes fen, Pol ī teneub nanī bun tamal anī to fiyen. Gawaman nē mudur ī, Pol Silisia provins bun tamal anī keleī ken, ³⁵ ī iron, “Aya ogon od, tamo ō bun od dun anidi ein disiyouf bun, karī auf.” Age ye fen, ī Pol Herod nē fō bun dinene ken, lo difouf nigin irokenēdin.

24

Pol Feliks Mala Bun Kot Fen

¹ Naa faif ilele di, pris neid mudur Ananias, uyu irouya tunī ado, lo keleī tamo yana Tertulus dedig geid, Sisaria taun disilen. Idi Pol bouwa bun od dūf nigin, gawaman nē mudur mala bun wō den. ² Anī Pol diweignē, isi di, Tertulus Feliks mala bun, Pol bun bou yūya od anī gariya ino irokenen, “Amā ō farumen wau inosiya sain meluk mabodok masin. Ogon lo fiya biya bun, neda teneub bun ererb ererb biya musei wowā den. ³ Odug Feliks, modoū ganen ado naab ganen bun, amā enei keleī ken, anī nigin fatuk bagai de mayok. ⁴ Anī ere, aya ogon sain to akasiyouf nigin, ō waū ino ken, sain naal bagai karī wamāf nigin arokonok.

⁵ “Tamo enei morō inoya tamo, teneub ganen bun, Juda tamo atun kuru yalesedig anī amā mailen. Ī Nasaret idegēya mo-moiya mala neid uyu irouya. ⁶ Ī tempeleg

amuyē ifenēf nigin age fen, anī nigin, amā ī malen. ⁸ Ō* ogo tamo enei to wiyēf are, od ī bou bun manof anī ganān momoi bagai ya anī, ō keleī youf.”

⁹ Juda tamo idi, ī bou bun od yūya bun megeir dife fen, are momoi, den.

¹⁰ Gawaman nē mudur, Pol wogō youf nigin mudurem dogol fiyē di, Pol iron, “Aya keleī, yar musei ō teneub enei bun es fiya tamo ubodon, anī nigin, aya wau el fe fen, aya yug nigin megeir afouf. ¹¹ Malai sã, ō yaor bagai keleī youf, are naa tuwelf dogol mogo ilef, aya Negur yana alesauf nigin Jerusalem eselen. ¹² Aya bouwau bun od dun tamo idi keleī, aya aib taka ado tempel bun to fe maun be, Juda neid uub fō bun be taun nameneg, tamo kayau waud to alesen. ¹³ Idi gama aya bouwa bun od duk are momoi yeya anī, ō ifelnōya kisi feleya sã. ¹⁴ Anī ere, aya Naab idi idegēya dedig anī dō afe fen, tubuda tar neid Negur yana alesedig, are momoi auf. Aya Moses nē Lo ado, profet neid buk bun ditoton anī ganān nigin, momoi auf. ¹⁵ Ayag tamo eneidi gen Negur bun wau iseya ado, are madur tamo ado tamo sesen laa bun tamal mata ke de fã douf anī. ¹⁶ Anī nigin, Negur mala bun ado tamo meleid bun, aya wau karētut abodōf nigin sain ganān kabī total aledig.

¹⁷ “Aya yar tunī firen abodkele fen, aya neu tamo kayau maleg nigin safina wau sã ado, Negur bun sesewi fiya nē safina, Jerusalem arou asin. ¹⁸ Aya nonorou lilik afel fen, enei age afe mog, idi aya tempel modoū bun fotou difiyan. Aya an tamo guru fiya mala taka geid san, katã san. ¹⁹ Anī ere, Juda tamo tunī Asia provins temeleid an difaren anidi, dogo bagai ō gein disi fen, bouwau bun od yūya idi adouf are, wogō dem bagai. ²⁰ Sãf are, tamo eneidi, aya uyu irouya neid guru fiya meleid bun afaren sain, idi aya bun ereb mosor fotou difen anī wogō douf. ²¹ Tekelei dogol, aya idi meleid bun afar fen, aweig aron, are eig fiya, ‘Laa bun

tamal mata kel fãya anī nigin, aya gama ã melein kot bun afaref.’ ”

²² Age ye di, Feliks ī yogo, Naab anī nigin keleī bagai, ī kot gudū fel fen, iron, “Kusī tamo neid odug Lisias isiyouf sain, aya ogon kot nigin od afōf.” ²³ Ī, Pol lo difouf, anī ere, ī karika difen ken, yogon mou tar ī ereb lau fef anī kulatun difouf nigin yo fiyēdiyof nigin, kusī tamo neid orowa irokenen.

²⁴ Naa tunī ilele di, Feliks ī aiwa Drusila Juda kayau ado disin. Ī Pol nigin od sur fe, isi fen, ī Kristus Jesus bun momoiya nigin wogō ye di, karī yen. ²⁵ Pol ī Negur nē madur fiya nigin, tamo yogon oroya kulatun fiya nigin ado, es fiya fau isiyouf anī nigin dir fe di, Feliks ī kumī ye fen, iron, “Are de bure welef! Wadã ule. Sain biya adouf are, ō nigin od sur afouf.” ²⁶ De sain anī bun, Feliks ī, Polem moni ifenēf nigin oron, anī nigin, sain musei Feliks Pol nigin od sur fe fen, urom wogō dedig.

²⁷ Yar uru ilele di, Porsius Festus, Feliks nē modoū yalen. Anī ere, Feliks Juda tamo meleid yalouf nigin, Pol kalabus bun itornē ibodon.

25

Pol Festus Mala Bun Kot Fen

¹ Festus provins anī bun wō ye, naa towo ilele di, ī Sisariam Jerusalem iselen, ² an pris odudug ado Juda neid uyu iroudiya geid, ī mala bun wō de fen, Pol bou yūya od anī dirokenen. ³ Festus ī wau ifeneīd fen, Pol Jerusalem sur fe di, ilauf nigin total bagai dirokenen, ere nigin, idi naab luwen dimin ken, Pol dukesiyouf nigin dodok difen. ⁴ Age de di, Festus ī irokenēdin, “Pol oun Sisaria kalabus bun ibodok. Aya yug mogo an alau fenē. ⁵ Anī nigin, tamo anī ereb kũ fenen ouf are, āgenei uyu irouya tunī aya weim Sisaria mele fen, an ī bou yūya od wogō douf.”

⁶ Festus ī idi geid, naa eit be ten dibodkele fen, Sisaria isilen. Naa anī ile di, ī es fiya modoū bun ibod ken, Pol ī wagen dirousiyouf nigin irokenēdin. ⁷ Pol wō ye di, Juda idi Jerusalem temeleid disin ī salili

* **24:8:** Itotoya tunī eig de ditoton: malen. Age mafe fen, amā nemã lo kilei es mafiyēf nigin age mafen. ⁷ Anī ere, kusī tamo neid odug Lisias isi, ī imaman tamal total ado son faman. ⁸ Agef fen, ī, tamo ī bou bun od dun anidi, ō gein disiyof nigin irokenēdin. Ō

difiye ken, ï mosor sane bagai inon de fen, ï bou yÿya od musei diron, anï ere, idi anï nÿ gariya to yaor difedin.

⁸ Age dife di, Pol yogo nigin isennÿya od iron, “Aya Juda neid lo nigin, tempel nigin, Sisa nigin be, ereb kÿ fenÿya taka to age afen.”

⁹ Anï ere, Festus ï, Juda tamo ï nigin waud yenÿf nigin wau iro ken, Pol iro-kenen, “Ö Jerusalem usel fen, boÿ yÿya od eneidi nigin an aya malaun kot bun ufarauf de?”

¹⁰ Pol iron, “Aya gama Sisa nÿ kot bun yeir afaref, ein aya kot difiyauuf. Ö ogo keleï bagai, aya Juda tamo bun kÿ fenÿya taka to anon. ¹¹ Anï ere, aya laa nÿ mosor taka anon ouf are, aya laa nigin to atorok. Anï ere, Juda tamo eneidi bouwau bun od dun anï momoi sãf are, aya taka nem idi imeid bun inenaya kisi feleya sã. Aya Sisa bun kot afouf.”

¹² Festus ï, yogon lo keleï tamo geid, katö difel fen, iron, “Ö Sisa bun kot afouf wol. Ö Sisa gein ulauf.”

Festus Pol Nigin King Agripa To Fiyen

¹³ Naa tunï ilele di, King Agripa Bernis ado, Festus aan difiyÿf nigin Sisaria taun disin. ¹⁴ Idi naa musei an dibodö di, Festus Pol nigin king ado katö de fen, ï iron, “Feliks ï, kalabus tamo taka ein itornen ibodok. ¹⁵ Aya Jerusalem ele di, pris odudug Juda neid uyu irouya geid, ï bun bou yÿya od dirou disi fen, ï mosor ado afiyÿf nigin dirokanan.

¹⁶ “Anï ere, aya arokenÿdin, Rom neid tobonunã bun, tamo taka bou bun od duk ï, yogon kiwai tar meleid bun ifar fen, bou bun od dun anï nigin, yogo bou isennÿya od wogöya sã mog, are kaisã tamo anidi imeid bun to dinenÿf. ¹⁷ Idi aya weim ein masi fen, aya to foi aun, we fele di, aya es fiya modoÿ bun abod ken, tamo are dale dirou disiyouf nigin arokenÿdin. ¹⁸ Yogon kiwai tar fã de wogö den, anï ere, aya mosor kisi afen anï nigin taka to bou bun dun. ¹⁹ Anï ere, idi dogo neid momoiya nigin ado, laa tamo yana Jesus, Pol ï nigin mata ibodok yedig anï nigin, ï geid fefe den. ²⁰ Aya enei nigin naig afe tutuk keleï youf au fen, nene aun, anï nigin, aya ï

Jerusalem ile fen, bou bun od dun enei nigin an kot bun ifarauf nigin to afiyen.

²¹ Anï ere, Pol ï kusï tamom lo difiyÿ dile, fau dum Sisam es fiyÿf nigin irokanan. Anï nigin, aya ï lo difiyek dile, ï Sisa gein sur fiya nigin naab amir ken, sur afiyÿf sain bun anï nigin arokenÿdin.”

²² Age ye di, Agripa Festus irokenen, “Aya yug tamo enei karï afiyÿ fenÿ.” Festus iron, “Ö nil karï wiyÿf.”

Pol Agripa Mala Bun Ifaren

²³ Naa anï ile di, Agripa Bernis ado, biya biyamã de disi, guru fiya fö aaben, kusï tamo neid odudug, taun nÿ uyu iroudiya geid dilen. Festus irö di, Pol aaben dirou disin. ²⁴ Festus iron, “King Agripa ado tamo ganan weim tafaref ã, tamo enei ulegef. Juda tamo kayau ganan Jerusalem ado ein Sisaria, ï nigin total bagai dirokanan. Idi ï mata to ibodöf nigin diweig diron. ²⁵ Aya, ï laa fouf nÿ ereb taka to age fen anï ailen. Anï ere, ï Sisa bun kot fouf nigin iron, anï nigin, aya ï Rom sur fiya nigin kisi afon. ²⁶ Anï ere, aya ï nigin ereb od Sisa bun atotkenÿf anï yaor sã. Anï nigin, aya ã ganan meleï bun ï arou asil, King Agripa ö bun bagai, anï bunem aya ï to afiyÿ keleï ken, ï nigin ereb od itotoya nigin adouf be. ²⁷ Ere nigin, aya kisi afef, kalabus tamo ï ereb mosor inon anï to yaor mog, sur afouf, are to biya.”

26

¹ Age ye di, Agripa Pol irokenen, “Aya ö ogo nigin wogö wouf nigin arokonok.” Anï nigin, Pol imam fe fen, yogo isennÿf nigin wogö yen, ² “King Agripa, bolÿ bagai, aya gama ö malã bun afar fen, Juda tamo aya bouwau bun od dun anï ganan nigin, aya yug isennauf nÿ od wogö auf. ³ Bolÿ bagai auf, ere nigin, ö Juda neid tobonunã ado luwa irouya anï ganan keleï. Anï nigin, ö folo reis fen, karï wiyauuf nigin agonok.

⁴ “Aya kesu naalun naig be afe abodon are, Juda tamo ganan keleï. Uruwa bun, aya neu teneub bun abodon, age afe fen, Jerusalemeg abodon are idi keleï. ⁵ Idi aya nigin sain meluk kelein, anï idi orodiyouf are, idi sã wogö douf, are ada neda momoiya mala bun, Farisia tamo idi lo

total bagai dō difedig anidi neid taka abodon. ⁶ Negur ada tubuda tar bun age afouf bagai fiyēdin anī bun, aya wau iseya ado, anī nigin, aya gama kot bun afaref. ⁷ Negur age afouf bagai fiyēdin anī nigin, ada neda ibor tuwelf, gaa ado bō ado total bagai Negur aruna dales fen, anī kisi fele di, dilouf nigin waud iseya adon. O king, wau iseya enei nigin, Juda idi aya bouwau bun od duk. ⁸ Ere nigin ā, Negur laa tamo kel turī fiyek anī kisi feleya sã gef?

⁹ “Aya yugeg, Jesus Nasaret tamal yana kiwai afenēf nigin ereb ereb ganan age afouf aun. ¹⁰ Are aya Jerusalem an age afen. Pris odudug bun yoya ale fen, Negur nē tamo kayau musei kalabus bun anenēdin. Idi laa bun dinenēdin sain, ayag idi laa bun dinenēdiyof nigin yo aun. ¹¹ Sain musei, aya idi darau afenēdiyof nigin, Juda neid uub fō fō bun elen, age afe fen, idi Negur kono difiyēf nigin nugo afiyēdin. Aya idi nigin nameu sane bagai yen ken, aya idi kafī fiya afenēdiyof nigin yaū tauneg elen.

¹² “De anī nigin sain taka bun, aya pris odudug neid od ado, yoya bun Damaskus taun elen. ¹³ O king, gaa atun age fiya naab luwe ele mog, aya saa ilun tamal fula fiya taka, gaa nē medeīya wal fiya, aya neu kabī turau tar geid bun, fula felen anī ailen. ¹⁴ Amã ganan tenebur kuku mau fen, ait taka Hibru od nem eig ye irokana mog, karī aun, ‘Sol, Sol, ere nigin ò aya daig wiyaf? Ò aa waila ado bun yē urak are, ò nigin malai bagai.’

¹⁵ “Age ye di, aya to afen, ‘Odug, ò aim?’ “Odug iron, ‘Aya Jesus, ò daig wiyaf anim. ¹⁶ Gama ò fã wale yem ufar. Aya ò bun wō aul, ere nigin, ò neu kabī tamo wō wo fen, ò aya nigin ereb ulen ado ereb afelnōf anī wogō wouf nigin agirnon. ¹⁷ Aya Israel tamo kayau bun ado haiden buneg asennōf. Aya idi bun ò sur ayok, ¹⁸ idi meleid fokō yel fen, gugum bun tamal lalan bun disiyof ado, Satan nē megeir bun tamal Negur bun disiyof, anī bunem idi neid mosor nigin weder tu keleya dale fen, aya nigin momoi de fen, fateuledin anidi atun dogo neid modoū gei difouf.’

¹⁹ “King Agripa, anī nigin, aya saa ilun tamal malau seleulã kurãf fen, ailen anī to adodon. ²⁰ Uruwa, oun Damaskus taun difaref anidi bun, Jerusalem ado Judia distrik ganan bun difaref anidi bun ado, haiden buneg, idi waud falei ye, Negur bun falei dife fen, ereb age difef bunem, idi waud falei yen anī yaor difouf nigin wogō aun. ²¹ Anī nigin, Juda idi tempel modoū bun daleyā fen, dinakesiyof fenē nigin age difen. ²² Anī ere, Negur aya isennaf isi, gama naa enei bun, anī nigin, aya ein afar fen, nanaal ado odudug bun wogō auf. Aya Moses profet geid agef wō youf den anī to adod ken, wogō auf, ²³ are Kristus darau yale fen, ī ket laa bun tamal mata kel fã ye fen, Israel tamo kayau ado haiden geid bun, fula fiya anī nigin kurō fesiyof anī.”

²⁴ Pol yogo bouwa isennēf nigin od enei wogō ye di, Festus iweig iron, “Pol, ò wadã inok. Ogon keleī odug anim wadã bun irouleyok.”

²⁵ Pol iron, “Odug Festus, aya wadã sã. Ereb aya orok enei are momoi, gariya ado. ²⁶ King ī enei nigin keleī, anī nigin, aya kumī sã wogō ayok. Aya momoi auf, are enei taka ī mala bun to iminen, ere nigin, enei iminēyan to wō yen. ²⁷ King Agripa, ò profet ganan nigin momoi wof de? Aya keleī, ò momoi wof.”

²⁸ Age ye di, Agripa Pol irokenen, “Ò kisi wof, are sain tobega eig fiya bun aya Kristen wō auf nigin neu kisi falei wouf de?”

²⁹ Pol iron, “Sain tobega be, sain meluk, aya Negur kosē afiyēdig are ò nigin dogol sã, ganan gama aya karī wiyagef āg, aya gen wowã gouf nigin, anī ere, sen enei dogol anī to difōyeīf.”

³⁰ Age ye di, king, gawaman nē mudur, Bernis ado, idi weim dibodon ganan fafã den. ³¹ Age de fen, idi aab ditor dile, abob diroken ken, diron, “Tamo enei ereb taka laa fouf nē be, kalabus ileya nē to age fef.”

³² Agripa Festus irokenen, “Tamo enei Sisa bun to kot fem are, ī yalisnēya kisi feleyam.”

27

Pol Waag Bun Rom Ilen

¹ Amã* waag bun Itali kantri malauf nigin od difõ di, Pol kalabus tamo tuni geid, kusĩ tamo neid orowa taka yana Julius ima bun dinenẽdin, ĩ Sisa nẽ Kusĩ Mala bun tamal taka. ² Amã waag taka, Adramitium taun tamal Asia provins bun maaĩ ub ub ilau fenẽ agef mog, sõ mau fen, melen. Aristakus, Tesalonika taun tamo oun Masedonia provins bun tamal, ĩ amã weim.

³ Naa ile di, Saidon taun wõ maun. Julius ĩ Pol wau ifen ken, ĩ mou tar gedin ile fen, erab ĩ lau fef anĩ difenẽf nigin yo fiyen.

⁴ Anenem amã baban waag bun sõ mau fen, Saipras nuyo wagenem melen, ere nigin, yau naaburamã gudũ fen. ⁵ Amã Silisia ado Pamfilia maaĩ atu mele fen, Lisia provins bun Maira taun wõ maun.

⁶ An kusĩ tamo neid orowa, Aleksandria taun tamal waag taka Itali kantri ilau fenẽ mog, ile fen, ĩ amã waag bun inenaman.

⁷ Amã naa musei, foinenem waag bun, Nidus taun non wõya nigin darau nem melen. Yau naaburamã gudũ fe di, amã Krit nuyo uyu Salmone wal mafe fen, Krit nuyo wagenem melen. ⁸ Amã darau kininem maaĩ ub dõ maf masil, modoũ yana Basis Biya dedig, Lasea taun non an wõ maun.

⁹ Naa musei ilelen, agef fen, waag bun ileyã are mogo sane bagai len, ere nigin, naa are Kuriya Naa† dumen. Anĩ nigin, Pol wedereid iron, ¹⁰ “Tamo, aya ailef are, neda waag bun delẽ sanel fen, waag adoi, udũ adoi, tamo adag daũf sa kalauf.”

¹¹ Anĩ ere, kusĩ tamo neid orowa, Pol wogõ yen anĩ to karĩ ye fen, waag irouya tamo ado waag marau idi neid od dõ fen.

¹² Basis are yau sain bun ifareya to biya nigin, musei ganã, waag bun tokõ mafel, Finiks wõ mau fen, an mabodõf nigin kisi difon. Finiks are Krit nuyo nẽ basis taka, gaa ileyã saut ado not melem wage ifenek.

⁹ Naa musei ilelen, agef fen, waag bun ileyã are mogo sane bagai len, ere nigin, naa are Kuriya Naa† dumen. Anĩ nigin, Pol wedereid iron, ¹⁰ “Tamo, aya ailef are, neda waag bun delẽ sanel fen, waag adoi, udũ adoi, tamo adag daũf sa kalauf.”

¹¹ Anĩ ere, kusĩ tamo neid orowa, Pol wogõ yen anĩ to karĩ ye fen, waag irouya tamo ado waag marau idi neid od dõ fen.

¹² Basis are yau sain bun ifareya to biya nigin, musei ganã, waag bun tokõ mafel, Finiks wõ mau fen, an mabodõf nigin kisi difon. Finiks are Krit nuyo nẽ basis taka, gaa ileyã saut ado not melem wage ifenek.

⁹ Naa musei ilelen, agef fen, waag bun ileyã are mogo sane bagai len, ere nigin, naa are Kuriya Naa† dumen. Anĩ nigin, Pol wedereid iron, ¹⁰ “Tamo, aya ailef are, neda waag bun delẽ sanel fen, waag adoi, udũ adoi, tamo adag daũf sa kalauf.”

¹¹ Anĩ ere, kusĩ tamo neid orowa, Pol wogõ yen anĩ to karĩ ye fen, waag irouya tamo ado waag marau idi neid od dõ fen.

¹² Basis are yau sain bun ifareya to biya nigin, musei ganã, waag bun tokõ mafel, Finiks wõ mau fen, an mabodõf nigin kisi difon. Finiks are Krit nuyo nẽ basis taka, gaa ileyã saut ado not melem wage ifenek.

Yau Uyẽ Ado

* **27:1:** Luk ĩ Pol geid, sain anĩ bun waag bun weim dilen. † **27:9:** Kuriya Naa anĩ, Israel tamo kayau mosor yaleleyã nẽ naa.

¹³ Yau saut melem foinenem fũ fe di, idi neid oroya kilei agef wõ yen anĩ kisi difen. Anĩ nigin, idi anka dĩ difesel fen, waag bun Krit nuyo maaĩ ub dõ de dilen.

¹⁴ Sain meluk ileyã sã mog, yau odug total ado, yana ‘Gaa iseyã not tamal’ dedig anĩ, fã ye fen, nuyo bunem fũf irou isilen. ¹⁵ Yau odug total ado waag yũ di, waag yau bun ileyã kisi feleyã san.

Anĩ nigin, amã waag ulum irouya matorõ di, yaum irouleman. ¹⁶ Amã nuyo naal taka Kauda dedig dumenem wal mafe fen, isennẽya nẽ waag naal darau nem dĩ mafen. ¹⁷ Tamo, isennẽya nẽ waag naal, waag odug teten dalesel dino fen, gama idi malũ nem waag odug anĩ to fara foug nigin luwa filu difen. Idi waag, maaĩ kulum yana Sirtis bun sõya nigin kumĩ de fen, anka folõ difesi di, yaum waag iroulen.

¹⁸ Yau fatuk bagai waag yuk ile, we fele di, idi udũ tuni naanũ diraran. ¹⁹ Naa anĩ ile di, idi imedim waag nẽ safina naanũ diraran. ²⁰ Naa musei, gaa ado barisa to mailen, agef fen, yau odug total ado de agef yenen. Anĩ bunem, amã isennẽya malouf nigin waumã iseyã ganã sa kelen.

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kitem waag bun to talauf nigin arokenein anĩ karĩ gem, are dem, ago gem are, daũ fiya ado iraraileya enei to fotou gem. ²² Anĩ ere, aya total unogouf nigin total bagai arokeneik, ere nigin, ãgenei taka to fõ yalauf, waag dogol narĩ foug. ²³ Nor bõ, Negur, aya yogon, aya ĩ aruna aledig, yogon engel sirun ifar fen, ²⁴ iron, ‘Pol, to kumĩ wo. Õ de Sisa malã kot bun ufarauf. Negur õ wau ifon ken, ganã õ geid waag bun ulegef idi neid mata õ ifonon.’ ²⁵ Anĩ nigin, tamo, total unogouf, ere nigin, aya Negur bun momoiya anof, are ĩ irokanã kilei fau agef wõ youf. ²⁶ Anĩ ere, ada nuyo taka bun sõ tauf.”

Waag Narĩ Felen

²⁷ Naa fotin nẽ bõ anĩ bun, amã fau Mediterenian Maaĩ bun yaum iroulema mog, bõ atun age fiya waag tamo idi

teneub melsā melef ya anī kerē fedin. ²⁸ Idi naan nē mala es difouf nigin malū folō difele di, isil fen, naan nē mala foti mita dilen. Sain naal bagai dile fen, idi baban malū folō difele di, isil fen, naan nē mala teti mita dilen. ²⁹ Idi waag meein tuwa bun ileyā nigin kumī de fen, idi waag dumen anka aiwa adodo folo folō difeledi di, disil fen, gaa nigin kosē den. ³⁰ Waag tamo idi, waag bun tamal diyalalau fenē nigin, idi isennēya nē waag naal folō difele di, maaīwō isilen, tamomoi de fen, waag uyu bun anka dirarāf nigin de fen, age difen. ³¹ Age dife di, Pol kusī tamo neid orowa, kusī tamo geid irokenēdin, “Tamo eneidi waag bun to dibodōf are, ā isenneīya to walogouf.” ³² Anī nigin, kusī tamo idi, malū isennēya nē waag naal iroun anī gudū difele di, ilen.

³³ We kurā fiya sā mog, idi ganān saaf dāf nigin, Pol ī total bagai irokeneīd fen, iron, “Naa fotin bun ā sii yei ken, saaf sā usigen, ā saaf taka to wōgen. ³⁴ Anī nigin, gama aya ā saaf wāgauf nigin total bagai arokeneik. Ā mata ubodōgouf nigin wāgauf. Āgenei taka, mudur bun fatiya tekelei bagai taka to kusuf irāf.” ³⁵ Pol od enei wogō yel fen, idi ganān meleid bun, ī bret tunī yale, Negur de fiyekel fen, mūf gariya ino yon. ³⁶ Idi ganān waud yalese di, saaf don. ³⁷ Amā waag bun mafaren ganān gu feleya are 276. ³⁸ Idi dakas kisi fele di, idi waag karikauf nigin, wit ganān maaīwō diraran.

³⁹ Lalan ise di, teneub uyu nain be ya anī idi keleī san, anī ere, alelei ub mumul ado anī dilen, kisi falauf are, idi an waag dirou dilauf nigin kisi difon. ⁴⁰ De sain tekelei bun maaīwō anka kokour de ditorarā yen ken, malū waag uyu gadi fiya nē pul difon anī biru difeledin. Age difel fen, idi yau bun sel dalesel fen, yau difenē di, waag ubun irou ilauf nigin age difen. ⁴¹ Anī ere, maaī irak isi abob bun dūdig nē an, waag maaī kulum yu ken, anī teten sō yesen. Waag uyu degē fel fen, tonoya kisi feleya san, age fe di, waag ibu maaim yū di, faraf fisik fe irailen.

⁴² Kalabus tamo idi maaīwō to gaōgī de diyawauf nigin, kusī tamo idi didenke-

siyouf nigin katō difen. ⁴³ Anī ere, kusī tamo neid orowa Pol isennēf nigin wau iro ken, kusī tamo idi dogo neid kisi to dō de age difouf nigin gudū felen. Idi yoyōya kisi feleya anidi, ketem waag bun tamal gurusā de fen, teneub bun dilauf nigin, ī ari fedin. ⁴⁴ Tunī ganān aa bun be, waag masasak bun an dilen. Anī bunem, idi ganān biya bagai totoū teneub bun wowā den.

28

Malta Nuyo Ubun

¹ Amā biya bagai ubun wō mau fen, nuyo are yana Malta ya anī kelein. ² Tamo kayau an temeleid waud fatuk bagai difanaman. Uyē isi fen, feluken nigin, idi yā kū dife fen, amā ganān aan difaman. ³ Pol ī aa were gurif fen, yā teten ino mog, gogour sane yā uruwam iru di, Pol ima bun degē felen. ⁴ Tamo kayau an temeleid, gogour anī Pol ima bun kuuri ye mog, dile fen, idi abob dirokenen, “Tamo enei tamo yukesiya tamo bagai, ere nigin, ī maaīwō tamal iyawol, anī ere, neda waitou Madur Fiya anim ī mata ibodōf nigin to oron.” ⁵ Age de di, Pol ī gogour wiri fe di, yā malan isilen, anī ere, ī bun ereb taka to wō yen. ⁶ Tamo kayau ī ima dī youf be, kaisā bagai kubū ye laa fouf de fen, kisi difen. Anī ere, idi sain meluk lo difef dile, ereb taka ī bun to wō yen anī dile fen, idi kisi falei del diron, ī waitou den.

⁷ Teneub akor melsā are, nuyo anī nē mudur, Publius nē teneub ibodon. Ī aan fama ken, yogon fō bun gei famā iroule, naa towo el fe kulatun faman. ⁸ Ī tama dagi di, fataren yenen, bouwa uruwa ado te fururū yalen. Pol ī ilouf nigin ile kosē yel fen, ima teten ino di, dagi fara felen. ⁹ Enei wō ye di, nuyo bun dagi tamo tunī ganān ī garan disi di, el feid ledin. ¹⁰ Idi naab fire fire bunem el difama ken, amā waag sō mauf nigin dodok mafe di, idi amā ereb ereb lau mafen anī difanaman.

Rom Wowā Den

¹¹ Ogō towo ilele di, amā, waag taka yau sain bun nuyo an si inon anī, sō mau fen, melen. Waag are Aleksandria taun tamal, anī uyu bun, waitou aina ado

Kastor Polluks ado meleidkanon dinon. ¹² Amã Sirakus taun wõ mau fen, naa towo an mabodon. ¹³ Anenem amã waag bun mele, Regium taun wõ maun. Naa anĩ ile di, yau saut melem fã yen, baban naa anĩ ile di, amã Puteoli taun wõ maun. ¹⁴ An amã momoiya tamo tunĩ fotou mafiyēdi di, idi geid naa sewen mabodōf nigin dirokanaman. Age mafel fen, Rom taun masin. ¹⁵ Momoiya tamo an, amã masif ya anĩ karĩ de fen, idi diyok disi, Apius Maket ado Tamo Yenēya Fō Towo bun an fotou difamãf nigin disin. Pol tamo anidi ileid fen, Negur de fiye ken, wau megeir yalen. ¹⁶ Amã Rom wõ mau fen, Pol ĩ mugu kusĩ tamo takam tari fiyek dibodōf nigin yo difiyen.

Pol Oun Rom Kusĩ Tamom Tari Fe Mog, Biya Od Wogõ Yen

¹⁷ Naa towo ilele di, Pol Juda neid uyu iroya iweig laisi, guru dife di, idi irokenēdin, “Turau tar, aya, neda tamo kayau ado, neda tubuda tar neid tobonunã to adodon, anĩ ere, aya Jerusalem oun daliya fen, Rom imeid bun dinenan. ¹⁸ Idi aya fele difiyale fen, dalisnau fenē age difen, ere nigin, aya laa nē mosor taka to anon. ¹⁹ Anĩ ere, Juda idi anĩ nigin kiwai dinon, aya neu tamo kayau nigin bouwa yūya od taka san, anĩ ere, naab taka san nigin Sisa bun kot afen. ²⁰ Gariya anĩ nigin, aya fotou ayei ken, ã geid wogõ tauf nigin to ayein. Israel neid waud iseya anĩ nigin, aya sen enei nem difōyan.”

²¹ Idi diron, “Amã õ nigin Judia distrik bun tamal pas taka to malen, agef fen, turada tar idi anenem disin õ nigin od taka be, od sane taka to dirokanaman. ²² Anĩ ere, amã ogon kisi anĩ karĩ mauf nigin waumã irok, ere nigin, amã keleĩ, tamo kayau teneub ganan bun, ogon momoiya mala enei nigin kiwai od wogõ dedig.”

²³ Idi Pol dilouf nigin naa taka dinon, naa anĩ bun, idi musei bagaim Pol ibodon nē an disin. Pol ĩ bonimei nem ile bõ, Negur nē tano nigin faded fiyeĩd fen, kurõ feis irokenēdin, ĩ Moses nē Lo ado profet neid itotoya bun, Jesus nigin idi neid kisi

falei ye fen, momoi douf nigin age fen. ²⁴ Tunĩ Pol wogõ yen anĩ bun waud falei yen, anĩ ere, tunĩ to momoi den. ²⁵ Pol idikeleya od enei wogõ ye di, idi dogo dogol fefe de fen, dilelen, “Awa Uur Fateul profet Asaia sigor bunem eig ye wogõ yen, are ĩ tubuĩ tar momoi bagai od anĩ wogõ fiyēdin:

²⁶ “Tamo kayau enei bun ule fen, urõ, “ã wedereim karĩ gouf, anĩ ere, wedereĩ to fokõ youf, ã meleim ulougouf, anĩ ere, meleĩ to fokõ youf.”

²⁷ Ere nigin, tamo kayau enei, idi waud katĩ felen, idi wederedim karĩya kisi feleya sã, age de fen, idi meleid difofakelen, age fiya sam are, idi meledim dilem, wederedim karĩ dem ado, idi waud fokõ ye fen, falei de di, aya idi el afedim.”*

²⁸ “Anĩ nigin, Negur nē isennēya haiden bun sur fen anĩ, ã keleĩ youf. Age fe di, idi anĩg karĩ douf!”†

³⁰ Yar uru adok, Pol ĩ yogon fõ na yaledig bun ibod ken, ĩ dilouf nigin disin ganan aan fiyēdin. ³¹ Kumĩ sã ado kafĩ fiya sã, ĩ Negur nē tano nigin wogõ ye fen, Odug Jesus Kristus nigin ifelnēdin.

* **28:27:** Asaia 6:9, 10 † **28:28:** Itotoya tunĩ eig de ditoton: douf!” ²⁹ Pol od enei wogõ yele di, Juda idi dogo tutur fatuk bagai fefe de fen, dilelen.

Rom

¹ Aya Pol, Kristus Jesus nê ferfer, aposel wõ auf nigin iweigna fen, Negur nê biya od wogõ auf nigin igrnan. ² Biya od anĩ, Negur kulu bagai yogon profet promis od irokenêdi di, Negur nê Itotoya Fateul bun ditoton, ³ are yogon Naal, neda Odug Jesus Kristus nigin, ĩ tamo nê ibor bun are, Dawid nê ibor bun wõ yen, ⁴ agef fen, fateul nê Awa Uur bunem, ĩ laa bun tamal kel turĩ fiyen anim, Negurem Jesus ĩ Yogo Naal megeir barikã ado anĩ yaor kurõ fesin. ⁵ ĩ bunem, amã yogon yana seli kulõ fiya nigin, haiden ganan atun temeleid, tamo kayau maweignêdi di, idi momoi de fen, dô difouf nigin, amã wau ifenêya ado aposel nê kabĩ malen. ⁶ Āg, Jesus nê tamo kayau wowã douf nigin iweignêdif anidi atun, ubodõgef.

⁷ Tamo kayau ganan Rom taun ubodõgef, Negur ã nigin wau laaf fen, tamo kayau fateul wõ gouf nigin iweignein, ã bun pas enei atotof.

Wau ifenêya ado wau inosiya, neda Tamada Negur ado Odug Jesus Kristus bunem, ã bun isiyouf.

Pol Rom Ileya Nigin Bagai Wau Iron

⁸ Uruwa bagai, aya ã ganan nigin, Jesus Kristus bunem, neu Negur de afiyek, ere nigin, āgenei momoiya nigin teneub ganan bun od iyokelen. ⁹ Negur ĩ nigin aya wau adok iro ken, ĩ Naal nê biya od wogõya bun aruna aledig, ĩ ileya mog, aya ã nigin toku neu kosêya bun faimud karĩ aledig. ¹⁰ Age afe fen, gama Negur orouf are, naab kã fele di, aya ã gein asiyouf nigin aya kosê auf.

¹¹ Aya ã ileyeĩya nigin bagai wau irok, are aya uur nê ege luwa tunĩ megeir ifareya nê anĩ afeneĩf nigin age afef, ¹² anĩ bunem, aya ã geid, mugu mugu āgenei momoiya ado neu momoiya bunem abob tasennêf. ¹³ Turau tar, aya ã enei to keleĩ youf anĩ to orouf, aya, sain musei, ã gein isiya nigin kisi afen, anĩ ere, aya age fiya nigin, naab katĩ felef isi, gama enei bun,

are aya, Juda sã anidi tunĩ ganan atun, age afen gen, ã atuneg gei ayeĩf nigin age afen.

¹⁴ Negur aya isennan nigin, aya ĩ bun wareg ado. Anĩ nigin, Aya, tamo Grik od ado dogo neid tobonuneid keleĩ anidi ado, tamo Grik od ado dogo neid tobonuneid keleĩ sã anidi bun, kisi biya adodo, nene yedidiya buneg, wareg enei aũf. ¹⁵ Age fiya nigin, aya Rom taun ubodõgef ã buneg, biya od anĩ wogõya nigin kisi total alef.

¹⁶ Aya biya od nigin to mama fiyaf, ere nigin, are Negur nê megeir, tamo ganan momoi def, kel gei fouf nigin, Juda idi bun keteme di, Juda sã anidi idi buneg age fouf. ¹⁷ Ere nigin, biya od bun, Negur ĩ tamo kayau yogon mala bun madur bagai inenêdiya nê naab anĩ kurõ fesif, Negur ĩ tamo kayau yogon mala bun madur bagai inenêdiya nê naab anĩ momoiya bunem dogol isif, are Negur nê Itotoya bun ibodok kilei, “Madur tamo momoiya bunem mata ibodõf.”*

Negur Nê Didi Tenebur Tamo Bun Isiyouf

¹⁸ Negur nê didi, saa ilun tamal, tamo idi dogo neid sanem momoi anĩ lai difedig anidi neid mosor ado sane ganan bun yaoref, ¹⁹ ere nigin, ereb Negur nigin idi keleĩ youf are, idi bun yaor, ere nigin, Negur ĩ idi bun anĩ yaor fen. ²⁰ Negur teneub saa ado kare fen sain bunem isi gamag, Negur nê tobonunã ileya kisi feleya sã anĩ, are in ibodkeleya megeir ado ĩ Negur ya anĩ, idi yaor diledig. Ereb Negur inodin anĩ bunem idi keleĩ, anĩ nigin, tamo idi galã taka sã.

²¹ Idi Negur kelein, anĩ ere, idi ĩ Negur gen to yana dales fen, de difiyêdig, anĩ ere, idi neid kisi nene yel fen, idi neid waud neneya anĩ bunem dogo neid waud gugum kerũ felen. ²² Idi amã kisi biya ado dedig, anĩ ere, idi neneya wowã de fen, ²³ idi to bura leya Negur nê fula fiya medeĩya anĩ falei difel, bura leya nê tamo, ninã, gaar ado, gaar luwedim diyõdig imedim meleidkanon dinon anĩ bun dinon.

²⁴ Anĩ nigin, Negur idi itornêdi di, idi neid waud irõya sane dô de, noli

* 1:17: Habakuk 2:4

mosor dino amuyē bun dile fen, idi neid bouwedim abob mama difenēdig. ²⁵ Idi Negur nē momoi anī falei difel, idegēya bun dinon, age de fen, idi Negur ereb ereb kare fen anī ban, ereb ereb Negurem kare fen idi yeneid anī dales fen, aruneid daledig. Negur ī faimud yana yaleseyauf. Momoi.

²⁶ Enei nigin, Negur idi mama nē oroya bun itornēdi di, dilen. Idi neid kayaug, Negur bagu fedin geid bouweid bagu fiya ditor ken, falei del, kayau tutur Negur bagu fediya sã anidi geid bouweid bagu difedig. ²⁷ Age fiya bagai, tamog Negur kayau ado bagu fedin anī ditor ken, idi abob bun noli nigin yã gaī de genen. Tamo, tamo tunī geid mama tobonunã age dife fen, idi neid idodōya mala darau dogo ke de dalen.

²⁸ Idi Negur nigin keleī yaleya ditoron, anī nigin, Negur idi itornēdi di, idi neid kisi sanel fen, idi ereb ereb to age fiya nē anī age difedig. ²⁹ Idi tobonunã madur fiya sã fire fire ganan, sane, safina nigin neu dogol yeya ado, to ile oroya anim isokosen. Idi kiyēī, tamo yukesiya, kusī, idegēya ado, sanem barikã. Idi dumen od wogō dedig, ³⁰ idi bou yūya od wogō dedig, Negur dudum difiyēdig, idi kono difedig, idi akoreid dūdig, idi dogo yeneid dalesedig. Idi sane age fiya nigin naab dimirēdig. Idi sineid temeid tar sigoreid to dō difedig. ³¹ Idi kisi biya sã, momoiya sã, waud laa fiya sã, waud yūya sã. ³² Idi Negur nē lo keleī, are idi anī age difef laa gurug difouf, anī ere, idi anī dogol to age difef diledig, anī ere, idi tunī anī age difedig anidig waud difenēdidig.

2

Negur Nē Es Fiya Madur Bagai

¹ Anī nigin, ō galã taka sã, ō aib taka es wiyēdig, ereb taka bun es wiyek, ō ogo boū uk, ere nigin, ō taka es wiyek, ō ogog de ago wodig. ² Ada keleī, Negur nē es fiya idi age difef anidi bun isif, are momoi nē bun Negur es fedig. ³ Anī nigin, tamo ō aib, tunī age difef anidi es wiyēid fen, ōg anī ago wodig, ō Negur nē es fiya anī wal afouf wof

de? ⁴ Ō, Negur nē biya fiya ō waū faleiya bun irouyō isif anī to kelei ken, yogon biya fiya, molol ado, feseya sã, idi kisi feleya bagai anī, ō kono wof de?

⁵ Anī ere, ogon waū total ado ogon waū faleiya sã bunem, ō ogo nigin Negur nē didi wō youf naa bun walouf nigin didi kuru wof, sain anī bun Negur nē es fiya madur bagai anī yaorouf. ⁶ Negur ī “mugu mugu ereb age difen kilei ifenēdiyof.”* ⁷ Idi feseya sã ereb biya age difen bunem, fula fiya medeīya, yana ado, to bura leya dimirēdig anidi, mata ibodkeleya ifenēdiyof. ⁸ Anī ere, idi dogo nigin dogol kisi de fen dimirē di, idi momoi anī ditor ken, sane dō difedig anidi bun, didi ado seyeya wō youf. ⁹ Morō ado darau, tamo sane age difedig ganan bun wō youf, Juda idi bun keteme di, haiden idi buneg age fouf. ¹⁰ Anī ere, fula fiya medeīya, yana ado, wau inosiya, idi biya age difedig ganan bun wō youf, Juda idi bun keteme di, haiden idi buneg age fouf. ¹¹ Ere nigin, Negur ī Juda ado haiden, es fiya tekelei bunem es fediyof.

¹² Idi Moses nē lo sa ken, mosor dinof gananeg, Moses nē lo sã daū falauf, idi Moses nē lo farumen dibod ken, mosor dinof ganan, Moses nē lo nem es fediyof. ¹³ Negur mala bun, idi lo karī dedig anidi madur bagai sã, anī ere, idi lo dō difedig anidi, Negur mala bun madur bagai youf. ¹⁴ Haiden idi lo sã dogo neid kisim ereb ereb lo irok kilei age difedig, idi lo sã, anī ere, idi dogo, dogo nigin lo. ¹⁵ Idi ereb ereb lo irok anī dogo neid waud bun itoton anī yaor difef, anī nigin, dogo neid kisi es fiya waud bun ibodok animeg, are momoi anī, yaor fe di, dogo neid kisim dogo bouweid yu ken, isenneīd mog fef. ¹⁶ Neu biya od, Jesus nigin tamo kayau arokenēdif anī irok kilei, Negur Jesus Kristus bunem, tamo nē wau bun iminek anī es fouf naa bun, enei agef bagai wō youf.

Juda Tamo Kayau Ado Lo

¹⁷ Ō ogo nigin aya Juda tamo wof; ō lo bun ufar fen, aya Negur ado nigal mauf wo fen, yanã walesef; ¹⁸ ō lom faded yō di,

* 2:6: Sam 62:12; Proverb 24:12

ō Negur nē oroya kelei ken, ereb madur bagai anī ō biya wof; ¹⁹ ō ogo nigin momoi wof, are ō mala ifofakeleya neid ulum irouya tamo, ō idi gugum bun difaref anidi neid lalan, ²⁰ ō neneya tamo neid tai fiya tamo, ō momou neid tise, ere nigin, ō lo bun kelei ado momoi anī barikā, ²¹ age fiyauf are, ō tunī ufelnēdidig, ō ogo to ufelnēdig de? Ō to bē walegei wodig, ō ogo bē waledig de? ²² Ō to seseirā unoi wodig, ō seseirā unodig de? Ō idegēya waitou anī to bagai oroyōdig, ō dogo neid tempel bun bē waledig de? ²³ Ō aya lo ado wo fen, yanā walesedig, ō lo ifodulūya bunem Negur mama wenēdig de? ²⁴ Are Negur nē Itotoya bun ibodok kilei, “Ā bunem, haiden atun Negur yana kono difiyek.”†

²⁵ Ō lo dō wof are, mulū are isennok, anī ere, ō lo ufodulōf are, ō mulū ileya sã gen wō wof. ²⁶ Anī nigin, idi mulū ileya sã anidim lo irok kilei dō difouf are, idi mulū ileyan gen to ilediyauf de? ²⁷ Taka ĩ mulū to ile fen, lo dōf el fouf are, ĩ, ō lo itotoya ado fen, mulū ulen, anī ere, ō lo ifodulūya tamo ye fen, to es yōf de?

²⁸ Tamo ĩ bouwam dogol Juda tamouf, ĩ Juda tamo bagai sã. Bouwam dogol mulū ilef, areg mulū bagai sã. ²⁹ Anī ere, tamo ĩ name bun Juda tamouf, ĩ Juda tamo bagai. Mulū bagai are, Awa Uurem, waud bun age fedig, lo itotoya bunem sã. Tamo age fiya, tamo bunem yana yaleseya to yaledig, anī ere, Negur bunem yaledig.

3

Negur Age Afouf Yen Are ĩ De Age Fouf

¹ Age fiyauf are, tamo ĩ aya Juda tamo yef bun, ere biya yalouf? Mulū bun ere biya adouf? ² Naab ganan bun musei! Uruwa bagai, Negur nē od idi kulatun difouf nigin imeid bun inon.

³ Juda tunī momoiya sãf are, naig fouf? Idi neid momoiya sã anim, Negur age fouf yen anī to age fouf de? ⁴ To bagai agef ilauf! Negur ĩ momoi bagai, age fe di, tamo

ganan idegēya temeleid tauf. Are Negur nē Itotoya bun ibodok kilei, “Are sain ō wogō wouf bun, ō madur bagai anī yaorouf, sain ō es diyōf bun, ō wal wediyouf nigin.”*

⁵ Anī ere, ada neda madur bagai sã anim, Negur nē madur bagai fatuk bagai yaor fouf are, ada ere tauf? Negur ĩ ada bun yogon didi ifanadauf nigin, ĩ madur sã tauf de? Aya tamo nē luwa irouya anī wogō auf. ⁶ To bagai agef ilauf! Age fiyauf are, Negur tamo kayau naig fe es fediyouf? ⁷ Taka nem monē ye fen, irōf, “Neu idegēya anim Negur nē momoi bagai anī yaau du fe di, anī bunem, yogon fula fiya medeīya odugouf are, ere nigin aya fau mosor tamal ya ani, bouwau bun inouf?” ⁸ Ere nigin to eig youf, “Biya anī wō youf nigin, ada sane age tafouf” youf? Tunī amam od enei wogō maudig de fen, amã bouwamã yūya od dirōdig. Negur idi es feid fen, mala solo ifenēdiyouf.

Aibem Taka Madur Bagai Sã

⁹ Amã ere mauf? Juda amã haiden wal fediya de? Gai sã bagai! Amã mogo, Juda ado haiden geid ganan mosor farumen kilei kilei dibodok ya anī, moron. ¹⁰ Are Negur nē Itotoya bun ibodok kilei, “Madur bagai taka to ibodok, tekelei bargaig sã;

¹¹ taka nem kisi fokōya sã, taka nem Negur imirēya sã.

¹² Ganan Negur nē naab fasis dife fen, ganan sesen len;

aibem taka to biya age fedig, tekelei bargaig sã.”†

¹³ “Idi neid uleidbanī, laa nē meku awa dede fiya sã gen;

idi neid baleid idegēya wogō dedig.”‡

“Gogour sane nē mū sigoredin ibodok.”§

¹⁴ “Idi neid eweid, isisiya ado dirikeī bagai.”*

¹⁵ “Idi neid yeid, tamo didenkesiyouf nigin tuninirya sã kaisã bagai dirādigi;

† 2:24: Asaia 52:5; Esekiel 36:22 * 3:4: Sam 51:4 † 3:12: Sam 14:1-3; 53:1-3; Eklisiastis 7:20 ‡ 3:13: Sam 5:9 § 3:13: Sam 140:3 * 3:14: Sam 10:7 † 3:17: Asaia 59:7, 8

16 idi neid iyōya bun, daū fiya ado morō dinodig,
 17 age de fen, wau inosiya nē naab idi keleī sā.”†
 18 “Idi neid meleid bun, idi Negur nigin kumī sā.”‡
 19 Gama ada keleī, ereb lo irok are, idi lo farumen dibodok anidi irokenēdif, anī bunem, eweid ganan omutukul del fen, tenebur tamo kayau ganan Negur nē es fiya farumen dibodōf. 20 Anī nigin, Negur ī, lo dō fiya bunem, ī mala bun taka ī madur bagai to youf. Age fiya nigin, lom ada mosor tanon anī yaor fadadig.

Madur Bagai Are Momoiya Bunem

21 Anī ere, gama Negur ī tamo kayau yogon mala bun madur bagai inenēdiya nē naab, are lo bunem sā anī yaor fen, are Lo ado profet neid wogōya bun kurō difesin. 22 Negur ī tamo kayau yogon mala bun madur bagai inenēdiya nē naab enei, Jesus Kristus nigin momoia bunem, idi momoi def ganan bun isif. Juda ado haiden bun de tekelei, 23 ere nigin, ganan mosor dinon, anī nigin, taka nem Negur fula fiya medeīya bun ibodok ī wagen ileyā kisi feleya sā. 24 Age dife di, Negur nē wau ifenēya anim, kel gei fiya Kristus Jesus na yaledin bunem isin anī bunem, idi ege bagai madur bagai inodif. 25 Negur ī, Jesus nē naud bun momoia bunem, Negur nē didi yof fen, tamo kayau neid mosor yalelkenēdiya kabī yalouf nigin, Negurem Jesus sesewi foug nigin inenen. Ī yogo madur bagai ya anī yaor fiya nigin, enei age fen, ere nigin, in molol bunem, uruwa mosor dinon anī mala solo ifenēdiya sā itornēdin. 26 Sain enei bun, ī yogo madur bagai ya anī, yaor fiya nigin age fen, are ī yogo madur bagai ye fen, taka ī Jesus bun momoia ado ī madur bagai youf nigin age fen.

27 Age fiyauf are, yana yaleseya anī nain? Yana yaleseya are sā. Ere gariya bunem? Lo dō fiya bunem de? Sā, momoia bunem. 28 Ere nigin, ada keleī, Negur ī tamo nē momoia bunem madur bagai youf, lo dō fiya bunem sā. 29 Negur

ī Juda neid dogol de? Ī haiden neid sā de? Eo, ī haiden nedig Negur. 30 Negur ī tekelei, ī mulū dilen anidi, momoia bunem madur bagai youf, agef fen, mulū ileyā sāg, momoia de tekelei anim madur bagai youf. 31 Age fiyauf are, ada momoia eneim lo anī tadodōf de? Sā bagai. Age fiya ban, ada lo tarou kafī tafalauf.

4

Negur Abraham, Ne Momoia Bunem Madur Bagai Yen

1 Age fiyauf are, ada Juda tubuda Abraham, ere anī ī gurug fen nigin, ere tauf? 2 Abraham yogon kabī bunem, madur bagai inenem are, Abraham ī yogo yana yaleseya nigin ereb taka adom, anī ere, Negur mala bun sā. 3 Negur nē Itotoya ere ye irok? “Abraham Negur nigin momoi ye di, Negur ī Abraham madur bagai yen.”*

4 Tamo taka ī kabī yalef, yogon mala solo are ege luwa ifenēya gen sā, are kabī mala. 5 Anī ere, tamo ī madur bagai wō youf nigin kabī to yale fen, Negur, ī dō fiya sā anidi madur fedidig, ī nigin momoi yef, Negur yogon momoia are madur bagai yef. 6 Dawid īg, tamo kabī bunem sā, Negur madur bagai yen, tamo anī nē el fiya nigin wogō yen:

7 “Idi neid kū fenēya nigin weder tu keledig,
 idi neid mosor yaleledig,
 are el fedif.

8 Tamo ī yogon mosor nigin Odug to bagai iwesnēf,
 ī el fiyek.”†

9 El fiya enei mulū ileyā neid dogol de? Sā, are mulū ileyā san neideg. Age fiya nigin, amā morōdig, Negur Abraham nē momoia bunem ī madur bagai yen. 10 Ere sain bun Negur ī age yen? Ī mulū ilel mog de, mulū ileyā sā mog? Ī mulū ilel mog sā, ī mulū ileyā sā mog. 11 Ī mulū ileyā nē uris, are ī fau mulū ileyā sā mog, momoia bunem Negur madur bagai yen anī nē uris yalen. Anī nigin, ī mulū ileyā san momoi def ganan neid temeid, anī bunem, Negur idi madur bagai youf. 12 Ī

‡ 3:18: Sam 36:1 * 4:3: Jenesis 15:6, 22 † 4:8: Sam 32:1, 2

mulū ileya nedig temeid, idi mulū dilen dogol sã, anī ere, idi tubuda Abraham ī mulū ileya sã mog, momoiya ado iyon anī yebura dō de diyōdig anidi nedig.

¹³ Negur, Abraham ado in tubu tar iro-kenēdin, are Negurem ereb ereb ganan idi afenēdi di, akorediyof yen anī, lo bunem sã, anī ere, madur bagai momoiya bunem isif anī bunem. ¹⁴ Idi lo dō difedig anidim, Negurem ereb ereb ganan idi afenēdi di, akorediyof yen anī akorediyof are, momoiya are ege ile di, ereb Negur iron are ege kilēf, ¹⁵ are lo didi irou isidig nigin. Lo sãf are, lo ifodulūyag sã.

¹⁶ Anī nigin, ereb Negur age afouf yen are, wau ifenēya bunem, kabī yalef ya anī yaorouf nigin, momoiya bunem isidig, are Negur ī, ege luwa Abraham nē ibor nē tubu tar ganan afenēdiyof yen anī, megeir fiya nigin age fedig, idi lo dō difedig anidi bun dogol sã, anī ere, idi Abraham nē momoiya dō difedig anidi buneg. Age fiya nigin, Abraham ī, ada ganan neda tamada. ¹⁷ Are Negur nē Itotoya bun ibodok kilei, “Aya ō teneub akor musei neid temeid anenon.” † Negur mala bun, ī neda tamada, Abraham Negur nigin momoi yen, Negur ī tamo gare den mata ifeneīd fen, ereb to ibodok anī iweig di, agef wō yedig, Negur ī anī.

¹⁸ Wau iseya nigin gariya taka sã bun, Abraham in wau iseya bun momoi yen, are ī teneub akor musei neid temeid wō youf nigin age fen, are Negur ī eig ye iro-kenen kilei, “Ogon ibor agef yenēf.” § ¹⁹ In momoiya bun felu reya sã, ī handred yar age fiya ibodon nigin, yogon bouwa anī laa gen ile fen, Sara kesu yaleya nigineg laa gen ilen. ²⁰ Anī ere, ereb ī Negur iron anī nigin to wau uru fen, in momoiya to ilef isi fen, anī ere, ī yogon momoiya megeir fe fen, Negur fula fiya medeīya ifenen. ²¹ Abraham ī, ereb Negur age afouf yen anī age fiya nigin, ī megeir ado, ye fen, momoi bagai yen. ²² Anī nigin, Negur, Abraham nigin ī madur bagai yen. ²³ Od “Negur ī nigin madur bagai yen” are, ī nigin dogol to itoton, ²⁴ anī ere, Negur ada nigin madur bagai youf anī nigineg

itoton, are ada, Negur, neda Odug Jesus tamo gare den bun tamal kel turī fiyen nigin, momoi tauf anī. ²⁵ Negur ī Jesus neda mosor nigin laa bun inene ken, ada madur bagai youf nigin, Jesus mata kel turī fiyen.

5

Maror Kulīya Ado

¹ Anī nigin, momoiya bunem, Negur ada madur bagai yen nigin, ada neda Odug Jesus Kristus bunem, Negur ado maror bun tabodok. ² Neda momoiya bunem, Jesus Kristus ī, ada Negur nē wau ifenēya enei ada gama an tafaref anī namen irou ileda di, telen. Anī nigin, ada Negur nē fula fiya medeīya nigin, wauda ise fen, kulī taudig. ³ Anī nigin dogol sã, ada neda morō nigineg kulī taudig, ere nigin, ada keleī, morō bunem feseya sã anī wō yedig, ⁴ feseya sã anī bunem atīya biya wō yedig, atīya biya bunem wau iseya wō yedig. ⁵ Wau iseya anim ada to fō fadadig, ere nigin, Awa Uur Fateul Negurem ifanadan anī bunem, in wau laa fiya ada wauda bun fi felen.

⁶ Ada fau maleg tabod mog, in sain bun bagai, Kristus ī, ada Negur dō fiya sã anidi nigin laa fen. ⁷ Tamo takam, taka madur bagai nigin, laa fiya malai bagai, agef fen, tamo takam aib taka tobonunã biya ado nigin total ino fen, laa fouf be. ⁸ Anī ere, Negur ada nigin yogon wau laa fiya anī, enei bun ada ifelnadaf, are ada fau mosor bun tabod mog, Kristus ada nigin laa fen.

⁹ Gama yogon naud bunem, Negur ada madur bagai yen nigin, ada ī bunem Negur nē didi bun tamal baban momoi bagai yalelkanadauf! ¹⁰ Sain ada Negur nē kiwai tamo tar tabod mog, yogon Naal nē laa bunem, ada ī geid komo fadan. Gama ada ī geid komo fadan nigin, baban momoi bagai, Kristus nē mata bunem ada kel gei fadauf! ¹¹ Enei dogol sã, anī ere, ada, ereb Negur neda Odug Jesus Kristus bunem age fen nigineg kulī taudig, are Jesus Kristus bunem, ada gama komo fiya talen.

† 4:17: Jenesis 17:5 § 4:18: Jenesis 15:5

Adam Bunem Laa Wō Yen, Kristus Bunem Mata Wō Yen

¹² Anī nigin, tamo tekelei bunem, mosor ket tenebur wō ye di, laa mosor bunem wō yen, age fiya bagai, ganan mosor dinon nigin, laa, tamo ganan bun wō yen. ¹³ Lo wōya sā mog, mosor tenebur ibodon. Anī ere, lo sāf are, mosor to iwesauf. ¹⁴ Anī ere, Adam nē sain bunem ile Moses nē sain bun, idi Adam age fen gen, to Negur nē itāfiya wal difen anidig laa farumen dibodon, Adam ī taka fau isiyouf nē malakanon.

¹⁵ Anī ere, Negur nē ege luwa are mosor Adam inon gen sā. Tamo tekelei nē mosor bunem musei gare den ouf are, Negur nē wau ifenēya ado ege luwa, tamo tekelei Jesus Kristus nē wau ifenēya bunem isin, naig fiya bagai tamo musei bun gogū foug! ¹⁶ Takag age fiya, Negur nē ege luwa are, tamo tekelei nē mosor mala age fiya sā. Es fiya mosor tekelei dōf fen, mosor inon nigin bouwa bun od yūya irou isin, anī ere, ege luwa mosor musei dōf fen, madur bagai anī irou isin. ¹⁷ Tamo tekelei nē mosor bunem, laa anī, tamo tekelei anī bunem mudur ibodon ouf are, idi Negur bunem, wau ifenēya barikā ado, madur bagai anī nē ege luwa barikā dalef anidi, momoi bagai, tamo tekelei Jesus Kristus bunem, mata bun mudur dibodōf!

¹⁸ Anī nigin, mosor tekelei bunem, Negur tamo ganan mosor temeleid yen, age fiya gen, madur bagai tekelei age fen bunem, Negur tamo nigin madur bagai ye fen, tamo ganan nigin mata irou isin. ¹⁹ Tamo tekelei nē od wal fiya bunem, musei mosor adodo wowā den, age fiya gen, tamo tekelei nē dō fiya bunem, musei madur bagai wowā douf.

²⁰ Mosor ifageya nigin, lo isin. Anī ere, mosor ifaga di, Negur nē wau ifenēya fatuk bagai ifagan, ²¹ are mosor laa bun mudur ibodon gen, wau ifenēya madur bagai bunem mudur ibod ken, neda Odug Jesus Kristus bunem mata ibodkeleya irou isiyouf nigin age fen.

6

Mosor Bun Laa, Kristus Bun Mata

¹ Age fiyauf are, ada ere tauf? Negur nē wau ifenēya ifagauf nigin, ada mosorei tauf de? ² Sā bagai! Ada mosor bun gare taun; naig fe di, ada anī bun tau tabodōf? ³ Ada ganan Kristus Jesus bun naan talen, are yogon laa bun naan talen anī, ā to keleī de? ⁴ Anī nigin, ada, laa bun naan talen bunem, ī geid mū fadan, are Kristus, Tama nē fula fiya medeīya nē megeir bunem, tamo gare den bun tamal kel turī fen gen, adag ibodōya mata bun mata tabodōf nigin age fen.

⁵ Ada yogon laa bun, enei gen ī geid bagu fadan ouf are, ada momoi bagai yogon kel fāya buneg, ī geid bagu fadauf. ⁶ Ada keleī, mosor nē bouwada yukesiyouf nigin, neda oroya tubu ī geid aa tetek bun yun, are ada mosor nē ferfer to tabodōf nigin age fen, ⁷ ere nigin, taka ī laa fen are, ī mosor nē megeir bun tamal yalelnen.

⁸ Ada Kristus geid gare taun ouf are, adag ī geid mata tabodōf nigin momoi tauf. ⁹ Ere nigin, ada keleī, Kristus tamo gare den bun tamal, kel turī fiyen nigin, ī baban to bagai laa foug, ī laa nē megeirem baban to ironēf. ¹⁰ Ī laa fen are, ī mosor nē megeir yukesiyouf nigin, sain tekelei bun dogol laa fen, anī ere, mata ī ibodok are, ī Negur bun mata ibodok.

¹¹ Age fiya bagai, ā aug nigin, mosor bun gare fen, Kristus Jesus bunem, Negur bun mata ubodōgef anī kisi gouf. ¹² Anī nigin, āgenei bouweī bura leya nē anī bun, mosor mudur ibodō di, ā in oroya sane anī dō gouf nigin to ago gouf. ¹³ Āgenei bouweī tunī, sane nē aruna yaleya nigin mosor bun to wenēgouf, anī ere, idi laa bun tamal kel turī fedin gen, ā aug Negur wenēg fen, āgenei bouweī tunī, madur bagai nē aruna yaleya nigin Negur bun wenēgouf. ¹⁴ Mosor āgenei odug to ibodōf, ere nigin, ā lo farumen sā, wau ifenēya farumen ubodōgef.

Madur Bagai Nē Ferfer

¹⁵ Age fiyauf are, naig fiya? Ada lo farumen sā, wau ifenēya farumen tabodok nigin, mosor tanouf de? Gai sā bagai! ¹⁶ Sain ā aug, taka sigor dōg fen, ferfer gen ī aruna walegef, ā taka sigor dō gef anī nē

ferfer ubodōgef anī, ā to keleī de? Ā mosor nē ferfer ubodōgef, are laa bun irouleyeik, ā Negur dō fiya nē ferfer ubodōgef, are madur bagai bun irouleyeik. ¹⁷ Anī ere, ada Negur de tafiyēf, ere nigin, ā uruwa bun mosor nē ferfer ubodōgen, anī ere, ā tai fiya difenein anī, āgenei wauī adok dō gen. ¹⁸ Ā mosor bun tamal yalelneī di, madur bagai nē ferfer wō gen.

¹⁹ Aya, ā bouweī bun felu reya nigin, tamo nē tobonunā bunem wogō auf. Ā uruwa bun ferfer gen, āgenei bouweī, sane amuyē ado bun unogen, ago ge di, fatuk bagai sane len, age fiya gen, gama ā ferfer gen, āgenei bouweī, madur bagai bun unoge di, fateul bagai wō gouf. ²⁰ Sain ā mosor nē ferfer ubodōgen, ā madur bagai nē farumen to ubodōgen. ²¹ Sain anī bun, ereb ā gama mama yeik bun tamal, ā ere mala biya walegen? Anī ganān are, laa bun irou isif. ²² Anī ere, ā gama mosor bun tamal yalelneī di, Negur nē ferfer wō gen, anī nē mala biya are, fateul bun irouleyeik, anī nē kaū are, mata faimud ibodkeleya. ²³ Ere nigin, mosor mala, are laa, anī ere, Negur nē ege luwa, are neda Odug Kristus Jesus bun mata faimud ibodkeleya.

7

Tamo Kayau Bagu Fiya Bun Od Malakanon

¹ Turau tar, aya, Moses nē lo keleī tamo ā arokeneik, lo are tamo mata ibodok sain bun dogol, ī bun megeir ado anī, ā to keleī de? ² Eig fiya gen, lo irok, kayau tamo aiwaf, ī tamo mata ibodok sain bun dogol ī aiwaf, anī ere, ī aiwa laa foug are, kayau ī bagu fiya nē lo farumen to ibodōf. ³ Age fiya nigin, kayau ī aiwa monog fau mata ibod mog, ī baban tamo taka yalouf are, ī seseirā kayau douf. Anī ere, yogon tamo laa foug are, lo anim kayau to ironē di, ī tamo taka yaloufeg, ī to seseirā kayau douf.

⁴ Anī nigin, neu turau tar, āg Kristus bouwa bunem lo bun gare gen, are ā, taka ī tamo gare den bun tamal kel turī fiyen anī nē wowāg fen, ada Negur bun faat

biya taūf nigin ago gen. ⁵ Sain ada bouwa nē oroyam ironadan bun, lo anim mosor nē oroya turī fe di, mosor nē oroya anim bouwada bun kabī yalen, anī bun, ada laa nē faat taun. ⁶ Anī ere, gama ada ereb mogo ironadan bun gare taun nigin, ada lo bun tamal yalelnadan, anī nigin, ada Awa Uur nē naab mata bun aruna talef, naab tubu lo itotoya bun sā.

Mosor Ado Kusīya

⁷ Age fiyauf are, ada ere tauf? Lo anī mosor de? Sā bagai! Momoi, lo sam are, aya mosor are ereb yef anī to keleim. Ere nigin, taka nē safina ile to oroya nigin lo to age ye irom are,* aya taka nē safina ile to oroya nigin to keleim. ⁸ Anī ere, itāfiya anim mosor modoū ifenē di, aya nameun mosorem taka nē safina ile oroya fire fire ganān inodin. Ere nigin, lo sāf are, mosor are laa fen. ⁹ Uruwa aya lo sā bun mata abodon, anī ere, itāfiya isi di, mosor mata fā ye di, ¹⁰ aya laa fiyan. Lo anī mata irusiyouf aun, anī ere, ī momoi bagai laa irusin anī ailen.

¹¹ Ere nigin, itāfiya anim mosor modoū ifenē di, mosorem aya idegna fen, itāfiya bunem laa bun inenan. ¹² Age fiyauf are, lo are fateul, itāfiya are fateul, madur fen, biya. ¹³ Age foug are, ereb biya anim aya bun laa irusin de? Sā bagai! Anī ere, mosor are mosor ya anī yaorouf nigin, mosorem ereb biya bunem aya bun laa irusin, are mosor itāfiya bunem mosor bagai wō youf nigin age fen.

¹⁴ Ada keleī, lo are Negur bun tamal, anī ere, aya bouwa buru nē, mosor nē ferfer gen na nē sur fiyan. ¹⁵ Ereb aya age afef, are aya keleī sā. Ere nigin, ereb aya age fiya nigin orouf, are aya to age afedig, anī ere, ereb aya to orouf anī, aya age afedig. ¹⁶ Ereb aya age fiya nigin to orouf anī, aya age afouf are, aya lo are biya auf anī ifelnadaf. ¹⁷ Anī nigin, aya yug anī to age afef, anī ere, mosor aya nameun ibodok anim age fef. ¹⁸ Aya keleī, ereb biya taka, aya nameun, are mosor nē bouwau enei bun to ibodok. Ere nigin, aya ereb biya age fiya nigin orouf, anī ere, aya age fiya

* 7:7: Eksodas 20:17; Diuteronomi 5:21

kisi feleya sã. ¹⁹ Ere nigin, ereb aya age afef, are ereb biya age fiya nigin orouf anĩ sã, anĩ ere, ereb sane aya age fiya nigin to orouf anĩ, aya faimud age afedig. ²⁰ Aya ereb to orouf anĩ age afouf are, ayam anĩ to age afef, anĩ ere, mosor aya nameun ibodok anim age fef.

²¹ Anĩ nigin, aya tobonunã eig fiya kabĩ yale mog, ailef: Sain aya biya age afou fenẽ di, sane anĩ aya ado ibodõdig. ²² Ere nigin, aya nameun Negur nẽ lo nigin wau kulĩ yedig, ²³ anĩ ere, aya lo taka anĩ bouwau tunĩ bun kabĩ yale mog, ailef, are neu kisi biya nẽ lo ado kusĩ de fen, aya, mosor, bouwau tunĩ bun kabĩ yalef anĩ nẽ lo nẽ kalabus tamo inenadig. ²⁴ O aya malaulon bagai! Aim anĩ aya laa nẽ bouwau enei bun tamal yalelnauf? ²⁵ Neda Odug Jesus Kristus age fen bunem Negur ada yalelnadan nigin ã de tafiyẽf!

Age fiyauf are, aya yug neu kisi bun are, Negur nẽ lo nẽ ferfer, anĩ ere, aya mosor nẽ bouwau enei bun, mosor nẽ lo nẽ ferfer.

8

Awa Uur Bunem Mata Ibodõya

¹ Anĩ nigin, idi Kristus Jesus bun dibodok anidi bun, mosor dinon nigin bou yũya taka gama to ibodok, ² ere nigin, Kristus Jesus bunem, mata nẽ Awa Uur nẽ lo anim, mosor ado laa nẽ lo bun tamal yalelnan. ³ Mosor nẽ bouwa felu reya nigin, lo anim age fiya nigin kisi feleya sã anĩ Negur age fen, are ã yogon Naal, mosor tamo nẽ bouwa gen bun, mosor yaleleya nẽ sesewi fiya ibodõf nigin sur fiyen anĩ bunem, Negur ã, mosor, mosor tamo nẽ bouwa bun ibodok anĩ nẽ megeir yukesin, ⁴ are madur bagai wõ youf nigin lo irok anĩ, bouwa nẽ oroya tator ken, Awa Uur nẽ oroya bun tabodõdig ada bun, kisi falauf nigin, Negur ã age fen.

⁵ Idi bouwa nẽ oroya bun dibodõdig anidi, dogo neid kisi are, ereb mosor nẽ bouwa orof anĩ bun yenẽdig, anĩ ere, idi Awa Uur nẽ oroya bun dibodõdig anidi, dogo neid kisi are, ereb Awa Uur orof anĩ bun yenẽdig. ⁶ Kisi mosor nẽ bouwa bun

yenẽdig, are laa nẽ, anĩ ere, kisi Awa Uur bun yenẽdig, are mata nẽ ado wau inosiya nẽ, ⁷ ere nigin, kisi mosor nẽ bouwa bun inodig, are Negur kiwai ifenẽdig, are Negur nẽ lo farumen to ibodõdig, ã age fiya nigineg kisi feleya sã. ⁸ Idi mosor nẽ bouwa bun dibodõdig anidi, Negur wau al fiya ifenẽya kisi feleya sã.

⁹ Anĩ ere, Negur nẽ Awa Uur ã namein ibodõf are, ã mosor nẽ bouwam to ulum iroukeneĩf, anĩ ere, ã Awa Uurem ulum iroukeneĩf. Anĩ ere, taka ã Kristus nẽ Awa Uur sãf are, ã Kristus nẽ sã. ¹⁰ Anĩ ere, Kristus ã namein ibodõf are, ãgenei bouweĩ mosor nigin laa foufeg, ãgenei uur madur bagai nigin mata ibodok. ¹¹ ã Jesus tamo gare den bun tamal, kel turĩ fiyen anĩ nẽ Awa Uur, ã namein ibodõf are, ã Kristus tamo gare den bun tamal, kel turĩ fiyen, yogon Awa Uur ã namein ibodok anĩ bunem, ãgenei bura leya nẽ bouweĩ matag ifeneĩf.

¹² Anĩ nigin, turau tar, ada wareg ado, are ada mosor nẽ bouwa to dõ tafouf, bouwa nẽ oroya bun to tabodõf. ¹³ ã bouwa nẽ oroya bun ubodõgouf are, ã gare gouf, anĩ ere, Awa Uur bunem ã bouwa nẽ tobonunã anĩ ukesigouf are, ã mata ubodõgouf, ¹⁴ ere nigin, idi Negur nẽ Awa Uurem uyu iroukenẽdif are, idi Negur nẽ gere tar. ¹⁵ ã kumĩya nẽ ferfer ineneĩya nẽ uur to walegen, anĩ ere, ã Negur nẽ gere tar ineneĩya nẽ Awa Uur walegen. Anĩ nigin, ã bunem ada taweig fen, “Aba, * Dei” taudig. ¹⁶ Awa Uur yogo, ada neda uur bun kurõ falaisi, ada Negur nẽ gere tar yedig. ¹⁷ Ada in gere tar ouf are, ada ereb el fiya biya Negur ifanadauf nigin promis od iron anĩ talouf. Ada Kristus geid weim yogon fula fiya medeĩyag talouf nigin ada momoi bagai ã geid weim yogon darau talouf are, ada Kristus geid weim ereb el fiya biya Negur ifanadauf nigin promis od iron anĩ talouf.

Fula Fiya Medeĩya Dumen Nẽ

¹⁸ Aya kisi afef, fula fiya medeĩya ada bun yaorouf, are ada neda darau gama talef anĩ wal fiya bagai. ¹⁹ Ereb ereb

* 8:15: Anĩ nẽ gariya, Aram od bun ‘Dei.’

ganan Negur inodin are, Negur yogo gere tar yaor fediyouf nigin, fatuk bagai tari difedig. ²⁰ Ere nigin, erab erab ganan Negur inodin are, Negur uruwa idi yogon oroya dō difouf nigin kisi fen anī idi to dō difedig, are dogo neid oroya bunem sã, anī ere, ī agef inodin anī nē oroya bunem. Anī ere, waud iseya ado, ²¹ are erab erab ganan Negur inodin, idig dogo bura leya nē kafī fiya bun tamal yaleneid fen, Negur nē gere tar neid fula fiya medeīya nē karika ibodōya bun gurif iroulediyouf.

²² Ada keleī, erab erab ganan Negur inodin, idi kesu gō fiya nē darau bun gen, gariya bunem osi def disi, gama sain enei bun bagaig, age difef. ²³ Anī dogol sã, anī ere, ada, Awa Uur, are dumen fula fiya medeīya ada talouf nē faat uyulil yūya anī talen, ada dugeg, Negur ada bouwada kel geif fen, ada yogon gere tar bagai ya anī yaor fe kurō falaisiyouf nigin, fatuk bagai tari tafe fen, namedan osi taudig. ²⁴ Ada kel gei fadan sain bun, ada wauda iseya enei talen. Anī ere, wau iseya malam ileya are, wau iseya bagai sã. Aim anī, erab ī mogo ilef nigin wau isauf? ²⁵ Anī ere, ada erab ada fau ileya sã nigin wauda isauf are, ada total tano fen, tari tafouf.

²⁶ Age fiya gen, Awa Uur ī neda felu reya bun isennadadig. Ada erab nigin kosē tauf anī ada keleī sã, anī ere, Awa Uur yogo od faded fiya kisi feleya sã anī, osi ye fen, ada nigin kosē yedig. ²⁷ Age fe di, Negur ada wauda fele fedig, ī Awa Uur nē kisi keleī, ere nigin, Awa Uur ī tamo kayau fateul nigin Negur nē oroya kilei kosē yedig.

Ada Kusī Wal Difen Anidi Wal Fediya

²⁸ Ada keleī, erab erab ganan bun, Negur yogo nigin waud laa fedig anidi neid biya fiya nigin Negur kabī yaledig, idi yogon oroya kilei iweignēdin anidi. ²⁹ Idi Negurem mogo kelein anidi, Negur idi yogo Naal gen wowã douf nigineg mogo igirnēdin, are yogon Naal, tura tar musei atun, kesu matu wō youf nigin age fen. ³⁰ Agef fen, idi Negur igirnēdin anidig, ī iweignēdin, idi Negur iweignēdin anidig, ī madur bagai fiyēdin, idi Negur madur

bagai fiyēdin anidig, ī fula fiya medeīya ifenēdin.

³¹ Age fiyauf are, ada enei nigin ere tauf? Negur ī nedauf are, aim anī ada daū fadaya kisi feleya? ³² Ī yogo Naal bagai nigin to katū ye fen, ada ganan nigin yogo Naal itornen anī, naig fe di, ī yogo Naal ado erab erab gananeg, ege kilē to ifanadauf? ³³ Aim anī, Negur igirnēdin anidi kot bun inenēdiyof? Negur yogo idi madur bagai fiyēdidig. ³⁴ Aim anī, idi mosor dinon ye fen, idi bouweid bun od yūf? Kristus Jesus ī mogo laa fen, agef feneg, ī kel turī fe di, matan, ī Negur ima biyalē ibod ken, ada nigineg kosē yedig. ³⁵ Aim anī, ada Kristus nē wau laa fiya bun tamal fara fadauf? Kafī fiya, morō, darau, naū, gemū, waila be, dimigem age fouf de? ³⁶ Are Negur nē Itotoya bun ibodok kilei,

“Ō nigin amā naa tekelei adok laa gurug mafef;

amā sipsip didenkesiya nigin age fiya gen dileman.”†

³⁷ Anī ere, enei ganan bun, ada, ī ada nigin wau laa fen bunem, ada kusī wal difen anidi wal fediya tabodok. ³⁸ Aya momoi auf, laa, mata, engel, kaa sesen, erab gama nē, erab dumen nē, erab megeir taka, ³⁹ ilun, kuren bagai be, erab erab ganan inodin bun erab takam, Negur nē wau laa fiya, neda Odug Kristus Jesus bun ibodok anī bun tamal, ada fara fadaya nigin kisi feleya sã.

9

Negur Yogo Bagai Igin

¹ Aya Kristus bun momoi orok, aya idegēya sã, neu kisi es fiya wau bun ibodok, Awa Uur Fateul bunem, aya bun anī megeir fef, ² are aya fatuk bagai wau gudūf fen, aya faimud wau bun morō ado. ³ Ere nigin, aya, neu turau tar, neu ibor anidi nigin, aya yug isisna fen, Kristus bun tamal yalenauf anīg, aya orouf. ⁴ Idi Israel tamo kayau. Negur nē gere tar ya anī dogo neid, Negur nē fula fiya medeīya anī, idi bun yaor fen, Negur ado bar itenēya, lo yaleya, tempel bun Negur yana yaleseya

† 8:36: Sam 44:22

ado, ereb Negur age afouf ye fen igirin, are dogo neid. ⁵Tubuid tar Abraham, Isak, Jakop are dogo neid, idi neid ibor anī isi isi Kristus wō yen, Kristus ī Negur, ganān ī farumen dibodok, faimud ī yana talesauf! Momoi.

⁶ Are Negur nē od irofosiya gen sã. Ere nigin, Israel ibor bun wō den anī, ganān Israel sã. ⁷ Idi Abraham nē ibor nē tubu tar ba, anī ere, ganān Abraham nē gere tar bagai sã. Age fiya ban, “Isak bunem, ogon ibor tar douf.”* ⁸ Are, tamo nē tobonunã nē naud bunem Abraham nē gere tar wowã den anidi ganān, Negur nē gere tar sã, anī ere, promis nē gere tar idi, Abraham nē ibor tar youf. ⁹ Negur nē promis od anī eig fiya, “Yogon sain bun bagai, aya kelauf, Sara kesu adouf.”†

¹⁰ Anī dogol sã, anī ere, Rebeka nē gere tar tama tekelei ado, are tubuda Isak. ¹¹ Anī ere, kesu uru fau gō fiya sã bun, ereb biya be sane be age fiya sã mog, Negur nē oroya anī, kabī bunem sã, iweignēdif ī bunem, yogon igiriya bun ifarauf nigin, ¹² ī Rebeka irokenen, “Matu anī, ibuye nē aruna yaleyēf.”‡ ¹³ Are Negur nē Itotoya bun ibodok kilei, “Aya Jakop nigin wau laa fen, anī ere, Esau to oroun.”§

¹⁴ Age fiyauf are, ada ere tauf? Negur madur sã de? Sã bagai! ¹⁵ Ere nigin, Negur Moses irokenen,

“Aya aib nigin wau yuk anī bun, wau yūya afenēf,
aya aib nigin wau irok, ī nigin wau yenēf.”*

¹⁶ Anī nigin, are, tamo nē oroya be kabī totol yaleya bunem sã, Negur nē wau yūya bunem. ¹⁷ Negur nē Itotoya bun, Isip nē king Farao nigin eig ye irok, “Aya ō enei nigin bagai king anenon, are aya ō bun neu megeir yaor afe di, teneub ganān bun, neu yanau kurō difalaisiyouf nigin age afen.”† ¹⁸ Anī nigin, Negur aib ī wau yūya ifenēya nigin orof bun, ī wau yūya ifenēdig, agef fen, ī aib nē wau katī feleya nigin orof bun, ī katī feledig.

¹⁹ Ā takam aya irokanauf, “Age fiyauf are, ere nigin Negur fau ada bouwada bun od yuk? Aim anī yogon oroya katī felef?”

²⁰ Anī ere, tamo ō ai anī Negur od solo urokenēf? “Ereb kare fen anim ī kare fen anī, ‘Ere nigin eig wo unoyan?’ fiyēf de?”‡

²¹ Mis inoya tamo ī mafer de tekelei anim, mis uru, taka kabī biya ifenēya nē, taka kabī sane ifenēya nē, yogon oroyam inoya kisi feleya sã de?

²² Negur ī yogon didi anī yaor fe di, yogon megeir anī tamo kayau keleī youf nigin wau iro ken, yogon didi idi bun ile, daū feidlauf anidi nigin molol bunem loloum fedi di, sain meluk ibodon ouf are, ada ere tauf? ²³ Negur ī idi fula fiya medeīya dalouf nigin dodok fe fen, yogon wau yūya ifenēdiyof anidi bun, yogon fula fiya medeīya barikã anī yaor fiya nigineg wau iron ouf are, ada ere tauf? ²⁴ Ada buneg Negur iweignadan, Juda temeleid dogol sã, haiden buneg. ²⁵ Are Hosia nē itotoya buneg Negur wogō yef kilei,

“Aya idi neu tamo kayau sã anidi, neu tamo kayau auf,
age afe fen, aya neu oboiyou sã anī,
neu oboiyou auf,”§

²⁶ takag,

“Negur ‘Ā neu tamo kayau sã’ yen nē modoū anī bun,
idi anī ‘Negur mata ibodōya nē gere tar’ youf.”*

²⁷ Asaia Israel nigin iweig iron,
“Israel tamo kayau maaī ubun mumul gen musei bagai,
anī ere, musei sã dogol kel gei fediyouf.

²⁸ Ere nigin, Odug ī teneub bun,
yogon tamo kayau es fediyouf nē od ganān kaisã bagai dōf agef kisi falauf.”†

²⁹ Are Asaia mogo iron kilei,
“Odug saa ilun nē kusī tamo guri feid uyu iroudig anī,
neda ibor nē tubu tar tunī to itornēdim are,

ada Sodom gen wō taum,

* 9:7: Jenesis 21:12 † 9:9: Jenesis 18:10, 14 ‡ 9:12: Jenesis 25:23 § 9:13: Malakai 1:2, 3 * 9:15: Eksodas 33:19 † 9:17: Eksodas 9:16 ‡ 9:20: Asaia 29:16; 45:9 § 9:25: Hosia 2:23 * 9:26: Hosia 1:10 † 9:28: Asaia 10:22, 23 ‡ 9:29: Asaia 1:9

ada Gomora gen tabodom.”†

Israel Tamo Kayau Momoiya Sã

³⁰ Anĩ nigin, ada ere taur? Haiden idi madur bagai anĩ to dimiren anidi, momoiya bunem madur bagai anĩ dalen. ³¹ Anĩ ere, Israel idi madur bagai nẽ lo dõ difen, idi madur bagai anĩ yaleya sã. ³² Ere nigin yaleya sã? Idi Negur nigin momoiya bunem dõ fiya sã, anĩ ere, lo dõ fiya bunem, Negur mala bun madur bagai dalouf nigin age difen nigin. Idi ye tũ fiya nẽ meein anim yeid tũ fen. ³³ Are Negur nẽ Itotoya bun ibodok kilei, “Lo weleg, aya Saion oun tamo yeid tũ fiya nigin meein taka, idi kubũ douf nigin sa tuwa taka anof, age afe di, taka ã, ã nigin momoi youf, ã mama to bagai yalouf.”§

10

¹ Turau tar, aya Negur ã Israel kel gei fediyouf nigin wau iro ken, Negur bun kosẽ audig. ² Aya idi nigin kurõ afeis eig auf, idi Negur nigin kisi total dinodig, anĩ ere, idi neid kisi total are keleĩ bunem sã. ³ Ere nigin, idi madur bagai Negur bunem isif anĩ to kelei ken, dogo neid madur bagai anĩ dalouf nigin dimiren, age dife fen, idi, Negur tamo kayau yogon mala bun madur bagai inenẽdiya nẽ naab anĩ ditoron. ⁴ Kristus ã, idi momoi def ganan madur bagai wowã douf nigin, lo nẽ idikeleya wõ yen.

⁵ Moses ã madur bagai lo ganan dõ fiya bunem isif nigin eig ye itoton, “Tamo ã lo enei dõ fef, ã anĩ bunem mata ibodõf.”* ⁶ Anĩ ere, madur bagai momoiya bunem isif anĩ eig ye irok, “Õ waũ bun to eig wo urõf, ‘Aim anĩ saa ilun iselauf?’† ” (are, Kristus irou isiyouf nigin) ⁷ “oo ‘Aim anĩ teneub kur bagai isilauf?’† ” (are, tamo gare den bun tamal Kristus irou isauf nigin). ⁸ Anĩ ere, ã ere ye irok? “Od anĩ õ wagen ibodok, are ogon sigor bun, ogon waũ bun ibodok,”§ are momoiya nẽ od amã wogõ maudig anĩ. ⁹ Are õ ogon

sigorom, “Jesus ã Odug,” wo fen, õ waũ bun, Negur ã Jesus tamo gare den bun tamal kel turĩ fiyen anĩ, momoi wouf are, õ kel yaleyõf. ¹⁰ Are, taka ã wau bun momoi ye di, Negur ã madur bagai yef, age fe di, taka ã sigorom momoi auf ye di, Negurem ã kel yalouf. ¹¹ Are Negur nẽ Itotoya bun ibodok kilei, “Taka ã, ã nigin momoi youf, ã mama to bagai yalouf.”* ¹² Juda ado haiden bun fire fire sã, Odug de tekelei anĩ ganan nẽ Odug, ã idi diweignek ganan bun el fiya fatuk bagai ifenẽdidig, ¹³ are Negur nẽ Itotoya bun ibodok kilei, “Idi Odug nẽ yana dale diweignek ganan, Negurem kel gei fediyouf.”†

¹⁴ Age fiyauf are, naig fe di, idi ã nigin to momoi den ani diweignẽf? Naig de fen, idi to karĩ den anĩ nigin momoi douf? Taka nem to irokenẽdiyof are, naig de fen, idi karĩ douf? ¹⁵ Idi to sur fediyouf are, idi naig de fen, od wogõ douf? Are Negur nẽ Itotoya bun ibodok kilei, “Idi biya od diroulef anidi, yeid gai meli bagai!”†

¹⁶ Anĩ ere, Israel tunĩ biya od anĩ to dalen. Idi age difen nigin, Asaia eig ye iron, “Odug, aim anĩ nemã od nigin momoi yen?”§ ¹⁷ Anĩ nigin, momoiya anĩ biya od karĩya bunem isidig, biya od karĩya are Kristus nẽ od bunem isidig. ¹⁸ Anĩ ere, aya to afe; Idi to karĩ dedig de? Momo, idi karĩ den, are Negur nẽ Itotoya bun ibodok kilei,

“Neu arũ tamo neid aiteid, teneub ganan bun iyokelen, dogo neid od teneub idikeleya bun ilen.”*

¹⁹ Baban aya to afe: Israel idi to kelein de? Uruwa bun, Negur Moses bunem iron, “Aya tamo kayau yeneid sã idi bun age afe di, idi nigin ã kiyeĩ unogouf.

Aya tamo kayau keleĩ sã idi bun age afe di, idi nigin ã nameĩ saneuf.”†

²⁰ Takag, Asaia kukĩya sã eig ye iron,

“Idi aya to dimirnan, aya dileyauf.

Idi aya nigin to fiya san anidi bun, aya yug yaor afouf.”†

§ 9:33: Asaia 8:14; 28:16 * 10:5: Levitikas 18:5 † 10:6: Diuteronomi 30:12 † 10:7: Diuteronomi 30:13
 § 10:8: Diuteronomi 30:14 * 10:11: Asaia 28:16 † 10:13: Joel 2:32 † 10:15: Asaia 52:7 § 10:16: Asaia 53:1 * 10:18: Sam 19:4 † 10:19: Diuteronomi 32:21 † 10:20: Asaia 65:1

²¹ Anĩ ere, Israel nigin ã eig ye iron,
 “Naa tekelei adok, aya tamo kayau dõ fiya
 sã, fe temeleid bun
 imau dõ au fen, tari afedif abodon.”§

11

Israel Idi Atun Musei Sã Dogol

¹ Age fiyauf are, aya to afef: Negur ã yagon tamo kayau aulel fedin de? Sã bagai! Aya yug Israel temelou, Abraham nẽ ibor, Benjamin nẽ gĩ bun temelou. ² Negur ã, yagon tamo kayau, ã mogo gariya bunem kelei ken igirnẽdin anidi to aulel fedin. Ereb Negur nẽ Itotoya bun Eliya nigin irok, are ã Negur ado, Israel idi nigin bou yũya od wogõ den anĩ, ã to keleĩ de?

³ “Odug, idi mogo ogon profet didenkeis fen, ogon alta narĩ difedin. Aya mugu dogol ditorna fen, idi aya dinakesiyouf nigin age difef.”* ⁴ Age ye di, Negur ere od solof irokenen? “Aya, aya yug nigin sewen tausen tamo idi idegẽya waitou Bal bun to iboreid bobou difen anidi, foi afen.”†

⁵ Age fiya gen, sain enei buneg, Negur wau ifenẽya bunem musei sã igirnẽdin anidi fau dibodok. ⁶ Igirĩya anĩ, Negur nẽ wau ifenẽya bunem isin, are tamo nẽ kabĩ bunem sã. Igirĩya anĩ tamo nẽ kabĩ bunem isin ouf are, Negur nẽ wau ifenẽya anĩ, wau ifenẽya sa ken, mala ifenẽya yenem.

⁷ Anĩ nigin, ada ere tauf? Ereb Israel idi kabĩ total dale fen, dimiren anĩ, idi to dalen, anĩ ere, Israel tunĩ musei sã Negur igirnẽdin anidim dogol dalen. Israel tunĩ ganan Negur waud ifofakelen. ⁸ Are Negur nẽ Itotoya bun ibodok kilei,

“Negur, idi kisi kurã fiya sã nẽ uur,
 meleid to dilouf nẽ ado,
 wedereid to karĩ douf nẽ anĩ ifenẽdin,
 anĩ bunem isi gama naa enei bun.”‡

⁹ Takag, Dawid eig ye iron,
 “Neu kiwai tar, idi neid sifa nẽ tebol bun,
 saaf dokon waud kulĩ yen sain bun,
 idi suk bun gei difediyouf, idi kor
 bun gei difediyouf, idi neid el fiyam,
 dogo yeid tũ difouf nigin ado, mala
 solo fiya nẽ darau, idi bun wõ youf
 nigin aya orouf.

¹⁰ Dogo neid meleid gugum kele fen, to dilouf, dogo neid bagiyeid gai gai nigin fe fesilauf anĩ orouf.”§

Aa Taka Nẽ Were Aa Taka Bun Inoya

¹¹ Age fiyauf are, aya to afef: Idi yeid tũ fe di, kubũ de fen, baban fãya kisi feleya sã de? Sã bagai! Anĩ fotokar, idi neid mosor nigin, kel gei fiya are haiden bun isin, are Israel idi kiyeĩ dinouf nigin age fen. ¹² Anĩ ere, idi neid mosor nigin tenebur tamo kayau bun el fiya kisi feleya bagai wõ ye fen, idi neid kũ fenẽya nigin haiden bun el fiya kisi feleya bagai wõ youf are, idi neid gire fiya anim naig fiya el fiya kisi feleya bagai irousiyouf!

¹³ Aya ã haiden bun wogõ auf. Aya haiden bun aposel nigin, aya neu kabĩ nigin fatuk bagai yanau alesef, ¹⁴ are aya neu Israel tamo kayau turĩ afeid, idi kiyeĩ dinouf bun, idi tunĩ kel gei afouf nigin age afef. ¹⁵ Negur idi aulel fedin bunem, tenebur tamo kayau idi Negur geid komo fiya dalen ouf are, sain Negur idi yalediyouf bun, ere anĩ wõ youf? Are idi tamo kayau ganan gare den bun tamal mata kel fã den gen ouf. ¹⁶ Wit uyulil faat yun anĩ bunem sesewi fiya nẽ bret dinof, anĩ nẽ masak fateul ouf are, bret ganang fateul. Warumutei anĩ fateul ouf are, were ganang fateul.

¹⁷ Were tunĩ kokour fele fen, õ oliv aa kuĩ nẽ were, oliv aa bun bagu yõ di, oliv aa nẽ warumutei bun saaf tekelei waledig, ¹⁸ anĩ nigin, Israel idi bun, õ haiden yanã to wales. Õ yanã walesauf are, enei kisi wo: Õ warumutei to usennek, anĩ ere, warumutei anĩ õ isennok. ¹⁹ Anĩ ere, õ eig wo urõf, “Aya aa anĩ bun bagu fiyauf nigin were kokour feledin.” ²⁰ Are momoi. Anĩ ere, idi momoiya sã nigin kokour feledin, age fe di, õ momoiya bunem ufaref. Õ yanã to wales, anĩ ere, õ kumĩ wouf. ²¹ Ere nigin, Negur ã Israel idi oliv aa nẽ were bagai yalelnẽdiyof nigin to katũ yen ouf are, ã õ nigineg to katũ youf.

²² Anĩ nigin, Negur nẽ molol ado wau itenẽya nigin kisi gouf, ã idi kubũ den anidi

§ 10:21: Asaia 65:2 * 11:3: 1 King 19:10, 14 † 11:4: 1 King 19:18 ‡ 11:8: Diuteronomi 29:4; Asaia 29:10
 § 11:10: Sam 69:22, 23

bun wau itenen, anī ere, ā in molol bun toku ubodōgouf are, ī ā bun molol ibodōf. Anī ere, ā in molol bun to ubodōgouf are, āg kokour yeikalauf. ²³ Israel idi momoiya sã bun toku to dibodōf are, idi baban aa oliv bun bagu fediyouf, ere nigin, Negur ī baban idi bagu fediya nigin kisi feleya. ²⁴ Ō ogon gariya oliv aa kuī bagai bun tamal kokour fele fen, ogon gariya sã oliv aa bagai kulatun fedig anī bun bagu yon ouf are, oliv aa bagai nē were eneidi, naig fiya karika bagai dogo neid oliv aa bagai bun bagu fediyouf!

Israel Ganan Kel Gei Fediyouf

²⁵ Turau tar, aya waa enei ā to keleī youf nigin to orouf, are ā aug nigin keleī biya ado to gouf nigin age afef. Waa are, Negurem Israel tunī waud ifofakelen, anī bunem idi dibodok disi mog, haiden idi Negurem igirnēdin anidi ganan Negur wagen disiyouf sain anī bun. ²⁶ Age dife di, Israel ganan kel gei fediyouf, are Negur nē Itotoya bun ibodok kilei,

“Kel yaleya tamo Saion bun tamal isiyouf, ī Jakob bun tamal Negur nē od dō fiya sã nē tobonunā anī yalelauf.

²⁷ Aya, idi geid bar itenēya nē enei atenēf, anī bunem aya dogo neid mosor alelauf.”*

²⁸ Biya od nigin, idi ā nigin kiwai, anī ere, Negur nē igirīya nigin, idi tubuid tar nigin, Negur idi nigin wau laa fedig, ²⁹ ere nigin, Negur nē ege luwa ado yogon igirīya anī falei fiya kisi feleya sã. ³⁰ Ā uruwa bun Negur dō fiya sã, anī ere, ā gama, Israel Negur dō fiya sã nigin, Negur nē wau yūya walegen. ³¹ Age fiya gen, idig gama Negur dō fiya sã, are Negur nē wau yūya ā ifenein anī bunem, idig gama Negur nē wau yūya dalouf nigin age fen. ³² Age fiya nigin, Negur ī tamo ganan, dō fiya sã nē kafī fiya bun inenēdin, are ī idi ganan wau yūya ifenēdiyof nigin age fen.

Negur Yana Yaleseya Nē Od

³³ O Negur nē kisi biya ado keleī biya, are kisi feleya bagai ilon bagai isilef.

Yogon es fiya anī imir ken, keleīya kisi feleya sã,
yogon delē iyōdig anī dir feleya kisi feleya sã.

³⁴ Are Negur nē Itotoya eig ye irok, “Aim anī Odug nē kisi kelein?”†

Aim anī ī ulum iroukenen?”†

³⁵ “Aim anī Negur ifenen nigin Negur ī aba kel ifenēf?”‡

³⁶ Ada keleī, od enei are momoi, ere nigin, ereb ereb ganan ī bun tamal isif, ereb ereb ganan ī bunem ibodok, ereb ereb ganan ī bun ilef.

Ī bun fula fiya medeīya faimud ibodōf! Momoi.

12

Mata Ibodōya Nē Sesewi Fiya

¹ Anī nigin, turau tar, aya, ā, Negur nē wau yūya ada ifanadan bunem totol bagai arokeneik, āgenei bouweī, mata ibodōya nē sesewi fiya, fateul ado Negur wau kulīya nē anī gen Negur wenēgouf. Enei anī, āgenei uurem Negur yana yaleseya.

² Tenebur enei nē oroya baban to dōg, anī ere, Negur āgenei kisi falei fe mata inoyeī di, āgenei kisi mata anī dō gouf, anī bunem, ā Negur nē oroya, are yogon biya nē, kulīya nē ado, kisi feleya nē oroya anī keleī youf.

³ Negur nē wau ifenēya bunem, aposel kabī yaleya nē yana aya ifanan nigin, aya ā ganan arokeneik: Taka ī yogo nigin kisi fouf anī to wal fe fen, kisi fouf, anī ere, momoiya Negur ifenen anī kilei, es fiya biya bun yogo nigin kisi fouf. ⁴ Ada bouwada tekelei bun fara fiya musei ado, anī ere, fara fiya ganan bun kabī tekelei sã, ⁵ age fiya gen, ada fara fiya musei, anī ere, Kristus bun, bouwada tekelei, fara fiya mugu mugu tunī ganan geid bagu fedif. ⁶ Negur wau ifenēya ada ifanadan kilei, ada Negur nē igirīya ege luwa fire fire ado. Tamo ī profet od wogōya nē igirīya ege luwa adouf, utornēg len, ī yogon momoiya kilei wogō youf. ⁷ Ī aruna yaleya nē igirīya ege luwa adouf, utornēg len, ī aruna yalouf. Ī ifelnēya nē igirīya

* 11:27: Asaia 59:20, 21; 27:9; Jeremaia 31:33, 34 † 11:34: Asaia 40:13 ‡ 11:35: Job 41:11

ege luwa adouf, utornëg len, ï ifelnëya kabï yalouf. ⁸ Ï wau yaleseya në igiriya ege luwa adouf, utornëg len, ï taka në wau yalesauf. Ï tunï lau fiya isennëya në igiriya ege luwa adouf, utornëg len, ï wau sã ifenëdiyof. Ï uyu irouya në igiriya ege luwa adouf, utornëg len, ï fõ fiya sã uyu irouya kabï yalouf. Ï wau yüya ifelnëya në igiriya ege luwa adouf, utornëg len, ï wau kulïya ado age foug.

Wau Laa Fiya

⁹ Wau laa fiya are mala yaleya sã. Ereb sane anï seseg fen, ereb biya anï kafï weleg. ¹⁰ Æ abob bun tureï tar bagai nigin gen, wauï laa fiya bun wauï wenëgouf. Æ atun abob yana ketem ilun walesagouf. ¹¹ Æ to fõ yei ken, kabï total waleg. Ægenei uur në total bunem, Odug aruna walogouf. ¹² Wau iseya bun wauï kulï youf, morõ bun megeir ufaragouf, toku kosë gouf. ¹³ Negur në tamo kayau lau difef anidi wenëdigouf. Tamo urug waledigouf. ¹⁴ Idi ã darau difeneik anidi el fiya wenëdigouf, el fiya wenëdig fen, to usisnëdigouf. ¹⁵ Idi waud kulï yef geid kulï gouf, idi inã dalef geid inã walogouf. ¹⁶ Æ abob nigin wauï tekelei yenëf. Æ yeneï to walesagouf, anï ere, ã tenebur difaref geid nigal yüya nigin ago gouf. Æ aug nigin keleï biya ado to gouf.

¹⁷ Æ aib taka sane age yeik anï, aba sane to wiyëgouf. Tamo ganan meleid bun ereb madur age fiya nigin karï walagouf. ¹⁸ Æ kisi feleyauf are, ganan geid wau inosiya bun ubodögouf. ¹⁹ Neu oboiyou tar, ã aug mala solo to wenëdigouf, anï ere, Negur në didi nigin modoũ unogouf, ere nigin, Negur në Itotoya bun eig ya ibodok, “Odug irok, mala solo ifenëya are neu. Ayam mala solo afenëf.”* ²⁰ Age fiya ban, Negur në Itotoya bun eig ya ibodok, “Ogon kiwai naũ foug are, saaf wenë yãf, ï naan ail foug are, naan wenë yãf. Anï agouf bun, ï yogon ereb sane age fen nigin mama sane falauf.”†

²¹ Æ sane anim to wal yeïf, anï ere, ãgem biya bunem sane anï wal gouf.

13

Gawaman Farumen Ibodöya

¹ Tamo kayau ganan gawaman farumedin dibodöf, ere nigin, gawaman Negurem to inodin anï taka to ibodok. Gawaman gama dibodok are Negur yogo inodin. ² Anï nigin, taka ï gawaman kiwai ifenek, ï ereb Negurem inon anï kiwai ifenek. Idi anï age difef, idi es fiya dogo bouweid bun dinouf. ³ Ere nigin, uyu irouya tamo, idi biya age difef anidi kumï to difiyëdidig, anï ere, idi sane age difef anidi kumï difiyëdidig. Uyu irouya ï õ to kumï ifonöf anï, õ oroyok de? Agouf are, ereb tobonunã biya anï ago wo di, ï õ yanã yalesauf. ⁴ Ere nigin, ï ogon biya fiya nigin Negur në kabï tamo inenen. Anï ere, sane ago wouf, õ kumï wouf, ere nigin, ï dimig ege to irouf. Ï Negur në kabï tamo, ï mala ifenëya tamo, idi sane age difef anidi bun Negur në didi irou isif. ⁵ Anï nigin, ã gawaman farumen bagai ubodögouf, are darau kumïya bunem dogol sã, Negur mala bun ada biya be sane es fiya në kisi nigin ago gouf. ⁶ Anï nigin, ã takiseg unogedig, ere nigin, gawaman në kabï tamo are Negur në kabï tamo, idi dogo neid sain ganan gawaman kabï nigin difenëdig. ⁷ Æ ereb ganan ifenëya nigin yenek are wenëgouf, ã takis ifenëya nigin ouf, takis unogouf, ã safina yaleya në takis ifenëya nigin ouf, safina yaleya në takis unogouf, ã anini fiyëya nigin ouf, anini wiyëgouf, ã seli yabiya nigin ouf, seli wabigouf.

Abob Nigin Wauï Laaf, Naa Mogo Dodolef

⁸ Wareg taka to utoröge di, ibodöf, abob nigin wauï laa fiya në wareg dogol ã atun ibodöf, ere nigin, taka ï ne tã nigin wau laa fef, ï lo döf kisi felef. ⁹ Ïtäfiya eig ye irok, “Seseirã to uno,” “Tamo to ukeis,” “Bë to ule,” “Taka në safina to malã ile orouf,”* Ïtäfiya eneidi ado ereb lo tunï ifaredif are,

* 12:19: Diuteronomi 32:35 † 12:20: Proverb 25:21, 22 * 13:9: Eksodas 20:13-15, 17; Diuteronomi 5:17-19, 21

ĩtãfiya tekelei eneim ganã irouf, “Õ ogo nigin waũ laa fef gen, nẽ tã nigin ago waũ laa foug.”† ¹⁰ Wau laa fiya anim, ne tã bun sane to age fedig. Anĩ nigin, wau laa fiya are lo dõf kisi felef.

¹¹ Anĩ nigin, sain enei nigin wedereĩ fokõf fen, enei ago gouf. ã mulaĩ itorõya nẽ sain mogo isif, ere nigin, ada uruwa bun momoi taun bunem isi, gama ada neda kel gei fadaya nẽ sain anĩ melsak. ¹² Bõ are mogo sa kalau fenẽ, naa mogo wõ you fenẽ. Anĩ nigin, ada gugum nẽ tobonunã tator, yerin gadi tafel fen, lalan nẽ tobonunã biya anĩ dõ tafouf. Age tafe fen, ada, kusĩ nigin kusĩ nẽ naki total difonũdig gen, tobonunã biya anĩ, ada bun ibodõf nigin age tafouf. ¹³ Tamo kayau we feleyan lo difeid le di, tobonunã biya age difedig gen, ada tobonunã biya dõ tafouf, bilãya ado naan yõya bun sã, noli tobonunã ado bouwa nẽ oroya nigin total sane wau fãya bun sã, kusĩ ado kiyeĩ buneg sã. ¹⁴ Anĩ ere, Odug Jesus Kristus anĩ waleg, aug bun ufonũgouf, agog fen, bouwa nẽ oroya dõ fiya nẽ kisi anĩ bun to ufaragouf.

14

Momoiya Felu Reya Ado Momoiya Total

¹ Taka ã momoiya felu ref are waleg fen, yogon keleĩ ã geid tekelei sã nigin to monẽ wiyẽgouf. ² Tamo taka in momoiya anim irõ di, ã ereb ereb ganã yõya nigin age fedig, anĩ ere, tamo taka in momoiya felu reya, ã sako dogol yõdig. ³ Tamo ereb ereb ganã yõdig anim, ne tã sako dogol yõdig to kono fiyẽf, age fe di, tamo ereb ereb ganã to yõdig anim, tamo ereb ereb ganã yõdig bou bun od to yũf, ere nigin, Negur ã yalen. ⁴ Õ ai anĩ taka nẽ kabĩ tamo es wof? ã kubũ be youf, ifar bẽf, are yogon Odug bun ibodok. Anĩ nigin, ã ifarauf, ere nigin, Odug ã yogo, ã ifareya nigin age fiya kisi feleya.

⁵ Tamo taka ã, naa taka anĩ naa ganã wal fiya gen iledig. Tamo taka naa ganã are de kilei kilei iledig. Idi mugu mugu dogo neid kisi bun anĩ nigin waud ditenẽf.

⁶ Taka ã naa taka anĩ odug gen ilef, Odug nigin ye fen, ã age fef. Age fiya gen, taka ã yaro muda yoko, Odug nigin ye fen, yoko, ere nigin, ã Negur de fiyek. Taka ã ereb ereb tunĩ yõya nigin itorok, ã Odug nigin ye fen, agef fen, Negur de fiyek. ⁷ Ere nigin, ada takam yogo nigin mata to ibodok, ada takam yogo nigin to laa fef. ⁸ Ada mata tabodok are, ada Odug nigin mata tabodok. Ada gare tauf are, ada Odug nigin gare tauf. Anĩ nigin, ada mata tabodok be, gare taufeg, ada Odug nẽ.

⁹ Gariya enei nigin, Kristus laaf fen, mata kel fã yen, are ã tamo gare den ado tamo mata dibodok neid Odug ibodõf nigin age fen. ¹⁰ Age fiyauf are, õ ere nigin ogon turã es wiyek? Õ ere nigin ogon turã kono wiyek? Ada ganã Negur nẽ es fiya nẽ sia wagen tafarauf. ¹¹ Age fiya nigin, Negur nẽ Itotoya eig ya ibodok,

“Odug irok, aya momoi bagai mata abodok nigin,

iboreid ganã aya bun bobou difouf, baleid ganã kurõ difeis, Negur yana dalesauf.”*

¹² Age fiya nigin, ada mugu mugu, ada dug nigin Negur kurõ tafeis tarokenẽf.

¹³ Anĩ nigin, ada abob es fiyẽya tatorõf. Anĩ ban, ã tureĩ nẽ naab bun ereb naabura gudũf kenẽya nẽ taka be, ye tũf kenẽya nẽ taka to unogouf nigin lo walagouf. ¹⁴ Odug Jesus kisi fokõ fel kana di, aya momoi bagai kisi afef, are saaf, Negur mala bun amuyẽ ado taka to ibodok. Anĩ ere, taka ã saaf taka amuyẽ ado youf are, ã yogo bun saaf anĩ amuyẽ ado. ¹⁵ Ereb õ woko anĩ bunem ogon turã ã wau morõ wenẽf are, õ waũ laa fiya bunem to agof. Ereb õ woko anĩ bunem, turã Kristus ã nigin laa fen anĩ to daũ wiyẽ. ¹⁶ Anĩ nigin, ereb ã biya gef anĩ, tamo kayau idi to sane douf nigin ago gouf. ¹⁷ Ere nigin, Negur nẽ tano are, saaf yõya ado naan yõya nẽ sã, anĩ ere, Awa Uur Fateul bun madur bagai, wau inosiya ado, kulĩya nẽ. ¹⁸ Taka ã naab enei bunem Kristus aruna yalef, ã Negur wau kulĩya ifenẽ di, tamo dile fen, biya douf.

† 13:9: Levitikas 19:18 * 14:11: Asaia 45:23

¹⁹ Anĩ nigin, ada ereb maror inoya nigin ado abob yalesnēya nigin, kabĩ total talouf. ²⁰ Saaf bunem Negur nē kabĩ to daũ gouf. Saaf ganan amuyē sã, anĩ ere, tamo ĩ saaf yōya bunem, ne tã, Negur nigin momoiya nē naab dōf mog ye isog yale di, kubũ youf, are sane. ²¹ Ō, nē turã kubũya nigin yaro to wãf be, aai to wãf be, ereb takag to agouf, are biyauf.

²² Anĩ nigin, ereb ereb enei bun ogon momoiya naig be fe yenēf, are ō ogo ado Negur bun dogol ibodōf. Tamo ĩ, ereb ĩ momoi bagai kisi fen biya yef anĩ, age fef bun, ĩ yogo bou bun od to yuk are, Negur ĩ el fiyek. ²³ Anĩ ere, tamo ĩ kisi toguf fen, saaf yoko, ĩ yogo bou bun od yuk, ere nigin, yogon saaf yōya are momoiya bunem sã. Ereb ereb ganan momoiya bunem isiya sã, are mosor.

15

¹ Ada momoiya total ado, idi momoiya total sã neid morō faali tafouf. Ada dug wauda al fouf nigin to age tafouf. ² Ada mugu mugu, neda tã tar, idi neid biya fiya nigin ado idi yalesnēdiyof nigin, wau al fiya tafenēdiyof. ³ Ere nigin, Kristus ĩ yogog yogo wau al fouf nigin to age fen, are Negur nē Itotoya eig ye irok kilei, “Idi ō kono diyon anidi neid kono fiya, aya bun isin.”* ⁴ Ereb ereb ganan kulu ditoton are, ada ifelnadauf nigin ditoton, are morō bun feseya sã ifareya bunem ado wau yaleseya Negur nē Itotoya ani ifanadaf anĩ bunem, ada wauda iseya adouf nigin age difen.

⁵ Negur, morō bun feseya sã ifareya ado wau yaleseya ifeneĩdig ĩ, ã Kristus Jesus dōg mog, ã atun wau tekelei nē uur ifeneĩf nigin aya orouf, ⁶ anĩ bun, wauĩ tekelei ado sigoreĩ tekelei bunem, ã Negur, neda Odug Jesus Kristus nē Tama fula fiya medeĩya wenēgouf.

⁷ Anĩ nigin, Negur yana fula fiya medeĩya bun iselauf nigin, Kristus ã yaleyeyin gen, ãg abob walogouf. ⁸ Aya ã arokeneik, Kristus ĩ, Juda neid kabĩ tamo wō yen, are Negur tubuda tar bun

age afouf yen anĩ kilei bagai, Negur age fouf anĩ, megeir fe ifelnēdiyof nigin ado, ⁹ haiden idi Negur nē wau yūya nigin, Negur fula fiya medeĩya difenēf nigin age fen, are Negur nē Itotoya bun ibodok kilei, “Anĩ nigin, aya haiden atun ō yanã alesauf, aya ō yanã bun seg alouf.”†

¹⁰ Baban ĩ irok, “O haiden ã, in tamo kayau geid wauĩ kulĩ ye.”‡

¹¹ Baban, “Haiden ã ganan, Odug yana waleseg! Tamo kayau ã ganan, ĩ yana waleseg fen, seg waleg!”§

¹² Baban, Asaia iron, “Jesi nē warumutei bun bali mata fokũ youf, ĩ wō ye fen, teneub ganan nē mudur ibodōf,

haiden idi ĩ nigin waud isauf.”*

¹³ Wau iseya nē Negur, ã Negur momoi wiyēg mog, wau kulĩya ado wau inosiya ganan, ã namein fi fele di, ise isokosauf, anĩ bunem, ã bun Awa Uur Fateul nē megeir bunem wauĩ iseya gogũ fouf nigin aya orouf.

Pol, Haiden Atun Kabĩ Tamon

¹⁴ Neu turau tar, aya yug momoi auf, ã aug tobonunã biya barikã, keleĩ barika ken, abob ifelnēya nigin kisi feleya bagai.

¹⁵ Anĩ ere, wau ifenēya Negur aya ifanan anĩ nigin, aya ã gariya tunĩ baban wed-ereĩ fokō youf nigin total ado atotkenein,

¹⁶ wau ifenēya anĩ bunem, aya haiden bun Kristus Jesus nē kabĩ tamo wō au fen, pris gen Negur nē biya od wogō auf, are haiden idi, Negur mala bun sesewi fiya biya, Awa Uur Fateulem fateuledin, wowã douf nigin age afef.

¹⁷ Anĩ nigin, aya Kristus Jesus bun, neu kabĩ Negur bun aledig nigin yanau alesef.

¹⁸ Aya ereb taka to wogō au fen, ereb Kristus aya bunem age fen anĩ dogol wogō auf, are aya ereb aya wogō aun ado ereb aya age afen bunem, haiden idi uyu arou di, idi Negur sigor dō difef anĩ, wogō auf,

¹⁹ are aya Awa Uur nē megeir bunem, uris

* **15:3:** Sam 69:9 † **15:9:** 2 Samuel 22:50; Sam 18:49 ‡ **15:10:** Diuteronomi 32:43 § **15:11:** Sam 117:1

* **15:12:** Asaia 11:10

ado memelik nē megeir bun age afen. Anī nigin, aya Jerusalem anenem gariya ano fen, tokō afel, Ilirikum provins ayo kele fen, Kristus nē biya od kisi feleya bagai yaor afen. ²⁰ Aya, idi Kristus keleī sā anidi bun, an biya od wogō auf nigin, faimud kisi total aledig, are aya takam gariya inon anī bun, kabī to alouf nigin age afedig.

²¹ Are Negur nē Itotoya bun ibodok kilei, “Idi ī nigin to karī den are dilouf, agef fen, idi to karī den are keleī youf.”†

²² Aya biya od modoū age fediyān wogōya nigin sain musei aledig anim, aya ā gein isiya nigin sain musei naaburau gudū fedig.

Pol Rom Taun Ki Ileya Nigin Kisi Fen

²³ Anī ere, gama aya kabī yaleya nigin, akor enei bun modoū taka sa ken, aya yar musei ā gein isiya nigin kisi total aledig nigin, ²⁴ aya Spein alauf bun asi fen, ailiyeīf nigin kisi afen. Aya ileya bunem ki ayei ken, aya ā geid sain naal uyu kū ta tabod ken, ā neu delē nigin usennagauf nigin wau isef. ²⁵ Anī ere, gama aya Negur nē tamo kayau aruneid yaleya nigin Jerusalem elef. ²⁶ Ere nigin, Masedonia provins nē sios ado Akaia provins nē sios idi, Jerusalem oun Negur nē tamo kayau atun maleg anidi isennēdiya nigin waud al fen. ²⁷ Idi age fiya nigin waud al fen, momoi bagai idi, Juda idi bun wareg ado. Ere nigin, haiden idi, Juda idi neid uur nē el fiya dalen nigin, haiden idi Juda idi bun safina nē el fiya bunem wareg dūf. ²⁸ Anī nigin, aya kabī enei bure afel fen, idi isennēya enei dalen anī ail fen, Spein ileya nigin asi fen, ki ayeīf. ²⁹ Aya keleī, sain aya ā gein asiyouf bun, aya Kristus nē el fiya barikā ado asiyouf.

³⁰ Turau tar, neda Odug Jesus Kristus bunem ado Awa Uur nē wau laa fiya bunem, aya ā total bagai arokeneik, ā, neu kabī nē morō bun, aya nigin Negur kosē wiyēgouf bunem usennagauf. ³¹ Aya Judia teneub bun momoiya sā imedin tamal yalelna di, neu kabī Jerusalem oun Negur

nē tamo kayau an anidim dirouwauf nigin kosē gouf, ³² ago ge di, aya Negur nē oroya bunem kulīya ado ā gein asi fen, aya ā geid si tano fen, megeir alouf. ³³ Wau inosiya nē Negur ā ganān bun ibodōf. Momoi.

16

Pol Nē Aanya

¹ Aya nemā mainamā Foibe, Senkria taun nē sios neid kabī kayau biya ya anī, ā keleī youf nigin arokeneik. ² Ā Negur nē tamo kayau ago wiyēdigedig gen, ī Odug bun waleg fen, ī ā bun ereb lau fef anī usennēgouf, ere nigin, ī tamo kayau musei isenneīd fen, ayag isennan.

³ Kristus Jesus bun, neu kabī turau tar, Prisila Akwila ado, neu aanya wenēdigouf. ⁴ Idi aya nigin laa uyu ditoron. Aya dogol sā, haiden neid sios ganāneg idi de difiyēdif.

⁵ Sios idi neid fō bun guru difedig anidig, neu aanya wenēdigouf.

Neu oboiyou Epenetus, Asia provins bun Kristus nigin ī ketem momoiya tamo wō yen anī, neu aanya wenēgouf.

⁶ Maria ā nigin kabī total yalen anī, neu aanya wenēgouf.

⁷ Neu sirag tar, Andronikus ado Junia* idi aya geid kalabus bun mabodon anidi, neu aanya wenēdigouf. Aposel atun idi ilun bagai difaref, aya momoiya sā mog, idi ketem Kristus nigin momoi den.

⁸ Ampliatus, Odug bun neu oboiyou, neu aanya wenēgouf.

⁹ Urbanus, Kristus bun neda kabī turada ado, neu oboiyou Stakis, neu aanya wenēdigouf.

¹⁰ Apeles ī nigin Kristus bun, tamo kayau biya difiyēdig anī, neu aanya wenēgouf.

Idi Aristobulus nē ibor anidi, neu aanya wenēdigouf.

¹¹ Herodion, neu sirag, neu aanya wenēgouf.

Idi Narsisus nē ibor Odug bun dibodok anidi, neu aanya wenēdigouf.

† **15:21:** Asaia 52:15 * **16:7:** Yana enī kayau nē yana. Itotoya tunī dum ditoton, are Junias den. Junias are tamo nē yana.

¹² Trifena ado Trifosa, kayau idi Odug bun kabī total daledig anidi, neu aanya wenēdigouf.

Neu oboiyou Persis, kayau taka Odug bun kabī total yaledig anī, neu aanya wenēgouf.

¹³ Rufus Odug bun igirnen ado, yogon sina, ĩg aya neu naai, neu aanya wenēdigouf.

¹⁴ Asinkritus, Flegon, Hermes, Patrobas, Hermas ado, turada tar idi geid difaref anidi, neu aanya wenēdigouf.

¹⁵ Filologus, Julia, Nereus ĩ main ado, Olimpas ado, Negur nē tamo kayau ganan idi geid difaref anidi, neu aanya wenēdigouf.

¹⁶ Abob fateul bunem umā wiyēg fen, aan wiyēgouf.

Kristus nē sios ganan ā bun aanya sur difef.

¹⁷ Turau tar, idi, ā Negur nigin keleī walegen anī, ditor ken, ā fara diyeyi ken, naabureī gudū difedig anidi lo walagauf nigin, aya ā total bagai arokeneik. Idi sese wedigouf. ¹⁸ Ere nigin, tamo age fediya are, neda Odug Kristus aruna to daledig, anī ere, idi dogo neid oroya aruna daledig. Od dan biya ado mala yaleya nē od bunem, idi tamo kisi sã gen anidi didegnēdidig. ¹⁹ Tamo ganan āgenei Negur nē od dō fiya biya anī karī den, anī nigin, aya ā nigin wau fatuk bagai kulī yef, anī ere, aya ā ereb biya nigin kisi biya waleg fen, sane nigin soso gouf anī orouf.

²⁰ Wau inosiya nē Negur, mogo melsã Satan ā yeī farumen orok fouf.

Neda Odug Jesus nē wau ifenēya ā bun ibodōf.

²¹ Timoti, neu kabī turau, yogon aanya ā bun sur fef. Neu sirag tar, Lusius, Jeson ado, Sosipater idig age difef.

²² Aya, Tertiussem pas enei atotof, Odug bun neu aanya ā bun sur afef.

²³ Gaius ĩ, aya ado ein sios ganan isennēdidig, yogon aanya ā bun sur fef.

Erastus ĩ taun nē moni lo fiya tamo ado, neda turada Kwartus, idi neid aanya ā bun sur difef.†

²⁵ Negur ĩ, neu biya od ado Jesus nigin wogōya anī bunem, ā yalesneīya kisi feleya. Biya od nē waa kulu bagai iminēyan ibodon, ²⁶ anī ere, Negur mata ibodkeleya anī, profet irokenēdi di, ditoton anī bun, kurō falaisi gama yaoren, are teneub ganan ĩ nigin momoi de fen, dō difouf nigin age fen. ²⁷ Negur ĩ yogo dogol kisi biya barikā, Kristus Jesus bunem fula fiya medeīya faimud ĩ bun ibodkalauf! Momoi.

† **16:23:** Itotoya tunī eig de ditoton: sur difef. ²⁴ Ada neda Odug Jesus Kristus nē wau ifenēya, ā ganan bun ibodōf. Momoi.

1 Korin

¹ Aya Pol, Negur nē oroyam Kristus Jesus nē aposel wō auf nigin iweignan, neda turada Sostenes ado,

² Korin oun Negur nē sios ā bun, pas enei matotkeneik. Ā Kristus Jesus bun fateuleī fen, fateul ubodōgouf nigin iweignein, are tamo kayau ganan fire firen difar fen, neda Odug Jesus Kristus, idi neid Odug ado neda Odug ĩ yana dalesedig anidi geid weim iweignein.

³ Negur neda Tamada ado Odug Jesus Kristus neid wau ifenēya ado wau inosiya, ā bun ibodōf.

Pol Negur De Fiyan

⁴ Aya wededem ā nigin Negur de afiyēdig, ere nigin, yogon wau ifenēya Kristus Jesus bun ā ifenein. ⁵ Ere nigin, Jesus bunem ereb ereb ganan bun, ā kisi feleya ifenein, are āgeneī wogō ganan ado keleī ganan bun, ⁶ ere nigin, Kristus nigin neda wogōya, ā bun megeir ifaren. ⁷ Anī nigin, ā neda Odug Jesus Kristus yaorouf nigin wauī fatuk unog fen, tarig mog, ā Awa Uur nē ege luwa taka to lau gef. ⁸ Jesus ā total irouyeik ile, idikeleya bun ilauf, anī bunem, neda Odug Jesus Kristus isiyouf nē naa bun, ā bouweī od sāf. ⁹ Negur ĩ, yogon Naal Jesus Kristus, neda Odug geid, ā nigal gouf nigin iweignein, ĩ ereb yef, de age foug bagai.

Sios Atun Fara Fiya

¹⁰ Turau tar, aya neda Odug Jesus Kristus yana bunem total bagai arokeneik, are ā atun fara fiya taka to ibodōf nigin, ā ganan abob nigin wauī tekelei yen ken, ā wauī ado kisi tekelei bagai ubodōgouf. ¹¹ Neu turau tar, tunī Kloe nē ibor bun tamal dirokanan, are ā atun luwa irouya ibodok. ¹² Aya enei wogō auf, are eig fiya, ā atun takam irok, “Aya Pol dō afef,” takam irok, “Aya Apolos dō afef,” takam irok, “Aya Pita dō afef,” takag irok, “Aya Kristus dō afef.”

* **1:19:** Asaia 29:14

¹³ Kristus ĩ fara furu fen de? Aya Pol ĩ, ā nigin aa tetek bun dun de? Ā aya Pol yanau bunem naan digunein de? ¹⁴ Aya Negur de afiyek, are aya ā taka to naan agunen, Krispus ado Gaius dogol naan agunēdin. ¹⁵ Anī nigin, taka nem to irōf, “Aya Pol yana nem naan agun.” ¹⁶ (Momoi, aya Stefanas nē ibor tareg naan agunēdin, anī teten, takag naan agunen be anī, to kisi afef.) ¹⁷ Ere nigin, Kristus ĩ aya naan agunēdiyof nigin to sur fiyan, anī ere, biya od wogō auf nigin sur fiyan, are Kristus nē aa tetek nē megeir to yalelauf nigin, tamo nē kisi biya wogōya anī bunem sā.

Kristus ĩ, Negur Nē Kisi Biya Ado Megeir

¹⁸ Jesus aa tetek bun laa fen ya od anī, idi inanakelediyof anidi bun are neneya, anī ere, ada isennadaf bun, od are Negur nē megeir. ¹⁹ Ere nigin, Negur nē Itotoya bun eig ye irok:

“Aya tamo kisi biya adodo neid kisi biya daū afalauf,
aya tamo keleī odug adodo neid keleī alelauf.”*

²⁰ Tamo kisi biya adodo nain? Tamo keleī odug adodo nain? Sain enei nē keleī yaleya nigin luwa irouya tamo nain? Negur ĩ tenebur enei nē kisi biya anī to neneya inon de? ²¹ Negur nē kisi biya bunem, tenebur tamo dogo neid kisi biya anim, Negur nigin to kelein, anī nigin, neneya od dedig anī wogō taudig bunem, idi momoi def anidi isennēdiya nigin, Negur wau al fen. ²² Juda idi memelik nē uris dilouf nigin dirōdig, Grik idi kisi biya anī dimirēdig. ²³ Anī ere, ada Kristus aa tetek bun dun anī wogō taudig, od anī Juda idi bun, ye tū fiya od, haiden idi bun, are neneya od, ²⁴ anī ere, idi Juda ado Grik Negurem iweignēdin anidi bun, Kristus ĩ Negur nē megeir, Negur nē kisi biya. ²⁵ Ere nigin, Negur nē neneya kisi are, tamo nē kisi biya wal fiya, Negur nē folo reya are, tamo nē megeir wal fiya.

²⁶ Turau tar, ā naig be fiya ufareg mog, ā iweignein anī kisi gouf. Ā musei sam, tamo nē keleī bunem, kisi biya ado wowā gen. Musei sam total ado wowā gen.

Musei sam yeneĩ ado wowã gen. ²⁷ Anĩ ere, Negur kisi biya adodo mama ifenēdiyof nigin, tenebur enei nē neneya igirnēdin. Negur ĩ megeir adodo mama ifenēdiyof nigin, tenebur enei nē folo reya igirnēdin. ²⁸ Negur ĩ tenebur enei nē yeneid sāsã, meleid irim lai difedig ado, ereb taka sã dedig anĩ igirnēdin, are ereb ado dedig anĩ, yana sa kalauf nigin age fen, ²⁹ anĩ bunem, Negur mala bun, taka nem yogo yana to yalesauf. ³⁰ Negur nigin ã Kristus Jesus bun ubodōgef, Jesus ĩ ada nigin Negur bunem kisi biya wō yen, are ada ĩ bunem madur bagai, fateul wowã tau fen, isennēya talen. ³¹ Anĩ nigin, Negur nē Itotoya bun eig ye irok, “Tamo ĩ yogo yana yalesef are, Odug ereb age fen anĩ nigin yana yalesauf.”†

2

¹ Turau tar, aya ã gein asi fen, Negur yaor afouf nigin wogō ayein sain bun, aya od biya odug nem be, kisi biya odug nem to wogō aun. ² Ere nigin, aya ã geid tabodon sain, aya ereb ereb ganan wederou tu kel fen, Jesus Kristus ado, ĩ aa tetek bun laa fen anĩ dogol kisi afouf nigin kisi afokelen. ³ Sain aya ã gein asin, aya totolou sã, fatuk bagai kumĩ tererē aun. ⁴ Neu od ado neu wogōya, are kisi biya nē, wauĩ faleiya nē od bunem sã, Awa Uur nē megeir nē ifelnēya bunem, ⁵ are āgenei momoiya, tamo nē kisi biya bun to ibodōf, Negur nē megeir bun ibodōf nigin age afen.

Awa Uur Nē Kisi Biya

⁶ Ada kisi biya nē od atīya anidi atun wogō taudig, anĩ ere, kisi biya anĩ, are sain enei nē sã, sain enei nē uyu irouya, fau inanakelediyof anidi neid sã. ⁷ Anĩ ere, ada, Negur nē waa kisi biya anĩ, wogō taudig, are iminēyan ibodok, teneub kare fiya sã mog Negur neda fula fiya medeīya nigin mogo igirin anĩ. ⁸ Sain enei nē uyu irouya takam, kisi biya anĩ to kelein. Idi kisi biya anĩ kelein are, idi fula fiya medeīya nē Odug aa tetek bun to dum. ⁹ Anĩ ere, Negur nē Itotoya eig ye irok kilei:

“Negur nigin waud laa fedig idi nigin Negur dodok fen anĩ,
malam taka to ilen,
weder takam to karĩ yen,
kisi takam to fokō yen.”*

¹⁰ Anĩ ere, Negur yogon Awa Uurem ada bun anĩ yaor fen.

Awa Uur ĩ ereb ereb ganan fai yeledig, Negur nē ereb ereb ilon bagaig fai yeledig.

¹¹ Tamo atun aim, tamo taka nē kisi keleĩ? Are tamo anĩ nē uurem dogol keleĩ. Age fiya bagai, tamo takam Negur nē kisi keleĩ sã, Negur nē Awa Uurem dogol keleĩ.

¹² Ada teneub enei nē uur to talen, anĩ ere, ada Awa Uur Negur bun tamal talen, are ereb Negur wau sã ifanadan anĩ, ada keleĩ youf nigin age tafen. ¹³ Ada enei anĩ wogō taudig, are tamo nē kisi biya bunem od difelnadan anĩ bunem sã, are od Awa Uurem ifelnadan anĩ bunem. Ada Awa Uur nē od bunem Awa Uur nē kisi wogō taudig. ¹⁴ Tamo Awa Uur sã ĩ, Negur nē Awa Uur bun tamal ereb isif anĩ to yale iroudig, ere nigin, yogon karīya bun, are neneya. ĩ anĩ keleīya nigin kisi feleya sã, ere nigin, are Awa Uur adodom dogol es difedig. ¹⁵ Awa Uur ado tamo ĩ, ereb ereb ganan nigin es fedidig, anĩ ere, ĩ yogo taka nem to es fiyēf. ¹⁶ Negur nē Itotoya eig ye irok:

“Aim Odug nē kisi keleĩ ken,
ĩ faded fiyēf?”†

Anĩ ere, ada Kristus nē kisi ado.

3

Sios Bun Fara Fiya

¹ Turau tar, aya ã momoiya nigin atīya gen to ayein, ã teneub enei nē dogol, ã Kristus bun momou gen ayein. ² Aya su afenein, saaf total anĩ to afenein, ere nigin, ã anĩ nigin to saika gen. Momoi, ã gamag fau to saika gef. ³ ã fau teneub enei nē dogol ubodōgef. ã atun, kiyeĩ ado luwa irouya ibodok, anĩ nigin, ã fau teneub enei nē sã de? ã teneub enei nē tamo gen to ago gef de? ⁴ Takam irok, “Aya Pol dō afef,” takam irok, “Aya Apolos dō afef,” ago gouf are, ã teneub enei nē tamo sã de?

† 1:31: Jeremaia 9:24 * 2:9: Asaia 64:4 † 2:16: Asaia 40:13

⁵ Agef ilauf are, Apolos ï ai? Pol ï ai? Amã Negur nẽ kabĩ tamo dogol, amã bunem ã momoi gen, are Odugem kabĩ morou morou ifanaman kilei. ⁶ Ayam faat atenẽ di, Apolosem naan fen, anĩ ere, Negurem odugouf nigin age fen. ⁷ Anĩ nigin, faat itenẽya tamo ado naan fiya tamo are ege, anĩ ere, Negur ï yogo dogol odug, ere nigin, ï ereb odugouf nigin age fedig. ⁸ Faat itenẽya tamo ado naan fiya tamo, idi kariya tekelei ado. Negur idi mugu mugu kabĩ dalen kilei, mala solo ifenẽdiyof. ⁹ Ere nigin, amã Negur nẽ kabĩ tura tar, ã Negur nẽ kabĩ akor, Negur nẽ fõ.

¹⁰ Negur ï aya wau ifenẽya ifanan anĩ bunem, aya fõ inoya keleĩ biya tamo gen, fõ inoya nigin gariya anon, age afe di, taka nem anĩ teten fõ inof. Anĩ ere, tamo mugu mugu el de, lo de fen, fõ dinouf nigin lo difalauf. ¹¹ Ere nigin, fõ gariya inon, are Jesus Kristus, taka nem fõ gariya fire inoya kisi feleya sã. ¹² Tamo takam fõ gariya enei teten, gol, silwa, meein moni odug, aa, yeye be, wit turu nem fõ inouf are, ¹³ yogon kabĩ naig be fiya are yaorouf, ere nigin, Kristus nẽ naa bun, anĩ lalan bun irculari inouf. Are yã ado wõ ye di, yã anim tamo mugu mugu nẽ kabĩ nẽ kaũ es fouf. ¹⁴ ï ereb inon anĩ ifarlauf are, ï yogon mala solo yalouf. ¹⁵ ï ereb inon anĩ isaikalauf are, ï agogon youf. ï yogo Negurem kel yalouf, anĩ ere, ï yã malan tamal ulõ yesiya tamo gen ibodõf.

¹⁶ ã aug are Negur nẽ tempel, Negur nẽ Awa Uur ã namein ibodõdig anĩ, ã to keleĩ de? ¹⁷ Taka ï Negur nẽ tempel daũ fouf are, Negur ï tamo anĩ daũf irailauf, ere nigin, Negur nẽ tempel are fateul, are ã tempel anĩ.

¹⁸ ã aug to udegnẽgouf. ãgenei taka ï, gama sain enei nẽ keleĩ bunem, aya kisi biya ado yef are, ï neneya wõ youf bagai, are ï kisi biya ado wõ youf nigin age fouf. ¹⁹ Ere nigin, Negur mala bun, teneub enei nẽ kisi biya are neneya. Negur nẽ Itotoya eig ye irok kilei, “Negur ï, kisi biya adodo tamo dogo neid keleĩ anim kor bun dilelel

mog, gei fedidig,”* ²⁰ Negur nẽ Itotoya takag irok, “Odug ï keleĩ, kisi biya adodo tamo neid kisi, are ege.”† ²¹ Anĩ nigin, tamo yeneid to walesagauf! Ere nigin, ereb ereb ganan are ãgenei, ²² Pol, Apolos, Pita, teneub enei, mata ibodõya, laa, gama be, dumen, ereb ereb ganan, are ãgenei, ²³ ã Kristus nẽ, Kristus ï Negur nẽ.

4

Kristus Nẽ Aposel Tar

¹ Anĩ nigin, tamo idi, amã nigin, idi Kristus nẽ kabĩ tamo tar, Negur nẽ waa lo fiya nigin idi imeid bun inon de fen, kisi difouf. ² Tamo idi ereb lo difouf nigin imeid bun inon anidi, dogo neid marau sigor dõ difef dile, age difouf anĩ, marau orof. ³ ã aya es wiyagef be, tamo nẽ kot bun es difiyaf, are aya to sii fiyaf. Momoi, aya yug nigineg to es afedig. ⁴ Neu kisi are karëtut, anĩ ere, anim aya mosor sã to auf. Odug im aya es fiyaf. ⁵ Anĩ nigin, es fiya nẽ sain fau wõya sã mog, to es gouf. Tari gef uleg, Odug isiyouf bun. ï ereb gugum bun iminek anĩ lalan bun irou isi fen, tamo neid waud bun kisi ibodok anĩ yaor fouf. Sain anĩ bun, idi mugu mugu Negur bun yana odug dalouf.

⁶ Turau tar, gama aya, ãgenei biya fiya nigin, ereb enei arokenein, aya yug ado Apolos bunem, afelnein, anĩ bunem, ã wogõya eig fiya nẽ gariya, are amã bun keleĩ walougouf, “Itotoya bun yenek anĩ to ufodulagauf.” ã anĩ keleĩ youf are, ã tamo taka anĩ yana waleseg fen, taka to lai gouf. ⁷ Ere nigin, aim õ, taka wal fiya inenok? Õ mogo ado, ere anĩ õ to walen? Õ mogo anĩ walen ouf are, ere nigin õ anĩ to walen gen, ogo yanã walesef?

⁸ Ereb ã oroyeik ganan ã mogo ado. ã mogo safina kisi feleya bagai ubodõgef. ã mogo king wowã gen, are amã geid sã. Amã ã geid king wowã tauf nigin, ã momoi bagai king wowã gem anĩ, aya orouf bagai. ⁹ Ere nigin, aya kisi afef, Negur ï amã aposel, tamo yukesiya nigin dinenẽdig gen, tamo dilouf nigin, gĩ bun idikeleyan bagai inenaman. Saa teneub

* 3:19: Job 5:13 † 3:20: Sam 94:11

ado, are tamo ado engel meleid bun, amã fele difamãf nigin inoman. ¹⁰ Amã Kristus nigin neneya mabodok, anĩ ere, ã Kristus bun kisi biya bagai ubodõgef. Amã total sã mabodok, anĩ ere, ã total ubodõgef. ã yeneĩ dalesedig, amã yanamã to dalesedig. ¹¹ Kulu nem isi gama sain enei bun, amã naũ ado naan ail mayok, amã gabar masasak mafilaik, amã darau difanamak, amã fõ sã. ¹² Amã mug imamam kabĩ total maledig. Sain amã disisnamak are, amã el fiya mafenẽdidig. Amã darau difanamak are, darau anĩ faali mafedig. ¹³ Bouwamã bun od duk sain, amã molol nem od solo mafedig. Mabodok masi gama sain enei bun, amã teneub enei nẽ ido gen ado, ereb ereb ganan nẽ moto gen wõ maun.

¹⁴ Aya ã mama ifeneĩya nigin enei to atotof, anĩ ere, ã neu kesu tar oboiyou gen wedereĩ arouf nigin age afef. ¹⁵ Ere nigin, Kristus bun, ã ten tausen kulat tamo ado, anĩ ere, ã temeĩ musei sã, are aya Kristus Jesus bun biya od bunem temeĩ wõ aun. ¹⁶ Anĩ nigin, aya ã madẽ wiyagauf nigin total bagai arokeneik. ¹⁷ Gariya enei nigin, aya neu kesu Timoti, ã Odug bun aya oboiyou ado dõ fiya biya, ã gein sur afef. Im Kristus Jesus bun, neu mata ibodõya nẽ suma anĩ, ã wedereĩ fokõ fouf, are aya modoũ ganan sios ganan bun afelnẽdidig age fiya bagai.

¹⁸ ã tunĩ, Pol ã amã garan to isiyouf ge fen, ã aug yeneĩ walesegen. ¹⁹ Anĩ ere, Odug arouf are, aya kaisã bagai ã gein asiyouf, age afe fen, aya dogo yeneid yaleseya tamo eneidi naig de wogõ def anĩ sã, anĩ ere, ereb megeir idi ado anĩ fele afouf. ²⁰ Ere nigin, Negur nẽ tano are ege wogõya nẽ sã, are megeir nẽ. ²¹ Ere anĩ ã oroyeik? Aya wagagã yeĩya nigin tibog ado ã gein asiyouf de, wau laa fiya ado molol bunem asiyouf?

5

Tureĩ Noli Tobonunã Ado Walelnẽgouf!

¹ ã atun, noli tobonunã age fiya, are haiden atuneg to wõ yedig anĩ, ibodok yeya karĩ aun. Tamo taka ã tama nẽ kayau

we fedig. ² Age fe di, ã aug selĩ wabigedig! Age fiya ban, ã wauĩ gudũf fen, tamo tobonunã enei inof anĩ, ãgenei uyu kũ fiya bun walelnẽgouf, are deuf. ³ Aya bouwau ã geid to ibodok, anĩ ere, uur bun are, aya ã geid tabodok. Aya ã geid ibodõya gen, tamo enei age fen, are ã mogo es afiyen. ⁴ ã neda Odug Jesus yana bunem guru gouf bun, aya uur bun ã geid tabodõf, are neda Odug Jesus nẽ megeir ibodõf sain bun, ⁵ tamo enei Satan ima bun unenẽg, anĩ bunem, mosor nẽ bouwa daũf iraile fen, Odug nẽ naa bun yogon uur isennẽya yalouf.

⁶ ã yeneĩ yaleseya are to biya. Yis naal bagai flawa obu namen kabĩ yaledig anĩ, ã to keleĩ de? ⁷ ã flawa mata yis sã gen wõ gouf nigin, yis tubu anĩ waleleg, are ã anĩ flawa mata yis sã. Ere nigin, Kristus, neda Pasa naa nẽ sipsip naal, sesewi difiyen. ⁸ Anĩ nigin, ada Pasa Sifa naa anĩ tarouwauf, are yis tubu, sesen ado to biya nẽ yis bunem sã, anĩ ere, bret yis sã, karẽtut ado momoi nẽ bret bunem age tafouf.

⁹ Aya ã noli tobonunã dinodig tamo kayau geid to nigal gouf nigin, neu pas mogo atotkenein, ¹⁰ anĩ ere, aya teneub enei nẽ tamo kayau geid to nigal gouf nigin to orok, are idi noli tobonunã, ereb ereb nigin akorouya, idegẽya bunem taka nẽ safina bẽ yaleya be, idegẽya waitou yana yaleseya age difedig. ã idi geid to nigal gouf are, ã teneub enei utorõgouf. ¹¹ Anĩ ere, gama aya ã bun atotof are, ã taka ã yogo nigin tura ye fen, noli tobonunã, ereb ereb nigin akorouya, idegẽya waitou yana yaleseya, bou yũya od wogõya, naan yõya be, idegẽya bunem taka nẽ safina bẽ yaleya age fedig, ã weim to nigal gouf. Tamo age fiya ado weim saafeg to wãgauf.

¹² Ere nigin aya idi sios mayarẽ difaref anĩ es afediyouf? Are, idi sios namen difaref anĩ ã to es wiyẽdigef de? ¹³ Negur idi sios mayarẽ difaref anĩ es fediyouf. Are Negur nẽ Itotoya bun eig ye irok kilei, “ã atun tamo sane anĩ walelnẽgouf.”*

* 5:13: Diuteronomi 17:7; 19:19; 21:21; 22:21, 24; 24:7

6

Momoiya Tamo Kayau Atun Kot Fiya

¹ Āgenei takam, taka ado fefuya yenēf are, ere nigin ī Negur nē tamo kayau wagedin irouleya ban, ī idi momoiya sã anidi bun, mama sã gen es fiya nigin irouledig? ² Are Negur nē tamo kayau teneub enei es difouf anī, ā to keleī de? Ā teneub enei es gouf are, ā morō naal bagai es fiya nigin kisi feleya sã de? ³ Are amā engel es mafediyouf anī, ā to keleī de? Age fouf are, mata ibodōya enei nē morō es fiya nigin naig fiyauf? ⁴ Anī nigin, ā teneub enei nē morō age fediya nigin fefuya adouf are, ā haiden idi, sios bun tamo yeneid sã anidi, es fiya tamo nigin ugirnēdigef de? ⁵ Aya ā mama yeīf nigin od enei orok. Are ā atun, momoiya tamo kayau fefuya idi atun ibodok anī, es fiya nigin kisi biya ado tamo taka sã de? ⁶ Anī ere, momoiya tamo takam tura taka kiwai ifen ken, kot bun iledig, are enei momoiya sã anidi wagedin irouledig.

⁷ Momoi bagai, ā atun abob nigin kot bun fefuya ibodok anim, ā mogo kuku gen anī yaoref. Ere nigin ā idi to utornēdige di, sane diyeīf? Ere nigin ā idi to utornēdige di, didegneīf? ⁸ Age fiya ban, ā aug udegēg fen, sane ago gedig, are ā tureī tar bun enei ago gedig.

⁹ Tamo tobonunā sesen idi, Negur nē tano to akorouf anī, ā to keleī de? Are ā idi to utornēdige di, didegneīf. Idi noli tobonunā dinodig, idi idegēya waitou yana dalesedig, idi seseirā tobonunā dinodig, tamo idi bouweid na nē sur difedig, tamo tutur, kayau tutur noli tobonunā dinodig, ¹⁰ idi bē daledig, idi ereb ereb safina nigin akorou dedig, idi naan dōdig, idi bou yūya od wogō dedig, idi idegēya bunem taka nē safina daledig anidi ganan, Negur nē tano to akorouf. ¹¹ Are ā tunī age fiya anī ago gedig. Anī ere, ā mosor bun tamal kulo yein, are ā fateul inenein, are ā, Odug Jesus Kristus yana bun ado neda Negur nē Awa Uur bunem, Negur mala bun madur bagai wowā gen.

Noli Tobonunā

* 6:16: Jenesis 2:24

¹² Taka irōf, “Aya ereb ereb ganan nigin sã age afeid kisi feleya.” Are de momoi, anī ere, ereb ereb ganan to isennadauf. Aya ereb ereb ganan nigin sã age afeid kisi feleya, anī ere, aya ereb takam to irouna di, ferfer abodōf. ¹³ Taka irōf, “Saaf are te guroub nē, te guroub are saaf nē.” Anī ere, Negur anī ganan daū falauf. Bouwa are noli tobonunā nē sã, anī ere, Odug nē, are Odug ī bouwa anī nē. ¹⁴ Are, Negur yogon megeir bunem Odug laa bun tamal yalesnen, are adag ī yalesnadauf. ¹⁵ Ā bouweī are, Kristus yogo bouwa nē tunī anī ā to keleī de? Age fiyauf are, aya Kristus bouwa nē tunī ale fen, kayau bouwa na sur fedig ado bagu afouf de? Sã bagai! ¹⁶ Tamo ī yogo, kayau taka bouwa na nē sur fedig ado bagu difouf are, ī kayau anī ado bouwa tekelei youf anī, ā to keleī de? Ere nigin, Negur nē Itotoya bun eig ye irok, “Idi urom bouweid tekelei youf.”* ¹⁷ Anī ere, taka ī yogo Odug ado bagu difouf are, ī uur bun Odug ado tekelei youf.

¹⁸ Noli tobonunā bun tamal uyagauf. Mosor tunī ganan tamo taka inof, are ī yogo bouwa serē inof, anī ere, taka ī yogon bouwam noli mosor inof, are ī yogo bouwa bun mosor inof. ¹⁹ Ā bouweī are Awa Uur Fateul nē tempel, Awa Uur Fateul are ā namein ibodok anī Negur bun tamal walegen are, ā to keleī de? Ā aug, āgenei sã, ²⁰ ere nigin, ā mala odugem na yaleyein. Anī nigin, bouweī anim Negur yana walesagauf.

7

Tamo Kayau Ado Bagu Fiya Nigin

¹ Gama od anī ā utotogen nigin aro-keneik, tamo ī kayau to yalouf, are deuf. ² Anī ere, noli tobonunā musei bagai ibodok nigin, are tamo mugu mugu ī yogon kayau adouf, are kayau mugu mugu ī yogon tamo adouf. ³ Tamo ī yogon bouwa nigin, yogon kayau to katū fiyēf, age fiya gen, kayau īg yogon bouwa nigin yogon tamo to katū fiyēf. ⁴ Kayau ī yogon bouwa nē mudur to ibodōf, are yogon

tamo nê, age fiya gen, tamo ï yogon bouwa nê mudur to ibodôf, are yogon kayau nê.

⁵ Æ abob nigin bouweï to katũ gouf, anï ere, ã kosê gouf nigin, sain naal bagai yo ge fen, bouweï katũ gouf, are kisi falauf. Agog fen, ã bouweï kulatun fiya anï, malai nigin, are Satanem to kisi yeïf nigin, baban ã bouweï bagu gouf. ⁶ Aya od enei karï gouf nigin orok, are ïtãfiya sã. ⁷ Tamo ganan aya gen dibodok, are aya orouf. Anï ere, tamo mugu mugu idi, Negur bun dogo neid ege luwa dalef, taka ege luwa enei, taka ege luwa anï.

⁸ Anï ere, aya kayau tamo yaleya sã, tamo kayau yaleya sã ado, waab arokenêdif, are idi aya gen age de dibodok dilauf, are deuf. ⁹ Anï ere, idi dogo bouweid nigin kulatun fiya kisi feleya sãf are, tamo idi kayau dalouf, kayau idi tamo dalouf, ere nigin, noli kisi waud bun yã gen bobo reya anï ban, tamo idi kayau yaleya, kayau idi tamo yaleya are deuf.

¹⁰ Tamo idi kayau adodo, kayau idi tamo adodo bun, aya od enei arokenêdif, are ayam sã, Odugem. Are kayau ï ne tamo to itornêf. ¹¹ Anï ere, kayau ï tamo itornêf are, ï tamo taka to yalouf be, are ï yogon tamo ado komo difouf. Are tamo ï yogon kayau to iru irailauf.

¹² Æ tunï ganan bun, aya od enei arokenêdif, are ayam, Odugem sã. Tura taka ï kayau ado, are kayau ï momoiya sã, anï ere, ï tamo ado ibodôya nigin oro fouf are, tamo ï kayau anï to iru irailauf. ¹³ Kayau taka ï tamo ado, are tamo ï momoiya sã, anï ere, ï kayau ado ibodôya nigin oro fouf are, kayau ï tamo anï to iru irailauf. ¹⁴ Ere nigin, tamo momoiya sã ï, yogon kayau bunem fateulen, are kayau momoiya sã ï, yogon momoiya tamo bunem fateulen. Age fiya sãf are, ã gereï tar idi karêtot to dibodôf. Anï ere, idi gama fateul dibodok.

¹⁵ Anï ere, taka ï momoiya sã, iyawau fenê nigin oro fouf are, utornêge di, age fouf. Suma age fiya bun, momoiya tamo be kayau, ereb taka anim to katï fiyek. Are Negur ï ada wau inosiya bun tabodôf nigin iweignadan. ¹⁶ Kayau ô, nê tamo usennêf be sã be anï, naig fe di, ô keleï youf? Tamo

ô, nê kayau usennêf be sã be anï, naig fe di, ô keleï youf?

¹⁷ Odug ada mugu mugu igirnadandan kilei ado, Negur ada mugu mugu iweignadan kilei bagai, age tag, mata tabodôgouf. Are, aya sios ganan bun nun enei anof. ¹⁸ Sain Negur ï tamo taka iweignen, tamo ï mogo mulũ ilen de? Are tamo ï mulũ ileya sã to ilauf. Sain Negur ï tamo taka iweignen, tamo ï mulũ ileya sã de? Are tamo ï to mulũ ilauf. ¹⁹ Mulũ ileya are ege, mulũ ileya sã areg ege. Anï ere, Negur nê ïtãfiya dô fiya anï odug bagai. ²⁰ Tamo mugu mugu ï Negur iweignen sain bun, ï ibodon suma anï bun, agef ibodôf. ²¹ Sain Negur ï iweignon, ô ferfer ubodon de? Ô anï nigin to morô yôf, anï ere, ô ferfer itorôya nigin kisi falauf are, anï ô agouf. ²² Ere nigin, taka ï, Odugem iweignen sain bun, ferfer ibodon, ï Odug nê karika tamo ibodok, age fiya gen, taka ï iweignen sain bun, karika tamo ibodon, ï Kristus nê ferfer ibodok. ²³ Æ mala odugem na yaleyein. Æ tamo neid ferfer to wowã gouf. ²⁴ Turau tar, tamo mugu mugu ï Negur iweignen sain bun ibodon suma anï bun, agef Negur ado dibodôf.

²⁵ Kayau taulei nigin, aya Odug bun tamal ïtãfiya taka to alen. Anï ere, aya, taka ï Odug nê wau yũya bunem momoi bagai tamo wô yen anï, aya neu kisi afeneik. ²⁶ Gama enei nê morô odug nigin, aya kisi afef, are tamo ï gama ibodok gen, agef ibodôf, are deuf. ²⁷ Ô kayau ado de? Age fiyauf are, ô kayau iru irailaya nigin naab to umirêf. Ô kayau to walen de? Age fiyauf are, ô kayau taka yaleya nigin to umirêf. ²⁸ Anï ere, ô kayau walef are, ô mosor to unof. Kayau taulei taka tamo yalef are, ï mosor to inof. Anï ere, tamo kayau dalef, kayau tamo dalef, idi mata ibodôya enei bun morô musei dalouf, are aya morô enei ã bun to wô youf anï orouf.

²⁹ Turau tar, aya od enei arokeneik, are sain mogo tobegaf, anï nigin, gama sain enei ilef bun, idi kayau ado, idi kayau sã gen dibodôf; ³⁰ idi maruid isif, idi to maruid isif gen dibodôf; idi waud al difef, idi waud to al difef gen dibodôf; idi ereb taka na dalef, idi ereb taka sã gen dibodôf;

³¹ idi teneub enei nē safina diroudif, are idi waud adok anī bun to dinouf. Ere nigin, teneub enei, gama agef ibodok anī, inanakalauf.

³² Aya ā to suwē gouf nigin orouf. Tamo kayau sã, ī Odug nē kabī nigin kisi fedig, are ī ereb age fe di, Odug al fouf nigin kisi fedig. ³³ Anī ere, tamo kayau ado, ī teneub enei nē bouwa isennēya nigin kisi fedig, are ī ereb age fe di, yogon kayau al fouf nigin kisi fedig. ³⁴ Age fe di, yogon kisi fara fedig. Kayau tamo sã be, kayau taulei, ī Odug nē kabī nigin kisi fedig, are ī bouwa ado uur bun fateul wō youf nigin age fedig. Anī ere, kayau tamo ado, ī teneub enei nē bouwa isennēya nigin kisi fedig, are ī ereb age fe di, yogon tamo al fouf nigin kisi fedig. ³⁵ Aya od enei āgenei biya fiya nigin orok, aya ā ifōyeif nigin to age afef, anī ere, ā madur agog fen, ā aug nigin Odug bun fara fiya sã wenēgouf nigin age afef.

³⁶ Anī ere, tamo taka ī, kayau taulei yaleya nigin digirnen anī, ī bun tobonunā biya sã age afef ye fen, kayau ī tamo yaleya nē sain mogo wal fe di, tamo ī kayau yaleya nigin kisi fef are, tamo ī yogon oroya kilei age fouf. Ī mosor to inof, are idi bagu difouf. ³⁷ Anī ere, tamo ī yogon wau bun total ifar fen, taka nē kisim to we fiyēf, anī ere, yogon oroya dōf fen, kayau taulei anī to yalouf nigin yogon kisi ifōf are, areg ī tutuk age fouf. ³⁸ Anī nigin, tamo ī kayau taulei yalef are, ī tutuk age fef, anī ere, tamo ī kayau to yalef are, ī tutuk bagai age fef.

³⁹ Kayau ī yogon tamo fau mata ibodōf are, ī yogon tamo ado dibodōf. Anī ere, yogon tamo laa fouf are, ī yogon oroya dōf fen, taka bun ileyā kisi feleya, anī ere, tamo ī Odug nigin momoi yef anī bun dogol. ⁴⁰ Anī ere, neu es fiya bun, kayau ī gama ibodok gen, ibodōf are, ī fatuk bagai al fouf. Aya kisi afef, are ayag Negur nē Awa Uur ado.

keleī ado. Keleī are yogo yana yaleseya inodig, anī ere, wau laa fiya anim biya yalesedig. ² Tamo ī ereb taka nigin aya keleī yef are, ī ereb taka keleī youf anī ī fau keleī sã. ³ Anī ere, tamo ī Negur nigin wau laa fef are, Negur ī nigin keleī.

⁴ Anī nigin, saaf idegēya waitou bun sesewi difedig anī yōya nigin, ada keleī, are tenebur ein idegēya waitou are ege, anī ere, Negur taka sã, tekelei dogol ibodok. ⁵ Ere nigin, saa be teneub bun, idi waitou dedig anī dibodok, are momoi bagai waitou musei ado odug musei dibodok, ⁶ anī ere, ada bun Negur tekelei dogol ibodok, are Dei, ī bun tamal ereb ereb ganān wō yen, ī nigin ada mata tabodok. Odug tekelei dogol ibodok, are Jesus Kristus, ī bunem ereb ereb ganān wō yen, ī bunem ada mata tabodok.

⁷ Anī ere, tamo ganān enei keleī sã. Tamo kayau tunī fau idegēya waitou nigin fatuk bagai kisi difedig nigin, sain idi saaf anī doko, idi saaf anī idegēya waitou bun sesewi difen de fen, kisi difedig, age dife di, idi waud total sã nigin, amuyēdig. ⁸ Anī ere, saafem ada Negur non to irouladauf, are ada saaf to tāf are, anim ada to daū fadauf, ada saaf tāfeg, anim ada to isen-nadauf.

⁹ Anī ere, ereb ā karika ago gouf anim, idi momoiya total sã anidi bun, naabura gudū fiya to wenēdigouf nigin lo walagauf. ¹⁰ Ere nigin, taka ī wau total sã anī, ō keleī enei ado, idegēya waitou nē tempel bun saaf wō mog ileyōf are, ī saaf idegēya waitou bun sesewi difen anī, kumī sã to yāf de? ¹¹ Anī nigin, turā total sã, ī nigin Kristus laa fen, are ogon keleim ī daū fiyek. ¹² Sain ā naab enei bun tureī tar bun mosor unog fen, dogo neid waud total sã anī daū wedigef are, ā Kristus bun mosor unogef. ¹³ Anī nigin, ereb aya āf anim neu turau mosor bun inenēf are, ayam ī mosor bun to anenēf nigin, aya muda baban to bagai āf.

8

Saaf Idegēya Waitou Bun Sesewi Difen

¹ Gama, saaf idegēya waitou bun sesewi difedig nigin, ada keleī, are ada ganān

9

Aposel Erebyaleya Nigin Kisi Feleya

¹ Erebyakam aya katī fiyaf de? Aya aposel sã de? Aya Jesus neda Odug to ailen

de? ¹ Æ Odug bun neu kabī bunem to wō gen de? ² Tunī bun aya aposel sã be, anī ere, momoi bagai aya ã bun aposel. Ere nigin, ã Odug bun aya aposel kabī alef anī nē uris.

³ Idi aya es difiyau f nigin dibodok anidi bun, isennaya od enei orok. ⁴ Amã saaf ado naan yōya nigin to kisi feleya de? ⁵ Amã, aposel tunī ganan, Odug nē tura tar ado Pita age difedig gen, kayau momoiya ado amã geid marou malauf, are to kisi feleya de? ⁶ Takag, aya ado Banabas dogol mata ibodōya nigin kabī malouf de?

⁷ Aim kusī tamo kabī yale fen, yogo nigin ereb ereb na yaledig? Aim wain kabier wain iten ken, dogo neid biya to yōdig? Aim sipsip lof fen, dogo neid su sumin to yōdig? ⁸ Aya tamo nē lo fiya bunem dogol, od enei orok de? Lo anīg enei nigin tekelei bagai to irok de? ⁹ Ere nigin, Moses nē Lo bun eig ye itoton, “Ō bulmakau, wit faat biya nē gabar loko fediyouf nigin lalai feid mog, yogon awa to ufokalauf.”* Negur ī bulmakau nigin kisi fef de? ¹⁰ Momoi, Negur ī od enei ada nigin to irok de? Momoi, od enei ada nigin itoton, ere nigin, tamo teneub gudū fedig ado, tamo wit faat biya nē gabar yaleledig, idi kusu fiya sain bun dogo neid morou morou dalouf nigin waud ise fen, age difedig. ¹¹ Amã ã atun āgenei uur nigin faat mararan ouf are, amã ã bun bouwa buru nē safina kusu mafouf are, anī odug biya de? ¹² Tunī ã bun isennēya enei yaleya nigin kisi falauf are, amã idi wal fiya anī, to malouf de?

Anī ere, amã ã bun safina yaleya nigin kisi feleya enei to age mafen. Age fiya ban, amã Kristus nē biya od to naabura gudū mafouf nigin, ereb ereb ganan faali mafef masin. ¹³ Idi tempel bun kabī daledig anidi, dogo neid saaf tempel bun daledig, idi alta bun aruna daledig anidi, ereb alta bun sesewi difen anī dale dogoledig, are ã to keleī de? ¹⁴ Naab tekelei anī bun, Odug iron, are idi biya od wogō def anidi, biya od bunem mata ibodōya nē safina dalouf.

¹⁵ Anī ere, aya safina yaleya nigin kisi feleya eneidi, anī taka to age afen. Age afe fen, aya, ã aya nigin ago gouf nigin,

enei to atotof. Takam yanau yalesey a enei aya bun yalelauf are, aya laa fiyauf anī orouf. ¹⁶ Aya biya od wogō auf sain bun, aya yug nigin yanau to alesedig, ere nigin, Negurem biya od wogō auf nigin nugo fiyadig. Aya biya od to wogō auf are, aya bun morō odug bagai wō youf. ¹⁷ Aya neu oroya bunem kabī enei alouf are, aya mala yaleya kisi feleya. Are neu oroyam sã, anī ere, aya Negurem kabī ifanan nigin age afef. ¹⁸ Age afouf are, ere anī neu mala solo? Are, sain aya biya od wogō auf, aya mala yaleya sã biya od wogō audig, are aya biya od bun mala yaleya nigin kisi feleya anī to age afedig.

¹⁹ Aya tamo taka nē sã, are aya karika, anī ere, aya tamo musei kisi feleya bagai gei afouf nigin, aya yug tamo ganan nē ferfer wō auf. ²⁰ Juda idi bun, aya Juda idi gei afouf nigin, Juda tamo gen wō aun. Idi lo farumen dibodok anidi bun, aya yug lo farumen to abodok, anī ere, aya idi lo farumen dibodok anidi gei afouf nigin, aya tamo lo farumen ibodok gen wō aun. ²¹ Idi lo sã anidi bun, aya Negur nē lo bun karika sã, are aya Kristus nē lo farumen abodok, anī ere, aya idi lo sã anidi gei afouf nigin, aya tamo lo sã gen wō aun. ²² Idi furūya anidi bun, aya idi furūya anidi gei afouf nigin, aya tamo furūya gen wō aun. Aya ereb ereb ganan kisi feleya anī bunem, tunī kel gei afouf nigin, tamo ganan bun, idi dibodok gen tobonunã age fiya gen wō aun. ²³ Aya biya od nigin enei ganan age afedig, are aya biya od nē el fiya weim talouf nigin.

²⁴ Gududuya bun, tamo ganan gududu dedig, anī ere, tekeleim dogol mala yaledig anī ã to keleī de? Naab age fiya bun, gududu ge fen, mala walougouf.

²⁵ Tamo ganan kodē wal difouf nigin age difedig anidi, ereb ereb ganan bun total bagai tai difedig. Idi mala fau sa kalauf anī dalouf nigin age difedig, anī ere, amã mala gai gai ibodkalauf anī yaleya nigin age mafedig. ²⁶ Anī nigin, aya tamo gariya sã gudu redig gen, to gudu raudig. Aya yau yūdig gen, to ege imau warū yeledig. ²⁷ Anī ere, aya yug bouwau au ken, anī neu

* 9:9: Diuteronomi 25:4

ferfer ibodōf nigin age afedig, are aya tunī wogō afiyeīd fen, aya yug mala solo yaleya nigin, kisi feleya sã to bagai wō auf nigin age afedig.

10

Israel Neid Tubuid Tar Bun Weder Irouya Od

¹ Turau tar, aya ã enei to keleī youf nigin to orouf, are Moses nē sain bun, tubuda tar ganan budū farumen difar fen, idi ganan Maaī Giriya atu diyok dilen. ² Idi ganan budū bun ado maaī bun naan dale fen, Moses nē ibor tar wowã den. ³ Are, idi ganan uur nē saaf tekelei anī don, ⁴ idi ganan uur nē naan tekelei anī don, are uur nē meein idi geid weim diyok dilen anī bun, idi naan don, meein are Kristus. ⁵ Anī ere, Negur ĩ idi musei ganan nigin wau to al fen, anī nigin, dogo neid bouweid gerere tuan firagagaū difen.

⁶ Enei ganan ada wederada irouya nigin wō yen, anī bunem ada idi age difen gen, ereb sane nigin wauda to tanouf. ⁷ Idi neid tunī gen, ã idegēya waitou yana to wale-sagauf. Are Negur nē Itotoya bun eig ye irok, “Tamo kayau saaf naan doko dibod ken, fafã de dale, noli tobonunã dinon.”* ⁸ Ada idi tunī age difen gen, noli tobonunã to tanouf. Age dife di, naa tekelei bun, idi atun tuwenti tri tausen tamo kayau gare den. ⁹ Ada idi tunī age difen gen, Odug kisi fiya bun to tanenēf. Idi age difen, gogourum didenkesin. ¹⁰ Ada idi tunī gen, to nauseir tauf. Idi age difen, daū fiya nē engelem idenkesin.

¹¹ Eneidi ada ifelnadauf nigin idi bun wō yen, are idikeleya sain, ada bun mogo wō yen anī bun, wederada irouya nigin itoton. ¹² Anī nigin, taka ĩ kisi fef, total ifaref yef, ĩ to kubū youf nigin lo falauf. ¹³ Kisi fiya ganan ã bun wō yedig, are tamo bun wō yedig dogol. Anī ere, Negur ĩ age afouf yef anī, age fedig, ĩ kisi fiya ã yaleya kisi feleya sã anī, ã bun to wō youf nigin age fouf. Anī ere, ã kisi yeīf sain bun, Negur ĩ iyawoya nē naab anīg ifelneīf, anī bunem ã total ufaragauf nigin sã kisi falauf.

Saaf Idegēya Waitou Bun Dinon Ado Odug Nē Saaf

¹⁴ Anī nigin, neu turau tar oboiyou, idegēya waitou yana yaleseya bun tamal uyalalagauf. ¹⁵ Aya ã tamo kayau kisi biya ado gen arokeneik, ereb aya arok anī, ã aug es gouf. ¹⁶ De fiyēya nē kap, ada de fiya tafenēdig, are Kristus nē naud bun bagu fiya sã de? Bret ada mumã tafedig, are Kristus nē bouwa bun bagu fiya sã de? ¹⁷ Bret tekelei dogol ibodok nigin, ada musei, anī ere, bouwada tekelei, ere nigin, ada ganan bret tekelei anī bun bagu tafedig.

¹⁸ Israel tamo kayau nigin kisi walogouf, idi sesewi fiya nē saaf dōdig anidi, alta bun to bagu difedig de? ¹⁹ Age fouf are, ere anī kisi afef, are sesewi fiya nē saaf idegēya waitou difenek anī odug de, oo idegēya waitou anī odug de? ²⁰ Sã, anī ere, haiden neid sesewi fiya anī kaa sesen bun difenēdidig, are Negur bun sã. Are aya ã kaa sesen geid bagu gouf nigin to orouf. ²¹ ã Odug nē kap bun ado kaa sesen neid kap buneg yōya nigin kisi feleya sã. ã Odug nē tebol bun ado kaa sesen neid tebol buneg bagu fiya nigin kisi feleya sã. ²² Ada Odug kiyeī ifanadauf nigin age tafef de? Ada neda megeir ĩ wal fiya de?

Momoiya Tamo Kayau Neid Tobonunã

²³ Tunī dirōdig, “Ada ereb ereb ganan nigin, sã age tafeid, age fiya nigin kisi feleya,” anī ere, ereb ereb ganan to isen-nadauf. Tunī dirōdig, “Ada ereb ereb ganan nigin, sã age tafeid, age fiya nigin kisi feleya,” anī ere, ereb ereb ganan biya fiya to inouf. ²⁴ Taka ĩ yogon biya fiya nigin to imirēf, anī ere, tunī neid biya fiya nigin imirēf.

²⁵ Ereb ereb yaro maket bun na sur difedig anī, ãgenei kisi bun to fiya sã wāgauf, ²⁶ ere nigin, “Teneub ado ereb ereb ganan anī namen yenek are Odug nē.”†

²⁷ Momoiya sã tamo taka, saaf yōya nigin ã iweigneī di, ã ileya nigin oroyeīf are, ereb ereb ã meleī bun inodin anī, ãgenei kisi bun to fiya sã wāgauf. ²⁸ Anī ere, taka

* **10:7:** Eksodas 32:6 † **10:26:** Sam 24:1

ĩ ã irokeneĩf, “Enei are sesewi fiya bun difenen,” youf are, tamo irokenein ĩ nigin ado kisi es fiya yaor karētut ibodōf nigin, saaf anĩ to wāgauf. ²⁹ Neu wogōya nē gariya are, tamo anĩ nē kisi es fiya nigin, are āgenei kisi es fiya nigin sã. Taka nem irōf, “Age fiyauf are, ere nigin neu ereb ereb nigin kisi feleya anĩ, tamo taka nē kisi es foug? ³⁰ Aya de fiya bunem saaf āf are, ere nigin taka nem saaf anĩ nigin, Negur de afiyek nigin bou yūya od irok?”

³¹ Anĩ ere, ã saaf wāgauf, naan wāgauf ado, ereb ereb ganan ago gouf are, Negur nē fula fiya medeīya nigin anĩ ganan ago gouf. ³² Juda tamo, Grik tamo be, Negur nē sios bun tamo taka, to ye tū foug nigin ago gouf. ³³ Ayag naab ganan bun tamo ganan al afiyēdiyof nigin age afedig gen, ago gouf. Ere nigin, aya neu biya fiya to amirek, anĩ ere, musei isennēdiyof nigin, dogo neid biya fiya amirek.

11

¹ Ayag Kristus madē afiyēdig gen, ã aya madē wiyagauf.

Negur Yana Yaleseya Bun Mudur Kerū Fiya

² Aya ã yeneĩ alesef, ere nigin, ã ereb ereb ganan bun aya nigin karĩ weleg fen, ifelnēya anĩ aya ale fen, ã afenein anĩ, kafĩ weleg uroug usigef.

³ Anĩ ere, aya ã eig fiya anĩ keleĩ youf nigin orouf, are tamo ganan neid mudur are Kristus, kayau nē mudur are tamo, Kristus nē mudur are Negur. ⁴ Tamo ganan, taka ĩ yogon mudur kerū fel fen, kosē yef be, profet od wogō yef, ĩ yogon mudur Kristus mama ifenek. ⁵ Kayau ganan, taka ĩ yogon mudur to kerū fel fen, kosē yef be, profet od wogō yef, ĩ yogon mudur, are aiwa anĩ mama ifenek, are ĩ yogon fatiya korerē feleya gen. ⁶ Kayau taka ĩ yogon mudur kerū fiya sãf are, ĩ yogon fatiya gudū falauf. Kayau taka ĩ yogon fatiya gudū foug be, korerē foug anim, mama ifenēf are, ĩ yogon mudur kerū foug. ⁷ Tamo taka ĩ yogon mudur to kerū foug, ere nigin, ĩ Negur nē malakanon ado fula fiya medeīya, tamo bun. Anĩ ere, kayau ĩ tamo nē fula fiya medeīya, kayau

bun. ⁸ Ere nigin, tamo ĩ kayau bunem to isin, anĩ ere, kayau ĩ tamo bunem isin. ⁹ Takag, tamo ĩ kayau isennēf nigin to inon, anĩ ere, kayau ĩ tamo isennēf nigin inon. ¹⁰ Age fiya nigin, kayau ĩ, engel idi neid meleid bun, ĩ tamo farumen ibodok anĩ ifelnēdiyof nigin, yogon mudur kerū foug.

¹¹ Anĩ ere, Odug bun kayau ĩ tamo bun yogo mugu to ifaref, tamo ĩg kayau bun yogo mugu to ifaref. ¹² Ere nigin, kayau ĩ tamo bunem isin gen, tamo ĩg kayau bunem wō yen. Anĩ ere, ereb ereb ganan Negur bun tamal isif. ¹³ Ā aug es gouf, are kayau taka ĩ yogon mudur to kerū fel fen, Negur kosē fiyek, are de de? ¹⁴ Tamo taka fatiya salo isiya adouf anim mama ifenek anĩ, tamo nē tobonunã anĩ to ifelneik de? ¹⁵ Anĩ ere, kayau taka ĩ fatiya salo isiya adouf, are yogon fula fiya medeīya. Ere nigin, fatiya salo isiya are, yogon mudur kerū fiya nigin ifenen. ¹⁶ Anĩ ere, taka ĩ od enei kiwai ifenēf are, ada suma taka sã, Negur nē sios buneg suma taka sã.

Odug Nē Saaf

(Matyu 26:26-29; Mak 14:22-25; Luk 22:14-20)

¹⁷ Faded fiya dō fiya enei bun, aya ã yeneĩ to alesef, ere nigin, āgenei guru fiya biya anĩ fotokar sane isidig. ¹⁸ Uruwa bun, aya karĩ aun, are ã sios nigin guru gef ã atun, fara fiya yenēdig, age afe fen, od tunĩ aya momoi auf. ¹⁹ Ā atun fara fiya bagai yenek, anĩ bunem, ã atun ai anĩ Negur yo fiyen anĩ ifelneĩf. ²⁰ Anĩ nigin, sain ã guru gef, are Odug nē Saaf bagai anĩ to wōgedig, ²¹ ere nigin, sain ã saaf wōgef bun, ã abob tari fediya sã, mugu mugu saaf wōgedig, anĩ nigin, taka ĩ naũ ibodōdig, taka ĩ naan yōdig. ²² Saaf ado naan yōya nigin ã fō sã de? Ā Negur nē sios lai ge fen, idi safina sã anidi mama wenēdigef de? Aya ã ere ayeĩf? Aya enei nigin ã yeneĩ alesauf de? Sã bagai! Aya enei nigin ã yeneĩ to alesauf.

²³ Ere nigin, aya enei Odug bun tamal ale fen, āg afenein. Are Odug Jesus, Judas ĩ kiwai ifenen bō anĩ bun, bret yale, ²⁴ Negur de fiye ken, bret anĩ mumãf fen, iron, “Enei neu bouwau, are ã nigin. Aya

nigin karĩ walagauf nigin enei ago gouf.”
²⁵ Naab tekelei bun, bõ saaf bure difel fen, ï kap yale fen, iron, “Kap wain enei neu naudou bun bar itenëya mata. Sain ganan ã wãgauf, aya nigin karĩ walagauf nigin enei ago gouf.”
²⁶ Ere nigin, sain ganan ã bret enei wõg fen, kap enei bun wãgauf, ã Odug nẽ laa nigin kurõ wesig mog, ï fau isiyouf.

²⁷ Anĩ nigin, taka ï tutuk sã bret anĩ yãf be, Odug nẽ kap bun yãf are, ï Odug nẽ bouwa ado naud bun mosor inouf.
²⁸ Taka ï yogo nigin es fel fen, bret anĩ yoko, kap anĩ bun yãf.
²⁹ Ere nigin, taka ï Odug nẽ bouwa nigin to kisif fen, bret yoko, kap bun yãf are, ï yogon es fiya anĩ yogo yoko.
³⁰ Anĩ nigin, ã atun musei malegeid fen, dagi didig, ãgenei tunĩ gare den.
³¹ Anĩ ere, ada nigin es tafouf are, ada es fiya bun to tabodõf.
³² Sain ada Odugem es fadauf, are ada Odugem madur fadauf, are ï teneub enei nẽ tamo kayau geid ada mosor ado to youf nigin age fouf.

³³ Anĩ nigin, neu turau tar, sain ã yõya nigin guru gouf are, ã abob nigin tari gouf.
³⁴ Taka ï naũ fouf are, ï fõ bun yãf, anĩ bunem, sain ã guru gouf, ã es fiya bun to ulagauf.

Sain aya asiyouf, aya faded fiya tobol afeneĩf.

12

Awa Uur Fateul Nẽ Ege Luwa

¹ Turau tar, aya ã Awa Uur Fateul nẽ ege luwa nigin to keleĩ youf anĩ to orouf.
² ã keleĩ, sain ã haiden ubodõgen, naab fire fire bun ditonei ken, eweid ifofakeleya idegëya waitou bun, fõ yeleya nigin dirou dileyein.
³ Anĩ nigin, aya ã arokeneik, are taka ï Negur nẽ Awa Uur bunem wogõ yef, ï to irõdig, “Jesus sane lauf.” Takag, taka nem eig ye irõya kisi feleya sã, “Jesus ï Odug,” are Awa Uur Fateulem dogol.

⁴ Ege luwa nigin fire fire dibodok, anĩ ere, Awa Uur anĩ tekelei.
⁵ Kabĩ gariya fire fire dibodok, anĩ ere, Odug tekelei.
⁶ Kabĩ nẽ megeir fire fire dibodok, anĩ ere, Negur tekelei ï, tamo ganan bun, kabĩ nẽ megeir ganan nigin kabĩ yaledig.

⁷ Tamo ganan isennëdiyof nigin, tamo mugu mugu bun Awa Uur yaor fedig.
⁸ Taka bun Awa Uur bunem kisi biya nẽ od ifenek, taka bun Awa Uur tekelei bunem keleĩ nẽ od ifenek,
⁹ taka bun Awa Uur tekelei bunem momoiya anĩ ifenek, taka bun Awa Uur tekelei anĩ bunem dagi el fiya nẽ ege luwa ifenek,
¹⁰ taka bun memelik inoya nẽ megeir ifenek, taka bun profet od ifenek, taka bun uur es fiya ifenek, taka bun od fire fire nem wogõya ifenek, taka bun od fire fire nem wogõya anĩ falei fiya ifenek.
¹¹ Enei ganan Awa Uur tekelei dogol ï yogon kabĩ, ï yogon oroya dõf fen, tamo kayau mugu mugu anĩ ifenëdidig.

Bouwa Tekelei, Fara Fiya Musei

¹² Bouwa anĩ tekelei, anĩ ere, bouwa anĩ fara fiya musei bunem inof. Yogon fara fiya ganan are musei, anĩ ere, idi bouwa tekelei dinof. Kristus ïg age fiya.
¹³ Ere nigin, ada ganan, Juda tamo be Grik tamo, ferfer be kafĩ fiya sã tamo, Awa Uur tekelei bunem naan tale fen, bouwada tekelei wõ taun, agef fen, ada ganan Awa Uur tekelei naan gen tokon, megeir talouf nigin ifanadan.

¹⁴ Bouwa ï fara fiya tekeleim to inof, anĩ ere, fara fiya museim inof.
¹⁵ Ye ï, aya ima sã, anĩ nigin, aya bouwa nẽ tunĩ sã youf, anĩ ere, gariya anĩ bun ï aya bouwa nẽ tunĩ sã yeya kisi feleya sã.
¹⁶ Takag, weder ï, aya mala sã, anĩ nigin, aya bouwa nẽ tunĩ sã youf, anĩ ere, gariya anĩ bun ï aya bouwa nẽ tunĩ sã yeya kisi feleya sã.
¹⁷ Bouwa adok malauf are, nainenem karĩ wouf? Bouwa adok wederouf are, nainenem sumeĩ walouf?
¹⁸ Anĩ ere, momoi, Negur ï bouwa nẽ fara fiya, ï orof kilei bagai, mugu mugu ganan inenëdin.
¹⁹ Bouwa nẽ fara fiya anĩ ganan tekelei youf are, bouwa ï nain ibodõf?
²⁰ Age fiya gen, bouwa nẽ fara fiya musei dibodok, anĩ ere, bouwa de tekelei.

²¹ Mala ima to irokenëf, “Aya õ to orouf!” Are, mudur ye to irokenëf, “Aya õ to orouf!”
²² Age fiya ban, bouwa nẽ fara fiya tunĩ to total sã tailedig anĩ sãf are, bouwa ibodõya kisi feleya sã.
²³ Ada bouwa nẽ fara fiya yana sã gen tauf anĩ, ada yana talesedig. Ada bouwa nẽ fara fiya yaor

fiya kisi feleya sã anĩ, dede ta, ed tafedig, ²⁴ anĩ ere, bouwada nẽ fara fiya yaor fiya kisi feleya anĩ, ada to dede ta, ed tafedig. Anĩ ere, Negur ĩ bouwa nẽ fara fiya bagu feleid fen, fara fiya yana sã idi yana odug ifenẽdin, ²⁵ anĩ bunem, bouwa bun foi fiya to ibodõf, anĩ ere, bouwa nẽ fara fiya idi abob nigin kilei kilei kisi difouf. ²⁶ Bouwa nẽ fara fiya takam darau yalouf are, bouwa nẽ fara fiya ganan ĩ geid darau daledig. Bouwa nẽ fara fiya takam yana yalouf are, bouwa nẽ fara fiya ganan ĩ geid kulĩ dedig.

²⁷ Gama, ã Kristus nẽ bouwa, are ã mugu mugu anĩ nẽ fara fiya. ²⁸ Sios bun Negur ĩ uyulil aposel ganan igirnẽdin, anĩ dõ fiya profet, anĩ dõ fiya tise, age fe di, memelik inoya tamo ado, dagi el fiya nẽ megeir dalen anidi, tunĩ isennẽdiya nigin kisi feleya anidi, erab erab lo fiya nigin megeir dalen anidi, od fire fire nem wogõya nigin kisi feleya anidig igirnẽdin. ²⁹ Idi ganan aposel de? Idi ganan profet de? Idi ganan tise de? Idi ganan memelik dinof de? ³⁰ Idi ganan dagi el fiya nẽ megeir dalef de? Idi ganan od fire fire nem wogõ def de? Idi ganan od fire fire nem wogõya anĩ falei difef de? ³¹ Anĩ ere, Awa Uur nẽ ege luwa odug yaleya nigin kisi total walougouf.

Gama aya naab gai biya bagai taka afelneĩf.

13

Wau Laa Fiya

¹ Aya tamo nẽ od fire fire nem ado engel nẽ od nem wogõ aufeg, wau laa fiya sãf are, aya belo gaõya be, kadod ait gũya gen dogol. ² Aya profet od wogõya nigin Awa Uur nẽ ege luwa ado fen, Negur nẽ waa ganan ado keleĩ ganan keleĩ ken, arei godo fiya nigin momoiya odug ado, anĩ ere, wau laa fiya sãf are, aya tamo ege. ³ Aya erab aya ado ganan maleg afeneĩd fen, bouwau atorõ di, yã malan dirãf, anĩ ere, aya wau laa fiya sãf are, aya mala biya taka to alouf.

⁴ Wau laa fiya are molol, wau laa fiya are dor yaleya. ĩ to kiyeĩ inodig. ĩ yogo yana to yalesedig. ĩ yogo to seli yabidig. ⁵ ĩ tobonunã sane sã, ĩ yogo nigin aya dogol to

yedig, ĩ kaisã to seye yedig, ĩ sane difiyek anĩ to karĩ yeledig. ⁶ Wau laa fiya anĩ sane nigin to kulĩ yedig, anĩ ere, momoi nigin kulĩ yedig. ⁷ ĩ faimud kulatun fedig, ĩ faimud momoi yedig, ĩ faimud wau isedig, ĩ faimud feseya sã megeir ifaredig.

⁸ Wau laa fiya are to bagai sa kalauf. Anĩ ere, profet od wogõya are sa kalauf, od fire fire nem wogõya are sa kalauf, keleĩ are sa kalauf. ⁹ Ere nigin, ada keleĩ tunĩ dogol keleĩ ken, profet od tunĩ dogol wogõ taudig, ¹⁰ anĩ ere, sain kibo feleya bagai anĩ isiyouf, kibo feleya bagai sã anĩ sa kalauf. ¹¹ Aya simõ bun, aya simõ gen wogõ aun, aya simõ gen kisi afen, aya simõ gen karĩ aun. Sain aya biyau fen, aya simõ nẽ tobonunã dumeun arailen. ¹² Gama ada dodo bun gen malakanon yaor sã tailedig, sain ada tarabã fadauf bun tutuk bagai tailauf. Gama aya tunĩ dogol keleĩ, sain anĩ bun Negur aya nigin ganan keleĩ gen, aya ganan keleĩ youf.

¹³ Are gama towo eneidi difaref, momoiya, wau iseya ado, wau laa fiya. Anĩ ere, anĩ atun wau laa fiya anĩ odug bagai, ganan wal fiya.

14

Profet Od Wogõya Ado Od Fire Fire Nem Wogõya Nigin Awa Uur Nẽ Ege Luwa

¹ Wau laa fiya nẽ naab dõg fen, Awa Uur nẽ ege luwa yaleya nigin kisi total walougouf, Awa Uur nẽ ege luwa bun profet od wogõya nẽ anĩ bagai walougouf. ² Ere nigin, taka ĩ od fire fire nem wogõ yef, ĩ tamo to wogõ fiyẽdif, anĩ ere, ĩ Negur wogõ fiyek. Are, taka nem in od to keleĩ youf. ĩ Awa Uur bunem Negur nẽ waa wogõ yef. ³ Anĩ ere, taka ĩ profet od wogõ yef, ĩ tamo megeir ifenẽdiyof nigin, waud yalesauf nigin ado, waud yo fouf nigin wogõ fiyẽdif. ⁴ Taka ĩ od fire fire nem wogõ yef, ĩ yogo dogol isennek, anĩ ere, taka ĩ profet od wogõ yef, ĩ sios isennek. ⁵ Aya ã ganan od fire fire nem wogõ gouf nigin orouf, anĩ ere, aya ã profet od wogõ gouf nigin orouf bagai. Taka ĩ od fire fire nem wogõ yef, ĩ sios isennẽf nigin taka nem yogon od to falei fouf are,

taka ï profet od wogõ yef anim, taka ï od fire nem wogõ yef anï wal fiya.

⁶ Turau tar, aya ã gein asi fen, od fire nem wogõ auf sain bun, aya kurõ fesiya od tunï, keleï, profet od be, faded fiya nẽ od, ã bun to arou asiyouf are, ere biya aya ã afeneïf? ⁷ Ereb idi mata sã aitedif, digẽ be gita age fiya, idi ailõ fire fire to dinouf are, naig fe di, taka nem ere seg kodẽ def anï keleï youf? ⁸ Takag, taur ait tutuk to wõ youf are, aim kusï nigin dodok fouf? ⁹ Æg age fiya. Æ, ãgenei baleim od fire nem yaor to wogõ gouf are, taka ï naig fe fen, ã wogõ gef anï keleï youf? Æ ege od yau bun urarãgouf dogol. ¹⁰ Tenebur ein od fire fire musei dibodok, anï ere, idi gariya sã taka to ibodok. ¹¹ Aya erreb taka nem wogõ yef, anï nẽ gariya to keleï youf are, aya wogõ yef anï nẽ yaũ tamo, age fe di, ï aya bun yaũ tamo. ¹² Æg age fiya. Æ Awa Uur nẽ ege luwa yaleya nigin kabï total walegedig, anï nigin, sios isennëya nẽ ege luwa yaleya nigin kabï total walogouf.

¹³ Age fiya nigin, taka ï od fire nem wogõ yef, ï erreb wogõ yef anï falei fouf nigin kosẽ youf. ¹⁴ Ere nigin, aya od fire nem kosẽ auf are, neu uur kosẽ yef, anï ere, neu kisi faat yũya sã. ¹⁵ Anï nigin, aya naig afouf? Aya neu uur bun kosẽ auf, anï ere, aya neu kisi buneg kosẽ auf. Aya neu uur bun seg alouf, anï ere, aya neu kisi buneg seg alouf. ¹⁶ Õ ogon uur bun Negur yana walesauf are, taka ï idi anï to keleï anidi atun ibodok, ï erreb õ urok anï keleï sã nigin, naig fe fen, ï ogon de fiyëya bun “Momoi” youf? ¹⁷ Õ ogon de fiya are biya bagai, anï ere, taka to usennek.

¹⁸ Aya ã ganan wal yeïya, od fire nem wogõ auf nigin Negur de afiyek. ¹⁹ Anï ere, sios bun, aya ten tausen od od fire nem wogõya anï fotokar, tunï tai fediya nigin od faif bun yaor wogõ auf anï orouf.

²⁰ Turau tar, ãgenei kisi bun simõ gen to ufareg. Sane nigin, momou nẽ kisi gen ufareg, anï ere, ãgenei kisi bun biyeï ufareg. ²¹ Lo bun eig ye itoton:

Odug irok,

* **14:21:** Asaia 28:11, 12

“Tamo od fire nem wogõ def anidi bunem ado,
yaũ tamo sigoreid bunem,
aya tamo kayau eneidi wogõ afediyouf,
anï ere, sain anï buneg idi aya to karï difiyauf.”*

²² Anï nigin, od fire nem wogõya are, momoiya tamo kayau bun uris sã, anï ere, momoiya sã tamo kayau bun uris. Anï ere, profet od wogõya are, momoiya tamo kayau bun, momoiya sã tamo kayau bun sã. ²³ Anï nigin, sios guru fiya odug bun, tamo kayau ganan od fire nem wogõ de di, tunï anï keleï sã be, tunï momoiya sã disiyouf are, idi ã nigin wadã ideneik to douf de? ²⁴ Anï ere, taka ï momoiya sã be, taka ï anï keleï sã, tamo kayau ganan profet od wogõ de mog, isiyouf are, ï tamo kayau ganan neid wogõya bunem ï mosor tamo ya anï kisi fokõ ye di, tamo kayau ganan ï es difiyëf, ²⁵ age dife di, yogon wau bun iminëdig anï yaorouf. Anï nigin, ï kusureis fen, Negur yana yales, “Momoi bagai, Negur ã atun ibodok,” youf.

Negur Yana Suma Dõf Yaleseya

²⁶ Anï nigin, turau tar, ada naig tafouf? Sain ã guru gef, ã ganan atun taka seg ado, taka faded fiya nẽ od ado, taka kurõ fesiya od ado, taka od fire nem wogõya be, od fire nem wogõya anï falei fiya adof. Anï ganan sios megeir fiya nigin ago gouf. ²⁷ Taka ï od fire nem wogõ youf are, uru be, towom dogol age fiya sain dale fen, teke tekeleim wogõ douf. Age fe di, taka nem od fire nem wogõya anï falei fouf. ²⁸ Od fire nem wogõya anï falei fiya tamo sãf are, wogõya tamo ï sios bun foro yel fen, yogo ado Negur bun wogõ youf.

²⁹ Profet uru be, towom age fiya wogõ douf, age de mog, tunï ganan, erreb wogõ yef anï el de es difouf. ³⁰ Anï ere, idi guru fiya dibodok anidi atun, kurõ fesiya od taka, taka bun isiyouf are, uyu wogõ yef are dẽ yalauf. ³¹ Ere nigin, ã ganan sain waleg fen, teke tekeleim profet od wogõ gouf, anï bunem, ganan keleï dale fen, waud yalesauf. ³² Profet neid uur are profet dogo kulatun dife fen, dogo neid

wogōya sain bun dogol wogō douf. ³³ Ere nigin, Negur ī ekul fiya nē Negur sã, ī wau inosiya nē Negur.

Tamo kayau fateul neid sios ganan bun age difedig gen, ³⁴ kayau idi sios bun foro del difarauf. Idi wogōya nē modoū to difenēdiyof, anī ere, idi Lo irok kilei, anī dō difouf. ³⁵ Idi ereb taka nigin to fiya orodiyof are, idi neid fō bun dogo neid tamo to difediyof, ere nigin, kayau taka sios bun wogōya are mama ado.

³⁶ Negur nē od ā bunem gariya inon de? Od anī ā bun dogol isin de? ³⁷ Taka ī kisif, ī profet taka be, ī Awa Uur nē ege luwa alen youf are, ī ereb aya atotkeneik are Odug nē itāfiya ya anī keleī youf. ³⁸ Taka ī enei welebi fouf are, ī yogo welebi fiyēf.

³⁹ Anī nigin, turau tar, profet od wogō gouf nigin kisi total walogouf. Agog fen, od fire nem wogōya nigin to katū wiyēdigouf. ⁴⁰ Anī ere, ereb ereb ganan suma bagai dōg fen, biya bagai ago gouf.

15

Kristus Nē Mata Kel Fāya

¹ Turau tar, aya biya od wogō ayeī di, waleg fen, anī teten ufaregef anī, baban ā kisi turī ayeīf nigin orouf. ² Ā od aya wogō ayein anī, uroug kafī waleg fen, ege to momoi gen ouf are, biya od enei bunem ā kel gei yeīf.

³ Ere nigin, ereb aya alen, are odug bagai nigin, uyulil anī aya ā afenein, are Kristus ī, Negur nē Itotoya bun yenek kilei, neda mosor nigin laa fe di, ⁴ ī mū difen, are Negur nē Itotoya bun yenek kilei, naa towo bun ī mata kel fā yen, ⁵ are ī Pita bun wō ye fen, anī dumen in dō fiya tar tuwelf bun wō yen. ⁶ Anī bure fele di, ī sain tekelei bun tura tar faif hundred wal fiya meleid bun wō yen, anidi ganan musei fau dibodok, tunī gare den. ⁷ Agef fen, ī Jems mala bun wō yen, anī dumen aposel ganan meleid bun wō yen. ⁸ Anī ganan bure fel fen, idikeleya bun, ī, aya kesu gō fiya sain sã bun gō difiyan gen anī, malau buneg wō yen.

⁹ Ere nigin, aya aposel idi atun naal bagai, aya to biya nigin aposel yeya nigin kisi feleya sã, ere nigin, aya Negur

nē sios darau afenen. ¹⁰ Anī ere, Negur nē wau ifenēya bunem, aya gama afaref gen age wō aun. Aya bun yogon wau ifenēya anī ege to ilen. Sã, aya kabī total idi ganan wal fediya alen, are ayam sã, anī ere, Negur aya ado ibodon in wau ifenēya anim. ¹¹ Age fiya nigin, ayam be, idim, amā enei wogō mauf, are ā enei momoi gen.

Gare Den Tamo Neid Mata Kel Fāya

¹² Amā Kristus gare den anidi bun tamal mata kel fā yen anī wogō maudig, anī ere, naig fe di, ā tunī, gare den anidi mata to ke de fā douf gedig? ¹³ Gare den anidi, mata to ke de fā douf are, Kristus īg mata to kel fā yem. ¹⁴ Kristus ī mata to kel fā yem are, nemā wogōya anī kaū sã di, āgenei momoiya areg kaū sam. ¹⁵ Age fiyam are, amā Negur nigin idegēya od wogō maudig anī dilemam, ere nigin, amā Negur ī Kristus gare den anidi bun tamal turī fiyen anī kurō mafesidig. Anī ere, Negur ī gare den anidi to turī fediyof anī momoi ouf are, ī Kristus to turī fiyem. ¹⁶ Ere nigin, Negur ī gare den anidi to turī fediyof are, ī Kristuseg to turī fiyem. ¹⁷ Negur ī Kristus to turī fiyem are, āgenei momoiya are ege, ā āgenei mosor bun fau ubodōgef. ¹⁸ Age fiyam are, idi Kristus nigin momoi de fen, gare den anidig fō delem. ¹⁹ Ada ein mata ibodōya enei nigin dogol, Kristus bun wauda iseya adouf are, ada tamo ganan wal fediya maladalon ado.

²⁰ Anī ere, Kristus momoi bagai gare den anidi bun tamal kel turī fiyen, are idi gare den anidi bun tamal faat uyulil yun gen. ²¹ Are, laa are tamo tekelei bunem isin nigin, gare den neid kel fāya areg tamo tekelei bunem isif. ²² Are, Adam bun ganan gare dedig, age fiya gen, Kristus bun ganan mata ifenēdiyof. ²³ Anī ere, idi mugu mugu dogo neid sain bun age difouf: Kristus ī uyulil faat yūya, anī dumen, ī isiyof sain bun, idi yogon dibodok anidi, mata ke de fā douf. ²⁴ Anī bure fele di, idikeleya sain isiyof, sain anī bun, Kristus ī gawaman ganan, yeneid ado ganan, megeir ganan daū fel fen, tano anī yale, Dei Negur ima bun inouf. ²⁵ Ere nigin,

ĩ king ibodok ile, yogon kiwai tar ganan yogo ye farumen inenēdiyof sain anĩ bun. ²⁶ Kiwai idikeleya bun daũ fiya nē, are laa. ²⁷ Are Negur nē Itotoya bun eig ye irok kilei, “Negur ĩ ereb ereb ganan yogo ye farumen inenēdin.”* Sain ĩ irok, are ereb ereb ganan ĩ farumen inenēdin, are Negur ĩ ereb ereb ganan Kristus farumen inenēdin, Negur ĩ yogo enei farumen to ibodok ya anĩ yaor. ²⁸ Sain Negur ĩ enei age fel fen, Naal yogo, Negur ĩ ereb ereb ganan Kristus farumen inenēdin anĩ, farumen inenēf, anĩ bunem, Negur ĩ ereb ereb ganan nē mudur ibodōf.

²⁹ Mata kel fāya anĩ sãf are, idi tamo gare den anidi nigin naan dalef idi naig difouf? Tamo gare den anidi to bagai kel turĩ fediyof are, ere nigin tamo kayau idi nigin naan daledig? ³⁰ Takag, amã nigin, ere nigin amã mug sain ganan bouwamã willa bun manenēdig? ³¹ Turau tar, aya ã neda Odug Kristus Jesus bun ubodōgef nigin, yanau alesedig anĩ bunem, momoi bagai enei total bagai arok, are aya naa ganan laa bun eledig. ³² Aya tamo nē kisi bunem dogol, Efesus oun gaar kuĩ geid kusĩ aun ouf are, ere mala biya anĩ aya alen? Tamo gare den anidi to kel turĩ fediyof are, Negur nē Itotoya bun yenek kilei,

“Saaf ado naan tãf,
ere nigin, nil gare tauf.”†

³³ ã taka nem to idegneif. “Sane geid nigal yũya bun, tobonunã biya daũ fedig.”

³⁴ Kisi biya bun kel usig ufareg fen, mosor inoya utorōg, ere nigin, ã atun tunĩ Negur nigin keleĩ sã difaref. Aya ã mama yeif nigin enei wogō auf.

Kel Fāya Nē Bouwa

³⁵ Anĩ ere, taka nem to fouf, “Tamo gare den anidi, naig fe kel turĩ fediyof? Bouweid naig fiya bagai ado disiyof?” ³⁶ ã neneya bagai! Ereb õ tu wouf anĩ, to laa fouf are, anĩ mata to wō youf. ³⁷ Sain õ tu wof, õ fau ibodōf nē bouwa anĩ to utenek, anĩ ere, wit be, ereb taka nē faat dogol. ³⁸ Anĩ ere, Negur ĩ oron kilei, bouwa ifenēdig, agef fen, ĩ faat fire fire dogo neid

bouweid fire fire ifenēdidig. ³⁹ Bouwa ganan tekelei sã. Tamo nē bouwa are fire, gaar bouwa fire, ninã bouwa fire, gau bouwa fire. ⁴⁰ Saa ilun nē bouweid ado di, tenebur nē bouweideg ado. Anĩ ere, saa ilun nē bouweid fula fiya medeīya fire di, tenebur nē bouweid fula fiya medeīya areg fire. ⁴¹ Gaa are futu reya fire di, ogō are futu reya fire, age fe di, barisa are futu reya fire. Barisa idi atuneg futu reya fire fire ado.

⁴² Age fiya gen, tamo gare den anidi neid mata kel fāya areg age fouf. Bouwa tu fiyaf nē are bura le di, bouwa kel fã yef nē are to bura ledig. ⁴³ Sane bun tu fiya di, fula fiya medeīya bun kel fã yef. Total sã tu fiya di, total ado kel fã yef. ⁴⁴ Bouwa buru maug are tu fiya di, uur nē bouwa are kel fã yef.

Bouwa buru maug ibodok are, uur nē bouwag ibodok. ⁴⁵ Anĩ nigin, Negur nē Itotoya bun eig ye irok, “Uyulil inon tamo Adam ĩ mata ibodōya wō yen.”‡ Idikeleya Adam ĩ mata ifenēya nē uur wō yen. ⁴⁶ Uur nē bouwa ketem to isin, anĩ ere, bouwa buru maug ketem isin. Age fe di, anĩ dumen, uur nē bouwa. ⁴⁷ Uyulil inon tamo are tenebur aas nē, anĩ dō fiya tamo are saa ilun nē. ⁴⁸ Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal gen. ⁴⁹ Ada tenebur tamo inon age fiya tabodok gen, adag tamo saa ilun tamal age fiya tabodōf.

⁵⁰ Turau tar, aya ã arokeneik, are tenebur nē bouwam Negur nē tano to akorou youf. Ere bura ledig anĩg to bura lauf anĩ to akorou youf. ⁵¹ Karĩ wog, aya waa taka arokeneif: Ada ganan to gare tauf, anĩ ere, ada ganan bouwada falei fouf, ⁵² are ereb fili yeleya be, mala kamisāya gen idikeleya nē taur aitouf bun, bouwada agef falei fouf. Taur aite di, tamo gare den anidi kel turĩ fedi di, to buraya nē ado fã douf, age fe di, ada bouwada falei fouf. ⁵³ Are, buraya nē anĩ to burauf nē anĩ ifonũf. Laa fiya nē anĩ to laa fouf nē anĩ ifonũf. ⁵⁴ Buraya nē anĩ to burauf nē anĩ ifonũf, laa fiya nē anĩ to laa fouf nē anĩ ifonũf sain anĩ bun, Negur nē Itotoya bun ibodok enei agef kisi fel wō youf,

* 15:27: Sam 8:6 † 15:32: Asaia 22:13 ‡ 15:45: Jenesis 2:7

“Negurem kusī bun laa wal fe fen, anī adok itob len.”§

⁵⁵ “O laa, ogon kusī wal fiya nē megeir nain?

O laa, ogon willa nain?”*

⁵⁶ Laa nē willa are mosor, mosor nē megeir are lo. ⁵⁷ Anī ere, Negur de tafiyēf! Ī neda Odug Jesus Kristus bunem kusī wal fiya ifanadadig.

⁵⁸ Anī nigin, neu turau tar oboiyou, total ufareg. Ereb takam to yokū yeif. Faimud Odug nē kabī fatuk bagai walogouf, ere nigin, ā keleī, are ā Odug bun kabī walegef anī, ege to ilauf.

16

Negur Nē Tamo Kayau Isennēdiya Nigin Kolekta

¹ Gama Negur nē tamo kayau isennēdiya nē kolekta nigin, ereb aya Galesia sios age difouf nigin arokenēdin anī ago gouf.

² Uub ganan nē naa matu bun, ā mugu mugu, augeneī moni walegedig anī foig, fire unog fen, kuru gouf, anī bunem, sain aya asiyouf bun, kolekta baban to unogouf. ³ Sain aya wō auf, tamo ā ugirnēdigen anidi bun, pas afeneīd fen, āgenei ege luwa ado Jerusalem sur afediyouf. ⁴ Ayag idi geid ileya nigin deuf are, idi aya geid weim malauf.

Pol Nē Wau Irōya

⁵ Aya Masedonia provins atu atu ele fen, ā gein asiyouf, ere nigin, aya Masedonia atu atu alauf. ⁶ Aya ā geid sain naal tabodōf be, yau ado menig sain bun ā geid tabodōf, anī bunem, ā neu iyōya nain be alauf bun usennagauf. ⁷ Aya gama ā ailiyei ken, sain naal ki yeīya anī to orouf. Odug yo youf are, aya sain naal meluk ā geid tabodōf anī wau irok. ⁸ Anī ere, aya Efesus ein abodok ele, Pentikos naa wō youf, ⁹ ere nigin, kabī kaū ado nē sukar odug, aya bun kā fen, age fe di, musei aya kiwai difanaf.

¹⁰ Timoti isiyouf are, ĩ ā geid ibodōf bun, ĩ ereb taka nigin to kumī youf nigin lo welegei, ere nigin, ĩ aya gen Odug nē kabī faali fef. ¹¹ Anī nigin, taka nem ĩ

yaleya nigin to itorōf. Yogon delē bun wau inosiya ado sur wiyēge di, ĩ aya gein kel isiyouf. Ī tura tar geid disiyouf nigin, aya ololo afedif.

¹² Neda turada Apolos nigin, ĩ tura tar geid ā gein dilauf nigin, aya total bagai arokenen. Ī gama ileya nigin wau yenēya sā, anī ere, ĩ ileya nigin sain biya isiyouf are, ĩ ilauf.

¹³ Lo welegei, momoiya bun total ufareg, tamo total ado kumī sā wōg, total waleg. ¹⁴ Ereb ereb ganan wau laa fiya bun ago gouf.

¹⁵ Ā keleī, are Stefanas nē ibor, Akaia provins oun uyulil momoiya tamo kayau wō de fen, idi dogo neid oroya dō de, Negur nē tamo kayau disennēdiyof nigin, kabī total daledig. Turau tar, aya total bagai arokeneik, ¹⁶ are ā eneidi age fediya ado, idi ganan kabī bun disi fen, kabī dalef anidi farumen ubodōg. ¹⁷ Sain Stefanas, Fotunatus ado, Akaikus wō den, aya wau al fen, ere nigin, ereb ā bun tamal ifanamāya anī, idim ā fotokar difanaman. ¹⁸ Are, idi age dife di, neu uur ado āgeneig filolō fen. Anī nigin, tamo age fediya nigin de fiyēdiya nē kisi walogouf.

Idikeleya Nē Aanya

¹⁹ Asia provins bun sios idi, ā bun aanya sur difef. Akwila Prisila ado aanya, wau sere fiya ado Odug bunem ā bun sur difef. Sios idi neid fō bun guru difedig idig age difef. ²⁰ Ein tureī tar ganan ā bun aanya sur difef. Ā abob aan wiyēg fen, fateul bunem umā gouf.

²¹ Aya, Pol imaum bagai aanya enei atotof.

²² Taka ĩ Odug nigin wau to laa fouf are, isisīya ĩ bun isiyouf. O Odug, usi!

²³ Odug Jesus nē wau ifenēya, ā bun ibodōf.

²⁴ Neu wau laa fiya, Kristus Jesus bunem ā ganan bun ibodōf. Momoi.

2 Korin

¹ Pol, Negur nē oroya bunem Kristus Jesus nē aposel wō aun, neda turada Timoti ado,

pas enei Negur nē sios Korin bun ado, tamo kayau fateul ganan Akaia provins bun dibodok bun matotof.

² Tamada Negur ado Odug Jesus Kristus neid wau ifenēya ado wau inosiya, ā bun ibodōf.

Wau Yo Fiya Ganana Nē Negur

³ Negur, neda Odug Jesus Kristus Tama, wau yūya nē Tama, wau yo fiya ganana nē Negur yana talesauf, ⁴ ī neda morō ganana bun wauda yo fedig, anī nigin, ada dug wau yo fiya Negur bun tamal talen anī bunem, idi morō adodo anidi waud yo tafedig. ⁵ Kristus nē darau gogūf, ada namedan isif gen, neda wau yo fiya anī Kristus bunem gogū felef. ⁶ Amā darau malef are, anī āgenei wauī yo fiya nigin ado, kel gei yeīya nigin. Amā waumā yo fef are, anī āgenei wauī yo fiya nigin, anī bunem darau de tekelei amāg malef anī, ā faali gef ulegef. ⁷ Ā nigin nemā waumā iseya total ifaref, ere nigin, amā keleī, are ā nemā darau walegef gen, ā nemā waumā yo fiyag walegef.

⁸ Turamā tar, darau amā Asia provins bun malen anī, ā to keleī youf anī, to oromak. Amā morō faali fiya kisi feleya sā bagai bun mabodon, anī nigin, amā mata ibodōya nē kisig matoron. ⁹ Momoi, amā waumā bun, es fiya tamo kot bun taka laa foug ye di, kisi fedig gen, kisi mafen. Anī ere, amā mug bun to mafar fen, Negur tamo gare den anidi kel turī fedidig ī bun mafarauf nigin enei wō yen. ¹⁰ Ī laa nē willa ado kafī fiya age fiya bun tamal yalelnaman, anī nigin, ī fau yalelnamāf. Ī toku yalelnamāf nigin waumā iseya ī bun manon. ¹¹ Are ā, āgenei kosēya bunem usennamāge di, Negurem age foug. Negur ī musei neid kosēya solof fen, wau ifenēya nē ege luwa ifanamāf nigin, museim amā nigin Negur de difiyēf.

Pol Iyōya Nē Delē Falei Yen

¹² Amā mug nigin seli yabiya are yeir: Nemā kisi es fiya bun kurō fesif, are amā tenebur ein, Negur nē fateul ado momoi bunem, ā bun bagai age mafedig. Amā tenebur ein bouwa buru isennēya nē kisi biya bunem to age mafedig, anī ere, Negur nē wau ifenēya bunem age mafedig. ¹³⁻¹⁴ Amā ereb ā uweseg fen, ā keleī anī wal fiya to matotkeneik. Gama ā amā nigin naal keleī, anī ere, ā amā nigin keleī bagai youf anī oromak, anī bunem amā Odug Jesus nē naa bun ā nigin selī malesauf gen, āg amā nigin selimā walesagauf.

¹⁵ Aya enei momoi bagai agef wō youf au fen, ā sain uru el fiya walogouf nigin, ā ket ki yeīya anī kisi afen. ¹⁶ Aya Masedonia provins ileya nigin asi, ki ayei ken, Masedonia ele fen, anenem ā gein baban kela asi di, ā aya Judia distrik ileya nigin sur wiyagauf nigin kisi afen. ¹⁷ Sain aya enei kisi afen, aya karika bagai age afen de? Aya, tenebur nē tamo kayau age difedig gen, nameun “Sā” au fen, sigoroum “Yo” auf de?

¹⁸ Anī ere, Negur ī age afoug ye fen, agef bagai dō fedig gen, nemā od ā gein isif are yo ye fen, sāya sā. ¹⁹ Ere nigin, Negur Naal, Jesus Kristus ī nigin, aya, Sailas Timoti ado geid ā atun wogō mayeīdig anī, ī sain tekelei bun, yo ye fen, to sā yedig, anī ere, ereb ī yo yef anī, ī faimud agef dōf kisi feledig. ²⁰ Ereb Negur age afoug yen od anī ganana Kristus bun yoya dogol. Anī nigin, ī bunem ada Negur bun fula fiya medeīya tarousiyoug nigin, sigoradam “Momoi” taudig. ²¹ Negurem, amā ado ā, Kristus bun total tafarauf nigin age fef. Ī igirnada fen, ada bun moul fi fel fen, ²² ī, ada yogon nigin, ada bun yogon uris ino fen, ī wauda bun, ereb isiyoug anī momoi bagai isiyoug ye fen, yogon Awa Ur iben.

²³ Negur ī aya nigin keleī bagai nigin, ī neu od megeir fe fen, isennēdidig, ī aya isennauf nigin aweignek, are aya ā nigin wauī ina fen, morō ifeneīya ator ken, Korin to kela asin. ²⁴ Amā āgenei momoiya nugo fiyēya nigin to age mafef, anī ere, amā ā wauī al foug nigin ā geid

kabī malef, ere nigin, momoiya bunem ā total ufaregef.

2

¹ Anī nigin, aya ā gein morō ado baban to ki ayeif nigin, neu kisi afon. ² Ere nigin, aya ā wauī morō afeneif are, aim anī aya wau al fiya ifanauf, are ā aya morō afenein anim dogol sā de? ³ Aya enei bagai nigin atotkenein, are sain aya asiyouf bun, idi aya wau al fiya difanauf anidi bun, aya morō to alouf nigin age afen. Aya enei momoi auf, are sain aya wau al fef, ā gananege wauī al fef. ⁴ Aya morō odug ado wau gudū fiya bun, inā odug ado atotkenein, are aya ā morō afeneif nigin to age afen, anī ere, ā bun neu wau laa fiya odug bagai anī, ā keleī youf nigin age afen.

Mosor Tamo Nē Mosor Nigin Weder Tu Keleya

⁵ Tamo anim morō ifenen ouf are, ī aya morō to ifanan, anī ere, ī ā gananege morō sau fiya ifenein. Aya total bagai to arōf nigin ‘sau fiya’ auf. ⁶ Ā musei gananege ī darau wenēgen are, ī nigin kisi feleya. ⁷ Age fiya ban, gama ā in mosor wedereī tu kel fen, ī wau yo gouf, anī bunem, ī wau gudū fiya fatuk bagaim to kuroub fiyēf. ⁸ Anī nigin, aya ī āgenei wauī laa fiya baban ufelnēgouf nigin total od arokeneik. ⁹ Aya, pas bun ā atotkenein, ere nigin, aya ā kisi ayeī di, ā ereb ereb gananege bun neu od dō gouf anī ailauf nigin age afen. ¹⁰ Ā taka nē mosor nigin wedereī tu kalauf are, ayag in mosor nigin wederou tu kalauf. Ereb taka weder tu keleya nē ibodō di, aya wederou tu kelen, are aya āgenei biya fiya nigin, Kristus mala bun wederou tu kelen, ¹¹ are Satanem ada to wal fada fen, bilā youf nigin age afen. Ere nigin, ada yogon kisi keleī.

Bar Itenēya Mata Nē Kabī Tamo Tar

¹² Sain aya Kristus nē biya od wogō auf nigin Troas taun ele fen, Odug ī aya nigin sukar kā fel mog ailen, ¹³ aya fau nameun wau inosiya san, ere nigin, aya turau Taitus an to ailen. Anī nigin, aya idi dabuo afiyeīd fen, Masedonia provins elen.

¹⁴ Anī ere, Negur de mafiyēf, ī faimud amā Kristus bun kusī wal fiya bun uyu iroukanamādig, agef fen, ī, amā bunem, Kristus nigin keleī anī nē sumeī biya, modoū gananege bun firagagaū feledig. ¹⁵ Ere nigin, amā idi kel gei fedif anidi ado idi isaikalauf anidi atun, Negur mala bun, Kristus nē sumeī biya. ¹⁶ Taka bun amā laa nē sumeī, taka bun amā mata ifenēya nē sumeī biya. Aim anī kabī age fiya yaleya kisi feleya? ¹⁷ Amā, musei idi Negur nē od nigin moni mala kabī daledig gen sā. Age fiya ban, Kristus bun, amā, tamo Negurem sur fedin gen, Negur mala bun momoi nē bunem wogō maudig.

3

¹ Amā baban yanamā yaleseya nigin gariya manof de? Amā, tamo tunī age difedig gen, kabī biya daledig nē isennēya pas, amam ā gein sur mafouf be, āgem amā bun sur gouf de? ² Ā aug anī, nemā pas, are waumā bun itoton, age fe di, tamo gananege keleī ken, diwesedig. ³ Ā aug anī, Kristus nē pas, nemā kabī nē kaū anī yaor gef, itoton are ink bunem sā, are mata ibodkeleya Negur nē Awa Uur bunem, meein fadaleya bun sā, are tamo waud bun.

⁴ Amā enei morok, ere nigin, amā Kristus bunem, Negur nigin momoiya ado. ⁵ Amā ereb taka amā mug bunem isif yeya kisi feleya sā, anī ere, amā nemā kisi feleya Negur bunem isif. ⁶ Negur ī amāge bar itenēya mata nē kabī tamo wōya kisi feleya inenaman, are lo itotoya nē sā, Awa Uur nē, ere nigin, lo itotoya anim idenkesidig, anī ere, Awa Uur im mata ifenēdidig.

Bar Itenēya Mata Nē Fula Fiya Medeīya

⁷ Kabī laa irou isidig, are meein bun gegē itoton anī fula fiya medeīya ado isin, anī nigin, Israel tamo kayau yogon fula fiya medeīya nigin meleid dē yel fen, Moses nē nawa lo feleya kisi feleya san, anī ere, fula fiya medeīya anī komomor fen. Kabī age fiya fula fiya medeīya ado isin ouf are, ⁸ Awa Uur nē kabī nē fula fiya medeīya anim lo nē fula fiya medeīya anī to wal fouf de? ⁹ Tamo neid mosor nigin

bouweid bun od yūdig nē kabī anī, fula fiya medeīyauf are, kabī madur bagai irou isidig in fula fiya medeīya nē odug naig fiya bagai! ¹⁰ Ereb kulu fula fiya medeīya yenen, are gama nē fula fiya medeīya odug bagai nigin, kulu nē are sa kelen. ¹¹ Ereb komomor falauf nē anī, fula fiya medeīya ado isin ouf are, faimud ibodkeleya nē fula fiya medeīya, yogon odug naig fiya bagai!

¹² Anī nigin, amā waumā iseya age fiya ado nigin, amā wogōya bun tuninirya sã. ¹³ Amā Moses gen sã, ī yogo nawa bun lalan komomor fe mog, Israel tamo kayau to dilouf nigin, yogo nawa bun gabar dede fedig. ¹⁴ Anī ere, idi neid kisi totolen, are sain enei bun, bar itenēya tubu iweseya bun gabar de anim fau ibodok. Gabar anī fau yaleleya sã ibodok, ere nigin, Kristus bun dogol anī yaleleyauf. ¹⁵ Sain enei buneg, Moses nē itotoya iweseya bun, gabar dogo neid waud dede fedig. ¹⁶ Anī ere, ereb sain taka ī Odug bun falei youf are, gabar are lelek felef. ¹⁷ Gama, Odug ī Awa Uur, Odug nē Awa Uur ibodok nē an, are katī feleya taka sã. ¹⁸ Anī nigin, ada ganan, nawada bun gabarem dede fiya sã are, Odug nē fula fiya medeīya tail fen, ada bun so fe di, ada ī gen falei fada di, neda fula fiya medeīya odugef iledig, are Odug bunem isidig, ī anī Awa Uur.

4

Mis Namen Safina Biya Bagai

¹ Anī nigin, amā Negur nē wau yūya bunem kabī enei ado nigin, amā waumā bun to folo redig. ² Anī ere, amā inokōya ado mama nē naab matoron, amā to madeg ken, Negur nē od to falei mafeledig. Anī ere, amā momoi nē anī yaor mafe fen, Negur mala bun, tamo ganan dogo neid kisi es fiya bun, amā mug nigin yanamã iseledig. ³ Amā nemã biya od dede fiyauf are, idi inanakalauf nē anidi bun dede fedif. ⁴ Teneub enei nē waitou, idi momoiya sã anidi neid kisi ifofakelen, anī nigin, Kristus ī anī Negur nē malakanon, yogon fula fiya medeīya nē biya od anī nē lalan, idi ileyã kisi feleya sã. ⁵ Amã, amã mug nigin to wogō maudig, anī ere,

Jesus Kristus ī Odug mau fen, amã Jesus nigin āgenei ferfer maudig. ⁶ Negur ī iron, “Gugum namen lalan fula fei,”* yen, inim Kristus nē nawa bun yogon fula fiya medeīya anī, amã keleī youf nigin, yogon lalan waumā bun fula fouf nigin inon.

⁷ Anī ere, amã nameman mis namen gen, safina biya bagai enei ado, are ereb ereb ganan wal fiya nē megeir, are amã nemã sã, Negur nē anī yaorouf nigin. ⁸ Amã siri ganan bun total bagai lai difamak, anī ere, narī famāya sã; ereb taka age mafouf nigin neneya difanamak, anī ere, amã waumā folo reya sã; ⁹ darau difanamak, anī ere, to folō famalef; dide-namã dirarak, anī ere, daū famaleya sã. ¹⁰ Amã faimud Jesus nē laa anī, bouwamã bun faali ma mayōdig, are Jesus nē matag bouwamã bun yaorouf nigin. ¹¹ Amã mata mabodok, anī ere, faimud Jesus nigin laa bun dinenamãdig, are yogon matag nemã laa nē bouwamã bun yaorouf nigin. ¹² Anī nigin, laa, amã bun kabī yaledig, anī ere, mata, ā bun kabī yaledig.

¹³ Negur nē Itotoya eig yef, “Aya momoi aun, anī nigin, aya wogō aun.”† Momoiya de tekelei anī nē kisi bunem, amãg momoi mauf, anī nigin, amãg wogō mauf, ¹⁴ ere nigin, amã keleī, Negur ī Odug Jesus laa bun tamal kel turī fen anim, amãg Jesus geid kel turī fama ken, amã ā geid in mala bun inenadauf. ¹⁵ Enei ganan are, āgenei biya fiya nigin, anī bunem, wau ifenēya anī tamo kayau bun kaka fef ile di, dogo neid Negur de fiyēya gogū fef anim, Negur fula fiya medeīya ifenēf.

¹⁶ Anī nigin, amã waumā to folo redig. Amã bouwamã buru foinenem ilumuk iledig, anī ere, amã nameman naa ganan bun mataya tobol fe iledig. ¹⁷ Nemã karika ado sain modeg nē morō anim, faimud ibodkeleya nē fula fiya medeīya, are morō anī ganan fatuk bagai wal fiya anī, amã malouf nigin kabī yaledig. ¹⁸ Anī nigin, ada ereb maladam tailef ani to lo tafalauf, anī ere, ereb maladam to tailef anī lo tafalauf. Ere nigin, ereb tailef, are sain tobega nē, anī ere, ereb to tailef, are faimud ibodkeleya nē.

* 4:6: Jenesis 1:3 † 4:13: Sam 116:10

5

Saa Tanon Ibodōya Nē Bouwa

¹ Ada keleī, tenebur nē salafat ada anī namen tabodōdig anī narī foug are, ada fō taka Negur bun tamal ado, are saa ilun oun faimud ibodkeleya nē fō, are tamo imam inoya sã. ² Gama ada fō enei bun tabod ken, osi taudig, age tafe fen, saa ilun neda ibodōya modoū bunem ifounnadauf nigin wauda fatuk irōdig, ³ ere nigin, ada saa tanon ibodōya nē bouwa ifounnadauf sain bun, ada gemū to diledauf. ⁴ Ada salafat enei bun tabod mog, morō faali tafe fen, osi taudig, ere nigin, ada salafat enei lelek fel kanadauf nigin to orodadig, anī ere, saa ilun neda ibodōya modoū bun ifounnadauf nigin orodadig, anī bunem, ereb laa nē anī, mata anim itob lauf. ⁵ Negur ī enei nigin bagai ada inoda fen, ada wauda bun, ereb isiyouf anī momoi bagai isiyouf ye fen, Awa Uur iben.

⁶ Anī nigin, ada faimud kisi total ado fen keleī, are ada bouwada buru ado tabodok sain anī bun, ada Odug weim to tabodōdig. ⁷ Ada momoiya bunem tabodōdig, ereb maladam tailef bunem sã. ⁸ Aya arok, ada kisi total ado fen, ada bouwada enei tator ken, Odug geid takai tabodōf nigin orodaf bagai. ⁹ Anī nigin, ada bouwada buru ado tabodok be tatorok be, ī wau al foug nigin ada kisi tatenēf. ¹⁰ Ere nigin, ada ganan Kristus nē es fiya sia wagen wō taur bagai, are mugu mugu, ereb biya be sane be, ada bouwada buru ado tabod ken, age tafan anī kilei, yogon mala solo yalouf.

Komo Fiya Nē Kabī

¹¹ Amã Odug anini fiyēya anī keleī nigin, amã tamo waud yaleya nigin age mafedig. Amã naig fiya anī Negur keleī bagai, age fiya gen, amã nigineg āgenei kisi es fiya bun yaorouf nigin, aya wau irok. ¹² Amã ā bun baban yanamã yaleseya nigin to age mafef, anī ere, ā amã yanamã walesagauf nigin sain mafeneik, anī bunem, idi ereb waud bun ibodok anī fotokar, ereb meledim dilef anī nigin yeneid dalesedig anidi bun, ā solof irōya kisi feleya. ¹³ Amã wadã idenamãf, are Negur nigin. Amã kisi

biya adouf, are ā nigin. ¹⁴ Kristus nē wau laa fiya anim amã toli famādig, amã kisi mafef, tekeleim ganan nigin laa fen, anī nigin, yogon laa bun, ganan gare den. ¹⁵ Ī ganan nigin laa fen, anī nigin, idi mata dibodok anidi dogo nigin to dibodōf, anī ere, ī idi nigin laa fe di, kel turī fiyen anī nigin dibodōf.

¹⁶ Anī nigin, gama einenem ilef ganan, ada tamo nē karīya bunem taka to keleī youf. Ada kulu naab enei bunem Kristus kelein, anī ere, ada baban to age tafedig. ¹⁷ Anī nigin, taka ī Kristus bun ibodok, Negur ī yale, mata bagai inon. Tubu are ilele di, mata anī isin. ¹⁸ Enei ganan Negur bun tamal, ī Kristus bunem ada ī geid komo fada fen, komo fiya nē kabī anī ada ifanadan. ¹⁹ Are Negur ī tamo nē mosor idi bun to iwes fen, Kristus bun tenebur tamo kayau ī geid komo fedin. Agef fen, Negur ī komo fiya nē od ada bun inon. ²⁰ Anī nigin, amã Kristus nē soosi tamo, are Negur ī yogon wau irōya, amã bunem wogō yedig gen. Amã Kristus fotokar ā magoneik, Negur geid komo gouf. ²¹ Negur ī, ada nigin ye fen, Kristus mosor sã anī, mosor ī bun inon, are ī bunem, ada Negur nē madur bagai wowã taur nigin age fen.

6

¹ Negur nē kabī tura tar amã, ā to- tol bagai marokeneik, are Negur nē wau ifenēya walegen anī, ege to aaluwan ilauf.

² Ere nigin, Negur ī irok,
“Neu wau ifenēya sain bun, aya ō karī ayon,
kel yaleya nē naa bun, aya ō asen- non.”*

Aya ā arokeneik, gama eī Negur nē wau ifenēya nē sain, gama eī kel yaleya nē naa.

Pol Nē Morō

³ Amã taka delē ilauf bun ye to tū foug nigin meein to manodig, are nemã kabī yana sane to ilauf nigin age mafedig. ⁴ Age fiya ban, amã, naab ganan bun, amã Negur nē kabī tamo bagai ya anī mafelnēdidig, are feseya sã ifareya bun, darau, morō, wau morō bun, ⁵ didenamak bun, kalabus bun, kusī bun, kabī total bun, bō mulaī

* 6:2: Asaia 49:8

itorōya bun ado, naū bun, ⁶ karētut bun, keleī bun, molol bun, dor yaleya bun, Awa Uur Fateul bun ado, wau laa fiya bagai bun, ⁷ momoi nē wogō bun, Negur nē megeir bun, madur bagai nē waila ima biyalē ado ima kilē bun, ⁸ tunī yanamā dalesedig ado tunī to yanamā dalesedig bunem, yana sane inoya ado yana biya inoya bunem; amā momoi marok, anī ere, amā idegēya tamo gen kisi difedig; ⁹ idi amā nigin keleī, anī ere, keleī sā gen kisi difedig; gare mauf, anī ere, amā mata mabodok; didenaman, anī ere, to didenamakesin; ¹⁰ waumā gudū fef, anī ere, faimud waumā kulī yedig; maleg, anī ere, musei safina kisi feleya manenēdidig; ereb taka sā, anī ere, ereb ereb ganan ado.

¹¹ Korin tamo kayau, amā karika wogō mayein. Age ma fen, amā ā bun waumā sukar fatuk bagai kā mafen. ¹² Amā nemā waumā laa fiya ā bun to mafokeledig, anī ere, āgenei wauī laa fiya amā bun ufokelegedig. ¹³ Aya neu kesu tar bun gen ā wogō ayeik, ā solog fen, wauīg sukar fatuk bagai kāg.

Momoiya Sā Geid To Bagu Gouf

¹⁴ Momoiya sā geid to bagu gouf. Madur bagai sane ado naig de nigal dūf? Lalan gugum ado ere bunem nigal dūf? ¹⁵ Kristus Satan ado naig fe di, waud tekelei youf? Ere anī momoiya ado, momoiya sā atun tekelei? ¹⁶ Negur nē tempel, idegēya waitou atun, ere mamad katō fiya ado? Are ada mata ibodōya Negur nē tempel. Negur iron kilei, “Aya idi geid mabod ken, idi atun ayōf, age afe fen, aya idi neid Negur ouf, age afe di, idi neu tamo kayau ouf.”†

¹⁷ “Anī nigin, utornēdig fen,
fire ufareg,
Odug irok.

Ereb amuyē ado to kobūg,
ago ge di, aya ā aleyeif.”‡

¹⁸ “Aya āgenei temeī di,
ā nau kesu tar, nau barai tar ouf,
Odug saa ilun nē kusī tamo guri feid
uyu iroudig anī irok.”§

7

¹ Ā neu oboiyou, ada Negur age afouf yen od enei ado nigin, ada dug ereb ereb ganan bouwa ado uur amuyē ifenēdig anī lilik tafe fen, Negur anini fiyēya bunem fateul bagai wō tauf.

Pol Nē Kulīya

² Āgenei wauī bun, amā nigin modoū unog. Amā aib taka bun to kū mafenen, amā aib taka sane bun to manenen, amā aib taka idegnēya bunem ereb ereb to son mafen. ³ Aya ā bouweī yūya nigin od enei to wogō auf. Ere nigin, aya mogo oron, are āgenei ibodōya modoū, amā waumā bun ado nigin, amā ā geid mata tabodōf be, gare tauf. ⁴ Aya ā nigin fatuk bagai momoi au fen, fatuk bagai ā yeneī alesef. Aya wau fatuk bagai yalesef, nemā morō ganan bun, neu wau kulīya gogū felef.

⁵ Sain amā Masedonia masin, nemā bouwamā enei si inoya san, anī ere, amā siri ganan bun darau difanaman, serē kiwai difanamā mog, nameman kumī ado. ⁶ Anī ere, Negur ī waud morō adodo waud yo fedidig, Taitus isin bunem ī waumā yo fen. ⁷ Are, in isin bunem dogol sā, anī ere, wau yo fiya ī wenēgen anī bunem ado. Ā aya uleyagauf nigin bagai oroyein, ereb wō yen anī nigin āgenei awaun yeya odug fen, ā aya nigin kisi fatuk bagai walegedig anī ī irokanaman, anī bunem, neu kulīya odug bagai iselen.

⁸ Aya neu pas bunem wauī gudū fiya afenein, anī nigin, aya uruwa bun awaun aun. Anī ere, gama aya anī nigin to awaun auf, ere nigin, aya ailef, are neu pas anim, sain naal bagai dogol wauī gudū fen. ⁹ Anī ere, gama aya wau al fef, are wauī gudū fiya afenein anī nigin sā, anī ere, āgenei wauī gudū fiya anim, wauī faleiya bun irouleyein nigin. Ere nigin, ā Negur nē oroya kilei wauī gudū fen, anī nigin, amā ā daū fiya to mafenein. ¹⁰ Wau gudū fiya Negur nē orof kilei anī, wau faleiya irousi, kel yaleya bun irouledig, anī nigin, ada to awaun taudig, anī ere, tenebur nē wau gudū fiya laa irousidig. ¹¹ Negur nē wau gudū fiya eneim, ā bun faat yun anī

† 6:16: Levitikas 26:12; Jeremaia 32:38; Esekiel 37:27 ‡ 6:17: Asaia 52:11; Esekiel 20:34, 41 § 6:18: 2 Samuel 7:14; 7:8

ulogouf, are ereb total bagai wauĩ irõdig, morõ wõ yen anim to lai yeĩf nigin ereb ã aug madur gedig, ereb sane nigin seye gedig, ereb Negur nigin anini gedig, ereb taka nigin bagai oroyeĩdig, ereb kabĩ total walegedig, ereb sane age fen bun mala solo wenëgedig. Ereb ereb ganan bun, ã aug enei nigin kũ fenëya taka sã anĩ yaor gen. ¹² Anĩ nigin, aya ã bun atoton are, taka ĩ sane age fen be, takam ĩ bun sane age fen anĩ nigin sã, anĩ ere, ã amã nigin naig ge wauĩ wanamãgef anĩ, Negur mala bun aug ulogouf nigin age afen. ¹³ Enei ganan nigin amã waumã yo fef.

Amã waumã yo fiya anĩ teten, amã Taitus ĩ fatuk bagai wau al fen anĩ mail fen, fatuk bagai waumã al fen, ere nigin, yogon uur ã ganan bunem filolõ fen. ¹⁴ Aya ĩ bun yeneĩ alesen, age afe di, ã aya mama to wanagen. Anĩ ere, ereb amã wogõ mayein anĩ ganan momoi, age fiya gen, amã Taitus bun yeneĩ malesen areg, momoi anĩ yaoren. ¹⁵ ã ganan ĩ dõg fen, aniniya ado tererëya bunem ĩ walegen anĩ, ĩ kisif fen, ã nigin yogon wau laa fiya mugi bagai ilen. ¹⁶ Aya, ereb ereb ganan bun, ã nigin, sã momoi auf nigin, wau al fef.

8

Wau Ifenëya Bunem Kolekta Inoya

¹ Turamã tar, amã, ã wau ifenëya Negur Masedonia sios ifenëdin anĩ keleĩ youf nigin oromak. ² Idi morõ odug bagai dale fen, maleg bagai dibodon, anĩ ere, idi neid waud kuliya mugi ado bun, idi isennëdiya nigin kolekta moni musei difenëdin. ³ Aya kurõ afeis eig au arokeneik, idi ifenëdiya kisi feleya ado, anĩ wal fesiyag difenëdin. Dogo neid oroyam, ⁴ idi Negur nẽ tamo kayau isennëdiya kabĩ amã geid malouf, are dem de fen, anĩ nigin total bagai dirokanaman. ⁵ Age dife fen, idi, amã idi nigin kisi mafen kilei, to age difen, anĩ ere, idi anĩ wal fiya age difen. Idi dogo anĩ ketem Odug difen ken, anĩ dumen Negur nẽ oroya dõ de, idi dogo amã difanaman. ⁶ Anĩ nigin, amã Taitus total bagai marokenen, ĩ uruwa bun gariya inon nigin, wau

ifenëya nẽ kabĩ enei ã buneg bure falauf nigin marokenen. ⁷ Anĩ ere, ã ereb ereb ganan bun, momoiya bun, wogõ bun, keleĩ bun, wauĩ adok irõya ganan bun, ãgenei wauĩ amã nigin laa fiya bun, kisi feleya ago gef gen, wau ifenëya nẽ kabĩ enei buneg ã kisi feleya ago gouf.

⁸ Aya ã ago gouf bagai nigin sii fiya to afeneik, anĩ ere, aya sios tunĩ kabĩ total dalef anĩ bunem, ãgenei wauĩ laa fiya anĩ, momoi be sã be anĩ es ayeĩf. ⁹ Ere nigin, ã neda Odug Jesus Kristus nẽ wau ifenëya keleĩ, are ĩ safina kisi feleya, anĩ ere, ã nigin ĩ maleg wõ yen, are yogon maleg bunem ã safina kisi feleya wõ gouf nigin, ĩ age fen.

¹⁰ Aya enei nigin neu kisi, ãgenei biya fiya nigin afeneik. Yar tubu bun, ã ket wenëdigen anĩ dogol sã, ã ago gouf nigin wauĩ iseya anĩg adon. ¹¹ Gama kabĩ anĩ udikalagauf, anĩ bunem, ã ago gouf nigin, ãgenei oroya total bagai ibodon gen, ã safina kisi feleya kilei kabĩ anĩ bure wala-gauf. ¹² Oroya anĩ an ibodõf are, Negur ereb tamo taka safina ado kilei anĩ yalouf, ereb tamo taka safina sã bunem sã.

¹³ Amã nemã oroya, tunĩ waud karika ifenëdi di, ã wauĩ morõ ifeneik anĩ sã, anĩ ere, ganan kisi kisi feleya ibodõya nigin oromak. ¹⁴ Sain enei bun, ãgenei ereb ereb musei anim, ereb idi lau difef anĩ gadõ gouf, anĩ bunem, dogo neid ereb ereb musei animeg, abag ereb ã lau gef anĩ gadõ difouf, age dife di, kisi kisi feleya ubodõgouf, ¹⁵ are Negur nẽ Itotoya eig ye irok kilei, “Taka ĩ safina musei kuru fen, ĩ musei bagai to yalen, taka ĩ naal kuru fen, ĩ to lau fen.”*

Taitus Korin Sur Difiyen

¹⁶ Aya, Negur ĩ, kisi aya ã nigin ado kisi de tekelei, Taitus nẽ wau bun inon nigin, Negur de afiyek. ¹⁷ Ere nigin, Taitus ĩ, nemã od ã ki yeiãya nigin anĩ, de ye fen, ĩ yogon wau irõya odug bagai ado, yogon oroyam ã gein isif. ¹⁸ Amã, turamã taka biya od bun yogon kabĩ nigin, sios ganan yana dalesedig anĩ, Taitus ado sur mafedif. ¹⁹ Enei dogol sã, turamã ĩ anĩ, wau ifenëya nẽ kabĩ

* 8:15: Eksodas 16:18

enei bun, amã geid mayok malauf nigin, siosem digirnen, kabĩ are, amã Odug bun fula fiya medeĩya marousiyouf nigin ado, amã nemã isennēdiya nigin waumã irōya mafelnēdiyof nigin kabĩ malef anĩ. ²⁰ Amã, wau ifenēya bunem ege luwa musei dinon enei, lo ma mog, tunĩ anĩ nigin od sane to dirōf nigin oromak. ²¹ Ere nigin, amã Odug mala bun ado, tamo meleid buneg, ereb madur bagai anĩ age mafouf nigin lo mafedig.

²² Amã, turamã taka, idi geid sur mafedif, ĩ amã sain musei es mafiye ken, ĩ ereb ereb musei bun kabĩ totol yaledig anĩ mailedig, ĩ ã nigin fatuk bagai momoi yef nigin, ĩ gama isennēdiya nigin kabĩ totol yaleya orib yef. ²³ Taitus nigin, ĩ neu tã tar taka, ĩ ã nigin neu kabĩ turau; nemã turamã tar nigin, idi sios neid arũ tamo, Kristus bun fula fiya medeĩya dirousidig. ²⁴ Anĩ nigin, āgenei wauĩ laa fiya nē kaũ ado, amã ã yeneĩ malesedig anĩ nē gariya nē kaũ, tamo eneidi ufelnēdigouf, anĩ bunem, sios idi anĩ dilouf.

9

¹ Ā mogo keleĩ nigin, aya Negur nē tamo kayau bun kabĩ enei nigin baban to atotkeneĩf. ² Ere nigin, aya isennēdiya nigin āgenei wauĩ irōya totol anĩ keleĩ ken, Masedonia tamo kayau bun yeneĩ alesedig, are yar tubu bun tamal isi, gama ã Akaia an isennēdiya nigin dodok gen anĩ arokenēdi di, isennēdiya nigin āgenei wauĩ irōya totol anim, idi musei waud fã yen. ³ Anĩ ere, aya turau tar sur afedin, are amã ã yeneĩ malesedig anĩ enei bun ege to ilauf, anĩ ere, ã aya aron gen dodok gouf nigin, age afen. ⁴ Ere nigin, Masedonia tamo tunĩ aya geid masi fen, ã dodok fiya sã anĩ dilouf are, amã ã nigin momoiya age fiya ado nigin mama malouf, āg mama yeĩf nigin ereb od taka sã. ⁵ Anĩ nigin, aya kisi afen, aya turau tar totol bagai arokenēdi di, idi ketem ã gein dile fen, ã wau ifenēya nē ege luwa musei wenēdigouf urōgen anĩ nigin dodok fiya bure difalauf, are deuf, aun. Age dife di, wau ifenēya nē ege luwa

dodok fiyauf, are nugo yeĩya bunem ege luwa inoya sã.

Wau Ifenēya Bunem Safina Ifenēya

⁶ Enei karĩ walagauf, aib taka faat musei sã irarak, ĩ musei sãg kusu fouf, aib taka faat musei irarak, ĩ museig kusu fouf. ⁷ Tamo mugu mugu, ereb yogon wau bun ifenēya nigin kisi ifon anĩ ifenēf, are wau morō bunem sã, takam nugo fiya bunem sã, ere nigin, Negur ĩ tamo wau kulĩya bunem ifenek nigin wau laa fef. ⁸ Negur ĩ wau ifenēya ganan ã kisi feleya bagai ifeneĩya kisi feleya, are ereb ereb ganan bun, ã faimud ereb ã kisig fen, lau gef anĩ ganan waleg fen, kabĩ biya ganan kisi feleya bagai ago gouf nigin age fef. ⁹ Negur nē Itotoya eig ye irok kilei:

“Ī yogon safina firagagaũ feid fen, maleg ifenēdin;
yogon madur bagai faimud ibod-kalauf.”*

¹⁰ Negur ĩ, faat irarãya tamo, faat ado yōya nē bret ifenēdig, ĩ āgenei faat irarãya nigineg ifen ken, musei inouf, agef fen, ĩ āgenei madur bagai nē kusu fiya odug inouf. ¹¹ Negur ĩ ereb ereb ganan bun, ã safina ado inoyeĩf, anĩ bunem, ã sain ganan wau ifenēya bunem musei wenēdigouf, ago ge di, idi amã bunem āgenei ege luwa dale fen, Negur de difiyēf.

¹² Kabĩ enei ã walegedig anim, ereb Negur nē tamo kayau lau difef anĩ nigin dogol to isennēdif, anĩ ere, ago ge di, musei idi Negur de difiyek buneg gogũ felef. ¹³ Kabĩ ã walegedig anĩ bunem, ã aug nigin yaor gen, anĩ nigin, tamo idi Negur yana dalesauf, ere nigin, ã Kristus nē biya od kurō wesig fen, anĩ dōg fen, ã wau ifenēya bunem idi adok ganan bun musei wenēdigen. ¹⁴ Age de fen, ã nigin idi neid kosē bun, dogo neid waud ã bun isiyouf, ere nigin, Negur ĩ wau ifenēya ereb ereb ganan wal fiya anĩ ã ifenein. ¹⁵ Negur nē ege luwa dir feleya kisi feleya sã anĩ nigin, Negur de tafiyēf!

10

Pol Yogo Ne Kabĩ Nigin Isennēya Od

* 9:9: Sam 112:9

¹ Aya, Pol, tuni dirõdig, aya ã geid tabodok sain bun, are yukeleya dedig, aya ã geid to tabodok sain bun, are total od irõdig dedig, aya Kristus nẽ imatkesiya ado molol nem eig au, ã arokeneik. ² Aya asiyouf sain bun, aya tuni amã teneub enei nẽ lo fiya bun mabodõdig dedig anidi bun, aya total od arõf nigin kisi afef gen, to age afouf nigin, aya ã agoneik. ³ Momi, amã tenebur ein mabodok, anĩ ere, amã kusĩ nigin, tenebur ein age difedig gen to age mafedig. ⁴ Amã nemã kusĩ nẽ willa are, teneub enei nẽ sã, anĩ ere, idi kau total narĩ fiya nigin Negur nẽ megeir ado. ⁵ Amã, monẽya ado, erob erob ganan Negur nigin keleiya nẽ naabura gudũ fiya nigin yogo iselef anĩ, narĩ mafedidig, age mafe fen, amã kisi ganan male fen, Kristus dõ fiya nigin marouledidig. ⁶ Sain ã, ãgenei dõ fiya ganan bun, kisi feleya bagai wõ gouf, amã fe temeleid ganan darau ifenẽdiya nigin dodok mafef anĩ kisi falauf.

⁷ ã erob erob teten nẽ anĩ dogol lo gedig. Taka i yogo nigin Kristus nẽ ye fen, anĩ nigin total bagai momoi youf, amãg i gen Kristus nẽ anĩ, i baban kisi fouf. ⁸ Aya, ã daũ yeiã ban yalesneiã nigin Odug yana ifanaman anĩ nigin, yanau naal yaor afe alesaufeg, aya anĩ nigin to mama fiyauf. ⁹ Aya neu pas bunem, ã kumi ifeneiã nigin age afef gen, ã kisi gef anĩ to orouf. ¹⁰ Ere nigin, tuni dirõdig, “In pas are morõ ado fen, total ado, anĩ ere, i amã geid mabodok sain bun, i maleg le fen, yogon wogõ are ege iledig.” ¹¹ Tamo age fediya idi keleĩ youf, amã ã geid to tabodok sain bun, nemã pas bun amã naig be fiya anĩ, amã ã geid tabodok sain bun, amã de dõ maf, age mafouf bagai.

¹² Amã, tuni dogo neid yeneid dalesedig idi geid, kerẽ sã dede to mauf. Idi dogo, dogo nigin dogo bun fele dife fen, dogo nigin dogo bun es difef anidi, idi kisi biya sã. ¹³ Anĩ ere, amã yanamã to daũ wal ma fen, malesauf, anĩ ere, amã kabĩ Negur igirkanaman bun dogol yanamã malesauf, kabĩ are ã buneg ilef. ¹⁴ Amã yanamã gerõ bagai to males maroulef, amã ã gein to

masim are, amã yanamã gerõ bagai males maroulem, ere nigin, amã Kristus nẽ biya od ado, ã geineg masin. ¹⁵ Amã tunim kabĩ dalen anĩ bun to daũ wal mafe fen, yanamã malesedig. Nemã waumã iseya are eig fiya, ãgenei momoiya odugef iseledi, ã atun amã nemã kabĩ akor fatuk bagai bilalaũ fef ilauf, ¹⁶ anĩ bunem, amã ãgenei akor wal mafesil fen, biya od wogõ mauf. Ere nigin, amã tamo taka nẽ akor bun kabĩ dalen anĩ nigin, yanamã yaleseya to oromak. ¹⁷ Anĩ ere, “Taka i yana yalesef, i Odug bun yana yalesauf.”* ¹⁸ Ere nigin, taka i yogo yana yalesef nigin, Negur to de yedig, anĩ ere, taka i Odugem yana yalesef anĩ, Negur de yedig.

11

Pol Idegẽya Aposel Geid

¹ ã aya utornag len, neneya od naal wogõ auf nigin aya wau irok, anĩ ere, ã mogo yeir ago gef. ² Aya ã bun Negur nẽ kiyeĩ bunem kiyeĩ afeneik. Aya ã aiweĩ tekelei, Kristus bun agirnein, are aya ã kayau taulei bagai gen, i gein arouliyeĩf nigin age afen. ³ Anĩ ere, Eva gougourem ed fe idegnen gen, ãgenei kisi sane le di, ã ãgenei wauĩ bun, Kristus bun ãgenei momoiya ado kisi karõtut utorõg fen, sane lauf nigin, aya kumi auf. ⁴ Takam ã gein isi fen, Jesus taka nigin, amã wogõ mayein anĩ nigin gen sã, wogõ youf be, ã uur fire, uur ã walegen gen sã anĩ walogouf be, ã biya od fire, biya od ã walegen gen sã anĩ walogouf are, ã anĩ karika bagai karĩ wedigedig. ⁵ Anĩ ere, aya kisi afef, aya aposel yeneid odug anidi farumen to bagai abodok. ⁶ Aya wogõya nigin biya sã be, anĩ ere, aya keleĩ ado. Amã, enei, ã bun naab ganan bun, erob erob ganan bun yaor mafen.

⁷ Aya yug nigin aukesil fen, Negur nẽ biya od mala sã ege bagai wogõ ayein bunem, ã alesnein anĩ mosor de? ⁸ Aya ã aruneĩ yaleya nigin, sios tuni bun tamal isennaya alen anĩ, sios tuni idi bun tamal bẽ alen gen. ⁹ Takag, sain aya ã geid tabod ken, erob taka nigin lau afen, aya ã

* **10:17:** Jeremaia 9:24

taka to morō afenein, ere nigin, turau tar Masedonia bun tamal disin idi, ereb aya lau afen kisi feleya bagai difanan. Ereb ereb ganan bun, aya yug ā morō ifeneīya ator ken, toku age afouf. ¹⁰ Kristus nē momoi anī, aya nameun ibodok nigin, taka nem Akaia provins bun neu yanau yaleseya enei to katī falauf. ¹¹ Ere nigin? Aya ā nigin wau laa fiya sā nigin de? Negur ī keleī, aya ā nigin wau laa fedig! ¹² Aya ereb ereb nigin idi yeneid dalesedig anī bun, amā idi geid tekelei ya anī karī douf nigin orodidig anidi neid naabureid gudū fiya nigin, ereb aya age afef anī, toku age afouf. ¹³ Ere nigin, tamo age fediya are idegēya aposel fen, idegēya kabī tamo, idi Kristus nē aposel neweid dale fen, kabī daledig. ¹⁴ Are terēya sā, ere nigin, Satan ī yogo bagai fula fiya nē engel nawa yaledig. ¹⁵ Anī nigin, Satan nē kabī tamo idi, madur bagai nē kabī tamo neweid dalouf are, to terē taul. Idi neid didikalauf bun, idi age difedig kilei dalouf.

Pol Yogon Kabī Nigin Morō Musei Yalen

¹⁶ Aya baban arok, taka nem aya nigin neneya tamo to youf. Anī ere, ā ago gouf are, aya neneya tamo gen waleyag, anī bunem, ayag yanau naal alesauf. ¹⁷ Aya yug yanau yaleseya enei bun, aya Odug gen to wogō auf, anī ere, neneya tamo gen wogō auf. ¹⁸ Musei idi, teneub enei nē tamo kayau age difedig gen, yeneid dalesedig nigin, ayag yanau alesauf. ¹⁹ Ā kisi biya bagai ado nigin, ā wauī al fiya ado neneya tamo karī wedigedig! ²⁰ Ere nigin, taka nem ā ferfer ineneik, ereb ereb ganan bun ā kadir ineneik, idegēya bun yaleyeik, yogo yana yaor falaisi ilun iselef be, weleī fā fef bun, ā karī wiyēgedig. ²¹ Aya momoi eig au arok nigin mama fiyaf, are amā felu reya bagai nigin to age mafedig!

Anī ere, taka ī total ino fen, ereb taka nigin yana yalesauf are–aya neneya tamo gen wogō auf–ayag total ano fen, yanau alesauf. ²² Idi Hibru tamo de? Ayag anī. Idi Israel tamo de? Ayag anī. Idi Abraham nē ibor nē tubu tar de? Ayag anī. ²³ Idi

Kristus nē kabī tamo de? (Aya wadā gen eig au wogō auf.) Aya idi wal fediya. Aya idi wal fediya kabī aledig, aya kalabus bun idi wal fediya abodōdig, aya idi wal fediya wagī difiyadig, age de fen, aya laa bun baba baban dinenan. ²⁴ Juda idi aya sain faif bun teti nain wagī difiyan. ²⁵ Sain towo bun, aya tibogem wagī difiyan, sain tekelei bun, aya meinem dinan, waag aya abodon sain towo sanen, aya, bō taka ado gaa taka ado, maaī atun abodon. ²⁶ Aya toku ayok bun, kuwei sane waila wal afen, bē tamo nē waila wal afen, neu fō turau tar geid kiwai wal afen, haiden geid kiwai wal afen, taun bun kiwai waila wal afen, gerere tuan kiwai waila wal afen, maaī bun waila wal afen, idegēya turau tar nē kiwai waila wal afen. ²⁷ Aya kabī total ale, morō ado fen, sain musei mulaī to ainēdig. Aya naū ado naan ail fiya fen, sain musei saaf sā aledig. Aya menig fiya fen, gemū abodōdig. ²⁸ Ereb ereb ganan anī sirin, aya naa ganan bun, sios ganan nigin suwēya morō anim lai fiyadig. ²⁹ Aib felu re di, aya to felu rauf de? Aib mosor bun iroule di, aya to wau morō fiyauf de?

³⁰ Aya yanau yaleseya nigin bagai youf are, aya ereb ereb neu felu reya anī yaor fedig anī nigin yanau alesauf. ³¹ Odug Jesus nē Dei, Negur, ī anī yana faimud yaleseya, ī keleī, aya to adegek. ³² Damaskus oun, gawaman nē mudur, King Areta farumen ī, aya yaleya nigin taun bobog bun lo fiya tamo inenēdin. ³³ Anī ere, aya karam kuren dinena fen, kau mosokoronem folo folō difiya di, yogon iman tamal ulō aran.

12

Pol Nē Mala Seleulā Kurā Fiya Ado Yogon Kudag Kereuk Fiya

¹ Aya yanau alesef alauf. Ereb mala to aloufeg, aya Odug bunem malau seleulā kurā fen ado, kurō fesiya od alen anī wogō auf alauf. ² Aya tamo taka* Kristus bun ibodok anī keleī, ī kulu yar fotin ilelen bun, Negurem yale, saa tano towo bun irou iselen. Ī bouwa ado be, bouwa sā be, aya keleī sā, Negur keleī. ³ Aya keleī, tamo enei–ī bouwa ado be, bouwa sā be, aya

* **12:2:** Tamo taka anī, Pol yogon nigin irok.

keleĩ sã, anĩ ere, Negur ã keleĩ- 4 ã paradis bun irou iselen. Ì ereb ereb tamom faded feleya kisi feleya sã, tamom wogõya nigin katũ fiyen anĩ karĩ yen. 5 Aya tamo age fiya anĩ yana alesauf, anĩ ere, aya yug nigin yanau to alesauf, aya neu felu reya nigin dogol yanau alesauf. 6 Aya yana yaleseya nigin agirĩfeg, aya neneya to abodõf, ere nigin, aya momoi anĩ wogõ auf. Anĩ ere, aya yana yaleseya nigin atorok, are taka nem ereb aya age afef be, wogõ auf anĩ wal fe fen, aya nigin fatuk to kisi foug nigin age afef.

7 Kurõ fesiya odug bagai enei alen anĩ bunem, aya yug yanau yaleseya katĩ feleya nigin, bouwa bun kudag ifanan, Satan nẽ arũ tamo darau ifanauf nigin bouwa bun yun, are aya yug yanau yaleseya katĩ feleya nigin. 8 Sain towo, Odug aya bun anĩ yalelkanauf nigin, aya ã agonen. 9 Anĩ ere, ã irokanan, “Neu wau ifenẽya õ nigin kilei bagai, ere nigin, neu megeir felu reya bun kisi feleya bagai wõ yef.” Anĩ nigin, aya fatuk bagai wau al fiya bun neu felu reya nigin yanau alesauf, are Kristus nẽ megeir aya bun ibodõf nigin age afouf. 10 Anĩ nigin, Kristus nigin, aya felu reya bun, kono fiya bun, wau morõ bun, darau bun, morõ bun, wau kulĩ yedig. Ere nigin, sain aya felu rauf bun, aya total adodig.

Pol Korin Tamo Kayau Nigin Suwẽ Yen

11 Aya yug nigin neneya tamo wõ aun, anĩ ere, ã aya nugo wiyage di, aya age afen. ã aya nigin yanau walesegem, are dem, ere nigin, aya ege, anĩ ere, aya aposel yeneid odug farumen to bagai abodok.

12 Aya ã atun abod ken, ereb aposel bagai nẽ anĩ, uris, ereb urug bagai ado, memelik, morõ ganan bun, feseya sã anodin.

13 Aya sios ganan bun age afedig anĩ, ã buneg age afen, anĩ ere, ereb tekelei dogol ã bun to age afen, are aya ã isennaya nigin morõ taka to afenein anĩ dogol. Neu kũ fenẽya enei nigin wedereĩ tu kel!

14 Gama aya eneim sain towo ki ayeĩf nigin saika afef, aya ã isennaya nigin morõ to afeneif, ere nigin, ereb aya orouf are, ãgenei safina sã, ã aug anĩ. Kesum sina

tama nigin moni to kuru difedig, anĩ ere, sina tamam nedi gereneid tar nigin age difedig. 15 Anĩ nigin, aya wau al fiya odug bun, neu safinau ganan ã nigin araile fen, aya yugeg arailauf. Aya ã nigin wau fatuk afeneĩ di, ã aya nigin wauĩ naal bagai wanagauf de? 16 ã tunĩ aya nigin urõgedig, ‘Í amã masennẽf nigin morõ to ifanaman, anĩ ere, ã idegẽya keleĩ bagai, idegẽya kor bunem gei famãdig,’ gedig. 17 Aya tamo susur afedin anidi taka bunem, ã adegnei ken, ãgenei safina alen de? 18 Aya Taitus ã gein ileya nigin total bagai aroken ken, aya amã turamã ã ado sur afedin. Taitus ã to idegnei ken, safineĩ yalen, ã age fen de? Amã kisi tekelei bun age mafe fen, naab tekelei dõ mafen, anĩ sã de?

19 ã sain enei ganan, amã mug isen-namãf nigin ã bun age mafedig be, kisi gedig. Amã, Negur mala bun, tamo Kristus nigin momoi def anidi gen, wogõ maudig. ã nemã oboimã, ereb ereb ganan amã age mafef, are ã megeir walougouf nigin. 20 Sain aya asiyouf, aya ã nigin kisi afef gen to ailiyeiãya nigin be, ã aya nigin kisi gef gen to uleyageya nigin, aya kumĩ auf. ã bun an, kusĩ, kiyeĩ, seyeya, fara fiya, ne tã bou yũya, dumen od irõya, aya aya yeya be, ekul ge ufaregeya nigin, aya kumĩ auf. 21 Sain aya baban asiyouf, neu Negur ã meleĩ bun aya mama ifana di, musei kulu mosor dino fen, amuyẽ, noli tobonunã fire fire ado, bouwa nẽ oroya nigin total sane wau fãya bunem waud to falei difen anidi nigin, aya wau gudũ foug nigin kumĩ auf.

13

Idikeleya Nẽ Weder Irouya Od

1 Eneim sain towo ã gein asif. “Od ganan isennẽya urom be, towom sigoredim kurõ difesiyouf anĩ megeir gouf.”* 2 Uruwa aya asi fen, baban asi ã geid tabodon sain bun, aya wedereĩ irouya od arokeneĩ bure afelen. Gama aya ã geid to tabod ken, anĩ ket, idi uruwa mosor dinodin anidi geid tunĩ ganan arokeneik: Aya kelau asiyouf sain bun, idi to loloum afediyouf, anĩ ere,

* 13:1: Diuteronomi 19:15

kafī fiya afenēdiyof, ³ ere nigin, ā Kristus ī aya bunem wogō yef anī ileyā oroyeik. Ī ā bun kabī yaleyā nigin to felu ref, anī ere, ī ā atun megeir ado. ⁴ Ere nigin, momoi bagai, ī felu reya bun aa tetek bun dun, anī ere, ī Negur nē megeir bunem mata ibodok. Age fiya gen, amāg ī bun felu reya, anī ere, Negur nē megeir bunem, amā ī geid mata mabodōf. Age mafe fen, amā Negur nē megeir ā atun yaor mafouf.

⁵ Ā momoiya bun ubodōgef be sā be anī, ulogouf nigin ā aug es gouf. Ā aug kisig uleg. Kristus Jesus ī, ā bun ibodok anī ā to keleī de? Sāf are, momoi bagai, ā es fiya bun kubū gef. ⁶ Anī ere, amā es fiya bun to kubū maun anī ā ulogouf nigin, aya momoi auf. ⁷ Ā ereb sane taka to ago gouf nigin, amā Negur bun kosē mauf. Are amā es fiya bun to kubū maun anī tamo kayau dilouf nigin sā, anī ere, amā es fiya bun kubū maun gen dilemāfeg, ā ereb madur ago gouf nigin. ⁸ Ere nigin, amā ereb taka momoi anī to kiwai mafenek, anī ere, momoi nē nigin dogol age mafef. ⁹ Amā felu mauf bun, ā megeir adof nigin, amā waumā al fef. Ā kisi feleyā bagai wō gouf nigineg, amā kosē mauf. ¹⁰ Gariya eig fiya nigin, aya ā geid to tabod ken, enei atotof, are sain aya asiyof, aya neu yanau bunem total od ā to arokeneīf nigin age afef, yanau are ā daū yeīya ban yalesneīya nigin Odug ifanan.

Idikeleya Nē Aanya

¹¹ Idikeleya bagai, turau tar, dabuo. Kisi feleyā bagai wō gouf nigin ago gouf, aya neu wogō anī karīg, kisi tekelei waleg, wauī inosiya bun ubodōg. Ago ge di, wau laa fiya ado wau inosiya nē Negur ā geid ibodōf.

¹² Fateul umāya bunem, abob aan wiyēg. ¹³ Negur nē tamo kayau ganān, nedi aanya ā bun sur difef.

¹⁴ Odug Jesus Kristus nē wau ifenēya, Negur nē wau laa fiya ado, Awa Uur Fateul nē nīgal yūya ā ganān bun ibodōf.

Galesia

¹ Aya Pol, aya aposel, tamo nē tobonunā bunem to wō aun, tamomeg aya to sur difiyan, anī ere, Jesus Kristus ado Tamada Negur ĩ Jesus Kristus laa bun tamal turī fe di, kel fā yen anim aya sur difiyan, ² are aya neu turau tar aya weim mafaref anidi ganan geid,

pas enei Galesia sios bun sur mafef.

³ Negur neda Tamada ado Odug Jesus Kristus bun tamal, wau ifenēya ado wau inosiya ā bun ibodōf, ⁴ Kristus ĩ, neda Tamada Negur nē oroya dōf fen, sain sane enei bun tamal, ada kel gei fadauf ye fen, neda mosor nigin yogo luwa itoron. ⁵ Anī nigin, Negur ĩ bun fula fiya medeīya gai gai ibodkalauf. Momoi.

Biya Od Fire Taka To Ibodok

⁶ Aya, ā kaisā bagai Negur ĩ Kristus nē wau ifenēya bunem ā iweignein anī utornēg fen, biya od fire bun falei ge di, terē auf. ⁷ Od are biya od bagai sã. Momoi bagai, tamo tunī, ā neneya bun dirāyei ken, Kristus nē biya od anī falei difalauf nigin age difef. ⁸ Anī ere, amam be, engel taka saa ilun tamalem, biya od fire, amā biya od wogō mayein anī to wogō yeif are, utornēg len, ĩ gai gai daū fiye kalauf! ⁹ Amā mogo marokenein gen, aya gama baban arokeneik: Aibem taka ā biya od fire, ā walegen anī to wogō yeif are, utornēg len, ĩ gai gai daū fiye kalauf!

¹⁰ Aya tamo nē yo ya yaleya nigin age afef de, Negur nē yo ya yaleya nigin age afef? Aya tamo waud al foug nigin age afef de? Aya fau tamo waud al foug nigin age afoug are, aya Kristus nē ferfer sã.

Pol ĩ Negurem Iweignen

¹¹ Turau tar, aya ā enei keleī youf nigin orouf, biya od aya wogō ayein, are tamo nē kisim to dinon. ¹² Aya anī tamo taka bun tamal to alen, takameg to ifelnan, anī ere, aya Jesus Kristus nē kurō falaisiya bunem alen.

¹³ Aya kulu Juda neid momoiya bun abod ken, naig be afen are ā karī gen.

Aya Negur nē sios darau fatuk bagai afen ken, daū afalauf nigin age afen. ¹⁴ Aya, Juda neid momoiya bun, Juda tamo aya gegen atun idi musei wawal afedin, age afe fen, aya neu tubu tar neid tobonuneid dō fiya nigin fatuk bagai kisi total anon. ¹⁵ Anī ere, Negur ĩ, aya sinau fau gō fiyaya sã mog, igirna fen, yogon wau ifenēya bunem aya iweigna di, ¹⁶ aya haiden atun yogon Naal nigin wogō auf nigin, yogon Naal aya bun yaor fiya nigin wau iron, sain anī bun, aya aib bun keleī yaleya nigin tamo taka to, to afiyen. ¹⁷ Aya, idi aya aposel wōya sã mog, aposel dibodon anidi ailediyouf nigin Jerusalemeg to eselen. Anī ere, aya kaisā bagai Arabia kantri ele fen, dum Damaskus kelau elen.

¹⁸ Yar towo ilele di, aya Pita ado uyu kū mafouf nigin Jerusalem esel fen, ĩ ado naa fiftin mabodon. ¹⁹ Aya aposel anidi taka to ailen, Odug nē tura, Jems dogol. ²⁰ Aya Negur mala bun momoi arokeneik, aya atotkeneik are idegēya sã. ²¹ Anī dumen, aya Siria ado Silisia provins elen. ²² Judia distrik oun sios Kristus bun dibodok idi, aya nigin keleī sã. ²³ Idi od enei dogol karī den: “Tamo ĩ kulu ada darau ifanadan, ĩ momoiya daū foug nigin kulu age fen anī, gama wogō yef.” ²⁴ Age de fen, idi aya nigin Negur yana dalesen.

2

Aposel Idi Pol Daleyen

¹ Yar fotin ilele di, aya baban Jerusalem eselen, sain anī are Banabas ado. Aya Taituseg ale fen, meselen. ² Aya Negur kurō fesiya ifelnan kilei, esel fen, biya od aya haiden atun wogō aun anī, idi faded afiyēdin. Anī ere, aya, ganan keleī sã mog, iminēyan idi sios nē uyu irouya gen ailedin anidi bun age afen, ere nigin, aya neu kabī alef ado mogo alen anī, ege ileya nigin kumī aun. ³ Anī ere, Taitus ĩ aya weim mabodon, ĩ Grik tamal, anī ere, idi ĩ mulū ileya nigin to nugo difiyen. ⁴ Morō are, idegēya turamā tar tunī, amā atun iminēyan disin anidi nigin fā yen, idi amā atun dimin ken, Kristus Jesus bun karika mabodon anī kofu de fen, amā lo nē kafī fiya bun diroulemāf nigin disin. ⁵ Biya od

nē momoi anī, ā bun ibodōf nigin, amā idi neid od anī, sain naal bagaig to maroun.

⁶ Idi sios bun yeneid ado anidi–idi naig be fediya are aya bun fire to ailedig, Negur ī tetenem lo fiya bunem to es fedig–tamo sios bun yeneid ado anidi neu od anī taka to tobol difen. ⁷ Age fiya ban, idi, Pita Juda idi bun biya od wogōya nē kabī ifenen gen, aya haiden bun biya od wogōya nē kabī ifanan anī dilen. ⁸ Negur ī, Pita Juda idi atun aposel kabī yalen anī bun kabī yalen gen, aya haiden atun aposel kabī alen buneg Negur kabī yalen. ⁹ Jems, Pita, Jon, idi sios nē monog tor gen diledin anidi, idi Negur aya wau ifenēya ifanan anī dile fen, aya Banabas ado nigal maūf nigin, imamā biyalē bagu difen. Idi, amā haiden bun mele di, idi Juda anidi bun dilauf nigin, yo den. ¹⁰ Idi amā faimud maleg masennēdiyof nigin dogol dirokanaman, kabī are, aya age afouf nigin kisi totol aledig anī age afedig bagai.

Pol Pita Ou Fiyen

¹¹ Sain Pita Antiok taun isi di, aya ī mala bun ou afiyen, ere nigin, ī yaor bagai kū fenen. ¹² Jems tamo tunī sur fedin anī fau isiya sã mog, Pita ī haiden geid saaf dō don. Anī ere, idi disi wō de di, ī haiden itorneīd fen, so fedin, ere nigin, ī idi mulū bun temeleid anidi kumī fiyeīd fen. ¹³ Juda tunī ganan, yogon mala yaleya anī dō difen, age dife di, dogo neid mala yaleya bunem, Banabaseg naab anī dō fen.

¹⁴ Sain aya, idi neid tobonuneid, biya od nē momoi anī to dō dife di, ail fen, aya idi ganan meleid bun Pita arokenen, “Ō Juda tamo, anī ere, ō haiden gen ubodok, Juda tamo gen sã. Agouf are, naig fe di, haiden idi Juda neid tobonunā dō difouf nigin, nugo wiyēdif?”

¹⁵ Ada Juda temelada gogū difadan, haiden mosor temelada sã. ¹⁶ Anī ere, ada keleī, tamo ī lo dō fiya bunem Negur mala bun madur bagai to wō yedig, anī ere, Jesus Kristus nigin momoiya bunem. Anī nigin, adag, Kristus Jesus nigin momoi taudig, are Kristus nigin momoiya bunem, lo dō fiya bunem sã, Negur mala bun

madur bagai wō tauf nigin age tafedig, ere nigin, lo dō fiya bunem, aibem taka Negur mala bun madur bagai to wō youf.

¹⁷ Ada, Kristus nigin momoiya bunem, Negur mala bun madur bagai wō tauf tau fen, ada dug mosor temelada anī dilouf are, Kristus ī mosor nē kabī tamouf de? Gai sã bagai! ¹⁸ Ereb aya daū afen anī, baban kare afouf are, aya yug, aya lo narī fiya tamo wō auf. ¹⁹ Lo bunem, aya lo mala bun laa fiyan, are aya Negur mala bun mata abodōf nigin age afen. ²⁰ Aya Kristus ado aa tetek bun dinakesin, anī nigin, aya baban mata to abodok, anī ere, Kristus aya bun mata ibodok. Gama aya bouwau mata ibodok, are aya Negur Naal nigin momoiya bunem mata abodok, ī aya nigin wau laaf fen, aya nigin yogo luwa itoron. ²¹ Aya Negur nē wau ifenēya to tadū afouf, ere nigin, lo bunem Negur mala bun madur bagai wōya anī isiyof are, Kristus ī ege laa fen.

3

Lo Dō Fiya De, Momoiya?

¹ Galesia tamo kayau, ā neneya! Aim ā idegnein? Ā meleī bun bagai, Jesus Kristus aa tetek bun dukesin anī, yaor bagai mafelnein. ² Ereb taka dogol, aya ā bun keleī you fenē: Ā lo dō fiya bunem Awa Uur walegen de, oo ereb karī gen anī nigin momoi ge di? ³ Ā fau neneya ufaregef de? Awa Uur bunem gariya unog fen, gama ā tamo nē totol bunem udikalagau fenē de? ⁴ Ā darau fatuk bagai ege walegen de? Are momoi, ege bagai walegen de? ⁵ Negur ī, ā, lo dō fiya bunem yogon Awa Uur ifeneī di, ā atun memelik inodin de, oo ereb ā karī gen anī nigin momoi ge di?

⁶ Abraham bun kisi gouf: “Ī Negur nigin momoi yen, age fe di, Negurem ī madur bagai fiyen.”* ⁷ Anī nigin, karī gouf, idi momoi def anidi, are idi Abraham gere tar. ⁸ Negur nē Itotoya ketem, Negur ī haiden idi neid momoiya bunem madur bagai fediyof anī ifelnadan, Negur ī, anī fau wōya sã mog, biya od anī ketem Abraham irokenen: “Teneub ganan ō bunem el

* **3:6:** *Jenesis 15:6* † **3:8:** *Jenesis 12:3; 18:18; 22:18*

fediyouf.”† ⁹ Anĩ nigin, idi momoiya ado are, momoiya tamo Abraham geid el fedif.

¹⁰ Idi lo dō fiya bunem dedig anidi ganan, are isisiya farumen dibodok, ere nigin, Negur nē Itotoya bun eig ye irok, “Idi ganan Lo nē Buk bun itotoya ibodok anĩ ganan toku to dō difouf are, isisiya farumen difaref.”† ¹¹ Taka ĩ lo bunem Negur mala bun madur bagai to wō youf, are yaor, ere nigin, Negur nē Itotoya eig ye irok, “Tamo madur bagai ĩ, momoiya bunem mata ibodōf.”§ ¹² Lo are, momoiya bunem to ifaref, age fiya ban, Negur nē Itotoya eig ye irok, “Tamo ĩ enei age fedif, ĩ anĩ bunem mata ibodōf.”* ¹³ Kristus ĩ, ada fotokar isisiya nē wō ye fen, ada lo nē isisiya bun temelada kel yaledan, ere nigin, Negur nē Itotoya eig ye irok, “Ganan aa bun diseginnēdif, idi isisiya farumen dibodok.”† ¹⁴ ĩ, el fiya Negurem Abraham ifenen anĩ, Kristus Jesus bunem, haiden bun isiyouf nigin, ada kel yaledan, are ada, momoiya bunem, Awa Uur nē promis anĩ talouf nigin age fen.

Lo ado Promis Od

¹⁵ Turau tar, aya tamo nē tobonunā bunem wogō auf: Tamo nē bar itenēya anĩg, tamo waud iro ken, bar ditenek anĩ, to dalelef be, to tobol difedig gen, eneig age fiya. ¹⁶ Negur ĩ, promis od anĩ, Abraham ado yogon ibor irokenēdin. Negur nē Itotoya to eig yef, “yogon ibor tar bun,” age youf are, are musei nigin, anĩ ere, Negur nē Itotoya, “ogon ibor bun,”† yef, are tamo tekelei, ĩ Kristus nigin. ¹⁷ Aya wogō auf anĩ nē gariya, are eig fiya: 430 yar ilele di, lo wō yen anĩ, Negur kulu bar itenēya inon anĩ to we fel fen, Negur nē promis to yalelef. ¹⁸ Lo bunem akor anĩ yaleya nigin ouf are, promis bunem akor are to dalouf. Anĩ ere, Negur ĩ, yogon wau ifenēya bun promis bunem akor anĩ Abraham ifenen.

¹⁹ Age fiyauf are, lo are ere nigin? Lo are mosor yaor fouf nigin ifenēdi di, anĩ ibodok ile, Abraham nē ibor ĩ nigin promis iron anĩ, wō youf bun bure falauf. Lo are, engelem, atun tamo Moses difenē di,

† **3:10:** Diuteronomi 27:26 § **3:11:** Habakuk 2:4
† **3:16:** Jenesis 12:7; 13:15; 24:7

lo anĩ yaor fen. ²⁰ Atun tamo ĩ, tamo foi fiya tekelei nē dogol to ibodōdig. Anĩ ere, Negur ĩ tekelei dogol, ĩ yogo bagai Abraham promis anĩ ifenen. (Anĩ bun, atun tamo taka to ibodok.)

²¹ Anĩ nigin, lo ado Negur nē promis kiwai youf de? Gai sã bagai! Lo ifenen anim tamo mata ifenem are, Negur mala bun madur bagai wōya are, momoi bagai, lo bunem isim. ²² Anĩ ere, Negur nē Itotoya kurō falaisi, tenebur tamo kayau ganan mosor nē kafĩ fiya bun difaref yef, are Negur nē promis Jesus Kristus nigin momoiya bunem ifenēf anĩ, idi momoi def anidi ifenēdiyof nigin, Negur age fen.

²³ Momoiya enei isiya sã mog, ada lo nē kafĩ fiya bun tabodon, tabodok tele mog, momoiya anĩ yaoren. ²⁴ Anĩ nigin, lo anim ada ulum iroukanada di, Kristus wagen tele di, ĩ ada momoiya bunem Negur mala bun madur bagai fadauf nigin, inon. ²⁵ Gama momoiya mogo isin nigin, ada gama baban lo farumen to tabodok.

Negur Gere Tar

²⁶ Ā ganan, Kristus Jesus nigin momoiya bunem, Negur gere tar ubodōgef, ²⁷ ere nigin, ā Kristus bun naan walegen ganan, are mogo Kristus ufonūgen. ²⁸ Ā gama, Juda tamo be Grik tamo, ferfer be kafĩ fiya sã, monog be gober to ufaregef, ere nigin, Kristus Jesus bun ā ganan tekelei ufaregef. ²⁹ Ā Kristus nē ufaragauf are, ā Abraham gere tar, anĩ nigin, in promis bunem yogon akor anĩ walogouf.

4

¹ Aya eig au wogō auf, kesu monog tama fotokar ĩ fau simōf are, are ĩ tama nē akor ganan yaloufeg, ĩ fau ferfer gen ibodok.

² ĩ fau simō ibod mog, ĩ idi kulatun fiya tamo ado idi lo fiya tamo farumen ibodō di, idi yogon kabĩ nigin lo difef, ile, tama sain ifenek anĩ bun didikalauf. ³ Age fiya gen, adag Kristus fau isiya sã mog, simō bun, tenebur nē uur sesen farumen, ferfer gen kafĩ fiya bun tabodon. ⁴ Anĩ ere, yogon sain bagai wō ye di, Negur yogo Naal sur fe di, kayau bunem wō yen, lo farumen

* **3:12:** Levitikas 18:5 † **3:13:** Diuteronomi 21:23

wō yen, ⁵ are idi lo farumen difaref anidi kel gei fediyouf nigin, age fe di, ada Negur gere tar ya bagai anī talouf nigin age fen. ⁶ Ā Negur gere tar nigin, Negur ī yogo Naal nē Awa Uur, ada wauda bun sur fe di, Awa Uurem iweig irōdig, “Abba,* Dei.” ⁷ Anī nigin, ō baban ferfer sã, ō in kesu. Ō in kesu ubodok nigin, Negur ī ōg yogon akor walouf nigin ineyon.

Pol Galesia Sios Nigin Osi Yen

⁸ Uruwa bun, ā Negur keleī sa ken, ā idi waitou bagai sã anī farumen ferfer ubodōgen. ⁹ Anī ere, gama ā Negur keleī, oo Negur ā nigin keleī youf auf are deuf, naig fe di, ā falei weleg fen, feseya ado maleg nē ifelnēya bun ulegef? Ā baban idim ferfer dineneīf nigin oroyeik de? ¹⁰ Ā naa tunī, ogō tunī, saneya tunī ado, yar tunī anī bun, anī nē lo dōg fen, āgenei kisi unogedig! ¹¹ Aya ā nigin kumī auf, are aya ā nigin ege be kabī alen.

¹² Turau tar, aya ā agoneik, aya gen wowāg, ere nigin, ayag ā gen wō aun. Ā aya bun ereb sane taka to ago gen. ¹³ Ā keleī, are aya dagi nigin, aya ā bun urug bagai biya od wogō ayein. ¹⁴ Neu dagi are ā morō ifenein, anī ere, ā aya to meleī irim wiyag fen, soso wiyagen. Age fiya ban, ā, aya Negur nē engel gen, Kristus Jesus yogo bagai gen, waleyagen. ¹⁵ Āgenei wauī kulīya ganam gama nain ibodok? Āgenei meleī kusuf yale, aya ifanaya nigin kisi feleyam are, ā kusug waleg aya wanagem, aya agef kurō feis irokeneīya nigin kisi feleya. ¹⁶ Aya age a momoi arokeneik bunem, āgenei kiwai wō auf de?

¹⁷ Tamo anidi are ā gei diyeīf nigin kabī totol daledig, anī ere, biya nigin sã. Idi ā ama bun tamal dalelneīf nigin orodif, are ā idi nigin kabī totol walougouf nigin age difef. ¹⁸ Erebiya nigin kabī totol yaleya, are biya, sain aya ā geid tabodok bun dogol sã, wededem ago gouf, are biya. ¹⁹ Neu kesu tar, aya ā nigin baban darau kesu gō fiya nigin gen alef ele, Kristus ā namein kare fouf. ²⁰ Aya ā geid gama tabod ken, aya neu ailō falei afouf nigin

aya wau adok irok, ere nigin, aya ā nigin nene auf!

Hagar Sara Ado

²¹ Aya urokanag, ā lo farumen ibodōya oroyeik, ā lo irok anī to keleī de? ²² Negur nē Itotoya bun irok, Abraham ī kesu uru ado, taka ferfer kayau bunem wō yen, agef fen, taka kafī fiya sã kayau bunem wō yen. ²³ Yogon kesu ferfer kayau bunem wō yen are, tamo nē tobonunā bunem gō fen. Age fe di, yogon kesu kafī fiya sã kayau bunem wō yen are, promis od anī dōf fen, wō yen.

²⁴ Enei are yaab od gen tailauf: Kayau are, bar itenēya uru nigin. Bar itenēya taka are, Sinai Arei bun tamal anī kesu gogū fen, are ferfer wowā douf nigin. Are Hagar. ²⁵ Hagar are Sinai Arei Arabia teneub bun ibodok anī nigin, takag, falei fel Jerusalem taun gama ibodok anī, ere nigin, ī yogon gere tar geid idi ferfer dibodok. ²⁶ Anī ere, Jerusalem ilun ibodok, are kafī fiya sã. Agef fen, ī neda sinada. ²⁷ Are Negur nē Itotoya eig ye irok:

“O kayau dali, ō kesu to gogū wodig, waū al fe.

Ō kesu gō fiya nē darau to walef, uweig fen, fatuk kaī wouf, ere nigin, kayau dali nē kesu are musei biya fen,

kayau tamo ado nē kesu wal fiya.”†

²⁸ Turau tar, ā, Isak gen, promis nē gere tar. ²⁹ Anī ere, sain anī bun, kesu tamo nē tobonunā bunem gō fen are, kesu Awa Uur nē megeir bunem gō fen anī darau ifenen. Gamag agef yenek. ³⁰ Anī ere, Negur nē Itotoya ere yef? “Ferfer kayau ado yogon kesu uru uraileid, ere nigin, ferfer kayau nē kesu ī, kafī fiya sã kayau nē kesu akor anī to foi fenēf.”‡ ³¹ Anī nigin, turau tar, ada ferfer kayau gere tar sã, kafī fiya sã kayau nē gere tar.

5

Kristus Bun Kafī Fiya Sã Ibodōya

¹ Ada karika tabodōf nigin, Kristus ī ada kafī fiya bun tamal yalelnadan. Anī nigin, megeir ufareg fen, baban ferfer nē kafī fiya farumen to ubodōg.

* 4:6: Anī nē gariya, Aram od nem, Dei. † 4:27: Asaia 54:1 ‡ 4:30: Jenesis 21:10

² Karĩ weleg! Aya Pol, ã arokeneik, ã mulũ bun ulalagauf are, Kristus ĩ, ã bun kabĩ sã bagai youf. ³ Tamo ganan mulũ bun dilef are, aya baban arokenēdif, idi lo ganan bagai dõ difouf. ⁴ ã lo bunem Negur mala bun madur bagai wõ gouf nigin ago gef, ã Kristus bun tamal fara yein. ã wau ifenēya utorōg fen, uyagen. ⁵ Anĩ ere, ada momoi tau fen, Awa Uur bunem madur bagai wõ tauf nigin, wauda ise fen, total bagai tari tafef. ⁶ Ere nigin, taka ĩ Kristus Jesus bun ibodok are, mulũ ileyã be, mulũ ileyã sã, anĩ ganan ege. Ere odug bagai are, momoiya, wau laa fiya bunem kabĩ yalef anĩ dogol.

⁷ ã meli bagai gududu gen. Aim anĩ ã momoi anĩ dõ fiya nigin naabureĩ gudũ fen? ⁸ Weder te yabiya od age fiya, are ĩ ã iweigneik anĩ bunem to isif. ⁹ “Yis naal bagai anim bret ganan gẽ yedig.” ¹⁰ Aya Odug bun ã nigin momoi auf, are ã kisi fire to walogouf. Aib ĩ ã neneya bun irailleyeik are, mala solo sane yalouf. ¹¹ Turau tar, aya mulũ ileyã nigin fau wogõ auf are, ere nigin aya fau darau difanaf? Aya age afem are, Kristus nẽ aa tetek, are tamo yeid tũ fiya nẽ meein to ibodom. ¹² Idi ã wauĩ tũ fiya difeneik anidi, idi dile, dogo bouweid gudũ difouf nigin, aya wau irok.

¹³ Neu turau tar, ã kafĩ fiya sã ufaragauf nigin iweignein. Anĩ ere, ãgenei kafĩ fiya sã anĩ bunem, bouwa nẽ oroya to dõ gouf, age fiya ban, wauĩ laa fiya bunem, abob aruna walogouf. ¹⁴ Lo ganan are lo tekelei bun bagu felef: “Õ ogo nigin waũ laa fef gen, nẽ tã nigin waũ laa fouf.”* ¹⁵ ã atun monēg fen, waila kaka gouf are, ã abob daũ wiyēgouf nigin, lo walagauf.

Awa Uur Bunem Ubodōgouf

¹⁶ Anĩ nigin, aya orok, Awa Uur bunem ubodōgouf, ago gouf are, ã bouwa nẽ oroya to dõ gouf. ¹⁷ Ere nigin, bouwa nẽ oroya ĩ, Awa Uur nẽ oroya anĩ to orodig, age fe di, Awa Uur ĩ, bouwa nẽ oroya to orodig. Idi urom abob kiwai difenēdig, are ã ereb oroyeik anĩ to ago gouf nigin age difedig. ¹⁸ Anĩ ere, ã Awa Uurem ulum irokeneif are, ã lo farumen to ubodōgef.

* 5:14: Levitikas 19:18

¹⁹ Bouwa nẽ oroya nẽ tobonunã are yaor: noli tobonunã, amuyẽ ado, bouwa nẽ oroya nigin total sane wau fãya; ²⁰ idegēya waitou yana yaleseya ado idegēya kosēya; abob kiwai ifenēya, kusīya, kiyēĩ inoya, seyeya, aya dogol yeya, fara fiya, foi fiya ado, ²¹ name nameya, aai naanueiya, bilãya ado, tobonunã age fiya anĩ ganan. Aya ã kulu arokenein gen, gama total bagai arokeneik, idi age de difaref anidi, Negur nẽ tano to dalouf.

²² Anĩ ere, Awa Uur nẽ faat are, wau laa fiya, wau kulīya, wau inosiya, wau yukeleya, wau ifenēya, tobonunã biya, dõ fiya biya, ²³ molol ado yogon bouwa tobonunã biya bun kulatun fiya. Lo takam enei ganan to katĩ felef. ²⁴ Aib idi Kristus Jesus nẽ dibodok, mogo mosor nẽ bouwa anĩ, yogon mala ile oroya ado bouwa nẽ oroya geid, aa tetek bun dukesin. ²⁵ Ada Awa Uur bunem tabodok nigin, ada Awa Uur bunemeg tayōf. ²⁶ Ada yanada to talesauf, to seye talesauf, age ta feneg, abob nigin kiyēĩ to tanouf.

6

Ganan Bun Biya Ago Gouf

¹ Turau tar, taka mosor ino mog ulogouf are, Awa Uur bun ufaregef ã, ĩ molol nem madur wiyēgouf. Anĩ ere, ãg kisi fiya bun to ulagauf nigin, ã aug nigin lo walagauf. ² Abob nẽ morõ faali ge, agog fen, naab anĩ bunem, Kristus nẽ lo anĩ ã bun kisi falauf. ³ Taka ĩ aya odug ye fen, ĩ yana sã ege ibodōf are, ĩ yogo idegnek. ⁴ Tamo mugu mugu yogon kabĩ anĩ es fouf. Agef fen, ĩ yogo nigin dogol yogon yana yales fen, taka yogo ad nigin to es fouf. ⁵ Ere nigin, mugu mugu yogon morõ anĩ faali fouf.

⁶ Taka ĩ Negur nẽ od nigin keleĩ yalef, ĩ ereb ereb biya anĩ ganan, yogon tise ado foi difouf.

⁷ Takam to idegneif: Takam Negur iseilnēya kisi feleya sã. Tamo ĩ ereb itenek de anĩ yaledig. ⁸ Taka ĩ yogo bouwa nẽ oroya dõ fiya nigin itenek, ĩ bouwa nẽ oroya bunem daũ fiya yalouf. Taka ĩ Awa

Uur dō fiya nigin itenek, ï Awa Uur bunem mata ibodkeleya anī yalouf. ⁹ Ada ereb biya age fiya nigin wauda to folo rouf, ere nigin, ada to fese tauf are, ada tatenek anī, yogon sain bun bagai talouf. ¹⁰ Anī nigin, ada anī age fiya nigin naab wō youf are, ada, tamo kayau ganan bun biya age tag, are idi momoiya nē ibor dibodok anidi bun bagai.

Mulū Bun Ileya Sā, Anī Ere, Mata Wōya

¹¹ Aya imaum bagai od nē ereb gegē odug atokenein anī uleg.

¹² Idi mayarē lo tafef anī bunem biya difamāf def anidim, ā mulū ileya nigin total bagai dirokeneik. Idi enei age difef are, idi Kristus nē aa tetek bunem darau yaleya ditor ken nigin dogol, age difef.

¹³ Idi mulū dilen anidig lo to dō difedig, anī ere, idi āgenei bouweī bunem yeneid dalesauf nigin ā mulū ileya nigin orodif.

¹⁴ Aya yug nigin to bagai yanau alesauf, neda Odug Jesus Kristus nē aa tetek nigin dogol. Aa tetek bunem, teneub enei nē oroya, aya bun laa fen, age fe di, ayag neu oroya, teneub enei nē oroya bun laa fiyan. ¹⁵ Mulū ileya, mulū ileya sā be, are ganan ege. Safina odug are, mata wōya.

¹⁶ Wau inosiya ado wau yūya, idi od enei mogo wogō aul anī dō difef anidi ganan bun isiyouf, Negur nē Israel tamo kayau buneg isiyouf.

¹⁷ Sain enei bunem ilauf ganan bun, taka nem morō to ifanauf, ere nigin, aya bouwau bun Jesus nē uris ibodok.

¹⁸ Turau tar, neda Odug Jesus Kristus nē wau ifenēya āgenei uur bun ibodōf. Momoi.

Efesus

¹ Aya Pol, Negur nē oroya bunem, Kristus Jesus nē aposel wō aun,

Efesus Negur nē tamo kayau, Kristus Jesus el de dō difedig anidi bun, pas enei atotof.

² Negur neda Tamada ado Odug Jesus Kristus neid wau ifenēya ado wau inosiya, ā bun ibodōf.

Kristus Bunem Uur Nē El Fiya Ifanadan

³ Ada, neda Odug Jesus Kristus nē Tama Negur, ī yana talesauf, ī uur nē el fiya Kristus bun saa ilun dibodok anī ganan bunem el fadan. ⁴ Negur ī saa teneub ado kare fiya sā mog, ada yogon mala bun, fateul ado amuyē sā tabodōf nigin, Jesus bun igirnadan. ⁵ Wau laa fiya bun, Negur ī yogon wau kulīya ado oroya kilei, Jesus Kristus bunem, ada yaleda fen, Negur nē gere tar wowā taut nigin, mogo igirnadan. ⁶ Anī nigin, Negur nē wau ifenēya, are Jesus Negurem ī nigin wau laa fedig anī bun, ege luwa ifanadan anī nē fula fiya medeīya nigin, Negur yana talesauf. ⁷ Jesus bun, ada, yogon naud bunem kel yaleya, mosor nigin weder tu keleya anī, Negur nē wau ifenēya barikā bunem, talen. ⁸ Negur ī yogon wau ifenēya bunem, kisi biya ado kisi fokōya ganan, ada bun foula fen. ⁹ Agef fen, ī yogon oroya nē waa anī ifelnadan, are yogon wau kulīya nē kisi Kristus bun kisi fen kilei, ¹⁰ yogon sain anī kisi fel wō youf bun kabī yalouf, sain anī bun, Negur ī saa teneub ado bun ereb ereb ganan dibodok anī, mudur tekelei, Kristus farumen gurif iroulauf.

¹¹ Negur ī yogon oroya dōf fen, ereb ereb ganan age fedig, ī yogon kisi dōf fen, ada mogo igirnadan, age fe di, adag Kristus bun yogon akor talen, ¹² are ada uyulil Kristus bun wauda iseya talen anī, Negur nē fula fiya medeīya yana talesauf nigin age fen. ¹³ Ā momoi anī nē od, āgenei kel yaleya nē biya od anī karī ge fen, āg Kristus bun ubodōgen. Ā Kristus nigin momoi ge di, Negur ā bun uris, are

Awa Uur Fateul Negur afeneīf yen anī inon. ¹⁴ Negur ī, idi Negur nē anidi kel yaleya fau wōya sā mog, ada neda akor momoi bagai talouf nigin megeir fe fen, Awa Uur Fateul iben, are ada yogon fula fiya medeīya yana talesauf nigin age fen.

De Fiyēya Ado Kosēya

¹⁵ Age fiya nigin, aya Odug Jesus nigin āgenei momoiya ado, Negur nē tamo kayau ganan nigin āgenei wauī laa fiya anī karī au fen, ¹⁶ aya ā nigin Negur de fiyēya to folō afelen. Aya neu kosēya bun ā nigin karī aul fen, ¹⁷ neda Odug Jesus Kristus nē Negur, Tamada fula fiya medeīya barikā, ī, ā ī nigin keleī bagai youf nigin, kisi biya ado kurō fesiya nē Awa Uur ifeneīf nigin, kosē audig. ¹⁸ Aya āgenei wauī nē meleī fokō fouf nigineg kosē audig, are ā, wau iseya ī anī bun iweignein, yogon fula fiya medeīya barikā nē akor Negur nē tamo kayau bun ibodok anī ado, ¹⁹ yogon megeir barikā momoi taut ada bun kabī yalef anī, keleī youf nigin, age afedig. Megeir are, yogon total barikā anim kabī yalef gen, ²⁰ megeir de tekelei anim Kristus bun kabī yale fen, ī laa bun tamal kel turī fiye ken, saa ilun Negur ima biyalē inenen. ²¹ Negur ī, Kristus, uyu irouya ganan, yeneid adodo ganan, megeir ganan, odudug ganan ado, yeneid sain enei bun ado sain fau isiyouf buneg ifenēdiyof ani ganan wal fiya bun inenen. ²² Agef fen, Negur ī, ereb ereb ganan Kristus ye farumen gō fel fen, ī sios nigin ereb ereb ganan neid mudur ibodōf nigin igirnen. ²³ Sios are, yogon bouwa, ī naab ganan bunem ereb ereb ganan kisi feledig anī nē kisi feleya.

2

Kristus Bun Mata Tabodok

¹ Ā kulu āgenei kū fenēya ado mosor bun gare gen. ² Sain anī bun, ā teneub enei nē naab ado, owōbē tano nē mudur, are uur idi dō fiya sā anidi bun gama kabī yalef anī nē naab dō gen. ³ Idi atun ada gananeg, uruwa bun bouwada nē oroya anī dō tafe fen, yogon oroya ado kisi dō tafen. Ada, tamo tunī ganan

idi gogū difedin gen, adag age de gogū difadan bunem, Negur nē didi farumen tabodon. ⁴ Anī ere, ada nigin yogon wau laa fiya odug bunem, Negur wau yūya barikā, ⁵ ĩ, ada kū fenēya bun gare taun sain buneg, ada Kristus geid turī fadan. Are wau ifenēya bunem, ā kel yaleyeyin. ⁶ Agef fen, Negur ĩ, ada Kristus geid kel turī fada fen, Kristus Jesus bun ada ĩ geid saa ilun tabodōf nigin inenadan, ⁷ are, fau isiyouf sain bun, ĩ yogon biya fiya Kristus Jesus bun ifanadan anī bunem, yogon wau ifenēya barikā ifelnēdiyof nigin age fen. ⁸ Wau ifenēya bunem, ā momoiya bunem kel yaleyeyin, are aug bunem sā, Negur nē ege luwa ifenein, ⁹ are kabī bunem sā, anī nigin, taka nem to yana yalesauf. ¹⁰ Ada Negur nē imaba, kabī biya talouf nigin Kristus Jesus bun ada kare fadan, kabī biya are Negur ada age tafouf nigin uruwa bun mogo dodok fanadan.

Kristus Bun Ada Tekelei

¹¹ Anī nigin, uruwa bun, ā gō diyein bunem haiden ubodōge di, idi mulū dilen anidim (are tamo bouwa bun tamo imedim age difen) ā mulū ileyā sā diyein anī karī weleg. ¹² Sain anī bun, ā Kristus nigin gerō ufaregen, ā Israel buneg yeneī sā, promis nē bar itenēya buneg ā yaū, tenebur ein wau iseya sā, Negur nigin keleī sā ubodōgen anī karī weleg. ¹³ Anī ere, gama ā uruwa gerō ufaregen anī, Kristus Jesus bun, Kristus nē naud bunem, Negur non guri yeī irusiyeyin.

¹⁴ Ere nigin, Kristus yogo ĩ neda maror, uru anī yale, tekelei inon, agef fen, kiwai fara fiya nē garaī anī narī fen. ¹⁵ ĩ yogo bouwa bunem lo, itāfiya ado, nun anī yaledin. ĩ yogo bun tamo uru anī bunem, tamo mata tekelei ino fen, maror inouf nigin age fen. ¹⁶ ĩ bouwa tekelei enei bun, idi uruwom aa tetek bunem Negur bun komo fediyof nigin agef fen, ĩ aa tetek bunem dogo neid kiwai yukesin. ¹⁷ ĩ isi fen, ā haiden gerō ufaregen bun maror nigin wogō yei ken, idi Juda temeleid non difaren anidi buneg, maror nigin wogō fiyēdin. ¹⁸ ĩ bunem, ada uruwom Awa Ur

tekelei bunem, Tamada wagen ileyā kisi feleya.

¹⁹ Anī nigin, ā yaū tamo ado tamo urug sā, anī ere, Negur nē tamo kayau geid tekelei fen, Negur nē ibor tar. ²⁰ Ā, aposel ado profet fō gariya dinon anī teten fō gen inoyeyin, are Kristus Jesus yogo ĩ monog tor gen. ²¹ Kristus bun, fō ganān katō fel fen, Odug bun tempel fateul wō youf nigin fā yef. ²² Kristus bun, āg, mata ibodōya nē modoū Negur yogon Awa Ur bunem ibodōf nē anī wō gouf nigin, weim inoyeik.

3

Pol Haiden Bun Biya Od Wogōya Tamo

¹ Age fiya nigin, aya Pol, haiden ā nigin, Kristus Jesus nē kabī nigin au fen, kalabus bun abodok.

² Momoi bagai, Negur nē wau ifenēya ā nigin aya ifanan anī, naig fe kabī yalen are, ā karī gen. ³ Are waa Negurem kurō fesiya bunem aya ifelnan, are aya mogo tobega bagai atoton gen. ⁴ Ā enei uweseg fen, Kristus nē waa nigin aya wederou fokō felen anī, keleī youf. ⁵ Are Awa Uurem Negur nē fateul aposel ado profet bun gama kurō fesin gen, sain mogo ilelen anī nē tamo kayau bun tamo idi to agef ifelnēdin. ⁶ Waa are, biya od bunem, haiden idi Israel geid Negur nē akor dalouf, idi ganān bouwa tekelei nē bagu fiya dibodōf, agef fen, Kristus Jesus bun promis nē akor anī weim dalouf.

⁷ Negur nē megeir kabī yale di, aya Negur nē wau ifenēya ege luwa ifanan anī bunem, biya od enei nē kabī tamo wō aun. ⁸ Negur nē tamo kayau ganān atun, tamo naal farumen aya gai naal bagai anī, wau ifenēya enei aya ifanan, are Kristus nē kisi feleya, are imir ken, ileyā kisi feleya sā anī, haiden bun wogō auf nigin ado, ⁹ waa enei, kulu isin ganān Negur ereb ereb ganān kare fen anī bun iminēyan ibodon anī, naig fe kabī yalef anī, tamo kayau ganān bun yaor afouf nigin ifanan. ¹⁰ Negur nē kisi are, gama sios bunem, Negur nē kisi biya fire fire, saa ilun uyu iroudiya ado yeneid adodo ifelnēdiyof, ¹¹ are Negur ĩ, yogon mata ibodkeleya nē oroya, neda Odug Kristus Jesus bun kisif

bure felen anī kilei, age fen. ¹² Kristus bun, ada Kristus nigin momoiya bunem, karika ado kumī sã, Negur wagen ileya kisi feleya. ¹³ Anī nigin, aya ã arokeneik, aya ã nigin darau alef ge fen, to felu gouf, darau are ã fula fiya medeīya ifeneīya nigin.

Efesus Sios Nigin Kosēya

¹⁴ Gariya enei nigin, Dei ī bunem, yogon ibor ganan saa ilun ado tenebur ein dibodok, ¹⁵ dogo neid yeneid yaledig, aya ī wagen iborou bobou afef. ¹⁶ Aya kosē auf, ī yogon fula fiya medeīya kisi feleya bunem, yogon Awa Uur bunem megeir ã namein ife fen, megeir yeif nigin, ¹⁷ are Kristus ī momoiya bunem āgenei wauī bun ibodōf nigin. Age afe fen, aya kosē auf, ã warumutei ado gariya, wau laa fiya bun utenēg fen, ¹⁸ ã Negur nē tamo kayau ganan geid, Kristus nē wau laa fiya anī, odug naig be fiya, meluk, ilun ado, namen naig be fiya anī ulogouf nigin megeir walogouf, ¹⁹ agog fen, wau laa fiya enei, keleī ganan wal fiya anī keleī youf, anī bunem, Negur nē kisi feleya ganan ã bun kisi falauf nigin kosē auf.

²⁰ Ī gama yogon megeir ada namedan kabī yalef anī bunem, ereb ada to tafef be, kisi tafef anī ganan wal fiya, age fiya kisi feleya, ²¹ sios bun ado Kristus Jesus bun, fula fiya medeīya, ibor ganan gai gai ibodok ilauf bun, ī bun ibodōf! Momoi.

4

Kristus Bouwa Bun Bagu Fiya

¹ Aya Kristus nigin kalabus bun abod ken, iweigya ã walegen kilei, mata ubodōgouf nigin total bagai arokeneik. ² Ā wauī adok ukalaisileg fen, molol bagai ubodōgouf. Ā to feseg, wauī laa fiya bun abob nē morō uteīgouf. ³ Awa Uur maror bunem bagu yein anī uroug kafī walagauf nigin, kabī total waleg. ⁴ Sain ã iweignein, ã wau iseya tekelei bun iweignein, age fiya gen, bouwa tekelei, Awa Uur tekelei, ⁵ Odug tekelei, momoiya tekelei, naan igūya tekelei, ⁶ Negur tekelei, ī ganan neid

Temeid, ī ganan wal fiya, ī ganan atun, ī ganan namen ibodok.

⁷ Anī ere, ada mugu mugu wau ifenēya, Kristus ege luwa ifenēya nigin kisi fen kilei, ifanadan. ⁸ Negur nē Itotoya anī nigin eig ye irok,

“Ī ilun iselen sain,

ī tamo musei geif irou iselen,

agef fen, ī tamo ege luwa ifenēdin.”*

⁹ (“Ī ilun iselen” ya nē gariya are ere? Anī nē gariya are, ī tenebur farumen bagai buneg isilen. ¹⁰ Ī isilen are, ī anī saa ilun ganan wal fiya iselen, are owō ganan inolauf nigin age fen.) ¹¹ Inim anī, tunī aposel kabī, tunī profet kabī, tunī soosi kabī, tunī pastor kabī ado tise kabī ifenēdin, ¹² are Negur nē tamo kayau, aruna yaleya kabī dalouf nigin dodok fedid, Kristus nē bouwa odugouf nigin age fen. ¹³ Agef ile ile, ada ganan, momoiya tekelei ado Negur Naal nigin keleī tekelei bun tasi fen, tamo kisi feleya bagai wō tau fen, Kristus nē kisi feleya bagai bun talauf.

¹⁴ Age tafouf, ada baban momou gen to tabodōf, maaī moloun wīya gen to age ta fen, tai fiya ganan, tamo neid beugya ado, idegēya tamo neid kisi anidim, yaum fū fe di, aarau ilef isif fedig gen, to wewu fadauf. ¹⁵ Age fiya ban, ada wau laa fiya bun momoi anī wogō tau fen, ereb ereb ganan bun Mudur ibodok bun biya daf iselauf, Mudur are Kristus. ¹⁶ Ī bunem, dirumunā ganan bouwa isenne ken, katokitī fe, bagu fele di, bouwa nē fara fiya mugu mugu yogon kabī yalef bunem, bouwa adok odug fen, wau laa fiya bun yogo inof.

Lalan Nē Gere Tar Gen Tabodōf

¹⁷ Anī nigin, aya enei Odug bun totol bagai arokeneik, ã baban, haiden idi difaredig gen, kisi sã gen to ufaragauf. ¹⁸ Idi neid kisi gugum kel fen, Negur nē mata bun ibodōya ditoron, ere nigin, idi wedereid to fokō ye fen, waud totolen. ¹⁹ Idi es fiya kisi ganan ditor ken, idi dogo bouweid adok sane bun difen ken, ereb ereb sane ganan, dogo nigin dogol, es fiya sã age difedig.

* 4:8: Sam 68:18

²⁰ Anĩ ere, ã Kristus nigin naab anĩ bunem to kelein. ²¹ Momoi bagai, ã ĩ nigin karĩ gen ado, ĩ bun difelnein, are momoi Jesus bun ibodok anĩ kilei. ²² ã uruwa ubodõgen, ãgenei oroya tubu, yogon idegẽya oroya bunem sane len anĩ, utorõg fen, ²³ ãgenei kisi nẽ tobonunã bun mata wõg fen, ²⁴ oroya mata, madur bagai ado momoi nẽ fateul bun Negur gen inon anĩ, ufonũgouf nigin difelnein.

²⁵ Anĩ nigin, ã mugu mugu idegẽya utorõg fen, ã neĩ tã momoi nem urokenẽgouf, ere nigin, ada ganan bouwa tekelei nẽ tunĩ. ²⁶ “ãGenei seyeya bun, mosor to unog.”† ã wauĩ bun to seye yef ile, gaa kuru kalauf. ²⁷ Agog fen, ã Satan nẽ modoũ taka to utoumkenẽgouf. ²⁸ Aib ĩ bẽ ilenouf, baban to bẽ ilauf, anĩ ere, yogo imam ereb biya nigin kabĩ yale di, ĩ lau difef anidi ifenẽdiya nigin safina adouf.

²⁹ ãGenei eweĩ bun od sesen to wõ youf, anĩ ere, idi lau difef anidi fã de dalouf nigin isennẽya od anĩ dogol urõge di, idi karĩ def are isennẽdiyof. ³⁰ Negur nẽ Awa Uur Fateul to wau morõ wenẽg, ĩ bunem kel yaleya nẽ naa nigin uris ã bun inon. ³¹ Ereb ereb dirikeĩ ganan, didi fatuk iseya, seyeya, gurũya, dumen od irõya ado, ereb ereb sane ganan utorõg. ³² Abob el wiyẽg fen, abob nigin wauĩ yu ken, Negur ĩ Kristus bun ãgenei mosor nigin weder tu kelen gen, abob nẽ mosor nigin wedereĩ tu kalauf.

5

¹ Anĩ nigin, ã Negur gere tar oboi nigin, ĩ gen bagai ago gouf. ² Kristus ada nigin wau laaf fen, ada nigin yogo bouwa ofa ado sesewi fiya sumeĩ biya gen Negur ifenen gen, wauĩ laa fiya bun agog ubodõgouf.

³ Anĩ ere, ã atun, naal bagai noli tobonunã be, ereb amuyẽ ado taka be, safina musei youf nigin ima su lai fe fen sũ we fiya taka to ibodõf, ere nigin, eneidi are Negur nẽ fateul tamo kayau bun to biya. ⁴ Takag, od sesen, neneya od be, od sane nem weli to unogouf, are ada nigin to biya, anĩ ere, de fiyẽya od wogõ gouf. ⁵ Ere

nigin, ã momoi bagai enei keleĩ: Tamo noli tobonunã ado, amuyẽ ado be, safina musei youf nigin ima su lai fe fen sũ we fiya (tamo age fiya are idegẽya waitou yana yaleseya tamo), ĩ Kristus ado Negur nẽ tano bun akor to yalouf. ⁶ To lo ge di, taka nem od egem idegneĩf, ere nigin, age fediya bunem Negur nẽ didi, idi nokũ difef anidi bun isidig. ⁷ Anĩ nigin, idi geid to nigal ũgouf.

⁸ Ere nigin, ã uruwa bun gugum, anĩ ere, gama Odug bun ã lalan. Lalan nẽ gere tar gen agog ufareg. ⁹ Ere nigin, lalan nẽ faat are, biya fiya, madur bagai ado, momoi anĩ ganan bun ibodok. ¹⁰ Agog fen, ereb Odug wau al fouf anĩ keleĩ youf. ¹¹ Ereb gugum bun tamal tobonunã faat biya sã anĩ geid to nigal ũgouf, anĩ ere, yaor wedigouf. ¹² Ere nigin, ereb fe temeleid iminẽyan age difedig anĩ nigin irõya, areg mama ado. ¹³ Anĩ ere, ereb ereb ganan lalan bun yaor fef, are yaoredig, ¹⁴ ere nigin, lalan anim age fe di, ereb ereb ganan yaoredig. Enei nigin wogõya eig yef,

“Fã wale, mulaĩ tamal,
laa bun tamal fã wo,
ago di, Kristus õ bun fula fouf.”*

¹⁵ Anĩ nigin, ãgenei ibodõya nigin el ge lo walagouf. Kisi sã gen to ufaragouf, anĩ ere, kisi biya ado gen ufaragouf. ¹⁶ Naa biya ã nigin wõ youf ganan to sekil gouf, ere nigin, naa are sane. ¹⁷ Anĩ nigin, to neneg, anĩ ere, Odug nẽ oroya naig fiya anĩ ã keleĩ youf. ¹⁸ ã wain musei to wõ ge di, meleĩ waĩ youf, are bouwa nẽ oroya nigin total sane wau fãya bun irouleyeĩf. Age fiya ban, Awa Uurem nameĩ isokosouf. ¹⁹ Od Negur nẽ Itotoya Sam bun ibodok, Negur yana yaleseya seg ado, uur nẽ seg bunem abob wogõ wiyẽgouf. ãGenei wauĩ bun Odug bun seg waleg fen, kakũ gouf. ²⁰ Sain ganan bun, Negur Tamada ereb ereb ganan nigin, neda Odug Jesus Kristus yana bun de wiyẽgouf.

²¹ Kristus anini wiyẽg fen, abob farumen ubodõg.

Tamo Aiwa Ado Kayau Aiwa

† 4:26: Sam 4:4 * 5:14: Asaia 26:19; 60:1; Rom 13:11

²² Kayau, ã Odug farumen ubodõgedig gen, aiweĩ tar farumen ubodõgouf. ²³ Ere nigin, Kristus ĩ, sios nẽ mudur ibodok gen, tamo ĩ kayau nẽ mudur ibodok, agef fen, Kristus ĩ sios, yogon bouwa nẽ kel yaleya tamo. ²⁴ Sios Kristus farumen ibodok gen, kayau idig ereb ereb ganan bun, dogo neid aiweid tar farumen dibodõf.

²⁵ Tamo, Kristus sios nigin wau laaf fen, yogo bouwa ĩ nigin ifenen gen, aiweĩ tar nigin wauĩ laa fouf. ²⁶ Kristus ĩ anĩ age fen, are sios fateul ibodõf nigin od bunem naan nem fili youf nigin kulof fen, ²⁷ are sios medeĩya bagai, diri sã, ifokoĩya be, ereb age fiya taka sã, anĩ ere, fateul fen bouwa od sã, yogo bun iroulauf nigin age fen. ²⁸ Age fiya bagai, tamo dogo bouweid nigin waud laa fedig gen, aiweid tar nigin agef waud laa fouf. Aib ĩ aiwa nigin wau laa fef, are yogo nigin wau laa fef. ²⁹ Aibem taka yogo bouwa to sane fiyẽdig, anĩ ere, ĩ ifout ken, kulatun fedig, Kristus sios nigin age fedig gen, ³⁰ ere nigin, ada yogon bouwa nẽ tunĩ. ³¹ Are Negur nẽ Itotoya eig ye irok kilei, “Age fiya nigin, tamo ĩ yogon tama sina ado itorneid fen, yogon aiwa ado bagu difouf, age de fen, idi uruwom bouweid tekelei youf.”† ³² Waa enei are, odug bagai, anĩ ere, aya Kristus ado sios nigin wogõ auf. ³³ Anĩ ere, ã aug nigin wauĩ laa fedig gen, ã mugu mugu ãgenei kayau tar nigineg agog wauĩ laa fouf. Age fe di, kayau ĩ yogon tamo farumen ibodõf.

6

Sina Tama Kesu Tar Geid

¹ Kesu, Odug bun sineĩ temeĩ tar sigoreid dõ gouf, ere nigin, anĩ madur. ² “Sinã tamã yeneid walesauf,” are ĩtãfiya matu promis ado bagu fen, ³ “anĩ bunem, õ ibodõya biya ile di, tenebur ein sain meluk ubodõf.”* ⁴ Tama tar, gereneĩ tar waud saneya to wenẽdig, age fiya ban, Odug nẽ tai fiya ado ifelnẽya bunem lo wedigouf.

Ferfer Ado Marau Tamo

⁵ Ferfer, ã Kristus dõ gounẽ gen, tenebur ein ãgenei marau tamo, kumĩ ado aniniya

ado, wauĩ adok bunem sigoreid dõ gouf. ⁶ ã meleid yaleya bunem to sigoreid dõ gouf, anĩ ere, Kristus nẽ ferfer gen, Negur nẽ oroya, ãgenei wauĩ adok bunem ago gouf. ⁷ ã Odug aruna walogounẽ gen, tamo nigin sã, wauĩ adok yen ken, aruneid walogouf, ⁸ ere nigin, ã keleĩ, ĩ ferfer be, kafĩ fiya sã, Odug ĩ mugu mugu ganan, ereb biya age difef anĩ kilei, mala solo ifenẽdiyof.

⁹ Marau tamo ã, ãgenei ferfer naab de anĩ bunem el wedigouf. To kumĩya wenẽdig, ere nigin, ã keleĩ, ã ado idi nigin, ãgenei Marau saa ilun ibodok, ĩ bun taka nigin dogol anĩ, kinau ya sã.

Negur Nẽ Kusĩ Nẽ Saki

¹⁰ Od idĩya nigin, Odug bun ado yogon megeir barikã bun, total ufareg. ¹¹ Negur nẽ kusĩ nẽ saki ganan waleg, naki weleg fen, Satan nẽ kisi, fe fiyẽya nigin, sã megeir ufaragouf. ¹² Ere nigin, ada neda kusĩ are, bouwa ado naud nẽ oroya fe fiyẽya nigin sã, anĩ ere, uyu iroudiya, yeneid adodo, tenebur nẽ gugum nẽ megeir ado, saa ilun kaa sesen nẽ megeir nẽ total fe fiyẽya nigin. ¹³ Anĩ nigin, Negur nẽ kusĩ nẽ saki ganan waleg, naki weleg, anĩ bunem, sesen nẽ naa wõ ye di, ã tutub yũ ifareya nigin kisi feleya, agog fen, ã ereb ereb ganan agog fen, ufaragouf. ¹⁴ Anĩ nigin, total ufareg, momoi nẽ lũ luweĩ gug fen, madur bagai nẽ siot kapam akoreĩ dedeg, ¹⁵ agog fen, ãgenei yeĩ bun su ufonũg fen, maror nẽ biya od wogõya nigin dodok fiya saika ufaragouf. ¹⁶ Enei ganan bun tobol fe fen, momoiya nẽ makanam waleg, anĩ bunem, ã sesen nẽ magir yã bale ado isif anĩ ganan, sã gare walagouf. ¹⁷ Agog fen, kel yaleya nẽ hat kapa ado Awa Uur nẽ dimig, are Negur nẽ od, anĩ waleg. ¹⁸ Kosẽya ado to fiya ganan bun, sain ganan Awa Uur bun kosẽ gouf. Enei kisi bun unog fen, saika ge fen, sain ganan Negur nẽ tamo kayau ganan nigin kosẽ gouf.

¹⁹ Aya nigineg kosẽ gouf, are sain aya od arõf bun ganan, Negurem od ifana fen, aya kumĩ sã biya od nẽ waa anĩ wogõ

† 5:31: Jenesis 2:24 * 6:3: Eksodas 20:12; Diuteronomi 5:16

auf nigin ago gouf. ²⁰ Biya od enei nigin, aya soosi tamo wõ au fen, kalabus bun abodok. Aya to kumĩ au fen, biya od sã kurõ afalaisiyouf nigin kosêg.

Idikeleya Nẽ Aanya

²¹ Tikikus, turau oboiyou fen Odug bun kabĩ tamo dõ fiya biya, ã ereb ereb ganan irokeneĩf, age fe di, ãg, aya naig be afef ado aya ere kabĩ alef anĩ, keleĩ youf.

²² Aya, ã, gariya enei nigin bagai ã gein sur afef, are ã amã naig be fiya mabodok anĩ keleĩ youf nigin ado, ã ãgenei wauĩ megeir fouf nigin.

²³ Tamada Negur ado Odug Jesus Kristus bunem, turau tar, wau inosiya ã bun ibodõf, agef fen, wau laa fiya momoiya ado ã bun isiyouf. ²⁴ Idi, neda Odug Jesus Kristus nigin waud laaf fen, waud laa fiya anĩ to folõ difeledig anidi ganan bun, wau ifenẽya ibodõf.

Filipai

¹ Pol ado Timoti, Kristus Jesus nē ferfer, Filipai oun Kristus Jesus bun Negur nē tamo kayau ganan ado, uyu iroudiya ado uyu iroudiya farumen sios kabī daledig anidi bun pas enei matotof.

² Neda Tamada Negur ado Odug Jesus Kristus bunem, wau ifenēya ado wau inosiya ā bun ibodōf.

De Fiyēya Ado Kosēya

³ Sain aya ā nigin karī aulef ganan bun, aya neu Negur de afiyēdig. ⁴ Ā ganan nigin neu kosēya ganan bun, aya sain ganan bun wau kulīya ado kosē audig, ⁵ ere nigin, ā gariya bunem biya od nigin, amā geid uyu kū ta tasin isi, gama sain enei bun. ⁶ Aya enei nigin momoi auf, are taka ī ā namein kabī biya gariya inon are, tokō fel ile, Kristus Jesus nē naa bun idikalauf.

⁷ Aya ā ganan nigin eig afe kisi afef, are tutuk, ere nigin, ā neu wau bun ufaregef, ere nigin, aya kalabus bun be abodok, biya od asen ken, kurō afeis fen megeir afef bun, ā ganan Negur nē wau ifenēya bun, aya geid tabodōgedig. ⁸ Kristus Jesus nē wau laa fiya bunem, aya ā ganan nigin wau naig be fe laa fedig, are Negur ī keleī.

⁹ Enei nigin aya kosē auf, are āgenei wauī laa fiya anī, keleī ado es fiya kisi ganan bun, odugef ilauf, ¹⁰ anī bunem, ā ereb biya bagai ya es fiya kelei ken, ā karētut fen, od sā ubodōgef uleg, Kristus nē naa bun wō gouf, ¹¹ ago ge di, madur bagai nē faat Jesus Kristus bunem isif anī, ā bun barikāf, anī bunem, Negur ī fula fiya medeīya ado yana yaleseya yalouf.

Pol Kalabus Ibodon Anim Biya Od Fou Yelen

¹² Turau tar, gama aya ā enei keleī youf anī orouf, ereb aya bun wō yen anim, biya od el fe isennē di, fou yelen. ¹³ Anī bunem, Sisa* nē fō lo fiya tamo ganan ado tamo kayau ganan idi, aya Kristus nigin kalabus bun abodok ya anī keleī. ¹⁴ Aya kalabus bun abodok anī bunem, neu turau

tar musei ganan, Odug bun dibodok idi, Negur nē od nigin, total ado kumī sā, wogō douf nigin waud yalesen.

¹⁵ Momoi, tunī kiyeī ado kiwai bunem Kristus nigin wogō dedig, anī ere, tunī kisi biya bunem age difedig. ¹⁶ Idi kisi biya bunem age difedig anidi, wau laa fiya bunem age difedig, are aya biya od asennen bunem kalabus bun abodok anī idi keleī. ¹⁷ Idi kiyeī ado kiwai bunem age difedig anidi, kisi karētut ban, dogo yeneid nigin de fen, Kristus nigin wogō def, are sain aya kalabus bun abod mog, morō aya bun tobol fiya nigin de fen age difedig. ¹⁸ Anī ere, ere naig fouf? Ereb odug bagai are, naab ganan bun, kisi kū fenēya bunem be, kisi tutuk bunem age difef, are Kristus nigin wogō def. Anī age dife di, aya wau al fef.

Momoi, aya neu wau al fiya tokō afalauf, ¹⁹ ere nigin, aya keleī, āgenei kosēya bunem ado Jesus Kristus nē Awa Uurem isennēya bunem, ereb aya bun wō yen anim, aya kafī fiya bun tamal yalelnauf. ²⁰ Aya total bagai kisi afe fen, wau irok, are aya naab taka bunem to mama fiyauf, anī ere, aya kumī sā total barikā ano di, Kristus ī, sain ganan age fedig gen, gamag neu bouwau bun, mata ibodōya bun be laa buneg, yana ilun iselauf. ²¹ Ere nigin, aya bun, mata ibodōyauf are Kristus nigin, laa fiyauf areg aya biya alouf. ²² Aya fau bouwau bun mata abodok alauf are, aya faat biya yūf nigin kabī alouf. Anī ere, ere anī aya dō afouf? Aya keleī sā! ²³ Aya uru anidim si sitakā dī difiyaf. Aya ile, Kristus ado ibodōya nigin orouf, are gai biya bagai, ²⁴ anī ere, aya bouwau mata ibodōf are, ā nigin biya bagai youf. ²⁵ Aya enei nigin momoi bagai au fen, aya keleī, aya fau abodōf, age afe fen, aya, āgenei momoiya biya ilauf nigin ado ā momoiya bun wauī kulī youf nigin, ā ganan geid tabodōf. ²⁶ Age fe di, aya ā geid baban tabodōf anī bunem, aya bunem, āgenei wauī kulīya Kristus Jesus nigin ise gogū fouf.

²⁷ Ereb wō youf, Kristus nē biya od kisin bagai ereb ereb ago gouf. Anī bunem,

* **1:13:** Rom neid king odug.

aya asi ã ailiyeif be, aya ã atun ibodõya sa ken karĩ be dogol auf, aya keleif youf, are ã uur tekelei bun total ufareg fen, biya od nẽ momoiya nigin tamo tekelei gen, bagug fen, kabĩ total walogouf. ²⁸ Idi naab fire fire bunem, kiwai difeneif anidi nigin, ã kumĩ sã ufaragouf. Are idi bun, idi daũ feidlauf anĩ nẽ uris, anĩ ere, ã bun, Negurem ã kel yaleyeif anĩ nẽ uris. ²⁹ Ere nigin, ã Kristus nigin momoi gouf nigin dogol, Kristus aruna yaleya nẽ el fiya to ifenein, anĩ ere, ã ã nigin daraug walogouf nigin ifenein. ³⁰ ã aya kusĩ aun ulegen, gamag fau kusĩ auf karĩ gef anĩ, ãg ago gef.

2

Kristus Nẽ Wau Yukesileya Anĩ Madẽ Gouf

¹ Anĩ nigin, ã Kristus bun wauĩ yaleseya adouf are, Kristus nẽ wau laa fiya bunem wauĩ yo fiya adouf are, Awa Uur geid nigal yũya adouf are, molol ado wauĩ yũya adouf are, ² neu wau kulĩya anĩ, wauĩ tekelei, wauĩ laa fiya tekelei, uur ado kisi bun tekelei bunem tobol ge di, neu wau kulĩya barikãf. ³ Aug nigin dogol be, ege yeneĩ yaleseya bunem ereb taka to ago gouf, anĩ ere, wauĩ yukesileya bun, ã aug nigin kisi gef anĩ wal fiya, taka nigin agog kisi gouf. ⁴ ã mugu mugu ãgenei biya fiya nigin dogol to kisi gouf, anĩ ere, tunĩ neid biya fiya nigineg kisi gouf.

⁵ ãgenei tobonuneĩ, Kristus Jesus nẽ ado tekelei youf:

⁶ ã yogo Negur bagai,
anĩ ere, ã Negur gen ibodõya anĩ itoron,

⁷ anĩ ere, ã yogon kisi ganan yukalaisil fen,
ferfer gen ibod ken,
tamo bagai gen wõ yen.

⁸ Agef fen, tamo bagai gen wõ ye mog,
dilen.

ã yogo wau yukesil fen,
laa nigineg sigor dõ fen, agef fen, aa tetek buneg laa fen!

⁹ Anĩ nigin, Negur ã ilun bagai yaleselne ken,

ã yana, yana ganan wal fiya anĩ ifenen.

¹⁰ Age fe di, Jesus yana anĩ bun, iboreid ganan bobou difouf,

saa ilun ado, tenebur ado, teneub farumeneg.

¹¹ Age de fen, sigoreid ganan kurõ difalaisi, Jesus Kristus ã Odug de fen, Tama Negur fula fiya medeĩya difenẽf.

Barisa Gegen Fula Fiya

¹² Anĩ nigin, neu oboiyou tar, aya malau bun dogol sã, anĩ ere, fatuk bagai aya ã geid to tabodok buneg, ã gai dõ gedig gen, ãgenei kel yaleya nigin, kumĩ ado tererẽya bunem, kabĩ total walogouf, ¹³ ere nigin, Negur nẽ kisi biya kilei, ã kisig fen, dõ gouf nigin, Negur ã ã namein kabĩ yaledig.

¹⁴ Ereb ereb ganan, nauseirya sã, monẽya sã bunem, ago gouf, ¹⁵ ago ge di, ã bouweif od sa ken, karẽtut bagai, tenebur tamo kayau waud gogileya ado sane atun, Negur gere tar kũ fenẽya sã wowã gouf, ã idi atun owõbẽ barisa gegen fula gouf. ¹⁶ Mata ifenẽya nẽ od uroug kafĩ walagouf, ago ge di, aya Kristus nẽ naa bun, aya ege to gudu raun be kabĩ alen anĩ nigin, yanau alesauf. ¹⁷ Anĩ ere, aya, ãgenei momoiya anĩ nẽ sesewi fiya ado aruna yaleya bun, wain ofa gen, naudou fi falaufeg, aya wau al fe fen, ã ganan geid wauda kulĩ youf. ¹⁸ Anĩ nigin, ãg wauĩ al fe fen, aya geid wauda kulĩ youf.

Timoti Epafroditus Ado

¹⁹ Odug Jesus bun, aya Timoti ã bun kaisã bagai sur fiya nigin, wau isef, are aya ã nigin od ale fen, ayag wau al fouf nigin age afef. ²⁰ Aya ein, aib taka ã gen, ãgenei biya fiya nigin wau fãya anĩ to ailen. ²¹ Ere nigin, ganan dogo nigin dogol kisi difedig, Jesus Kristus nẽ biya fiya nigin to kisi difedig. ²² Anĩ ere, ã keleif, Timoti ã yogo nigin yaor fen, ere nigin, ã aya urom, kesu yogon tama ado gen, biya od nigin kabĩ malen. ²³ Anĩ nigin, aya bun ereb ereb naig fe wõ youf anĩ ail fen, ã ã bun kaisã bagai sur fiya nigin, wau irok. ²⁴ Age afe fen, aya Odug bun momoi auf, aya yug kaisã bagai asiyouf.

²⁵ Anĩ ere, aya kisi afef, aya Epafroditus ã gein baban sur afiyẽf are deuf auf, ã neu turau, neu kabĩ turau ado, kusĩ tamo turau, ãg ãgenei soosi tamo, ã ereb aya lau

afef anī kulatun fiyauf nigin sur wiyēgen anī. ²⁶ Ī ā ganan ileyēya nigin wau fatuk bagai irok, agef fen, ĩ dagi ado ya anī karī gen bunem wau morō ado. ²⁷ Momoi ĩ dagi fen, laaf genen. Anī ere, Negur ĩ nigin wau yun, ĩ nigin dogol sã, aya nigineg wau yu ken, aya wau gudū fiya teten, wau gudū fiya baban to alouf nigin age fen. ²⁸ Anī nigin, aya ĩ sur fiyēya nigin wau total bagai irok, age afe di, sain ā ĩ baban uleg fen, wauĩ al fe di, aya wau morō are wau warasa youf. ²⁹ Ā Odug bun wauĩ al fiya odug bunem aan wiyēgouf, agog fen, tamo ĩ gen yeneid walesagauf, ³⁰ ere nigin, ĩ Kristus nē kabī nigin laaf genen, ĩ ā aya isennēya ifanaya kisi feleya sã anī, aya ifanauf nigin, yogon bou itoron.

3

Bouwa Nē Oroya Nigin To Momoi Ge

¹ Od idīya nigin, neu turau tar, Odug bun wauĩ kulī ye! Aya ā bun de tekelei enei baban itotoya nigin morō sã. Are ā kulatun yeīya nigin, age afef.

² Gaū anidi nigin lo walagauf, tamo idi sane age difedig, idi mulū ileyā nigin bouweid gudū difedig anidi. ³ Ere nigin, ada anī mulū telen, ada anī Negur nē Awa Uur bunem Negur yana talesedig, ada anī Kristus Jesus nigin yanada talesedig, age ta fen, ada bouwa nē oroya nigin to momoi taudig. ⁴ Anī ere, aya yug bouwa nē oroya bun yanau yaleseya nigin gariya ado.

Aib taka ĩ bouwa nē oroya bun yana yaleseya nigin gariya ado youf, aya ĩ wal fiya. ⁵ Naa eit bun aya mulū elen, aya Israel tamo, Benjamin nē ibor bun tamal, Hibu tamo bagai, aya lo bunem Farisia tamal, ⁶ aya Negur nigin au fen, kabī total aledig, age afe fen, sios darau afenēdidig, lo dō fiya bunem madur bagai wōya nigin, aya bouwau bun od sã.

⁷ Anī ere, ereb ereb anī ganan aya isenauf aun are, Kristus nigin au fen, atoron.

⁸ Anī dogol sã, neu Odug Kristus Jesus nigin keleīya anī, ereb ereb ganan wal feid fen, odug bagai nigin, aya ereb ereb ganan are ege auf. Aya ĩ nigin ereb ereb ganan ator ken, sisik gen kisi afef, are aya

Kristus anī ale fen, ⁹ ĩ ado bagu mafouf nigin age afen. Neu madur bagai aya bun ibodok are, lo bunem isiya sã, anī ere, madur bagai Kristus nigin momoiya bunem isif, are madur bagai Negur bun tamal momoiya bunem isif. ¹⁰ Aya, Kristus nigin, yogon mata kel fāya nē megeir nigin ado, yogon darau bun ifareya nigin kelei ken, yogon laa bun ĩ gen wō auf nigin orouf, ¹¹ are aya laa bun tamal kel fāya anī alouf nigin age afef.

Pol ĩ Daū Bun Wōya Nigin Gudu Ren

¹² Aya enei ganan mogo alen be, kisi feleya bagai wō aun gen to kisi afef, anī ere, aya, ereb aya yaleya nigin Kristus Jesus igrinan anī, yaleya nigin total bagai gudu rauf. ¹³ Turau tar, aya anī mogo alen to auf. Anī ere, ereb aya age afef are, ereb aya dudum afen are wederou tu kel fen, ereb malabag ifaref anī bun gudu rauf. ¹⁴ Aya, mala solo Negurem saa ilunem Kristus Jesus bun iweignan anī, alouf nigin daū bun gudu rauf.

¹⁵ Ada atīya wō taun ganan, eig ya dogol kisi tafouf. Ā kisi tunī nigin fire kisi gouf, areg Negur ā bun yaor fouf. ¹⁶ Anī ere, ereb ada mogo talen anī dō tafouf.

¹⁷ Turau tar, ā tunī geid bagug fen, aya dō wiyagauf, agog fen, ā, idi amā tobonunā mafelnein bun difaref anidi dō wedigouf. ¹⁸ Ere nigin, aya mogo sain musei arokeneik asin anī, gama baban maru isi fen arokeneik, musei idi Kristus nē aa tetek nigin kiwai dibodok. ¹⁹ Idi neid idikeleya are daū feleya bun, idi neid waitou are dogo neid naumeid, agef fen, dogo neid fula fiya are dogo neid mama bun ibodok. Dogo neid kisi are tenebur nē safina bun ibodok. ²⁰ Anī ere, ada neda ibodōya modoū are, saa ilun ibodok. Agef fen, ada kel yaleya tamo Odug Jesus Kristus an tamal fatuk bagai tari tafef. ²¹ Kristus ĩ, ereb ereb ganan ĩ farumen irouleya nē megeir bunem, ada bouwada tenebur nē enei falei fele di, ĩ yogon bouwa fula fiya medeīya gen wō douf.

4

¹ Anĩ nigin, neu turau tar, aya ã nigin wau laaf fen, kisi total anodig, ã neu wau kulĩya ado tetet. Neu oboiyou tar, ã Odug bun agog ufareg, megeir lauf.

Wau Yaleseya Od

² Aya Yuodia õ agonok, Sintike õg agonok, ã Odug bun wauĩ tekelei youf. ³ Kabĩ turau bagai, aya õ arokonok, kayau eneidi biya od nigin aya isennaya nigin kabĩ total daledig anidi usenneĩd fen, Klemen ado neu kabĩ turau tar ganan, dogo neid yeneid mata ibodõya nẽ buk bun ifaref anidig, usennediyouf.

⁴ Sain ganan Odug bun wauĩ kulĩ youf. Aya baban arokeneik: Wauĩ kulĩ ye! ⁵ Ægenei molol anĩ tamo ganan bun yaor gouf. Odug ĩ mogo melsak. ⁶ Æ ereb taka nigin to suwẽ gouf, anĩ ere, ereb ereb ganan bun, kosẽya ado to fiya bunem, Negur de wiyẽg fen, ægenei to fiya Negur bun unogouf. ⁷ Ago ge di, Negur nẽ wau inosiya tamo nẽ karĩya ganan wal fiya anim, Kristus Jesus bun, ægenei wauĩ ado ægenei kisi kulatun fediyouf.

⁸ Od idiya nigin, turau tar, ereb momoi anĩ, ereb biya anĩ, ereb madur anĩ, ereb karẽtut anĩ, ereb wau laa fiya nẽ anĩ, ereb yana iseleya nẽ anĩ, ereb taka biya bagai fen, yana iseleya nẽ bagai anĩ, ereb ereb age fiya nigin kisi gouf. ⁹ Ereb aya bunem ã kelein, walegen, karĩ gen be, aya bun ulegen anĩ, agog dõ gouf. Ago ge di, wau inosiya nẽ Negur, ã geid ibodõf.

Pol Idi Neid Ege Luwa Nigin De Fiyẽdin

¹⁰ Gama ã aya isennaya nigin baban kisi fã yen nigin, aya Odug bun fatuk bagai wau kulĩ yef. Momoi, ã aya isennaya nigin kisi gen, anĩ ere, ã anĩ yaor fiya nigin naab taka to wõ yen. ¹¹ Aya ereb lau afef nigin, enei to orok, ere nigin, sain naig be fe isiyoufeg, aya wau inois ibodõya nigin kelein. ¹² Aya maleg bun ibodõya are aya kelei, aya safina ado ibodõyaq aya kelei. Nain be, ereb sain naig be fe wõ youf bun, aya nameu isokosauf be, naũ abodõf, aya safina musei ado be, aya safina naal bagai adoufeg, aya wau inois ibodõya nẽ waa

are aya kelein. ¹³ Aya ereb ereb ganan, ĩ aya megeir ifanadig bunem, sã age afouf.

¹⁴ Anĩ ere, aya neu morõ bun isennaya nigin kisi gen are, ã biya ago gen. ¹⁵ Filipai tamo kayau ã gai kelei bagai, aya Masedonia provins ator ken, asi, biya od uyulil wogõ ayein sain bun, sios takam safina yaleya bun be, ifenẽya bun to isennan, ægem dogol. ¹⁶ Sain aya Tesalonika taun abodoneg, ã safina aya isennẽya nigin aya lau afe mog, baba baban sur wanagen. ¹⁷ Aya safina ege luwa yaleya nigin to kisi afef, anĩ ere, aya ægenei dumen mala solo biya walogouf nigin kisi afef. ¹⁸ Aya ereb ereb ganan kisi feleya ale fen, anĩ wal fiyag alen. Aya fatuk bagai wanagen, gama aya Epafroditus bunem safina fire fire ege luwa sur gen anĩ alen. Anĩ ganan are, sesewi fiya sumei biya ado anĩ, Negur wau al fiya ado yalouf. ¹⁹ Agef fen, neu Negur ĩ, Kristus Jesus bun, yogon kisi feleya fula fiya medeĩya barikã bunem, ægenei lau gef ganan ifeneĩf.

²⁰ Neda Tamada Negur bun fula fiya medeĩya gai gai ibodkalauf. Momoi.

Idikeleya Nẽ Aanya

²¹ Kristus Jesus bun Negur nẽ tamo kayau ganan aan wiyẽdigouf. Turau tar aya geid mafaref anidim aanya sur difef. ²² Negur nẽ tamo kayau ganan, ã bun aanya sur difef, idi atun, idi Sisa nẽ ibor bun kabĩ daledig anidim bagai anĩ, ã bun aanya sur difef.

²³ Odug Jesus Kristus nẽ wau ifenẽya ægenei uur bun ibodõf. Momoi.

Kolosi

¹ Aya Pol, Negur nē oroya bunem Kristus Jesus nē aposel wō aun ado, neda turada Timoti adom,

² oun Kolosi taun, Negur nē fateul tamo kayau, Kristus bun momoiya turamā tar bun pas enei matotkeneik.

Wau ifenēya ado wau inosiya, Tamada Negur bunem ā bun ibodōf.

De Fiyēya Ado Kosēya

³ Sain amā ā nigin kosē mauf bun, amā faimud neda Odug Jesus Kristus nē Tama, Negur de mafiyēdig, ⁴ ere nigin, amā Kristus Jesus bun āgenei momoiya ado, ā Negur nē tamo kayau ganan nigin wauī laa fiya anī karī maun. ⁵ Ā mogo momoi nē od, biya od ā bun isin anī karīg fen, ereb ā nigin saa ilun inon nigin wauī ise fen, momoiya ado wauī laa fiya anī wō yen. ⁶ Sain ā biya od anī karīg fen, Negur nē wau ifenēya momoi bagai kelein sain anī bunem ilauf ganan, biya od anī ā atun age fen gen, teneub ganan bun, biya od enei faat yu ken, odugef. ⁷ Ā, nemā oboimā ferfer turamā Epafras bun keleī anī walegen, ī amā nawamā yaleya, Kristus nē kabī tamo dō fiya biya, ⁸ agef fen, inimeg āgenei Awa Ur bun wauī laa fiya nigin irokanaman.

⁹ Age fiya nigin, sain amā ā nigin karī maun bunem isif ganan, amā ā nigin Negur kosē mafiye ken, uur nē kisi biya ado kisi fokōya ganan bunem Negur nē oroya nigin keleī aura yeīf nigin to fiyēya to matorōdig. ¹⁰ Age mafe fen, amā, ā Odug nē oroya bun ubodōg fen, ereb ereb ganan bun Odug wau al foug nē anī ago gouf nigin kosē maudig: faat biya kabī biya ganan bun yūf nigin, Negur nigin keleī, ā bun odugouf nigin, ¹¹ yogon fula fiya medeīya nē megeir bunem megeir ganan ifeneī di, ā ereb ereb ganan bun, feseya sā megeir bagai ufaragauf nigin, agef fen, wauī kulīya ado, ¹² Tamada ī, ā lalan nē tano bun Negur nē tamo kayau neid akor weim walogouf nigin age fen anī, de wiyēgouf nigin kosē maudig. ¹³ Ere nigin,

ī ada gugum nē megeir bun yalelnada fen, in Naal Negurem ī nigin wau laa fedig anī nē tano bun gei fada irou isidan. ¹⁴ Ī Naal bun ada kel yaledan, neda mosor nigin weder tu kelen.

Kristus Ī Ereb Ereb Ganān Wal Fiya

¹⁵ Kristus ī, Negur ada to tailef anī nē malakanon, ī Negur nē kesu matu, ereb ereb inodin ganān anī nē mudur inenen. ¹⁶ Are, Kristus ī bunem ereb ereb ganān inodin, ereb ereb saa ilun ifaredif ado tenebur ein ifaredif, ereb ereb tailef ado to tailef, king, megeir, uyu iroudiya be, yeneid adodo; ereb ereb ganān Kristus bunem Kristus nigin ye fen, inodin. ¹⁷ Kristus ī ereb ereb ganān wōya sā mog, ibodon, agef fen, ī bun ereb ereb ganān ifaref. ¹⁸ Ī bouwa are sios, ī yogo anī nē mudur. Ī gariya, tamo gare den bun tamal uyulil kel fā yen, are ereb ereb ganān bun ī mudur ibodōf nigin age fen. ¹⁹ Negur ī yogon kisi feleya bagai anī ganān, Kristus bun ibodōf nigin oro fen, ²⁰ ī Kristus nē naud aa tetek bun fi felen anī bunem maror ino fen, Kristus bunem ereb ereb ganān tenebur ifaredif be, saa ilun ifaredif, ī geid komo difouf nigin oron.

²¹ Uruwa bun, ā Negur nigin gerō ufareg fen, āgenei tobonunā sane bunem, āgenei kisi bun Negur nigin kiwai ubodōgen. ²² Anī ere gama, Negur ī, Kristus nē bouwam laa bunem, yogon lo fiya bun ā fateul, amuyē sā, od sā ineneīf nigin ī geid komo yein. ²³ Ā āgenei momoiya tobol ge fen, feseya sā total ufareg fen, biya od karī gen sain bun wauī iseya walegen anī bun to ulegef usigef gouf are, agog wō gouf. Biya od enei are, ereb ereb ganān saa farumen ifaref anidi bun kurō fesin, agef fen, aya Pol biya od anī nē kabī tamo wō aun.

Pol Sios Nigin Kabī Total Yalen

²⁴ Gama aya ā nigin darau alef anī nigin wau al fef, age afe fen, Kristus ī yogon bouwa sios nigin darau yalen bun fau to kisi felef anī kisi falauf nigin, aya bouwaum darau anī ale di, kisi falauf. ²⁵ Aya Negur nē od anī kisi feleya bagai afeneīf nigin, Negur kabī ifanan anī nē

kabī tamo wō aun. ²⁶ Negur nē od are ī waa, kulunem ibor isin ganan bun iminēyan ibodon anī, gama Negur nē momoīya tamo kayau bun yaor fen. ²⁷ Negur nē tamo kayau bun, Negurem waa enei nē fula fiya medeīya barikā anī naig be fiya anī, haiden atun yaor foug nigin wau iron, waa are Kristus ā namein ibodok, anī nē fula fiya medeīya nigin wau iseya anī.

²⁸ Amā ī nigin kurō mafalasi, tamo kayau ganan wedereid maroud fen, kisi biya ganan bun, tamo kayau ganan mafelnēdidig, are amā tamo kayau ganan Kristus bun, kisi feleya bagai manenēdiyof nigin age mafef. ²⁹ Enei kisi falauf nigin, aya kabī total alef, yogon megeir aya nameun ibod ken, kabī total yalef anim aya gunī auf.

2

¹ Aya ā nigin, idi Laodisia taun difaref anidi nigin ado, idi aya to bagai dileyaf anidi ganan nigin, naig afe gunī auf anī, ā keleī youf nigin orouf. ² Neu kisi bagai are, idi waud alese di, wau laa fiya bunem waud katō difouf, age fe di, idi kisi fokō feleya nigin keleī barikāf, anī bunem, idi Negur nē waa keleī youf, are Kristus. ³ Ī bun kisi biya ado keleī nē safina biya ganan inokon ibodok. ⁴ Aya taka nem meleī yaleya od biyai biyai bunem to idegneīf nigin enei arokeneik. ⁵ Momoī, aya bouwaum ā geid to tabodok, anī ere, aya uur bun ā geid tabod ken, ā naig be ge tutuk ufareg fen, āgenei Kristus bun momoīya naig be fe megeir ifaref anī, ileya nigin wau irok.

Tamo Nē Lo Wal Fe Fen, Kristus Bun Mata Ibodōya

⁶ Ā Kristus Jesus āgenei Odug walegen, anī nigin, ā ī bun mata ubodōgouf. ⁷ Ī bun warei urarāg fen, fō kare gen walesagauf, ā difelnein kilei, āgenei momoīya bun megeir ge fen, de fiyēya anī ā bun ise gogū foug.

⁸ Taka nem ā, tamo nē idegēya keleī kaū sā bunem to gurar yeī irouleyeīf nigin lo walagauf, are Kristus dō fiya ban, tamo nē

tobonunā ado tenebur enei nē tobonunā dō fiya nigin.

⁹ Ere nigin, Kristus bun Negur nē kisi feleya bagai ganan bouwa bun ibodok.

¹⁰ Agef fen, ā Kristus bun kisi feleya bagai ifenein, Kristus ī megeir ganan ado yeneid adodo ganan neid mudur. ¹¹ Ī bun āg mulū ulegen, are tamo imam mulū bun ineneīya sā, anī ere, mosor nē oroya yaleleya nigin, Kristusem mulū bun inenein. ¹² Ā, ī geid naan yaleya bun mū yei ken, Negur ī laa bun tamal Kristus kel turī fiyen anī nē megeir bun, āgenei momoīya bunem ī geid kel turī yein.

¹³ Sain ā, āgenei mosor nigin ado āgenei mosor nē oroya nigin mulū ileya sā nigin, laa bun ufareg mog, Negur ī, ā Kristus geid kel turī yein. Ī neda mosor adok nigin weder tu kelen. ¹⁴ Ī lo nē itāfiya itotoya, are ada weteda kiwai ibodon anī isasalen, ī anī yalel fen, aa tetek bun yun. ¹⁵ Agef fen, ī, megeir adodo yeneid adodo neid total ganan, ye farumen gō fel fen, Kristus nē aa tetek bunem kusī bun idi wal fedin anī dilouf nigin, ganan meleid bun yaor fen.

¹⁶ Anī nigin, ā saaf be naan wāgauf, uub sifa naa fire fire be, ogō mata sigigi fiya naa be, Sabat naa* to dō gouf bun, taka nem to es yeīf. ¹⁷ Eneidi are, ereb fau isiyouf nē malakanon. Anī ere, ereb momoī bagai are Kristus bun fotou fiyauf. ¹⁸ Aib taka ī, mala yaleya nigin wau yukesileya ado engel yeneid yaleseya nigin wau al fef anim, ā mala solo walogouf anī to wal yeīf. Tamo age fiya ī ereb ilen anī nigin nenerī meluk dir fe fen, yogon bouwa nē oroya anim, gariya sā fagā yedig. ¹⁹ Ī bouwa nē mudur Kristus anī folō fel fen ifaren, mudur are Kristus, ī bunem bouwa ganan tuwa katō fiya ado dirumunā anidim disennē di, katō fel ifar fen, Negur yogo age fe di, odugedig.

²⁰ Ā Kristus geid tenebur enei nē tobonunā bun laa yein, age fiyauf are, ere nigin anī ā fau anī nē gen ufareg fen, yogon itāfiya eig fiya farumen ufaregef, ²¹ “Ā to uroug! Ā to kobūg uleg! Ā to dorōg uleg!”? ²² Enei ganan are, kabī wenēge di,

* **2:16:** Sabat naa anī, Juda neid uub nē naa.

sa kalauf, ere nigin, idi tamo nē ïtãfiya ado tai fiya dogol. ²³ Momoi, ïtãfiya age age fediya are, dogo neid kism seli kulõ fiya, dogo neid idegëya waud yukesileya ado, dogo neid bouweid kafï fiya ifenëya bun, kisi biya gen ulegedig, anï ere, idi bouwa nē oroya lai fesileya nigin kisi feleya sã.

3

Fateul Ibodõya Nē Faded Fiya

¹ Age fiya nigin, ã mogo Kristus geid keg fã gen nigin, ãgenei wauï ereb ereb ilun nē nigin, Kristus Negur ima biyalë ibodok nē an, unogouf. ² Ægenei kisi ereb ereb ilun nē nigin unogouf, ereb ereb tenebur nē nigin sã. ³ Ere nigin, ã gareg fen, ãgenei mata gama Kristus geid Negur bun inokon. ⁴ Kristus ï ãgenei mata, ï wõ youf sain bun, ãg ï geid fula fiya medeïya bun wõ gouf.

⁵ Anï nigin, ereb ereb ãgenei tenebur nē oroya nē anï udenkesig: noli tobonunã, amuyë tobonunã, noli kisi, oroya sesen ado, safina musei youf nigin ima su lai fe fen sũ we fiya (are idegëya waitou seli yabiya). ⁶ Eig fediya nigin, Negur nē didi isif. ⁷ Æ uruwa ubodõgen, naab enei bun uyõgen. ⁸ Anï ere, ã gama naab eig fediya, wau saneya, didi iseya, tobonunã sesen inoya, dumen od irõya ado, sigoreï bun od sesen wogõya, anï ganan utorõgouf. ⁹ Æ abob to udegnëgouf, ere nigin, ãgenei bouweï nē oroya tubu yogon tobonunã ado uraileg fen, ¹⁰ oroya mata ufonügen, are Negur nē malakanon nigin keleï bun mata falei yeïdig. ¹¹ Ein baban, Grik tamo be Juda tamo, mulũ ileyã be mulũ ileyã sã, yaũ tamo be tamo kuï gen, ferfer be kafï fiya sã tamo gen, fire fire to ibodok, anï ere, Kristus ï anï ganã, ï ganã anï namedin ibodok.

¹² Anï nigin, ã tamo kayau Negurem igrinein, fateul ado Negur nē oboi tar nigin, wau yũya, tobonunã biya, wau yukesileya, molol ado, kaisã to seyeya anï ufonügouf. ¹³ Molol ufareg fen, abob nigin morõ faali gouf, agog fen, ã atun abob ereb morõ ibodõf anï nigin wedereï tu kalauf. Odug ãgenei mosor nigin weder tu kelen gen, ãg mosor nigin wedereï tu kalauf.

¹⁴ Agog fen, enei ganã teten, wauï laa fiya ufonügouf, anim ereb ereb ganã tekelei guf irouwauf.

¹⁵ Kristus nē wau inosiya ãgenei wauï bun utorõg len, ulum irouwauf, ere nigin, ã bouwa tekelei bun wau inosiya bun iweignein. Agog fen, Negur de wiyëgouf. ¹⁶ Utorõg len, Kristus nē od fatuk bagai ã namein ibodõ di, ã kisi biya ganã bunem abob ufelndig fen, abob weder urougouf, agog fen, od Negur nē Itotoya Sam bun ibodok, Negur yana yaleseya seg ado, uur nē seg, ãgenei wauï bun Negur de fiyëya ado walogouf. ¹⁷ Agog fen, ereb ã ago gef, od bun be kabï yaleya bun, anï ganã Odug Jesus yana bun agog fen, ï bunem Dei Negur de wiyëgouf.

Momoiya Tamo Kayau Ibor Mata Ibodõya Nē Faded Fiya

¹⁸ Kayau, ãgenei tamo farumen ubodõgouf, are Odug nē lo fiya bun biya bagai.

¹⁹ Tamo, ãgenei aiweï tar nigin wauï laaf fen, idi waud morõ to wenëdigouf.

²⁰ Kesu, ã ereb ereb ganã bun sineï temeï tar sigoreid dõ gouf, anim Odug wau al fouf.

²¹ Tama, ã gereneï tar to waud saneya wenëdigouf, ago gouf, idi agogon de fen, waud to al fouf.

²² Ferfer, ã ereb ereb ganã bun, ãgenei marau tenebur enei nē sigoreid dõ gouf, idi meledin dogol idi biya difamãf ya bunem meleid yaleya nigin dogol to ago gouf, anï ere, ã wauï momoi nē ado Odug nigin anini ge fen, ago gouf. ²³ Ereb ago gef ganã, wauï adok iro ken, ago gouf, tamo nigin sã, Odug nigin kabï alef ge fen, kabï walogouf, ²⁴ ere nigin, ã keleï, ã Odug bun tamal in akor mala solo walogouf. Are Odug Kristus anï ã aruna walekenëgef. ²⁵ Aib taka ï sane age fouf, yogon sane age fiya nigin mala solo sane yalouf, ere nigin, an anï kinau ya sã.

4

¹ Marau ã, ãgenei ferfer ereb madur ado biya anï wenëdigouf, ere nigin, ã keleï, ãg saa ilun ãgenei Marau ibodok.

Faded Fiya Tunĩ

² Kosēya anĩ total uroug, lo weleg fen, Negur de wiyēgouf. ³ Agog fen, amã nigned kosē gouf, are Negur amã od wogō mauf nigin bobog kã fel kanamã di, amã Kristus nē waa kurō mafalaisiyouf nigin kosē gouf, anĩ nigin aya kalabus bun abodok. ⁴ Negur aya biya od wogō auf nigin ifanan anĩ, sã yaor kurō afalaisiyouf nigin kosē gouf. ⁵ Ereb tamo kayau serē temeleid bun ago gou fenē, kisi biya ado ago gouf. Sain biya ã nigin wō youf ganan to sekil gouf. ⁶ ãgenei wogōya sain bun ganan wau ifenēya barikãf, od karīya biya dogol wogō gouf, anĩ bunem, ã, tamo kayau ganan naig be fe solof irokenēdiya nigin keleĩ youf.

Idikeleya Nē Aanya

⁷ Tikikusem aya nigin od ganan wogō yeĩf. Ĩ neu turau oboiyou, kabĩ tamo dō fiya biya fen, Odug bun kabĩ turau. ⁸ Aya, ĩ, ã bun enei nigin bagai sur afiyek, are ã, amã naig ma mafaref anĩ keleĩ di, anĩ bunem ĩ ãgenei wauĩ yalesauf nigin, age afef. ⁹ Ĩ Onesimus ado disiyouf, Onesimus ĩ neda turada dō fiya biya oboida, ĩ ãgenei taka. Idi erab erab ganan ein agef wō yef anĩ dirokeneĩf.

¹⁰ Neu kalabus turau Aristakus, ã bun yogon aanya sur fef, Mak, Banabas ne tam, ĩg agef aanya sur fef. (ã ĩ nigin faded fiya walegen. Ĩ ã garan isiyouf are, ã ĩ walogouf.) ¹¹ Jesus ĩ yana taka Jastus dedig, ĩg aanya sur fef. Negur nē tano nigin neu kabĩ tamo turau tar atun, idi dogol anĩ Juda temeleid. Age de fen, idi momoi bagai de fen, neu wau dalesen. ¹² Epafra ĩ ãgenei taka, Kristus Jesus nē kabĩ tamo, ã bun aanya sur fef. Ĩ faimud kosēya bun ã nigin total inodig, are ã Negur nē oroya ganan bun, kisi feleya bagai ado momoiya odug bun total ufaragouf nigin age fef. ¹³ Aya, ĩ, ã nigin, idi Laodisia taun difaref anidi nigin ado, idi Hierapolis taun difaref anidi nigin kabĩ total yaledig anĩ, sã ĩ nigin kurō afesif. ¹⁴ Nemã oboimã dokta Luk ado Demas aanya sur difef. ¹⁵ Tureĩ tar Laodisia taun dibodok anidi bun ado,

Nimfa ado sios yogon fō bun guru difef anidi bun, neu aanya wenēdigouf.

¹⁶ Pas enei uweseg le di, Laodisia sios buneg diwesauf, abag, Laodisia tamal paseg uwesagouf.

¹⁷ Akipus urokenēg, “Ō Odug bun kabĩ walen anĩ, el wo udikalauf nigin karĩ walauf.”

¹⁸ Aya, Polem aanya enei imaum bagai atotof. Aya kalabus bun abodok anĩ karĩ walagouf. Wau ifenēya ã ado ibodōf.

1 Tesalonika

¹ Pol, Sailas, Timoti,
amã, Tesalonika sios Tamada Negur,
Odug Jesus Kristus ado bun ufaregef ã
bun, pas enei matotof:

Wau ifenëya wau inosiya ado ã bun
ibodõf.

*Tesalonika Neid Momoiya Nigin De
Fiyëya*

² Amã faimud ã ganan nigin Negur de
mafiye ken, nemã kosë bun ã nigin maro-
kenëdig. ³ Amã neda Negur Tamada mala
bun, momoia bunem ãgenei kabĩ faat
yuk, wauĩ laa fiya bunem ãgenei kabĩ
yaleya ado, neda Odug Jesus Kristus bun
wauĩ ise fen, ã to fese gen anĩ toku karĩ
mauledig.

⁴ Turamã tar, Negur ã nigin wau laa
fedig anĩ, amã keleĩ, are Negur ã ã igrinein,
⁵ ere nigin, nemã biya od ã bun isin, are
od dogol bunem sã, anĩ ere, megeir ado,
Awa Uur Fateul ado, momoia bagai ado,
ã bun isin. ã atun, ã nigin naig be ma
mabodon anĩ ã keleĩ. ⁶ ã, amã Odug
Jesus geid madë wamãgen. ã darau odug
adon, anĩ ere, Awa Uur Fateulem kulĩya
ifenein anĩ bun, ã od anĩ walegen. ⁷ Anĩ ni-
gin, ã Masedonia Akaia provins ado bun,
momoia tamo kayau ganan neid dodo
gen wowã gen. ⁸ Odug në od ã bunem
ilen, Masedonia Akaia provins ado bun
dogol sã, ãgenei Negur nigin momoia
anĩ fõ fõ ganan iyokelen. Anĩ nigin amã
baban ã ereb to mayeĩf. ⁹ Idi dogo, ã
amã naig ge walemãgen anĩ kurõ difalasi
kanamak. Age de fen, ã naig ge idegëya
waitou utorõg fen, Negur bun falei ge,
mata ibodõya në ado momoi në Negur
aruna waleg fen, ¹⁰ ã Naal ã laa bunem turĩ
fiyen, are Jesus ã didi dumen isiyouf bun
tamal kel yaledadig anĩ, saa ilun tamal tari
gen anĩ dirokanamak.

2

Pol Tesalonika Oun Kabĩ Yalen

¹ Turamã tar, ã keleĩ, amã nemã ki yeiã
ege to ilen. ² ã keleĩ, amã Filipai taun oun

darau ado kono fiya malen, anĩ ere, neda
Negur në isennëya bunem amã total mano
fen, naabura gudũ fiya total ibod mog, in
biya od wogõ mayein. ³ Amã total bagai
marokeneik are, kũ fenëya bunem sã, kisi
sane bunem sã, idegneiã bunemeg sã.
⁴ Age fiya ban, Negur biya od wogõya
nigin igrineid fen, yo fiyëdin anidim gen,
amã wogõ maudig. Amã tamo waud al
fouf nigin to kabĩ malef, anĩ ere, Negur ã
wauda es fedig, ã wau al fouf nigin kabĩ
malef. ⁵ ã keleĩ, amã meleĩ yaleya nigin
to bagai wogõ mau fen, naumamã nigin to
nawamã dede mafedig. Are amã momoi
morok anĩ Negur ã keleĩ. ⁶ Amã tamom
yanamã seli kulõ difouf nigin to mamiren,
ã bunem sã, taka bunemeg sã.

Amã Kristus në aposel mau fen, amã sã
morõ mafeneĩ yoũ në, ⁷ anĩ ere, ã atun,
amã molol nem kesu sina gere tar kulatun
fedidig gen, age mafen. ⁸ Amã ã nigin
waumã fatuk laaf fen, amã Negur në biya
od ifeneiã nigin dogol sã, nemã mata
ã nigin iraileya nigineg waumã iron, ere
nigin, ã amã bun oboimã bagai wowã gen.
⁹ Turamã tar, momoi, amã kabĩ total morõ
ado malen anĩ ã karĩ welegef. Amã morõ
ã taka to mafeneif nigin, bõ ado gaa ado
kabĩ male fen, Negur në biya od ã bun
wogõ maun.

¹⁰ ã, momoia tamo atun, amã naig be
mafen, fateul, madur bagai, od sã ma-
faren, are ã keleĩ, Negureg keleĩ. ¹¹ ã keleĩ,
are amã, tama ã gere tar nigin suma inodig
gen, ã mugu mugu bun suma manon,
¹² amã wauĩ malesedig, wowor mayeĩdig,
Negur ã yogon tano ado fula fiya medeãya
bun ulagauf nigin iweigneik, ã orof kilei ã
ubodõgouf nigin, wedereĩ maroudig.

¹³ Age ma fen, amãg toku Negur de
mafiyëdig, ere nigin, sain ã Negur në od
amã bunem karĩg fen, walegen, are tamo
në od gen to walegen, Negur në od bagai
walegen, Negur në od anĩ, momoi gef ã
bun kabĩ yalef. ¹⁴ Turamã tar, ã oun Judia
distrik Negur në sios madë wiyëdigen.
Sios Judia distrik oun Kristus Jesus bun
difaref, Juda tamo bun darau dalen gen
bagai, ãg fõ tureĩ tar bun darau walegen.
¹⁵ Juda tamo idi, Odug Jesus profet geid

didenkeis fen, amãg dirumã dirailen. Idi Negur wau al fiya to difenen, idi tamo ganan kiwai difenëdif. ¹⁶ Idi neid tobouneid bun, amã haiden wogõ mafiyëdi di, isennëya dalouf nigin naaburamã gudũ difedig. Naab anĩ bunem, faimud idi neid mosor tete tete dife di, mudu isedig. Age fiya nigin, Negur nẽ didi kisi feleya bagai, idi bun mogo isin.

Pol Tesalonika Ileya Nigin Fatuk Bagai Wau Iron

¹⁷ Anĩ ere, turamã tar, sain modeg bun, ã geid tabodon anĩ fara mafen (are bouwamam, kisim sã), amã ã ileyeyia nigin fatuk bagai waumã iro ken, naab ganan bun kabĩ totol malen. ¹⁸ Amã ã gein masiyouf nigin waumã yenen. Momoi, aya, Pol, baba baban lakĩ afen. Anĩ ere, Satan naaburamã katĩ felen. ¹⁹ Neda Odug Jesus isiyouf bun, ere anĩ ã mala bun, nemã wau iseya, kuliyã, yana yaleseya nẽ teter youf? Are ã anĩ sã de? ²⁰ Momoi, ã nemã fula fiya medeyia ado, nemã kuliyã.

3

¹ Anĩ nigin, amã foiya kisi feleya sã nigin, amã kisi ma fen, amã mugu ein Atens mabodõf are deuf maun. ² Amã, ã ãgenei momoiya bun megeir yei ken, wauĩ yalesauf nigin, Timoti, ã nemã turamã ado Kristus nẽ biya od nigin Negur nẽ kabĩ tura, sur mafiyen. ³ Are takam morõ eneidi bun to kisi rori youf nigin age mafen. ã gai keleĩ bagai, are ada morõ eneidi nigin igirnadan. ⁴ Momoi, amã ã geid tabodon bun, amã, ada fau darau difanadauf nigin toku marokenein. Age fiya bagai, agef wõ yen, are ã keleĩ. ⁵ Anĩ nigin, aya foiya kisi feleya sã kisi afe fen, aya ãgenei momoiya ileya nigin sur afen. Aya, naab taka taka bun kisi fiya tamo kisi yeĩ di, nemã kabĩ totol ege ileya nigin kumĩ aun.

Timotim Pol Od Biya Iroulekenen

⁶ Anĩ ere, Timoti gama bagai, ã bun tamal amã gein isi fen, ãgenei momoiya ado wauĩ laa fiya nigin od biya irou isin. ã irokanaman, are ã, amã nigin faimud biya karĩ welegedig ado, amã ã ileyeyia nigin waumã irõdig gen, ãg ilemãya nigin

wauĩ irõdig yen. ⁷ Anĩ nigin, turamã tar, amã nemã waumã morõ ado, darau ganan bun, ãgenei momoiya bunem, amã ã nigin waumã yalesen. ⁸ Gama amã waumã kuliyã ado mata mabodok, ere nigin, ã Odug bun megeir ufaregef. ⁹ Neda Negur mala bun, amã ã nigin waumã kuliyã ifanaman enei ganan nigin, naig ma abag kisi mafel, ã nigin Negur de mafiyëf? ¹⁰ Amã masi mailiyei ken, erëb ã fau ãgenei momoiya bun lau gef anĩ isenneiyã nigin, bõ ado gaa ado Negur totol bagai kosë mafiyëdig.

¹¹ Gama, neda Negur Tamada ã yogo, neda Odug Jesus ado, nemã naab ã gein isiya nigin dũf nigin oromak. ¹² Odug ãgenei wauĩ laa fiya gire fese di, amã ã nigin waumã laa fedig age fiya gen, abob nigin ado ganan nigin wauĩ laa fiya gogũ foug nigin oromak. ¹³ Negur ã, ãgenei wauĩ megeir fe di, neda Odug Jesus, in fateul tamo kayau ganan geid disiyouf sain bun, neda Negur Tamada mala bun, ã bouweĩ od sã fateul wõ gouf nigin oromak.

4

Mata Ibodõya Bun Negur Wau Al Fiya Ifenëya

¹ Od idiyã nigin, turamã tar, amã, ã Negur wau al fiya wenëgouf nigin naig ge ufaragouf nigin mafelnein, are gama agog ufaregef. Gama amã ã enei baba baban ago gouf nigin to mayei ken, Odug Jesus bun totol bagai marokeneik. ² Odug Jesus nẽ totol bunem, amã ã faded fiya mafenein, are ã keleĩ.

³ Negur nẽ oroya are ã fateul wowã gouf anĩ, are ã noli tobonunã sese wiyëgouf. ⁴ ã mugu mugu bouweĩ kulatun ge di, fateul fen, yeneĩ biyauf nigin keleĩ youf. ⁵ Haiden Negur keleĩ sam, noli nigin mudureid ditenëdig gen to ago gouf. ⁶ Enei bun, takam ne tura sane to age fiyëf, idegëya bunem morõ to ifenëf. Amã mogo marokenei ken, wedereĩ maroun, are Odug fau mosor age fediya ganan nigin tamo mala solo ifenëdiyof. ⁷ Negur ada amuyë adouf nigin to iweignadan, anĩ ere, fateul ibodõya nigin iweignadan. ⁸ Anĩ nigin, taka ã od enei idodõf, ã tamo to idodnek,

are Negur in Awa Uur Fateul ifeneĩdig anĩ idodnek.

⁹ Gama tureĩ tar nigin wauĩ laa fiya anĩ nigin amã to matotkeneĩf, ere nigin, ã aug abob nigin wauĩ laa foug nigin Negurem ifelnein. ¹⁰ Momoi, ã tureĩ tar ganan Masedonia provins ganan bun difaref anidi nigin wauĩ laa fedig. Anĩ ere, turamã tar, ã baba baban ago gouf nigin total bagai marokeneik.

¹¹ Amã marokenein gen, ã molol ibodõya nigin kisi total walogouf, ãgenei kabĩ nigin kisig fen, aug imeim kabĩ walogouf. ¹² Anĩ bunem, ãgenei ibodõya bun tamo serẽ temeleid dileyei ken, anini douf, taka bun to utobõgouf.

Odug Isiyouf

¹³ Turamã tar, amã ã gare den onudi nigin to keleĩ youf anĩ to oromak, takag, tamo tunĩ ganan, wau iseya sã gen wauĩ gudũ foug anĩ to oromak. ¹⁴ Jesus laaf fen, kel fã yen nigin ada momoi tauf, anĩ nigin, Negur, idi Jesus bun gare den anidi, Jesus geid guri feid isiyouf nigin momoi tauf. ¹⁵ Odug nẽ od bunem, amã ã marokeneik, are ada fau mata tabodok, Odug isiyouf bun tafaref ada, idi gare den anidi to bagai wal tafediyouf. ¹⁶ Odug yogo bagai saa ilunem isiyouf, ait odugem irõ di, engel uyu irouya nẽ ait ado, Negur nẽ taur bunem iweig di, Kristus bun gare den anidi ketem fafã douf. ¹⁷ Anĩ bure fele di, ada fau mata tabod ken, tafaref anĩ geif, idi geid bagu fada fen, lalo bun kutũ fada se, Odug fotou fiya nigin saa ilun irou iselnadauf. An ada Odug geid mata gai gai tabodkalauf. ¹⁸ Anĩ nigin, od enei bunem abob wau talesauf.

5

¹ Gama, turamã tar, amã sain ado naa nigin to matotkeneĩf. ² Ere nigin, ã keleĩ bagai, Odug nẽ naa, bẽ tamo bõ isiyouf gen wõ youf. ³ Tamo kayau wau inosiya ado morõ sã tabodok de mog, daũ fiya nunũ idi bun, kayau kesu gõ fiya nigin firi yedig gen isi di, idi to diyalalauf.

⁴ Anĩ ere, turamã tar, ã gugum bun to ufaregef, anĩ nigin, naa anĩ bẽ tamo gen to isi fen, ba yeĩf. ⁵ ã ganan lalan ado we bun

temeleĩ. Ada bõ ado gugum nẽ sã. ⁶ Anĩ nigin, ada, idi tunĩ denek gen to tafarauf, anĩ ere, ada lo tafel fen, karĩ adouf. ⁷ Are idi mulaĩ temeleid, bõ anĩ denẽdig, idi aai meleid waĩ yedig, bõ anĩ aai meleid waĩ yedig. ⁸ Anĩ ere, ada we nẽ nigin, ada dug nigin karĩ ado fen, momoiya wau laa fiya ado siot kapa gen tafoun ken, kel gei fiya nẽ wau iseya anim hat kapa gen kurũ tafouf. ⁹ Negur ada didi yaleya nigin to igirnadan, anĩ ere, ada neda Odug Jesus Kristus bunem kel gei fadauf nigin igirnadan. ¹⁰ ã ada nigin laa fen, are ada mata be tabodok, gare be tauf are, ã geid tabodõf nigin age fen. ¹¹ Anĩ nigin, abob wau tales fen, abob walesagauf, gama ago gef gen.

Idikeleya Nẽ Faded Fiya

¹² Turamã tar, gama amã marokeneik, idi ã atun kabĩ total dalef, idi Odug bun ãgenei uyu irouya difar fen, wedereĩ dirouf anidi karĩ wiyẽdigouf. ¹³ Idi kabĩ dirouf nigin ge fen, idi nigin wauĩ laaf fen, fatuk bagai karĩ wiyẽdigouf. Abob nigin wau inosiya bun ufaragauf. ¹⁴ Turamã tar, amã total bagai marokeneik, fõ temeleid wedereid uroug, anini temeleid waud waleseg fen, forõ temeleid usennẽdigouf, ganan nigin nameĩ ukeleg ubodõgouf. ¹⁵ Taka nem taka nẽ mosor to solo foug, anĩ ere, abob nigin ado ganan nigin, faimud tobonunã biya ago gouf.

¹⁶ Wauĩ bun faimud kulĩ youf, ¹⁷ toku kosẽ gouf, ¹⁸ erob erob ganan bun de wiyẽgouf, ere nigin, are ã nigin Kristus Jesus bun Negur nẽ oroya.

¹⁹ Awa Uur nẽ yã to uroroukeleg, ²⁰ profet neid od to welebi ge. ²¹ Erub erub ganan es gouf. Biya anĩ uroug, kafĩ walagauf. ²² Erub sesen fire fire ganan sese gouf.

²³ Negur ã yogo, wau inosiya nẽ Negur, fateul kisi feleya bagai inoyeĩf. ãgenei uur, meleikanon ado, bouweĩ anĩ ganan, neda Odug Jesus Kristus isiyouf bun od sãf. ²⁴ ã iweigneik ã yogon od dõ fiya biya, ã de age foug.

²⁵ Turamã tar, amã nigin kosẽg. ²⁶ Tureĩ tar ganan, umã fiya fateul bunem aan

wedig. ²⁷ Aya, tureĩ tar ganan bun pas enei uwesagauf nigin, Odug mala bun total bagai arokeneik.

²⁸ Neda Odug Jesus Kristus nẽ wau ifenẽya ã ado ibodõf.

2 Tesalonika

¹ Pol, Sailas, Timoti weim, Tesalonika sios, Tamada Negur, Odug Jesus Kristus ado bun ufaregef ã bun, pas enei matotof:

² Wau ifenëya wau inosiya ado, Tamada Negur, Odug Jesus Kristus ado bunem, ã bun ibodōf.

De Fiyëya Ado Kosëya

³ Turamã tar, amã ã nigin faimud Negur de mafiyëf bagai, are de age mafiyëf, ere nigin, ãgenei momoiya fau fau odugef iselef, agog fen, ã ganan abob nigin wauĩ laa fiya anĩ odugef. ⁴ Anĩ nigin, amã Negur në sios atun, ã momoi ge fen, ã kafĩ fiya darau ganan ado walegef bun to fese gef nigin selĩ kulō mafedig.

⁵ Enei ganan anim, Negur në es fiya are tutuk anĩ yaoref. Anĩ bunem, ã Negur në tano nigin kisi falauf, ã anĩ nigin kafĩ fiya walegef. ⁶ Negur ã madur bagai. Ì morō difeneik anidi morō ifenëdiyof, ⁷ ã morō walegef, ã karika ifeneif, amãg ifanamãf. Anĩ Odug Jesus, in engel megeir adodo geid, yã bale fitotoleya bun saa ilunem isiyof bun wō youf. ⁸ Idi Negur keleĩ sã ado, neda Odug Jesus në biya od to dō difedig anidi, darau ifenëdiyof. ⁹ Idi daũ fiya faimud ibodkeleya në kafĩ fiya dale fen, Odug mala bun tamal ado, yogon megeir në fula fiya medeïya bun tamal, irudiyof. ¹⁰ Naa anĩ bun, ã isi, yogon fateul tamo kayau bun tamal, fula fiya medeïya yale di, ã nigin momoi den anidi ganan, ã nigin meleid yũ yalouf. Are ã gediyouf, ere nigin, ã nemã od nigin momoi gen.

¹¹ Anĩ nigin amã ã nigin toku kosë maudig, are neda Negur iweigneik anĩ kilei, ã kisi feleya inoyeif nigin, takag, Negur in megeir bunem, ereb ereb biya ganan ã ago gouf nigin kisi gef anĩ ado, ãgenei momoiya në kabĩ ganan kisi falauf nigin. ¹² Amã age ma kosë maudig, are neda Negur ado Odug Jesus Kristus neid wau ifenëya bunem, neda Odug Jesus yana ã atun fula fiya medeïya yale di, ãg ã

bun fula fiya medeïya walogouf nigin age mafedig.

2

Lo Wal Fiya Tamo Wō Youf

¹ Turamã tar, Neda Odug Jesus Kristus isiyof nigin ado, ã wagen guru tagauf nigin, amã ã marokeneik, ² Odug në naa mogo isin yeya anĩ, profet od, wogōya be, pas amã bunem isin ya anĩ karīg fen, to kaisã terëg fen, wauĩ kui youf. ³ Naab taka taka bun, taka nem to idegneif nigin lo weleg, ere nigin, fau kiwai ketem wō ye fen, lo wal fiya tamo, are daũ fiya bun ileyã në anĩ wō ye bure fele di, naa are isiyof. ⁴ Ì kiwai ino fen, ereb ereb ganan waitou de fen, seli dabidig anĩ ã farumen ineneid fen, ã yogo Negur në tempel bun ibod ken, ã yogo nigin Negur ye kurō fesiyof.

⁵ Aya ã geid tabod ken, enei nigin aro-keneidig anĩ, ã to karĩ welegef de? ⁶ Gama erebem ironnek are ã keleĩ, age fe di, fau yogon sain bun bagai, ã wō youf. ⁷ Lo wal fiya në waa megeir mogo kabĩ yalef, anĩ ere, ã gama ironnek anim irouf ile iwaikalauf. ⁸ Age fe di, lo wal fiya tamo yaorouf, ã Odug Jesus in awa yau neseyam yukeis fen, Odug isiya në medeïya anim ã daũ falauf. ⁹ Lo wal fiya tamo në isiya, de Satan në kabĩ ado susu fel, idegëya memelik, uris ado, ereb urug bagai fire fire ganan inodiyof. ¹⁰ Agef fen, sesen ganan bunem idi inanakelef anidi idegnëdiyof. Idi inanakelef, ere nigin, idi momoi nigin waud laaf fen, kel gei fediyof anĩ ditoron. ¹¹ Age fiya nigin, Negur idegëya total sur fe di, idi anĩ nigin momoi douf. ¹² Are idi momoi në nigin to momoi de fen, sesen nigin waud al fen anidi ganan, Negurem es fediyof nigin age fef.

Megeir Ifareya

¹³ Anĩ ere, amã faimud, ã, turamã tar Odug në oboi nigin, Negur de mafiyëf bagai, ere nigin, gariya bun, Negur, Awa Uur ã fateul ineneïya nigin kabĩ yalef bunem ado, ã momoi në nigin momoi gef bunem, kel gei yeif nigin igrinein. ¹⁴ Ì nemã biya od bunem enei bun iweignein,

are ã neda Odug Jesus Kristus nẽ fula fiya medeïya anĩ walogouf nigin age fen. ¹⁵ Anĩ nigin, turamã tar, megeir ufareg fen, sigoramam wogõya bunem ado pas bunem, mafelnein anĩ uroug kafĩ walagouf.

¹⁶ Neda Odug Jesus Kristus ï yogo ado Tamada Negur, ï ada nigin wau laa fen ado, yogon wau ifenẽya bunem, faimud ibodkeleya nẽ wau yaleseya ado wau iseya biya ifanadan anĩ, ¹⁷ ã wauĩ yaleseya difenei ken, erab erab biya ganam ago gef ado od wogõya bun megeir difeneif nigin oromak.

3

Kosẽ Nigin To Fiya

¹ Od idïya nigin, turamã tar, Odug nẽ od, ã bun age fef gen, kaisã bagai iyokel fen, tamo kayau atun fula fiya medeïya yalouf nigin, amã nigin kosẽ gouf. ² Agog fen, amã tamo idodõya ado sesen bun tamal yalelnamãf nigin kosẽ gouf, ere nigin, tamo ganam momoïya sã. ³ Anĩ ere, Odug ï yogon od dõ fiya biya, ï ã megeir ifenei ken, Satan bun tamal kulatun yeif. ⁴ Amã Odug bun momoï mauf, are amã ã marokeneik anĩ ago gef ulagouf. ⁵ Odug ãgenei wauĩ itoneĩ di, Negur nẽ wau laa fiya ado Kristus nẽ feseya sã megeir ifareya bun ilauf nigin oromak.

Fõ Temeleid Wedereid Irouya

⁶ Odug Jesus Kristus yana bunem, turamã tar, amã ã marokeneik, tureĩ tar fõ temeleid ganam, amã mafelnein kilei to mata dibodõdig anidi so wiyẽdigouf. ⁷ Amã age mafen anĩ naig ge dõ gouf nigin, ã aug keleĩ. Amã ã geid tabodon sain bun, amã to fõ faman. ⁸ Age ma fen, amã taka nẽ saaf na yaleya sã to mon. Age fiya ban, amã ã atun taka morõ to mafenẽf nigin, bõ ado gaa ado kabĩ total malen. ⁹ Amã ã bun tamal isennẽya yaleya kisi feleya, anĩ ere, to age mafen, ere nigin, ã amã bun ulemãg fen, ãg agog dõ gouf nigin. ¹⁰ Amã ã geid tabodon sain bun, amã nun enei mafenein: “Taka ï kabĩ to yalouf are, ï saaf to yãf.”

¹¹ Amã ã atun tunĩ fõ temeleid yeya anĩ karĩ maun. Idi fõ temeleid, anĩ ere, idi

dogo nigin kabĩ to dale fen, taka nigin dogol wogoĩ dedig. ¹² Tamo age fediya nigin, Odug Jesus Kristus yana bunem, amã total bagai moro ken, wedereid marouf, dẽ desil fen, dogo naumeid nigin kabĩ dalouf. ¹³ Aug nigin, turamã tar, biya ago gouf nigin to fõ yeif.

¹⁴ Taka ï pas enei bun marokeneik anĩ to dõ fouf are, dẽ wiyẽ kalagouf. ï mama fouf nigin, weim to nigal ùgouf. ¹⁵ Anĩ ere, ï kiwai gen to ulougouf, ï tureĩ gen weder urougouf.

Idikeleya Nẽ Aanya

¹⁶ Gama wau inosiya nẽ Odug ï yogo, sain ganam bun, naab ganam bun, wau inosiya ifeneif. Odug ã ganam geid ibodõf.

¹⁷ Aya, Pol, aya imaum aanya enei atotof, are neu pas ganam bun aya yug imauba. Aya eig afe atotodig.

¹⁸ Neda Odug Jesus Kristus nẽ wau ifenẽya ã ganam bun ibodõf.

1 Timoti

¹ Aya, Pol, Negur neda Isennadaya ado Kristus Jesus neda wauda iseya neid nigiya od bunem Kristus Jesus nē aposel wō aun,

² Timoti, momoiya bun neu kesu bagai, bun pas enei atotof.

Tamada Negur ado neda Odug Kristus Jesus neid wau ifenēya, wau yūya ado, wau inosiya, ō bun ibodōf.

Idegēya Lo Tai Fiya Tamo Nigin Weder Irouya

³ Aya Masedonia provins alauf sain bun, aya ō total bagai arokonon, Efesus an ubod ken, tamo tunī urokenēdi di, idegēya keleī anī baban to tai difediyouf. ⁴ Ago di, idi nenerī ege ado ibor idikeleya sā dir difedidig anī so difediyouf. Age fediya are momoiya bunem Negur nē kabī yaleya ban, luwa irouya dogol dalesedig. ⁵ Weder irouya od enei nē gariya are, wau laa fiya, are ī wau karētut, es fiya kisi biya ado, momoiya bagai bun tamal isidig. ⁶ Tunī enei bunem diya dile, od kaū sā wogōya bun dilelen. ⁷ Idi lo tai fiya tamo wōya orodif, anī ere, idi ereb wogō def ado, ereb nigin total dinof are idi keleī sā.

⁸ Ada keleī, taka ī lo dōf el foug are, lo ī biya. ⁹ Ada keleī, lo ī madur tamo nigin to inof, ī lo wal fiya, idodōya, Negur dudum fiya, mosor temeleid, idi fateul sā, idi buru naumeī nigin kisi difedig, idi sineid temeid tar didenkesif, tamo yuke-siya, ¹⁰ noliya, tamo tutur kayau tutur noliya, ferfer inouf nigin tamo bē yaleya, idegēya, momoi nē od wa fiya, ereb ganan ifelnēya biya wal difef anidi nigin lo inof. ¹¹ Ifelnēya biya anī, biya od fula fiya medeīya, Negur el fiya barikā aya wogōya nigin ifanan anī susu felef.

Odug Nē Wau Ifenēya Pol Bun Ilen

¹² Aya neda Odug Kristus Jesus megeir ifanan anī de afiyek, ere nigin, ī aya yogon od dō fiya biya anī ile fen, in kabī alouf nigin igirnan. ¹³ Aya kulu kono fiya tamo, tadū fediya tamo, seye tamo, anī ere, aya

wau yūya ifanan, ere nigin, aya to kelei ken, momoiya sa ken, age afen. ¹⁴ Neda Odug nē wau ifenēya, Kristus Jesus nē momoiya wau laa fiya ado, mugi bagai aya bun foula felen.

¹⁵ Od enei momoi bagai, ganan dale fen, momoi douf nigin: Kristus Jesus mosor tamo kel gei fiya nigin tenebur isin. Idi atun aya sane bagai, idi ganan wal fediya. ¹⁶ Anī ere, gariya eig fiya nigin, aya wau yūya ifanan, are aya mosor temeleid ganan wal fediya bun, Kristus Jesus in imatēya mugi bagai aya bun ifelnēdin, anī bunem idi momoi douf anidim dile fen, ī nigin momoi de fen, mata ibodkeleya anī dalouf nigin ī age fen. ¹⁷ Gama King ibodkeleya, ī mata ibodkeleya, ileya kisi feleya sā, Negur yogo dogol anī bun yana ado fula fiya medeīya gai gai ibodkalauf. Momoi.

¹⁸ Timoti, neu kesu, aya tai fiya od eig fiya afonok, are ō nigin profet od wogōya yenen anī dō wo di, ō sā biya kusī wouf nigin. ¹⁹ Momoiya ado wau karētut biya urou kafī wol. Tunī anī ditoraran nigin dogo neid momoiya tadū difelen. ²⁰ Age difen atun are Himeneus Aleksanda ado, idi Negur to kono difiyēf anī keleī youf nigin, Satan ima bun anenēdin.

2

Negur Yana Yaleseya Nigin Fadedya

¹ Aya ō total bagai orokonok, uruwa bagai, are nonī fiya, kosēya, taka nigin Negur irokenēya, de fiyēya anī, tamo ganan nigin agouf. ² King ado kabī nē mudur ganan nigin agouf, are ada wauda inosiya ado foro tausil, Negur orof ganan ado fateul bun tabodōf nigin agouf. ³ Agouf are biya, Negur neda Isennadaya wau al fef, ⁴ Negur ī tamo adok ganan kel gei foug nigin ado, momoi nē keleī bun disiyouf nigin orof. ⁵ Are, Negur ī tekelei, agef fen, atun tamo tekelei, Negur ado tamo atun ifaref, tamo are Kristus Jesus, ⁶ tamo ganan fotokar ī yogo bouwa itoron, anī yogon sain bun bagai Negurem tenebur tamo kayau keleī youf nigin yaoren. ⁷ Age fiya nigin, aya arū tamo, aposel igirnan, aya momoi bagai orok, aya idegēya sā, aya, haiden

atun, momoiya bagai nē ifelnēdiya tamo igirnan.

⁸ Tamo fō fō ganan imeid fateul ilun dales fen, kosē douf anī aya orouf, seye sã, monē sã.

⁹ Takag, aya kayau kolos biya, taka mama ifenēya nē ani sã, tamo kayau nē lo fiya biya bun ifonūya anī orouf, fatiya kori fiya sã, gol sã, maaī tuwa meli bagai pel nē kilelei sã, meein odug nē kolos sã anī orouf. ¹⁰ Anī ere, aya idi tobonunã biya dō difouf anī orouf, are kayau Negur yana dalesef ya anī susu falauf.

¹¹ Kayau ī foro yel dē yesil fen, dō fouf anī bunem keleī yalouf. ¹² Aya kayaum tamo ifelnēya be, wal fiye ken, uyu iroukenēya nigin to yo auf, ī foro yalauf bagai. ¹³ Ere nigin, Adam ketem inon, agef fen, Eva inon. ¹⁴ Agef fen, Adam anī to idegnen, kayau anī idegnē di, mosor bun kubū yen. ¹⁵ Anī ere, kayau idi toku tobonunã biya bun momoi douf, waud laa fouf, fateul dibodōf are, idi kesu gō fiya bun isennēya dalouf.

3

Uyu Iroudiya Ado Uyu Iroudiya Farumen Kabī Tamo

¹ Od enei are momoi bagai: Taka ī uyu irouya wō youf nigin wau irōf, ī kabī biya yaleya nigin orof. ² Uyu irouya, yana sane sã, ī kayau aiwau, anī ere, ī kayau tekelei youf, ī molol tamo, yogo nigin el fe kulatun fouf, ī karī difiyēf, tamo dor yalouf, tai fiya kisi feleya, ³ aai to yōdig, to kusī youf, imatēya, monēya sã, moni nigin wau laa fiya sã. ⁴ Ī kayau kesu el fe, lo fediyouf bagai. Age fe di, in kesu el de dō de fen, karī difiyēf. ⁵ (Taka ī yogon kayau kesu lo feid fen, tutuk fediya kisi feleya sãf are, naig fe fen, ī Negur nē sios lo fouf?) ⁶ Ī gama bagai momoiya tamo wō ye fen, to uyu irouya ifarauf bagai, age fouf are, ī bilāya bunem fasikor fele di, Negur Satan es fiyen gen, īg es fiyēf be. ⁷ Ī serē temeleid buneg yana biya adouf bagai, anī bunem, ī yana sane to yale fen, Satan nē kor bun to ilauf.

⁸ Uyu iroudiya farumen kabī tamo anidi, areg age fiya, tamo idi karī difiyēdidig, idi

baleid to kara urudig, aai fatuk to dōdig, idegēya bunem safina to daledig. ⁹ Idi momoiya nē keleī mugi, kisi karētut atata feleya ado dirouwau, bagai. ¹⁰ Uruwa idi kisi difediyouf, age de fen, idi bun od taka sãf are, utornēdig len, uyu irouya farumen kabī tamo wō de fen, tamo kayau disennēdiyof.

¹¹ Naab tekelei anī bunem, nedi aiweid tar idig karī difiyēdiyof, idi dumen od to wogō douf, anī ere, idi molol fen, ereb ereb ganan kulatun fiya kisi falauf.

¹² Uyu irouya farumen kabī tamo ī kayau aiwau, anī ere, kayau tekelei fen, in kesu tar ado fō ereb ereb ganan anī el fe, kulatun fediyouf bagai. ¹³ Idi kabī biya dalen, are yeneid biya bagai dalef, age de fen, idi Kristus Jesus bun momoiya nigin kukīya sã wogō def.

¹⁴ Aya ō gein kaisã bagai isiya nigin wau yenek, anī ere, aya faded enei atotkonok, anī bunem, ¹⁵ aya foi auf are, tamo kayau Negur nē fō bun naig de age difouf are ō keleī youf, Negur nē fō anī mata ibodōya Negur nē sios, are momoi nē monog tor ado gariya. ¹⁶ Neda momoiya nē waa anī odug, are taka nem wa fiya kisi feleya sã:

Ī bouwa ado wō yen,

Awa Urem ī madur bagai anī yaoren, age fe di, engelem dilen,

age de fen, teneub ganan bun ī nigin wogō de,

momoi de di,

fula fiya medeīya bun yalesnen.

4

Pol Timoti Faded Fiyen

¹ Awa Uur yaor bagai irok, dum bun tunī fau momoiya ditor ken, idegēya uur ado ereb ereb kaa sesen idim difelnēdiyof anī, idi dō difouf. ² Ifelnēdiya age fediya are, idegēya tamo neid meleid yaleya bunem isif, idi neid kisi ain uruwam ifalege di, galig leya gen. ³ Idi tamo kayau yaleya katū difiyēid fen, saaf tunī nigineg katū difiyēdiyof, saaf are Negurem tamo momoi de fen, momoi nigin keleī anidi Negur de difiye ken, dāf nigin inodin. ⁴ Ereb ereb ganan Negur inon are biya,

ereb ereb Negur de fiye ken, yaleyauf anī, to sese fiyēyauf, ⁵ ere nigin, are Negur nē od ado kosē bunem fateul ifenek.

⁶ Ereb ereb enei turā tar bun ufelnēdiyof are, momoiya od ado ifelnēya biya dō wodig anim megeir ifonō di, Kristus Jesus nē kabī tamo biya wō wouf. ⁷ Negur ditoron anī nē od ado kayau tubau neid nenerī ege anī to urou, Negur nē tobonunā dō fiya biya wō wouf nigin, ō ogo tai wouf. ⁸ Bouwa buru nē tai fiya are naal isennadaf, anī ere, Negur nē tobonunā dō fiya biya are ereb ereb ganan nigin isennadaf, anim gama mata ibodōya nē ado dumen mata ibodōya nē promis od irouf.

⁹ Od enei momoi bagai, ganan dale fen, momoi douf nigin ¹⁰ (enei nigin, ada kabī tale fen, lakī tafef), are ada neda wauda iseya mata ibodōya Negur bun tanon, ī tamo ganan nē isennēya, idi momoi def anidi neid bagai.

¹¹ Ereb ereb eneidi urokeneīd, su agog wiyēīd fen, ufelneīd. ¹² Ō kesu oosi de fen, takam to lai yōi, anī ere, wogōya bun, ibodōya bun, wau laa fiya bun, momoiya bun, amuyē sã karētut bun, momoiya tamo neid suma ago fen, idi age de dō difouf nigin ufelnēdiyof. ¹³ Atun meleid bun Negur nē Itotoya uwesauf, faded wedyouf, ago fen, ufelnēdif ule mog, aya asiyouf. ¹⁴ Uyu irouya imeid ō teten dino fen, profet od bunem uur nē ege luwa walēn anī to welebi wo.

¹⁵ Ō suma enei ganan dō fen, waū adok wenēdiyof, anī bunem, tamo kayau ganan ogon kabī naig fe ilef anī dilouf.

¹⁶ Ō ogo nigin ado ogon ifelnēdiya nigin lo walauf. Anī feseya sã toku agouf, anī bunem, ō ogo ado idi karī diyōf anidi isennēya walogouf.

5

Momoiya Tamo Kayau Kulatun Fediya Nigin

¹ Tamo tubau total bagai to kākã wiyēf, anī ere, ō tamã gen urokenēf. Kesu oosi, turā tar gen walediyof, ² kayau biyeid are sinã gen, kayau momoul are main tar gen, kisi karē bagai ado walediyof.

³ Kayau waab bagai kesu sã anidi el ge lo wedigouf. ⁴ Anī ere, waab taka ī gere tar be, tubu tar adouf are, uruwa idi neid Negur dō fiya nē tobonunā biya tai fiya nigin, idi neid ibor el de kulatun difouf, nedi sineid temeid tar simō bun lo difedin anī kilei abag age de kulatun difedyouf, anim Negur wau al fouf. ⁵ Kayau waab bagai taka, ī mugu bagai, isennēya yaleya nigin yogon wau iseya Negur bun ino fen, bō ado gaa ado toku kosē ye fen, Negur bun isennēya yaleya nigin to fiyēf. ⁶ Anī ere, waab taka ī bouwa sigigi fiya nigin dogol ibodōf are, ī mata ibodok, anī ere, ī laa fen. ⁷ Faded eneig tamo kayau wenēdiyof, ago di, taka bouwa bun od to dinouf. ⁸ Taka ī yogon ibor tar to kulatun fediyof, yogon sina tama kayau kesu bagai anī to kulatun fediyof are, in wau momoiya wa fef, anī bunem, ī sane bagai, taka to momoi yef anī wal fiya.

⁹ Waab taka ī aiwa tekelei ado el de dibodok dile 60 yar wal fen ouf are, waab neid daū bun unenēf, ¹⁰ agef fen, ī yogo tobonunā biya nigin yana ado, ī kesu kulat biya, ī tamo yaledig, momoiya tamo kayau yeid kulo fedig, morō adodo isenneīd fen, ī yogo ereb ereb biya ganan age fedig.

¹¹ Kayau waab fau gaū idi, waab neid daū bun to unouf. Ere nigin, idi neid bouwa nē oroya anī, Kristus nigin momoiya anī wal fese di, idi tamo yaleya nigin orodiyof. ¹² Anī bunem, idi es fiya dogo bouweid bun dinof, ere nigin, idi uruwa bun waud kuturol fen iron anī narī difen. ¹³ Takag, idi fō fiya tobonuneid ado fen, fō fō dalef diyōdig. Fō fiya dogol sã, dumen od wogōya ado, taka nigin wogō yef iyōya, idim to wogōya nē anī wogō dedig. ¹⁴ Anī nigin, kayau waab fau gaū, tamo dalouf, kesu adouf, nedi fō el de lo difouf, kiwaim idi dumedin irōya nigin naab to dukenēdiyof anī aya orouf. ¹⁵ Tunī mogo ditor ken, Satan dō difen.

¹⁶ Kayau taka ī momoiya ado, in ibor bun waab adodiyof are, ī yogo isennēdiyof, idi nigin sios morō to ifenēf, anī bunem, sios waab idi isennēdiya nigin bagai yenek anidi isennēdiyof.

¹⁷ Uyu irouya sios nē kabī el de diroulef, yana biya ado mala solo biya bagai dalouf,

are idi biya od wogō def ado difelnēdif anidi, age difouf bagai. ¹⁸ Negur nē Itotoya eig ye irok, “Bulmakau wit faat biya nē gabar yalelauf nigin lalai feid mog, yogon awa to ufokol,”* takag, “Kabī tamo, yogon kabī mala yalouf.”† ¹⁹ Uyu irouya taka nigin bouwa yūya od to urouwauf, fau uruwom be towom dirō di, anī urouwauf. ²⁰ Idi mosor dinof are tamo kayau meleid bun ou wiyēdiyof, are tunī wedereid fokō youf nigin agouf.

²¹ Negur, Kristus Jesus ado, engel igrnēdin meleid bun, aya ō total bagai orokonok, faded enei dō fen, taka dogol waū to wenēf, ō anī kinau ya anī bunem ereb taka to agouf.

²² Tetedin imā inoya nigin to sibu wo, tunī neid mosor bun to kababal wo. Ō karē bagai ubodōf.

²³ Naan dogol to wāf, wain naal bagai walouf, ere nigin, ogon name darau nigin ado, ogon dagi baba baban wō yedig nigin.

²⁴ Tamo tunī neid mosor are yaor, anī ketem es fiya bun ifaref, anī ere, tunī neid mosor dum yaorouf. ²⁵ Age fiya gen bagai, biya age fiya are yaor, idi biya age fiya gama yaor sā areg, iminēya kisi feleya sā.

6

¹ Ferfer idi ganān, nedi moroid tar yana biya dino fen, karī difiyēdiyof, anī bunem, Negur nē yana ado ama mafelnēdif anī, to kono difouf. ² Tunī idi, nedi moroid tar momoiya adouf are, amā tura tura de fen, to karī difiyēdig gen to age difouf. Age fiya ban, idi el de aruneid dalouf, ere nigin, idi neid kabī bunem biya dalef are momoiya tamo, idi neid oboiyeid. Enei ganān anī ufelneid fen, total bagai urokenēdiyof.

Moni Nigin Wau Laa Fiya

³ Taka ī idegēya keleī ifelneid fen, Odug Jesus Kristus nē faded fiya biya ado fateul ibodōya ifelnēdiya anī nigin wau to irōf are, ⁴ ī idegēyam idegnē di, bilā yef, ī ereb taka to keleī. Ī monēya ado od luwa irouya nigin oroya sane ado, anī bunem, kiyeī, kusī, bou yūya od, sisiniya kisi sane irou

fen, ⁵ tamo kisi sesen ado atun toku koūkā ya ibodōf, tamo kisi sesen ado anidi, momoi anī ditor ken, fateul ibodōya are moni odug yaleya nigin de fen, kisi difedig.

⁶ Anī ere, safina nigin wau morō sā ado fateul ibodōya anī, mala biya ado. ⁷ Ere nigin, ada teneub enei bun gemū tasin nigin, age fiya bagai gemū ke tauf. ⁸ Anī ere, ada saaf ado kolos adouf are, ada nigin de tauf. ⁹ Tamo kayau safineid ado ibodōya kisi difef anidi, kisi fiya bun, kor bun ado, neneya kisi ado waila dī fiya kisi musei bun kuku def, kisi anim tamo daūf sane lauf. ¹⁰ Moni nigin wau laa fiya, are ereb ereb sesen ganān nē gariya. Tamo kayau tunī moni nigin waud ditenen, momoiya ditor ken, idi dogo waud darau musei dalen.

Polem Timoti Ago Dō Woi Fiya

¹¹ Anī ere, ō, Negur nē tamo, enei ganān nigin so rel fen, madur bagai ibodōya, fateul ibodōya, momoiya, wau laa fiya, feseya sā ifareya ado, molol dō wouf. ¹² Momoiya nigin kusī biya walouf. Mata ibodkeleya are, ō musei meleid bun el wo, kurō wesin sain bun, ō anī nigin iweignon anī urou kafī wol. ¹³ Negur ereb ereb ganān mata ifenēdidig ado, Kristus Jesus ī Pontius Pailat mala bun el fe kurō fesin, idi meleid bun, aya ō orokonok, ¹⁴ od enei dō, kerema sā dō wo ule, neda Odug Jesus Kristus wō youf, ¹⁵ are Negur yogon sain bun irou isiyof, Negur ī el fiya ado ī dogol Uyu Irouya, king neid King ado odudug neid Odug, ¹⁶ ī dogol ī mata ibodkeleya, agef fen, ī lalan medeīya barikā tamom an ileyā nigin kisi feleya sā anī bun ibodōdig, taka nem to ilen, taka nemeg to ilouf. Ī bun yana ado megeir faimud ibodkalauf. Momoi.

¹⁷ Teneub enei bun safina musei adodo urokenēdig len, yeneid to dales fen, moni nigin waud to diten, moni are gai to ibodkalauf, anī ere, idi neid waud Negur bun dinouf, ī ada wauda al fouf nigin, ereb ereb ganān kisi feleya ifanadadig. ¹⁸ Idi tobonunā biya age dife di, tobonunā biya inid ado dibodōf nigin, dor yaleya nigin ado, ne tā isennēya nigin urokenēdiyof.

* 5:18: Diuteronomi 25:4 † 5:18: Luk 10:7

¹⁹ Naab enei bunem, idi safina biya dogo neid dumen nē nigin gariya megeir ado dino fen, mudu dino di, iselauf, age de fen, idi mata are mata bagai anī dalouf.

²⁰ Timoti, ereb ereb ò bun inon anī kulatun wo. Momiya sã neid od ado, kiwai kisi are idegēya bunem keleĩ biya dedig anī so wiyē, ²¹ are tunī mogo wogō den, anī age de fen, idi momiya bun tamal ditor diyalelen.

Wau ifenēya ò bun ibodōf.

2 Timoti

¹ Aya, Pol, mata nē promis od, are Kristus Jesus bun ibodok anī kilei, Negur nē oroya bunem Kristus Jesus nē aposel wō aun,

² Timoti, neu kesu oboiyou bun pas enei atotof.

Tamada Negur ado neda Odug Kristus Jesus neid wau ifenēya, wau yūya ado, wau inosiya, ō bun ibodōf.

Momoiya Megeir Ifareya Nigin Wau Yaleseya Od

³ Aya ō nigin, toku bō ado gaa ado, neu kosē bun karī aul fen, aya, neu talik tar age difen gen, Negur mala bun kisi karē bunem, Negur aruna aledig anī, de afiyek.

⁴ Ogon maru nigin karī aul fen, ileyōya nigin wau fatuk irok, are aya wau fatuk al foug nigin age afef. ⁵ Aya ogon momoiya idegēya sã anī karī aulen, momoiya anī, uruwa bun ogon tubū Lois sinã Yunis ado bun ibodon gen, aya momoi auf, are ō buneg agef ibodok. ⁶ Anī nigin, Negur nē ege luwa anī kebu wo di, futu rouf nigin wederē fokō afef, Negur nē ege luwa are imau teten anon anī bunem ō bun ibodok anī. ⁷ Negur ada kumī nē uur to ifanadan, anī ere, megeir nē, wau laa fiya nē ado, ada dug kulatun fiya nē uur ifanadan.

⁸ Anī nigin, ō neda Odug kurō fesiya nigin ō to mama yōf, aya ī nigin kalabus bun abodok nigineg to mama yōf. Anī ere, Negur nē megeir bunem, ō aya ado bagu ta fen, biya od nigin darau talouf. ⁹ Negur ī kel gei fada fen, fateul ibodōya bun iweignadan, are ada ereb taka age tafen anī bunem sã, anī ere, ī yogon wau irōya ado wau ifenēya bunem ī age fen. Wau ifenēya enei, Kristus Jesus bun tetunem fau sain gariya inoya sã mog, ifanadan. ¹⁰ Anī ere, wau ifenēya anī gama neda Isennadaya, Kristus Jesus wō yen anī bunem yaoren, ī laa anī narī felen, agef fen, biya od bunem, mata ado faimud ibodkeleya anī yaor fen. ¹¹ Biya od enei nigin aya soosi tamo, aposel ado ifelnēya tamo igirnan. ¹² Age fiya nigin, aya darau

enei alef, anī ere, aya to mama fiyaf, ere nigin, aya aib nigin momoi aun are aya keleī, Odug nē naa anī nigin, ereb aya ī kulatun foug nigin afenen are, ī lo fiya kisi feleya are aya keleī.

¹³ Ereb aya bun tamal karī won, ifelnēya biya anī, Kristus Jesus bun momoiya waū laa fiya ado, el wo dō fen, urou. ¹⁴ Awa Uur Fateul ada namedan ibodok anī nē megeir bunem, ereb ereb biya ifonon anī kulatun wo.

¹⁵ Ō keleī, Asia provins bun ganan ditornan, idi atun Figelus Hermogenes adog.

¹⁶ Odug, Onesiforus nē ibor bun wau yūya ifelnēdiyof nigin aya orouf, ere nigin, ī sain musei wau filolō fiya bunem el fiyadig, aya kokolin difiyan nigin to mama fen. ¹⁷ Ī Rom taun ibodon sain, aya nigin fatuk bagai imirnaf ile, dum fotou fiyan. ¹⁸ Odug nē wau yūya, Odug nē naa anī bun, Odug ī ifenēf nigin aya orouf! Ō keleī bagai, ī naig fe naab musei bun Efesus taun oun isennan.

2

¹ Anī nigin, ō, neu kesu, Kristus Jesus nē wau ifenēya bun megeir uno. ² Musei meleid bun aya wogō au di, karī won anī, karīya biya tamo anidi ufelnēdiyof, ago di, idi bagam tunī ifelnēdiya kisi feleyauf. ³ Kristus Jesus nē kusī tamo biya gen, ō amã geid darau karī taul fen, tafarauf. ⁴ Kusī tamo ī tamo ege neid tobonuneid to kababal fef, ī yogon mudur ado anī wau al foug nigin orof. ⁵ Age fiya gen, gudu reya tamo ī gudu ref, ī gudu reya nē suma to dō foug are, ī uyu irouya nē teter to yalouf. ⁶ Kabī tamo kabī total yaledig ī, ketem kaū yalouf. ⁷ Aya orok anī kisi wo, Odug enei ganan nigin kisi fokō fonōf.

⁸ Jesus Kristus laa bunem kel fã yen ī, Dawid nē ibor bun tamal anī karī walauf. Enei are neu biya od, ⁹ enei nigin aya darau ale fen, mosor tamo gen kokolin difiyan. Ani ere, Negur nē od kokolin fiya sã. ¹⁰ Anī nigin, aya igirnēdin anidi nigin, ereb ereb ganan bun feseya sã afaredig, are idig isennēya Kristus Jesus bun ibodok anī, fula fiya medeīya ibodkeleya ado dalouf nigin age afedig.

- ¹¹ Od enei momoi bagai:
Ada ĩ weim gare taun ouf are,
adag ĩ weim mata tabodōf.
- ¹² Ada feseya sã tafarauf are,
adag ĩ weim lo fiya nē mudur tabodōf.
Ada ĩ nigin wa tafouf are,
ĭg ada nigin wa fouf.
- ¹³ Ada to dō tafoufeg,
ĭ de agef dō fouf,
ere nigin, ĩ yogo nigin wa fiya kisi
feleya sã.

Kabĭ Tamo Negurem Ile Fen, De Yen

¹⁴ Idi erēb erēb enei nigin toku wedereid fokō wouf. Negur mala bun, od luwa irouya nigin wedereid urou, are kaũ sã, are karĭ def anidi tadũ difedidig dogol.

¹⁵ Ō Negur mala bun, kabĭ tamo ile fen, de youf, are kabĭ tamo ĩ yogon kabĭ nigin to mama fouf, ĩ momoi od tutuk ifelnēdiya nē kabĭ el fe irouwauf anĭ, wō wouf nigin, kabĭ total bagai walouf. ¹⁶ Negur sã ado kaũ sã nē od so wiyēf, ere nigin, idi anĭ bun dilelef are, fau gai momoiya sã bagai wowã douf. ¹⁷ Idi neid ifelnēya kaisã bagai gedi gen iyokalauf, idi atun are Himeneus Filetus ado, ¹⁸ idi momoi nē anĭ so difiyē diyalelen. Idi dirōdig, mata kel fāya are mogo wō yen, age de fen, tunĭ neid momoiya daũ difef. ¹⁹ Anĭ ere, Negur nē gariya total ifaref, itotoya enei bun megeir fef, “Aib idi yogon are Odug ĩ keleĭ,”* ado, “Ganan idi Odug yana kurō difesif, sesen bun tamal falei douf bagai.”

²⁰ Fō odug taka bun, safina erēb erēb gariya fire fire nem dinon are dibodok, tunĭ gol ado silwa nem, tunĭ aa nem ado mafer nem dinon, tunĭ kabĭ odug ifenēya nē ado tunĭ kabĭ nanaal ifenēya nē. ²¹ Tamo taka ĩ, sesen enei bun tamal amuyē anĭ kulo felef are, ĩ fau kabĭ biya ifenēya nē wō youf, ĩ fateulouf, Marau mala bun, kabĭ biya yaleya kisi feleya wō ye fen, kabĭ biya ganan ifenēya nē wō youf nigin saika fouf.

²² Oosi nē bouwa oroya sane so wiyē, ago fen, madur bagai ibodōya, momoiya, wau laa fiya ado, wau inosiya anĭ, aib idi waud karētut bun Odug diweignek

anidi geid, dōg. ²³ Neneya ado wadã keleĭ nē luwa irouya anĭ to fedē wo, ere nigin, ō keleĭ, are anĭ bunem kiwai wō yedig. ²⁴ Odug nē ferfer to kusĭ youf bagai, age fiya ban, ĩ tamo kayau ganan nigin imatēya ifelnēdiyof, ifelnēdiya kisi feleyauf, to seye youf bagai. ²⁵ Idi ĩ kiwai difenek anidi molol nem wedereid urouwauf, ago di, Negur idi waud falei fe di, idi momoi nigin keleĭ youf nigin wau iseya adouf. ²⁶ Anĭ bunem, idi wedereid fokō ye fen, Satan nē kor bun tamal, in oroya dō difouf nigin Satan gei fedin anidi ditor diyawauf.

3

Idikeleya Naa Bun Tamo Kayau Negur Ditorōf

¹ Anĭ ere, enei keleĭ youf. Idikeleya naa bun, morō odug wō youf. ² Tamo kayau dogo nigin waud laa fouf, moni nigin waud laa fouf, yeneid dalesauf, aya aya yeya, Negur kono difouf, sineid temeid sigoreid wal difouf, disennēdi di to de difiyēdiyof, fateul to dibodōf, ³ wau laa fiya sã, kiwai nigin weder tu keleya sã, taka dumen wogōya, yogo nigin kulatun fiya biya sã, nirāya, tobonunã biya nigin kiwai inoya, ⁴ ne tã kiwai ifenēya, sibuya, kisim aya aya yeya, Negur nigin wau laa fiya ban bouwa nē oroya nigin wau laa fiya, ⁵ bouwedim dogol Negur nē tobonunã dō dife fen, in megeir wa difouf. Idi age fediya so weid.

⁶ Age fediya anidim naab dimirek dile, fō bun dile fen, kayau maleg dideg-neĭd, dogo neid kisi ulum diroukenēdidig, kayau mosor beberikã anidi, oroya sane fire fire bun waud dalesedig, ⁷ kayau idi gai toku keleĭ daledig, anĭ ere, momoi anĭ to bagai keleĭdig. ⁸ Janes Jambres ado Moses kiwai difenen gen, tamo enidig momoi anĭ kiwai difenek, tamo anidi kisi gelele fiya ado, momoiya sã nigin itornēdin. ⁹ Anĭ ere, idi gerō bai to dilauf, ere nigin, tamo uru age difen gen, idi neid kũ fenēya tamo kayau ganan meleid bun kaisã yaorouf.

* 2:19: Namba 16:5

Polem Timoti Ago Dõ Woi Fiyen

¹⁰ Anĩ ere, neu ifelnēya, neu tobonunã, neu kisi gariya, neu momoiya, sain meluk totol ifareya, wau laa fiya, feseya sã ifareya, ¹¹ kafĩ fiya, darau, naig be fiya Antiok, Ikonium ado, Listra taun bun darau morõ aya alen anĩ ganan õ keleĩ. Anĩ ere, Odug anĩ ganan bun tamal yalelnan. ¹² Momoi, tamo kayau ganan, idi Kristus Jesus bun Negur nē tobonunã dõ difouf nigin orodiyouf are, idi morõ dalouf. ¹³ Agef mog, tamo sesen ado idegēya tamo, sane bunem sane bagai lauf, tunĩ didegneĩd mog, abag didegnēdiyof. ¹⁴ Anĩ ere, ogo nigin, ereb õ keleĩ wale fen, momoi won anĩ toko tokõ wo ule, ere nigin, idi difelnon are õ idi nigin keleĩ. ¹⁵ Agef fen, õ simõ bunem Negur nē Itotoya fateul kelein, are õ isennõ di, kisi biya wale fen, Kristus Jesus nigin momoiya bunem, kel yaleyõya kisi feleyauf. ¹⁶ Negur nē Itotoya ganan are Negur awa uur neseya bunem, are ifelnēya, sakāya, madur fiya ado, madur ibodõya tai fiya nigin biya. ¹⁷ Age fe di, Negur nē tamo, kabĩ biya ganan yaleya nigin kisi feleya bagai youf.

4

¹ Negur ado, Kristus Jesus ĩ isi fen, in tano inouf sain bun, ĩ mata dibodok ado gare den anidi es fediyouf anĩ, idi meleid bun, aya od enei totol bagai arokonok. ² Biya od wogõ wo; biya od wogõya nigin, sain biya bun ado sain sane bun dodok wo, sain meluk feseya sã ifareya ado faded fiya bunem, madur wo, totol od urokeneĩd, waud walesauf. ³ Sain fau isiyouf bun, tamo biya od nigin to wedereid dinouf. Age fiya ban, idi dogo neid oroya dõ dife fen, wederedim karĩya nigin gegeĩ fedidig anĩ karĩ douf nigin, idegēya ifelnēdiya tamo musei gou difediyouf. ⁴ Idi fau momoi anĩ ditor ken, wedereid fitok du ken, nenerĩ ege anĩ karĩ douf. ⁵ Anĩ ere, õ ereb ereb ganan bun kisi fokõ wol fen, morõ faali wo, soosi kabĩ wale, ogon kabĩ ganan walel anĩ kisi falauf.

⁶ Aya mogo wain sesewi fiya gen fi afalau fenē, agef fen, neu ileyā sain mogo isil. ⁷ Aya biya kusĩ aun, aya gudu reya

mogo bure afelen, aya momoiya kafĩ afe-len. ⁸ Gama aya nigin, madur bagai nē teter dodok fe ibodok, are Odug, Es Fiya Tamo madur bagai, fau naa anĩ bun ifanau fenē, anĩ ere, aya dogol sã, idi in isiya tari difef anidig ifenēdiyof.

Pol Timoti Ĩ Gein Kaisã Isiyouf Nigin Irokenen

⁹ Aya gein kaisã bagai usiyouf nigin kabĩ totol wale. ¹⁰ Ere nigin, Demas ĩ tenebur enei nē nigin wau laa fen nigin, itorna fen, Tesalonika taun ilen. Kresen ĩ Galesia provins ilen, age fe di, Taitus ĩ Dalnesia distrik ilen. ¹¹ Luk dogol aya ado mabodok. Mak wale fen, urom usig, ere nigin, ĩ neu kabĩ nigin isennaya kisi feleya. ¹² Aya Tikikus Efesus taun sur afen. ¹³ Õ usiyouf sain bun, neu saket meluk Karpus nē fõ bun Troas taun oun atoron anĩ wale urou usiyouf, neu buk kori fediya anĩg urou usiyouf, anĩ atun neu buk kori fediya meme gabar bun itotoya nē anĩ to bagai utorõf.

¹⁴ Aleksanda ain kabĩ tamo ĩ, aya gai kiwai totol bagai ifanan. Odug fau ĩ ereb age fen anĩ nigin mala solo sane ifenēf. ¹⁵ Õg ĩ nigin lo welei, ere nigin, ĩ neda od nigin totol bagai kiwai inon.

¹⁶ Aya uruwa kot bun afaren sain, takam to isennan, anĩ ere, ganan ditornan. Anĩ nē mala solo to ifenēdiyof nigin aya orouf. ¹⁷ Anĩ ere, Odug aya sirun ifar fen, megeir ifanan. Age fe di, aya bunem biya od kisi feleya bagai wogõ au di, haiden ganan karĩ douf nigin age fen. Agef fen, aya laion awa bun tamal yalelnan. ¹⁸ Odug fau kiwai sane ganan bun tamal yalelna fen, karika bagai in saa tanon irou iselelauf. ĩ bun fula fiya medeĩya gai gai ibodkalauf. Momoi.

Idikeleya Nē Aanya

¹⁹ Prisila, Akwila ado, Onesiforus nē ibor tar geid, aanya enei wenēdiyof. ²⁰ Erastus Korin taun ibodon, agef mog, aya Trofimus dagi mog, Miletus taun oun atornen. ²¹ Yau sain fau mog, ein kaisã usiyouf nigin kabĩ totol wale. Yubulus, Pudens, Linus, Klodia ado momoiya turã tar ganan aanya sur difonok.

²² Odug ogon uur ado ibodõf. Wau ifeněya ã bun ibodõf.

Taitus

¹ Aya Pol, Negur nē ferfer, Jesus Kristus nē aposel, Negur igirnēdin neid momoiya nigin ado, momoi nē keleī uyu irou di, idi fateul bagai dibodōf nigin, igirnan, ² momoiya ado keleī anī, mata faimud ibodkeleya nē wau iseya bun ibodok, mata faimud ibodkeleya anī nigin Negur ī to idegēdig, fau sain gariya inoya sã mog, wau kuturol fen, promis od iron. ³ Agef fen, yogon sain bun bagai, Negur neda Isennadaya ī irō di, aya biya od wogōya kabī ifanan anī bunem wogō au di, in od yaoren,

⁴ Taitus, neu kesu bagai, ada momoiya tekelei ado ō bun pas enei atotof:

Negur Tamada ado Kristus Jesus neda Isennadaya neid wau ifenēya ado wau inosiya ō bun ibodōf.

Taitus Nē Kabī Oun Krit Nuyo

⁵ Aya Krit nuyo an atornon anī nē gariya are, ereb bure felediya san anī madur woid fen, taun ganan bun uyu irouya, aya ō orokonon gen ugirnēdiyof nigin. ⁶ Uyu irouya are ī bouwa od sã, kayau tekelei aiwa, tamo ī ne gere tar momoiya ado, tetēya, idodōya sã. ⁷ Sios lo fiya tamo ī, Negur nē kabī ifenēya nigin, ī bouwa od sã, to aya dogol yedig, kaisã to name isedig, aai fatuk to yōdig, to kusī yedig, idegēya bunem safina to yaledig. ⁸ Agef mã, ī tamo yaledig, ereb biya nigin wau laa fedig, ī kisi biya ado ibodōdig, madur, fateul, ī yogo nigin biya kulatun fedig. ⁹ Ī momoiya od difelnen anī irou kafī falauf, anī bunem, ī sã tunī keleī biya bunem waud yalesauf, agef fen, ī idi keleī biya od nigin kiwai dinon anidi faded fiyēdiyof bagai.

¹⁰ Ere nigin, an idodōya tamo, od kaū sã, idegēya temeleid musei difaref, idi atun mulū bun temeleid anidim age difedig bagai. ¹¹ Idi sigoreid ufofãf, ere nigin, idi idegēya bunem safina yaleya nigin to ifelnēya nē anī difelneid fen, fō fō adok daū difedif. ¹² Idi neid fonō profet taka eig ye iron, “Krit tamo kayau idi faimud

idegēya temeleid, gaar kuī sane gen, fō temeleid saaf weweneid.” ¹³ Od enei are momoi. Anī nigin, totol od urokeneid, ou wiyēdiyof, ago di, anī idi neid momoiya biyauf, ¹⁴ anī bunem, idi Juda neid nenerī kaū sã to karī douf, age de fen, idi momoi nē anī ditoron anidi neid od to dō difouf. ¹⁵ Karē bun temeleid bun, ereb ereb ganan karē, anī ere, idi amuyē kisi ado momoiya sã anidi bun, karē taka sã. Momoi, idi neid waud ado kisi es fiya sane len. ¹⁶ Idi Negur keleī dedig, anī ere, nedi tobonuneid bun, idi Negur nigin wa difedig. Idi sane bagai, idodōya temeleid, idi ereb biya age fiya nigin kisi feleya sã.

2

Ereb Mala Fire Fire Ifelnēdiyof

¹ Ō ereb biya od wogō yef anī kilei ufelnēdiyof. ² Tamo biyeid dogo nigin biya kulatun difouf nigin, idi anī karī difiyēdiyof nigin, idi kisi biya ado dibodōf nigin ado, momoiya, waud laa fiya ado, feseya sã ifareya bun madur dibodōf nigin ufelnēdiyof bagai.

³ Age fiya bagai, kayau biyeideg karī del dibodōf nigin, taka dumen od to dirōf nigin, wain fatuk bagai to dāf nigin, agef fen, ereb biya anī difelnēdiyof nigin ufelnēid. ⁴ Ago di, idi, kayau momoul, nedi aiweid tar adodo kesu tar nigin waud laa fouf nigin, tai difedyouf, ⁵ idi dogo nigin, sã biya kulatun difouf nigin ado bouweid od sã dibodōf nigin, fō bun kabī dalouf nigin, tobonunã biya age difouf nigin ado, aiweid tar nigin karī difedyouf, age dife di, taka nem Negur nē od to kobu fouf nigin, kayau momoul tai difedyouf.

⁶ Age fiya gen bagai, kesu gaū, dogo nigin biya kulatun difouf nigin wedereid urou. ⁷ Ereb ereb ganan bun, idi dile fen, dō difouf nigin ereb ereb biya ago. Ogon ifelnēya bun, ō tutuk ifareya, wau adok ifelnēya bun ifenēya, ⁸ wogō biya tamo to kiwai difenēf nē anī ufelnēdiyof, ago di, idi kiwai difonok anī mama fediyof, ere nigin, idi ada nigin ereb sane taka wogōya nigin are sã.

⁹ Ferfer, ereb ereb ganan bun, nedi moroid tar karī difedyouf, waud al fiya

difenēdiyof, aiteid to solo difouf, ¹⁰ idi bun tamal bē to dalouf, idi nedi moroid tar nē od dō fiya biya bagai anī difelnēdiyof nigin ufelnēdiyof, age dife di, naab ganan bun, idi age difef bunem, Negur neda Isenadaya nigin ifelnēya anī, tamo meleid bun biya ile di, tamo neid oroya anī bun dinouf.

¹¹ Negur nē wau ifenēya, isennēya irou isidig anī, tamo ganan bun isin. ¹² Anim, Negur nē tobonunā dō fiya sā ado tenebur nē oroya sane bun, “Bai” yeya nigin ifelnadadig, agef fen, ada dug nigin biya kulatun ibodōya, madur ibodōya ado, Negur nē oroya bun, gama sain enei bun ibodōya nigin, ifelnadadig, ¹³ agef mā, ada el fiya nē wauda iseya, are neda Negur odug ado Isennadaya, Jesus Kristus ī, fula fiya medeīya ado isiyof anī tarī tafouf, ¹⁴ Jesus Kristus ī yogo luwa ada nigin itoron, are ī sesen ganan bun tamal yalelnada fen, ī yogo nigin yogon tamo kayau bagai kulo fele di, idi ereb biya age difouf nigin kabī totol dalouf nigin, ī age fen.

¹⁵ Ereb ereb enei ō ufelnēdiyof. Ogon totol ganan bunem, idi neid waud wales fen, wedereid urou. To loloum weid len, ō lai diyōf.

3

Ereb Biya Anī Dōf Age Fouf

¹ Tamo kayau wedereid fokō wo, are idi lo fiya ado yeneid adodo tamo karī difediyof, to didodōf, idi biya age difouf nigin ololo difouf, ² taka to bouwa bun od dūf, wau inosiya ado waud difenēdiyof, tamo ganan bun dimatkesiyof nigin ago.

³ Adag kulu kisi neneya adon, tadodon, didegnadan, tenebur nē oroya fire fire ado bouwa nē oroya fire fire nē ferfer tabodon. Ada tobonunā sesen ado kiyeī bun tabodon, to dileda orodin, adag taileid to orodan. ⁴ Anī ere, Negur neda Isenadaya nē tobonunā biya ado wau laa fiya wō ye fen, ⁵ ī isennadan, are ada ereb madur age tafen anī bunem sā, are yogon wau yūya bunem. Ī mata wōya nē naan kulo fiya bunem ado, Awa Uur Fateulem mata falei fiya bunem isennadan.

⁶ Negur ī, Jesus Kristus neda Isennadaya

bunem, Awa Uur Fateul, ada bun kisi feleya bagai foula fen, ⁷ are yogon wau ifenēya bunem madur fadan, anī bunem, ada mata faimud ibodkeleya nē wauda iseya ado fen, in akor anī talouf nigin age fen. ⁸ Od enei momoi bagai, anī nigin, aya, ō enei totol wogō wo di, Negur nigin momoi def anidi karī del fen, ereb biya anī el de age difouf anī orouf. Enei ganan are biya bagai, tamo ganan nigin deuf.

⁹ Anī ere, neneya kisi abob fe fiyēya anī, ibor dir fiya, monēya ado, lo nigin luwa irouya anī sese wiyeīd, ere nigin, anidi are kaū sā, kabī ifenēya kisi feleya sā. ¹⁰ Taka ī, ā atun fara fef, uruwa bun weder urouwau, ago fen, babaneg weder urouwau. Anī bure fele di, ī utornēf. ¹¹ Ō keleī youf, tamo age fiya are wau gogil fen, mosor bun ilen, ī yogo bouwa sanen inon.

Idikeleya Nē Od

¹² Sain aya ō gein Artemas be Tikikus sur afiyē di, ō Nikopolis an, aya gein kaisā isiya nigin, totol bagai naab umirēf, ere nigin, yau sain bun aya an abodōf nigin kisi anon. ¹³ Lo keleī tamo Senas ado Apolos, idi neid naab dilauf nigin, ereb ereb ganan usennēdiyof, ago di, idi ereb lau fiya sā dilauf. ¹⁴ Neda tamo kayau idig, ereb ereb biya age fiya nigin, idi de keleī anī dalouf bagai, are idi naa ganan nē safina dale fen, kaū sā to dibodōf nigin age difouf.

¹⁵ Ganan aya geid mabodok anidim, ō bun aanya sur mafef. Momoiya bun amā nigin waud laa fef anidi aan wiyeīd.

Wau ifenēya ā ganan bun ibodōf.

Filemon

Pol Nē Aanya

¹ Aya, Pol, Kristus Jesus nē kalabus tamo, neda turada Timoti ado,

oboida ado kabī turada Filemon gein,

² mainada Afia, kusī tamo turada Akipus ado, sios ogon fō bun guru difedig gein pas enei matotof.

³ Wau ifenēya ado wau inosiya, Negur neda Tamada ado Odug Jesus Kristus bunem ō bun ibodōf.

De Fiyēya Ado Kosēya

⁴ Aya, neu kosē bun, ō nigin karī aul fen, neu Negur faimud de afiyēdig, ⁵ ere nigin, aya, ogon momoiya Odug Jesus bun ilen anī karī au fen, Negur nē tamo kayau ganan nigin ogon waū laa fiya anī karī audig. ⁶ Aya, ō amā geid ogon momoiya nē uyu kū fiya anī kabī yale di, ereb ereb biya ganan, Kristus bun ada talef anī, ō kisi feleya bagai keleī youf nigin kosē auf. ⁷ Ogon waū laa fiya anim, wau al fiya odug ifana fen, neu wau yalesen, ere nigin, turau ō, Negur nē tamo kayau neid waud filolō fiya wenēdin.

Pol Onesimus Nigin To Fen

⁸ Anī nigin, Kristus bunem aya sā megeir afar fen, ō arokonō di, ereb ō agouf nigin kisi feleya, ⁹ anī ere, aya wau laa fiya bun afar fen, totol bagai to ayok. Aya, Pol, tamo tubau fen, gama Kristus Jesus nē kalabus tamo, ¹⁰ aya neu kesu Onesimus nigin totol bagai to ayok, ī kokolin afar mog, neu kesu wō yen. ¹¹ Kulu ī ō nigin to biyan, anī ere, gama ī ada uruwom nigin biya bagai.

¹² Aya, ī, ō gein kel sur afef, ī aya neu oboiyou. ¹³ Aya ī uruwom mabodom are, sain aya biya od nigin kokolin afar mog, ī ogon modoū yale fen, isennam. ¹⁴ Anī ere, aya ō waū to irō mog, aya ereb taka naig be fiya age afouf nigin to oroun, are ō nugo yōya bunem sā, ogon oroya dō wo agouf nigin age afen. ¹⁵ Momoi, ī ō uruwom sain naal bagai fara gen nē gariya are, ō ī baban gai gai kel walouf nigin be, ¹⁶ ī baban ferfer gen sā, anī ere, ferfer wal

fiya, turā bagai. Ī aya bun neu oboiyou, anī ere, ī ō bun ogon oboi bagai neu wal fiya, are tamo nē lo fiya bun ado Odug nē lo fiya bun age fiyauf.

¹⁷ Anī nigin, ō, aya ogon kabī turā gen ago kisi wouf are, aya aan wiyaf gen, īg ago aan wiyēf. ¹⁸ Ī ō bun ereb sane taka age fen be, ereb wareg taka adouf, wareg are aya bun uno. ¹⁹ Aya, Pol, imaum bagai enei atotof. Aya fau aba afonōf, aya, ō aya bun ogon mata nigin wareg ado anī nigin ō to arokonok. ²⁰ Turau, aya fau ō bun tamal, ereb biya Odug bun alouf nigin orouf, Kristus bun, aya wau filolō fiya wana. ²¹ Ogon dō fiya anī momoi auf nigin, aya atotkonok, aya to ayok anī wal fiya agouf anī aya keleī.

²² Agef fen takag yeir. Aab taka, aya nigin dodok wana, ere nigin, āgenei kosēya bunem, aya baban ā bun kelau asi, an abodōf nigin, aya wau isef.

²³ Epafra, Kristus Jesus bun neu kalabus turau, ō bun aanya sur fef. ²⁴ Mak, Aristakus, Demas ado, Luk, neu kabī turau tar idig age difef.

²⁵ Odug Jesus Kristus nē wau ifenēya āgenei uur bun ibodōf.

Hibru

Negur Naal Engel Wal Fedif

¹ Kulu Negur, profet bunem, sain musei ado naab fire fire bun, tubuda tar wogō fiyēdin, ² anī ere, gama idikeleya naa enidi bun, ī Naal bunem wogō fadan, Naal ī ereb ereb ganan akorouf nigin Negurem igirnen, ī bunem saa teneub ado inon. ³ Naal ī Negur nē fula fiya medeīya nē so fiya, ī Negur yogo gen bagai, in od total ado bunem ereb ereb ganan megeir irou ifaref. Ī mosor lilik fiya anī age fel fen, saa ilun Negur Megeir Bagai ima biyalē ibodon. ⁴ Negur, Naal yana ifenen are engel yeneid wal fiya, age fiya bagai, Naal ī engel wal fediya.

⁵ Ere nigin, Negur ī yogon engel taka to eig ye irokenen,

“Ō neu Kesu,

gama aya ō Tamā wō aul.”*

Takag, Negur ī engel taka nigin to eig ye iron,

“Aya yogon Tama abodōf,

ī neu Kesu ibodōf.”†

⁶ Takag, Negur ī yogon kesu matu tenebur ein irou isif sain bun, ī baban irok,

“Negur nē engel ganan ī seli dalouf.”‡

⁷ Negur ī engel nigin irok,

“Ī yogon engel yau gen wowā douf nigin inodif,

ī yogon kabī tamo yā bale gen wowā douf nigin inodif.”§

⁸ Anī ere, Negur ī Naal nigin irok,

“O Negur, ogon tano gai gai ibodkalauf, ō ogon tano tobonunā madur bagai bun lo wouf.

⁹ Ō tobonunā madur bagai nigin waū laaf fen, tobonunā sane anī sese wedig,

anī nigin, Negur, ogon Negur kulīya nē moul ō bun fi felen,

anī bunem, nē tā tar wal feid fen, ilun inenon.”*

¹⁰ Takag, ī irok,

* 1:5: Sam 2:7 † 1:5: 2 Samuel 7:14, 1 Stori 17:13 ‡ 1:6: Diuteronomi 32:43 § 1:7: Sam 104:4 * 1:9: Sam 45:6, 7 † 1:12: Sam 102:25-27 ‡ 1:13: Sam 110:1 * 2:8: Sam 8:4-6

“O Odug, gariya bun ō teneub nē gariya kare won,

ō imam saa unon.

¹¹ Idi fau inanakalauf, anī ere, ō fau ubodōf,

idi ganan kolos gen sanef ilauf.

¹² Ō idi saket gen kori wediyouf,

idi kolos gen falei wediyouf.

Anī ere, ō ubodok gen ago ubodōf,

ogon sain to idikalauf.”†

¹³ Negur ī yogon engel taka to eig ye irokenen,

“Imau biyalē ubod mog,

ogon kiwai tar

ō yē inoya nē sawa anouf.”‡

¹⁴ Age fiyauf are, engel idi ere? Idi uur Negur nē kabī daledig, tamo kayau isennēya dalouf anidi disennēdiyof nigin Negurem idi sur fedidig.

2

Karī Yeleya Nigin Weder Irouya

¹ Anī nigin, ada karī taun anī fatuk bagai lo tafalauf, anī bunem, ada to kū tafenēf.

² Negur nē od tubuda tar bun engel bunem wogō difiyēdin are total ado ibodon, anī nigin, idi od anī didod ken, to dō difen anidi are, anī kilei mala solo darau dalen.

³ Anī nigin, ada isennēya odug anī to karī tafiyēf are, naig ta tayalalauf? Uruwa bun Odug ī isennēya enei nigin wogō yen, age fe di, idi ī karī difiyen anidim, isennēya are momoi anī, ada bun yaor difen. ⁴ Uris,

ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

are momoi anī, ada bun yaor difen. ⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

ō ī fula fiya medeīya yana ado anī nē
teter kurū wiye ken,
8 ye farumen ereb ereb ganān gō we-
len.”*

Negur ī farumen ereb ereb ganān gō
felen, are ereb taka ī farumen sã anī
taka to ibodok. Anī ere, gama ada ereb
ereb ganān ī farumen ifaref anī to tailef.
9 Anī ere, Jesus Negurem ī sain naal engel
farumedin inene ken, ī darau yale laa
fen nigin, gama ī fula fiya medeīya yana
ado anī nē teter kurū fiyen anī ada tailef,
are Negur nē wau ifenēya bunem, ī tamo
kayau ganān nigin laa ilen.

10 Negur ereb ereb ganān, yogo nigin
ado yogo bunem inon, ī kesu tar musei
fula fiya medeīya bun irou isiyouf nigin,
tamo kel gei fiya nē marau Jesus, darau
bunem kisi feleya bagai wō youf nigin agef
inonen, are tutuk. 11 Yogo tamo kayau
fateul ifenēdif ado, fateuledif anidi geid,
ibor tekeleif. Anī nigin, Jesus idi turau tar
fiyēdiya nigin to mama fef. 12 Ī irok,
“Aya ō yanã neu turau tar bun kurō
afalaisiyouf,
tamo kayau guru difef meleid bun,
aya ō selī abiyouf nigin seg alouf.”†

13 Ī baban irok,

“Aya ī bun neu momoīya anouf.”‡
Takag, ī baban irok,

“Aya yeir, Negur ī gere tar ifanan geid.”§

14 Gere tar idi bouweid ado naudeid ado
nigin, īg bouwa ado naud ado idi gen
wō yen, are ī yogon laa bunem, Satan ī
laa nē megeir irouf anī daū falauf nigin
ado, 15 idi laa nigin kumī de fen, sain
ganān anī nē ferfer dibodok disin anidi
kafī fiya bun tamal yalelnēdiyof nigin age
fen. 16 Are momoi bagai, Jesus ī engel to
isennēdif, anī ere, ī Abraham nē ibor nē
tubu tar isennēdif. 17 Anī nigin, Negur
ī, Jesus naab ganān bun yogon tura tar
gen inonen, are Jesus ī pris mudur wau
yūya, dō fiya biya ado wō ye fen, Negur
aruna yalouf nigin ado, ī Negur nē didi yof
fen, tamo kayau neid mosor yalelkenēdiya
kabī yalouf nigin age fen. 18 Jesus yogo
bun kisi fiya wō yen sain bun, ī morō

yalen, anī nigin, ī idi kisi fiya bun difaref
anidi isennēdiya kisi feleya.

3

Jesus Ī Moses Wal Fiya

1 Anī nigin, fateul turau tar, āg Negurem
iweignein, Jesus ī yogo aposel ado pris
mudur, are ada ī nigin momoi tauf taudig,
ī bun kisi fatuk tanouf. 2 Moses ī Negur nē
fō ganān bun, Negur nē od el fe dō fedig,
age fiya bagai, Jesus ī, Negur ī igirnen anī
ait el fe dō fedig. 3 Fō inoya tamo yogo
yana odug yaledig, fō anī wal fiya. Age
fiya bagai, Jesus ī yana odug bagai, Moses
wal fiya. 4 Fō ganān fō inoya tamo ado,
anī ere, Negur ī yogo ereb ereb ganān
inoya marau. 5 Moses ī, Negur nē fō ganān
bun kabī tamo ibod ken, Negur nē od el
fe dō fedig, agef fen, ī Negur dumen bun
ereb wogō youf anī kurō fesin. 6 Anī ere,
Kristus ī Negur Naal, ī Negur ait el fe dōf
fen, Negur nē fō lo fedig. Anī nigin, ada
toku totol tano fen, wauda isef anī nigin
yanada talesef anī tarou tokō tafalauf are,
ada yogon fō.

Momoīya Sã Nigin Weder Irouya

7 Anī nigin, Awa Uur Fateul eig ye irok
kilei ago gouf:

“Gama ã, Negur nē ait karī gouf are,

8 ã oun gerere tuan Negur kisi wiyēg
fen,

kiwai wenēgen age fiya gen,
ã wauī to agef totolouf.

9 An temeī tar aya kisi difiya fen, kiwai
difanan,
are idi yar foti bun ereb age afen are
dilen.

10 Anī nigin, aya ibor anidi nigin seye ise
fen,
oron, ‘Idi neid waud faimud itorna
fen, fire iledig,
age de fen, idi neu naab to keleīdig.’

11 Anī nigin, aya seye ise fen, wau kuturol
fen, oron,
‘Idi neu si inoya bun to bagai di-
lauf.’ ”*

12 Turau tar, ã takam, wau sane ado
momoīya sã anim, mata ibodōya Negur

† 2:12: Sam 22:22 ‡ 2:13: Asaia 8:17 § 2:13: Asaia 8:18 * 3:11: Sam 95:7-11

dudum fiyēf anī to ago gouf nigin lo welegei. ¹³ Anī ere, od ‘Gama’ yeya Negur nē Itotoya bun yenek anī, ada bun fau agef yenēf are, naa ganan bun abob wau talesagauf, anī bunem, ā taka mosorem idegnē di, wau to totolouf. ¹⁴ Uruwa bun ada kisi total adon anī, kafī tafel tarou, idikeleya bun talauf are, ada Kristus nē ereb ereb ganan weim talef. ¹⁵ Negur nē Itotoya eig ye irok kilei,

“Gama ā Negur nē ait karī gouf are,
āgenei tubuī tar Negur kiwai difenen
age fiya gen,

ā wauī to agef totolouf.”†

¹⁶ Are aiyaim karī de fen, kiwai dinon? Idi ganan Mosesem Isip tamal guri feid dilen anidim sā de? ¹⁷ Negur aiyai nigin yar foti wau sanen? Idi mosor dino fen, gerere tuan gare den anidi nigin sā de? ¹⁸ Negur aiyai nigin wau kuturol fen, idi yogon si inoya bun to bagai dilauf yen? Idi yogon od to dō difen anidi nigin sā de? ¹⁹ Anī nigin, ada talef, are idi to momoi den nigin, namen ileyā kisi feleya san.

4

Negur Nē Tamo Kayau Neid Sabat Si Inoya

¹ Anī nigin, Negur nē si inoya bun ileyā nigin, Negur nē promis od anī fau yenek nigin, ā takam si inoya bun ileyā nigin ā to biya ya anī, Negurem to ilouf nigin lo tafalauf. ² Ere nigin, idi karī den gen, adag biya od karī taun. Idi od karī den, anī ere, idi bun faat yūya sā, ere nigin, idi od karī den sain, idi momoiya ado od anī to dalen. ³ Gama ada mogo momoi taun, are si inoya anī bun telef. Are idi to momoi den nigin Negur eig ye iron kilei,

“Aya seye ise fen, wau kuturol fen, oron,
‘Idi neu si inoya bun to bagai dilauf.’”*
Negur nē kabī teneub kare fiya sain bun mogo bure felen, anī ere, ī od agef iron. ⁴ Negur nē Itotoya bun, Negur naa sewen nigin eig ye wogō yen, “Naa sewen bun, Negur ī yogon kabī ganān bun si inon.”†

⁵ Baban Negur nē Itotoya enei bun, ī eig ye irok, “Idi neu si inoya bun to bagai dilauf.”

⁶ Anī nigin, tunī si inoya anī bun sā dilauf nigin fau ibodok, anī ere, idi uyulil biya od karī den anidi, si inoya anī bun to dilen, ere nigin, idi od anī to dō difen. ⁷ Anī nigin, sain meluk ilele di, Negur baban naa taka igir ken, are “Gama” yen anī, Negur ī Dawid sigor bunem wogō yen, are mogo iron gen:

“Gama ā, Negur nē ait karī gouf are,
ā wauī to totolouf.”‡

⁸ Josua ī si inoya anī to ifenēdin, ī si inoya anī ifenēdim are, Negur anī dumen naa taka nigin to wogō yem. ⁹ Anī nigin, Negur nē tamo kayau neid Sabat§ si inoya fau ibodok. ¹⁰ Ere nigin, Negur ī yogon kabī bun si inon kilei, taka ī Negur nē si inoya bun ilef, īg yogon kabī bun si inof. ¹¹ Are, taka nem, od to dō difen anidi to dō feid fen, kubū youf nigin, si inoya anī bun ileyā nigin kabī total bagai talouf.

¹² Negur nē od mata ibod ken, kabī total yalef, are dimig willa si sitakā wal fiya. Are malakanon uur ado, tuwa katō fiya, tuwa nē seselina ado atun borū fel si sitakādīg. Are wau bun kisi ado oroya es fedig. ¹³ Ereb ereb ganān inodin are Negur mala bun taka to iminek. Ereb ereb ganān ī mala bun lelek feleya ado yaor. Ī bun ada ereb age tafen anī faded tafiyēf.

Jesus Pris Mudur Odug

¹⁴ Anī nigin, pris mudur odug saa ilun Negur gein iselen, are Jesus Negur Naal, ada ī ado nigin, ada momoiya kurō tafesif anī tarou kafī tafalauf. ¹⁵ Are, neda pris mudur ī, neda felu yabiya keleī bagai nigin, wau yūya yaleya kisi feleya, ī ada gen mogo naab ganān bun kisi fiya yalen, anī ere, ī mosor sā. ¹⁶ Anī nigin, ada megeir tano fen, Negur nē sia wagen talauf, an wau ifenēya ibodok, anī bunem, ada neda lau fiya sain bun, ada isennadauf nigin wau yūya tale fen, wau ifenēya fotou tafouf.

† 3:15: Sam 95:7, 8 * 4:3: Sam 95:11 † 4:4: Jenesis 2:2 ‡ 4:7: Sam 95:7, 8 § 4:9: Sabat naa anī, Juda neid uub nē naa.

5

¹ Pris mudur idi ganan tamo atun yale fen, tamo kayau nigin Negur aruna dale, mosor nigin ofa ado sesewi fiya difenēf nigin igirnēdin. ² Īg yogo felu yabidig nigin, idi to kelei ken, kũ difenek anidi, molol nem isennēdiya kisi feleya. ³ Age fiya nigin, ĩ tamo kayau neid mosor nigin ado, yogon mosor nigineg sesewi fedig.

⁴ Taka nem, pris mudur, yana odug anī, ĩ yogo bouwa bun to inodig, anī ere, ĩ Aron gen, Negurem dogol igirnēdig. ⁵ Age fiya gen, Kristus ĩg pris mudur ibodōf nē fula fiya medeīya yogo bouwa bun to inon. Anī ere, Negur ĩ irokenen,

“Ō neu Kesu,

gama aya ō Tamā wō aul.”*

⁶ Ī taka bun eig ye irok,

“Ō faimud ubodkalauf nē pris,

Melkisedek nē gī bun.”†

⁷ Jesus ĩ tenebur mata ibodon sain bun, ĩ inā odug marum fe fen, Negur ĩ laa bun tamal isennēya nigin kisi feleya, ĩ bun kosē ye fen, igonen. Jesus ĩ imatkeis fen, Negur farumen ibodon nigin, Negur ĩ karī fiyen. ⁸ Jesus ĩ Negur Naal, anī ere, ĩ darau yalen anī bunem, dō fiya nigin keleī yale fen, ⁹ kisi feleya bagai wō yen. Agef fen, ĩ ait dō difef ganan neid mata ibodkeleya kel gei fiya nē gariya wō ye di, ¹⁰ Negur ĩ Jesus Melkisedek nē gī bun pris mudur inenen.

Momoiya Folō Feleya Nigin Weder Irouya

¹¹ Amā enei nigin wogōya musei ado, anī ere, amā faded yeīya nigin total, ere nigin, ā keleīya nigin forō gef. ¹² Ā tise wōya nigin sain meluk adon, anī ere, ā fau taka nem Negur nē od tamo mata urug ifelnēdidig age fiya baban ifelneīf nigin ubodōgef. Ā fau su yōya nigin yenek, saaf total yōya nigin kisi feleya sã. ¹³ Taka ĩ su yoko are ĩ fau momou, anī nigin, ĩ madur bagai nē ifelnēya keleī sã. ¹⁴ Anī ere, saaf total are biyeid neid, idi tai fiya bun, kisi def dile fen, enei biya, enei saneya keleīdig.

* 5:5: Sam 2:7 † 5:6: Sam 110:4 * 6:14: Jenesis 22:17

6

¹ Anī nigin, ada, ifelnēya gariya bunem Kristus nigin kelein daū are tator ken, keleī tōya bagai bun talauf. Ada keleī eig fediya nigin baban to gariya tanouf, are laa ileya nē suma bun tamal faleiya, Negur nigin momoiya, ² naan igūdiya, ima teten inoya, laa bun tamal kel fāya ado, faimud ibodkeleya nē es fiya. ³ Negur wau irōf are, ada keleī mugier bagai talauf.

⁴ Idi Negur nē fula fiya mogo dalen, idi saa ilun nē ege luwa mogo kobū de dilen, idi Awa Uur Fateul dalen, ⁵ idi Negur nē od are biya bagai ado, sain fau isiyouf anī nē megeir mogo kelein, ⁶ age difen anidi momoiya folō difalauf are, idi baban waud faleiya nigin guri feid isiya kisi feleya sã, ere nigin, idi dogo baban Negur Naal aa tetek bun du ken, mal atun mama difenek.

⁷ Teneub anī bun sain musei uyē isi lūf fen, kabī moroid saaf ifenēdidig, teneub are Negur el fiya ifenēdig. ⁸ Anī ere, teneub bun malū duri ado lili isedif, are teneub to biya, gelu fiya melsã ibodok. Idikeleya bun yã malan isaikalauf.

⁹ Oboimã tar, amã eig ma wogō mauf, anī ere, amã ā bun age fiya to wō ye fen, biya fiya ā bun isiyouf nigin momoi mauf, biya fiya are kel gei fiya ado isiyouf. ¹⁰ Negur ĩ madur, ĩ, āgenei kabī ado wauī laa fiya, are ā Negur nē tamo kayau usennēdigef usigef bunem Negur ufelnēgef anī, weder to tu kalauf. ¹¹ Amã, ā mugu mugu kabī total eig fiya bagai walegef uleg, idikeleya bun ulagauf anī oromak, ago ge di, āgenei wauī iseya anī agef kisi falauf. ¹² Amã, ā fō yeīf anī to oromak, anī ere, ā, idi momoi de, to fese de fen, ereb Negur ĩ afeneīf yen anī dalef anidi, madē wedig ago gouf anī oromak.

Negur Age Afouf Yen Anī Momoi Bagai Agef Wō Youf

¹³ Negur ĩ Abraham age afouf fiyen sain bun, taka Negur yogo wal fiya, ĩ yana bunem Negur wau kuturoleya od wogōya nigin taka to ibodon, anī nigin, ĩ yogo wau kuturol fen, ¹⁴ iron, “Aya momoi bagai el fiya afon ken, momoi bagai gerē tar musei

afonōf.”* ¹⁵ Age ye di, Abraham ï feseya sã tari fef ile, Negur afonōf yen anï yalen.

¹⁶ Tamo idi waud kuturol fen, dogo neid od megeir difouf are, tamo ï idi wal fediya yana bunem megeir difedig. Waud kuturoleya od anim, od wogō def anï megeir fe fen, luwa irouya ganan irukaka kesidig. ¹⁷ Age fiya bagai, Negur age afouf yen anï dalouf anidi bun, Negur ï yogon kisi to bagai falei youf anï yaor fenēdiyof nigin, ï wau kuturoleya od wogō yen anim, ï age afouf yen anï, megeir fen. ¹⁸ Od uru enei, are od Negur age afouf yen ado wau kuturoleya od anï, faleiya kisi feleya sã, Negur ï od uru enei nigin idegēya kisi feleya sã anï bunem, wau iseya malada bun ifaref anï tarou kafï tafalauf nigin, Negur nē ahahaya bun taya telen ada anï, wauda fatuk yalesauf nigin Negur age fen. ¹⁹ Wau iseya enei are, ada maladakanon nē anka, are total fen, to gebe yedig. Are anim, gabar tempel namen ibodok anï borū fel, modoū fateul bagai bun iledig. ²⁰ Jesus ï Melkisedek nē gï bun faimud ibodkeleya pris mudur wō ye fen, ï mogo ada nigin an uyulil ilen.

7

Pris Melkisedek

¹ Melkisedek enei Salem nē king, ï Negur Ilun Bagai nē pris. ï Abraham king geid kusï del wal feid fen, kel isi mog, fotou fe fen, el fiya ifenen. ² Age fe di, Abraham ereb ereb ganan ï ado anï bun tamal ten tekelei ifenen. Yana Melkisedek nē gariya are “madur bagai nē king,” takag, “Salem nē king,” anï nē gariya, “wau inosiya nē king.” ³ Melkisedek ï sina tama sã, in ibor nē gï taka sã, wō yen nē naa ado laa nē naa taka sã, ï Negur Naal gen faimud ibodkeleya pris.

⁴ ï naig fiya odug bagai anï kisi wog. Tubu Abraham ïg safina kusï bun yalen anï ten tekelei ifenen. ⁵ Lo irok, are Lewi nē ibor nē tubu tar bun pris wowã def idi, tamo kayau bun ten tekelei dalouf, tamo kayau are nedi tureid tar. Tureid tar idig Abraham nē ibor, anï ere, idi age difedig. ⁶ Melkisedek ï Lewi nē ibor bun

tamal sã, anï ere, ï Abraham bun tamal ten tekelei yale fen, Abraham Negurem age afouf fiyen anï el fiya ifenen. ⁷ Kisi togu fiya sã, tamo odugem, ï farumen anï el fiya ifenēdig. ⁸ Pris tamo, idi gare dedig, ten tekelei daledig, anï ere, Melkisedek nigin, Negur nē Itotoya yaor fef, ï mata ibodkeleya, ï ten tekelei yalen. ⁹ Ada sã eig tauf, Lewi ï ten tekelei yaledig, ïg Abraham bunem Melkisedek ten tekelei ifenen, ¹⁰ ere nigin, Lewi ï fau tubu Abraham bouwa bun ibod mog, Melkisedek ï Abraham fotou fiyen.

Jesus ï Melkisedek Gen

¹¹ Israel tamo kayau lo ifenēdin anï bun irok nigin, Lewi idi pris kabï daledig. Lewi neid pris kabï anï bun lau fiya to yenem are, ere nigin pris taka isiya nigin lau fiya fau yenen, Melkisedek nē gï bun tamal taka, Aron nē gï bun tamal sã? ¹² Pris kabï falei fouf are, lo areg falei fouf. ¹³ Neda Odug nigin od enei wogō yen, are ï ibor fire bun tamal, yogon ibor bun tamal taka pris kabï to yalen. ¹⁴ Neda Odug ï Juda ibor bun tamal are yaor. Anï ere, Moses ï pris nigin wogō yen sain bun, Juda ibor nigin od taka to wogō yen. ¹⁵ Pris taka Melkisedek gen bagai wō yef are, od enei amã wogō maun are yaor bagai wō yef. ¹⁶ ï tamo pris kabï yaleya nē lo bunem pris to wō yen, anï ere, ï, mata, daū feleya kisi feleya sã anï nē megeir bunem pris wō yen. ¹⁷ Are Negur nē Itotoya eig ye irok kilei:

“Ö faimud ubodkalauf nē pris,

Melkisedek nē gï bun.”*

¹⁸ Lo tubu are megeir sã, kabï to yaledig, anï nigin, yerin gadi difelef, ¹⁹ (ere nigin, lo anim ereb taka to madur fedig). Anï ere, wau iseya biya anï wō yef, anï bunem, ada Negur non telef.

²⁰ Negur ï Jesus pris inenen, are wau kuturoleya od sã to inenen. Pris tunï ganan idi age fiya sã, idi wau kuturoleya od sã, pris wō den. ²¹ Negur ï Jesus irokenen sain bun, ï wau kuturoleya od ado pris wō yen:

“Odug wau kuturol fen iron,

* 7:17: Sam 110:4 † 7:21: Sam 110:4

are yogon kisi to falei youf,
 ‘Ō faimud ubodkalauf nē pris.’”†
²² Wau kuturoleya od enei nigin, Jesus ĩ
 bar itenēya tubu wal fiya nē megeir fiya
 wō yen.

²³ Pris idi museim dibodon, ere nigin, idi
 gare de fen, kabī to tokō difelen. ²⁴ Anī ere,
 Jesus ĩ faimud ibodkelef, anī nigin, ĩ gai
 gai pris kabī yalef, are taka bun to ilauf.
²⁵ Age fiya nigin, idi ĩ bunem Negur garan
 disif anidi, ĩ el fe isenneīd leya kisi feleya,
 ere nigin, ĩ mata faimud ibod ken, idi nigin
 Negur bun kosē yef.

²⁶ Pris mudur age fiya anim, sã isen-
 nadauf. ĩ fateul, kerema sã, amuyē sã,
 mosor adodo bun tamal gadi felen, Negur
 ĩ saa ilun bagai inenen. ²⁷ Pris mudur
 tunī ganan, naa ganan, dogo neid mosor
 nigin ket sesewi dife fen, tamo kayau neid
 mosor nigin sesewi difedig, anī ere, Jesus
 ĩ pris anidi gen sã. ĩ yogo bouwa sesewi
 fen sain bun, ĩ idi neid mosor nigin sain
 tekelei dogol sesewi fen. ²⁸ Lo are felu
 yabidig tamo pris mudur igirnēdidig, anī
 ere, Negur nē wau kuturoleya od, are lo
 dumen isin, od anim, Negur Naal, faimud
 kisi feleya bagai ibodkalauf nigin inenen,
 ĩ anī igirnen.

8

Bar itenēya Mata Nē Pris Mudur

¹ Amã wogō mauf anī nē kaū, are yeir.
 Ada pris mudur age fiya ado, ĩ saa ilun
 Negur nē sia ima biyalē ibod ken, ² modoū
 fateul bagai, are tamom sã, Odug yogo
 bagai salafat inon anī bun aruna yalef.

³ Pris mudur ganan, ofa ado yaro sesewi
 fiya difenēf nigin igirnēdif, anī nigin, neda
 Pris Mudur ĩg ereb taka ifenēf nigin adouf.

⁴ ĩ tenebur ibodom are, ĩ pris to wō yem,
 ere nigin, tamo lo irok kilei ofa difenēdif
 are mogo dibodok. ⁵ Idi modoū fateul
 bagai, are saa ilun ibodok age fiya gen, anī
 nē malakanon bun aruna dalef. Anī nigin,
 Moses ĩ salafat fateul inouf nigin age fen
 sain bun, Negur ĩ weder iroun, “Lo welei, ō
 arei bun afelnon age fiya kilei bagai, ereb
 ereb ganan unouf.”* ⁶ Anī ere, Jesus ĩ kabī

yalen are idi neid kabī wal fiya, ere nigin,
 Negur ado tamo geid bar itenēya nigin, ĩ
 atun tamo kabī yalef, bar itenēya anī, bar
 itenēya tubu anī wal fiya, bar itenēya mata
 anī, Negur od age afouf yen, are od tubu
 wal fiya anī teten inon.

⁷ Bar itenēya tubu bun kū fenēya taka to
 ibodom are, mata nigin to lau fiyam. ⁸ Anī
 ere, Negur ĩ tamo kayau bun kū fenēya ile
 fen, iron:

“Odug irok, sain fau isif,
 are Israel tamo kayau ado
 Juda tamo kayau geid
 bar itenēya mata anouf.

⁹ Bar itenēya are,
 aya idi neid tubuid tar Isip bun tamal
 imeid gim afe elen sain bun,
 idi tubuid tar geid,
 bar itenēya anon age fiya gen sãf.
 Idi neu bar itenēya to dō difen nigin,
 aya idi dudum afedin.

¹⁰ Odug irok, sain anī dumen,
 aya Israel tamo kayau geid, bar
 itenēya enei anouf.
 Aya neu lo idi neid kisi bun ano fen,
 idi neid waud bun atotauf.
 Aya idi neid Negur abodōf,
 idi neu tamo kayau dibodōf.

¹¹ Tamo takam ne tā to ifelnēf,
 tamo takam tura to eig ye irokenēf,
 ‘Odug nigin keleī youf,’
 ere nigin, idi ganan aya nigin keleī youf,
 naal bagai bunem isel, odug bun.

¹² Aya idi neid sane nigin wederou tu kel
 fen,

idi neid mosor nigin to karī aulauf.”†
¹³ Negur ĩ bar itenēya enei “mata” yen,
 anī bunem bar itenēya tubu are kabī sã.
 Ereb taka tubu, kabī sã yen anī, kaisã
 bagai iminkalauf.

9

Tenebur Negur Nē Salafat Bun Seli Yabiya

¹ Bar itenēya tubu anī, seli yabiya ni-
 gin nun ado fen, seli yabiya nē modoū
 tenebur eineg adon. ² Salafat taka dinon.
 Aab malabag anī bun, yal nē tibog, tebol
 ado, bret sesewi difen anī an ifaredin,

* **8:5:** Eksodas 25:40 † **8:12:** Jeremaia 31:31-34

modoũ are Modoũ Fateul dedig. ³ Gabar Modoũ Fateul bun ibodok anĩ dumen, aab taka Modoũ Fateul Bagai dedig ibodon, ⁴ an gol alta aa gaula sumeĩ nigin tō fiyadig ado, bar itenēya nē bogis gol nem ganan kerũ feleya ibodon. Bogis enei bun, gol darum mana ado, Aron nē manig sana wō yen ado, meein bedu bar itenēya itoton ado ifaredin. ⁵ Bogis teten Fula Fiya Medeīya Negur nē engel Serubim difaren, wayeid yarirĩ dife, bogis mala dede difen, bogis mala are modoũ, Negur an mosor yaledig. Anĩ ere, amã enei nigin gama to dir mafalauf.

⁶ Sain erēb erēb ganān age de dodok difel fen, pris idi Negur nē kabĩ dalouf nigin, aab malabag bun naa ganān diledig. ⁷ Anĩ ere, pris mudur dogol, aab Modoũ Fateul Bagai dedig gabar dumen ibodok anĩ bun, yar tekelei bun sain tekelei dogol iledig. Ī naud sã to bagai iledig. Ī yogo nigin ado, tamo kayau neid mosor to kelei ken dinon anĩ nigin naud Negur ifenēdig. ⁸ Enei bunem Awa Uur Fateul, salafat fateul urug bagai dinon anĩ fau ifar mog, Modoũ Fateul Bagai bun ileya nigin, bobog fau kã feleya sã anĩ ifelnēdin. ⁹ Enei are gama sain enei nigin malakanon. Are ofa ado yaro sesewi fiya Negur difenen anim, Negur seli yabidig tamo yogon wau kare keleya kisi feleya sã anĩ ifelnēdif. ¹⁰ Safina age fediya anĩ, are saaf, naan yōya ado, amuyē lilik fiya nē tobonunã fire fire dogol. Age fediya anĩ, are bouwa buru nē lo, kabĩ yalef ile, suma mata nē sain bun.

Kristus Nē Naud

¹¹ Kristus ĩ, erēb erēb biya mogo wō yen anĩ nē pris mudur isin. Ī salafat fateul odug, biya bagai bun isour yale ilen, salafat fateul are tamom to dinon, are erēb kare fen enei nē tomina sã. ¹² Ī meme ado bulmakau naal nē naud ado to ilen, anĩ ere, ĩ Modoũ Fateul Bagai bun, yogon naud bunem, sain tekelei dogol isour yale ile fen, ada nigin kel gei fiya faimud ibodkeleya anĩ yalen. ¹³ Meme ado bulmakau nē naud ado, bulmakau gober naal yã difalege di, isaikelen anĩ nē aas nem, idi

amuyē lilik fiya sã anidi tetedin wiri dife di, idi amuyē lilik fele di, bouweid fili yedig. ¹⁴ Are momoi youf are, Kristus nē naud naig fe yenēf! Ī Awa Uur faimud ibodkeleya bunem, yogo bouwa amuyē sã, Negur bun sesewi fen. Yogon naud anim, ada wauda laa bun ileya nē tobonunã bun tamal kulo fadalef, anĩ bunem, ada mata ibodōya Negur aruna talouf.

¹⁵ Gariya enei nigin, Kristus ĩ bar itenēya mata nē atun tamo, anĩ bunem, tamo Negurem iweignēdin anidi, faimud ibodkeleya akor, are Negur age afouf yen anĩ dalouf. Ere nigin, bar itenēya tubu bun, mosor dinon anidi, nedi mosor bun tamal yalelnēdiyof nigin, ĩ laa fen.

¹⁶ Fadim anĩ kabĩ yalouf nigin, fadim yun tamo ĩ mogo laa fen are yaorouf, ¹⁷ ere nigin, fadim are, tamo laa fe di dogol, kabĩ yaledig. Fadim yun tamo fau mata ibod mog, fadim anĩ to bagai kabĩ yaledig. ¹⁸ Age fiya nigin, bar itenēya tubug naud sã to kabĩ yalen. ¹⁹ Moses lo bun ĩtãfiya ganān tamo kayau ganān wogō fiyeĩd fen, ĩ bulmakau naal ado meme nē naud, naan ado yale falei fe fen, sipsip siwi giriya ado aa hisop were nem, lo buk bun ado tamo kayau ganān bun wiri fen. ²⁰ Moses iron, “Enei are bar itenēya nē naud, are Negur ã dō gouf nigin irokenein.”* ²¹ Naab tekelei anĩ bunem, ĩ salafat fateul ado sesewi fiya nē safina ganān bun naud wiri fen. ²² Momoi, lo bun irok, melsã erēb erēb ganān naud bunem kulo falauf, are naud to fi falauf are, mosor nigin weder to tu kalauf.

²³ Anĩ nigin, saa ilun nē safina anĩ nē malakanon, sesewi fiya enei bunem kulo feledig, anĩ ere, saa ilun nē safina dogo, sesewi fiya enei wal fiya bunem, age fedig. ²⁴ Kristus ĩ modoũ fateul tamom dinon, are modoũ fateul momoi bagai nē malakanon anĩ bun to ilen. Ī saa ilun bagai anĩ bun ile fen, Negur mala bun ada nigin wō yen. ²⁵ Pris mudur ĩ, yogo naud sã, yaro naud ado, yar ganān Modoũ Fateul Bagai bun iledig. Anĩ ere, Kristus ĩ yogo bouwa baba baban sesewi fouf nigin saa ilun to ilen. ²⁶ Kristus ĩ age fem are, teneub

* 9:20: Eksodas 24:8

kare fiya sain bunem isin are, ï sain musei darau yalem. Anï ere, gama idikeleya sain enei bun, ï yogo bouwa sesewi fe fen, mosor yalelauf nigin, sain tekelei dogol wõ yen. ²⁷ Tamo ganan sain tekelei dogol gare douf, anï dumen, Negur es fediyouf. ²⁸ Age fiya gen, Jesus ïg tamo kayau musei neid mosor yalel kenëdiyof nigin, yogo bouwa sesewi fe, tekelei fen. Ï baban isiyof, are mosor yaleleya nigin sã, anï ere, tamo idi ï tari difef anidi kel gei fediyof nigin.

10

Jesus Sesewi Fe, Tekelei Felen

¹ Lo are safina biya isif anï nẽ malakanon dogol, momoi bagai safina biya anï sã. Agef yenek nigin, lo are, sesewi fiya de tekelei anï, yar ganan gai toku difenëdig anï bunem, idi Negur seli dabiyouf nigin disif anidi, madur tamo bagai wowãya kisi feleya sã bagai. ² Age fiya kisi feleyam are, idi sesewi fiya ganan ditorom. Ere nigin, Negur sesewi difedig tamo neid mosor, momoi bagai kulo felem are, idi baban mosor nigin waud to morõ fedim. ³ Anï ere, yar ganan bun sesewi fiya anim, tamo kayau idi, mosor nigin karï deledig, ⁴ ere nigin, bulmakau ado meme nẽ naud anim mosor yaleleya kisi feleya sã.

⁵ Anï nigin, Kristus tenebur isi fen, iron: “Õ sesewi fiya ado ofa to oroyon, anï ere, õ aya nigin bouwa taka dodok won.

⁶ Õ, ofa yã bun ifaleg isaikeleya anï ado, mosor yaleleya nẽ ofa anï nigin waũ to iron.

⁷ Ago di, aya oron, ‘Aya nigin buk bun eig ye itoton,

O Negur, aya yeir, aya ogon oroya dõ afouf nigin asin.’ ”*

⁸ Ï uruwa iron, “Sesewi fiya ado ofa, ofa yã bun ifaleg isaikeleya anï ado, mosor yaleleya nẽ ofa anï õ to oroyon, anï nigin waũ to iron” (anï ere, lo are, idi age difouf nigin iron). ⁹ Age ye fen, ï iron, “Aya yeir, aya ogon oroya dõ afouf nigin asin.” Ï mata anï inouf nigin uruwa nẽ anï yalelen.

¹⁰ Oroya anï bun, Jesus Kristus ï yogo bouwa sesewi fe, tekelei felen, anï bunem, ada fateul wõ taun.

¹¹ Naa ganan bun, pris ganan mugu mugu difar fen, Negur nigin dogo neid kabï daledig. Idi sesewi fiya de tekelei anï toku difenëdig, sesewi fiya anim mosor yaleleya nigin kisi feleya sã bagai. ¹² Anï ere, Kristus ï mosor nigin gai gai nẽ sesewi fiya tekelei fele fen, Negur ima biyalẽ ibodon. ¹³ Sain anï bunem isi gama, Kristus ï, yogon kiwai tar Negurem Kristus ye inoya nẽ sawa inenëdiyof anï tari fef. ¹⁴ Ï sesewi fe, tekelei felen anim, idi mosor bun temeleid kulo feledif anidi, gai gai nigin madur feledin.

¹⁵ Awa Uur Fateul ïg od enei nigin eig ye irokanadaf. Uyulil ï irok:

¹⁶ “Odug irok, sain anï dumen, aya idi geid bar itenëya enei anouf. Aya neu lo idi waud bun ano fen,

idi neid kisi bun atotauf.”†

¹⁷ Age ye fen, ï tobol fe irok:

“Dogo neid mosor ado sane age difedig are,

aya to karï aulauf.”‡

¹⁸ Mosor enei weder tu kelen ouf are, baban mosor nigin sesewi fiya taka to yenek.

To Fese Tauf Nigin Iweigya

¹⁹ Anï nigin, turamã tar, ada Jesus nẽ naud bunem, Modoũ Fateul Bagai bun tuninir ya sã iley a nigin kisi feleya. ²⁰ An iley a nẽ naab are, mata ibodõya nẽ naab mata, are ï, ada nigin, gabar Modoũ Fateul Bagai bun iley a nigin bobog katï felen anï serek felen bunem kã felen, gabar are yogo bouwa. ²¹ Ada Negur nẽ fõ lo fiya nigin pris odug ado. ²² Anï nigin, ada wauda tutuk fen, momoiya total ado Negur non talauf, ere nigin, ada wauda, mosor nẽ wau morõ bun tamal wirif kulo fada le fen, bouwada naan karëtut nem kulo felen. ²³ Neda wauda iseya ada wogõ taudig anï, ada tarou kafï tafalauf, ere nigin, Negur age afouf yen, are ï de age fouf bagai. ²⁴ Ada wau laa fiya ado tobonunã biya bun talauf nigin, abob wau yalesey a nigin kisi tafouf. ²⁵ Ada guru fiya

* **10:7:** Sam 40:6-8 † **10:16:** Jeremaia 31:33 ‡ **10:17:** Jeremaia 31:34

anĩ to tatorõf, tunĩ to guru difedig gen, to age tafouf, anĩ ere, ada abob wau talesef talauf, ere nigin, ã, Odug nẽ Naa melsã isif are ulegef.

²⁶ Ada momoi anĩ kelei ken, neda oroya dõ tafe, mosor tanof talauf are, mosor yaleleya nẽ sesewi fiya taka to ibodok, ²⁷ anĩ ere, Negur yogon es fiya ado, yã bobo reya anim yogon kiwai tar yakur feid isasaikalauaf anĩ, kumĩ ado tari fiya dogol ibodok. ²⁸ Taka ĩ Moses nẽ lo dudum fen, ĩ nigin tamo urom be towom, ĩ age fen anĩ yaor dife di, waud yũya sã dukesi di, laa fen. ²⁹ Age fiyauf are, taka ĩ, Negur Naal ye nem lai fe fen, bar itenẽya nẽ naud anim ĩ mosor bun tamal kulo fiyekelen anĩ, fateul sã gen inene ken, wau ifenẽya nẽ Awa Ur kono fiyek ĩ, darau naig fiya bagai yalouf anĩ kisi gef. ³⁰ Ere nigin, ada kelei, Negur eig ye iron, “Taka ĩ sane age fouf, ĩ mala solo sane ifenẽya are neu kabĩ, ayam mala solo sane afenẽf.”§ Takag, ĩ baban iron, “Odug ĩ yogon tamo kayau es fediyouf.”*

³¹ Taka ĩ mata ibodõya Negur ima bun ilauf are, ĩ fatuk bagai kumĩ tererẽ youf.

³² ã uruwa bun fula fiya walegen, anĩ dumen naig wog ufaregen anĩ kisi waleg. Sain anĩ bun ã darau nẽ kusĩ odug walegen, anĩ ere, total ufaregen. ³³ Sain tunĩ, ã mal atun kono diyeyi ken, darau difeneĩdig. Sain tunĩ, ã, idi morõ age fiya dalen anidi usennẽdigidig. ³⁴ ã tamo kalabus bun dibodon anidi nigin wauĩ yũya wenẽdigen, agog fen, tamo idi ãgenei safina ganam dale di, ã kulĩya ado folõ wol kenẽdigen, ere nigin, ã kelei, ã aug safina biya, mata gai ibodkeleya nẽ ado.

³⁵ Anĩ nigin, ãgenei kisi total anĩ to folõ walagauf, are fau mala solo odug bagai ifeneĩf. ³⁶ ã total ufaragauf, anĩ bunem, ã Negur nẽ oroya dõg fen, ereb ĩ age afouf yen anĩ walogouf. ³⁷ Ere nigin, sain naal bagai ilele di, “Tamo ĩ isif, are fau isiyouf, ĩ to foi youf.

³⁸ Anĩ ere, neu tamo madur bagai, ĩ momoiya bunem mata ibodõf.

Ĩ dumelem soso rouf are,
aya ĩ nigin wau to al fouf.”†

³⁹ Anĩ ere, ada, idi dumelem soso de fen, fõ defef gen sã, anĩ ere, ada, idi momoi de fen, isennẽya dalef gen.

11

Momoiya Bunem

¹ Momoiya are, ereb nigin wauda isef anĩ, de momoi bagai agef wõ youf tauf anĩ. Momoiya are, ereb ada maladam to tailef anĩ, de momoi bagai ibodok tauf anĩ.

² Kulu nẽ tamo kayau, dogo neid momoiya bunem, Negur idi nigin de fiyẽdin.

³ Momoiya bunem, ada kelei, Negur irõ di, saa teneub ado wõ yen, anĩ nigin, ereb ada malada bun tailef are, maladam to tailef anim inodin. ⁴ Momoiya bunem, Abel ĩ sesewi fiya, Kain nẽ wal fiya Negur ifenen. Abel nẽ momoiya bunem, Negur ĩ Abel nigin madur tamo bagai yen, ere nigin, Negur ĩ Abel nẽ sesewi fiya are de yen. Abel ĩ laa fen, anĩ ere, momoiya bunem, ĩ fau wogõ yef.

⁵ Momoiya bunem, Enok teneub enei bun tamal yalennen, anĩ nigin, ĩ to laa fen. Negurem ĩ yalennen nigin, takam ĩ to fotou fiyen. Negur nẽ Itotoya irok, Negur ĩ fau to yale mog, ĩ Negur wau al fiya ifenen. ⁶ Taka ĩ to momoi youf are, ĩ Negur wau al fiya ifenẽya kisi feleya sã, ere nigin, taka ĩ Negur gein isif, are Negur ibodok anĩ ado, ĩ dimirnek anidi mala solo ifenẽdidig anĩ, de momoi bagai youf.

⁷ Momoiya bunem, Noa ĩ ereb malam fau ileya sã mog, Negurem weder iroun anĩ karĩ ye fen, ĩ Negur anini fiye ken, yogon ibor isennẽdiyof nigin waag taka kare fen. Yogon momoiya bunem, Noa ĩ, teneub enei mosor ado anĩ yaor fe fen, madur bagai, are momoiya bunem isif anĩ, Negur bun tamal yalen.

⁸ Negur ĩ, Abraham yogon akor fau yalouf modoũ bun ilauf nigin iweignen sain bun, Abraham ĩ nain be ilauf ya anĩ kelei san. Anĩ ere, ĩ momoiya bunem Negur nẽ od dõf fen, ilen. ⁹ Momoiya bunem, Abraham ĩ, Negur afonõf yen teneub anĩ bun, yaũ teneub bun yaũ tamo gen ibodon. ĩ salafat bun ibodon, Isak

Jakop ado, idi Negur afonōf yen od tekelei Abraham yalen anī dalen, idig salafat bun dibodon. ¹⁰ Are Abraham ī, taun anī gariya teten totoo ifaref, are Negurem eig fe yenēf ye fen, kare fen anī tari fedig.

¹¹ Abraham ī tubau bagai, Sara ī yogo dali. Anī ere, momoiya bunem, Abraham tama wōya nigin kisi felen, ere nigin, ī, Negur age afouf yen anī agef wō youf bagai ye fen, momoi yen. ¹² Anī nigin, tamo tekelei ī tubau bagai laa tamo gen, ī bunem yogon ibor nē tubu tar, saa ilun barisa ado maaī ubun kulum yenek gen, iwesleya kisi feleya sã, fulus fen.

¹³ Tamo kayau eneidi ganam momoi de fen, gare den. Idi ereb Negur ī age afouf yen anī to dalen. Are idi egerom meledim dogol dile fen, waud al fen. Age dife fen, teneub enei bun idi yaū tamo, namala den. ¹⁴ Tamo kayau age de dirok, are dogo neid teneub dimirek anī difelnadaf. ¹⁵ Idi teneub ditor disin anī nigin kisi dalem are, idi keku de dilauf nigin kisi feleya yenem. ¹⁶ Age fiya ban, idi teneub biya bagai, saa ilun nē anī nigin waud yenen. Anī nigin, Negur ī, idi nemã Negur def anī nigin to mama fef, ere nigin, ī idi neid taun taka dodok felen.

¹⁷ Momoiya bunem, Negur Abraham kisi fiyen sain bun, Abraham ī, Isak anī Negur sesewi fiya ifenen. Abraham Negurem age afouf fiyen ī, naal tekelei bagai anī sesewi fiya ifenēf nigin age fen. ¹⁸ Negur Abraham irokenen, “Isak bunem, ogon ibor tar wowã douf.”* ¹⁹ Abraham kisi fen, Negur ī laa tamo kel turī fiya kisi feleya. Anī nigin, ada eig tau wogōya kisi feleya, Abraham ī Isak laa bun tamal kel yalen.

²⁰ Momoiya bunem, Isak ī, Jakop Esau ado, dumen bun idi neid ibodōya nigin el fiya ifenēdin.

²¹ Momoiya bunem, Jakop yogon laa melsã mog, Josef gere tar monog mugu mugu el fiya ifeneīd fen, yogon manig tubi bun mudur isen ken, Negur seli yabin.

²² Momoiya bunem, Josef yogon laa melsã mog, Israel tamo kayau Isip tamal

ditor dilauf nigin wogō ye fen, yogon tuwa nigin faded fiyēdin.

²³ Momoiya bunem, Moses sina tama adom, Moses wō ye di, ī ogō towo dinokellen, ere nigin, Moses ī kesu meli bagai dile fen, idi king nē od nigin to kumī den.

²⁴ Momoiya bunem, Moses ī biya fen, Isip king nē barai nē kesu yeya anī itoron.

²⁵ Moses ī, mosor nē oroya sain naal bun dō fiya itor ken, Negur nē tamo kayau geid morō dalouf nigin wau iron. ²⁶ Moses ī kisi fen, are Kristus nigin kono fiya yaleya anī, Isip nē safina biya bagai anī wal fiya, ere nigin, ī yogon mala solo dumen nē anī lo felen. ²⁷ Momoiya bunem, Moses ī Isip king nē seye nigin kumī sã, Isip itor ilen. Ī totoo ifaren, ere nigin, Moses ī, Negur iley a kisi feleya sã anī, ilen gen age fen.

²⁸ Momoiya bunem, ī Pasa ado, bobog bun naud wiri fiya nē suma inon, are Yukesiya nē Engel ī, Israel neid kesu monog matu to idenkesiyouf nigin age fen.

²⁹ Momoiya bunem, Israel tamo kayau, teneub maug bun gen Maaī Giriya atu diyok dilen. Anī ere, Isip tamo idi dibal mog, naan kerub fedi di, gare den.

³⁰ Momoiya bunem, Israel tamo kayau, Jeriko kau, naa sewen kalī dife di, Jeriko kau narī felen.

³¹ Momoiya bunem, naabur kayau Rahab, idi Negur ait to dō difedig geid to didenkesin, ere nigin, ī kofo tamo aan fiyēdin.

³² Aya baban ere od taka arokeneīf? Aya Gidion, Barak, Samson, Jepta, Dawid, Samuel ado, profet idi nigin dir feleya nigin sain sã. ³³ Idi momoiya bunem king geid kusī de fen, lai difedin. Idi madur bagai bunem kulatun difen. Idi Negur age afeneīf yen anī dalen. Idi laion eweid difofakelen. ³⁴ Idi yã bale difofor len. Idi dimig waila wal difen. Idi totoo sã, anī ere, megeir dale fen, totoo difaren. Idi kusī namen totoo dale fen, yaū kusī tamo lai difedin. ³⁵ Kayau dogo neid tar gare dedin, baban mata ke de fafã de di, daledin. Tunī darau sane bagai dale fen, kafī fiya bun tamal yalelnēdiya ditoron, are idi kel fãya biya anī, dalouf nigin

* **11:18:** Jenesis 21:12

age difen. ³⁶ Tunī kono fiya ado tibog dalen, tunī sen nem difofa ken, kalabus bun dinenēdin. ³⁷ Idi meein tulu difedin. Idi so nem kokour difedi di, uru wō yen. Idi dimig nem didenkesin. Idi sipsip gabar ado meme gabar difounkel dilen, are idi maleg dibodon, darau dalen, to biya di-fiyēdin. ³⁸ Tenebur ein, idi ed fe ibodōya nigin to biya. Idi gerere tuan, arein, meein ku bun ado, teneub kur diyōdig.

³⁹ Eneidi ganan, Negur, dogo neid momoiya nigin de fiyēdin. Anī ere, idi takam, Negur age afouf yen anī to yalen, ⁴⁰ ere nigin, Negur ada nigin kisi biya bagai inon, are idi ada weim ouf dogol, kisi feleya bagai wowā douf nigin, Negur ī age fen.

12

Negur Yogon Kesu Tar Madur Fiyēdidig

¹ Ada momoiya tamo kayau age fediya musei budū gen kalilī difadaf. Anī nigin, ereb ereb ganan naaburada gudū fef anī ado, mosor karika sane fili fadaf anī taraile fen, abob wawal fiya nē gudu reya Negurem inokanadan anī bun, feseya sā gududu tauf. ² Ada malada Jesus bun dogol tanouf, ī neda momoiya nē gariya ado, momoiya kisi feleya bagai wōya nē. Ī wau al fiya mala bun ifaren anī nigin ye fen, ī aa tetek nigin to fese ye fen, mama yaleya nigin to kukī yen, agef fen, ī Negur nē sia ima biyalē ibodon. ³ Jesus ī mosor adodo tamom kiwai fatuk difenen anī ganan faali fen, ī nigin kisi tafouf, are ā to fō yei ken, wauī folo rouf nigin age tafouf.

⁴ Ā mosor ado gunī gedig, anī ere, ā fau kusīg fen, naudeī fi feleya sā. ⁵ Agog fen, ā wauī yaleseya od, Negur neu kesu tar yein anī wedereī tu kelen:

“Neu kesu, ō Odug nē madur fiya to ege wouf,

Odug ī ou yōf are, waū to folo rouf,

⁶ ere nigin, Odug ī, idi nigin wau laa fedig anidi madur fiyēdidig,

agef fen, ī yogon kesu tar yaledif anidi ganan darau ifenēdidig.”*

⁷ Morō ā ado are, Negur nē madur fiya anī de faali gouf. Negur ī, ā yogon kesu tar nigin age fef. Kesu nanī taka, tamam to madur fiyēdig? ⁸ Negur yogon kesu tar ganan madur fiyēdidig, anī ere, ī ā to madur yeīf are, ā yogon kesu tar sā, ā dubur temeleī. ⁹ Ada ganan tamada tar ado, idi ada madur difada di, anī nigin bobou tafiyēdidig. Anī nigin, ada fatuk bagai neda uur nē Tama farumen tabod ken, mata tabodōf! ¹⁰ Ada tamada tar, sain naal bagai, idi biya kisi difen anī kilei, madur difadan. Anī ere, Negur neda biya fiya nigin, madur fadadig, are ada ī geid fateulouf nigin age fedig. ¹¹ Sain madur fiya ganan bun, wau al fiya to taledig, darau anī taledig. Anī ere, dum, idi darau age fiya bunem madur fiyēdin anidi bun, madur bagai ado wau inosiya nē faat biya wō youf.

¹² Anī nigin, imeī bubur kelediya ado iboreī felu reya megeir weledigouf. ¹³ “Yeī nigin naab tutuk gouf,”† anī bunem, yeī kirorōya to sesen lauf, are biya lediyouf.

Negur Dudum Fiya Nigin Weder Irouya

¹⁴ Tamo ganan geid wauī inosiya bun ubodōg fen, fateulouf nigin kabī total waleg. Fateul sāf are, takam Odug to ilouf. ¹⁵ Taka nem Negur nē wau ifenēya to folo rouf nigin ado, aa faat dirikeī gen to wō ye fen, musei morō ifeneīd fen, amuyē ifenēdiyof nigin lo welegei. ¹⁶ Taka nem noli tobonunā to inouf nigin be, Esau gen Negur nigin kisi sā to ibodōf nigin lo welegei. Esau ī, kesu matu nigin yogon akor fau yalouf anī, sain tekelei nē saaf anī nem na sur fen. ¹⁷ Anī dumen, ā karī gef kilei, ī el fiya enei akorouf nigin oron, anī ere, ī to yalen. Ī inā ado el fiya anī imiren, anī ere, ī wau faleiya nigin naab taka san.

¹⁸ Ā arei eig fiya bun to usigen, arei are kobū fiya kisi feleya, yā balē yef ado, gugum, tubutubuya, uyē yau total ado, ¹⁹ taur ait, ait taka od wogōya nē, are tamo idi ait anī karī de fen, od baban to wogō fiyēdiyof nigin digonen, ²⁰ ere nigin, idi eig ye irokenēdin anī yaleya kisi feleya sā, “Gaar taka arei anī kobū foufeg, meein

* **12:6:** Proverb 3:11, 12 † **12:13:** Proverb 4:26 ‡ **12:20:** Eksodas 19:12, 13

tulu difouf.”† 21 Moses anī ile fen, fatuk bagai kumī ise fen, iron, “Aya kumī tererē auf.”§

22 Anī ere, ā Saion Arei bun, saa ilun nē Jerusalem, are mata ibodōya Negur nē taun usigen. Ā engel mala musei biya al de guru difef bun usigen. 23 Ā, Negur nē kesu matu, idi yeneid saa ilun itoton anidi neid sios bun usigen. Ā tamo ganan nē es fiya Negur bun ado, madur tamo kisi feleya bagai wowā den anidi neid uur bun usigen. 24 Ā, Jesus, bar itenēya mata nē atun tamo bun ado, naud wiri fen, are Abel nē naud wogō yef anī wal fiya od wogō yef anī bun usigen.

25 Lo welegei, are ī wogō yef anī to dudum wog. Idi tenebur ein wedereid iroun ī dudum difiyen idi to diyalelen, ani nigin, ada saa ilunem wederada irouf ī dudum tafouf are, ada iyaleleya nigin malai bagai. 26 Sain anī bun, yogon aitem teneub enei yokū fen, anī ere, gama ī promis od eig ye iron, “Baban aya teneub dogol sã, saa ado yokū afouf.”* 27 Od “baban” yef are ifelnadaf, are ereb ereb inodin yokū fiya kisi feleya anī yokū feid fen, yalelauf, are ereb yokū fiya kisi felya sã anī fau ifarauf nigin age fouf.

28 Ada tano yokū fiya kisi feleya sã anī talem, anī nigin, Negur de tafiye ken, Negur wau al fouf nigin, kumī ado aniniya bunem, Negur seli tabiyouf, 29 ere nigin, neda “Negur ī isaikeleya nē yã.”†

13

Idikeleya Nē Wau Yaleseya Od

1 Abob nigin tureī tar gen, toku wauī laa fouf. 2 Tamo mata urug yalediya nigin to wedereī tu kalauf, tamo tunī age difen are, keleī sa ken, engel gei difedin. 3 Idi kalabus bun difaref anidi, ā idi geid takai kalabus bun ifareya gen, karī wedigouf. Idi to biya difiyēdif anidi, ā morō takai walegef gen, karī wedigouf.

4 Tamo kayau ado bagu fiya nigin, tamo ganan, yana odug an dinouf. Tamo kayau ado bagu fiya nē fatar karētut ibodōf, ere

nigin, Negur ī, idi seseirã tobonunã dinof anidi ado, idi noli tobonunã dinof anidi, es fediyouf. 5 Moni nigin kisi fatuk to unogouf, safina ā adof anī, are eī de gouf, ere nigin, Negur ī iron,

“Aya to bagai atorneīf,
aya to bagai folō ayeikalauf.”*

6 Anī nigin, ada kumī sã torōf,
“Odug ī neu isennēya, aya to kumī auf.
Aya tamom ere naig fiyau?”†

7 Āgenei uyu irouya, Negur nē od wogō diyein anī karī walagauf. Idi naig de dibodok disi di, ereb wō yen anī kisig fen, idi neid momoiya madē gouf. 8 Jesus Kristus ī to falei yedig, nor, gama ado, sain ganan, de agef ibodkeledig.

9 Ā ifelnēya fire fire anim to wewu yeī irouleyeīf. Ada wauda, wau ifenēya anim megeir fouf anī biya, saaf nē lo dō fiya bunem ada wauda to megeir fouf, are idi saaf nē lo dō de doko anidi, anim to isennēdif. 10 Ada alta ado, an pris salafat fateul bun kabī daledig idi, neda alta anī bun yōya nigin kisi feleya sã.

11 Pris mudur, yaro naud anī, mosor nē sesewi fiya Negur ifenēf nigin, Modoū Fateul Bagai bun iledig, yaro bouwa are, fō mayã dumeitur difaleg isaikeledig. 12 Anī nigin, Jesus īg yogon naud bunem, tamo kayau neid mosor yalelauf nigin, taun bobog dumeitur darau faali fen. 13 Anī nigin, ada, ī mama faali fen anī tale fen, fō mayã dumeitur ī gein talauf. 14 Ere nigin, ada, tenebur ein, faimud ibodkeleya nē taun sã, anī ere, ada taun fau isiyouf anī tamirek.

15 Anī nigin, ada toku, Jesus bunem, yana yaleseya nē sesewi fiya, Negur tafenēf, yana yaleseya nē sesewi fiya are, sigoradam Jesus yana kurō tafesif anī. 16 Ereb ereb biya agog fen, abob wenēgouf anī to wedereī tu kalauf, ere nigin, sesewi fiya age fediya anim Negur wau al fedig. 17 Āgenei uyu irouya farumen ubodōg fen, karī wiyēdigouf. Idi ā lo diyēdig, idi dogo neid kabī nigin dum Negur dirokenēf. Idi karī wiyēdigouf, anī bunem, idi neid kabī

§ 12:21: Diuteronomi 9:19 * 12:26: Hagai 2:6 † 12:29: Diuteronomi 4:24 * 13:5: Diuteronomi 31:6
† 13:6: Sam 118:6, 7

morõ sã, wau kulīya ado dalouf, ere nigin, idi morõ ado kabī dalouf are, ã to isenneĩf.

¹⁸ Amã nigin kosẽ gouf. Amã momoi mauf, are amã kisi karêtut ado, amã ereb ereb ganan bun biya age mafouf nigin oromak. ¹⁹ Negur aya ã gein kaisã bagai sur fiyauf nigin, ã kosẽ gouf nigin, fatuk bagai arokeneik.

²⁰ Wau inosiya nẽ Negur ĩ, faimud ibod-keleya bar itenēya nẽ naud bunem, neda Odug Jesus, sipsip lo fiya tamo odug, laa bun tamal kel irousin. ²¹ Wau inosiya nẽ Negur ĩ, Jesus Kristus bunem, yogon oroya dõ gouf nigin ereb ereb biya ganan ã ifenei ken, yogo wau al fouf nigin ada bun kabī yalouf anĩ amã oromak. Negur ĩ bun fula fiya medeīya gai gai ibodõf. Momoi.

²² Turau tar, ã, neu wau yaleseya od anĩ, karĩ gouf nigin, total bagai arokeneik, ere nigin, aya pas tobega dogol atotkenein.

²³ Neda turada Timoti, kalabus bun tamal ulõ yesin anĩ, ã keleĩ youf nigin aya orouf. ĩ kaisã wõ youf are, amã urom ã mailiyeĩf nigin masiyouf.

²⁴ Āgenei uyu irouya ganan ado, Negur nẽ tamo kayau ganan aan wiyēdigouf. Idi Itali temeleid, ã bun, idi neid aanya, sur difeneik.

²⁵ Negur nẽ wau ifenēya ã ganan bun ibodõf.

Jems

¹ Aya Jems, Negur ado Odug Jesus Kristus neid ferfer,

Israel neid ibor tuwelf tenebur ein firagaŕaũ difen bun pas enei atotof.

Aan yeya.

Morõ Bun Ado Kisi Fiya Bun

² Turau tar, ereb sain morõ fire fire walogouf are, ã wauĩ al fiya nigin gouf,

³ ere nigin, ã keleĩ, ãgenei momoiya, kisi fiya bunem, feseya sã ifareya wõ yedig.

⁴ Feseya sã ifareya anĩ tobol ge di, ketẽ yese di, ã atĩyeĩ ken, kisi feleya bagai, ereb taka nigin lau fiya sã wõ gouf. ⁵ Æ taka kisi biya nigin lau fouf, Negur tamo ganan kisi biya nigin lau de fen to difiyẽf

anĩ to ou fiyeĩd fen, wau sã kisi biya kisi feleya ifenẽdidig anĩ to fiyẽf, age fe di, ĩ ifenẽf. ⁶ Anĩ ere, ĩ to fiyẽ fenẽ, ĩ momoi ye fen, to wau uru ouf bagai, ere nigin, taka ĩ wau uru ouf are, ĩ maaĩ moloun wĩya gen, yaum wese fe di, ilef isif fedig gen. ⁷ Tamo age fiya, ĩ Odug bun tamal ereb taka alouf ye fen, to kisi fei. ⁸ ĩ tamo wau uru ado, ereb age fef ganan bun, in wau to dẽ yesiledig.

⁹ Momoiya turada taka ĩ maleg are, ĩ Negur mala bun yogon modoũ ilun nigin wau al fouf bagai. ¹⁰ Anĩ ere, taka safina musei ado, sain Negur ĩ lai fesilnẽf are, ĩ anĩ nigin wau al fouf bagai, ere nigin, ĩ odõ munĩ gen inanakalauf. ¹¹ Gaa ise fen, yogon uruwa nẽ total anim aayũ gariri keledig, age fe di, munĩ tu rel fen, kubũ ye fen, yogon gegẽ meli bagai anĩ inanakalauf. Age fiya gen, tamo safina musei ado ĩg yogon kabĩ yalef ile mog, inanakalauf.

¹² Tamo taka ĩ, morõ bun megeir ifaref ilauf, ĩ el fiyek, ere nigin, ĩ kisi fiya bun ifaren nigin, ĩ mata nẽ teter Negur idi ĩ nigin waud laa fef anidi afenẽdiyof yen anĩ yalouf.

¹³ Kisi fiya isi di, taka nem to irõf, “Negur aya mosor anouf nigin kisi fiyaf.” Ere nigin, Negur ĩ sanem kisi fiyẽya kisi feleya sã, agef fen, inimeg taka mosor inouf nigin

to kisi fiyẽf. ¹⁴ Anĩ ere, mugu mugu ĩ, yogon oroya sanem mala yũ yale di, kisi fiya bun iledig. ¹⁵ Age fe di, bouwa nẽ oroya anim, mosor wau bun kare fe di, mosor gõ fef, mosor anĩ isora le fen, laa gõ fef.

¹⁶ Turau tar oboiyou, to didegneĩf. ¹⁷ Ereb biya ganan ado ege luwa bagai ganan, are ilun tamal, Negur saa ilun nẽ lalan ganan kare fen ĩ bunem isif, ĩ to falei fulu yedig, ĩ buri ilef isif fedig gen to falei yedig. ¹⁸ ĩ, yogon oroya bunem, ada, yogon momoi od bunem yogon gere tar wõ tauf nigin igirnadan, are ada ereb ĩ inodin anĩ ganan bun faat uyulil taka gen wõ tauf nigin age fen.

Karĩya Ado Dõ Fiya

¹⁹ Turau tar oboiyou, enei karĩ wala-gauf: Tamo ganan kaisã bagai karĩ gouf, kaisã to wogõ gouf, kaisã to seye gouf, ²⁰ ere nigin, tamo nẽ wau saneya are, tutuk mata ibodõya Negur orof anĩ to irou isidig. ²¹ Anĩ nigin, ereb ereb amuyẽ ganan ado, sesen ketẽ yesen ganan walelagauf, agog fen, wauĩ yukesileya bunem, od ã namein Negurem itenen, kel yaleyeĩf kisi feleya anĩ walogouf.

²² Æ od ege karĩ dogol ya bunem, to aug bouweĩ udegnẽg. Ereb yef anĩ dõg agog. ²³ Aib taka ĩ od karĩ ye fen, ereb yef anĩ to dõ fef are, ĩ tamo yogo nawa dodo bun ilef gen, ²⁴ ĩ yogo nawa felef, waĩf yale di, kaisã bagai yogo nawa nigin nene yedig gen age fiya. ²⁵ Anĩ ere, tamo ĩ, lo kisi feleya bagai, karika ifenẽdig anĩ bun, el fe felef fen, faimud age fef ile, ereb karĩ yen anĩ to weder tu kel fen, anĩ agei fouf are, ĩ ereb age fef anĩ bun el fiyẽf.

²⁶ Aibem taka ĩ aya momoi auf ye fen, ereb ereb lo irok kilei bagai dõf age fouf, anĩ ere, yogon sigor to fateul inouf are, ĩ yogo idegne ken, yogon momoiya are kaũ sã. ²⁷ Momoiya, Negur ada Tamada karẽtut ado kũ fenẽya sã gen iledig, are eig fiya: maad ado waab, nedi morõ bun kulatun fediya, agef fen, tenebur nẽ oroyam to amuyẽ iroudauf nigin lo feleya.

2

Ã Wauĩ Wenēgef Anĩ Dogol To Lo Walagauf

¹ Turau tar, ā, neda fula fiya medeīya nē Odug Jesus Kristus nigin momoi gef nigin, ā wauĩ wenēgef anĩ dogol to lo walagauf.

² Tamo taka ĩ, āgenei guru fiya bun ima sai gol ado kolos biya ifoun ken, isi di, maleg tamo taka kolos tubu adog namen isiyouf.

³ Ā tamo kolos biya ado anĩ el ge lo weleg fen, “Ogon ibodōya modoũ biya bagai yeir,” ge fen, maleg tamo urokenēgouf, “Ō an ufar,” be “Ō yeu gariyan tenebur ubod,” wiyēgouf are, ⁴ ā atun es ge fen foi gen, agog fen, kisi gariya sane bunem es fiya tamo wō gen.

⁵ Karĩg, turau tar oboiyou! Negur ĩ, tenebur tamo kayau meleid bun maleg anidi momoiya bun kisi feleya bagai wō de di, Negur nē tano ĩ nigin waud laa fedig anidi afenēdiyof yen anĩ, idi akor dalouf nigin to igirnēdin de? ⁶ Anĩ ere, ā maleg anidi anĩ meleĩ irim uledigen. Tamo safineid adodom to lai diyeĩdig de? Idim ā kot bun to guri diyeĩ dirouleyeĩdig de? ⁷ Idim, Kristus yana biya anĩ bunem ā iweigneĩdig anĩ, to yana sane dinodig de?

⁸ Ā, momoi bagai, neda King nē lo, Negur nē Itotoya bun ibodok, “Ō ogo nigin waũ laa fef gen, nē tā nigineg ago waũ laa fouf,”* anĩ dō gouf are, ā biya ago gef. ⁹ Anĩ ere, ā wauĩ wenēgef anĩ dogol lo walagauf are, ā mosor unog fen, lo bunem, ā lo wal fiya tamo wowā gef. ¹⁰ Ere nigin, taka ĩ lo ganan dōf fen, lo tekelei dogol wal fouf are, ĩ lo ganan wal fef. ¹¹ Aib ĩ iron, “Ō seseirā to uno,”† ĩ eig yeg iron, “Ō taka to ukeis.”‡ Ō seseirā to unof, anĩ ere, taka ukesiyouf are, ō lo wal fiya tamo wō wouf.

¹² Idi, lo karika ifenēdidig anim, es fediyouf age fediya gen wogōg fen, dō gouf, ¹³ ere nigin, Negur, es fiya wau yūya sã anĩ, aib wau yūya sã bun inouf. Taka ĩ taka nigin wau yūya ifelnēf are, ĩ es fiya anĩ wal fouf, ere nigin, ĩg Negurem wau yūya ifelnēf.

* **2:8:** Levitikas 19:18 † **2:11:** Eksodas 20:14; Diuteronomi 5:18 ‡ **2:11:** Eksodas 20:13; Diuteronomi 5:17 § **2:23:** Jenesis 15:6

Momoiya Ado Dō Fiya

¹⁴ Turau tar, tamo taka aya momoi auf ye fen, to dōf age fouf, ĩ ere biya age fouf? Momoiya age fiyam tau isennēf?

¹⁵ Turada be mainada taka ĩ, kolos ado saaf naa teke tekelei yōya nē sã. ¹⁶ Ā takam ĩ irokenēf, “Wau inosiya bun ule, aya ō de ailiyok, uruwa wale fen, wō el wo,” age ye fen, ĩ bouwa buru isennēya nigin ereb taka to age fouf, ĩ ere biya age fef? ¹⁷ Naab age fiya bagai, momoiya yogo dogol, dō fiya bunem to isennek, are laa fef.

¹⁸ Anĩ ere, takam irōf, “Taka momoiya ado, taka dō fiya ado.” Kisi age fiya are kũ fenēya.

Ogon momoiya, dō fiya sãf are, naig fe di, aya ō momoiya ado ya anĩ keleĩ youf? Anĩ ere, aya, neu dō fiya bunem, aya momoiya ado ya anĩ afelnōf. ¹⁹ Ō Negur tekelei ibodok ya anĩ momoi wof. Are de! Kaa seseneg age de momoi de fen, kumĩ tererē dedig.

²⁰ Ō neneya bagai, ō momoiya dō fiya sã are, ege bagai ya anĩ keleĩ you fenē de?

²¹ Ada tubuda Abraham yogo naal Isak alta bun Negur sesewi fiyēf nigin age fen bun, ereb ĩ age fen bunem, Negur ĩ madur bagai to fiyen de? ²² Ō, yogon momoiya ado yogon dō fiya bagu de kabĩ dale di, yogon momoiya, ereb age fen anĩ bunem, kisi felen anĩ ulef. ²³ Anĩ bunem, Negur nē Itotoya eig ye irok anĩ kisi felen, “Abraham Negur nigin momoi yen, age fe di, Negur Abraham madur bagai yen,”§ age ye fen, Negur Abraham nigin neu mou yen. ²⁴ Anĩ bun, ō ulef, are tamo ĩ ereb age fef anĩ bunem, Negur ĩ nigin madur bagai yef, momoiya dogol bunem sã.

²⁵ Age fiya bagai, Rahab naab kayau ĩg, kofo fiya tamo gei feid fen, naab taka bunem sur fedin anĩ bunem, Negur Rahab nigin to madur bagai fiyen de? ²⁶ Bouwa uur sã are laa fef age fiya gen, momoiya dō fiya sã are laa fef.

3

Sigoreĩ Kulatun Gouf

¹ Turau tar, ã atun musei tise wowãya nigin to kisi gouf, ere nigin, ã keleĩ, amã tise kabĩ malef, total bagai es famãf. ² Ada ganan naab musei bun kuku taudig. Aib taka ã ereb yef bun to kũ fenēf, ã tamo kisi feleya bagai, yogon bouwa ganan ulum iroukenēya kisi feleya.

³ Ada hos sigorada dō difouf nigin eweid bun ain tobega tanof are, ada hos bou ganan, sã gadi tafiyēf. ⁴ Takag, waag bun kisi gouf. Idi odug bagai fen, yau totolem irouledig, anĩ ere, ulum irouya tamo narib ileya nigin, ulum naal bagai anim waag anĩ narib ileya orof nē irouledig. ⁵ Age fiya bagai, bouwada bun baleda are gai naal bagai, anĩ ere, ã, ereb odudug ã age fef nigin, yogo yana seli yabidig. Dub odug yã ninimam age fe di, uu yedig age fiya gen bagai kisi gouf. ⁶ Baledag ã yã, bouwada ganan atun sane nē teneub. ã tamo oditekei bouwa ganan amuyē ifenēdig, yogon mata ibodok ilauf ganan bun yã irãdig, age fe di, ãg yogo hel bunem isaikalau.

⁷ Gaar fire fire ganan, ninã, gaar luwedim diyōdig anĩ ado, maaĩwō difaref are ganan, maman difiyēdig nigin tamom maman difediyouf. ⁸ Anĩ ere, tamo takam bale maman fiya kisi feleya sã. ã faimud sane fen, laa nē mũ sanem barikã.

⁹ Baledam ada neda Odug ado Tamada yana talesedig, age tafe fen, de anim tamo Negur yogo gen inodin anĩ gelu tafedidig. ¹⁰ Awada tekelei anĩ bun tamal, yana yaleseye ado gelu fiya wō yedig. Turau tar, anĩ to agef ilauf bagai. ¹¹ Maaĩ naan ado naan maug, warur tekelei bun tamal wōya kisi feleya de? ¹² Turau tar, aa fig, aa oliv faat imaya kisi feleya de? Aa wain, aa fig faat imaya kisi feleya de? Age fiya gen, maaĩ naan, warur bun tamal, naan maug wōya kisi feleya sã.

Tenebur Nē Kisi Biya Ado Negur Nē Kisi Biya

¹³ ã atun taka, kisi biya ado fen, kisi fokō feleya adouf are, ã yogon tobonunã biya bunem, wau yukesileya kisi biya bunem isif anĩ bun, dō fiya bunem anĩ yaorouf.

* 4:6: Proverb 3:34

¹⁴ Anĩ ere, ã āgenei wauĩ bun, kiyeĩ makik ado, aya aya yeya adouf are, ã yeneĩ to waleseg fen, aya kisi biya ado gouf. Ago gouf are, ã udegēg fen, momoi nē od anĩ to dō gouf. ¹⁵ Yeneĩ yaleseye nē kisi age fiya, saa ilunem to isif, anĩ ere, are tenebur tamal, bouwa nē oroya nē, Satan bun tamal. ¹⁶ Ere nigin, kiyeĩ ado aya aya yeya ibodok nē an, ekul fiya ado ereb ereb sane ganan ibodok.

¹⁷ Anĩ ere, kisi biya saa ilunem isif are, uyulil karētut, age fe di, maror nigin wau laa fiya, molol, abob karĩ fiyēya, wau yūya barikã ado, faat biya yūya, anĩ kinau ya sã ado, mala yaleya sã. ¹⁸ Maur gudū fiya tamo ã maror bun itenek, ã madur bagai anĩ kusu fedig.

4

Negur Farumen Ubodōgouf

¹ Erem age fe di, kusīya ado monēya ã atun ibodok? Are āgenei oroya ã namein kusī yedig anĩ bunem to wō yedig de? ² ã ereb oroyeik, anĩ ere, to walegedig. Anĩ nigin, ã safineid adodo udenkesig fen, ereb ereb yalekenēdiya nigin kisi gedig. ã ereb oroyeik, anĩ ere, yaleya kisi feleya sã. Anĩ nigin, ã monēg fen, kusī gedig. ã to walegedig, ere nigin, ã Negur to, to wiyēgedig. ³ Sain ã to gef bun, to walegedig, ere nigin, ã wauĩ bun tutuk sa ken, to gedig, ã ereb walegef are aug naumeĩ nigin ge fen, iraleya nigin ago gedig.

⁴ ã gai de, tamo kayau seseirã dinodig gen! ã tenebur nē oroya ado bagu gouf are, Negur kiwai wenēgef anĩ ã keleĩ sã de? Taka ã tenebur nē oroya ado bagu fouf are, Negur nē kiwai tamo wō youf. ⁵ ã kisi gef, Negur nē Itotoya ã gariya sã, “Uur ada namedan ibodōf nigin inon anĩ kiyeĩ total bagai ifenek,” yef de? ⁶ Anĩ ere, Negur ã wau ifenēya mugi bagai ada ifanadadig. Anĩ nigin, Negur nē Itotoya eig ye irok, “Negur ã, dogo yeneid dalesef anidi kiwai ifeneĩd fen, waud dukesil dibodok anidi wau ifenēdidig.”*

⁷ Age fiyauf are, aug Negur farumen ubodōgouf. Satan wal fiya nigin teĩbir gouf, ago ge di, ĩ ā folō yeikalau. ⁸ Negur wagen usig len, ĩ ā wagein isiyouf. Mosor adodo ā, imeĩ kulo gouf, kisi uru adodo ā, kisi tenebur ein nē oroya bun unogef anĩ utorōg fen, kisi ganan Negur bun dogol unogouf. ⁹ Wauĩ gudūf, maruĩ isi fen, inā walogouf. Kasāya utorōg fen, wauĩ gudū fouf, wauĩ kulīya utorōg fen, wauĩ morōf. ¹⁰ Odug mala bun wauĩ ukesileg, ago ge di, ĩ ā yalesneĩf.

¹¹ Turau tar, ā abob, ō sane to wiyēg. Taka ĩ, tura, ō sane fiyek be, es fiyek, ĩ lo are sane ye fen, lo es fiyek. Ā lo es wiyēgouf are, ā lo dō fiya tamo sã, anĩ ere, ā lo nē marau gen wowāg fen, ā aug tamo es wiyēgedif. ¹² Lo ifenēya ado es fiya tamo, de tekelei dogol ibodok, ĩ yogo kel yaleya ado daũ feleya kisi feleya. Anĩ ere, ā ere anĩ neĩ tã es wiyēgouf?

Nil Nigin Yana Yaleseya

¹³ Gama karĩ gouf, ō aib urōgedig, “Gama be nil, amã fau taun enei be anĩ bun mele, an yar tekelei mabod, bisnis mano fen, moni malouf,” gedig. ¹⁴ Anĩ ere, āgenei mata are nil naig fe ilauf anĩ, ā keleĩ sã. Āgenei mata are ere? Ā ogou sain naal bagai wō ye fen, iwaikedig gen. ¹⁵ Anĩ nigin, ā eig gouf, “Odug orouf are, amã mabod ken, enei be anĩ age mafouf,” gouf. ¹⁶ Anĩ ere, ā agog wauĩ fã ye di, yeneĩ walesegedig. Yana yaleseya age fediya ganan are sane. ¹⁷ Age fiya nigin, taka ĩ biya nigin kelei ken, age fiya kisi feleya anĩ to age fouf, ĩ mosor inouf.

5

Safina Musei Adodo Bun Weder Irouya

¹ Gama karĩ weleg, ā safina musei adodo, morō odug ā bun isif anĩ nigin maruĩ isi fen, inā walogouf. ² Āgenei safineĩ bura le di, dedek āgenei kolos dakasin. ³ Āgenei gol ado silwa maat te yun. Dogo neid maat te anim, ā nigin kiwai od wogō ye fen, yã nem gen āgenei bouweĩ yakasiyouf. Ā gamag idikeleya sain mog, safina kuru gen. ⁴ Ulegef! Kabĩ tamo āgenei kabier kusu fiya nigin oroi

dilen anĩ to na waledigen nigin, na yaleya nē wareg ā to wenēdigen anim, ā nigin kaĩ ye fen, iron. Age dife di, oroi tamo aiteid, Odug saa ilun nē kusĩ tamo guri feid uyu iroudig anĩ, wederen ilen. ⁵ Ā tenebur ein ereb ereb biyai biyai ado ubodōg fen, bouweĩ sigigi gen. Ā idenkesiya nē naa nigin bouweĩ gigiru unogen. ⁶ Ā, idi mosor sã, kiwai to difenein anidi, bouweid ũg fen, udenkesigen.

Darau Bun Feseya Sã Ifareya

⁷ Anĩ nigin, turau tar, to fese gef uleg, Odug nē isiya sain wō youf. Saaf kabĩ yaleya tamo, teneub bun saaf biya bagai wō youf nigin, naig fe tarif fen, uyē uruwan isif ile idikeledig anĩ atun, naig fe feseya sã tarif fen, kabĩ yaledig anĩ uleg. ⁸ Āg, to feseg fen, total ufaragouf, ere nigin, Odug isiya nē naa are mogo melsak. ⁹ Turau tar, abob to nauseir wiyēg, abob nauseir wiyēgouf are, es fiya ā bun isiyouf. Es fiya tamo mogo bobogē ifaref!

¹⁰ Turau tar, profet Odug nē yana bun wogō den anidi, darau bun feseya sã difaren gen āg ago gouf. ¹¹ Ā keleĩ, ada idi feseya sã difaren anidi el fedif taudig. Ā Job naig fe feseya sã ifaren anĩ karīg fen, dum Odug ĩ bun ereb naig fen are ulegen. Age fiya gen, Odug ĩ wau ifenēya ado wau yūya barikã.

¹² Anĩ ganan wal fiya, turau tar, ā wauĩ kuturol fen, saa ilun bunem, tenebur bunem be, ereb taka bunem od to megeir wogouf. Āgenei yoya are de yo dogol gouf, āgenei sãya are de sã dogol gouf. To dō gouf are, es fiya bun ufaragouf.

Momoiya Bunem Kosēya

¹³ Ā atun taka ĩ morō bun ibodok de? Age fouf, ĩ kosē youf bagai. Ā atun taka wau al fef de? Age fouf, ĩ yana yaleseya nē seg yalediyouf. ¹⁴ Ā atun taka dagi ado de? Age fouf, ĩ sios nē mudur adodo ĩ nigin kosē de fen, Odug yana bun ĩ mudur bun moul fi difalauf nigin iwegnēdiyof bagai. ¹⁵ Age fe di, momoiya bunem kosē def anim dagi tamo el fiyēdig. Odug ĩ yalesneĩf. ĩ mosor inon ouf are, in mosor nigin weder tu kalauf. ¹⁶ Anĩ nigin, āgenei

mosor nigin abob mala bun kurō wesig fen, abob nigin kosē ge di, ā karika wal-ogouf. Madur tamo nē kosēya are megeir ado fen, kabī yaledig.

¹⁷ Eliya ī tamo ada gen taka. Ī uyē to isiyouf nigin total bagai kosē ye di, tenebur ein yar towo ogō sigis uyē to isin.

¹⁸ Ī baban kosē ye di, saa ilunem uyē isin, age fe di, tenebur nē saaf wowā yen.

¹⁹ Turau tar, ā atun taka, momoi nē naab kū fen ken, fasikor fel, meteig ile di, takam ī momoi nē naab bun kel irousyouf are,

²⁰ enei karī gouf, aibem taka ī mosor tamo yogon kū fenēya nē delē bun tamal falei fiyek are, yogon malakanon laa bun tamal kel yale fen, mosor musei ganan nigin weder tu keleya anī irou isif.

1 Pita

¹ Aya Pita, Jesus Kristus nē aposel, Negur igrnēdin anidi, tenebur ein yaū tamo gen Pontus, Galesia, Kapadosia, Asia ado, Bitinia provins firagagaū de difaref anidi bun pas enei atotof. ² ã, ereb wōya sã mog, Negur Tamada nē keleī biya kilei igrneī di, Awa Uur nē kabī bunem fateul wō gen, anī bunem, ã Jesus Kristus sigor dōg fen, yogon naud ã tetein wiri fen.

Wau ifenēya ado wau inosiya ã bun barikāf.

Mata Ibodōya Wau Iseya Nigin Negur Yana Yaleseya

³ Negur, neda Odug Jesus Kristus nē Tama yana talesauf! Yogon wau yūya odug bun, Negur ī Jesus Kristus laa bun tamal kel fã yen bunem, ada mata gō fadan, are ada mata ibodōya wau iseya bun tele fen, ⁴ yogon akor, inanakeleya, bura leya be, sa keleya kisi feleya sã, ã nigin saa ilun dodok fen anī bun ta-lauf nigin age fen. ⁵ Momoiya bunem, ã Negur nē megeir anim kulatun yeik ile, kel yaleya, idikeleya sain bun yaor foug nigin dodok fef anī, isiyouf. ⁶ Anī nigin, gama sain naal bagai, ã morō fire fire anī bun wauī morō yeīdigeg, ã fatuk bagai wauī kulī yef. ⁷ Morō eneidi ã bun isin are, āgenei momoiya, gol yã nem difalegefeg, sa keledig anī wal fiya wō ye fen, āgenei momoiya anī, momoiya bagai yaore di, Jesus Kristus wō youf sain bun, yana ifenēya, fula fiya medeīya ado, yana yaleseya walogouf nigin agef isin. ⁸ ã ī to ulegen, anī ere, ã ī nigin wauī laa fef. ã gama ī to ulegef, anī ere, ã ī nigin momoi ge fen, wauī kulīya dir feleya kisi feleya sã ado fula fiya medeīya anim aura yeik, ⁹ ere nigin, ã āgenei momoiya nē kaū, āgenei meleīkanon kel yaleya anī mogo walegef.

¹⁰ Kel yaleya enei nigin, profet idi wau ifenēya ã bun isin anī nigin wogō den anidi, fatuk bagai el de dimir ken, ¹¹ Kristus nē Uur idi bun ibodon anī, Kristus nē darau ado anī dumen isiyouf

nē fula fiya medeīya nigin profet od wogō yen sain bun, ī ere nigin ado ereb sain nigin wogō yen anī, idi keleī youf nigin age difen. ¹² Awa Uur Fateul saa ilunem sur fen anī bunem, soosi tamo idi biya od wogō diyein anim ereb wogō diyein, are engeleg dilouf nigin total bagai orodif anī nigin, profet idi wogō den sain bun, idi dogo nigin sã, ã nigin aruna dalen anī, idi bun yaor fen.

Fateul Ubodōgouf

¹³ Anī nigin, dō fiya nigin āgenei kisi dodok gouf. ã aug nigin biya kulatun gouf. Jesus Kristus yaor foug sain bun, wau ifenēya ifeneīf anī nigin āgenei wauī iseya barikāf. ¹⁴ Gere tar dō fiya biya gen, sain ã neneya bun ubodōg fen, oroya sane ã walegen anī to dō gouf. ¹⁵ Anī ere, Negur ã iweignein, ī fateul ibodok gen, ereb ã ago gef ganan bun fateul ubodōgouf, ¹⁶ ere nigin, Negur nē Itotoya eig ye irok, “Fateul ubodōg, ere nigin, aya fateul abodok.”*

¹⁷ ã, Dei anī kinau ya bunem tamo mugu mugu nē kabī to es fedig ī, uweignēgef, anī nigin, ã tenebur ein yaū tamo gen, kumī ado aniniya anī bun, āgenei mata ubodōgouf. ¹⁸ Ere nigin, ã keleī, ã, mata ibodōya kaū sã, tubuī tar bunem walegen anī bun tamal kel yaleyen, are silwa be gol age fediya gen, ereb bura lauf anī bunem sã, ¹⁹ anī ere, Kristus, sipsip naal amuyē sã, gerī tō fiya taka sã anī nē naud biya bagai anī bunem kel yaleyen. ²⁰ Negur ereb ereb ganan kare fiya sã mog, ī igrnen, anī ere, ã nigin idikeleya sain enei bun ī yaor fen. ²¹ Kristus bunem, ã, Negur Kristus laa bun tamal kel turī fiye ken, fula fiya medeīya ifenen ī nigin momoi gen, anī nigin, āgenei momoiya ado wauī iseya Negur bun ibodok.

²² ã gama momoi anī dō fiya bunem, aug nigin lilik ge fen, tureī tar nigin wauī laa fiya bagai walegen nigin, abob nigin fatuk bagai wauī bun wauī laa foug. ²³ Ere nigin, ã bura leya nē faat bunem sã, to bura leya nē faat bunem baban gō yein, are Negur nē od mata ibod ken, faimud

* **1:16:** Levitikas 11:44, 45; 19:2; 20:7

ibodkeleya anī bunem age fen. ²⁴ Are
Negur nē Itotoya eig ye irok kilei,
“Tamo ganan fisir gen,
 agef fen, dogo neid fula fiya medeīya
 ganan kabier odō munī gen.
Fisir gariri keleid fen, munī kuku redig,
²⁵ anī ere, Odug nē od faimud ibod-
 kalauf.”†
Od enei are ā wogō yein.

2

¹ Anī nigin, sane ganan, idegēya ganan,
mala yaleya, kiyeī ado, dumen od irōya
ganan urailagauf. ² Momou mata gō
fediya gen, uur nē sumin karētut nigin
fatuk bagai oroyeīf, ago ge di, ā anī bunem
āgenei kel yaleya bun odugouf. ³ Gama ā,
Odug ī biya yeya anī, mogo wōg ulegen.

*Mata Ibodōya Meein Ado Tamo Kayau
Negurem Igirnēdin*

⁴ Ā, ī mata ibodōya Meein, tamom
dudum difiyen, anī ere, Negurem igrne
ken, Negur mala bun biya bagai wō yen
anī bun usig fen, ⁵ āg, mata ibodōya meein
gen, uur nē fō inoyeī di, pris fateul wōg
fen, Jesus Kristus bunem uur nē sesewi
fiya Negur mala bun biya anī wenēdigouf.
⁶ Are Negur nē Itotoya eig ye irok kilei,
“Lo weleg, aya Saion oun meein taka,
 monog tor aya agirnen, biya bagai anī
 anof,
age afe di, taka ī, ī nigin momoi yef,
 ī mama to bagai yalouf.”*

⁷ Momoi gef ā bun, meein enei are biya
bagai. Anī ere, idi to momoi def anidi bun,
“Meein fō inoya tamom sane de fen, di-
toron anī,
 gama monog tor wō yen.”†

⁸ Agef fen,
“Ī, tamo yeid tū fiya nē meein wō ye fen,
 idi kuku douf nē sa tuwa anī wō yen.”‡
Idi yeid tū fef, ere nigin, idi od anī to dō
difef, areg Negurem idi age difouf nigin
igirin.

⁹ Anī ere, ā tamo kayau Negurem
igrnein, king nē pris, teneub fateul, Negur
nē tamo kayau wowā gen, are ī ā gugum
bun tamal iweignei ken, yogon lalan biya

bagai bun irouleyein anī nē yana, ā wale-
sagauf nigin, agog wō gen. ¹⁰ Uruwa bun,
ā Negur nē tamo kayau sā, anī ere, gama ā
Negur nē tamo kayau. Uruwa bun, ā wau
yūya to walegen, anī ere, gama ā mogo
wau yūya anī walegen.

¹¹ Turau tar oboiyou, aya ā tenebur ein
yaū tamo ado urug tamo gen anī, mosor
nē oroya meleīkanon geid kušī yedig anī
so wiyēgouf nigin, totol bagai arokeneik.

¹² Ā haiden atun tobonuneī biya bagai bun
ubodōge di, idi ā nigin sane ago gedig
dedig anidi, āgenei tobonuneī biya anī dile
fen, Negur ada ki fadauf sain bun, idi
Negur yana dalesauf.

*Uyu Iroudiya Ado Odudug Farumen
Ibodōya*

¹³ Ā aug Odug nigin ge fen, megeir ganan
tamo atun inodin anī farumen ubodōgouf,
are king megeir ilun bagai ī farumen be,
¹⁴ gawaman nē mudur adodo idi, tamo
sane age difef anidi darau difenēdiyof ni-
gin ado, tamo tutuk age difef anidi yeneid
dalesauf nigin, Negurem sur fedif anidi
farumen ubodōgouf. ¹⁵ Ere nigin, ā ereb
biya ago gef bunem, kisi neneya tamo neid
neneya wogōya anī foro dalauf, are Negur
nē oroya. ¹⁶ Tamo kafī fiya sā ubodōgouf,
anī ere, āgenei kafī fiya sā anī sane kerub
fiya nē kabī bun to unogouf. Negur nē
ferfer ubodōgouf. ¹⁷ Tamo ganan anini
wiyēdigouf. Momoiya tureī tar nigin wauī
laa fouf. Negur kumī ado anini wiyēgouf.
Agog fen, king anini wiyēgouf.

¹⁸ Ferfer ā, aniniya ganan ado āgenei
odudug farumen ubodōgouf, idi biya fen,
waud yūdig anidi dogol farumen sā,
idi wau morō difeneīdig anidig farumen
ubodōgouf. ¹⁹ Ere nigin, tamo taka ī gariya
sā darau yalef sain bun, ī Negur nigin kisif
fen, darau nē morō anī faali fouf, are biya.
²⁰ Anī ere, ā mosor unogen nigin wagī fiya
waleg fen, morō faali gouf are, ā bun ere
biya anī isiyouf? Anī ere, ā ereb biya ago
gen nigin darau waleg fen, anī faali gouf
are, enei are Negur mala bun biya. ²¹ Enei
bun ā iweignein, ere nigin, Kristus ā nigin

† 1:25: Asaia 40:6-8 * 2:6: Asaia 28:16 † 2:7: Sam 118:22 ‡ 2:8: Asaia 8:14

darau yalen, are āg ī uleg fen, yogon delē anī dō gouf nigin age fen.

²² “Ī mosor taka to inon, age fe di, yogon sigor bun idegēya taka to dilen.”

²³ Sain idi ī kono difiyen, ī idi to solo fedin. Sain ī darau yalen, ī kumī to ifenēdin. Age fiya ban, ī yogo Negur tutuk es fedig ī ima bun inon. ²⁴ Neda mosor ī yogo bouwam aa tetek bun faali fen, are ada mosor bun gare tau fen, madur bagai bun mata tabodōf nigin age fen. Yogon gudū fiyam ā el yein. ²⁵ Ā sipsip gen fō yeleyan ulegen, anī ere, gama ā sipsip marau, āgenei meleīkanon nē lo fiya tamo bun keg usigen.

3

Kayau Aiweid Tar Geid

¹ Kayau ā, age fiya bagai, aiweī tar farumen ubodōgouf, ago ge di, aib idi biya od nigin to momoi defeg, idi irokenēdiya bunem sā, nedi kayau tar neid tobonuneid bunem kel yalediyouf, ² are idi āgenei tobonuneī karētut ado aniniya anī dile fen, momoi douf. ³ Āgenei meli meli, mayarē naki anī, fatiya korif ifōya, gol sai ifonūya be, kolos biya ifonūya age fediya bunem to isiyouf. ⁴ Age fiya ban, āgenei meli meli, ā namein uur molol ado imatēya anī nē meli meli to inanakalauf, are Negur mala bun odug bagai anī bunem isiyouf. ⁵ Naab enei bun, fateul kayau kulu temeleid idi, Negur bun waud dinon anidig, dogo nigin meli bagai wowā douf nigin age difedig. Idi dogo neid aiweid tar farumen dibodōdig. ⁶ Sara ī Abraham sigor dōf fen, ī nigin yogon odug yedig gen, ā ereb madur agog fen, kumī farumen to ubodōgouf are, ā ne barai tar wowā gef.

⁷ Tamo āg, age fiya bagai, aiweī tar geid ubodōg fen, idi nigin kisi gouf, are idi forōya nigin tamo wal fiya sā, idi dum mata ibodōya nē ege luwa wau ifenēya, ā weim walogouf nigin, aniniya ado ago wiyēdigouf, ago ge di, āgenei kosēya, ereb takam to naabura gudū fouf.

Biya Age Fiya Nigin Darau Yaleya

* **3:14:** Asaia 8:12

⁸ Od idīya nigin, ā ganan abob geid wauī tekelei bun ubodōgouf. Abob nigin wauī ūgouf. Tureī tar gen abob nigin wauī laa fouf. Wauī yūya ado wauī yukesileya bun ubodōgouf. ⁹ Sane anī sane bunem be, kono fiya anī kono fiya bunem to solo gouf, anī ere, el fiya bunem solo gouf, ere nigin, ā ago ge di, el fiya anī walogouf nigin, ā enei bun iweignein. ¹⁰ Are Negur nē Itotoya eig ye irok kilei,

“Aib ī mata nigin wau laaf fen,
naa biya ilouf,

ī yogo bale sane wogōya bun tamal so fiye ken,
yogon sigor idegēya wogōya bun tamal so fiyēf bagai.

¹¹ Ī sane itor ken, biya age fouf bagai.

Ī maror imir ken, anī dō fouf bagai.

¹² Ere nigin, Odug nē malam tamo madur bagai lo fedidig,
agef fen, yogon weder dogo neid kosēya anī karī yedig.

Anī ere, Odug nē nawa, idi sane age difef anidi bun dudum fiyēdidig.”

¹³ Ā biya age fiya nigin kabī total walogouf are, aim anī ā sane yeīf? ¹⁴ Anī ere, ā ereb madur nigin darau walogoufeg, ā el yeik. “Ereb idi kumī def anī to kumīg, to morō yeīf.”* ¹⁵ Anī ere, āgenei wauī bun Kristus ī Odug unogouf. Idi wauī iseya ā namein ibodok anī nē gariya karī douf nigin to diyeik anidi ganan solog urokenēdigouf nigin, faimud dodok gouf. Anī ere, molol ado aniniya bunem enei agog fen, ¹⁶ kisi karētut walogouf, ago ge di, idi Kristus bun āgenei tobonuneī biya nigin od sane wogō def anidi, dogo neid dumen od wogōya nigin mama fediyouf. ¹⁷ Biya age fiya nigin darau yaleya, are Negur nē oroyauf, enei are, sane age fiya nigin darau yaleya anī wal fiya, are biya bagai youf. ¹⁸ Kristus ī, sain tekelei dogol, mosor nigin laa fen, ī madur tamo anī, idi madur sā tamo nigin laa fen, are ī, ā Negur bun irouleyeīf nigin age fen. Ī bouwa dukesin, anī ere, Awa Uur bunem mata ibodon. ¹⁹ Awa Uur bunemeg ī ile fen, uur kalabus bun dibodon anidig wogō

fiyēdin. ²⁰ Eneidi are, kulu Noa nē sain bun, waag ifot mog, Negur idi nigin feseya sā tari fedidig, anī ere, idi fe den. Waag anī namen, tamo kayau musei sā, ganan eit dogol naan bunem kel yaledin. ²¹ Naan enei are, naan igūya, gama Jesus Kristus nē mata kel fāya bunem āg kel yaleyeik anī nē malakanon, are bouwa bun amuyē yaleleya sā, are Negur bun kisi karētut biya inoya. ²² Jesus Kristus ī saa ilun isel fen, Negur ima biyalē ibodok, age fe di, engel, yeneid adodo ado, megeir ganān ī farumen dibodok.

4

Negur Nigin Mata Ibodōya

¹ Anī nigin, Kristus ī yogo bouwa bun darau yalen nigin, ā augeg yogon kisi de tekelei anī urougauf, ere nigin, taka ī yogo bouwa bun darau yalen, ī mosor inoya nigin folō felen. ² Agef fen, ī tenebur ein yogon mata ibodōya fau ibodok bun, tamo bouwa nē oroya nigin to mata ibodōf, anī ere, Negur nē oroya nigin mata ibodōf. ³ Ā kulu sain meluk bagai, ereb haiden age difedig anī, ago gedig, idi bouwa nē oroya nigin total sane wau fāya, noli kisi, aai yōya, bilāya, mala odug bun naan yōya ado, idegēya waitou yana yaleseya sane bagai bun dibodōdig. ⁴ Ā idi geid, idi sane bagai age difedig anī bun to ulege di, idi anī dile fen, terē def, age de fen, idi ā nigin od sane wogō def. ⁵ Anī ere, idi, Negur idi mata dibodok anidi ado idi gare den anidi es fediyouf nigin dodok fef ī bun, dogo nigin kurō difeis dirokenēf. ⁶ Enei nigin, biya od anī, idi gama mogo gare den anidig wogō fiyēdin, are idi bouweid bun, tamo gen es feid fen, dogo neid uur bun, Negur mata ibodok gen mata dibodōf nigin age fen.

⁷ Ereb ereb ganān nē idikeleya naa mogo melsak. Anī nigin, ā kosē gouf nigin, kisi el ge waleg fen, aug nigin biya kulatun gouf. ⁸ Anī ganān wal fiya, abob nigin fatuk bagai wauī laa foug, ere nigin, wau laa fiya are mosor musei kerub fedidig. ⁹ Nauseirya sā, abob el ge waledigouf. ¹⁰ Ā

mugu mugu, Negur bunem ege luwa walegen anī bunem, Negur nē wau ifenēya fire fire nē lo fiya tamo dō fiya biya gen, abob aruna walogouf. ¹¹ Aib taka ī od wogō yef, ī Negur nē od bagai wogōya gen wogō youf. Aib taka ī aruna yalef, ī megeir Negur ī ifenek anī bunem age foug, are ereb ereb ganān bun, Jesus Kristus bunem, Negur yana dalesauf nigin age foug. Ī bun fula fiya medeīya ado megeir gai ibodkalauf. Momoi.

Momoiya Tamo Ibodōya Nē Darau

¹² Turau tar oboiyou, ā darau yā isaīneī geneg gama walegef anī nigin, ereb urug ā bun wōya gen to terē gouf. ¹³ Anī ere, ā Kristus geid darau walegef nigin wauī kulī youf, ago ge di, ā yogon fula fiya medeīya anī yaor foug sain bun, wauī fatuk bagai kulī youf. ¹⁴ Ā Kristus yana nigin de fen, kono diyeīf, ā el yeik, ere nigin, fula fiya medeīya nē Awa Uur, are Negur nē anī ā bun ibodok. ¹⁵ Ā darau walogouf, are tamo yukesiya tamo, bē tamo, tamo tobonunā sane fire fire dinodig be, baula fiya tamo, nedi darau gen sāf. ¹⁶ Age fiya ban, ā momoiya tamo nigin darau walogouf are, ā to mama yeī, anī ere, ā Negur yana anī urougef nigin ī yana walesagauf. ¹⁷ Ere nigin, sain eī, Negur nē ibor bun, es fiya gariya inoya nē. Es fiya anī ada bun gariya inof are, idi Negur nē biya od to dō difedig anidi bun ere anī wō youf? ¹⁸ Are Negur nē Itotoya eig ye irok kilei,

“Madur tamo kel yalediya nigin malai bagai youf are, tamo momoiya sā ado mosor temeleid nigin ere anī wō youf?”*

¹⁹ Anī nigin, idi Negur nē oroya bunem darau dalef anidi, idi dogo, Negur kare fedin yogon od dō fiya biya, ī ima bun dino fen, toku ereb biya anī age difef dilauf.

5

Sios Nē Uyu Iroudiya Ado Kesu Oosi Bun

¹ Sios nē uyu irouya ā atun dibodok bun, aya, uyu irouya tureī, Kristus nē darau ail fen, kurō afesidig ado, fula fiya

* 4:18: Proverb 11:31

medeïya fau yaor foug weim talouf anï, ã arokeneik. ² Negur nẽ sipsip ã farumen dibodok anï nẽ lo fiya tamo wõg fen, kabï mala nigin ge fen to lo wedigouf, anï ere, ã wauï iro ken, Negur ã ago gouf nigin orof kilei lo wedigouf. Moni nigin ge fen, to ago gouf, anï ere, aruneid yaleya nigin bagai fen, ago gouf. ³ Idi ã gem lo wedigouf nigin inodin anidi to nugo wiyëdigouf, anï ere, ã sipsip dileyei ken, dõ diyeïf nẽ tobonuneï bun ago gouf. ⁴ Agog mog, sipsip lo fiya tamo neid mudur wõ youf sain bun, ã fula fiya medeïya nẽ teter to bagai tu ralauf anï walogouf.

⁵ Age fiya bagai, kesu oosi ã, biyeid uyu irouya farumen ubodõgouf. Æ ganan, abob nigin wauï yukesileya anï ufonõgouf, ere nigin,
 “Negur ï yeneid dalesef anidi kiwai gen iledidig,
 anï ere, ï waud yukesileya anidi wau ifenëdidig.”*

⁶ Anï nigin, Negur nẽ ima megeir barikã farumen wauï ukalaisileg ubodõgouf, ago ge di, ï ã yogon sain bun yalesneïf. ⁷ Ægenei suwëya ganan ï bun unogouf, ere nigin, ï ã nigin suwë yedig.

⁸ Æ aug nigin biya kulatun ubodõg fen, lo walagauf. Ægenei kiwai, Satan ï laion ninirã ye fen, taka yakasiyouf nigin mumul katï fedig gen, age fedig. ⁹ Momoiya bun total ufareg fen, ï wal fiya nigin teïbir gouf, ere nigin, ã keleï, ã tureï tar teneub ganan bun, darau de tekelei age fiya anï daledig.

¹⁰ Ago ge di, wau ifenëya ganan nẽ Negur ï, ã Kristus bun, yogon fula fiya medeïya faimud ibodkeleya bun iweignein ï, ã sain naal darau walege di, ï yogo baban yalesnei ken, ã kisi feleya bagai total, megeir ado, feseya sã wõya nigin age foug. ¹¹ ï bun megeir gai gai ibodkalauf. Momoi.

Idikeleya Nẽ Aanya

¹² Sailas, ï aya turau dõ fiya biya gen kisi afedig, in isennëya bunem, aya ã tobega bagai atotkenein, anï bunem, aya ã wauï ales fen, enei ã gama walegef anï momoi

* 5:5: Proverb 3:34

bagai Negur nẽ wau ifenëya au fen, kurõ afesin. Anï bun total ufaragauf. ¹³ Sios Babilon ibodok, ï ã geid weim igirnein, ï ã bun yogon aanya sur fef, age fe di, neu kesu Mak ïg age fef. ¹⁴ Wauï laa fiya bunem, abob umã wiyëg fen, aan gouf. Æ Kristus bun ufaregef anï ganan bun, wau inosiya ibodõf.

2 Pita

¹ Aya Simon Pita, Jesus Kristus nē ferfer fen aposel,

idi neda Negur ado Isennadaya, Jesus Kristus nē madur bagai bunem momoiya meli bagai neda gen dalen anidi bun, pas enei atotof.

² Ā, Negur ado neda Odug Jesus nigin keleī bunem, wau ifenēya ado wau inosiya ā bun barikāf.

Negur Ī Ada Yogon Igirnadan

³ Negur ĩ yogon fula fiya medeīya ado biya bunem iweignadan, ada ĩ nigin keleī bunem, ada Negur nē oroya bun mata tabodōf nigin, ereb lau tafef anī ganan yogon megeir anim ifanadan. ⁴ Enei bunem, ĩ ada yogon promis od, odug fen meli bagai andi ifanadan, are anī bunem ā Negur nē tobonunā bun bagai ufareg fen, bouwa nē oroya sanem teneub ganan daū fen anī utorōgouf nigin age fen.

⁵ Age fiya nigin, āgenei momoiya bun, biya anī tobol fiya nigin kabī total walogouf, agog fen, biya bun, keleī tobol fiya nigin, ⁶ agog fen, keleī bun, aug nigin biya kulatun ibodōya tobol fiya nigin, agog fen, aug nigin biya kulatun ibodōya bun, feseya sā ifareya tobol fiya nigin, agog fen, feseya sā ifareya bun, Negur nē oroya bun ibodōya tobol fiya nigin, ⁷ agog fen, Negur nē oroya bun ibodōya bun, abob geid nigal yūya tobol fiya nigin, agog fen, abob geid nigal yūya bun, wau laa fiya tobol fiya nigin kabī total walogouf. ⁸ Ere nigin, ā tobonunā enei ganan waleg fen, tobol gouf are, ā neda Odug Jesus Kristus nigin keleī yaleya bun kabī biya kaū ado walogouf. ⁹ Anī ere, taka ĩ eneidi taka to yalouf, ĩ melsā nigin dogol ileyā kisi feleya fen, mala ifofakeleya, agef fen, ĩ yogon mosor kulu tamal bun tamal lilik fiyekelen anī weder tu kelen.

¹⁰ Anī nigin, turau tar, Negurem ā iweignei ken, igirnein anī tutuk bagai keleī youf nigin, kabī total walogouf. Ere nigin, ā enei ago gouf are, ā to bagai kubū

gouf. ¹¹ Ago ge di, ā, neda Odug fen Isennadaya, Jesus Kristus nē tano mata gai ibodkeleya bun, ileyā nigin lakī fiya taka to ibodōf.

Negur Nē Itotoya Nē Profet Od

¹² Anī nigin, ā enei nigin kelei ken, momoiya ā gama ado anī bun total ufaregef, anī ere, aya enei nigin kisi gouf nigin, faimud wedereī fokō afouf. ¹³ Aya kisi afef, aya bouwau enei nē salafat bun abod mog, āgenei kisi turī afouf, are tutuk, ¹⁴ ere nigin, aya mogo, neda Odug Jesus Kristus kurō feis irokanan nigin, aya keleī, aya mogo melsā yerin awaikalauf. ¹⁵ Anī nigin, aya ā atorneī mog, ā faimud enei karī walagouf nigin kabī total alouf.

¹⁶ Amā, neda Odug Jesus Kristus nē megeir ado isiya nigin ā marokenein sain are, amā nemā kisim tamo nē nenerī anī to wogō mayein, anī ere, amā malamam bagai yogon fula fiya medeīya nē megeir mailen anī wogō maun. ¹⁷ Ait are Negur fula fiya medeīya megeir ado bunem ĩ bun isi fen, iron, “Eī neu Kesu, ĩ nigin aya wau laa fedig, ĩ nigin aya wau kulī yedig,”* sain anī bun, ĩ, Tama Negur bunem, yana odug ado fula fiya medeīya yalen. ¹⁸ Amā ĩ geid arei fateul bun mafar mog, ait enei saa ilunem isi mog, amā mug bagai karī maun.

¹⁹ Agef fen, ada, profet neid od are momoi anī, megeir tafe, momoi taut, are lalan gugum modoū bun, we fef ile, we kasasa fe fen, bonimeī nē barisa wauī bun fā youf gen, ā profet neid od karī weleg fen, el ge dō gouf are, ā biya ubodōgouf. ²⁰ Ere odug bagai are eig fiya, ā keleī youf, Negur nē Itotoya nē profet od taka, tamo nē kisim to faded fouf. ²¹ Ere nigin, profet od, tamo nē oroya bunem to wogō den, anī ere, tamo Awa Uur Fateulem ulum iroukenēdi di, Negur bun tamal od dale fen, wogō den.

2

Idegēya Tise Ado Idi Daū Fediya Nigin

¹ Anī ere, tamo kayau atun idegēya profeteg difaren, age fiya gen, ā atun idegēya tisege dibodōf. Idi fau tamo kayau daū

* **1:17:** Matyu 17:5; Mak 9:7; Luk 9:35

fediya nē idegēya od anī iminēyan difel-neīf, Odug na yaledin ī anī wa de fen, idi dogo bun kaisā bagai daū feidleya anī dinouf. ² Musei dogo neid tobonuneid sane dō de fen, momoi nē naab are naabura gudū difouf. ³ Dogo naumeid nigin, tise eneidi nenerī dogo neid kisim wogō diyei ken, safineī gei difouf. Negur idi mogo es fedin, agef fen, idi daū fediya nē are mogo isiyouf.

⁴ Negur ī engel mosor dino di, to isen-neīd fen, hel bun sur fiyēdin, dumen es fediyouf nigin ku gugum keleya bun in-enēdin. ⁵ Negur ī kulu tenebur nē tamo kayau to isenneīd fen, tamo kayau idi Negur nē to difaren anidi bun kuwei sur fen, anī ere, ī, Noa madur bagai nigin wogōya tamo ado, sewen anidi geid ahaha fedin. ⁶ Negur ī, Sodom taun ado Gomora taun, yam yakur feid aasu ileyā bunem daū feidlen, are tamo kayau Negur nē to difaref anidi bun, ereb wō youf anī ifelnēdiyof nigin age fen. ⁷ Negur ī, Lot madur tamo, tamo lo to dō difedig anidi neid tobonuneid sane nigin wau morōdig ī ahaha fiyen ⁸ (ere nigin, madur tamo are, naa ganā bun, idi atun ibod ken, tobonuneid sane ilen ado karī yen anī bunem, yogon malakanon madur anī darau yalen). ⁹ Age fiyauf are, Odug ī naig fe fen, tamo Negur nē dibodok anidi, morō bun tamal yalelneīd fen, tamo Negur nē to dibodok anidi, darau bun irounēdif ile, es fiya nē naa bun ileyā nigin anī keleī. ¹⁰ Negur ī, idi bouwa nē oroya sane dō de fen, Odug nē yana lai difedig anidi bun, momoi bagai age fouf.

Idi kumī sā ado, dogo yeneid dalesedig. Idi, engel megeir adodo nigin bou yūya od wogōya nigin to kumī dedig. ¹¹ Anī ere, engeleg dogo neid total ado megeir odug bagai nigin tamo eneidi wal fediya, Odug mala bun, engel megeir adodo age fediya nigin bou yūya od to wogō dedig. ¹² Anī ere, tamo eneidi, ereb idi keleī sā nigin kono difedig. Idi gaar kuī kisi sā, bouwa nē oroya dogol dō dife di, tamom kaka difeid fen, didenkesiyof nigin dogol gō difedidig anidi gen. Gaar kuī gen, idig daū

fediyouf.

¹³ Idi sane age difen kilei, mala solo sane dalouf. Idi gaa atun bouwa nē oroya sigigi fiya nigin orodidig. Idi amuyē ado gerī tō fiya. Idi ā geid sifa dino fen, nedi bouweid nē oroya sigigi difedig. ¹⁴ Idi meleid bun seseirā tobonunā barikā ado fen, mosor inoya nigin to bagai ditorōdig. Idi, tamo kayau total sā difaref anidi, didī difedidig. Idi safina musei youf nigin imeid su lai de fen sū we fiya nigin keleī bagai. Idi daū feidleya nē gere tar. ¹⁵ Idi naab madur anī ditor ken, Beor naal, Balam ī sane nē mala solo nigin wau laa fedig anī nē naab dō difouf nigin fasis difen. ¹⁶ Anī ere, ī donki, gaar kuī wogōya kisi feleya sā anim, yogon kū fenēya nigin ou fiyen, donki ī tamo nē ait nem wogō ye fen, profet anī nē neneya kisi katū fiyen.

¹⁷ Tamo eneidi, naan warur gere keleya gen ado, ogou uyē yau total ado bunem irou isidig gen. Modoū gugum keleya bagai anī, idi nigin saia fen. ¹⁸ Idi yana yaleseya od kaū sā wogō de fen, tamo kayau idi kū fenēya bun dibodok anidi bun tamal, mogo diyawof anidi, bouwa nē oroya, noli nigin kisi fāya bunem didī difedidig. ¹⁹ Tamo sane eneidi, tamo kayau karika ibodōya mafeneīf de dirokenēdidig, anī ere, idi dogo sane nē ferfer, ere nigin, tamo ī, ereb ī wal fiyek anī nē ferfer. ²⁰ Idi, neda Odug ado Isennadaya, Jesus Kristus keleī ken, tenebur nē sane bun tamal soso dife di, baban tenebur nē sanem fili feid fen, wal fediyouf are, idi gariya bun sane dibodon anī wal fiya, idikeleya bun sane bagai dibodōf. ²¹ Idi madur bagai nē naab anī keleī ken, itāfiya fateul idi imeid bun dinon anī dudum difem are, idi madur bagai nē naab anī to keleim, are dem. ²² Od biya tamo kayau wogō dedig are, idi nigin momoi, “Gaū yogon iluf anī kel yōdig,”* takag, “Bor naan igu kel fen, baban ile ed igūdig.”

3

Odug Nē Naa

¹ Turau tar oboiyou, eī neu pas baban ā bun sur afef. Aya pas uru enei atotodin

* 2:22: Proverb 26:11

are, kisi biya turĩ akeneĩ di, wedereĩ fokõ youf nigin age afen. ² Aya, od profet fateul kulu wogõ den ado, ãtãfiya neda Odug ado Isennadaya, ãgenei aposel bunem ifenein anĩ, ã karĩ walagauf nigin orouf.

³ ã uyulil enei keleĩ youf, idikeleya naa bun, kono temeleid disiyouf, idi disi, kono de fen, dogo neid oroya sane dõ difouf. ⁴ Idi dirõf, “Ĩ asiyouf yen promis od anĩ nain? Amã nemã tamamã tar gare den bunem isif, ereb ereb ganan uruwa bun kare fen gen, agef yenek.” ⁵ Anĩ ere, idi, kulu bagai Negur nẽ od bunem saa wõ ye fen, teneub naan bun tamal ado naan nem kare fen anĩ, karĩ del fen, wedereid tu kelen. ⁶ Naan anim, kuwei fã ye fen, sain anĩ bun teneub ganan daũ felen. ⁷ Od de anim, saa ado teneub gama tailef are, yã nigin faraf foi fen, agef fen, tamo kayau momoiya sã es fiya ado daũ feidleya nẽ naa nigin inon ibodok.

⁸ Anĩ ere, turau tar oboiyou, ereb tekelei enei to wedereĩ tu kalauf, Odug bun naa tekelei are tausen yar gen, agef fen, tausen yar are naa tekelei gen. ⁹ Odug ĩ, yogon promis od kisi falauf nigin, tunĩ age dedig gen, to foi yedig. ĩ taka daũ feleyan ileya itor ken, ganan waud falei fouf nigin, sain meluk tari yeĩdig.

¹⁰ Anĩ ere, Odug nẽ naa are, bẽ tamo gen isiyouf. Saa gududũ ye fen, iwaikalauf, ereb ereb nanaal teneub inon are ganan yam daũ falauf, agef fen, teneub ado ereb ereb ganan ĩ bun ibodok are yaor fouf.*

¹¹ Naab enei bun, ereb ereb ganan daũ falauf, anĩ nigin, ã tamo kayau naig fiya bagai wõya nigin kisi gef? ã fateul ubodõg fen, Negur nẽ tobonunã bun ubodõgouf. ¹² ã, Negur nẽ naa tarig fen, kaisã bagai isiyouf nigin ololo gouf. Naa anĩ bun, yam saa daũ falauf, ereb ereb nanaal teneub inon are uruwam naan kalauf. ¹³ Anĩ ere, ada yogon promis od tarou fen, saa mata ado teneub mata ololo tafef, are madur tamo kayau an dibodõf.

¹⁴ Age fiya nigin, turau tar oboiyou, ã enei tari gef nigin, Odug mala bun amuyẽ sã, od sã wowãg fen, ĩ ado wauĩ katõ

gouf nigin kabĩ total walogouf. ¹⁵ ãgenei kisi bun, neda Odug sain meluk tari fiya are, kel yaleya nigin gouf, are neda turada oboida Pol ĩg Negur kisi biya ifenẽ di, ã bun pas itoton kilei. ¹⁶ ĩ yogon pas ganan bun, eig fe itotoid fen, enei nigin wogõ yen. Yogon pas bun, ereb ereb tunĩ keleĩya nigin lakĩ fiya bagai ibodok, are idi keleĩ sa ken, momoiya ilef isif anidi, Negur nẽ Itotoya tunĩ bun age difedig gen, falei difeid fen, dogo daũ feidleya bun diledig.

¹⁷ Anĩ nigin, turau tar oboiyou, ã enei mogo keleĩ nigin, lo wal fiya tamo neid kũ fenẽyam to guri diyeyi ken, dile ãgenei modoũ biya utorõg fen, kubũ geya nigin lo welegei. ¹⁸ Anĩ ere, neda Odug ado Isennadaya, Jesus Kristus nẽ wau ifenẽya ado keleĩ bun, odugouf. ĩ bun fula fiya medeĩya gama ado faimud ibodkalauf! Momoi.

* **3:10:** Itotoya tunĩ eig de ditoton: are yakur falauf.

1 Jon

Mata Ibodōya Nē Od

¹ Are ī gariya bun tamal, are amā mogo karī maun, are amā mogo malamam mailen, are amā mogo mail fen, amā imamam kobū mafen—anī amā mata ibodōya nē Od mau fen, kurō mafesif. ² Mata are wō yen. Amā anī mail fen, anī nigin kurō mafesif. Age mafe fen, amā, mata ibodkeleya ī, Tama ado dibod ken, amā bun wō yen anī, ā yaor mafe marokeneik. ³ Amā ereb mailen ado karī maun anī, ā yaor mafe marokeneik, are āg amā geid nigal taūf nigin age mafef. Age fe di, neda nigal yūya are, Tama ado yogon Naal Jesus Kristus geid nigal taūf. ⁴ Amā nemā waumā kulīya barikāf nigin enei matotof.

Lalan Bun Iyōya

⁵ Od enī, amā ī bun tamal karī mau fen, ā yaor mafe marokeneik: Negur ī lalan, ī bun gugum taka to ibodok. ⁶ Ada ī geid nigal tauk tau fen, gugum bun tayōf are, ada tadeg fen, momoi anī bunem to tabodok. ⁷ Anī ere, ī lalan bun ibodok gen, adag lalan bun tayōf are, ada abob geid nigal taūf, age tafe di, Negur Naal, Jesus nē naud anim, mosor ganan bun tamal kulo fadalauf.

⁸ Ada mosor sā tauf are, ada dug tadeg ken, momoi anī ada namedan ibodōya sā. ⁹ Ada neda mosor kurō tafalaisiyouf are, ī yogon od dō fiya biya fen, madur bagai, anī nigin, ī fau neda mosor nigin weder tu kel fen, ada neda madur bagai sā anī ganan bun tamal kulo fadalauf. ¹⁰ Ada mosor to tanon tauf are, ada, Negur ī idegēya tamal tau fen, in od ada namedan to ibodok.

2

Kristus Ī Ada Isennadaya

¹ Neu kesu tar, ā mosor to unogouf nigin, aya enei atotkeneik. Anī ere, taka ī mosor inouf are, taka ada isennadauf nigin yogon Dei irokenēdig anī ibodok, ī Jesus Kristus, madur bagai. ² Ī neda mosor nigin Negur nē didi yo fiya nē sesewi fiya,

are neda mosor nigin dogol sā, anī ere, tenebur tamo kayau ganan neid mosor nigineg.

³ Ada keleī, ada yogon itāfiya dō tafef are, ada mogo ī keleī. ⁴ Tamo ī aya ī keleī ye fen, ereb ī irok anī to dō fouf are, ī idegēya tamo, agef fen, momoi anī ī bun to ibodok. ⁵ Anī ere, taka ī yogon od dō fef are, Negur nē wau laa fiya are momoi bagai ī bun kisi felef. Anī bunem, ada ī bun tabodok anī ada keleī. ⁶ Aib taka ī bun abodok yef, ī Jesus age fedig gen age fouf bagai.

Ītāfiya Mata

⁷ Turau tar oboiyou, aya itāfiya mata to atotkeneik, anī ere, itāfiya tubu, are abob nigin wau laa fiya anī, ā uruwa Jesus nigin momoi gen sain bunem karī gen. Itāfiya tubu enei are, od ā karī gen anī. ⁸ Anī ere, aya itāfiya mata atotkeneik, are anī nē momoi anī, ī bun ado ā bun mogo ulegef, ere nigin, gugum mogo iwaikele di, lalan momoi bagai anī mogo so fef.

⁹ Taka ī lalan bun abodok ye fen, yogon tura nigin to orof, ī fau gugum bun ibodok. ¹⁰ Aib taka ī yogon tura nigin wau laa fef, ī lalan bun ibodok, age fe di, ereb anim ī ye tū fiya nigin, ī bun taka to ibodok. ¹¹ Anī ere, aib taka ī yogon tura nigin to orof, ī gugum bun ibod ken, gugum bun iyōdig. Ī narib ilef anī, ī keleī sā, ere nigin, gugum anim ī mala ifofakelen.

¹² Aya kesu tar ā atotkeneik, ere nigin, āgenei mosor in yana bunem weder tu kelen.

¹³ Aya tama tar ā atotkeneik, ere nigin, ā ī gariya bun ibodok anī keleī.

Aya kesu oosi ā atotkeneik, ere nigin, ā sane anī mogo wal gen.

¹⁴ Aya kesu tar ā atotkeneik, ere nigin, ā Dei anī mogo keleī.

Aya tama tar ā atotkeneik, ere nigin, ā ī gariya bun ibodok anī keleī.

Aya kesu oosi ā atotkeneik, ere nigin, ā total ado, age fe di, Negur nē od ā bun ibodok, age fe di, ā sane anī mogo wal gen.

Teneub Ein Nē Nigin To Wauī Laa Fouf

¹⁵ Æ teneub enei be, ereb taka tenebur ibodok anī nigin to wauī laa foug. Taka ī teneub enei nigin wau laa foug are, Dei nē wau laa fiya ī bun to ibodok. ¹⁶ Ere nigin, ereb ereb ganān tenebur ein ifaref–mosor tamo nē oroya, yogon mala ile oroya ado, ereb ī ado fen ereb ī age fef anī nigin yana yaleseya–are Dei bun tamal to isif, anī ere, tenebur tamal isif. ¹⁷ Teneub ado yogon oroya are sa kalauf, anī ere, tamo Negur nē oroya dō fef, ī mata ibodkalauf.

Kristus Nē Kiwai Tar Nigin Weder Irouya

¹⁸ Neu kesu tar, sain enei are idikeleya sain. Kristus nē kiwai isif anī, ā mogo karī gen, age fiya gen, gamag Kristus nē kiwai tar musei disin. Anī bunem, sain enei are idikeleya sain anī, ada keleī. ¹⁹ Idi uruwa bun, ada geid tabod ken, ada bun tamal dilen, anī ere, idi momoi bagai neda sã. Ere nigin, idi nedam are, idi ada geid tabodom. Anī ere, idi ada bun tamal dilen anim, idi ganān neda sã anī yaor fen.

²⁰ Anī ere, ā, Kristus ī Fateul anī bunem, Awa Uur Fateul waleg fen, ā ganān momoi anī keleī. ²¹ Aya ā momoi anī keleī sã nigin to atotkeneik, anī ere, ā momoi anī keleī nigin ado, idegēya taka momoi anī bun tamal to isif nigin, aya ā atotkeneik. ²² Ai anī idegēya tamo? Tamo, Jesus ī Kristus yeya anī wa fef anī. Tamo age fiya, are Kristus nē kiwai. Ī, Dei ado Naal wa fedif. ²³ Taka ī Naal wa fef, ī bun Dei sã. Aib taka ī Naal kurō fesif, ī bun Deig ado.

²⁴ Ereb ā gariya bunem karī gen anī, ā bun agef ibodōf nigin lo walagauf. Ago gouf are, ā Naal bun ado Dei buneg ubodōgouf. ²⁵ Agef fen, enei anī ereb ī age afoug fadan, are mata ibodkeleya.

²⁶ Aya, idi ā kũ fenēya bun dirouleyēya nigin age difef anidi nigin, enei atotkeneik. ²⁷ Æ nigin, Awa Uur Fateul ā ī bun tamal walegen are, ā bun ibodok, age fe di, aib takam ā ifelneīya nigin lau fiya taka to ibodok. Anī ere, yogon Awa Uur Fateul anim, ereb ereb ganān nigin ā ifelneīdig. Age fe di, Awa Uur Fateul anī momoi bagai, idegēya sã, anī nigin, ā ifelnein kilei anī, ī bun ubodōgouf.

Negur Nē Gere Tar

²⁸ Neu kesu tar, gama ī bun agog ubodōgouf, ago ge di, ī wō youf sain bun, ī isi di, ī mala bun, ada kumī sã ado mama sã tafarauf.

²⁹ Æ, ī madur bagai anī keleī youf are, ā keleī, tamo idi ereb madur age difef anidi ganān ī bunem gogū fedin.

3

¹ Tamada, ada bun, wau laa fiya fatuk bagai ifanadan, anī nigin, Negur, ada in gere tar yedig. Are ada age fiya. Teneub enei ada nigin keleī sã, ere nigin, teneub enei ī nigin keleī sã. ² Turau tar oboiyou, ada gama Negur nē gere tar. Age fe di, ada naig be fiya bagai wowā tauf, are fau yaor fiya sã. Anī ere, ada keleī, ī isyouf sain bun, ada ī gen wowā tauf, ere nigin, ada ī bagai anī tailauf. ³ Aib taka ī bun wau iseya anī ado, ī karētut bagai gen, ī yogo karētut ouf.

⁴ Aib taka mosor inof, ī lo wal fef. Momoi bagai, mosor are lo wal fiya. ⁵ Anī ere, ā keleī, ī ada neda mosor yalelauf nigin wō yen. Agef fen, ī bun mosor sã. ⁶ Taka ī bun ibodok, ī mosor to inof iledig. Taka ī mosor inof iledig, ī to ilen be, oo, ī nigin keleī san.

⁷ Neu kesu tar, ā takam to idegneif. Aib taka ī ereb madur age fef, Odug ī madur bagai gen, ī madur. ⁸ Aib taka ī ereb mosor age fef, ī Satan nē, ere nigin, Satan ī gariya bunem mosor inof isin. Negur Naal ī, Satan nē kabī anī daū falauf nigin wō yen. ⁹ Taka Negur bunem gō fen, ī mosor to inof iledig, ere nigin, Negur nē faat ī bun ibodok. Ī mosor inof ileyā kisi feleyā sã, ere nigin, ī Negur bunem gō fen. ¹⁰ Ada ai anī Negur nē gere tar ado, ai anī Satan nē gere tar anī, naig tafe keleī youf, are eig fiya. Aib taka ī ereb madur to age fef, ī Negur nē kesu sã, aib taka ī yogon tura nigin to wau laa fef, īg Negur nē kesu sã.

Abob Nigin Wauī Laa Fouf

¹¹ Od enei ā gariya bunem karī gen, are ada abob nigin wauda laa foug bagai.

¹² Æ Kain gen to ago gouf, ī Satan nē fen, yogo tura yukesin. Ere nigin ī yogo tura yukesin? Ere nigin, yogon tobonunā are sane fen, yogo tura nē tobonunā are

madur. ¹³ Turau tar, teneub enei nē tamo kayau sane diyēf are, to terē gouf. ¹⁴ Ada keleī, ada laa tator ken, mata ibodōya bun telen, ere nigin, ada neda turada tar nigin wauda laa fef. Aib taka ī to wau laa fef, ī laa bun ibodok. ¹⁵ Aib taka ī yogon tura nigin to orof, ī tamo yukesiya tamo, agef fen, ā keleī, tamo yukesiya tamo ī bun, mata ibodkeleya sã.

¹⁶ Ere anī wau laa fiya naig tafe ada keleī youf, are eig fiya. Jesus Kristus ī ada nigin yogon mata itoron. Anī nigin, adag turada tar nigin neda mata tatorōf bagai. ¹⁷ Aib taka ī safina ado fen, yogon tura lau fiya bun ibodok anī ile fen, ī nigin wau to yuk, Negur nē wau laa fiya naig fe ī bun ibodok? ¹⁸ Neu kesu tar, ada od be, sigorada wogōya bunem wauda to laa foug, anī ere, age tafedig ado momoi bun age tafoug. ¹⁹ Anī bunem, ada momoi bagai nē anī, ada keleī youf, age tafe fen, ada wauda yogon mala bun si inouf, ²⁰ ada neda wauda, ada nigin kafī fiya ifanadauf sain anī buneg, age foug. Ere nigin, Negur ī neda wauda wal fiya, agef fen, ī ereb ereb ganan nigin keleī.

²¹ Turau tar oboiyou, ada wauda kafī fiya to ifanadauf are, ada Negur mala bun kumī sã totol tafar fen, ²² ereb ada ī to tafiyek anī, ī bun tamal talouf, ere nigin, ada yogon itāfiya dō tafe fen, ereb ī orof anī age tafef. ²³ Yogon itāfiya are eig fiya. Negur Naal, Jesus Kristus nē yana nigin momoi tau fen, ī ada irokanadan kilei, abob nigin wauda laa foug anī. ²⁴ Idi yogon itāfiya dō difef anidi, ī bun dibodok, agef fen, ī idi bun ibodok. Ī ada bun ibodok anī, naig tafe ada keleī youf, are eig fiya. Ada Awa Uur ifanadan anī bunem, ada anī keleī.

4

Uur Nigin Es Gouf

¹ Turau tar oboiyou, uur ganan nigin to momoi ge fen, idi Negur bun tamal be sã anī ulougouf nigin, idi es wiyēdigouf, ere nigin, idegēya profet musei teneub ganan bun diyokelef. ² Negur nē Awa Uur naig ge ā keleī youf, are eig fiya. Uur ganan Jesus Kristus ī tamo bouwa bun isin anī

dirōdig, are Negur bun temeleid. ³ Anī ere, uur ganan Jesus nigin wa difef, are Negur bun temeleid sã. Enei are Kristus nē kiwai anī nē uur, are ī mogo isif ya anī karī gen, gamag ī mogo tenebur ibodok.

⁴ Neu kesu tar, ā Negur nē ubodōg fen, idi wal wiyēdigen, ere nigin, ī ā bun ibodok anī, ī tenebur ein ibodok anī wal fiya. ⁵ Idi tenebur temeleid, anī nigin, idi tenebur nē lo fiya bunem wogō de di, tenebur tamo kayau idi karī difiyēdidig.

⁶ Ada Negur bun temelada, age tafe di, aib ī Negur keleī, ada karī fadadig, anī ere, aib ī Negur bun tamal sã, ada to karī fadadig. Anī bunem, ada momoi bagai nē Awa Uur ado kũ fenēya nē uur nigin keleī youf.

Negur Nē Wau Laa Fiya Ado Neda Wauda Laa Fiya

⁷ Turau tar oboiyou, abob nigin wauda laa foug, ere nigin, wau laa fiya are Negur bunem isidig. Ganan waud laa fedig idi, are Negurem gō fedi di, idi Negur keleī.

⁸ Aib taka ī to wau laa fedig, ī Negur keleī sã, ere nigin, Negur ī wau laa fiya. ⁹ Negur nē wau laa fiya eig fe ifelnadan. Ī yogon Naal tekelei bagai, ada ī bunem mata tabodōf nigin, tenebur sur fen.

¹⁰ Wau laa fiya are yeir. Ada Negur nigin wauda to laa fen, anī ere, ī ada nigin wau laaf fen, yogon Naal, neda mosor nigin Negur nē didi yo fiya nē sesewi fiya anī sur fen.

¹¹ Turau tar oboiyou, Negur ī ada nigin agef wau laa fen nigin, adag abob nigin wauda laa foug bagai. ¹² Takam Negur to bagai ilen. Anī ere, ada abob nigin wauda laa foug are, Negur ada bun ibod ken, yogon wau laa fiya ada bun kisi falauf.

¹³ Ada keleī, ada ī bun tabodok, agef fen, ī ada bun ibodok, ere nigin, ī yogon Awa Uur ada ifanadan. ¹⁴ Ada tail fen, kurō tafef, Dei, yogon Naal tenebur enei nē kel yaleya tamo wō youf nigin sur fen, taudig.

¹⁵ Aib taka Jesus ī Negur Naal youf are, Negur ī bun ibodok, age fe di, ī Negur bun ibodok. ¹⁶ Age fiya nigin, ada, wau laa fiya ada nigin Negur ado anī kelei ken, momoi taudig.

Negur ī wau laa fiya. Aib taka wau laa fiya bun ibodok, ī Negur bun ibodō di, Negur ī bun ibodok. ¹⁷ Naab age fiya

bun, wau laa fiya ada atun kisi fele di, ada es fiya naa bun, kumĩ sã, totol tafarauf, ere nigin, tenebur ein, ada Kristus gen tabodok. ¹⁸ Wau laa fiya bun, kumĩ taka to ibodok. Anĩ ere, wau laa fiya kisi feleya bagai anĩ, kumĩ irudig, ere nigin, kumĩ mala solo sane ado iledig. Taka ĩ kumĩ yef, ĩ wau laa fiya bun, kisi feleya bagai to wõ yef.

¹⁹ Ada wauda laa fedig, ere nigin, ĩ ketem ada nigin wau laa fen. ²⁰ Aib taka ĩ aya Negur nigin wau laa fef ye fen, yogon tura nigin to orouf are, ĩ idegëya tamal. Ere nigin, aib taka ĩ yogon tura ĩ iledig anĩ nigin to wau laa fef are, ĩ Negur to ilen anĩ nigin wau laa fiya kisi feleya sã. ²¹ Kristus ĩ ada ĩtäfiya enei ifanadan. Aib taka Negur nigin wau laa fef, ĩ yogon tura nigineg wau laa foug bagai.

5

Negur Naal Nigin Momoiya

¹ Aib taka ĩ Jesus ĩ Kristus yef, ĩ Negurem gõ fen, agef fen, aib taka tama nigin wau laa fef, ĩ yogon kesu nigineg wau laa fef. ² Ada Negur nẽ gere tar nigin wauda laa fef ya anĩ, naig tafe keleĩ youf, are eig fiya. Negur nigin wau laaf fen, yogon ĩtäfiya dõ fiya bunem. ³ Negur nigin wau laa fiya, are yeir. Yogon ĩtäfiya dõ fiya. Agef fen, yogon ĩtäfiya are, ada age tafouf nigin morõ to ifanadadig, ⁴ ere nigin, ganan Negur bunem wowã den idi, tenebur nẽ oroya wal difedig. Momoiya bunem, ada tenebur nẽ oroya wal tafedig. ⁵ Aim anĩ tenebur nẽ oroya wal fef? ĩ, Jesus Negur Naal ye fen, momoi yef anim dogol.

⁶ Enei anĩ, naan igüya nẽ naan ado laa nẽ naud bunem isin, are Jesus Kristus. ĩ naan bunem dogol to isin, anĩ ere, naan ado naud bunem isin. Agef fen, Awa Uurem anĩ kurõ fesif, ere nigin, Awa Uur ĩ momoi bagai. ⁷ Towo anidim kurõ difesif. ⁸ Awa Uur, naan ado, naud. Agef fen, towo are tekelei wogõ def. ⁹ Ada tamom kurõ difesif anĩ taledig, anĩ ere, Negur nẽ kurõ fesiya are tamo nẽ wal fiya. Negur nẽ kurõ fesiya are yeir, ĩ yogon Naal nigin kurõ fesin. ¹⁰ Aib taka Negur Naal nigin momoi

yef, ĩ kurõ fesiya od enei in wau bun ibodok. Aib taka Negur nigin to momoi yef, ĩ Negur idegëya tamo yef, ere nigin, ĩ Negur yogon Naal nigin od kurõ fesin anĩ to momoi yef. ¹¹ Kurõ fesiya od are yeir. Negur ada mata ibodkeleya ifanadan, age fe di, mata enei are yogo Naal bun ibodok. ¹² Taka ĩ Naal ado, ĩ mata ado, taka ĩ Negur Naal sã, ĩ mata sã.

Idikeleya Nẽ Od

¹³ Aya, ã Negur Naal nẽ yana nigin momoi gef anĩ, mata ibodkeleya ã bun ibodok anĩ, ã keleĩ youf nigin enei atotkeneik. ¹⁴ Negur mala bun, ada kumĩ sã totol ado anĩ eig fiya. Ada yogon oroya dõ tafe fen, ereb taka nigin to tafiyëf are, ĩ ada karĩ fadauf. ¹⁵ Age fe di, ada ereb nigin to tafiyek, ĩ karĩ fadadig anĩ ada keleĩ youf are, ada keleĩ, ereb ada to tafiyek are ada talef.

¹⁶ Aib taka ĩ yogon tura mosor laa bun to irouledig anĩ ino mog, ilouf are, ĩ tura nigin kosë ye di, Negur tura mata ifenëf. Aya idi nedi mosor laa bun to guri feid irouledig anidi nigin wogõ auf. Mosor laa bun guri feid irouledig are ibodok. Aya mosor anĩ nigin kosë youf nigin to wogõ auf. ¹⁷ Kũ fenëya ganan, are mosor, agef fen, mosor laa bun to guri feid irouledig anĩ ibodok.

¹⁸ Ada keleĩ, aib taka Negur bunem wõ yen, ĩ mosor to inof iledig. Negur Naal ĩ kulatun fiyë di, Satan nẽ anim ĩ to daũ fiyëf. ¹⁹ Ada keleĩ, ada Negur nẽ gere tare di, teneub ganan Satan nẽ anĩ farumen ibodok. ²⁰ Takag ada keleĩ, Negur Naal isi fen, ada keleĩ fokõ fanadan, are ada, Negur momoi bagai anĩ, keleĩ youf nigin age fen. Age fe di, ada, Negur momoi bagai anĩ bun tabodok, are yogon Naal Jesus Kristus bun. ĩ momoi bagai Negur fen, mata ibodkeleya anĩ.

²¹ Neu kesu tar, idegëya waitou so wiyëdigouf.

2 Jon

Aan Yeya

¹ Aya, sios nē mudur ado,

kayau* Negurem igrinen ado yogon gere tar bun pas enei atotof. Aya momoi anī bun ã nigin wau laa fedig, are aya dogol sã, anī ere, ganan idi momoi nigin keleĩ anidig, ² are momoi anī ada namedan ibod ken, ada geid ibodkalauf anī nigin.

³ Wau ifenēya, wau yūya ado, wau inosiya, Dei Negur ado Jesus Kristus, Dei nē Naal bunem, momoi ado wau laa fiya bun ada geid ibodōf.

Momoi Bun Mata Ibodōya

⁴ Aya ogon gere tar tunī, Dei ada irokanadan kilei, momoi bun diyō mog, ail fen, fatuk bagai wau al fen. ⁵ Gama, kayau oboiyu, aya itāfiya mata õ to atotkonok, anī ere, ada gariya bunem talen anī dogol. Ada abob nigin wauda laa foug anī, aya to afef. ⁶ Enei anī wau laa fiya, are ada yogon itāfiya dō fiya bun tayōf. Enei anī yogon itāfiya, are ã gariya bunem mogo karĩ gen kilei, ã wauĩ laa fiya bun uyōgouf.

⁷ Idegēya tamo musei, teneub ganan bun diyok, idi Jesus Kristus tamo bouwa bagai bun isin anī wa difedig. Tamo age fiya ĩ idegēya tamo fen, ĩ Kristus nē kiwai.

⁸ ã nigin amã kabĩ total maledig anī, ege kilē to ilauf nigin ado, ã mala solo kisi feleya bagai walogouf nigin lo walagauf.

⁹ Taka ĩ Kristus nē ifelnēya anī idod ken, anī bun to ibodok, ĩ namen Negur to ibodok. Aib taka ĩ ifelnēya anī bun tobol fef ilef, ĩ namen Dei ado Naal dibodok.

¹⁰ Aib taka ã bun isi fen, ifelnēya enei to irou isiyouf, ĩ āgenei fō bun to waleg uroulagauf, ĩ aaneg to wiyēgouf. ¹¹ Aib taka ĩ aan fiyek, ĩ yogon kabĩ sane bun weim kabĩ dalef.

Idikeleya Nē Aanya

¹² Aya ã bun itotoya nigin musei ado, anī ere, aya pepa ado ink nem itotoya nigin to orouf. Age fiya ban, aya ã ki ayei ken, abob

nawa bun wogō tauf nigin wau irok, age tafe di, wauda al fiya anī isokosauf.

¹³ Ogon main Negurem igrinen anī nē gere tar, nedi aanya sur difef.

* **1:1:** Kayau are, kayau Jon ĩ nigin keleĩ anī be, oo, ĩ are sios.

3 Jon

Aan Yeya

¹ Aya, sios nē mudur ado, turau oboiyou Gaius, aya ī nigin momoi anī bun, wau laa fedig, ī bun pas enei atotof.

² Turau oboiyou, ogon malākanon biya ibodok gen, ō boū biya ibod ken, ereb ereb ganān ō nigin biya ilauf nigin, aya kosē auf. ³ Turau tar tunī disi fen, ō momoi anī biya bagai dō wo fen, momoi anī bun toku uyōdig anī dirokana di, aya fatuk bagai wau al fen. ⁴ Aya gereu tar momoi anī bun diyōdig karīya anim, wau al fiya ereb ereb ganān wal fiya anī ifanadig.

Negur Nē Kabī Tamo Kulatun Fediya

⁵ Turau oboiyou, ō, turada tar idi, ō bun yaū tamo anidi nigin el wo, biya ago wedidig. ⁶ Idi ogon waū laa fiya nigin sios dirokenēdin. Ō idi tobonunā Negur orof kilei sur wediyouf are, ō biya ago wouf. ⁷ Idi Odug yana nigin, haiden bun tamal isennēya taka to dale fen, dilen. ⁸ Anī nigin, ada, momoi anī nigin weim kabī talouf nigin, tamo age fediya tasennēdiyof bagai.

⁹ Aya sios bun pas atoton, anī ere, Diotrefes uyulil ibodōya nigin wau laa fedig, ī nemā od to karī yedig. ¹⁰ Anī nigin, aya asiyouf sain bun, aya ī ereb age fef, amā nigin dumen od sane bagai irōdig anī yaor afouf. Anī dogol sā, ī turada tar yalediya nigin itoron. Ī idi turada tar yaleya nigin orodif anidig katū feid fen, idi sios bun tamal yalelnēdin.

¹¹ Turau oboiyou, ereb sane anī to madē wo, ereb biya anī madē wouf. Aib taka ereb biya age fef, ī Negur bun tamal. Aib taka ereb sane age fef, ī Negur to ilen. ¹² Demetrius ī nigin, ganān biya wogō dedig, momoi anī ī yogog age fedig. Amāg ī nigin biya wogō maudig, age mafe di, ā keleī, nemā wogō are momoi.

Idikeleya Nē Aanya

¹³ Aya ō bun itotoya nigin musei ado, anī ere, aya pepa ado ink nem itotoya nigin to

orouf. ¹⁴ Aya kaisā ileyōya nigin wau irok, age afe fen, abob nawa tail fen, wogō tauf.

¹⁵ Wau inosiya ō bun ibodōf. Turada tar ein, nedi aanya sur difef. Turada tar an mugu mugu yeneid nem aan wediyouf.

Jud

¹ Aya Jud, Jesus Kristus nē ferfer fen, Jems ne tura,

idi Negurem iweignēdin, Tamada Negur idi nigin wau laa fe di, Jesus Kristus kulatun fedidig anidi bun, pas enei atotof.

² Wau yūya, wau inosiya ado, wau laa fiya, ā bun barikāf.

Momoiya Sā Tamo Neid Mosor Ado Daū Feidleya

³ Turau tar oboiyou, aya, ā kel yaleya ada weim talen anī nigin atotkeneif nigin, kisi total aledig, age a mā, aya kisi afen, aya atot fen, momoiya sain ganan nigin sain tekelei bun, Negur nē tamo kayau imeid bun ifenēdin anī, el ge kulatun gouf nigin, total bagai arokeneif, are deuf aun.

⁴ Ere nigin, tamo tunī idi daū feidleya nigin mogo kulu yeneid itoton anidi, ā keleī sā mog, ā atun iminēyan disin. Idi Negur nē ibodōya sā, idi neda Negur nē wau ifenēya anī falei difel, karika tobonunā sane inoya nē gen dino fen, Jesus Kristus neda Uyu Irouya fen Odug yana wa difedig.

⁵ Momoi, ā enei ganan mogo keleī, anī ere, aya ā, Odug yogon tamo kayau Isip bun tamal kel gei fedin, anī ere, dum idi to momoi den anidi daū feidlen anī nigin, baban wedereī fokō afouf nigin orouf.

⁶ Takag, engel idi dogo neid ifareya modoū bun to dibod ken, dogo neid modoū ditoron anidi, Negurem es fiya naa odug nigin ye fen, idi gugum bun ineneid fen, sen mata ibodkeleya anim ifofakelen. ⁷ Age fiya bagai, Sodom Gomora ado, taun anidi kalilī fiya idi noli tobonunā ado tobonunā sane bun dilelen. Idi bun, yā mata faimud ibodkeleya nē darau dalouf anī nē malakanon ilyauf nigin age fen.

⁸ Naab gai age fiya bagai, imīya tamo eneidi dogo bouweid amuyē dinoid fen, Negur nē yana dudum difiye ken, engel megeir adodo dumedin od dirōdig. ⁹ Anī ere, engel neid mudur ado Maikel, sain ī Satan ado Moses bouwa nigin luwa dirou fen, ī bouwa bun kumī sā od sane wogōya

nigin itoron, anī ere, ī iron, “Odug ō ou yok!” ¹⁰ Anī ere, tamo eneidi, ereb idi keleī sā anī nigin, od sane dirōdig. Age de fen, idi gaar kisi sam gen, bouwa nē oroya bunem idi keleī anī dō dife fen, daū feleya bun dileledig.

¹¹ Idi meleidlon ado! Idi Kain nē naab dō difen. Idi moni nigin de fen, Balam nē kū fenēya bun kaisā dilelen. Idi Kora nē kiwai inoya dō dife di, daū feidlen.

¹² Tamo enidi, āgenei wauī laa fiya nē sifa bun, ā geid kumī sā saaf dokon maaīwō sa tuwa waag daū fiyēdig gen, daū diyeidig. Idi sipsip lo fiya tamo, dogo naumeid nigin dogol kisi difedig gen. Idi budū uyē sā, yaum irouf iyōdig gen. Idi aa wei, mayo sain bun faat sā, agef fen, laaf uru fen, warumutei teten isen gen. ¹³ Idi maaī moloun fatuk fā ye fen, dogo neid mama sali moku fiya gen. Idi barisa ilef isif fedig, anidi nigin karos bagai gugum keleya gai gai nigin saia fen gen.

¹⁴ Enok, ī Adam bunem isin ibor sewen, tamo eneidi nigin profet od wogō yen, “Uleg, Odug ī yogon fateul anidi tausen tausen geid disif. ¹⁵ Ī ganan es feid fen, Negur nē to dibodok anidi ganan, dogo neid tobonunā sane, naab sane bun age difedig nigin ado, Negur nē to dibodok mosor temeleid anidi, od sane ganan ī nigin wogō dedig nigin, Negur nē to dibodok anidi neid mosor yaor fediyouf.” ¹⁶ Tamo eneidi are nauseir temeleid fen, taka nē kū fenēya dimirēdig. Idi dogo neid oroya sane dō difedig. Idi dogo yeneid dales fen, dogo neid biya fiya nigin, tunī meleid yaleya bun biya biya le fen, wogō dedig.

Feseya Sā Ifareya Nigin

¹⁷ Anī ere, turau tar oboiyou, ereb neda Odug Jesus Kristus nē aposel mogo dirokenein anī kisi gouf. ¹⁸ Idi ā dirokenein, “Idikeleya sain bun, kono fiya tamo wowā de fen, dogo neid oroya sane dō difouf.” ¹⁹ Tamo eneidim ā fara diyeif, idi tenebur nē kisi dō de fen, Awa Uur idi bun to ibodok.

²⁰ Anī ere, ā, turau tar oboiyou, ā aug nigin āgenei momoiya fateul bagai bun fō gen unogef useleg fen, Awa Uur Fateul bun kosē gouf. ²¹ Ā, neda Odug Jesus Kristus

ně wau yūya anim, mata ibodkeleya bun
irouleyeif anī tarig fen, Negur ně wau laa
fiya bun, aug nigin kulatun gouf.

²² Idi momoiya total sã nene def anidi
bun wauĩ wenēdigouf. ²³ Tunĩ yã bun
tamal gurar ge gei wedigouf. Agog
fen, tunĩ bun wauĩ yūya aniniya ado
ufelnēdigouf. Anī ere, dogo neid kolos,
bouwa ně oroya sanem amuyē iroun anī
utorōg.

Negur Yana Yaleseya Nē Od

²⁴ Negur ĩ, ã to kubũ gouf nigin kulatun
yei ken, fula fiya medeĩya ĩ mala bun, kũ
fenēya sã, wau kulīya odug ado ineneĩya
kisi feleya ĩ anī bun, ²⁵ ada Isennadaya
Negur tekelei dogol ĩ anī bun, fula fiya
medeĩya, total, megeir ado, yana odug,
neda Odug Jesus Kristus bunem, kulu,
gama ado, faimud ibodkalauf! Momoi.

Kurō Fesiya Od

Od Uyu Irouya

¹ Jesus Kristus nē kurō fesiya od, are ereb kaisā bagai wō youf anī, Negurem yogon ferfer ifelnēdiyof nigin Jesus ifenen. Jesus ī, yogon ferfer Jon od anī keleī youf nigin, yogon engel Jon bun sur fen. ² Jonem ereb ereb ganan ī ilen anī kurō falaisif, are Negur nē od ado, Jesus Kristus nē od. ³ Taka ī profet od enei iwesef are ī el fiyek, agef fen, idi anī karī de fen, ereb anī bun itoton anī waud bun dinof anidi el fedif, ere nigin, sain mogo dodolef.

Jon Sios Sewen Bun Yogon Aanya Sur Fen

⁴ Aya Jon,

Asia provins bun sios sewen bun pas enei atotof.

Negur ī gama ibodok, kulu ibodon, dumen isiyouf bunem, uur sewen yogon king nē sia wagen difaref bunem ado, ⁵ Jesus Kristus ī Negur nē od el fe dōf wogō yedig, ī tamo gare den bun tamal uyulil kel turī fiyen, tenebur king ganan neid mudur ī bunem, wau ifenēya ado wau inosiya ā bun isif.

Jesus ī ada nigin wau laaf fen, yogon naud bunem, ada neda mosor bun tamal yalelnadan. ⁶ Agef fen, ī ada yogon Tama Negur aruna yaleya nigin, in tano ado in pris inodan. Ī bun fula fiya medeīya ado megeir gai gai ibodkalauf! Momoi.

⁷ Log, ī lalo bunem isif.

Age fe di, meleid ganan ī dilouf, idi ī gilī difen anidig dilouf.

Age fe di, tamo kayau tenebur ein ganan ī nigin waud gudū fouf.

Are agef bagai wō youf! Momoi.

⁸ Odug Negur irok, “Aya uyulil ado idikeleya, aya gama abodok, kulu abodon, dumen asiyouf, aya saa ilun nē kusī tamo guri afeid uyu aroudig anī.”

Taka Ī Tamo Naal Gen

⁹ Aya Jon, āgenei tureī, aya, Jesus bun darau, Negur nē tano ado, feseya sā

* 1:13: Daniel 7:13

ifareya, ā geid taledig, aya Negur nē od ado Jesus nē od wogō aun nigin, Patmos nuyo bun abodon. ¹⁰ Odug nē naa bun, aya Awa Uur namen abod ken, aya dumeun ait odug taur gen wō ye mog, karī aun. ¹¹ Ait iron, “Ereb ō ulef anī, buk kori fiya bun utot fen, sios sewen bun sur wediyouf, oun Efesus, Smerna, Pergamum, Taiaaira, Sardis, Filadelfia ado, Laodisia.”

¹² Aya ait wogō fiyan anī ileyā nigin falei aun. Aya falei aul fen, lam nē gol tutur sewen ailedin. ¹³ Lam tutur anī atun, aib taka “tamo naal gen”* kolos meluk ifonū di, yen isilen ado, let gol akor gu fen anī ifaren. ¹⁴ In mudur ado fatiya, sipsip siwi lalau, saa lalo lalau gen, yogon mala are yā mala fitotoleya gen. ¹⁵ Yogon ye are bras yā malan ifalegeya medeīya gen, in ait are naan uhuhuya gen. ¹⁶ Yogon ima biyalē barisa sewen iroun, agef fen, in awa bun tamal, dimig bala waila si sitakā wō yen. Yogon nawa are gaa ririya gen medeī yen.

¹⁷ Aya ī ail fen, aya ī ye gariyan kubū au, laa gen ainen. Age afe di, ī ima biyalē aya teteun ino fen, iron, “Ō to kumī wo. Aya gariya, aya idikeleya. ¹⁸ Aya mata ibodōya nē, aya laa fiyan, anī ere, uleyaf, aya gai gai mata abodkalauf! Aya laa nē ado Hades nē ki aroudif.

¹⁹ “Anī nigin, ereb ō ulen, ereb gama ibodok, ereb dumen wō youf anī utot. ²⁰ Barisa sewen aya imau biyalē ulen ado, lam nē gol tutur sewen ulen anī nē waa nē gariya, are eig fiya: Barisa sewen are sios sewen neid engel, lam nē tutur sewen are sios sewen.

2

Efesus Sios Bun Od Ilef

¹ “Efesus sios nē engel bun utot:

Od enei are, ī barisa sewen ima biyalē iroun mog, sewen gol lam tutur difaren atun iyok ilen nē od: ² Ereb ō ago wof, are aya keleī, ogon kabī total yaleya ado ogon feseya sā ifareya anī. Aya keleī, ō tamo sesen to loloum weid fen, idi dogo anī aposel dedig, anī ere, aposel sā anidi es wiyeīd fen, idi neid idegēya anī ulen.

³ Ō total ufar fen, neu yanau nigin morō faali won, anī ere, ō to fō yon.

⁴ Anī ere, aya ō nigin od enei ado: Ō uruwa aya nigin waū laa fen anī utoron.

⁵ Anī nigin, ō nainenem kubū won anī kisi wo! Falei wo fen, ereb uruwa agon anī agouf. Ō to falei wouf are, aya ō gein asi fen, ogon lam tutur ado yogon modoū bun tamal alelauf. ⁶ Anī ere, tobonunā biya enei ō ado: Ō Nikolas dō difiyek neid tobonuneid to oroyōdig, are ayag to oroudig.

⁷ Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, aya ī mata ifenēya nē aa Negur nē paradis bun ibodok anī bun tamal, yōya nigin yo afiyēf.

Smerna Sios Bun Od Ilef

⁸ “Smerna sios nē engel bun utot:

Od enei are, ī gariya ado idikeleya, ī laaf fen, baban mata fā yen nē od.

⁹ Ogon darau ado ogon maleg nigin aya keleī, anī ere, ō safina musei ado. Aya idi dogo nigin Juda tamo dedig, anī ere, idi Juda tamo sã, Satan nē guru fiya anidi neid bou yūya od nigin keleī.

¹⁰ Ereb mogo ō darau ifonōf nigin to kumī wo. Aya ō arokonok, Satan ī mogo ā tunī kisi yeīya nigin kalabus bun ineneīf. Age fe di, ā naa ten darau walogouf. Ō laa bun dinenōfeg, ogon momoiya urou kafī walauf, ago di, aya ō mata nē teter kurū ayōf.

¹¹ Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, namba tu nē laa ī to daū fiyēf.

Pergamum Sios Bun Od Ilef

¹² “Pergamum sios nē engel bun utot:

Od enei are, ī dimig bala waila si sitakā ado nē od. ¹³ Ō ubodok nē an aya keleī, an Satan nē sia ibodok. Anī ere, ō neu yanau urou kafī welef. Antipas, neu dō fiya biya, aya nigin od wogō yedig, ī Satan ibodok nē āgenei taun an dukesin sain anī buneg, ō aya nigin ogon momoiya to folō welen.

¹⁴ Anī ere, aya ō nigin od tunī ado: Ō tamo tunī an Balam nē keleī dirouf anidi ado, Balam ī Balak ifelnē di, Balak ī Israel tamo kayau yeid tū fiya nē meein ino fen, idegnēdi di, Israel idi saaf idegēya waitou bun sesewi difen anī dokon, noli tobonunā dinon. ¹⁵ Age fiya gen, ō aneg tunī Nikolas nē ifelnēya dirouf anidi ado. ¹⁶ Anī nigin, waū falei wo! Sãf are, aya kaisã bagai ō gein asi fen, neu sigorou nē dimig ado idi geid kusī auf.

¹⁷ Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, aya ī mana iminēyan ibodok tunī afenēf. Aya ī meein lalau takag, yana mata teten itoton anī afenēf. Aib ī anī yalef dogol yana anī keleī youf.

Taiataira Sios Bun Od Ilef

¹⁸ “Taiataira sios nē engel bun utot:

Od enei are Negur Naal nē od, yogon mala are yã mala fitotoleya gen, yogon ye are bras yã malan ifalegeya medeīya gen. ¹⁹ Aya keleī, ō ereb agof, ogon waū laa fiya ado momoiya, ogon aruna yaleya ado feseya sã ifareya. Aya keleī, ō uruwa bun ago won anī wal fiya gama ō agodig.

²⁰ Anī ere, aya ō nigin od enei ado: Ō kayau Jesebel, ī yogo nigin profet kayau yef anī, loloum wedig. ī yogon ifelnēya bunem neu ferfer idegnēdi di, idi noli tobonunā bun dile fen, saaf idegēya waitou sesewi difen anī dōdig. ²¹ Aya ī yogon mosor nigin wau falei youf nigin sain afenen, anī ere, ī to orof. ²² Anī nigin, aya ī darau nē fatar bun ara ken, idi ī geid seseirã dinodig anidi, kayau anī nē naab nigin waud to falei youf are, aya idi darau fatuk bagai afenēdiyof. ²³ Aya ī gere tar adenkesiyof. Age afe di, sios ganan, aya waud ado kisi es afedig anī keleī youf. Age afe fen, aya ā mugu mugu ereb ereb ā ago gef kilei, mala solo afeneīf. ²⁴ Anī ere, aya ā tunī ganan Taiataira ufaregef anī arokeneik, ā kayau anī nē ifelnēya to uroug fen, Satan nē waa namen bagai dedig anī to kelein anī arokeneik (aya ā bun ereb

morō taka to afeneif). ²⁵ Ereb ā urougef anī dogol urougef uleg mog, asiyouf.

²⁶ Aib ī kusī anī wal fe fen, neu oroya dōf ile, idikeleya bun ouf, aya ī teneub lo fediya nigin megeir afenēf.

²⁷ Ī ain manig nem ulum irokenēdiyof, ī mis gen daū fedi di, urud falaisiyouf,*

are aya neu Dei bunem megeir alen gen. ²⁸ Aya ī bonimeī nē barisa kilokilog afenēf. ²⁹ Taka ī weder adouf, utornēg len, ī Awa Uur sios irokenēdif anī karī youf.

3

Sardis Sios Bun Od Ilef

¹ “Sardis sios nē engel bun utot:

Od enei are, ī Negur nē uur sewen ado barisa sewen irouf anī nē od. Ō ereb agof, are aya keleī. Ō mata ubodok dedig, anī ere, ō laa yon. ² Fā wale! Ereb mogo laa fou fenē anī megeir wenē, ere nigin, aya ō ereb agof are neu Negur nē mala bun tutuk bagai sā ailef. ³ Anī nigin, ereb ō walen, ereb ō karī won anī karī walauf. Anī dō wo fen, waū falei wo. Ō to fā walouf are, aya bē tamo gen asiyouf. Aya sain nanī be, ō gein asiyouf anī, ō to keleī youf.

⁴ Anī ere, ō, Sardis an tamo kayau tunī, idi neid kolos amuyē fiya sā difaref anidi ado. Idi kolos lalau difoun ken, aya geid mayōf, ere nigin, idi kisi feleya bagai. ⁵ Aib ī kusī anī wal fouf, ī idi gen kolos lalau ifonūf. Aya yogon yana, mata ibodōya nē buk bun tamal to alelauf, age afe fen, yogon yana neu Dei ado yogon engel meleid bun kurō afesiyouf. ⁶ Taka ī weder adouf, utornēg len, ī Awa Uur sios irokenēdif anī karī youf.

Filadelfia Sios Bun Od Ilef

⁷ “Filadelfia sios nē engel bun utot:

Od enei are, ī fateul bagai ado momoi nē od, ī Dawid nē ki irouf. Ereb ī kā fef, taka nem to inolalauf, agef fen, ereb ī inolelef, taka nem to kā falauf. ⁸ Ō ereb agof, are aya keleī. Ulef, aya, sukar kā

feleya taka nem inoleleya kisi feleya sā anī, ō wagen anon. Aya keleī, ō megeir naal bagai ado, anī ere, ō neu od dō wo fen, neu yanau to wa won. ⁹ Ulef, idi Satan nē guru fiya namen temeleid, idi dogo nigin Juda tamo dedig, anī ere, idi Juda tamo sā, idegēya tamo anī, ayam age afe di, idi disi, ō yē gariyan kubū de fen, aya ō nigin wau laa fedig anī idi keleī youf. ¹⁰ Ō feseya sā ufarauf nigin neu od urou kafī welen anī nigin, ayag idi tenebur dibodok kisi fediya nigin teneub ganan bun darau isiyouf sain bun, aya ō ahaha ayōf.

¹¹ Aya kaisā bagai asiyouf. Ō ereb urouf anī kafī walauf, ago di, taka nem ogon kurū fiya nē teter anī to yalouf. ¹² Aib ī kusī anī wal fouf, aya, neu Negur nē tempel bun, ī monog tor atennēf. Ī anī baban to bagai itorōf. Aya ī bun, neu Negur nē yana ado, neu Negur nē taun yana, Jerusalem mata, are saa ilun tamal neu Negur bunem isiyouf anī atotauf. Age afe fen, aya neu yanau matag ī bun atotauf. ¹³ Taka ī weder adouf, utornēg len, ī Awa Uur sios irokenēdif anī karī youf.

Laodisia Sios Bun Od Ilef

¹⁴ “Laodisia sios nē engel bun utot:

Od enei are Momoi Barikā nē od, ī dō fiya biya ado, momoi bagai Negur nē od wogō yedig, ī ereb ereb Negur inodin ganan nē gariya. ¹⁵ Ō ereb agof anī aya keleī, are ō medir sā, uruwag sā. Aya ō medir be, uruwa anī taka ubodok nigin orouf. ¹⁶ Anī nigin, ō laigog, medir sā, uruwag sā nigin, aya ō mogo awau bun tamal atigil arāyōf. ¹⁷ Ō urōdig, ‘Aya safina ganan kisi feleya, aya safina musei alen nigin, aya ereb taka to lau afedig,’ wodig. Anī ere, ō keleī sā, ō gai sane bagai, malalon ado, maleg, malā ifofakeleya ado, gemū ubodok. ¹⁸ Aya ō arokonok, ō aya bun gol bagai, gol yā bun difalegen anī, ō safina ganan kisi feleya bagai wō wouf nigin, na walouf, ō kolos lalaug ufonū di, ogon gemū mama dede wouf nigin na walouf, ō

* 2:27: Sam 2:9

mala marasin malā bun uno fen, kelē walauf nigin na walouf.

¹⁹ Aya idi nigin wau laa fedig anidi, aya ou afeid fen, tai afedidig. Anī nigin, kabī total wale fen, mosor utor ken, waū falei wouf. ²⁰ Lo weleg, aya bobogē afar fen, godu afef. Taka ī aitou karī ye fen, sukar kā fouf are, aya ī namen asi fen, ī ado saaf māf, age afe di, ī aya ado saaf māf.

²¹ Aib ī kusī anī wal fouf, aya kusī wal afe fen, neu Dei nē king nē sia bun, neu Dei ado mabodok gen, īg neu king nē sia bun, aya ado mabodōf nigin yo afiyēf.

²² Taka ī weder adouf, utornēg len, ī Awa Ur sios irokenēdif anī karī youf.”

4

King nē Sia Saa Ilun Ibodok

¹ Anī bure fele di, aya kelē aulen, aya wageun an saa ilun nē sukar kā feleya ifar mog, ailen. Age afe fen, ait aya uyulil taur gen wogō fiya di, karī aun are iron, “Ein use, ago di, ereb enei bure fele di, wō youf anī, afelnōf.” ² Kaisā bagai aya Awa Ur namen abodon, age afe fen, wageun an saa ilun king nē sia bun, aib taka ibodon anī ailen. ³ Agef fen, taka an ibodon are, lo fiya bun meein medeīya jaspā ado meein giriya medeīya konilian gen wō yen. Walol taka, meein aarau mata age fiya medeīya emeral gen sof fen, king nē sia anī kalilī fen. ⁴ King nē sia anī sirin, tuwenti-fo king nē sia anim salili de fen, tuwenti-fo mudur adodo anī bun dibodon. Idi kolos lalau difoun ken, dogo neid mudureid bun king nē gol teter ado dibodon. ⁵ King nē sia bun kolimei filiya firagagaū fe sof fen, gurūya odug wō ye di, kolimei gudū yen. King nē sia wagen lam sewen futu redin, are Negur nē awa uur sewen anī. ⁶ Takag, king nē sia wagen, ereb taka maaī gen galas nem dinon anī, galas medeīya bagai age fiya ibodon.

Anī atun king nē sia salili fiya bun, ereb mata ibodōya aiwa adodo difaren. Idi meleid barikā, wagedin ado dumedineg. ⁷ Ereb mata ibodōya uyu ifaren are laion gen, anī dō fiya are bulmakau gen, anī dō fiya are nawa, tamo nawa gen, anī

dō fiya are webi fatutu yef gen. ⁸ Ereb mata ibodōya aiwa adodo idi mugu mugu wayeid sigis ado fen, bouweid ganān bun meleid barikā, wayeid farumēg meleid ado. Bō ado gaa ado, idi eig yeya to folō difeledig:

“Fateul, fateul, fateul
are Odug Negur saa ilun nē kusī tamo
guri feid uyu iroudig anī,
ī kulu ibodon, ī gama ibodok, ī dumen
isiyouf.”

⁹ Ereb sain ereb mata ibodōya idi, taka ī king nē sia bun ibod ken, mata faimud ibodkeleya anī bun, fula fiya medeīya, yana odug ado, de fiyēya difenēdig bun, ¹⁰ mudur adodo tuwenti-fo, ī king nē sia bun ibod mog, ī wagen kuku de fen, ī mata faimud ibodkeleya anī seli dalesedig. Idi king nē sia wagen dogo neid teter gō difel fen, dirōdig:

¹¹ “Nemā Odug Negur,
ō fula fiya medeīya, yana odug ado,
megeir yaleya kisi feleya bagai,
ere nigin, ō ereb ereb ganān ago di, wowā
den,
ago fen, ogon oroya bunem idi unodi
di,
age de difaref.”

5

Buk Kori Fiya Ado Sipsip Naal

¹ Age de di, aya ī king nē sia bun ibodon anī ima biyalē, buk kori fiya si sitakā itotoya ado uris sewen nem itā de fen, sile fiyan anī ailen. ² Age afe fen, aya engel megeir ado taka ailen, ī ait odugem iweig iron, “Aim uris eneidi narī feid fen, buk kori fiya enei fara feleya kisi feleya?” ³ Anī ere, saa ilun be, tenebur be, teneub farumen tamal, taka nem buk kori fiya anī fara feleya be, namen fele fiya kisi feleya sā. ⁴ Aya fatuk bagai inā alen, ere nigin, taka nem buk kori fiya anī fara feleya be, namen fele fiya kisi feleya to wō yen. ⁵ Age afe di, mudur adodo takam aya irokanan, “To inā wale! Ulef, Juda nē ibor bun tamal Laion, Dawid nē Warei mogo kusī wal fen. Inim, sā buk kori fiya anī yogon itāfiya uris sewen ado fara falauf.”

⁶ Age ye di, aya Sipsip Naal dukessin anī gen, king nē sia ereb mata ibodōya aiwa adodo salili difiyen ado, mudur adodo atun ifar mog, ailen. Ī karat sewen ado mala sewen ado, mala sewen are Negur nē awa uur sewen teneub ganan bun susur fedin anidi. ⁷ Sipsip Naal ĩ isi fen, ĩ king nē sia bun ibodon anī nē ima biyalē buk kori fiya anī yalen. ⁸ Sain ĩ anī yalen, ereb mata ibodōya aiwa adodo, mudur adodo tuwenti-fo geid, Sipsip Naal wagen kuku den. Idi mugu mugu harp* ado beī gol nem kaau sumeī biya isokoseya ado guri difen, kaau sumeī biya are momoiya tamo kayau neid kosē. ⁹ Age de fen, idi seg mata dalen:

“Ō buk kori fiya anī wale fen,
yogon itāfiya uris sewen anī fara fe-
leya kisi feleya bagai,
ere nigin, ō dinōkesi di,
ō ogon naud bunem
ibor ganan bun, od fire fire ganan
bun, tamo kayau ganan bun ado,
teneub ganan bun, Negur nē tamo
kayau na waledin.

¹⁰ Ō idi neda Negur aruna dalouf nigin,
tano ado pris unenēdin,
ago di, idi teneub ganan lo fiya nigin
mudur dibodōf.”

¹¹ Age de di, aya malau ara ken, engel musei bagai neid aiteid karī aun, idi tausen musei ado handred tausen musei wal fiya. Idi king nē sia, ereb mata ibodōya ado, mudur adodo salili difiyēdin.

¹² Age de fen, idi aiteid odugem seg dalen:
“Sipsip Naal dukessin ĩ
megeir, safina, kisi biya, total, yana odug,
fula fiya medeīya ado,
yana yaleseya yaleya kisi feleya bagai!”

¹³ Agef fen, aya, ereb ereb ganan saa ilun difaref, tenebur difaref, teneub farumen difaref ado, maaī bun difaref, ereb ereb ganan anī namen mata difaref idi seg dale mog, karī aun:

“Ī king nē sia bun ibodok ado Sipsip Naal
bun,
yana yaleseya, yana odug, fula fiya
medeīya ado, megeir,
gai gai ibodkalauf!”

¹⁴ Ereb mata ibodōya aiwa adodo diron, “Momoi,” age de di, mudur adodo kuku de fen, yana dalesen.

6

Ītāfiya Uris

¹ Aya lo afe mog, Sipsip Naal itāfiya uris sewen anī uyulil fara fen. Age fe di, aya, ereb mata ibodōya aiwa adodo takam, ait kolimei ait gen bun eig ye mog, karī aun, “Usi!” ² Aya lo afen, aya wageun an hos lalau taka ifaren. Tamo anī teten ibodon ĩ wi taka iroun, ĩ kusī wal fiya nē teter ifenen, age fe di, ĩ hos bun kusī wal fe fen, kusī wal fediyouf nigin ilen.

³ Sipsip Naal ĩ itāfiya uris uyulil dō fiya anī fara fen, age fe di, aya ereb mata ibodōya uyulil dō fiya anī eig ye mog, karī aun, “Usi!” ⁴ Age ye di, hos taka isin, are giriya bagai. Tamo anī teten ibodon ĩ, tenebur tamal malol yalel fen, tamo abob didenkesiyouf nigin megeir ifenen. Ī anī dimig odug ifenen.

⁵ Sipsip Naal ĩ itāfiya uris anī dō fiya fara fen, age fe di, aya ereb mata ibodōya anī dō fiya anī eig ye mog, karī aun, “Usi!” Aya lo afen, aya wageun an hos karos taka ifaren. Tamo anī teten ibodon, yogon ima bun ĩ foi fiya nē safina iroun. ⁶ Age fe di, aya ereb mata ibodōya aiwa adodo atun ait taka gen karī aun are iron, “Naa tekelei nē mala solo wit bret tekelei yalouf, naa tekelei nē mala solo baali bret towo yalouf. Ago fen, oliv moul ado wain to daū wo!”

⁷ Sipsip Naal ĩ itāfiya uris anī dō fiya fara fen, age fe di, aya ereb mata ibodōya anī dō fiya anī eig ye mog, karī aun, “Usi!”

⁸ Aya lo afen, aya wageun an hos bailuya taka ifaren. Tamo anī teten ibodon ĩ yana Laa, age fe di, Hades ĩ degē degē fiyen. Idi tenebur tamo kayau aiwa adodo foi fiya atun taka anī, dimig nem, kadir nem, dagi odug nem ado, tenebur gaar kuī nem didenkesiyouf nigin megeir ifenēdin.

⁹ Sipsip Naal ĩ itāfiya uris anī dō fiya fara fen, age fe di, aya idi Negur nē od dale fen, feseya sā od anī wogō de di, didenkesin anidi neid meleidkanon alta farumen ailedin. ¹⁰ Idi aiteid odugem diweig diron,

* 5:8: Harp anī gita gen musik kodē dedig.

“Ereb ererb ganān nē Odug, fateul fen momoi, ere sain bun bagai, ō tenebur tamo kayau es woid fen, idi amā didenamakesin nigin mala solo wenēdiyof?” ¹¹ Age de di, idi mugu mugu kolos lalau meluk ifenēdin, agef fen, idi naal sain meluk tari de mog, dogo neid kabī tureid tar ado momoiya tamo kayau Negur igirnēdin ganān, idi age difedin gen didenkesiya kisi falauf nigin irokenēdin.

¹² Aya ī itāfiya uris anī dō fiya fara fel mog, ailen. Age fe di, mimī odug wō yen. Gaa gugum kel fen, wau gudū fiya nē gabar meme siwi nem iwaya gen karos kelen. Ogō oditekei naud giriya gen falei felen. ¹³ Age fe di, saa ilun barisa tenebur kuku ren, are aa fig faat dobi yau totolem yoū fe di, kuku redig gen age fen. ¹⁴ Saa, pepa kori fiya gen iwaikelen, agef fen, arei ganān ado nuyo ganān, dogo neid modoū ditoraran.

¹⁵ Age fe di, tenebur nē king, tamo yeneid adodo, kusī mudur, safina musei adodo, megeir adodo ado, ferfer ganān ado tamo kafī fiya sā bun difaref ganān, kuren ado arei nē sa atun diminanan. ¹⁶ Idi arei ado sa diweig dirokenēdin, “Tetenaman kubūg fen, ī king nē sia bun ibodok anī nawa ado Sipsip Naal nē didi bun tamal unokolnamāg! ¹⁷ Ere nigin, idi neid didi nē naa odug mogo isin, anī nigin, aim ifareya kisi feleya?”

7

Israel Tamo Kayau 144,000 Bun Uris Dinon

¹ Anī bure fele di, aya engel aiwa adodo, teneub idikeleya uyu uyu aiwa adodo bun, difar fen, teneub uyu uyu aiwa adodo nē yau, yau takam teneub be, maaī be, aa taka bun to fū fof nigin kafī difel mog, ailen. ² Age afe fen, aya engel taka mata ibodōya Negur nē itāfiya uris ado gaa iseyan ise mog, ailen. Ī engel aiwa adodo teneub ado maaī daū fiya nē megeir ifenēdin anidi, ait odugem iweig irokenēdin: ³ “Ā teneub be, maaī be, aa taka fau mog to daūg, amā neda Negur nē ferfer demeid bun itāfiya uris manol len.” ⁴ Age ye di, aya idi itāfiya nē uris

dinon anidi ganī anī karī aun, are 144,000 idi Israel ibor ganān bun temeleid.

⁵ Juda nē ibor bun tamal 12,000 are itāfiya uris dinon,

Ruben nē ibor bun tamal are 12,000,

Gad nē ibor bun tamal are 12,000,

⁶ Aser nē ibor bun tamal are 12,000,

Naftali nē ibor bun tamal are 12,000,

Manase nē ibor bun tamal are 12,000,

⁷ Simeon nē ibor bun tamal are 12,000,

Lewi nē ibor bun tamal are 12,000,

Isakar nē ibor bun tamal are 12,000,

⁸ Sebulun nē ibor bun tamal are 12,000,

Josef nē ibor bun tamal are 12,000,

Benjamin nē ibor bun tamal are 12,000.

Guru Fiya Mala Odug Kolos Lalau Meluk Difonundin

⁹ Anī bure fele di, aya lo afen, aya wageun an guru fiya mala odug bagai, taka nem iwesleya kisi feleya sā, idi teneub ganān bun, ibor ganān bun, tamo kayau ganān bun ado, od fire fire ganān bun temeleid, idi king nē sia wagen ado Sipsip Naal wagen difaren. Idi kolos lalau meluk difoun ken, pam boge anā boge gen anī imedim guri difen. ¹⁰ Age de fen, idi aiteid odugem diweig diron:

“Kel gei fiya are

neda Negur king nē sia bun ibodok ado

Sipsip Naal nē.”

¹¹ Engel ganān, king nē sia ado, mudur adodo ado, ererb mata ibodōya aiwa adodo salili difiyeid difar fen, king nē sia wagen neweid lē kuku de fen, Negur yana dale-sen. ¹² Idi diron:

“Momoi!

Yana yaleseya, fula fiya medeīya,

kisi biya, de fiyēya, yana odug,

megeir ado, total are

neda Negur bun gai gai ibodkalauf.

Momoi!”

¹³ Age de di, mudur adodo takam aya to fiyan, “Idi eneidi kolos lalau meluk difonun are nanidim, idi nainenem disin?”

¹⁴ Aya ī arokenen, “Tamo biya, ō keleī.”

Age au di, ī irokanan, “Eneidi are darau, kafī fiya odug bun temeleid disin. Idi dogo neid kolos meluk Sipsip Naal naud nem kulo dife di, lalaun. ¹⁵ Anī nigin, “idi Negur nē king nē sia wagen difar fen,

yogon tempel bun gaa ado bō ganan aruna daledig.

Age dife di, ī king nē sia bun ibodok anim yogon salafat biraraū fe fen, kerū fediyouf.

¹⁶ Idi baban to naū fediyouf, to naan ail fediyouf.

Gaam be, ereb uruwa adom, baban to isaīnēdiyof.

¹⁷ Ere nigin, Sipsip Naal king nē sia atun ifaref inim, dogo neid lo fiya tamo ibodōf.

Ī idi mata ibodōya nē naan warur bun gurif iroulediyof.

Age fe di, Negur ī idi meleid bun tamal maruid ganan waī falauf.”

8

Ītāfiya Uris Namba Sewen Ado Aa Gaula Sumeī Biya Nē Gol Beī

¹ Sain Sipsip Naal ītāfiya uris namba sewen anī fara fele di, saa ilun hap aua age fiya karasā sā mutū bagai yenen.

² Age fe di, aya engel sewen Negur wagen difaren anidi, taur sewen ifeneīd mog, ailen.

³ Engel taka ī, aa gaula sumeī biya nē gol beī ado isi, alta bun ifaren. Ī aa gaula sumeī biya musei, momoiya tamo kayau ganan neid kosē ado, king nē sia wagen gol alta bun sesewi fouf nigin difenen.

⁴ Aa gaula sumeī biya nē kaau, momoiya tamo kayau neid kosē ado, engel ima bun tamal Negur wagen iselen. ⁵ Agef fen, engel aa gaula sumeī biya nē beī yale, alta bun tamal yā ife fen, tenebur iran, age fe di, kolimei gudūya, gurūya odug, kolimei fliya ado, mimī wō yen.

Taur

⁶ Age fe di, engel sewen taur sewen ado, taur wese fiya nigin dodok difen.

⁷ Engel uyulil yogon taur wese fe di, uyē ais, yā naud ado bagu fen, isi di, tenebur iraran, age fe di, teneub tekelei faraf towo fiya gen anī taka adok isaikelen, aa ganan faraf towo fiya gen anī taka adok isaikelen, agef fen, fisir mata ganan isasaikelen.

⁸ Engel uyu wō yen anī dō fiya yogon taur wese fe di, ereb arei odug gen yā fitotoleya ado maaīwō iran. Maaī faraf

towo fiya gen anī taka, naud falei felen, ⁹ maaīwō ereb ereb mata ibodōya faraf towo fiya gen anī taka gare den, agef fen, waag ganan faraf towo fiya gen anī taka daū felen.

¹⁰ Anī dō fiya engel taka yogon taur wese fe di, barisa odug yal gen kaur fen, saa ilunem, naan faraf towo fiya gen anī taka bun ado, naan warur anidi bun kubū yen. ¹¹ Barisa anī nē yana Dirikeī. Naan faraf towo fiya gen anī taka dirikeī kele di, tamo kayau musei, naan dirikeī kelen anī bunem gare den.

¹² Anī dō fiya engel taka yogon taur wese fe di, gaa faraf towo fiya gen anī taka, ogō faraf towo fiya gen anī taka ado, barisa faraf towo fiya gen anī taka yū di, idi ganan faraf towo fiya gen anī taka gugum kelen. Naa faraf towo fiya gen anī taka lalan sa kelen, agef fen, bō faraf towo fiya gen anī takag age fen.

¹³ Aya lo afe mog, aya webi taka karī au mog, ilun fatutu ye fen, ait odugem iweig iron, “Malalon! Malalon! Malalon tenebur dibodok anidi bun, ere nigin, engel towog mogo taur ait wese difou fenē!”

9

¹ Engel anī dō fiya engel taka yogon taur wese fe di, aya barisa taka saa ilunem tenebur kubū yen anī ailen. Barisa are ku isil idīya sā nē ki anī ifenen. ² Ī ku isil idīya sā anī kā fele di, kaau are yā odug kū fiya modoū bun tamal gen fā yen. Ku isil idīya sā bun tamal kaau anim, gaa ado saa gugum kelen. ³ Age fe di, kaau namen tamal, totobi tenebur wowā den, are idi neid megeir, tenebur ābei neid megeir gen ifenēdin. ⁴ Idi tenebur tamal fisir be, ereb aayū be, aa taka to daū difouf, anī ere, tamo kayau idi Negur nē uris demeid bun sā anidi dogol daū difediyouf nigin irokenēdin. ⁵ Idi tamo idenkesiya nē megeir to ifenēdin, anī ere, idi ogō faif bun darau dogol difenēdiyof nigin megeir ifenēdin. Age fe di, idi neid darau arar, ābei tamo garū fe di, darau arar iledig gen. ⁶ Naa anidi bun tamo laa dimirēf, anī ere, to dilouf. Idi laa orodiyouf, anī ere, laa to gurug fediyouf.

⁷ Totobi are hos kusī bun ileyā nē gegen. Idi neid mudureid bun, ereb gol teter gen kurū difedin, idi neid neweid tamo neweid gen. ⁸ Nedi fatiyeid kayau fatiyeid gen, agef fen, waileid are laion willa gen. ⁹ Nedi siot kapa are ain nē siot kapa gen, agef fen, idi neid wayeid furūya are hos musei ado karis kusī bun gududu de fen, gou redig gen. ¹⁰ Idi ibud ado waileid ābei neid gen, agef fen, idi ibud nem ogō faif bun tamo kayau darau difenēdiyof nigin megeir adon. ¹¹ Idi uyu iroukenēdiya nē king ado, are ku isil idīya sã nē engel, in yana Hibru od nem are Abadon, Grik od nem are Apolion.*

¹² Morō odug uyulil anī bure felen, age fe di, morō odug uru are fau disif.

¹³ Engel namba sigis anī yogon taur wese fe di, aya ait taka gol alta Negur wagen ifaref anī nē karat aiwa adodo bunem wowā yeid mog, karī aun. ¹⁴ Ait are engel namba sigis taur ado anī irokenen, “Engel aiwa adodo Yufretis naan odug bun difofan anidi fara woidle.” ¹⁵ Age ye di, engel aiwa adodo are aua, naa, ogō, yar enei bun bagai, tamo teneub ganan bun fara fiya towo anī taka adok didenkesiyof nigin, dodok fedin anī folō feledin. ¹⁶ Hos teten kusī bun ileyā nē tamo anidi are 200 milion. Aya dogo neid namba karī aun.

¹⁷ Aya malau seleulã kurã fiya bun, hos adodo tamo hos tetedin dibodon anidi eig fiya ailedin: Idi neid siot kapa are, yã giriya gen, maaī gegē gen ado, bailuya salfa gen. Hos mudureid are, laion mudureid gen, agef fen, idi eweid bunem yã, kaau ado, salfa wowā yen. ¹⁸ Tamo tenebur ganan faraf towo fiya gen anī taka ganan, sane towo anim, yã, kaau ado, salfa idi eweid bun wowā yen anim didenkesin. ¹⁹ Hos idi neid megeir are eweid bun ado ibud bun ibodon, ere nigin, idi neid ibud are gogour gen fen, mudureid anim tamo kayau darau difenēdidig.

²⁰ Tamo kayau tunī ganan, sane eneidim to didenkesin anidi, idi imedim dinon anī to ditor ken, waud to falei yen. Idi kaa sesen yeneid yaleseya to ditor ken, gol, silwa, bras, meein ado, aa nē idegēya

waitou, are lo fiya, karīya be, iyōya kisi felya sã anidi yeneid yaleseya itorōya sã.

²¹ Idi tamo yukesiya, dogo neid idegēya kosēya, dogo neid noli tobonunã be, dogo neid bē yaleya tobonunã nigineg waud to falei yen.

10

Engel Ado Buk Kori Fiya Naal

¹ Anī bure fele di, aya engel megeir ado taka saa ilunem isi mog, ailen. Ī lalom silef fen, yogon mudur bun walol ado. In nawa gaa gen, agef fen, yogon ye are tor yã bobo reya gen. ² Ī buk kori fiya naal taka ima bun fara feleya iroun. Ī ye biyalē maaī bun iten ken, ye kilē teneub bun itenen. ³ Agef fen, ĩ laion ninirã ye gen ken, ait odugem iweig iron. Sain ĩ iwegin, kolimei gudūya sewen neid aiteid wogō den. ⁴ Kolimei gudūya sewen wogō de di, aya anī atotau fenē age afen, anī ere, aya ait taka saa ilunem eig ye mog, karī aun, “Ereb kolimei gudūya sewen wogō den anī bun ĩtãfiya uris uno fen, ō to utotauf.”

⁵ Age ye di, engel maaī bun ado teneub bun ifar mog ailen, are ima biyalē saa ilun yalesen. ⁶ Agef fen, engel ĩ, Negur gai gai mata ibodkeleya, saa ado ereb ereb ganan anī bun difaref, teneub ado ereb ereb ganan anī bun difaref, maaī ado ereb ereb ganan anī bun difaref inodin anī yana nem, wau kuturol fen, iron, “Foiya nē sain sã! ⁷ Anī ere, engel namba sewen anī yogon taur wese foug naa bun, Negur nē waa, ĩ yogon ferfer profet irokenēdin kilei, agef wō ye kisi falauf.”

⁸ Anī bure fele di, ait saa ilunem aya irokana di, karī aun, are baban irokanan, “Ule, engel maaī ado teneub bun ifaref anī ima bun, buk kori fiya fara feleya irouf anī wale,” yen.

⁹ Age ye di, aya engel garan ele fen, buk kori fiya naal anī ifanauf nigin arokenen. Ī aya irokanan, “Are wale wō wakas. Are ō namē bun dirikeī youf, anī ere, ō awã bun are nin te gen dan yōf.” ¹⁰ Aya buk kori fiya naal engel ima bun tamal ale on. Are neu awau bun nin te gen dan fiyan,

* **9:11:** Abadon ado Apolion nē gariya, Daū Fiya Tamo.

anī ere, aya akalaisile di, nameun dirikei fiyan. ¹¹ Age afe di, idi aya dirokanan, “Ō tamo kayau musei, teneub musei, od musei ado, king musei nigin, baban profet od wogō wouf.”

11

Od Megeir Fiya Nē Isennēya Tamo Uru

¹ Aya sisi fiya nē tibog gen werī taka ifana fen, irokanan, “Ule fen, Negur nē tempel ado alta sisi wo fen, Negur yana an ganim dalesedig anī uwes. ² Anī ere, tempel fofomala anī utor. Are to sisi wo, ere nigin, are haiden ifenēdin. Idi fotitu ogō bun taun fateul anī lai difalauf. ³ Age dife di, aya neu od megeir fiya nē isennēya tamo uru megeir afenēdi di, idi 1,260 naa anidi bun wau gudū fiya nē gabar difoun ken, profet od kurō difesiyouf.” ⁴ Eneidi are oliv aa uru ado lam tutur uru, tenebur nē Odug wagen difaref. ⁵ Takam idi darau ifenēdiya nigin age foug are, yā eweid bunem wō ye fen, idi neid kiwai tar oditekei yakur falauf. Aibem taka idi darau ifenēdiyou fenē age foug, are agef laa foug bagai. ⁶ Tamo eneidi saa katī feleya nē megeir ado nigin, idi profet od wogō douf sain, uyē to isiyouf, agef fen, idi naan falei fe di, naud wōya nigin megeir ado fen, ereb sain orodif kilei, idi ereb sane fire fire bunem teneub yūya nē megeir ado.

⁷ Idi Negur nē od kurō fesiya bure difele di, gaar kuī anī ku isil idīya sā bunem ulō yeis fen, idi geid kusī de, wal feid fen, idenkesiyouf. ⁸ Idi neid bouweid buru taun odug anī nē naabur yenēf, taun are yaab od bunem Sodom ado Isip dedig, an nedi Odugeg aa tetek bun dukesin. ⁹ Tamo kayau fire fire bun tamal, ibor fire fire bun tamal, od fire fire bun tamal ado, teneub fire fire bun tamal, tamo kayau idi, naa towo ado naa taka atun bun, nedi bouweid buru dile fen, mumā difoug nigin to yo douf. ¹⁰ Tamo kayau tenebur dibodok anidi, idi nigin waud al fe di, sifa dino fen, idi abob safina ege luwa difenēf, ere nigin, profet uru eneidi, idi tenebur dibodok anidi darau difenēdin.

¹¹ Anī ere, naa towo ado naa taka atun anī bure fele di, mata neseya nē uur Negur bunem idi namedin ilen, age fe di, idi fafā de difaren. Age dife di, idi diledin are kumī tererē den. ¹² Anī bure fele di, idi saa ilunem ait odug eig ye irokeneīd mog, karī den, “Ilun ein useg,” yen. Age ye di, idi neid kiwai lo difeid mog, idi lalo bunem saa ilun diselen.

¹³ Sain anī bun bagai, mimī odug wō ye di, taun anī bun ten tekelei adok daū felen. Sewen tausen tamo kayau mimī anim idenkesin. Age fe di, idi gareya sā are kumī tererē de fen, saa ilun nē Negur fula fiya medeīya difenen.

¹⁴ Morō odug uyu ilen anī dō fiya bure fele di, morō odug anī dō fiya mogo melsā bagai isiyou fenē.

Engel Taur Namba Sewen Anī Wese Fen

¹⁵ Engel namba sewen anī yogon taur wese fe di, saa ilun ait odug wowā ye fen, diron:

“Tenebur nē tano are, neda Odug ado yogon Kristus nē tano wō yen, age fe di, ī gai gai lo fiya nigin anī nē mudur ibodōf.”

¹⁶ Age de di, tuwenti-fo mudur adodo, Negur wagen dogo neid king nē sia bun dibodon wageidlē kuku de fen, Negur yana dales, ¹⁷ diron:

“Odug Negur saa ilun nē kusī tamo guri weid uyu uroudig anī, ō gama ubodok, kulu ubodon, amā ō de mayok,

ere nigin, ō ogon megeir odug wale fen, lo fiya nigin king wō won.

¹⁸ Teneub ganan waud sanen, anī ere, ogon didi mogo isin.

Tamo gare den anī es fediya sain mogo isin,

ogon ferfer profet, ogon tamo kayau fateul ado,

idi ogon yanā nigin anini den anidi nanaal ado odudug,

mala solo ifenēdiya sain mogo isin, idi teneub daū difef anidi daū fediya sain mogo isin.”

¹⁹ Anī bure fele di, Negur nē tempel saa ilun kā fele di, yogon tempel namen yogon bar itenēya nē bogis wō yen. Age fe di, kolimei filiya, gurūya odug, kolimei

gudŷya, mimĩ ado, uyẽ ais ado odug wõ yen.

12

Kayau Ado Gogour Odug

¹ Uris odug fire bagai saa ilun wõ yen. Kayau taka gaa ifoun kel fen, yogon ye farumen ogolam ado, yogon mudur bun barisa tuwelf nẽ teter kurũ fen. ² Ĩ bou ado fen, kesu gõ fiya sain melsã di, darau nigin kaĩ yen. ³ Age fe di, uris takag saa ilun wõ yen. Gogour giriya odug bagai mudur sewen, karat ten ado, teter sewen mudur sewen bun difaren ado wõ yen. ⁴ Yogon ibum barisa fara fiya towo anĩ taka saa ilun waĩf, tenebur iraran. Gogour odug anĩ kayau kesu gõ fiya sain melsã anĩ wagen ifaren, are ĩ yogon kesu gõ falaisi di, itobouf nigin age fen. ⁵ Kayau kesu taka gõ fen, are kesu monog, ĩ teneub ganan ain manig nem ulum irokenẽdiyof. Age fe di, yogon kesu kaisã bagai gurar fe yale, Negur ado yogon king nẽ sia wagen irouselen. ⁶ Kayau, Negurem modoũ dodok fenen nẽ gerere tuan iya ilen, an ĩ Negurem 1,260 naa kulatun fiyẽf.

⁷ Agef fen, saa ilun kusĩ wõ yen. Maikel yogon engel geid, gogour odug geid kusĩ den. Age fe di, gogour odug, yogon engel geid, abag idi geid kusĩ den. ⁸ Anĩ ere, gogour odug in engel geid, idi neid megeir kisi feleya sã, anĩ nigin, idi saa ilun nedi modoũ ditoron. ⁹ Gogour odug bagai are dale diran, are gogour kulu tamal bagai, anĩ Devil be, Satan dedig, ĩ teneub ganan idegnẽdidig. Ĩ tenebur dale dira ken, yogon engeleg ĩ geid diraran.

¹⁰ Age fe di, aya saa ilunem ait odug eig ye mog, karĩ aun:

“Gama neda Negur nẽ kel yaleya, megeir, tano ado,
yogon Kristus nẽ total mogo isin.
Ere nigin, ĩ neda turada tar bouweid yũya od irõdig,
ĩ neda Negur wagen, gaa ado bõ, idi bouweid yũya od irõdig,
are mogo dale diran.

¹¹ Idi Sipsip Naal naud bunem ado,

dogo neid Jesus nigin od wogõya bunem ĩ wal difiyen.

Idi dogo mata ibodõya nigin kisi fatuk to dale fen,

laa uyu ditoron.

¹² Anĩ nigin, saa ilun õ ado, an ufaregef ã, wauĩ kulĩ ye!

Anĩ ere, teneub ado maaĩ ã, meleĩlon ado, ere nigin, Satan mogo ã bun isilen!

Seye ĩ bun isokosef, ere nigin, ĩ keleĩ, yogon sain mogo modegef.”

¹³ Sain gogour odug ĩ tenebur diran anĩ ile fen, ĩ kayau kesu monog gõ fen anĩ iruf ilen. ¹⁴ Kayau are, gerere tuan modoũ ĩ nigin dodok fenen anĩ bun fatutu ye ilauf nigin, webi odug nẽ waye uru difenen, an kayau gogour odug anim to irounẽf nigin, yar towo ado yar taka atun, kayau anĩ kulatun difiyẽf. ¹⁵ Age fe di, gogour ĩ awa kurenem, naan odug gen, naan foula fen, are kayau anĩ wal fiye ken, kuwei bun yale irousilauf nigin age fen. ¹⁶ Anĩ ere, teneub kayau isenne ken, awa aã ye fen, gogour odug awa kurenem naan odug foula fen anĩ yakasin. ¹⁷ Age fe di, gogour odug kayau nigin fatuk bagai name fen, kayau nẽ ibor tar fau dibodok anidi ganan geid kusĩya nigin ilen, idi Negur nẽ ĩtãfiya dõ de fen, Jesus nẽ biya od dirouf anidi.

13

¹ Agef fen, gogour odug maaĩ yerin ifaren.

Gaar Kuĩ Maaĩ Namenem Ulõ Yesin

Age fe di, aya gaar kuĩ taka maaĩ namenem ulõ yeis mog, ailen. ĩ karat ten ado, mudur sewen ado fen, ĩ yogon karat ten bun teter adodo fen, mudur ganan bun Negur kono fiya nẽ yana ado. ² Gaar kuĩ aya ailen are lepat* gen, anĩ ere, yogon ye are bea nẽ ye gegen, agef fen, awa laion nẽ gen. Gogour odug yogon megeir, yogon king nẽ sia ado, total odug, gaar kuĩ ifenen. ³ Gaar kuĩ nẽ mudur taka are dũ di, laa fou fenẽ gen yenen, anĩ ere, dũ di, laa fou fenẽ gen yenen are baban biya len. Teneub ganan terẽ de fen, gaar

* 13:2: Lepat are fus kuĩ odug gen.

kuī dō difen. ⁴ Tamo idi gogour odug yana dalesen, ere nigin, ī gaar kuī megeir ifenen. Age de fen, idi gaar kuīg yana dales fen, diron, “Aim anī gaar kuī gen? Aim anī ī ado kusī yalesauf?”

⁵ Gaar kuī ī, yogo seli kulō fiya nē od ado Negur nigin kono fiya nē od wogō youf nigin sigor ifen ken, foti-tu ogō bun kabī yalouf nigin megeir ifenen. ⁶ Gaar kuī ī Negur kono fiyēf nigin, Negur yana, Negur nē ibodōya modoū ado, idi saa ilun dibodok anidi bun bou yūya od wogō youf nigin awa kamen. ⁷ Gaar kuī ī, Negur nē tamo kayau geid kusī de fen, idi wal fediyouf nigin megeir ifenen. Agef fen, ī, ibor ganan, tamo kayau ganan, od fire fire ganan ado, teneub ganan nē mudur ibodōf nigin megeir ifenen. ⁸ Tenebur dibodok anidi ganan gaar kuī yana dale-sauf, are idi, saa teneub ado kare fen sain bunem isi sain enei bun, idi yeneid Sipsip Naal dukesin anī nē mata ibodōya nē buk bun to itoton anidim age difouf.

⁹ Taka ī weder adouf, utornēg len, ī karī youf.

¹⁰ Taka ī kalabus bun ileyā nigin igirnēf, ī kalabus bun ilauf. Taka ī dimig nem dukesiyouf nigin igirnēf, dimig nem ī dukesiyouf. Enei wō youf sain bun, Negur nē tamo kayau feseya sā total difar fen, momoiya kafī difel dirouwauf.

Gaar Kuī Teneb Bunem Ulō Yesen

¹¹ Anī bure fele di, gaar kuī taka teneb-urem ulō yeis mog, ailen. Ī sipsip naal gen karat uru ado, anī ere, ī gogour odug gen wogō yedig. ¹² Ī gaar kuī uyulil ulō yesin anī lof mog, yogon megeir ganan yale fen, kabī yalen. Agef fen, ī, teneub ado idi tenebur difaref anidi ganan, gaar kuī uyulil ulō yesin, are dū di, laa fou fenē gen yenen anī baban biya len, ī yana dale-sauf nigin nugo fedin. ¹³ Agef fen, ī uris memelik odug inodin, ī tamo kayau lo de mog, age fe di, yā saa ilunem tenebur isin anīg age fen. ¹⁴ Ī gaar kuī uyulil ulō yesin anī lof mog, megeir yale fen, memelik inodin nigin, ī tenebur difaref anidi idegnēdin. Ī, gaar kuī, are dimig

nem dū di, baban biya len anī yana dale-sauf nigin, idi anī nē malakanon dinouf nigin irokenēdin. ¹⁵ Ī gaar kuī uyulil ulō yesin anī malakanon mata ifenēya nē megeir ifenen, anī bunem, malakanon are sā wogō yen, ī age fe di, idi malakanon anī yana yaleseya ditoron anidi ganan didenkesin. ¹⁶ Gaar kuī dumen ulō yesin are, tamo kayau ganan, nanaal ado odudug, safina ado ado maleg, kafī fiya sā tamo ado ferfer, uris taka imeid biyalē be, demeid bun dalouf nigin nugo fedin. ¹⁷ Age fe di, aibem taka to na yale fen, to na sur fouf, ī gaar kuī nē uris adouf anī dogol, uris are gaar kuī nē yana be, yogo yana nē namba.

¹⁸ Kisi biya adouf are, enei keleī youf. Are taka ī karīya biya adouf, ī utornēg len, gaar kuī nē namba iwesauf, ere nigin, namba are tamo nē. In namba are 666.

14

Sipsip Naal Ado 144,000 Tamo

¹ Anī bure fele di, aya lo afen, aya wageun Sipsip Naal Saion Arei bun 144,000, yogon yana ado yogon tama nē yana demeid bun itotoyan anidi, ī geid difaren. ² Age afe fen, aya ait taka saa ilunem, naan fatuk wī ye fen, gou redig gen ado, kolimei gudūya odug gen karī aun. Ait aya karī aun are, harp kodēya tamo harp kodē dedig gen. ³ Age de fen, idi, king nē sia, ereb mata ibodōya aiwa adodo ado, mudur adodo wagedin seg mata dalen. Aibem taka seg anī keleīya kisi feleya sā, 144,000 idi tenebur tamal kel gei fedin anidim dogol. ⁴ Eneidi are kayau geid yen ken, amuyē inoya sā anidi, ere nigin, idi dogo nigin karētut bagai dibodon. Idi Sipsip Naal narib ile di, idi dō de diyōdig. Idi tamo ganan atun kel geif fen, faat uyulil yūya gen, Negur ado Sipsip Naal bun sesewi fedin. ⁵ Idi sigoredin idegēya taka to wō yen, idi bouweid bun od taka sā.

Engel Towo

⁶ Anī bure fele di, aya engel taka ilun bagai fatutu ye mog, ailen. Ī idi tenebur dibodok anidi, are teneub ganan, ibor ganan, od fire fire ganan ado, tamo kayau

ganan bun kurō fesiyof nigin, mata ibodkeleya nē biya od ado ailen. ⁷ Ī ait odugem iron, “Negur anini wiyēg fen, ĩ fula fiya medeīya wenēg, ere nigin, yogon es fiya nē sain mogo isin. Ī saa, teneub, maaī ado, naan warur inodin anī yana waleseg.”

⁸ Anī dō fiya engel takam dō fiye ken, iron, “Ī kubū yen! Babilon Odug kubū yen, ĩ teneub ganan yogon seseirā tobonunā nē wain total ifeneīd don.”

⁹ Anī dō fiya engel takam dō fiyeīd fen, ait odugem iron, “Taka ĩ gaar kuī ado yogon malakanon yana yales fen, yogon uris dama bun be, ima bun yalouf, ¹⁰ ĩg Negur nē didi nē wain yāf, are mogo total adok yogon didi nē kap bun fi felen. Ī engel fateul anidi ado Sipsip Naal meleid bun, salfa yā bobo reya bun darau yalouf. ¹¹ Age fe di, dogo neid darau nē yākaau fā ye, gai gai agef ibodkalouf. Idi gaar kuī ado yogon malakanon yana dalesedig anidi be, aib taka yogon yana nē uris yalen ĩ, naa be bō, si inoya nē sain sā.” ¹² Enei wō youf sain bun, Negur nē tamo kayau, idi Negur nē itāfiya dō de fen, Jesus nigin momoiya dirou kafī difelef anidi, feseya sā megeir difarauf bagai.

¹³ Anī bure fele di, aya saa ilunem ait taka eig ye mog, karī aun, “Utot: Idi sain enei bunem ilauf ganan, Odug bun gare douf are el fediyof.”

Awa Uurem irok, “Mmoi, idi dogo neid kabī bun si dinouf, ere nigin, idi ereb age difen are ado dilauf.”

Tenebur Saaf Kusu Fiya Sain

¹⁴ Aya lo afen, aya wageun lalo lalau taka ado, lalo bun ibodon are ‘tamo naal gen,’* ĩ yogon mudur bun gol teter kurū fen, yogon ima bun dimig gunō waila ado irouf anī ailen. ¹⁵ Age fe di, engel taka tempel bunem isi fen, ĩ lalo bun ibodon anī ait odugem iweig irokenen, “Ogon dimig gunō waila ado wale fen, kokour wo, ere nigin, kokour fiya nē sain mogo isin, tenebur saaf kusu fiya nē are mogo mayol.” ¹⁶ Age ye di, lalo bun ibodon ĩ, yogon dimig gunō waila ado tenebur waī fe di, tenebur saaf kokour fen.

* **14:14:** Daniel 7:13

¹⁷ Engel taka, saa ilun oun tempel bunem isin, ĩg dimig gunō waila ado iroun. ¹⁸ Age fe di, engel takag, yā lo fedig anī alta bunem isi fen, ait odugem ĩ dimig gunō waila ado iroun anī iweig irokenen, “Ogon dimig gunō waila ado wale fen, tenebur tamal wain nē biya kuru wo, ere nigin, wain biya are mayol.” ¹⁹ Engel ĩ yogon dimig gunō waila ado anī tenebur waī fen, wain biya kuru fen, agef fen, ĩ Negur nē didi nē wain asi fiya modoū odug bun iraran. ²⁰ Wain biya are, taun yerin wain asi fiya modoū bun asi difen, age dife di, naud wain asi fiya modoū bunem isin, are 300 kilomita meluk fen, wan ado hap mita ilun.

15

Engel Sewen Teneub Daū Fiya Nē Sesen Sewen Adodo

¹ Anī bure fele di, aya saa ilun uris odug taka fire bagai ailen. Are engel sewen, idikeleya nē teneub daū fiya nē sesen sewen adodo, are idi idikeleya nē, ere nigin, idi bunem Negur nē didi idikalauf. ² Age afe fen, aya ereb taka maaī galas nem dinon anī, yā ado bagu fiya gen ail fen, idi gaar kuī, yogon malakanon ado, yogon yana nē namba kusī bun wal difen anidi, maaī yerin difaren anī ailen. Idi Negurem harp ifenēdin anī guri de fen, ³ Negur nē ferfer, Moses nē seg ado, Sipsip Naal nē seg dalen:

“Odug Negur saa ilun nē kusī tamo guri weid uyu uroudig anī,
ō agodig anī odug fen, mala yū yaleya.
Teneub ganan nē King,
ogon naab are madur fen, momoi bagai.

⁴ O Odug, aim anī ō to kumī yo ken,
ō yanā bun fula fiya medeīya to inouf?
Ere nigin, ō dogol fateul.
Ogon tobonunā biya madur bagai are yaor won nigin,
teneub ganan disi fen,
ō wagen yanā dalesauf.”

⁵ Anī bure fele di, aya lo afe mog, saa ilun oun tempel, Negur nē Od Kurō Fesiya nē Salafat Fateul, are kā fen. ⁶ Tempel

namenem, engel sewen idi teneub daũ fiya nē sesen sewen adodo anī ulō desin. Idi kolos lalau amuyē sã, medeīya difoun ken, idi akoreid bun gol let gu difedin. ⁷ Age dife di, ereb mata ibodōya aiwa adodo takam, gol beī sewen Negur mata faimud ibodkeleya nē didi isokoseya anī, engel sewen ifenēdin. ⁸ Age fe di, tempel are, Negur nē fula fiya medeīya ado yogon megeir nē kaau isokose di, engel sewen neid teneub daũ fiya nē sesen sewen anī fau bure feleya sã mog, taka nem tempel namen ileyã kisi feleya sã.

16

Beī Sewen Negur Nē Didi Ado

¹ Anī bure fele di, aya ait odug taka tempel bunem engel sewen irokeneīd fen, eig ye mog, karī aun, “Uleg, beī sewen Negur nē didi adodo anidi teneub bun fi weleg.” ² Engel uyulil ile fen, yogon beī teneub bun fi fele di, guruma sane darau odug bagai anī, tamo kayau gaar kuī nē uris ado fen, yogon malakanon yana dalesedig anidi bun, wowã yen.

³ Anī dō fiya engel taka, yogon beī maaī bun fi fele di, maaī anī laa tamo nē naud gen falei fen, age fe di, ereb ereb maaīwō mata dibodon ganan gare den.

⁴ Anī dō fiya engel taka, yogon beī, naan odudug ado naan warur anidi bun fi felen, age fe di, naud falei feledin. ⁵ Age fe di, aya engel naan lo fedig anī eig ye mog, karī aun:

“Ō gama ubodok, kulu ubodon, ō Fateul Bagai,
ō madur bagai,
ere nigin, ō mogo ago es won.

⁶ Idi ogon tamo kayau ado ogon profet didenkeis fen, dogo neid naud fi difelen,
anī nigin, ō idi naud yōya nigin wenēdin, are idi yōya kisin bagai wenēdin.”

⁷ Age ye di, aya alta eig ye mog, karī aun: “Mmoi, Odug Negur saa ilun nē kusī tamo guri weid uyu roudig anī, ogon es fiya are, momoi fen madur bagai.”

⁸ Anī dō fiya engel taka, yogon beī gaa bun fi fele di, gaa tamo kayau yã nem ifalegnēdiyof nigin megeir ifenen. ⁹ Idi uruwa total bagai bunem ifalegnēdi di, idi, Negur teneub daũ fiya nē sesen eneidi lo fedidig anī, yana kono difen, age de fen, idi waud falei ye fen, Negur yana yaleseya ditoron.

¹⁰ Anī dō fiya engel taka, yogon beī gaar kuī nē king nē sia bun fi fele di, yogon tano gugum kelen. Tamo idi darau nigin baleid mū de fen, ¹¹ dogo neid darau ado gurumeid nigin, saa ilun nē Negur kono difen. Anī ere, idi ereb sane age difen anī to ditor ken, waud to falei yen.

¹² Anī dō fiya engel taka, yogon beī Yufretis naan odug bun fi fele di, naan are, gaa iseyan tamal king disiyof nē naab dodok fiya nigin, gere kelen. ¹³ Anī bure fele di, aya kaa sesen towo felī gen, idi gogour odug awa kurem, gaar kuī awa kurem ado, idegēya profet awa kurem ulō deis mog, ailen. ¹⁴ Idi kaa sesen nē uur anidim memelik nē uris dino fen, idi teneub ganan nē king ganan bun dile fen, Negur saa ilun nē kusī tamo guri feid uyu roudig anī nē naa odug bun, idi kusī bun guru difouf nigin gou difediyof.

¹⁵ Jesus irok, “Lo welegei, aya bē tamo gen asiyof! Taka ī mulaī yenēya sa ken, yogon kolos sirin ado ibodok are, ī el fiyek, ere nigin, ī gemū to ile di, yogon mama to dilouf.”

¹⁶ Age de fen, idi king, Hibru od nem Amagedon dedig nē an guru difouf nigin gou difedin.

¹⁷ Anī dō fiya engel taka, yogon beī ilun owōbē fi fele di, tempel namenem king nē sia bunem ait odug wō ye fen, iron, “Gama mogo bure felef!” ¹⁸ Age fe di, kolimei filiya, gurūya odug, kolimei gudūya ado, mimī odug wō yen. Tamo tenebur difar mog, mimī odug age fiya taka to wō yen, mimī are gai odug bagai. ¹⁹ Taun odug Babilon are faraf towo fen, agef fen, teneub ganan nē taun daũ feledin. Negur ī Babilon Odug nigin weder fokōf fen, kap yogon didi barikā nē wain isokosen anī ifenen. ²⁰ Nuyo ganan sa kele di, areig ilediya kisi feleya sã. ²¹ Saa ilunem uyē

ais ado odug, teke tekelei 50 kilogram age fiya tamo bun kuku ren. Age fe di, idi uyē ais adom daū fedin nigin de fen, Negur kono difen, ere nigin, daū fiya are, gai sane bagai.

17

Kayau Gaar Kuī Teten Ibodon

¹ Engel sewen beī sewen adodo anī takam isi fen, aya irokanan, “Usi, aya kayau bouwa na sur fedig odug, ī naan musei teten ibodōdig anī nē kafī fiya afelnōf. ² Tenebur nē king, ī geid seseirā tobonunā dino di, tamo kayau tenebur difaref anidi, yogon seseirā tobonunā nē wain bunem, idi meleid waī yen.”

³ Age ye fen, engel ī Awa Uur bunem aya gerere tuan yale irouleyan. An aya, kayau, gaar kuī giriya, bouwa bun kono fiya yeneid barikā, mudur sewen ado, karat ten anī teten ibod mog, ailen. ⁴ Kayau ī, kolos giriya tu releya medeīya ado giriya bagai ifoun ken, gol, meein meli bagai ado, maaī tuwa meli bagai pel naki yen. Ī gol kap, ninir safineid ado yogon seseirā tobonunā nē sisik isokosen anī imam iron. ⁵ Waa nē yana are, yogon dama bun ditoton:

BABILON ODUG

KAYAU BOUWEID NA SUR FIYA ADO TENEUR NINIR IBODOK ANIDI NEID SINA.

⁶ Aya, kayau, Negur nē tamo kayau neid naudeid ado, idi Jesus nē od kurō difesin anidi, nedi naudeid yokon, mala waī ye mog, ailen.

Aya kayau anī ail fen, fatuk bagai terē aun. ⁷ Age afe di, engel aya irokanan, “Ō ere nigin terē wof? Aya, ō, kayau nē waa ado, gaar kuī kayau anī teten ibodōdig, ī mudur sewen ado fen, karat ten ado anī nē waa anī faded ayōf. ⁸ Gaar kuī ulen are, kulu ibodon, gama ibodōya sā, agef fen, ī ku isil idīya sā bunem ulō yeis fen, yogo daū falauf bun ilauf. Tamo kayau tenebur dibodok anidi, saa teneub ado kare fen sain bunem isin, idi yeneid mata ibodōya nē buk bun to itoton, idi gaar kuī anī dile fen terē douf, ere nigin, gaar kuī ī kulu ibodon, gama ibodōya sā, agef fen, fau dum isiyouf.

⁹ “Enei keleīya nigin, kisi biya adouf. Mudur sewen are, arei mudu sewen kayau teten ibodōdig anī. ¹⁰ Idig king sewen anidi. Faif idi kuku ralaisin, taka fau ibodok, taka fau isiya sā. Anī ere, ī isiyouf are, sain naal bagai ibodōf. ¹¹ Gaar kuī kulu ibodon, gama ibodōya sā, are ī namba eit king, ī sewen anidi nē taka, ī yogo daū fiya bun ilauf.

¹² “Karat ten ō ulen are, ten king idi tano fau yaleya sā anidi, anī ere, idi gaar kuī geid, aua tekelei king nē megeir dalouf. ¹³ Idi kisi tekelei ado fen, dogo neid megeir ado total, gaar kuī difenēf. ¹⁴ Idi Sipsip Naal geid kusī douf, anī ere, Sipsip Naal idi kusī bun wal fediyouf, ere nigin, ī odug neid Odug ado king neid King. Idi ī iweignēdin anī, igirnēdin anī, feseya sā dō difen anidi, ī geid difarauf.”

¹⁵ Age ye fen, engel aya irokanan, “Naan, kayau bouwa na sur fedig ī anī teten ibodon, ō ulen are, tamo kayau, guru fiya odug, teneub ganan ado, od fire fire ganan. ¹⁶ Karat ten ō ulen ado gaar kuī, idi kayau bouwa na sur fedig anī to orodiyouf. Idi ī daū difiye ken, gemū dinenēf. Idi ī bouwa dokon, yā nem tō difiyēf. ¹⁷ Negur idi neid waud bun kisi anī ino di, idi Negur nē oroya dō difouf nigin, idi kisi tekelei dino fen, dogo neid tano gaar kuī difenēf, age difef dile mog, Negur nē od kisi falauf. ¹⁸ Kayau ō ulen are, taun odug, tenebur nē king neid mudur ibodok anī.”

18

Babilon Narī Fen

¹ Anī bure fele di, aya engel taka saa ilunem isi mog, ailen. Ī megeir odug ado, age fe di, yogon fula fiya medeīya anim teneub lalan len. ² Ī ait odugem, total bagai iweig iron:

“Kubū yen! Babilon Odug kubū yen!

Ī, kaa sesen neid fō,
kaa sesen ganan neid fō ado,
ninā amuyē ado ninir sane to ile oroya
ganan neid fō falei fen.

³ Teneub ganan,
yogon seseirā tobonunā nē wain total
don.

Tenebur nē king, ī geid seseirā tobonunā dinon,

age fe di, tenebur nē bisnis tamo idi, yogon safina nigin oroya total ado bunem, safina musei dalen.”

⁴ Anī bure fele di, aya ait taka saa ilunem eig ye mog, karī aun:

“Neu tamo kayau, ā yogon mosor anī utin to walogouf nigin ado,

ā in mala solo sane taka to walogouf nigin,

ā ī utornēg fen, usig,

⁵ ere nigin, yogon mosor mogo mudu ilun isel saa ilune di,

Negur yogon idododin nigin weder fokō yen.

⁶ Ī ifenein kilei abag wenēgouf,

ereb ī age fen are, ī age fen anī ado, taka teten unog fen, wenēgouf.

Ereb ī yogon kap bun falei fen are, ī falei fen anī ado, taka falei ge fen, teten unogouf.

⁷ Ī fula fiya medeīya ado safina meli meli, yogo nigin yalen kilei,

darau ado wau gudū fiya fatuk bagai wenēgouf.

Ī yogon wau bun, yogo yana yales fen,

‘Aya kuin abodok, aya waab sā, agef fen, aya to bagai wau gudū fouf,’ yen.

⁸ Anī nigin, naa taka bun, in daū fiyēya nē sesen ī bun isiyouf,

are laa, wau gudū fiya ado, kadir.

Agef fen, ī yā bun isaikalauf,

ere nigin, Odug Negur ī es fiyek, ī anī megeir barikā.

⁹ “Tenebur nē king idi, ī geid seseirā tobonunā dino fen, yogon safina meli meli foi difen anidi, ī isaī di, kaau dile fen, idi ī nigin waud gudūf fen, inā logurouf. ¹⁰ Idi in darau yaleya anī nigin fatuk bagai kumī de fen, gerō difar fen, dirōf:

“ ‘Malalon! Malalon, O taun odug, O Babilon, taun megeir ado!

Aua tekelei bun, ogon daū fiya mogo isin!’

¹¹ “Tenebur nē bisnis tamo idi ī nigin waud gudūf fen, inā logurouf, ere nigin, taka nem idi neid safina baban to na yalouf, ¹² safina are, gol, silwa, meein meli meli ado, maaī tuwa meli bagai pel; gabar

lalau medeīya, gabar giriya tu releya medeīya, gabar slika ado, gabar giriya bagai; aa meli meli fire fire; ereb ereb fire fire elefan karat nem, aa meli meli nem, bras nem, ain nem ado, mambol nem dinodin; ¹³ sinamon, ye, aa gaula sumeī nigin tō fiyadig, moul aa bun tamal sumeī biya biya ado, moul biya takag; wain ado oliv moul; flawa ado wit, bulmakau ado sipsip; hos ado karis, ferfer ado tamo mata dibodok.

¹⁴ “Idi dirōf, ‘Ereb ereb yaleya nigin ō oroyon are, mogo sa kelen. Ogon safina musei ado ereb ereb fula fiya medeīya ganan, mogo sa kelen, idi baban to bagai fotou difouf.’ ¹⁵ Bisnis tamo safina eneidi na sur dife fen, ī bunem safina musei dalen anidi, yogon darau nigin fatuk bagai kumī de fen, gerō difarauf. Idi inā logur fen, waud gudūf fen, ¹⁶ diweig dirōf:

“ ‘Malalon! Malalon, O taun odug, kolos lalau meli bagai, giriya tu releya medeīya ado, giriya bagai ifoun ken, gol, meein meli bagai ado, maaī tuwa meli bagai pel naki yen!

¹⁷ Aua tekelei bun dogol, safina odug bagai age fiya daū felen!’

“Maaī bun ulum irouya tamo ganan, idi waag bun diyōdig ganan ado, idi maaī bunem dogo neid mata ibodōya nē safina daledig anidi ganan, gerō bagai difarauf.

¹⁸ Sain idi ī isaī di, kaau dile fen, idi diweig dirōf, ‘Taun odug eig fiya taka tau ibodon?’

¹⁹ Idi aas mudureid bun digu ken, waud gudū fe di, inā logur fen, diweig dirōf:

“ ‘Malalon! Malalon, O taun odug, an idi maaī bun waag adon ganan, yogon safina odug bunem safina musei dalen!

Aua tekelei bun, are daū felen!

²⁰ O saa ilun, ī nigin waū kulī ye!

Negur nē tamo kayau, aposel ado, profet, wauī kulīg!

Ī ā age yein kilei, Negur ī es fiyen.’ ”

²¹ Age ye fen, engel megeir ado, meein odug wit itutuya nē age fiya, yale fen, maaīwō ira ken, iron:

“Waila sane eig fiya bunem,

Babilon taun odug agef daū fe di, baban to bagai dilouf.

²² Harp kodēya tamo, seg tamo, kelel fiya tamo ado, taur fūya tamo, idi neid ailō ō bun baban to bagai karī douf.

Kabī fire fire ganan nē keleī tamo, ō bun baban taka to bagai wō youf. Wit itutuya nē meein ait, ō bun baban to bagai karī douf.

²³ Lam nē lalan ō bun baban to bagai so fouf.

Tamo kayau yalef yalef yeya ait, ō bun baban to bagai wō youf.

Ogon bisnis tamo idi, teneub ganan nē tamo odug.

Ō ogon idegēya kosē bunem, teneub ganan udegnēdin.

²⁴ Profet, Negur nē tamo kayau ado, tenebur ein didenkesin anidi ganan neid naudeid, ī bun dilen.”

19

Halleluya!

¹ Anī bure fele di, aya saa ilun tamo kayau guru fiya mala odug neid aiteid gou reya gen, karī aun:

“Halleluya!

Kel gei fiya, fula fiya medeīya ado, megeir are, neda Negur nē.

² Yogon es fiya are, momoi fen madur bagai.

Ī kayau bouwa na sur fedig odug, ī yogon seseirā tobonunā bunem teneub daū fen anī, es fiyen.

Ī yogon ferfer neid naudeid, anī mala solo ī bun ifenen.”

³ Idi baban diweig diron:

“Halleluya!

Ī bunem kaau faimud gai gai iselauf.”

⁴ Mudur adodo tuwenti-fo ado, ereb mata ibodōya aiwa adodo, kuku de fen, Negur king nē sia bun ibodon anī yana dalesen. Age de fen, idi diweig diron: “Momoi, Halleluya!”

⁵ Age dife di, ait taka, king nē sia bunem wō ye fen, iron:

“Ā in ferfer ganan, ī anini wiyēgedig, nanaal ado odudug, neda Negur yana waleseg!”

⁶ Age ye di, aya guru fiya mala odug aiteid gen karī aun, are naan fatuk wī ye fen, gou redig gen ado, kolimei gudūya odug gen, diweig dirō mog, karī aun: “Halleluya!

Ere nigin, neda Odug Negur saa ilun nē kusī tamo guri feid uyu iroudig anī, ī lo fiya nigin king ibodok.

⁷ Ada wauda kulī ye, wauda al fe fen, fula fiya medeīya tafenēf!

Ere nigin, Sipsip Naal kayau yaleya nē naa mogo isin, age fe di, yogon kayau mois mogo yogo nigin dodok fen.

⁸ Kolos lalau meli bagai, medeīya ado fil-
iya, ī ifonūf nigin ifenen.”

(Kolos lalau meli bagai are, Negur nē tamo kayau neid tobonuneid madur anī.)

⁹ Anī bure fele di, engel aya irokanan, “Utot: ‘Idi Sipsip Naal kayau mois ado bagu fiya nē sifa bun ibodōya nigin iweignēdin are, idi el fedif!’ ” Age ye fen, ī tobol fe iron, “Enei are, Negur nē od momoi bagai.”

¹⁰ Age fe di, aya ī yana alesauf nigin, ye gariyan kubū aun. Anī ere, ī aya irokanan, “To ago! Aya, ō ado, ogon turā tar idi Jesus nē wogōya kafī difel dirouf anidi geid, ada in ferfer. Negur yana wales! Ere nigin, Jesus nigin wogōya are, profet od wogōya nē uur anī.”

Tamo Hos Lalau Teten Ibodon

¹¹ Aya saa ilun kā feleya ifar mog, aya wageun an hos lalau ifar mog, ailen. Tamo anī teten ibodon are, yana ‘Feseya Sā Dō Fiya Biya’ ado ‘Momoi Bagai’ dedig. Madur bagai bunem, ī es feid fen, kusī yedig. ¹² Yogon mala are, yā mala fitotoleya gen, agef fen, yogon mudur bun teter musei biya. Ī yogo bun yana itotoya taka ado, are aibem taka to keleī, ī yogo dogol.

¹³ Ī kolos meluk naud bun nu fen anī ifonun. Yogon yana are, Negur nē Od. ¹⁴ Saa ilun nē kusī tamo, idi hos lalau tetedin dibodada ken, kolos meli bagai, lalau filiya difoun ken, ī dō difiyen. ¹⁵ Ī yogon awa bunem, dimig willa ado, teneub ganan yūf nigin wō yen. “Ī ain manig nem ulum

* 19:15: Sam 2:9

iroukenēdiyof.”* Ī, Negur saa ilun nē kusī tamo guri feid uyu iroudig anī nē didi totol nē wain asi fiya modoū bun, asi foug.

¹⁶ Ī, yogon kolos meluk bun ado yogon tukuri bun, yana enei itotoya ibodok:

KING NEID KING ADO ODUG NEID ODUG.

¹⁷ Age afe fen, aya engel taka gaa bun ifar mog, ailen, ĩ ait odugem ninā ganan ilun fatutu def anidi iweig iro-kenēdin, “Usig, Negur nē sifa odug bun gurug, ¹⁸ agog fen, ā, king bouweid, kusī mudur bouweid, tamo megeir adodo neid bouweid, hos ado hos tetedin dibodadak anidi neid bouweid, tamo kayau ganan, kafī fiya sã tamo ado ferfer, nanaal ado odudug, bouweid wãgauf.”

¹⁹ Anī bure fele di, aya, gaar kuī, tenebur nē king ado, dogo neid kusī tamo idi, tamo hos teten ibodon anī, yogon kusī tamo geid weim kusī douf nigin, guru de mog, ailedin. ²⁰ Anī ere, gaar kuī are dale diroun, age de fen, idegēya profet, ĩ memelik nē uris gaar kuī mala bun inodin anīg, gaar kuī ado dale diroun. Uris anidi bunem, ĩ, idi gaar kuī nē uris dalen anidi ado, idi yogon malakanon yana dalesedig anidi idegnēdin. Idi urom mata dibod mog, ku kolili fiya meein salfa yã bobo reya barikã ado bun, gei de diraran. ²¹ Dogo neid kusī tamo ganan, dimig, tamo hos teten ibodon awa bunem wō yen anim, idenkesin, age fe di, ninā ganan idi neid bouweid dō dō, teid isokosen.

20

Tausen Yar

¹ Anī bure fele di, aya engel taka saa ilunem, ĩ ku isil idīya sã nē ki ado, sen odug imam irou fen, isi mog, ailen. ² Ī gogour odug, gogour kulu tamal bagai, are Devil be Satan dedig anī yale fen, tausen yar ifarauf nigin sen nem ifokelen. ³ Ī ku isil idīya sã bun ira ken, ku katī fel fen, anī teten itāfiya uris inon. Ī tenebur tamo kayau to idegneid mog, tausen yar ilauf nigin age fen. Anī bure fele di, sain tobega dogol ĩ folō fiyekalauf.

⁴ Aya, king nē sia anidi bun, idi es fiya nē megeir ifenēdin anidi dibod mog, ailedin. Age afe fen, aya, dogo neid biya

od Jesus nigin wogō den ado, Negur nē od nigin, uleid kokour difedin anidi neid meleidkanon ailen. Idi gaar kuī be, yogon malakanon yana to dales fen, yogon uris demeid bun be, imeid bun to dalen. Idi mata ke de, fã de fen, Kristus geid, lo fiya nigin tausen yar ilauf anī nē mudur dibodon. ⁵ (Tamo gare den tunī ganan to ke de, fã de mog, tausen yar are bure felen.) Enei are, kel fãya uyulil anī. ⁶ Idi kel fãya uyulil anī bun ke de, fã den are, idi el feid fen, fateul. Laa uyulil anī dō fiya isif are, idi bun megeir sã. Anī ere, idi Negur nē ado Kristus nē pris dibod ken, tausen yar anī bun, Kristus geid, lo fiya nigin mudur dibodōf.

Satan Daū Felen

⁷ Tausen yar anī bure fele di, Satan ĩ yogon kalabus bun tamal yalelnē di, ⁸ ĩ tamo kayau teneub ganan bun idegnēdiyof nigin, teneub idīyan aiwa adodo, are Gog ado Magog bun ile fen, idi kusī bun ileya nigin gou fediyof. Idi neid namba are, maaī ubun mumul ifaref age fiya. ⁹ Idi teneub modoū odug bun dile fen, Negur nē tamo kayau neid modoū ado, taun Negur anī nigin wau laa fedig anī salili difen. Anī ere, yã saa ilunem isi fen, idi yakur feidlen. ¹⁰ Age fe di, Satan idi idegnēdin are, ku kolili fiya meein salfa yã bobo reya ado bun dale diran, gaar kuī ado idegēya profet idi ketem mogo an diraran. Idi ganan an sain ganan, bō ado gaa ado, gai gai darau dalouf.

Gare Den Anidi Es Fediyof

¹¹ Anī bure fele di, aya king nē sia lalau odug ado, taka anī teten ibodon anī ailen. Teneub ado saa, ĩ mala iran nē waif yale di, idi modoū san. ¹² Age fe di, aya, gare den anidi, odudug ado nanaal, sia wagen difaren ado, buk ikoudiya anidig ailedin. Buk takag ikouya ailen are, mata ibodōya nē buk. Gare den anidi, erab age difen buk bun itoton anī kilei, es fedin. ¹³ Maaī bun gare den anidi, maaim ifenēdi di, laa ado Hades, gare de di, idi bun difaren anidi difenēdin. Age fe di, mugu mugu erab age difen kilei, es fedin. ¹⁴ Age fe di, laa ado Hades, ku kolili fiya yã bobo reya ado bun

geif iraran. Ku kolili fiya yā bobo reya ado, are laa uyulil isin anī dō fiya laa anī. ¹⁵ Aib taka ī, yogon yana mata ibodōya nē buk bun itotoya sã ilen, ī ku kolili fiya yā bobo reya ado bun, yale iran.

21

Jerusalem Mata

¹ Anī bure fele di, aya, saa mata ado teneub mata, ailen. Saa uyulil ado teneub uyulil are waif yalen, agef fen, maaī baban to ibodon. ² Aya Taun Fateul, are Jerusalem mata, Negur bun tamal, saa ilunem isi mog, ailen, are kayau mois tamon ileya nigin naki rel fen, dodok fen gen. ³ Age afe fen, aya ait odug king nē sia bunem eig ye mog, karī aun, “Gama Negur nē salafat, tamo bun ibodok, age fe di, ī idi geid dibodōf. Idi yogon tamo kayau ouf, age fe di, Negur yogo bagai, idi geid dibod ken, idi neid Negur ibodōf. ⁴ Ī idi neid meleid bun maruid ganan waī falauf. Baban laa, wau gudū fiya, inā yaleya be, darau to ibodōf, ere nigin, ereb ereb tubu nē are, ganan sa kelen.”

⁵ Ī king nē sia bun ibodon are iron, “Aya ereb ereb ganan mata anof!” Age ye fen, ī iron, “Enei utot, ere nigin, od eneidi are, agef bagai wō youf nigin momoi bagai.”

⁶ Ī aya irokanan, “Gama mogo bure felen. Aya uyulil ado idikeleya, gariya ado idikeleya. Taka ī naan ail fouf, aya ī mata ifenēya nē naan warur bun tamal, mala sã, afenē di, yāf. ⁷ Taka ī kusī wal fouf, ī enei ganan akorouf, age fe di, aya yogon Negure di, ī neu kesu ibodōf. ⁸ Anī ere, idi dume dume age difedig, momoiya sã, tobonunã sane bagai dinodig, tamo duke-sidig, noli tobonunã dinodig, idegēya bun kosē dedig, idegēya waitou yana dalesedig ado, idegēya tamo ganan, idi neid modou are, ku kolili fiya meein salfa yā bobo reya barikã ado bun. Enei are, laa uyulil dō fiya namba tu laa anī.”

⁹ Engel sewen anī taka, beī sewen idikeleya nē sesen barikã teneub daū fiya nē ado anī taka, isi fen, aya irokanan, “Usi, aya kayau mois, Sipsip Naal nē kayau anī afelnōf.” ¹⁰ Age ye fen, ī aya Awa Ur bunem arei odug ilun bagai anī bun

irouleya fen, Taun Fateul, Jerusalem, Negur bun tamal saa ilunem isi mog, ifelnan.

¹¹ Taun are, Negur nē fula fiya medeīya anim so fen. Yogon medeīya are, meein na sur fiya nē meli bagai jasper gen, yogon filiya are, galas medeīya bagai gen.

¹² Taun are, yogon garaī odug ilun fen, bobog tuwelf ado. Agef fen, engel tuwelf bobog bun difaren. Bobog bun, Israel ibor tuwelf anidi yeneid itoton. ¹³ Bobog towo gaa iseyan, bobog towo not melē, bobog towo saut melē, bobog towo gaa ileyen age de difaren. ¹⁴ Taun anī nē garaī, gariya tuwelf ado, gariya tuwelf anī bun, Sipsip Naal nē aposel tuwelf yeneid ado.

¹⁵ Engel aya wogō fiyan are, ī taun, taun nē bobog ado, yogon garaī sisi fediyouf nigin, sisi fiya nē gol tibog iron. ¹⁶ Taun nē bagalam ado bogorou kilei kilei inon. Engel are tibog nem taun sisi fe fen, ilen, 2,200 kilomita meluk, yogon bagalam ado yogon ilun areg de anī kilei. ¹⁷ Engel ī, tamo nē sisi fiya bunem, taun garaī nē mugi sisi fen, are 65 mita, areg engel nē sisi fiya. ¹⁸ Garaī are, meein jasper nem inon. Agef fen, taun are gol bagai nem dogol inon, gol filiya are galas medeīya bagai gen. ¹⁹ Taun garaī nē gariya are, meein meli bagai fire fire nem, naki fen. Gariya uyulil ifaren are jasper nem, anī dō fiya are meein maaī gegē gen sapaia nem, anī dō fiya are meein kalsedoni nem, anī dō fiya are meein aarau mata gen emeral nem, ²⁰ anī dō fiya are meein giriya ado lalau sadonikis nem, anī dō fiya are meein giriya konilian nem, anī dō fiya are meein aarau mayo gen krisolait nem, anī dō fiya are meein aarau mata gen beril nem, anī dō fiya are meein aarau mayo gen topas nem, anī dō fiya are meein krispres nem, anī dō fiya are meein haiasin nem, anī dō fiya are meein giriya ametis nem. ²¹ Bobog tuwelf are maaī tuwa meli bagai pel tuwelf, bobog teke tekelei, maaī tuwa meli bagai pel teke tekelei nem inon. Taun nē naab odug are, galas karētut bagai gen, gol bagai nem dogol inon.

²² Aya taun an tempel taka to ailen, ere nigin, Odug Negur saa ilun nē kusī tamo guri feid uyu iroudig anī ado Sipsip Naal

are, idi anī tempel. ²³ Taun are, gaa lalan be, ogō lalan yaleya nigin to yenek, ere nigin, Negur nē fula fiya medeīya anim lalan ifenēdig, agef fen, Sipsip Naal are taun nē lam. ²⁴ Tenebur tamo kayau, taun anī nē lalan bun diyō di, tenebur nē king, nedi fula fiya medeīya, taun anī bun dirousiyouf. ²⁵ Naa taka bun, yogon bobog taka to bagai inolalauf, ere nigin, an bō sāf. ²⁶ Tenebur tamo kayau idi, nedi fula fiya medeīya ado yana odug, taun anī bun dirou disiyouf. ²⁷ Ereb taka amuyē ado an namen to ilauf, agef fen, aib taka mama nē tobonunā age fedig be, idegēdig, īg an to ilauf, anī ere, idi yeneid Sipsip Naal nē mata ibodōya nē buk bun itoton anidi dogol dilauf.

22

Mata Ifenēya Nē Naan Odug

¹ Anī bure fele di, engel ī, aya, naan odug, mata ifenēya nē naan, are karētut galas medeīya bagai gen, Negur nē ado Sipsip Naal nē king nē sia bunem isif anī ifelnan, ² naan are taun nē naab odug atu isilen. Naan si sitakā, mata ifenēya nē aa difaren, are yar tekelei bun faat yū tuwelf fedig, ogō teke tekelei bun yogon faat yūdig. Agef fen, aa aarau are, tenebur tamo kayau dagi yalelkenēdiya nē. ³ Isisīya taka baban to ibodōf. Negur nē ado Sipsip Naal nē king nē sia are, taun namen ibodōf, age fe di, yogon ferfer idi, in aruna dalouf. ⁴ Idi in nawa dilouf, age dife di, yogon yana idi demeid bun ibodōf. ⁵ Baban bō taka to ibodōf. Idi lam nē lalan be, gaa nē lalan nigin, to kisi difouf, ere nigin, Odug Negur idi lalan ifenēdiyof. Age fe di, idi gai gai lo fiya nigin mudur dibodōf. ⁶ Engel ī aya irokanan, “Od eneidi are, agef bagai wō youf nigin momoi bagai. Odug, profet neid uur nē Negur, ī ereb mogo wō youf bagai anī yogon ferfer ifelnēdiyof nigin, yogon engel sur fen.”

Jesus Mogo Isif

⁷ “Ulef! Aya mogo kaisā bagai asiyof fenē! Taka ī profet od buk enei bun ibodok anī dō fef are, ī el fiyek.”

⁸ Aya, Jon, ayam eneidi karī au fen, ailedin. Sain aya anī karī au fen, ailedin, aya engel aya ifelnan anī, ye gariyan kubū au fen, yana alesauf nigin age afen. ⁹ Anī ere, ī aya irokanan, “To ago! Aya, ō, ogon turā tar profet ado, idi buk enei nē od dō difef anidi ganan geid, ada in ferfer. Negur yana wales!”

¹⁰ Age ye fen, ī aya irokanan, “Ō buk enei nē profet od anī bun, itāfiya uris to uno, ere nigin, sain mogo melsak. ¹¹ Aib ī mosor inof, utornēg len, ī agef mosorei youf. Aib ī sane age fef, utornēg len, ī sane agei fouf. Aib ī biya age fef, utornēg len, ī biya agei fouf. Aib ī fateul ibodok, utornēg len, ī fateulei youf.”

¹² Jesus irok, “Ulef! Aya mogo kaisā bagai asiyof fenē! Mala solo tamo ifenēdiya nē are yeir, aya bun ibodok, anī nigin, aya, tamo mugu mugu ereb age difen kilei anī afenēdiyof. ¹³ Aya uyulil ado idikeleya, uyulil nē ado dumen bagai nē, gariya ado idikeleya.

¹⁴ “Idi dogo neid kolos meluk kulo difef, anī bunem, idi mata ifenēya nē aa bun ileya nigin ado, taun nē bobog bunem taun namen ileya nigin kisi feleya, are idi el fedif. ¹⁵ Mayarē difaref are, idi gaū, idi idegēya bunem kosē dedig, noli tobonunā dinodig, tamo dukesidig, idegēya waitou yana dalesedig ado, idi ganan idegēya nigin waud laaf fen, age difedig anidi.

¹⁶ “Aya, Jesus, ayam kurō fesiya od enei sios nigin afeneif nigin, ā bun neu engel sur afen. Aya Dawid nē Warumutei ado Ibor, Bonimeī nē Barisa medeīya.”

¹⁷ Awa Uur ado kayau mois dirok, “Usi!” Aib taka ī karī yef, irōf, “Usi!” Aib taka ī naan ail fef, utornēg len, ī isiyof. Aib taka ī orof, utornēg len, ī mata ifenēya nē naan ege luwa yalouf.

¹⁸ Aya, idi ganan buk enei nē profet od karī def anī, totol bagai arokenēdif: Aibem taka od enei teten ereb taka tobol fouf, Negur ī daū fiya nē sesen buk enei bun itoton anī, ī bun tobol fouf. ¹⁹ Agef fen, aib taka profet od nē buk enei bun od taka yalelauf, Negur ī, mata ifenēya nē aa ado taun fateul, buk enei bun faded fel itoton anidi bun tamal, ī yalelnēf.

²⁰ Taka ã enei ganan kurŏ fesif, are irok,
“Mmoi, aya mogo kaisã bagai asiyou
fenẽ.”

Mmoi. Odug Jesus usi.

²¹ Odug Jesus nẽ wau ifenẽya, Negur nẽ
tamo kayau bun ibodŏf. Mmoi.

Od Marik Nu Testamen Enei Bun Ifaredif Nē Fadedya

Aa Fig

Aa fig are aa taka, in faat anī yōya nigin dan bagai.

Aa Gaula Sumeĩ Biya (Luk 1:9-11; Rev-lesen 8:3, 4)

Aa gaula sumeĩ biya are aa taka nē sumin aarau ado warumutei anidi bunem dinodig. Tempel bun, tamo kayau Negur bun kosē douf sain bun, aa gaula sumeĩ biya anī tō difedig, are sumeĩ meli bagai youf nigin.

Aa Hisop (Jon 19:29; Hibrū 9:19)

Aa hisop are aa taka, pris idi naan be naud bun nu difeis fen, safina bun be tamo kayau bun wiri difedig, are idi suma anī bunem Negur nē lo fiya bun fateul wō youf nigin age difedig.

Aa Oliv (Rom 11:17, 24; Jems 3:12; Rev-lesen 11:4)

Aa Oliv are aa taka, anī faat adodig. Juda idi aa oliv faat nem moul dinodig. Moul anī saaf yabiya nigin, bouwa bun wā fiya di, sumeĩ biyauf nigin ado ereb tunī musei nigineg anī kabī difenēdig. Juda idi neid ibodōya bun, oliv are safina odug bagai. Aa Oliv nē Arei are arei taka Jerusalem non ibodok, an aa oliv ifaredidig.

Aa Tetek

Rom tamo kayau neid tobonunā bun, tamo taka ereb sane bagai age fen ouf, are eig fiya, taka yukesiya be, taka fefu fiye ken, bē yaleya anī, idi ī kafī fiya bun aa tetek ilun dū di, laa foug nigin age difedig.

Idi aa masak uru aninem aa tetek dinodig, age difel fen, idi tutim tamo aa tetek bun dūdig, oo, malum ī difōdig. Age de fen, idi aa tetek dales diteg ifare di, tamo an ditornē di, ī an kuuri yef ile laa fedig. Tamo taka ī aa tetek bun eig de duk, ī darau odug bagai yalef ile fen, dum ī laa fedig. Are anīg taka, mama yaleya nigin odug bagai.

Aa Wain Faat

Aa wain faat are faat taka. Anī bunem wain dinodig. Juda idi nedi kabier aa wain musei ditenēdig, age de fen, idi aa wain faat musei youf nigin aa wain el de lo difedig.

Abel (Matyu 23:35; Luk 11:51; Hibrū 11:4, 12:24)

Abel are, ī Kain tura naal.

Abraham

Abraham ī, Israel tamo kayau neid temeid matu. Kulu bagai, Negur ī Abraham irokenen, are ī teneub mata taka ī an ibodōf nigin ifenēf yen. Age fe di, teneub anī dogo neid bagai youf. Abraham yogon fō gariya itor ken, ile teneub anī imirēf nigin Negur ī irokenen. Abraham dōf age fen. Ī yar musei, gerō bagai iyok ile, ile teneub anī fotou fen. Teneub are gama Israel dedig anī.

Are Abraham bun, Negur in uyulil bar itenēya anī inon. Negur ī Abraham irokenen, ī ado in ibor tar anī, Negur nē tamo kayau bagai wowā youf, aib idi Negur dō difoug are, Negur idi kulatun fediyouf yen.

Abraham aiwa, Sara dedig anī yalen. Idi kesu taka yaleya san, ile ile, idi uruwom tubau bagain. Anī nigin, Negur memelik ino di, Sara kesu gō fen. Idi kesu yana dū Isak den.

Isak ī biya fen, ī kayau Rebeka dedig anī yalen. Rebeka kesu uru gō fen, are idi aina ado, idi yeneid are Esau, Jakop ado. Jakop ī yana takag Israel, ī bunem Juda idi, Israel tamo kayau yeya yana anī dalen.

Kesu monog uru anidi taka, Jakop ī kayau uru tura ado anī gei fen, idi yeneid Lea, Rahel ado, babaneg kayau uru yalen. Ī kesu monog tuwelf gogū fen, idi anī Israel ibor tuwelf neid tubuid tar. Idi yeneid Jon nē kurō fesiya od 7:4-8 (Revelesen 7:4-8) nē itotoya bun gī fen.

Kesus monog eneidi, kesu musei adodof ile, Israel tamo kayau fulus bagai felen. Anī nigin, idi adok Abraham nē ibor tar.

Adam (Luk 3:38; Rom 5:14; 1 Korin 15:22, 45; 1 Timoti 2:13, 14; Jud 14)

Negur uyulil tamo inon, are Adam. Negur ī Adam kare fiyen, are teneub

nem.

Adam ī, aiwa Eva adom, uyulil Negur nē itāfiya difodul ken, mosor dinon. Sain anī bunem ilen, tamo mosor bun dilelen.

1 Korin 15:45 bun, Jesus kristus ī, idikeleya nē Adam yef, ere nigin, ī tamo kayau, nedi mosor bun tamal kel gei fedin. Adam im mosor inon, anim tamo kayau tunī ganān mosor bun dilelen. Jesus Kristus, tamo kayau dogo neid mosor bun tamal kel gei feid fen, idi ibodōya mata anī ifenēdin.

Alabasta (Matyu 26:7; Mak 14:3; Luk 7:37)

Sain taka bun, kayau taka, moul sumeī meli bagai anī, Jesus ye kulo foug nigin irou isin. Moul enei, gulub taka, are meein gariya fire taka nem dinon anī namen ibodon. Meein age fiya anī alabasta dedig.

Alta

Juda idi, Negur bun sesewi fediya anī age difedig. Idi, sesewi fiya nigin, yaro, are sipsip, meme be, bulmakau age fediya anī didenkesidig. Alta are, modoū an sesewi difedig. Meein nem anī dinodig.

Aposel

Jesus uyulil in dō fiya tar tuwelf igitnēdin, are idi yogon aposel wowā douf nigin (Matyu 10:1-4; Mak 3:13-19; Luk 6:12-16).

Tamo enidi ī geid dibod ken, ifelnēdin. Jesus laaf fen, kel fā yen sain bun, idi ī meledim dilen. Ī, tamo kayau bun, ereb idi dilen ado biya od wogō difediyof nigin idi susur fedin. Idi, tamo kayau Jesus nigin momoi den anidi neid uyu irouya wowā den.

Aposel nē buk bun, Pol, Banabas ado, tamo tunīg, are idig aposel dedig. Idig tamo Jesus Kristus nē kabī yaleya nigin igitnēdin. Inglis nem, tamo enidi are 'apostles' dedig. Od enei nē gariya are, tamo idi susur fedif anidi.

Areopagus (Aposel 17:19-22; 34)

Areopagus are, arei mudu taka nē yana Atens taun ibodon. Taun tamo kayau yeneid adodo arei mudu anī bun guru difedig. Anī nigin, tamo kayau

anidi neid guru fiya anīg Areopagus dedig.

Aron (Luk 1:5; Aposel 7:40; Hibu 5:4, 7:11, 9:4)

Aron ī, Jakop nē gere tar tuwelf atun taka Lewi nē ibor bun tamal anī taka. Tamo anī, ī pris kabī yalouf nigin uyulil igitnēdin, are Negur ī iron, Aron nē ibor tar anidi, Israel tamo kayau are Juda anidi atun, pris dibodōf, yen.

Aron ī, are Moses tura biya. Idi uruwom uyu kū de fen, Israel tamo kayau Isip neid ferfer difaren sain bun, kabī dalen. Idi israel tamo kayau kafī fiya bun tamal dalelnēdiyof nigin uyu diroun.

Sain taka bun, Israel tamo kayau tunī, Moses ado Aron kiwai difenēdi di, Negur ī, idi anī uyu irouya tamo bagai igitnēdin anī yaor fe ifelnēdin. Negur, idi Israel ibor tuwelf uyu irouya morou morou neid manig dale, Negur nē Salafat bun gō difoug nigin irokenēdin. Negur ī iron, tamo ī uyu irouya ibodōf nigin igitnēdin, are yogon manig ifaraūf, yen. Naa taka di, Aron nē manig bonu fel, ifirau kel fen, faat yun. Negur iron, sain anī bunem ilauf ganān, Aron nē manig enei are Negur nē Salafat bun bar itenēya nē bogis namen uris gen ibodōf, yen.

Asaia (Matyu 3:3; Aposel 8:30; Rom 9:27-29)

Asaia ī Negur nē propet odug taka. Kulu bagai Jesus Kristus tenebur isiya sā mog, Asaia ereb musei ī bun wowā youf anī nigin wogō yen.

Atemis (Aposel 19:24-35)

Atemis are kayau waitou taka yana, anī Asia teneub bun, tamo kayau musei, ī yana dalesedig.

Awa Uur Fateul

Awa Uur Fateul are Negur nē Uur. Awa Uur Fateul, Negur, Jesus Kristus, idi are tekelei (Matyu 28:19). Negur nē Awa Uur, tamo kayau Jesus Kristus nigin momoi def anidi bun ibodōdig. Ī kabī yaledig are eig fiya:

1. Ī tamo kayau momoi anī keleī youf nigin age fedig (Jon 16:13; 1 Korin 2:10-13).

2. Ī idi Jesus Kristus nigin momoi def anidi nigin, Negur kosē fiyēdig (Rom 8:26).
3. Ī tamo kayau Negur nē naab keleī youf nigin, ulum iroukenēdidig (Aposel 13:2; 16:6, 7).
4. Ī tamo kayau Negur nē od wogō de fen, yogon kabī dalouf nigin megeir ifenēdidig (1 Korin 2:4, 5).
5. Ī tamo kayau mugu mugu sios kabī dale di, sios ganan total ifarauf nigin megeir ifenēdidig (1 Korin sapta 12, 14)

Baali

Baali are faat taka age fiya. Are wit gen. Tamo kayau in faat anidi nem, bret dinodig, anī ere, baali bunem bret dinof, are to biya, are wit bunem bret dinof bagai gen sã.

Babilon

Babilon are, taun odug bagai taka anī yana. Kulu bagai, tamo kayau teneub anī bun temeleid, Israel tamo kayau geid kusī de fen, idim wal difedin. Idi, Israel tamo kayau musei ferfer gen, nedi teneub bun guri difeid diroulen, age dife di, Israel tamo kayau idi, sewenti yar an difaren (Matyu 1:11, 12, 17; Aposel 7:43).

Jon nē kurō fesiya od buk bun (Revelsen 14:8, 17:5, sapta 18) taun taka Babilon def anī nigin irok. Are fau Rom taun nē be uris nigin anī irok. 1 Pita 5:13 nē itotoya bun, Babilon are fau de be Rom taun nigin irok.

Bal (Rom 11:4)

Bal are idegēya waitou taka. Kulu bagai, Israel tamo kayau, Israel teneub bun dile dibodōya sã mog, tamo kayau teneub anī bun difaredig, Bal waitou anī yana dalesedig. Sain tunī, Israel tamo kayaug, Negur yana yaleseya ditor ken, Bal waitou yana dalesedig. Anī nigin, Negur fatuk bagai idi nigin name isedig.

Balam (2 Pita 2:15; Jud 11; Revelesen 2:14)

Balam are Negur nē profet taka. Sain taka bun, teneub taka Moab dedig anī bun, an Israel tamo kayau neid kiwai tar difaren. Nedi king are Balak dedig. Balak ĩ, Balam Israel tamo kayau

isisnēdiyof nigin wau iron, age fe di, ĩ idi kusī bun wal fediyof nigin. Uruwa bun, Balam ĩ itoron, anī ere, ĩ Balak nē modoũ bun ileyā nigin gariya inon. ĩ fau naab luwe ile mog, engel naabura ĩ ilauf nē bun katī fel ifaren. Donki Balam teten ibod ken, ilen anī, engel ile fen, norũ fel ileyā nigin itoron, malakaĩ, Balam ĩ wagī fiyeneg ileyā san. Are donki Balam iroken ken, ĩ ou fiyen.

Balam ĩ, Israel tamo kayau to isisnēdin, ere nigin, ĩ keleī, Negur el fiya idi ifenēdin. Balam nigin, Nu Testamen nē itotoya bun irok, are ĩ moni nigin wau laa fen, ere nigin, Balak ĩ Negur nē tamo kayau neid kiwai fiyeneg, Balam ĩ Balak isennēf nigin yo yen (Namba sapta 22-24).

Bar Itenēya (Namba wan bar itenēya: Luk 1:72; Aposel 3:25, 7:8; Galesia 3:17; Hiebru 9:1; Namba tu bar itenēya: Matyu 26:28; Mak 14:24; Luk 22:20; Rom 11:27; 1 Korin 11:25; 2 Korin 3:6; Hiebru 7:22, 8:6-13, 9:15, 10:16, 29, 12:24, 13:20)

Bar itenēya are tamo kayau uruwo atun dinodig. Sain tamo taka ĩ bar itenēya inou fenē, ĩ tamo taka nigin, ereb taka agef kenēf anī, age afouf bagai fiyek, are abag solo fef, are tamo taka ĩ nigin, ereb taka age fenēf anī, age afouf bagai yedig. Negur ĩ yogo, yogon tamo kayau geid bar itenēya anī ino fen, yogon tamo kayau ĩ dō difiyēf are, ĩ dogo neid Temeid ado Odug ibodōf nigin, age afouf yen.

Negur bar itenēya uruwo anī inon. Bar itenēya uyulil bun, Negur ĩ Moses ado bar itenēya inon, agef fen, Negur iron, are idi aib aib yogon lo dirouwauf are, ĩ yogon tamo kayau bagai gen gei fediyof. Anī ere, takam in lo dō feleya bagai kisin san, anī nigin, takam, Negur mala bun bar itenēya uyulil bun, madur bagai wōya kisi feleya san. Bar itenēya mata bun, Negur iron, tamo taka Jesus Kristus nigin momoi youf are, ĩ Negur mala bun madur bagai wō ye di, ĩ kel yaleyēf, are ĩ in lo ifodulēya be mosor to inon gen Negurem ileyēf.

Bar Itenēya Nē Bogis (Hibru 9:4; Revelesen 11:19)

Bogis anī, aa nem dino fen, bouwa ganan gol nem degē difelen. Namen meein odudug uruwo, are teten Negur itāfiya ten itotodin anī dibodon (Hibru 9:4, 5). Israel tamo kayau gerere tuan luwe diyok dile fen, bogis are de ado faali de dilen, age de fen, Negur nē Salafat bun dinodig. Bogis ado safina namen ifaredin, are fateul bagai, ere nigin, are bar itenēya Negur ī Israel tamo kayau geid inon anī nē uris.

Barak (Hibru 11:32)

Barak are, Israel tamo kayau neid uyu iroukenēdiya odug taka. Ī kusī bun idi uyu iroukeneīd dile fen, nedi kiwai tar wal difedin (Jas sapta 4, 5).

Bea (Revelesen 13:2)

Bea are gaar taka odug bagai, anī teneub tunī bun dubur difaredig.

Belsebul

Belsebul are uur neid yana taka anī, ibor tunī Israel tamo kayau non difaref anidim yana dalesedig. Gariya bun bagai, ī Bal-sebub deden. Ī anīg, Satan dedig, yogo anī kaa sesen neid mudur.

Benjamin (Aposel 13:21; Rom 11:1; Filipai 3:5; Revelesen 7:8)

Benjamin ī are Jakop nē kesu monog tuwelf anidi taka, ī Juda neid tubuid tar tuwelf ibor anī taka.

Dawid

Dawid ī are Israel tamo kayau neid king odug bagai. Ī in tama Jesi dedig anī ne naal ibuye. Kulu ī fau king wōya sā mog, ī ne tama nē sipsip anī lo lo fedin. Sain ī fau kesu oosi mog, guru fiya taka bun, ī tamo odug bagai taka Goliat ado kusī de fen, yukesin.

Dawid ī, Negur nigin fatuk bagai wau laa fedig. Ī, Negur yana yaleseya nigin seg musei itotodin, anī Sam dedig.

Are Dawid nē ibor bun anī Jesus ī wō yen (Rom 1:3; Revelesen 22:16). Kulu bagai, Kristus nigin anī iron, kel yaleya tamo anī Negur sur fouf, are King Dawid nē ibor bun tamal taka.

Dō Fiya Tar

Inglis od bun, dō fiya tar are ‘disciple.’ Jesus nē dō fiya tar ganan, are tamo

kayau Jesus nigin momoi def, in od karī de fen, dō difedig anidi.

Aposel nē buk bun, od tunī Jesus nē dō fiya tar nigineg agef faded fef, are ‘tamo kayau Jesus nigin momoi def anidi’ oo ‘tureid tar’ dedig.

Sain tunī, Matyu, Mak, Luk ado Jon nē buk bun, dō fiya tar tuwelf anidi nigin irok. Dō fiya tar tuwelf anidi, ī weim dibodōf nigin, fire bagai igirnēdin. Jesus ī, idig ne soosi tamo wowā douf nigin sur fedin, are Matyu 10:1-4 bun irok kilei.

Elisa (Luk 4:27) - Naman bun anī ulouf.

Eliya (Matyu 11:14; Mak 9:4; Rom 11:2; Jems 5:17)

Eliya ī Negur nē profet odug taka. Ī nigin, nenerī Jems 5:17 bun anī itoton.

Engel

Engel are, Negur nē soosi tamo tar, saa ilun Negur wagen difaredig. Soosi tamo enidi, are tamo bagai sā, are idi uur. Idi malam ilediya kisi feleya sā, dogom yaorediyouf dogol.

Negur ī, yogon engel yogon kabī dalekenēf nigin sur fedidig. Dogo neid kabī are, Negur nē tamo kayau lo fediya nigin (Aposel 12:6-11, 27:23; Hibru 1:14). Sain taka taka, Negur, tamo taka bun od mata wogō youf nigin yogon engel susur fedidig.

Engel mudur ī Maikel dedig (Jud 9). Engel yana ado taka, are Gabriel (Luk 1:19, 26).

Epikurian Tamo (Aposel 17:18)

Epikurus nē dō fiya tar ado, tamo kayau foi fiya anī ‘Stoik Tamo’ dedig anidi, idi keleī adodo anī, momoi ado keleī yaleya nigin fatuk bagai kisi difedig. Idi eneidi katō fiya nigin, sain musei daledig.

Esau (Rom 9:13; Hibru 11:20, 12:16-17)

Isak kesu uruwo gō fedin, are idi aina ado. Idi Esau ado Jakop dedig. Esau ī kesu matu, anī ere, sain taka bun, Esau ī naū fe fen, ī saaf bunem yogon kesu matu nē akor anī Jakop bun solo fen. Esau ī, are Jakop anī, yogon kesu matu nē el fiya anī yalouf nigin, saaf tar yabiya bunem solof ifenēf nigin yo yen.

Eva (2 Korin 11:3; 1 Timoti 2:13)

Eva ī Adam aiwa. Negur teneub kare fen sain anī bun, ī uyulil Adam ino fen, ī Adam ne siri tuwa taka anī yale fen, anī nem Eva ineyen. Kū fenēya bunem, Eva gogour nē sigor dō fen, are Satanem Eva idegnē di, kayau ī aa faat anī Negur to dāf nigin idi irokenēdin anī yon. Kayau ī aa faat tunīg, Adam ifenē di, ī aa faat anī yon. Idi uyulil Negur nē itāfiya anī wal difen, sain anī bunem ilen, tamo kayau mosor dinodif disin. Adam Eva ado idi kesu towo, are idi Kain, Abel ado, Set.

Faat Korō Feleya Tamo (Matyu 19:12; Aposel 8:27)

Tamo faat korō felediya, idi kabī tamo odudug, king nē aruna daledig. Teneub uyu takā tunī neid tobonunā bun, idi tamo anidi faat korō difel kenēdidig.

Farao (Aposel 7:10, 13, 21; Rom 9:17; Hibru 11:24)

Farao ī Isip tamo kayau neid king odug nē yana. Nedi king odug ganan Farao dedig.

Farisia

Farisia are, Juda tamo kayau idi atun, mala odug bagai taka. Farisia idi musei lo ifelnēya kabī daledig. Idi, Negur nē lo Moses ifenen anī keleī bagai, age de fen, idi tobonunā musei ado nun idi tobol difedin anīg difelnēdidig. Idi tamo kayau tunī ganan wal fediya gen momoi de fen, dogo yeneid dalesedig. Idi sain musei mala yaleya tamo, idi namedin kisi sane ado fen, mayarē biya gen tamomoi dedig. Farisia idi, Jesus kiwai difen ken, ī dukesiyouf nigin kisi difen.

Gidion (Hibru 11:32)

Gidion ī Israel tamo kayau nē uyu irouya odug taka. Ī momoiya odug ado fen, Negur ulum iroukenēf nigin ī bun kosē yen. Ī tamo musei sã kusī bun irou leid fen, idi Negur nē isennēya bunem nedi kiwai tar wal difedin.

Gomora - Sodom bun ulouf.

Grik

Grik anī kantri taka. Grik nē taun mudur are Atens, are Korin tauneg, teneub anī bun ibodok.

Grik tamo kayau idi keleī odug bagai adodo, anī nigin, tenebur tamo kayau nedi kisi biya nigin anini difiyēdidig.

Tamo kayau musei Grik od anī wogō dedig. Jesus Kristus teneub enei bun ibod mog, tamo kayau keleī adodo ganan Grik od anī wogō dedig. Nu Tes-tamen anī Grik od nem uyulil ditoton.

Hagar (Galesia 4:24, 25)

Hagar ī Abraham aiwa Sara nē fō nē kabī kayau taka anī. Sain anī bun, Sara kesu taka fau gō fiya sã mog, ī Hagar Abraham ado denēf nigin irokenen, age fe di, Abraham bunem Ismael dedig anī wō yen. Ismael ī anī, Negur ī, Abraham ifenēf nigin promis od to ifenen. Anī nigin, Ismael ne ibor tar, Negur ī ereb Abraham nē ibor tar ifenēdiyof nigin promis od ifenen anī to dalen. Dum, Sara yogo Isak gō fen, kesu anī, Negurem Abraham Sara ado ifenēdiyof nigin promis od anī irokenēdin.

Sara Isak gō fel fen, ī Hagar monē fiye ken, kesu ado irudi di, diyawon. Hagar ile arei mudu Sinai dedig non ibodon. Arei mudu anī bun an, yar musei ilele di, dum Negur Moses iroken ken, ī yogon itāfiya ifenen. Anī nigin, Galesia 4 bun irok, are Hagar ī ferfer kayau taka, ī idi tamo kayau Negur nē itāfiya nē ferfer dibodok anidi neid malakanon yef. Idi ferfer, ere nigin, idi momoi def are, tamo taka Negur nē itāfiya ganan dō fef anī, ī Negur mala bun madur bagai wō ye di, Negurem yalouf def. Idi Negur nē od eig fiya anī to momoi def, are ganan Jesus Kristus nigin momoi def anidi Negur mala bun madur bagai wō def anī.

Haiden

Inglis od nem ‘Gentile’ are tamo kayau ganan idi Juda sã anidi. Grik od bun anī nē gariya are teneub ganan bun tamo kayau difaref anidi, anī are, Juda sã anī. Juda idi amam amam yeya bagai dedig, ere nigin, Negurem idi yogon tamo kayau igirnēdin nigin, age fe di, idi teneub tunī ganan nē tamo kayau lalai difedidig.

Halleluya (Revelesen 19:1-6)

Sain Juda idi Negur yana dalesau fenē, idi ‘Halleluya’ de kakaī dedig. Od anī nē gariya are “Negur yana taleseg.”

Hermes (Aposel 14:12)

Hermes are, waitou taka yana anī Grik idi yana dalesedig. Grik tamo kayau dirōdig, ī waitou tunī ganan neid soosi tamo.

Herod

Nu Testamen bun, are tamo aiwa adodo fire fire anī Herod dedig:

1. King Herod ī anī, Herod Odug dedig, Jesus wō yen sain anī bun, Judia distrik bun king ibodon. Im anī Jesus momou mog, yukesiyouf nigin age fen (Matyu 2:1-22; Luk 1:5).
2. Jesus biya od wogōya ado memelik inodin sain anī bun, Herod Antipas anī, Galili distrik nē uyu irouya ibodon. Ī de anim anī Herodias yale fen, naan igunēdiya tamo Jon nē mudur gudū fen. Jesus Pailat nē kot bun ifaren sain anī bun, Herod ī es fiyēf nigin wagen diroulen (Mak 6:14-29; Luk 23:6-12).
3. King Herod Agripa I ī, sios uruwa bun idi Jesus Kristus nigin momoi den anidi darau ifenēdin. Ī, Jon nē tura Jemseg yukesin (Aposel 12:1-23).
4. King Herod Agripa II ī anī Pol nē od es fe fen, ī Sisa wagen es fiyēf nigin Rom sur fiyen (Aposel 25:13-26:2, 26:19, 27-32).

Hibru

‘Hibru’ nē gariya are ‘Juda’ de tekelei. Tamo kayau idi Hibru difiyēdif are idi Abraham nē ibor. Yana anī nedi tubuid tar taka bunem isin, ī anī Eber dedig. Od Juda idi dirōdig anīg, Hibru dedig.

Hosiana

Od Hosiana, are aanya anī tamo kayau, tamo be kayau be taka suma bun yana odug difenēf nigin kakaī yei yeya anī agei difedig. Anī nē gariya, are “Negur sã ī isennēf!” be, “Negur yana taleseg.”

Isak (Aposel 7:8; Rom 9:7; Hibru 11:9)

Isak ī Abraham Sara ado neid kesu. In yana nē gariya are kasã. Abraham bun ulouf.

Isennēya Tamo

Jesus ī ‘tenebur enei nē Isennēya Tamo’ dedig, ere nigin, ī tamo kayau idi dalouf nē kafī fiya bun tamal diyawauf nigin naab anī kã fen. Jesus laaf fen, tamo kayau ganan nigin ye fen kafī fiya

anī yalen, anī nigin, Negur idi ī nigin momoi def anidi ganan neid mosor nigin weder tu keledidig. Negur Jesus nigin ye fen, idi madur bagai gen iledidig.

Isip

Isip are teneub taka Israel non ibodok anī. Israel tamo kayau 400 yar Isip oun ferfer difaren (Aposel 7:34-38).

Israel

Israel yana anī, are Negurem Jakop ifenen, ī Isak in aiwa Rebeka ado neid kesu uru atun taka anī.

Israel nē ibor are yeneid tunī wogōya fire fire bunem dirōdig. Idi anī, ‘Israel nē tamo kayau’ dedig, dum idi ‘Juda’ dedig, age de feneg, idig ‘Hibru’ dedig. Juda bun ulouf.

Teneub Israel tamo kayau dibodok nē an, anīg Israel dedig. Uruwa bun, teneub are Kanan dedig. Gamag teneub anī Palestin dedig.

Jakop

Jakop de tamo tekelei Israel anī. Ī ne kesu monog tuwelf anidi adon, idi anī Israel nē ibor tuwelf nē tubuid tar. Abraham bun ulouf.

Jepta (Hibru 11:32)

Jepta ī kusī tamo odug taka. Sain taka bun, ī Israel tamo kayau neid uyu irouya tamo ibodon.

Jeremaia (Matyu 2:17, 16:14, 27:9)

Jeremaia ī Negur nē propet taka. Ī, Kristus kel yaleya tamo Negurem sur fe di, isi youf nigin promis od iron anī isiyouf sain bun, ereb musei wō youf anī nigin profet od wogō yen.

Jesi (Matyu 1:5-6; Luk 3:32; Aposel 13:22; Rom 15:12)

Jesi ī King Dawid ne tama, anī Jesus Kristus nē tubu. Kulu bagai, propet Asaia, Jesi ado Dawid nē ibor bun tamal Kristius wō youf anī nigin itoton.

Jesus

Jesus yana anī nē gariya, are “Kel yaleya tamo,” oo “Neda Negur anī neda Kel Yaleya Tamo”. Yeneid tunī Jesus nigin wogō dedig are: Jesus Kristus, Negur Naal, Tamo Naal, Dawid Naal.

Jona (Matyu 12:39-41, 16:4; Luk 11:29-32)

Jona ī Negur nē propet taka. Sain taka bun, Negur in biya od wogō youf nigin, taun taka Niniwe dedig bun an ī sur fiyen. Anī are, Jona modoū taka bun ileyā nigin ye fen, waag taka bun sō yen. Sain ī waag bun ibod mog, Negur yau uyē ado odug bagai sur fen. Tamo kayau waag anī bun difaren idi, Jona bunem yau uyē ado odug bagai wō yen anī kelein. Anī nigin, idi ī maaīwō diran. Gau odug takam ī yakalaisile di, ī gau te namen naa towo ibodon, age fe di, gau ī, Jona teneub bun ilu iran. Anī bure fele di, Jona Negur nē od dōf fen, Negur nē biya od wogō youf nigin Niniwe taun ilen.

Josef

Nu Testamen bun, tamo yeneid Josef dedig tunī difaref.

1. Josef ī, Jakop nē gere tar tuwelf anidi taka, Jakop nē gere tar tuwelf anidi Israel tamo kayau neid tubuid tar. Josef ī anī Benjamin nē tura (Aposel 7:9-14; Jon 4:5; Hibiru 11:21, 22; Revelesen 7:8).
2. Josef taka, are Maria ne tamo.
3. Josef taka, are Jesus nē tura tar anidi taka (Matyu 13:55; Mak 6:3).
4. Josef taka, are Jems taka, Jems tura naal dedig anī nē tura (Matyu 27:56; Mak 15:40, 47)
5. Josef, Arimatea tamal, are safina musei ado tamo, ī Juda uyu iroudiya neid kaunsel guru fiya anidi taka. Ī tamo biya fen, Jesus Kristus dō fiyēdig (Matyu 27:57-60; Mak 15:42-46; Luk 23:50-53; Jon 19:38-42).
6. Josef Basabas ī (Aposel 1:23) Jesus Kristus nē dō fiya tar taka, ī Jesus geiden. Sain idi Judas ne modoū fotokar, tamo taka aposel wō youf nigin digirin, idi Josef ado Matias atun aisāi diran. Are, Matias ī anī digirnen.
7. Barabas ī anīg, Josef dedig (Aposel 4:36).

Josua (Aposel 7:45; Hibiru 4:8)

Moses laa fe di, Josua im anī Israel tamo kayau neid uyu irouya wō yen. Ī Kanan teneub bun idi guri feid iroulen, teneub are, Negur idi ifenēdiyof nigin

promis od iron anī. Age de fen, idi tamo kayau an difaren anī kusī bun wawal difedin. Josua ī teneub anī foif fen, Israel nē ibor tar mugu mugu bun teneub morou morou anī ifenēdin, anī are, Lewi ne ibor idi pris kabī dalouf nigin igirnēdin anidi dogol teneub taka morowouf nigin ifenēdiya sā. Josua ī uyu irouya odug wō ye fen, tamo kayau waud tekelei ado Negur dō difouf nigin totol od irokenēdin. Ī iron, “Neu tamo kayau ado aya niginēg, amā Negur dō mafouf,” yen.

Juda (Hibiru 7:14, 8:8; Revelesen 5:5, 7:5)

Juda ī Jakop ne gere tar tuwelf anidi taka. Ī Juda ibor dedig anī nē tubuid. Teneub in tubuid tar difaren are Judia dedig, teneub anī bun, taun Jerusalem dedig anī ibodok. Jesus Kristus ī Juda nē ibor bun tamal wō yen.

Juda Tamo Kayau

Tamo kayau idi Juda dedig, are Abraham nē ibor tar. Abraham bun ulouf.

Gariya bun, Juda yana nē gariya are, “tamo kayau idi Juda nē teneub bun difaref anidi,” are tamo kayau Juda nē ibor bun temeleid. Juda ibor anī Israel neid ibor tuwelf anidi taka. Anī are, dum Israel tamo kayau ganān nigin yana ‘Juda’ anī dirōdig. Israel bun ulouf.

Jon nē biya od bun, Jon yana Juda anī wogō yedig, are Juda neid uyu irouya tar nigin ye fen age fedig.

Kaa Sane

Kaa sesen anidi, are Satan nē dō fiya tar. Idi uur anidi anī, tamo morō difenēdi di, tamo kayau idi Negur nē od wal dife fen, Satan dō difouf nigin age difedig. Sain tunī, idi tamo dirounēdig, are tamo ī Satan nē kabī ado ereb sane bun ilauf bun, age difedig.

Kain (Hibiru 11:4; 1 Jon 3:12; Jud 11)

Kain ī, Adam Eva ado neid kesu matu. Ī yogon tura naal are ī Abel dedig anī nigin fatuk bagai kiyeī inon, ere nigin, Negur ī, Abel nē sipsip sesewi fiya anī de yen, anī ere, Kain nē saaf kabier tamal sesewi fiya are itoron. Anī nigin, ī Abel yukesin. Enei nigin, Negur ī iron, Kain ī fau de teneub ganān bun iyokesi di, tamo kayau ganān ī dudum difiyēf.

Kamel (Matyu 3:4, 19:24; Mak 10:25; Luk 18:25)

Kamel are gaar odug taka anī, tamo kayau teten dibod ken, diyōdig. Ī morō odudugeg faali fedig. Sain tunī kamel nē siwi anim kolos didi ado dinodig.

Kanan (Aposel 7:11, 13:19)

Kanan are teneub yana, anī Negur ĩ, Israel tamo kayau nedi teneub ouf, anī ifenēdiyof nigin promis od irokenēdin. Gamag, teneub anī, are Israel dedig. Sain tunīg, are Palestin dedig.

Koban (Mak 7:11-12)

Koban dedig, tobonunā anī nē gariya taka to kelein, anī ere, ereb nigin irok anī, Mak nē itotoya 7:11-12 bun ibodok dogol.

Kora (Jud 11)

Kora ĩ, Moses ado Aron kiwai ifeneīd fen, kušī uyu iroun. Anī nigin, Negur fatuk bagai name fen, teneub anī bagā ye di, Kora ado idi ganan ĩ dō difen anidi itob le nēdin.

Kristen (Aposel 11:26, 26:28)

Kristen nē gariya, are tamo taka ĩ Jesus Kristus dō fef anī.

Kristus

Inglis od bun, Kristus anīg Mesia dedig. Od Kristus, are Grik od nem, od Mesia, are Juda neid od nem. Od gariya are tamo ĩ mudur bun moul fi difelef anī. Ere nigin, enei are, kulu bagai, sain Negur Juda neid king taka age fiya igrnek, idi ĩ moul mudur bun fi difeledig, uris taka gen, ĩ king wō youf nigin. Negur yogon tamo kayau kel gei fediyof nigin, isennēya taka sur fof nigin age afouf yen, agef fen, tamo anī irou isiyof. Tamo enei, are Kristus dedig, ere nigin, tamo anī, Negur igrne ken bagai sur fen.

Lewi (Hibru 7:5, 9, 10; Revelesen 7:7)

Lewi ĩ Jakop ne gere tar tuwelf anidi taka, Jakop ne gere tar tuwelf anidi Israel ibor tuwelf nē tubuid tar. Lewi ne ibor tar, temple bun Negur nē kabī dalouf nigin igrnēdin. Lewi ne ibor tar bun, pris anidi igrnēdin, are Lewi ne ibor bun, Aron nē ibor bun temeleid pris anidi igrnēdidig. Aron bun ulouf.

Jesus ne dō fiya tar taka ĩg Lewi dedig. Ī yana taka are Matyu (Matyu 9:9-13; Mak 2:14; Luk 5:27-29).

Lo

Negur nē lo are, Buk Baibel bun buk faif uyulil ditoton bun yenek. Lo eneidi, Negur in tamo kayau nigin ye fen, anī Moses bun yaor fen.

Lo Ifelnēdiya Tamo

Lo ifelnēdiya tamo idi, lo Negur ĩ Juda idi nigin Moses ifenen anī tamo kayau difelnēdidig. Idi Moses nē buk faif bun od ditodin anidi bagai difelnēdidig. Lo, Moses bun ulouf.

Lot (Luk 17:28-32; 2 Pita 2:7)

Lot ĩ Haran ne naal, Haran ĩ Abraham ne tura naal. Abraham bun ulouf. Sain Abraham teneub mata Negurem afonōf yen anī imirēf nigin ilen, Lot ĩ ado dilen. Idi teneub anī bun dile fen, sain taka bun, Lot Sodom taun ibodōf nigin ilen. Taun anī nē tamo kayau ereb ereb sesen musei age difedig. Anī nigin, Negur ĩ Sodom taun daū fof nigin iron. Negur ĩ Lot taun anī bun tamal iyawouf nigin weder irowauf nigin in engel sur fen. Lot in ibor tar geid taun anī ditoron, idi ditor dilele di, Negur taun anī yā nem daū felen. Idi taun ditor dilel mā, idi dumedin to lo difouf nigin, engel Lot irokenen, anī ere, Lot aiwa falei yel, dumen lo fen, kaisā bagai, kayau ĩ sol nem tamo nē malakanon inoya anī gen falei felen.

Maaĭ Giriya

Maaĭ Giria are Israel ado Isip atun yenek. Moses bun ulouf.

Mana (Jon 6:31, 49; Hibru 9:4; Revelesen 2:17)

Kulu bagai, Israel tamo kayau Isip bun tamal diyalelen sain anī bun, idi gerere tuan yar foti diyokesin. Sain anī bun, Negur idi saaf ifenēdin. Saaf enei mana dedig. Naa mugu mugu bun, saaf enei saa ilunem tenebur kuku redig, anī ere, Sabat naa bun sã. Age fe di, tamo kayau dile saaf enei kuru difedig. Saaf enei Eksodas 16:13-36 bun es fe faded fef.

Masted (Matyu 13:31-32, 17:20; Mak 4:31-32; Luk 13-19, 17:6)

Masted are aa taka, in faat anidi nanaal bagai. Anī ere, ī odugouf are, aa odug gen, odug bagai wō yedig.

Melkisedek (Hibru sapta 5-7; Sam 110:4)

Ada Melkisedek nigin tutuk bagai keleī sā, anī ere, Hibru sapta 5-7 nē itotoya bun ereb yef anī dogol keleī. Jenesis 14:17-20 nē itotoya bun, sain taka bun, kiwai tamo idi disi fen, Abraham ne tura nē naal Lot, in ibor tar geid, nedi safina ganan ado dirouneīd fen, lei difedin. Anī nigin, Abraham ile fen, kiwai tamo kusī bun wal feid fen, Lot ado yogon safina ganan kel gei fedin. Sain Abraham kel isi mog, Melkisedek ī naabur fotou fiyen. Melkisedek ī, bret ado wain, Abraham ifen ken, Negur ī bun biya age fef anī de age fe tobol fouf nigin kosē ye, el fiya ifenen. Abraham ī, safina ganan kusī bunem gei fedin anī nē ten tekelei Melkisedek ifenen, age fiya gen, dum, Israel tamo kayau nedi safina ganan bun ten tekelei anī pris idi age de difenēdidig. Anī nigin, Buk Hibru bun, Melkisedek īg pris taka yef. Dum, Negur, Israel tamo kayau neid pris anidi Lewi nē ibor bun tamal digirnēdiyof yen. Anī ere, sain Melkisedek ī, Abraham fotou fiyen, Lewi ī Abraham nē ibor, fau wōya sā mog. Anī nigin, Buk Hibru nē itotoya bun, sain Abraham in safina ganan bun, ten tekelei anī Melkisedek ifenen, are Lewi ne ibor bun temeleid pris ganan dogo neid ten tekelei anīg Melkisedek difenen gen ileyauf yen, ere nigin, dum idi Abraham bunem wō douf.

Mesia - Kristus bun ulouf.

Moses

Moses ī, Israel tamo kayau neid uyu iroya odug. Israel tamo kayau Isip nē ferfer difaren sain anī bun, Negur ī, Israel tamo kayau uyu iroukenēdi di, idi Isip bun tamal diya fen, teneub Negurem idi ifenēdin anī bun ke douf nigin, Moses igrinen. Negur naab fire bagai bun, Moses fotou fiyen. Moses, aa taka yā uu ye mog anī ilen, anī ere, uu ya san. Ī modoū anī bun Negur ibodok ya anī kelein. Age fe di, Negur ī wogō fiye

ken, ī yogon tamo kayau uyu iroukenēdi di, nedi teneub bun ke de dilauf nigin Moses igrinen anī ī irokenen.

Negur ī, Moses bunem ereb biya bagai musei age fedin. Sain taka bun, Isip tamo, Israel tamo kayau dirudidi di, idi maaī taka, Maaī Giriya dedig bun disin sain bun, Negur naan wī yef anī dē yalouf nigin age fe di, naan anī garaī taka gen ifare di, tamo kayau teneub gere keleya bun diyok dilen. Idi dibal dilele di, Isip tamog dibalauf nigin age difen, anī ere, naan baban wī ye fen, idi kerub fedin, age fe di, idi dimutatakesin.

Negur ī, yogon lo, Israel tamo kayau nigin ye fen, Moses ifenen. Sain idi gerere tuan diyō mog, naa taka bun, Moses arei Sinai dedig anī bun ibod ken, Negur bun kosē youf nigin an iselen. Negur yogo Moses bun yaor fe fen, in itāfiya anidi ī irokenen. Negur itāfiya ten odug bagai anidig, meein uruwo bun itotodin, meein eneidi anī, Negur nē salafat namen modoū fateul anī bun dinodin. Moses ī Sinai arei bunem isi bure fel fen, ī itāfiya ganan itotodin. Itāfiya eneidi are Buk Baibel bun buk faif uyulil ditoton anidi, are ‘Moses ne buk’ dedig anī bun dibodok; eneidi are Jenesis, Eksodas, Levitikas, Namba ado, Diuteronomi. Lo buneg ulouf.

Mosor

Tamo taka Negur nē itāfiya anī taka be ifodulouf, are anī mosor. Are tamo nē lo fiya bun, safina naal be odugeg, anī Negur mala bun fau de mosor.

Moul Aa Bun Tamal Sumeī Biya, Mer (Myrrh) (Matyu 2:11; Mak 15:23; Jon 19:39; Revelesen 18:13)

Moul aa bun tamal sumeī biya, Mer, are safina taka, anī moni odug bagaim naa sur difedig, ī sumeīg meli bagai. Ī aa taka nē gaula anī dale fen, anī dinodig. Juda idi anī nem marasin dinodig, marasin are tamo darau odug bagai to yalouf nigin, ī yenēya nigin age fedig. Idi laa tamo nē bouwa buru mū difouf nigin dodok difouf nigineg marasin anī kabī difenēdig.

Mulū Ileya

Juda neid tobonunā bun, idi kesu monog ganan gogū difef, are naa eit ilele di, idi bouwa gudū fiya anī age difedig. Are Negurem enei idi age difouf nigin Abraham irokenen. Jenesis 17:9-14 bun ulouf.

Mulū ileyā are, tamo ī Juda tamo yeya anī nē uris. Juda tamo kayau nigin ‘idi mulū ileyā bun temeleid’ dedig.

Sain tamo kayau biya od uyulil wogō den, Juda tunī an, idi eig den, tamo taka ī Juda sā anī, ī kristen taka wō youf nigin oro fouf are, ī uyulil mulū ilauf. Enei anī ī Juda tamo yeya anī nē uris, age fe di, dum ī kristen taka wō youf. Pol anī to yo yen. Ī Galesia sios tamo kayau bun, pas anī nigin itotodin, ado modoū musei tunī buneg. Ī iron, tamo taka ī isennēya yaleyā nigin oro fouf are, ī safina tekelei dogol de age fouf, are ī Jesus Kristus bun momoi youf dogol.

Naan Igūya

Buk Baibel nē itotoya bun, are Jon ī tamo kayau musei Jordan naanū naan igunēdin. Ī idi irokenēdin, are idi nedi mosor bun tamal de waud falei ye fen, naan digūwauf, anī bunem, are idi waud falei yen anī, ganan keleī youf.

Tamo kayau idi Jesus Kristus nigin momoi def anidi atun, naan igūya are, aib taka ī kristen taka wō yef anī tamo kayau ifelnēdif nē uris.

Naan igūya nē gariya are:

- (a) Aib taka ī naan igun, are ī mosor inodin anī bun tamal wau falei yen.
- (b) Ī, Jesus Kristus aib aib idi ī nigin momoi def anidi neid mosor nigin weder tu kalauf yen anī nigineg momoi yef.
- (c) Ī Jesus Kristus dō fiya nigin ado, ne od dō fiya nigin oro fedig.

Nad (Mak 14:3; Jon 12:3)

Sain taka bun, kayau taka, Jesus ye bun wā fouf nigin moul irou isin. Moul enei nad bunem dinon, nad are aa spike-nard dedig anī nē sumin.

Naman (Luk 4:27)

Naman ī kusī tamo neid mudur taka nē yana, ī Siria kantri bun tamal. Ī Juda tamo sā. Ī kusī tamo odug bagai, anī ere, ī lepra guruma ado. Sain taka bun,

ī profet Elisa bun ile fen, ī lepra guruma bun tamal el fiyēf nigin to fiyen. Elisa ī Jordan naanū ile fen, ī yogo sain seven naan igūwauf anī irokenen. Naman dōf age fen, age fe di, ī bouwa el fe biya len.

Negur Nē Sipsip Naal

Jon 1:29, 36 bun, Jon naan igunēdiya tamo, Jesus nigin, “Negur nē sipsip naal” yedig. Juda neid tobonunā bun, idi sipsip naal taka, Negur nedi mosor weder tu kalauf nigin, sesewi fiya nigin tō dife isaikedig. Sipsip naal nē naud anim, Negur nē lo fiya bun, idi fateul inenēdig. Jesus ī Negur nē sipsip naal dedig, ere nigin, ada sā neda mosor nigin weder tu keleya anī talouf nigin, ī yogon mata sesewi fiya taka gen anī ifenen.

Negur Nē Tempel

Negur nē Tempel anī Jerusalem, Israel nē taun odug an ibodon. Modoū enei are Juda idi an dile, sifa naa odug sigigi dife fen, sesewi fediya ado ofa anidi Negur bun dinodig.

Tamo kayau Juda sā anidi tempel nē mayaī mayarē dogol diledig. Tempel namen bagai an, idi Negur nē safina fateul anidi dinodig. Yar ganan bun sain tekelei dogol, pris mudurem dogol modoū anī bun iledig. Gabar odug taka modoū fateul bagai anī nē bobog ileyā bun dinolelen. Gabar enei anī, Jesus laa fen sain bun, muduronem serek fe isil ye bunen (Matyu 27:51; Mak 15:38; Luk 23:45). Enei are, sain anī bunem, tamo kayau ganan Kristus nigin momoi douf are, Negur idi ī wagen ileyā nigin naab anī kā fen anī ifelnadaf.

Niniwe (Matyu 12:41; Luk 11:32)

Niniwe are taun yana, anī bun Negur profet Jona in biya od wogō youf nigin sur fen. Buk Jona bun ulouf. Negur in od are eig fiya, idi ereb sesen anidi age difedig nigin, ī idi daū fediyouf. Sain idi od enei karī den, idi maruid isi fen, waud falei yen. Anī nigin, Negur idi neid mosor nigin weder tu kel fen, idi to daū fedin.

Noa (Matyu 24:37-38; Luk 3:36, 17:26-27; Hibu 11:7; 1 Pita 3:20; 2 Pita 2:5)

Noa ī kulu bagai ibodon. Tamo nē ibor Adam bunem garia inon, ī are namba

nain ibor. Sain Noa tenebur ibodon, tenebur tamo kayau ganan ereb ereb sesen musei age difedig. Anī nigin, Negur ī, kuwei odug taka sur fe di, tenebur tamo kayau ganan ado ereb ereb ganan tenebur difaref anī daū fediyouf nigin iron. Anī ere, Noa ī tamo biya, ī Negur nē od dō fedig. Anī nigin, Negur Noa waag odug taka inouf nigin irokenen, Negur ī irokenen kilei bagai, waag age inouf nigin irokenen. Negur Noa in aiwa ado gere tar towo, nedi aiweid tar weim waag namen dilauf nigin irokenen, idi weim, gar, ninā fire fire bun monog tekelei ado gober tekelei, anī ere, gar, ninā tunī bun monog sewen ado gober sewen weim waag namen dilauf nigin irokenen. Noa ī, Negur od iron anī nigin momoi ye fen, ī Negur od ī irokenen kilei bagai age fen. Noa in tamo kayau geid waag namen dilele di, Negur uyē odug sur fen, age fe di, kuwei odug ilen. Arei mudu ganane naan kerū feledin. Tenebur tamo kayau tunī ganan dimutatakesin, anī ere, Noa ado in ibor tar are kel gei fedin.

Ogō musei ilele di, naan isilelen, age fe di, teneub baban sagau kelen. Anī nigin, Noa in tamo kayau geid waag bun tamal kututū desin. Age dife fen, Noa Negur bun sesewi fe fen, ī yana yalesen, ere nigin, Negur idi isennēdin nigin. Negur baban kuwei taka age fiya, ī age fe di, to wō youf nigin promis od iron. Ī walol are yogon promis od nē uris ye fen, promise od eig fiya wogō yen, are sain enei bunem ilauf ganan bun, an naa, bō, uyē saniya, gaa saniya, ifaya nē sain ado kusu fiya nē sain anidi ibodōf yen.

Paradis (Luk 23:43; 2 Korin 12:3; Revelsen 2:7)

Paradis nē gariya are ‘kabī meli bagai.’ Modoū meli bagai Iden, are gariya bun Negur Adam ado Eva an inenēdin anī nigin Paradis dedig. Anī ere, Nu Testamen bun, Paradis nē gariya, are saa tano nē gariya de tekelei, are modoū meli bagai an tamo kayau Jesus Kristus nigin momoi den anidi, dum idi gare douf bun, dilauf.

Pasa - Sifa Naa bun ulouf.

Pentikos – Sifa Naa bun ulouf.

Pris

Pris idi Israel tamo kayau nigin de fen, Negur bun sesewi fiya difenēdiyof nigin Negurem igrnēdin anidi. Jesus nē sain bun, idi Jerusalem Tempel bun sesewi fiya difenēdidig. Pris idi Aron nē ibor bun digirnēdidig (Aron bun ulouf), are Lewi nē ibor tar atun Aron nē ibor bun temeleid. (Lewi bun ulouf).

Pris mudur ī, pris idi atun odug bagai. Pris mudur ī, yar tekelei nē dogol ibodōf nigin digirnēdidig, age de fen, anī baban pris taka digirnēdig. Pris mudur im dogol Tempel nē modoū fateul bagai namen iledig, are yogon mosor ado tamo kayau neid mosor yaleleya nigin Negur bun sesewi fiya ifenēf nigin age fedig.

Pris atun pris odug dedig anidig dibodon. Pris odug idi are, pris mudur, pris ganan kulu pris mudur dibodon anidi ado, tamo yeneid adodo pris nē ibor bun temeleid anidi.

Profet

Profet are tamo taka ī, od Negur ī bun yaor fe irokenen anī wogō yedig. Ī Negur nigin ye fen, od tamo kayau bun wogō yedig.

Uruwa bun, Negur profet musei sur fedidin, are Samuel, Asaia ado Jeremaia age fediya. Idi bunem, Negur dum bun ereb wō youf anī nigineg yaor fen. Yar musei Jesus Kristus fau wōya sā mog, idi in isiya nigin, ereb ereb musei ī age fediyof nigin ado, ereb ī bun wō youf anī nigin diron. Idi, Jesus Kristus tenebur tamo kayau es fediyof nigin, fau baban kel isiya sā mog, ereb ereb musei teneub enei nē idikeleya naa bun wowā youf nigineg diron.

Rabi

Rabi are yana Juda idi tise odug bagai be idi atun uyu irouya anī bun difenēdig. Tamo aib ī kisi biya ado fen, yana adouf are, ī Rabi difiyēdig. Rabi yana taka are Raboni, anī nē gariya Rabi de tekelei.

Rahab (Hibru 11:31; Jems 2:25)

Kulu bagai, sain Israel tamo kayau, teneub Negur idi afenēdiyof yen anī bun dilauf nigin age difen, idi, tamo

kayau teneub anī bun difaren anidi dile fen, naig de idi wal difediyouf nigin kisi dalouf nigin kofo tamo sur difedin. Rahab naabur kayau taka bouwa na sur fedig, ī teneub anī bun ibodōdig. Sain Israel kofo tamo an disin, kayau ī, idi isenneīd fen, idi inokolnēdin, ere nigin, kayau ī, Israel tamo kayau teneub de anī dalouf anī Negur nē oroya ye fen, momoi yen. Anī nigin, sain Israel tamo kayau teneub anī nē tamo kayau wal difedin, idi Rahab to dukessin, anī ere, idi, taun anī bun tamo kayau tunī ganan didenkesin. Kayau Matyu 1:5 bun irok anī, kayau de tekelei be, are ī de Jesus nē tubuid tar taka.

Rahel (Matyu 2:18)

Rahel ī, Jakop ne kayau tar anidi taka, ī nigin Jakop wau fatuk bagai laa fedig. Rahel ī Josef ado Benjamin ado sineid, are Juda tamo kayau neid sineid tar ganan anī im ifaref.

Rebeka (Rom 9:10-13)

Abraham ne naal Isak ne kayau anī Rebeka. Ī, Esau ado Jakop, idi urom aina anidi neid sineid. Esau uyulil wō yen, anī ere, Jakop im anī Negurem ī uyulil wō youf nigin igirnen, age fe di, ī bunem Juda idi ibor wowā den. Esau ado Jakop bun ulouf.

Rom

Rom are kantri Itali dedig anī nē taun odug. Jesus tenebur ibodon sain anī bun, Rom nē tamo kayau teneub tunī musei kusī bunem lei difen. Idi Israel anīg wawal difeid fen, Israel tamo kayau anī ulum dirounēdin. Anī nigin, Israel tamo kayau, Rom idi to oroid fen, nedi teneub bun idi dalelnēdiyof nigin waud yenen. Rom nē king, are Sisa dedig ī, sain anī bun, teneub ganan atun king odug bagai ibodon.

Sabat Naa

Sabat naa are naa odug bagai. Jenesis nē Buk bun ditoton are eig yef, Negur naa sigis anidi bun teneub kare fen, agef fen, naa sewen bun ī si inon, ere nigin, in kabī are bure felen. Negur iron, tamo kayau de naa sigis anidi bun dogol kabī dalouf, age de fen, naa sewen bun idi de si dino fen, Negur yana dalesauf.

Juda idi Sabat naa nigin lo musei adon. Idi dirōdig, tamo kayau de naa anī bun ereb kabī taka to dalouf, age de fen, tamo kayau lo anī difodulouf are, idi fatuk bagai namedidig. Age fiya nigin, sain Jesus Sabat naa bun tamo taka dagi ado el fiyen ado, sain Jesus nē dō fiya tar Sabat naa bun kurukeis dāf nigin nonū difedin, idi anī nigin waud sanen. Idi diron, are idi kabī dalef den.

Sadusia

Sadusia are Juda idi atun yeneid adodo neid mala taka. Idi kisi difedig, are tamo kayau, lo Negur Moses ifenen anī ado Juda neid tobonunā tunī ganan, tutuk bagai dō difouf dedig. Idi Juda tamo neid mala taka Farisia gen (Faria bun ulouf). Anī ere, idi sain musei Farisia tamo geid luwa diroudig, ere nigin, Farisia idi momoi def are, tamo taka ī laaf fen, baban mata kel fā youf def, anī ere, Sadusia enei to momoi dedig.

Saion (Matyu 21:5; Jon 12:15; Rom 9:33, 11:26; 1 Pita 2:6)

Saion are arei mudu taka anī bun Jerusalem taun anī dinon anī nē yana. Tempel anī arei mudu anī bun ifaren, are modoū anī, taun ganan nē fa-teul bagai. Sain tunī, Saion yana are Jerusalem ganan nigin anī dirōdig. Sain tunī, Saion yana Jerusalem ilun ibodok anī nigin dirōdig, are saa tano yogo anī. Are modoū anī, Negur ibodok nē an anī nē uris. (Hibru 12:22, Revelesen 14:1)

Salafat

Kulu bagai, Israel tamo kayau gerere tuan diyon sain anī bun, Negur Moses salafat fire bagai taka inouf nigin irokenen. Ī salafat anī, gabar biya ado gaar gabar bunem naig fiya inouf nigin ī de tutuk bagai ī irokenen. Are an idi bar itenēya nē bokis, meein uruwo Negur anidi bun itāfiya ten itotodin ado, Negur nē safina tunī salafat anī namen dibodok.

Juda idi salafat enei bun Negur yana dalesedig, age dife fen, idi Negur bun an sesewi fediya difenēdidig, are age ifaref ile Solomon Tempel inon sain anī bunen.

Salfa (Revelesen 9:17)

Salfa are safina bailuya taka anī, yā bale ado el fe uu ye fen, sumeī total ado. Anī bunem, gan nē pauda dinodig.

Sam

Buk Psalm are Negur bun yana yale-seya seg nē buk. Dawid tamo kayau tunī geid seg eneidi ditoton, are idi naig de fen, Negur nigin waud laaf fen, ī bun yana dalesef anī dirōf nign.

Samaria

Samaria are teneub akor taka nē yana. Samaria tamo kayau idi Juda tamo kayau bagai sā, ere nigin, kulu bagai, idi kayau Juda sā anidi lei difedin. Anī nigin, Juda bagai anidim idi lai difedidig.

Samson (Hibru 11:32)

Kulu bagai, Samson ī Juda neid uyu iroudiya taka ibodon. Negurem ī bouwa buru nē total odug anī ifenen.

Samuel (Aposel 3:24, 13:20; Hibru 11:32)

Samuel ī profet odug taka. Im anī, Dawid Israel neid king ibodōf nigin moul mudur bun fi felen. Ī anī tamo kayau neid uyu irouya odug taka.

Sara (Rom 4:19, 9:9)

Sara ī Abraham ne kayau. Kayau ī yar musei dalin, anī ere, sain ī tubau bagai mog, ī Isak gō fen. Abraham bun ulouf.

Satan

Satan ī kaa sesen neid uyu irouya. Ī Negur nē kiwai, ī tamo kayau idegnēdi di, idi sane age difouf nigin age fedig. Ī tamo kayau Jesus Kristus nigin momoi def anidi, idi kulu ereb sane age difen anī nigin toku wedereid fokō fenēdi di, idi nedi mosor nigin Negur weder to tu kelen gen kisi difouf nigin age fedig. Satan ī anig ‘Devil’ oo ‘tenebur enei nē king’ dedig.

Sifa Naa

Sifa naa are naa tunī odudug anī bun, Juda idi yar ganan bun sigigi difedig. Sifa naa enidi bun, idi Negur nē biya fiya ado kulu Negur idi nigin ereb age fedin anī nigin kisi difedig. Sifa naa nē yana tunī are eig fiya:

Tempel Mata Negur Ifenēya Nē Sifa Naa (Jon 10:22)

Sifa naa enei bun, Juda idi, kulu bagai, tamo taka Judas Makabius dedig ī, Negur nē Tempel haiden idi amuyē dinon anī amuyē sā ino fen, tamo kayau an Negur yana dalesauf nigin Tempel dodok fen anī karī deledig. Ī enei age fen, ere nigin, urug tamo idi ado kiwai tamo anidim, Tempel bun dile fen, amuyē dinodin.

Juda idi sifa naa enei nigin age de dirōdig, ‘Lalan nē Sifa Naa’. Age fiya nigin, sain anī bun, Jesus iron, “Aya teneub enei nē Lalan.” (Jon 9:5)

Pasa Nē Sifa Naa (Matyu 26:2, 5, 17-19)

Pasa nē sifa naa dedig are Juda idi nigin, sifa naa odug bagai. ‘Pasa’ yana nē garia, are wawal fiya. Sifa naa enei bun, Juda idi, kulu bagai, Isip nē kafī fiya teneub bun tamal, naig de diyalelen anī karī deledig. Sain anī bun, Negur, Isip neid fō mugu mugu bun kesu monog matu idenkesidiyouf nigin in engel sur fen. Anī are, ī Juda neid fō mugu mugu bun idi sipsip naal taka dukeis fen, sipsip naal nē naud anī sukar nē tor bun ororo difediyof nigin irokenēdin. Age dife di, sain engel naud anī ile fen, ī fō anī wal fen, agef fen, an kesu taka to yukesin.

Anī nigin, Pasa nē sifa naa bun, Juda idi, fō mugu mugu bun, sipsip naal taka dukeis fen, weim sipsip naal dō don.

Bret Yis Sā Nē Sifa Naa

Bret yis sā nē sifa naa are, Pasa nē sifa naa de anī bun, Juda idi sigigi difedig. Sain Juda idi Isip teneub bun tamal diya dilelen, idi tari fiya nigin sain taka sak ile, idi bret fau to gē ye mog anī yā bun dinodig. Anī nigin, sifa naa enei bun, Juda idi, bret yis sā anī dō don.

Salafat Nē Sifa Naa (Jon 7:2-52)

Sifa naa enei bun, Juda idi kulī dedig, ere nigin, saaf kusu fiya anī mogo kisi felen. Idi salafat dinoid fen, uub tekelei sifa naa nigin an difaredig, age fe di, idi naab anī bun, nedi tubuid tar Negur idi teneub afenēdiyof yen anī fau yaleya sā mog, idi gerere tuan 40 yar diyo ken, salafat bun dibodon anī karī deledig.

Pentikos Nē Sifa Naa (Aposel 2:1,

20:16; 1 Korin 16:8)

Pentikos nē sifa naa anīg are Juda idi nigin sifa naa odug bagai. ‘Pentikos’ yana nē garia are fifti. Juda idi, Pasa naa wō ye naa fifti ilele di, sifa naa enei sigigi difedig.

Pentikos nē sifa naa bun, Juda idi wit kususu fiya nigin sigigi difedig. Juda idi, kulu bagai, Negur Sinai arei bun Juda idi nigin Lo anī Moses ifenen nigineg karī deledig. Gama, Pentikos are Kristen tamo kayau, naa enei bun Awa Uur Fateul uyulil tamo kayau Jesus Kristus bun momoi den anidi bun isin anī nigin karī deledig. (Aposel 2:1-4)

Sinai

Sinai are arei mudu taka nē yana, an Moses ibodon sain, Negur in itāfiya ī ifenen. Moses bun ulouf.

Sinamon (Revelesen 18:13)

Sinamon, are aa taka nem dinodig. Ī sumeī meli bagai fen, ī na yaleya nigin moni odug bagai. Tamo kayau moul sumeī meli bagai youf nigin, anī moul ado falei difedig, moul anī, tamo kayau mudureid bun fi difelediyouf nigin age difedig, are sain tunī tamo laa fen anī bouwa buneg inoya nigin age difedig.

Sipsip

Baibel nē sain bun, Juda idi sipsip kulatun fiya nē suma age difedig are eig fiya:

1. Sain anī bun, tamo tekelei sipsip musei kulatun fedig. Idi taun bun to difar genēdig, anī ere, tamo kayaum dubur idi guri difeid dirouledig, are modoū fisir musei biya ifaredif nē an sipsip idi dāf nigin dinenēdidig.
2. Tamo tunī sipsip idi kulatun fediya nigin dub anī bun sipsip geid weim difaredig. Tamo eneidi, sipsip nigin keleī bagai. Idi sipsip mugu mugu keleīdig.
3. Tamo sipsip kulatun fef, are de modoū taka ganan kau ifokeleya ado anī dodok fedig. Bō sain, idi sipsip ulum dirou fen, an dinenēdig, anī bunem, ereb takam idi to daū fediyouf. Tamo sipsip kulatun fedif, ī de an garaī bobog bun yenēdig. Sain tunī, bē tamo taka, sipsip taka bē yalouf

nigin kau gar yeis kutū yesiya nigin age fedig.

4. Juda idi, Negur bun sipsip sesewi fiya anī difnēdig. Negur nē sipsip naal bun ulouf.

Sisa

Sisa ī, are Rom tamo kayau neid king nē yana. Rom tamo kayau teneub ganan kusī bunem wawal difeid fen, uyu diroun. Sisa ī, idi ganan anī nē odug. Rom tamo kayau neid king ilun difaref ganan anī, are Sisa dedig.

Sodom (Matyu 10:15, 11:23-24; Luk 17:29; Revelesen 11:8)

Sodom are taun taka Lot ibo ibodon anī nē yana (Lot bun ulouf). Taun taka Gomora dedig anī Sodom taun non ifaren. Sodom ado Gomora taun neid tamo kayau idi ereb sesen musei age difen. Anī nigin, Negur, taun anidi, yā nem daū feledin.

Solomon (Matyu 1:6-7, 6:29, 12:42; Luk 11:31, 12:27; Aposel 7:47)

Solomon ī Dawid ne naal. Ī Israel tamo kayau neid king odug taka.

Sain taka bun, Negur imīya bun, Solomon bun isi fen, ere safina ege luwa anī ī ifenēf anī orof anī to fiyen. Solomon ī, in tamo kayau sā el fe ulum iroukenēdiyof nigin Negur kisi biya ī ifenēf nigin ī irokenen. Negur kisi biya odug Solomon ifenen, ī king ganan anidi bun kisi biya bagai anī wō yen. Negur Solomon safina odug musei bargaig anī ifenen, momoi, ī safina musei anī kisi feleya bagai.

Solomon im anī uyulil Negur nē Tempel inon. Tempel anim Negur nē salafat uruwa bun Juda idi Negur yana dalesedig anī nē modoū yalen. Tempel anī gai meli bagai.

Stoik Tamo Epikurian tamo bun ulouf

Sus (Aposel 14:12)

Sus are waitou odug Grik idi yana dalesedig anī nē yana. Sain tunī, tamo kayau ī anī Jupita dedig. In soosi tamo are Hermes dedig.

Tamo Naal

Kulu bagai, kel yaleya tamo anī Negurem yogon tamo kayau nedi mosor bun tamal kel gei fediyof nigin sur

fouf yen anī, profet taka Daniel dedig anī kel yaleya tamo anī nē yana agef irōdig. Anī nē gariya are Kristus de tekelei (Kristus bun ulouf). Jesus yogo nigin yana eneī agef irōdig. Sain Jesus yogo nigin aya Tamo Naal yef, are ī anī tamo taka Negurem sur fiyen ado, ī anī Negur bun tamal megeir yalen anī yef. Ī tamo bagai, are ī anīg Negur.

Wau Faleiya

Wau faleiya nē gariya bagai are:

1. Tamo taka ī sane age fen anī ilouf;

2. Ī irok, ī ereb sesen age fedig anī itor ken, ereb Negur orof anī age fouf;

3. Ī ereb sesen ī age fedig anī nē mosor nigin weder tu kalauf nigin Negur irokenek.

Yis (Matyu 13:33, 16:6, 12; 1 Korin 5:6-8; Galesia 5:9)

Yis are safina bret inoya nigin kabī difenēdig. Safina anim, bret gē youf nigin age fedig. Yis naalem dogol bret odug biya musei inoya nigin kabī difenēdig.